

Rigveda-Finder

To search for diacritics press ALT key, then type 0 + code on numerical keypad, e.g. to search for ā, press ALT key, keep it pressed, and enter 0192 on num pad.

192	193	194	195	197	198	199	200	201	202	203	204	205	206	207	217	239	252
ā	ī	ū	ṛ	ṝ	ḷ	ṅ	ñ	ṇ	ṭ	ḍ	ś	ṣ	ṃ	ḥ	ṁ	ī	ū

1. Mandala

- 1.001.01a agnim īde purohitam yajñasya devam ṛtvijam |
1.001.01c hotāraṃ ratnadhātamam ||
1.001.02a agniḥ pūrvebhir ṛṣibhir īdya nūtanair uta |
1.001.02c sa devāṃ eha vakṣati ||
1.001.03a agninā rayim aśnavat poṣam eva dive-dive |
1.001.03c yaśasaṃ vīravattamam ||
1.001.04a agne yaṃ yajñam adhvaraṃ viśvataḥ paribhūr asi |
1.001.04c sa id deveṣu gachati ||
1.001.05a agnir hotā kavikratuḥ satyaś citraśravastamaḥ |
1.001.05c devo devebhir ā gamat ||
1.001.06a yad aṅga dāśuṣe tvam agne bhadraṃ kariṣyasi |
1.001.06c tavet tat satyam aṅgiraḥ ||
1.001.07a upa tvāgne dive-dive doṣāvastar dhiyā vayam |
1.001.07c namo bharanta emasi ||
1.001.08a rājantam adhvarāṇāṃ gopām ṛtasya dīdivim |
1.001.08c vardhamānaṃ sve dame ||
1.001.09a sa naḥ piteva sūnave 'gne sūpāyano bhava |
1.001.09c sacasvā naḥ svastaye ||
- 1.002.01a vāyav ā yāhi darśateme somā aramkṛtāḥ |
1.002.01c teṣāṃ pāhi śrudhī havam ||
1.002.02a vāya ukthebhir jarante tvām achā jaritāraḥ |
1.002.02c sutasomā aharvidaḥ ||
1.002.03a vāyo tava prapṛcatī dhenā jigāti dāśuṣe |
1.002.03c urūcī somapītaye ||
1.002.04a indravāyū ime sutā upa prayobhir ā gatam |
1.002.04c indavo vām uśanti hi ||
1.002.05a vāyav indraś ca cetathaḥ sutānāṃ vājinīvasū |
1.002.05c tāv ā yātam upa dravat ||
1.002.06a vāyav indraś ca sunvata ā yātam upa niṣkṛtam |
1.002.06c makṣv itthā dhiyā narā ||
1.002.07a mitraṃ huve pūtakṣam varuṇam ca riśādasam |
1.002.07c dhiyaṃ ghṛtācīm sādhanā ||

1.002.08a ṛtena mitrāvaruṇāv ṛtāvṛdhāv ṛtasprśā |
1.002.08c kratum bṛhantam āśāthe ||
1.002.09a kavī no mitrāvaruṇā tuvijātā urukṣayā |
1.002.09c dakṣam dadhāte apasam ||

1.003.01a aśvinā yajvarīr iṣo dravatpāṇī śubhas patī |
1.003.01c purubhujā canasyatam ||
1.003.02a aśvinā purudaṃsasā narā śavīrayā dhiyā |
1.003.02c dhiṣṇyā vanataṃ giraḥ ||
1.003.03a dasrā yuvākavaḥ sutā nāsatyā vṛktabarhiṣaḥ |
1.003.03c ā yātaṃ rudravartanī ||
1.003.04a indrā yāhi citrabhāno sutā ime tvāyavaḥ |
1.003.04c aṇvībhis tanā pūtāsaḥ ||
1.003.05a indrā yāhi dhiyeṣito viprajūtaḥ sutāvataḥ |
1.003.05c upa brahmāṇi vāghataḥ ||
1.003.06a indrā yāhi tūtujāna upa brahmāṇi harivaḥ |
1.003.06c sute dadhiṣva naś canaḥ ||
1.003.07a omāsaś carṣaṇīdhṛto viśve devāsa ā gata |
1.003.07c dāśvāṃso dāśuṣaḥ sutam ||
1.003.08a viśve devāso apturaḥ sutam ā ganta tūrṇayaḥ |
1.003.08c usrā iva svasarāṇi ||
1.003.09a viśve devāso asridha ehimāyāso adruhaḥ |
1.003.09c medham juṣanta vahnayaḥ ||
1.003.10a pāvakā naḥ sarasvatī vājebhir vājinīvatī |
1.003.10c yajñam vaṣṭu dhiyāvasuḥ ||
1.003.11a codayitrī sūnṛtānām cetantī sumatinām |
1.003.11c yajñam dadhe sarasvatī ||
1.003.12a maho arṇaḥ sarasvatī pra cetayati ketunā |
1.003.12c dhiyo viśvā vi rājati ||

1.004.01a surūpakṛtṇum ūtaye sudughām iva goduhe |
1.004.01c juhūmasi dyavi-dyavi ||
1.004.02a upa naḥ savanā gahi somasya somapāḥ piba |
1.004.02c godā id revato madaḥ ||
1.004.03a athā te antamānām vidyāma sumatinām |
1.004.03c mā no ati khya ā gahi ||
1.004.04a parehi vīgram astrītam indram pṛchā vipaścitam |
1.004.04c yas te sakhibhya ā varam ||
1.004.05a uta bruvantu no nido nir anyataś cid ārata |
1.004.05c dadhānā indra id duvaḥ ||
1.004.06a uta naḥ subhagāṃ arir voceyur dasma kṛṣṭayaḥ |
1.004.06c syāmed indrasya śarmaṇi ||
1.004.07a em āsum āśave bhara yajñāśriyaṃ nṛmādanam |
1.004.07c patayan mandayatsakham ||
1.004.08a asya pītva śatakrato ghano vṛtrāṇām abhavaḥ |
1.004.08c prāvo vājeṣu vājinam ||
1.004.09a taṃ tvā vājeṣu vājinam vājayāmaḥ śatakrato |

1.004.09c dhanānām indra sātaye ||
1.004.10a yo rāyo 'vanir mahān supāraḥ sunvataḥ sakhā |
1.004.10c tasmā indrāya gāyata ||

1.005.01a ā tv etā ni ṣīdatendram abhi pra gāyata |
1.005.01c sakhāya stomavāhasaḥ ||
1.005.02a purūtām purūṇām īśānaṃ vāryāṇām |
1.005.02c indraṃ some sacā sute ||
1.005.03a sa ghā no yoga ā bhuvat sa rāye sa puraṃdhyām |
1.005.03c gamad vājebhir ā sa naḥ ||
1.005.04a yasya saṃsthe na vṛṇvate harī samatsu śatravaḥ |
1.005.04c tasmā indrāya gāyata ||
1.005.05a sutapāvne sutā ime śucayo yanti vītaye |
1.005.05c somāso dadhyāśiraḥ ||
1.005.06a tvam sutasya pītaye sadyo vṛddho ajāyathāḥ |
1.005.06c indra jyaiṣṭhyāya sukrato ||
1.005.07a ā tvā viśantv āśavaḥ somāsa indra girvaṇaḥ |
1.005.07c śaṃ te santu pracetase ||
1.005.08a tvam stomā avīvṛdhan tvām ukthā śatakrato |
1.005.08c tvam vardhantu no giraḥ ||
1.005.09a akṣitotiḥ saned imaṃ vājam indraḥ sahasriṇam |
1.005.09c yasmin viśvāni paumṣyā ||
1.005.10a mā no martā abhi druhan tanūnām indra girvaṇaḥ |
1.005.10c īśāno yavayā vadham ||

1.006.01a yuñjanti bradhnam aruṣaṃ carantam pari tasthuṣaḥ |
1.006.01c rocante rocanā divi ||
1.006.02a yuñjanty asya kāmyā harī vipakṣasā rathe |
1.006.02c śoṇā dhṛṣṇū nṛvāhasā ||
1.006.03a ketuṃ kṛṇvann aketave peśo maryā apeśase |
1.006.03c sam uṣadbhir ajāyathāḥ ||
1.006.04a ād aha svadhām anu punar garbhatvam erire |
1.006.04c dadhānā nāma yajñiyam ||
1.006.05a vīḍu cid ārujatnubhir guhā cid indra vahnibhiḥ |
1.006.05c avinda usriyā anu ||
1.006.06a devayanto yathā matim achā vidadvasuṃ giraḥ |
1.006.06c mahām anūṣata śrutam ||
1.006.07a indreṇa saṃ hi dṛkṣase saṃjagmāno abibhyuṣā |
1.006.07c mandū samānavarcasā ||
1.006.08a anavadyair abhidubhir makhaḥ sahasvad arcati |
1.006.08c gaṇair indrasya kāmyaiḥ ||
1.006.09a ataḥ pariḥmann ā gahi divo vā rocanād adhi |
1.006.09c sam asminn ṛñjate giraḥ ||
1.006.10a ito vā sātīm īmahe divo vā pārthivād adhi |
1.006.10c indram maho vā rajasaḥ ||

1.007.01a indram id gāthino bṛhad indram arkebhīr arkiṇaḥ |
 1.007.01c indraṃ vāṇīr anūṣata ||
 1.007.02a indra id dharyoḥ sacā sammiśla ā vacoyujā |
 1.007.02c indro vajrī hiraṇyayaḥ ||
 1.007.03a indro dīrghāya cakṣasa ā sūryaṃ rohayad divi |
 1.007.03c vi gobhir adrim airayat ||
 1.007.04a indra vājeṣu no 'va sahasrapradhaneṣu ca |
 1.007.04c ugra ugrābhīr ūtibhiḥ ||
 1.007.05a indraṃ vayam mahādhana indram arbhe havāmahe |
 1.007.05c yujaṃ vṛtreṣu vajriṇam ||
 1.007.06a sa no vṛṣann amuṃ caruṃ satrādāvann apā vṛdhi |
 1.007.06c asmabhyam apratiṣkutaḥ ||
 1.007.07a tuñje-tuñje ya uttare stomā indrasya vajriṇaḥ |
 1.007.07c na vindhe asya suṣṭutim ||
 1.007.08a vṛṣā yūtheva vaṃsagaḥ kṛṣṭīr iyarty ojasā |
 1.007.08c īśāno apratiṣkutaḥ ||
 1.007.09a ya ekaś carṣaṇīnāṃ vasūnām irajyati |
 1.007.09c indraḥ pañca kṣitīnām ||
 1.007.10a indraṃ vo viśvatas pari havāmahe janebhyaḥ |
 1.007.10c asmākam astu kevalaḥ ||

1.008.01a endra sānasim rayim sajītvānaṃ sadāsaham |
 1.008.01c varṣiṣṭham ūtaye bhara ||
 1.008.02a ni yena muṣṭihatya yā ni vṛtrā ruṇadhāmahai |
 1.008.02c tvotāso ny arvatā ||
 1.008.03a indra tvotāsa ā vayaṃ vajraṃ ghanā dadīmahī |
 1.008.03c jayema saṃ yudhi sṛḍhaḥ ||
 1.008.04a vayaṃ sūrebhir astrībhīr indra tvayā yujā vayam |
 1.008.04c sāsahyāma pṛtanyataḥ ||
 1.008.05a mahāṃ indraḥ paraś ca nu mahitvam astu vajriṇe |
 1.008.05c dyaur na prathinā śavaḥ ||
 1.008.06a samohe vā ya āsata naras tokasya sanitau |
 1.008.06c viprāso vā dhiyāyavaḥ ||
 1.008.07a yaḥ kukṣiḥ somapātamaḥ samudra iva pivate |
 1.008.07c urvīr āpo na kākudaḥ ||
 1.008.08a evā hy asya sūnṛtā virapśī gomati mahī |
 1.008.08c pakvā śākhā na dāsūṣe ||
 1.008.09a evā hi te vibhūtaya ūtaya indra māvate |
 1.008.09c sadyaś cit santi dāsūṣe ||
 1.008.10a evā hy asya kāmyā stoma ukthaṃ ca śamsyā |
 1.008.10c indrāya somapītaye ||

1.009.01a indrehi matsy andhaso viśvebhiḥ somaparvabhiḥ |
 1.009.01c mahāṃ abhiṣṭīr ojasā ||
 1.009.02a em enaṃ sṛjatā sute mandim indrāya mandine |
 1.009.02c cakriṃ viśvāni cakraye ||
 1.009.03a matsvā suśipra mandibhi stomebhīr viśvacarṣaṇe |

1.009.03c sacaiṣu savaneṣv ā ||
 1.009.04a asṛgram indra te giraḥ prati tvām ud ahāsata |
 1.009.04c ajoṣā vṛṣabham patim ||
 1.009.05a saṃ codaya citram arvāg rādha indra vareṇyam |
 1.009.05c asad it te vibhu prabhu ||
 1.009.06a asmān su tatra codayendra rāye rabhasvataḥ |
 1.009.06c tuvidyumna yaśasvataḥ ||
 1.009.07a saṃ gomad indra vājavad asme pṛthu śravo bṛhat |
 1.009.07c viśvāyur dhehy akṣitam ||
 1.009.08a asme dhehi śravo bṛhad dyumnaṃ sahasrasātamam |
 1.009.08c indra tā rathinīr iṣaḥ ||
 1.009.09a vasor indraṃ vasupatiṃ gīrbhir gṛṇanta ṛgmiyam |
 1.009.09c homa gantāram ūtaye ||
 1.009.10a sute-sute nyokase bṛhad bṛhata ed ariḥ |
 1.009.10c indrāya sūṣam arcati ||

1.010.01a gāyanti tvā gāyatriṇo 'rcanty arkam arkiṇaḥ |
 1.010.01c brahmāṇas tvā śatakṛata ud vaṃśam iva yemire ||
 1.010.02a yat sānoḥ sānum āruhad bhūry aspaṣṭa kartvam |
 1.010.02c tad indro arthaṃ cetati yūthena vṛṣṇir ejati ||
 1.010.03a yukṣvā hi keśinā harī vṛṣaṇā kakṣyaprā |
 1.010.03c athā na indra somapā girām upaśrutim cara ||
 1.010.04a ehi stomāṃ abhi svarābhi gṛṇīhy ā ruva |
 1.010.04c brahma ca no vaso sacendra yajñam ca vardhaya ||
 1.010.05a uktham indrāya śamsyaṃ vardhanam puruniṣṣidhe |
 1.010.05c śakro yathā suteṣu ṇo rāraṇat sakhyeṣu ca ||
 1.010.06a tam it sakhitva īmahe taṃ rāye taṃ suvīrye |
 1.010.06c sa śakra uta naḥ śakad indro vasu dayamānaḥ ||
 1.010.07a suvivṛtaṃ sunirajam indra tvādātam id yaśaḥ |
 1.010.07c gavām apa vrajaṃ vṛdhi kṛṇuṣva rādho adriṇaḥ ||
 1.010.08a nahi tvā rodasī ubhe ṛghāyamāṇam invataḥ |
 1.010.08c jeṣaḥ svarvatīr apaḥ saṃ gā asmabhyaṃ dhūnuhi ||
 1.010.09a āśrutkarṇa śrudhī havaṃ nū cid dadhiṣva me giraḥ |
 1.010.09c indra stomam imam mama kṛṣvā yujaś cid antaram ||
 1.010.10a vidmā hi tvā vṛṣantamaṃ vājeṣu havanaśrutam |
 1.010.10c vṛṣantamasya hūmaha ūtim sahasrasātamām ||
 1.010.11a ā tū na indra kauśika mandasānaḥ sutam piba |
 1.010.11c navyam āyuh pra sū tira kṛdhī sahasrasām ṛṣim ||
 1.010.12a pari tvā girvaṇo gira imā bhavantu viśvataḥ |
 1.010.12c vṛddhāyum anu vṛddhāyo juṣṭā bhavantu juṣṭayaḥ ||

1.011.01a indraṃ viśvā avivṛdhan samudravycasam giraḥ |
 1.011.01c rathītamam rathinām vājānām satpatim patim ||
 1.011.02a sakhye ta indra vājino mā bhema śavasas pate |
 1.011.02c tvām abhi pra ṇonumo jetāram aparājitam ||
 1.011.03a pūrvīr indrasya rātayo na vi dasyantū ūtayaḥ |
 1.011.03c yadī vājasya gomata stotr̥bhyo maṃhate magham ||

1.011.04a purām bhindur yuvā kavir amitaujā ajāyata |
 1.011.04c indro viśvasya karmaṇo dhartā vajrī puruṣtutaḥ ||
 1.011.05a tvam valasya gomato 'pāvar adrivo bilam |
 1.011.05c tvām devā abibhyuṣas tujyamānāsa āviṣuḥ ||
 1.011.06a tavāhaṃ śūra rātibhiḥ praty āyaṃ sindhum āvadan |
 1.011.06c upātiṣṭhanta girvaṇo viduṣ ṭe tasya kāravaḥ ||
 1.011.07a mājābhira indra māyinaṃ tvam śuṣṇam avātiraḥ |
 1.011.07c viduṣ ṭe tasya medhirās teṣāṃ śravāṃsy ut tira ||
 1.011.08a indram īśānam ojasābhi stomā anūṣata |
 1.011.08c sahasraṃ yasya rātaya uta vā santi bhūyasīḥ ||

1.012.01a agniṃ dūtaṃ vṛṇīmahe hotāraṃ viśvavedasam |
 1.012.01c asya yajñasya sukratum ||
 1.012.02a agniṃ-agniṃ havīmabhiḥ sadā havanta viśpatim |
 1.012.02c havyaavāham purupriyam ||
 1.012.03a agne devāṃ ihā vaha jajñāno vṛktabarhiṣe |
 1.012.03c asi hotā na iḍyaḥ ||
 1.012.04a tāṃ uśato vi bodhaya yad agne yāsi dūtyam |
 1.012.04c devair ā satsi barhiṣi ||
 1.012.05a gṛtāhavana dīdivaḥ prati śma riṣato daha |
 1.012.05c agne tvam rakṣasvinaḥ ||
 1.012.06a agniṃ-agniḥ sam idhyate kavir gṛhapatir yuvā |
 1.012.06c havyaavāḍ juhvāsyaḥ ||
 1.012.07a kavim agniṃ upa stuhi satyadharmāṇam adhvare |
 1.012.07c devam amīvacātanam ||
 1.012.08a yas tvām agne haviṣpatir dūtaṃ deva saparyati |
 1.012.08c tasya sma prāvītā bhava ||
 1.012.09a yo agniṃ devavītaye haviṣmāṃ āvivāsati |
 1.012.09c tasmai pāvaka mṛḍaya ||
 1.012.10a sa naḥ pāvaka dīdivo 'gne devāṃ ihā vaha |
 1.012.10c upa yajñam haviś ca naḥ ||
 1.012.11a sa na stavāna ā bhara gāyatreṇa navīyasā |
 1.012.11c rayiṃ vīravatīm iṣam ||
 1.012.12a agne śukreṇa śociṣā viśvābhira devahūtibhiḥ |
 1.012.12c imaṃ stomaṃ juṣasva naḥ ||

1.013.01a susamiddho na ā vaha devāṃ agne haviṣmate |
 1.013.01c hotaḥ pāvaka yakṣi ca ||
 1.013.02a madhumantaṃ tanūnapād yajñam deveṣu naḥ kave |
 1.013.02c adyā kṛṇuhi vītaye ||
 1.013.03a narāśamsam iha priyam asmin yajña upa hvaye |
 1.013.03c madhujihvam haviṣkṛtam ||
 1.013.04a agne sukhatame rathe devāṃ iḍita ā vaha |
 1.013.04c asi hotā manurhitaḥ ||
 1.013.05a strīṇita barhir ānuṣag gṛtapṛṣṭham manīṣiṇaḥ |
 1.013.05c yatrāmṛtasya cakṣaṇam ||
 1.013.06a vi śrayantām ṛtāvṛdho dvāro devīr asaścataḥ |

1.013.06c adyā nūnaṃ ca yaṣṭave ||
1.013.07a naktoṣāsā supeśasāsmin yajña upa hvaye |
1.013.07c idaṃ no barhir āsade ||
1.013.08a tā sujihvā upa hvaye hotārā daivyā kavī |
1.013.08c yajñaṃ no yakṣatām imam ||
1.013.09a idā sarasvatī mahī tisro devīr mayobhavaḥ |
1.013.09c barhiḥ sīdantv asridhaḥ ||
1.013.10a iha tvaṣṭāram agriyaṃ viśvarūpam upa hvaye |
1.013.10c asmākam astu kevalaḥ ||
1.013.11a ava sṛjā vanaspate deva devebhyo haviḥ |
1.013.11c pra dātur astu cetanam ||
1.013.12a svāhā yajñaṃ kṛṇotanendrāya yajvano gṛhe |
1.013.12c tatra devāṃ upa hvaye ||

1.014.01a aibhir agne duvo giro viśvebhiḥ somapītaye |
1.014.01c devebhir yāhi yakṣi ca ||
1.014.02a ā tvā kaṇvā ahūṣata gṛṇanti vipra te dhiyaḥ |
1.014.02c devebhir agna ā gahi ||
1.014.03a indravāyū bṛhaspatim mitrāgnim pūṣaṇam bhagam |
1.014.03c ādityān mārutaṃ gaṇam ||
1.014.04a pra vo bhriyanta indavo matsarā mādayiṣṇavaḥ |
1.014.04c drapsā madhvaś camūśadaḥ ||
1.014.05a idate tvām avasyavaḥ kaṇvāso vṛktabarhiṣaḥ |
1.014.05c haviṣmanto araṃkṛtaḥ ||
1.014.06a ghṛtapṛṣṭhā manoyujo ye tvā vahanti vahnayaḥ |
1.014.06c ā devān somapītaye ||
1.014.07a tān yajatrāṃ ṛtāvṛdho 'gne patnīvatas kṛdhi |
1.014.07c madhvaḥ sujihva pāyaya ||
1.014.08a ye yajatrā ya idyās te te pibantu jihvayā |
1.014.08c madhor agne vaṣatḥkṛti ||
1.014.09a ākīm sūryasya rocanād viśvān devāṃ uṣarbudhaḥ |
1.014.09c vipro hotaha vakṣati ||
1.014.10a viśvebhiḥ somyam madhv agna indreṇa vāyunā |
1.014.10c pibā mitrasya dhāmabhiḥ ||
1.014.11a tvaṃ hotā manurhito 'gne yajñeṣu sīdasi |
1.014.11c semaṃ no adhvaraṃ yaja ||
1.014.12a yukṣvā hy aruṣī rathe harito deva rohitaḥ |
1.014.12c tābhir devāṃ ihā vaha ||

1.015.01a indra somam piba ṛtunā tvā viśantv indavaḥ |
1.015.01c matsarāsas tadokasaḥ ||
1.015.02a marutaḥ pibata ṛtunā potṛād yajñaṃ punītana |
1.015.02c yūyaṃ hi ṣṭhā sudānavaḥ ||
1.015.03a abhi yajñaṃ gṛṇihi no gnāvo neṣṭaḥ piba ṛtunā |
1.015.03c tvaṃ hi ratnadhā asi ||
1.015.04a agne devāṃ ihā vaha sādāyā yoniṣu triṣu |
1.015.04c pari bhūṣa piba ṛtunā ||

1.015.05a brāhmaṇād indra rādhasaḥ pibā somam ṛtūmr̥ anu |
 1.015.05c taved dhi sakhyam astr̥tam ||
 1.015.06a yuvaṃ dakṣaṃ dhṛtavrata mitrāvaruṇa dūḍabham |
 1.015.06c ṛtunā yajñam āśāthe ||
 1.015.07a draviṇodā draviṇaso grāvahastāso adhvare |
 1.015.07c yajñeṣu devam īdate ||
 1.015.08a draviṇodā dadātu no vasūni yāni śṛṇvire |
 1.015.08c deveṣu tā vanāmahe ||
 1.015.09a draviṇodāḥ pipīṣati juhota pra ca tiṣṭhata |
 1.015.09c neṣṭrād ṛtubhir iṣyata ||
 1.015.10a yat tvā turiyam ṛtubhir draviṇodo yajāmahe |
 1.015.10c adha smā no dadir bhava ||
 1.015.11a aśvinā pibatam madhu didyagnī śucivratā |
 1.015.11c ṛtunā yajñavāhasā ||
 1.015.12a gārhapatyena santya ṛtunā yajñanīr asi |
 1.015.12c devān devayate yaja ||

1.016.01a ā tvā vahantu harayo vṛṣaṇaṃ somapītaye |
 1.016.01c indra tvā sūracakṣasaḥ ||
 1.016.02a imā dhānā ghṛtasnuvo harī ihopa vakṣataḥ |
 1.016.02c indraṃ sukhatame rathe ||
 1.016.03a indram prātar havāmaha indram prayaty adhvare |
 1.016.03c indraṃ somasya pītaye ||
 1.016.04a upa naḥ sutam ā gahi haribhir indra keśibhiḥ |
 1.016.04c sute hi tvā havāmahe ||
 1.016.05a semaṃ na stomam ā gahy upedaṃ savanaṃ sutam |
 1.016.05c gauro na tṛṣitaḥ piba ||
 1.016.06a ime somāsa indavaḥ sutāso adhi barhiṣi |
 1.016.06c tāṃ indra sahase piba ||
 1.016.07a ayaṃ te stomo agriyo hṛdispṛg astu śaṃtamaḥ |
 1.016.07c athā somaṃ sutam piba ||
 1.016.08a viśvam it savanaṃ sutam indro madāya gachati |
 1.016.08c vṛtrahā somapītaye ||
 1.016.09a semaṃ naḥ kāmam ā pṛṇa gobhir aśvaiḥ śatakrate |
 1.016.09c stavāma tvā svādhyāḥ ||

1.017.01a indrāvaruṇayor ahaṃ samrājor ava ā vṛṇe |
 1.017.01c tā no mṛḍāta īdṛśe ||
 1.017.02a gantārā hi stho 'vase havaṃ viprasya māvataḥ |
 1.017.02c dhartārā carṣaṇinām ||
 1.017.03a anukāmam tarpayethām indrāvaruṇa rāya ā |
 1.017.03c tā vām nediṣṭham īmahe ||
 1.017.04a yuvāku hi śacīnām yuvāku sumatinām |
 1.017.04c bhūyāma vājadāvnām ||
 1.017.05a indraḥ sahasradāvnām varuṇaḥ śamsyānām |
 1.017.05c kratuḥ bhavaty ukthyaḥ ||
 1.017.06a tayor id avasā vayaṃ sanema ni ca dhīmahi |

- 1.017.06c syād uta prarecanam ||
1.017.07a indrāvaruṇa vām ahaṃ huve citrāya rādhasē |
1.017.07c asmān su jigyuṣas kṛtam ||
1.017.08a indrāvaruṇa nū nu vām siṣāsantīṣu dhīṣv ā |
1.017.08c asmabhyaṃ śarma yachatam ||
1.017.09a pra vām aśnotu suṣṭutir indrāvaruṇa yām huve |
1.017.09c yām ṛdhāthe sadhastutim ||
- 1.018.01a somānaṃ svarānaṃ kṛṇuhi brahmaṇas pate |
1.018.01c kakṣivantaṃ ya auśijaḥ ||
1.018.02a yo revān yo amīvahā vasuvit puṣṭivardhanaḥ |
1.018.02c sa naḥ siṣaktu yas turaḥ ||
1.018.03a mā naḥ śaṃso araruṣo dhūrṭiḥ praṇaṅ martyasya |
1.018.03c rakṣā ṇo brahmaṇas pate ||
1.018.04a sa ghā vīro na riṣyati yam indro brahmaṇas patiḥ |
1.018.04c somo hinoti martyam ||
1.018.05a tvam tam brahmaṇas pate soma indras ca martyam |
1.018.05c dakṣiṇā pātv aṃhasaḥ ||
1.018.06a sadasas patim adbhutam priyam indrasya kāmyam |
1.018.06c sanim medhām ayāsiṣam ||
1.018.07a yasmād ṛte na sidhyati yajño vipaścitas cana |
1.018.07c sa dhīnām yogam invati ||
1.018.08a ād ṛdhnoti haviṣkṛtim prāñcaṃ kṛṇoty adhvaram |
1.018.08c hotrā deveṣu gachati ||
1.018.09a narāśaṃsaṃ sudhṛṣṭamam apaśyaṃ saprathastamam |
1.018.09c divo na sadmamakhasam ||
- 1.019.01a prati tyam cārum adhvaram gopīthāya pra hūyase |
1.019.01c marudbhir agna ā gahi ||
1.019.02a nahi devo na martyo mahas tava kratum paraḥ |
1.019.02c marudbhir agna ā gahi ||
1.019.03a ye maho rajaso vidur viśve devāso adruhaḥ |
1.019.03c marudbhir agna ā gahi ||
1.019.04a ya ugrā arkam ānṛcur anādhṛṣṭāsa ojasā |
1.019.04c marudbhir agna ā gahi ||
1.019.05a ye śubhrā ghoravarpasaḥ suksatrāso riśādasaḥ |
1.019.05c marudbhir agna ā gahi ||
1.019.06a ye nākasyādhi rocane divi devāsa āsate |
1.019.06c marudbhir agna ā gahi ||
1.019.07a ya iṅkhayanti parvatān tiraḥ samudram arṇavam |
1.019.07c marudbhir agna ā gahi ||
1.019.08a ā ye tanvanti raśmibhis tiraḥ samudram ojasā |
1.019.08c marudbhir agna ā gahi ||
1.019.09a abhi tvā pūrvapītaye sṛjāmi somyam madhu |
1.019.09c marudbhir agna ā gahi ||

1.020.01a ayaṃ devāya janmane stomo viprebhir āsayā |
 1.020.01c akāri ratnadhātamaḥ ||
 1.020.02a ya indrāya vacoyujā tatakṣur manasā harī |
 1.020.02c śamībhir yajñam āśata ||
 1.020.03a takṣan nāsatyābhyām parijmānaṃ sukhaṃ ratham |
 1.020.03c takṣan dhenuṃ sabardughām ||
 1.020.04a yuvānā pitarā punaḥ satyamantrā ṛjūyavaḥ |
 1.020.04c ṛbhavo viṣṭy akrata ||
 1.020.05a saṃ vo madāso agmatendreṇa ca marutvatā |
 1.020.05c ādityebhiś ca rājabhiḥ ||
 1.020.06a uta tyaṃ camasaṃ navam tvaṣtur devasya niṣkṛtam |
 1.020.06c akarta caturaḥ punaḥ ||
 1.020.07a te no ratnāni dhattana trir ā sāptāni sunvate |
 1.020.07c ekam-ekam suśastibhiḥ ||
 1.020.08a adhārayanta vahnayo 'bhajanta sukṛtyayā |
 1.020.08c bhāgaṃ deveṣu yajñiyam ||

1.021.01a ihendrāgnī upa hvaye tayor it stomam uśmasi |
 1.021.01c tā somaṃ somapātāmā ||
 1.021.02a tā yajñeṣu pra śaṃsatendrāgnī śumbhatā naraḥ |
 1.021.02c tā gāyatreṣu gāyata ||
 1.021.03a tā mitrasya praśastaya indrāgnī tā havāmahe |
 1.021.03c somapā somapītaye ||
 1.021.04a ugrā santā havāmaha upedaṃ savanaṃ sutam |
 1.021.04c indrāgnī eha gachatām ||
 1.021.05a tā mahāntā sadaspatī indrāgnī rakṣa ubjatam |
 1.021.05c aprajāḥ santv atriṇaḥ ||
 1.021.06a tena satyena jāgrtam adhi pracetune pade |
 1.021.06c indrāgnī śarma yachatam ||

1.022.01a prātaryujā vi bodhayāśvināv eha gachatām |
 1.022.01c asya somasya pītaye ||
 1.022.02a yā surathā rathitamobhā devā diviṣṛṣā |
 1.022.02c aśvinā tā havāmahe ||
 1.022.03a yā vām kaśā madhumaty aśvinā sūnṛtāvati |
 1.022.03c tayā yajñam mimikṣatam ||
 1.022.04a nahi vām asti dūrake yatrā rathena gachathaḥ |
 1.022.04c aśvinā somino gṛham ||
 1.022.05a hiraṇyapāṇim ūtaye savitāram upa hvaye |
 1.022.05c sa cettā devatā padam ||
 1.022.06a apāṃ napātam avase savitāram upa stuhi |
 1.022.06c tasya vratāny uśmasi ||
 1.022.07a vibhaktāraṃ havāmahe vasoś citrasya rādhasaḥ |
 1.022.07c savitāraṃ nṛcakṣasam ||
 1.022.08a sakhāya ā ni śidata savitā stomyo nu naḥ |
 1.022.08c dātā rādhamāsi śumbhati ||
 1.022.09a agne patnīr ihā vaha devānām uśatīr upa |

1.022.09c tvaṣṭāraṃ somapīṭaye ||
 1.022.10a ā gnā agna ihāvase hotrāṃ yaviṣṭha bhāratim |
 1.022.10c varūtrīm dhiṣaṇāṃ vaha ||
 1.022.11a abhi no devīr avasā mahah śarmanā nṛpatnīḥ |
 1.022.11c achinnapatrāḥ sacantām ||
 1.022.12a ihendrāṇim upa hvaye varuṇāṇim svastaye |
 1.022.12c agnāyīm somapīṭaye ||
 1.022.13a mahī dyauḥ pṛthivī ca na imam yajñam mimikṣatām |
 1.022.13c pipṛtām no bharīmabhiḥ ||
 1.022.14a tayor id ghṛtavat payo viprā rihanti dhītibhiḥ |
 1.022.14c gandharvasya dhruve pade ||
 1.022.15a syonā pṛthivi bhavānṛkṣarā niveśanī |
 1.022.15c yachā naḥ śarma saprathaḥ ||
 1.022.16a ato devā avantu no yato viṣṇur vicakrame |
 1.022.16c pṛthivyāḥ sapta dhāmabhiḥ ||
 1.022.17a idam viṣṇur vi cakrame tredhā ni dadhe padam |
 1.022.17c samūḍham asya pāṃsure ||
 1.022.18a trīṇi padā vi cakrame viṣṇur gopā adābhyaḥ |
 1.022.18c ato dharmāṇi dhārayan ||
 1.022.19a viṣṇoḥ karmāṇi paśyata yato vratāni paspaśe |
 1.022.19c indrasya yujyaḥ sakhā ||
 1.022.20a tad viṣṇoḥ paramam padaṃ sadā paśyanti sūrayaḥ |
 1.022.20c divīva cakṣur ātatam ||
 1.022.21a tad viprāso vipanyavo jāgṛvāṃsaḥ sam indhate |
 1.022.21c viṣṇor yat paramam padaṃ ||

1.023.01a tivrāḥ somāsa ā gahy āśīrvantaḥ sutā ime |
 1.023.01c vāyo tān prasthitān piba ||
 1.023.02a ubhā devā diviṣṛṣendravāyū havāmahe |
 1.023.02c asya somasya pīṭaye ||
 1.023.03a indravāyū manojuvā viprā havanta ūtaye |
 1.023.03c sahasrākṣā dhiyas patī ||
 1.023.04a mitraṃ vayam havāmahe varuṇam somapīṭaye |
 1.023.04c jajñānā pūtakṣasā ||
 1.023.05a ṛtena yāv ṛtāvṛdhāv ṛtasya jyotiṣas patī |
 1.023.05c tā mitrāvaruṇā huve ||
 1.023.06a varuṇaḥ prāvitā bhuvan mitro viśvābhir ūtibhiḥ |
 1.023.06c karatām naḥ surādhasaḥ ||
 1.023.07a marutvantaṃ havāmaha indram ā somapīṭaye |
 1.023.07c sajūr gaṇena tṛmpatu ||
 1.023.08a indrajyeṣṭhā marudgaṇā devāsaḥ pūṣarātayaḥ |
 1.023.08c viśve mama śrutā havam ||
 1.023.09a hata vṛtraṃ sudānava indreṇa sahasā yujā |
 1.023.09c mā no duḥśaṃsa īsata ||
 1.023.10a viśvān devān havāmahe marutaḥ somapīṭaye |
 1.023.10c ugrā hi pṛṣnimātaraḥ ||
 1.023.11a jayatām iva tanyatur marutām eti dhṛṣṇuyā |
 1.023.11c yac chubham yāthanā naraḥ ||

- 1.023.12a haskārād vidyutas pary ato jātā avantu naḥ |
1.023.12c maruto mṛḍayantu naḥ ||
1.023.13a ā pūṣaṅ citrabarhiṣam āghṛṇe dharuṇam divaḥ |
1.023.13c ājā naṣṭam yathā paśum ||
1.023.14a pūṣā rājānam āghṛṇir apagūḍham guhā hitam |
1.023.14c avindac citrabarhiṣam ||
1.023.15a uto sa mahyam indubhiḥ ṣaḍ yuktāṃ anuseṣidhat |
1.023.15c gobhir yavam na carikṣat ||
1.023.16a ambayo yanty adhvabhir jāmayo adhvariṇyatām |
1.023.16c pṛñcatir madhunā payaḥ ||
1.023.17a amūr yā upa sūrye yābhir vā sūryaḥ saha |
1.023.17c tā no hinvantv adhvaram ||
1.023.18a apo devir upa hvaye yatra gāvaḥ pibanti naḥ |
1.023.18c sindhubhyaḥ kartvam haviḥ ||
1.023.19a apsv antar amṛtam apsu bheṣajam apām uta praśastaye |
1.023.19c devā bhavata vājinaḥ ||
1.023.20a apsu me somo abravīd antar viśvāni bheṣajā |
1.023.20c agniṃ ca viśvaśambhuvam āpaś ca viśvabheṣajīḥ ||
1.023.21a āpaḥ pṛñita bheṣajam varūtham tanve mama |
1.023.21c jyok ca sūryam ḍṛṣe ||
1.023.22a idam āpaḥ pra vahata yat kiṃ ca duritam mayi |
1.023.22c yad vāham abhidudroha yad vā śepa utānṛtam ||
1.023.23a āpo adyānv acāriṣam rasena sam agasmahi |
1.023.23c payasvān agna ā gahi tam mā sam sṛja varcasā ||
1.023.24a sam māgne varcasā sṛja sam prajayā sam āyuṣā |
1.023.24c vidyur me asya devā indro vidyāt saha ṛṣibhiḥ ||
- 1.024.01a kasya nūnam katamasyāmṛtānām manāmahe cāru devasya nāma |
1.024.01c ko no mahyā aditaye punar dāt pitaram ca ḍṛṣeyam mātaram ca ||
1.024.02a agner vayam prathamasyāmṛtānām manāmahe cāru devasya nāma |
1.024.02c sa no mahyā aditaye punar dāt pitaram ca ḍṛṣeyam mātaram ca ||
1.024.03a abhi tvā deva savitar isānam vāryānām |
1.024.03c sadāvan bhāgam imahe ||
1.024.04a yaś cid dhi ta itthā bhagaḥ śaśamānaḥ purā nidaḥ |
1.024.04c adveṣo hastayor dadhe ||
1.024.05a bhagabhaktasya te vayam ud aśema tavāvasā |
1.024.05c mūrdhānam rāya ārabhe ||
1.024.06a nahi te kṣatram na saho na manyum vayas canāmī patayanta āpuḥ |
1.024.06c nemā āpo animiṣam carantir na ye vātasya praminanty abhvam ||
1.024.07a abudhne rājā varuṇo vanasyordhvam stūpaṃ dadate pūtakṣaḥ |
1.024.07c nīcinā sthur upari budhna eṣām asme antar nihitāḥ ketavaḥ syuḥ ||
1.024.08a urum hi rājā varuṇaś cakāra sūryāya panthām anvetavā u |
1.024.08c apade pādā pratidhātave 'kar utāpavaktā hṛdayāvidhaś cit ||
1.024.09a śatam te rājan bhiṣajaḥ sahasram urvī gabhirā sumatiṣ ṭe astu |
1.024.09c bādhasva dūre nirṛtim parācaiḥ kṛtam cid enaḥ pra mumugdhy asmat ||
1.024.10a amī ya ṛkṣā nihitāsa uccā naktam dadṛṣre kuha cid diveyuḥ |
1.024.10c adabdhāni varuṇasya vratāni vicākaśac candramā naktam eti ||
1.024.11a tat tvā yāmi brahmaṇā vandamānas tad ā śāste yajamāno havirbhiḥ |

1.024.11c aheḍamāno varuṇeha bodhy uruśaṃsa mā na āyuh pra moṣiḥ ||
 1.024.12a tad in naktam tad divā mahyam āhus tad ayam keto hṛda ā vi caṣṭe |
 1.024.12c śunaḥśepo yam ahvad gṛbhītaḥ so asmān rājā varuṇo mumoktu ||
 1.024.13a śunaḥśepo hy ahvad gṛbhītas triṣv ādityam drupadeṣu baddhaḥ |
 1.024.13c avainam rājā varuṇaḥ sasṛjyād vidvāṃ adabdho vi mumoktu pāsān ||
 1.024.14a ava te heḍo varuṇa namobhir ava yajñebhir īmahe havirbhiḥ |
 1.024.14c kṣayann asmabhyam asura pracetā rājann enāṃsi śīsrathaḥ kṛtāni ||
 1.024.15a ud uttamam varuṇa pāsam asmad avādhamam vi madhyamam śrathāya |
 1.024.15c athā vayam āditya vrata tavānāgaso aditaye syāma ||

1.025.01a yac cid dhi te viśo yathā pra deva varuṇa vratam |
 1.025.01c minimasi dyavi-dyavi ||
 1.025.02a mā no vadhāya hatnave jihīdānasya rīradhaḥ |
 1.025.02c mā hṛṇānasya manyave ||
 1.025.03a vi mṛḍikāya te mano rathīr aśvam na saṃditam |
 1.025.03c gīrbhir varuṇa sīmahi ||
 1.025.04a parā hi me vimanyavaḥ patanti vasyaiṣṭhaye |
 1.025.04c vayo na vasatīr upa ||
 1.025.05a kadā kṣatraśriyam naram ā varuṇam karāmahe |
 1.025.05c mṛḍikāyorucaḥsasam ||
 1.025.06a tad it samānam āśāte venantā na pra yuchataḥ |
 1.025.06c dhṛtavratāya dāsūṣe ||
 1.025.07a vedā yo vīnām padam antarikṣeṇa patatām |
 1.025.07c veda nāvaḥ samudriyaḥ ||
 1.025.08a veda māso dhṛtavrato dvādaśa prajāvataḥ |
 1.025.08c vedā ya upajāyate ||
 1.025.09a veda vātasya vartanim uror ṛṣvasya bṛhataḥ |
 1.025.09c vedā ye adhyāsate ||
 1.025.10a ni śasāda dhṛtavrato varuṇaḥ pastyāsv ā |
 1.025.10c sāmṛājyāya sukratuḥ ||
 1.025.11a ato viśvāny adbhutā cikitvāṃ abhi paśyati |
 1.025.11c kṛtāni yā ca kartvā ||
 1.025.12a sa no viśvāhā sukatur ādityaḥ supathā karat |
 1.025.12c pra ṇa āyūṃṣi tāriṣat ||
 1.025.13a bibhrad drāpiṃ hiraṇyayam varuṇo vasta nirṇijam |
 1.025.13c pari spaśo ni ṣedire ||
 1.025.14a na yaṃ dipsanti dipsavo na druhvāṇo janānām |
 1.025.14c na devam abhimātayaḥ ||
 1.025.15a uta yo mānuṣeṣv ā yaśaś cakre asāmy ā |
 1.025.15c asmākam udareṣv ā ||
 1.025.16a parā me yanti dhītayo gāvo na gavyūtīr anu |
 1.025.16c ichantīr urucaḥsasam ||
 1.025.17a saṃ nu vocāvahai punar yato me madhv ābhṛtam |
 1.025.17c hoteva kṣadase priyam ||
 1.025.18a darśam nu viśvadarśatam darśam ratham adhi kṣami |
 1.025.18c etā juṣata me giraḥ ||
 1.025.19a imam me varuṇa śrudhī havam adyā ca mṛḍaya |
 1.025.19c tvām avasyur ā cake ||

1.025.20a tvam̐ viśvasya medhira divas̐ ca gmas̐ ca rājasi |
1.025.20c sa yāmani prati śrudhi ||
1.025.21a ud uttamam̐ mumugdhi no vi pāsam̐ madhyamam̐ cṛta |
1.025.21c avādhamāni jīvase ||

1.026.01a vasiṣvā hi miyedhya vastrāṅy ūrjām̐ pate |
1.026.01c semam̐ no adhvaram̐ yaja ||
1.026.02a ni no hotā vareṅyaḥ sadā yaviṣṭha manmabhiḥ |
1.026.02c agne divitmatā vacaḥ ||
1.026.03a ā hi śmā sūnave pitāpir yajaty āpaye |
1.026.03c sakhā sakhye vareṅyaḥ ||
1.026.04a ā no barhī riśādaso varuṅo mitro aryamā |
1.026.04c sīdantu manuṣo yathā ||
1.026.05a pūrvya hotar asya no mandasva sakhyasya ca |
1.026.05c imā u ṣu śrudhī giraḥ ||
1.026.06a yac cid dhi śasvatā tanā devam̐-devam̐ yajāmahe |
1.026.06c tve id dhūyate haviḥ ||
1.026.07a priyo no astu viśpatir hotā mandro vareṅyaḥ |
1.026.07c priyāḥ svagnayo vayam ||
1.026.08a svagnayo hi vāryam̐ devāso dadhire ca naḥ |
1.026.08c svagnayo manāmahe ||
1.026.09a athā na ubhayeṣām̐ amṛta martyānām̐ |
1.026.09c mithaḥ santu praśastayaḥ ||
1.026.10a viśvebhir agne agnibhir imam̐ yajñam̐ idam̐ vacaḥ |
1.026.10c cano dhāḥ sahaso yaho ||

1.027.01a aśvam̐ na tvā vāravantam̐ vandadhyā agniṃ namobhiḥ |
1.027.01c samrājantam̐ adhvarāṅām̐ ||
1.027.02a sa ghā naḥ sūnuḥ śavasā pṛthupragāmā suśevaḥ |
1.027.02c mīdhvāṃ̐ asmākam̐ babhūyāt ||
1.027.03a sa no dūrāc cāsāc ca ni martyād aghāyoḥ |
1.027.03c pāhi sadam̐ id viśvāyuḥ ||
1.027.04a imam̐ ū ṣu tvam̐ asmākam̐ saniṃ gāyatram̐ navyāṃsam̐ |
1.027.04c agne deveṣu pra vocaḥ ||
1.027.05a ā no bhaja parameṣv ā vājeṣu madhyameṣu |
1.027.05c śikṣā vasvo antamasya ||
1.027.06a vibhaktāsi citrabhāno sindhor ūrmā upāka ā |
1.027.06c sadyo dāsūṣe kṣarasi ||
1.027.07a yam̐ agne pṛtsu martyam̐ avā vājeṣu yam̐ junāḥ |
1.027.07c sa yantā śasvatīr iṣaḥ ||
1.027.08a nakir asya sahantya paryetā kayasya cit |
1.027.08c vājo asti śravāyyaḥ ||
1.027.09a sa vājam̐ viśvacarṣaṅir arvadbhīr astu tarutā |
1.027.09c viprebhir astu sanitā ||
1.027.10a jarābodha tad viviḍdhi viśe-viśe yajñiyāya |
1.027.10c stomam̐ rudrāya dṛśīkam̐ ||
1.027.11a sa no mahāṃ̐ animāno dhūmaketuḥ puruścandraḥ |

1.027.11c dhiye vājāya hinvatu ||
 1.027.12a sa revāñ iva viśpatir daivyaḥ ketuḥ śṛṇotu naḥ |
 1.027.12c ukthair agnir bṛhadbhānuḥ ||
 1.027.13a namo mahadbhyo namo arbhakebhyo namo yuvabhyo nama āśinebhyah |
 1.027.13c yajāma devān yadi śaknavāma mā jyāyasaḥ śaṃsam ā vṛkṣi devāḥ ||

1.028.01a yatra grāvā pṛthubudhna ūrdhvo bhavati sotave |
 1.028.01c ulūkhalasutānām aved v indra jalgulaḥ ||
 1.028.02a yatra dvāv iva jaghanādhiṣavaṇyā kṛtā |
 1.028.02c ulūkhalasutānām aved v indra jalgulaḥ ||
 1.028.03a yatra nāry apacyavam upacyavaṃ ca śikṣate |
 1.028.03c ulūkhalasutānām aved v indra jalgulaḥ ||
 1.028.04a yatra manthām vibadhnate raśmīn yamitavā iva |
 1.028.04c ulūkhalasutānām aved v indra jalgulaḥ ||
 1.028.05a yac cid dhi tvam gr̥he-gr̥ha ulūkhalaka yujyase |
 1.028.05c iha dyumattamaṃ vada jayatām iva dundubhiḥ ||
 1.028.06a uta sma te vanaspate vāto vi vāty agram it |
 1.028.06c atho indrāya pātave sunu somam ulūkhala ||
 1.028.07a āyajī vājasātāmā tā hy uccā vijarbhṛtaḥ |
 1.028.07c harī ivāndhāṃsi bapsatā ||
 1.028.08a tā no adya vanaspatī ṛṣvāv ṛṣvebhiḥ sotṛbhiḥ |
 1.028.08c indrāya madhumat sutam ||
 1.028.09a uc chiṣṭam camvor bhara somam pavitra ā sṛja |
 1.028.09c ni dhehi gor adhi tvaci ||

1.029.01a yac cid dhi satya somapā anāśastā iva smasi |
 1.029.01c ā tū na indra śaṃsaya goṣv aśveṣu śubhriṣu sahasreṣu tuvīmagha ||
 1.029.02a śiprin vājānām pate śacīvas tava daṃsanā |
 1.029.02c ā tū na indra śaṃsaya goṣv aśveṣu śubhriṣu sahasreṣu tuvīmagha ||
 1.029.03a ni ṣvāpayā mithūdr̥ṣā sastām abudhyamāne |
 1.029.03c ā tū na indra śaṃsaya goṣv aśveṣu śubhriṣu sahasreṣu tuvīmagha ||
 1.029.04a sasantu tyā arātayo bodhantu śūra rātayaḥ |
 1.029.04c ā tū na indra śaṃsaya goṣv aśveṣu śubhriṣu sahasreṣu tuvīmagha ||
 1.029.05a sam indra gardabham mṛṇa nuvantam pāpayāmuyā |
 1.029.05c ā tū na indra śaṃsaya goṣv aśveṣu śubhriṣu sahasreṣu tuvīmagha ||
 1.029.06a patāti kuṇḍṛṇācyā dūram vāto vanād adhi |
 1.029.06c ā tū na indra śaṃsaya goṣv aśveṣu śubhriṣu sahasreṣu tuvīmagha ||
 1.029.07a sarvam parikrośam jahi jambhayā kṛkadāśvam |
 1.029.07c ā tū na indra śaṃsaya goṣv aśveṣu śubhriṣu sahasreṣu tuvīmagha ||

1.030.01a ā va indram kriviṃ yathā vājayantaḥ śatakratum |
 1.030.01c maṃhiṣṭham siñca indubhiḥ ||
 1.030.02a śatam vā yaḥ śucinām sahasram vā samāśirām |
 1.030.02c ed u nimnam na riyate ||
 1.030.03a sam yan madāya śuṣmiṇa enā hy asyodare |
 1.030.03c samudro na vyaco dadhe ||

1.030.04a ayam u te sam atasi kapota iva garbhadhim |
 1.030.04c vacas tac cin na ohasē ||
 1.030.05a stotraṃ rādhānām pate girvāho vīra yasya te |
 1.030.05c vibhūtir astu sūnṛtā ||
 1.030.06a ūrdhvas tiṣṭhā na ūtaye 'smin vāje śatakrato |
 1.030.06c sam anyeṣu bravāvahai ||
 1.030.07a yoge-yoge tavastaraṃ vāje-vāje havāmahe |
 1.030.07c sakhāya indram ūtaye ||
 1.030.08a ā ghā gamad yadi śravat sahasriṇībhīr ūtibhīḥ |
 1.030.08c vājebhir upa no havam ||
 1.030.09a anu pratnasyaukaso huve tuvipratim naram |
 1.030.09c yaṃ te pūrvam pitā huve ||
 1.030.10a taṃ tvā vayaṃ viśvavārā śāsmahe puruhūta |
 1.030.10c sakhe vaso jaritṛbhyaḥ ||
 1.030.11a asmākaṃ śipriṇināṃ somapāḥ somapāvnām |
 1.030.11c sakhe vajrin sakhinām ||
 1.030.12a tathā tad astu somapāḥ sakhe vajrin tathā kṛṇu |
 1.030.12c yathā ta uśmasiṣṭaye ||
 1.030.13a revatīr naḥ sadhamāda indre santu tuvivājāḥ |
 1.030.13c kṣumanto yābhir madema ||
 1.030.14a ā gha tvāvān tmanāpta stotrībhyo dhṛṣṇav iyānaḥ |
 1.030.14c ṛṇor akṣaṃ na cakryoḥ ||
 1.030.15a ā yad duvaḥ śatakratav ā kāmaṃ jaritṛṇām |
 1.030.15c ṛṇor akṣaṃ na śacībhiḥ ||
 1.030.16a śāśvad indraḥ popruthadbhir jigāya nānadadbhiḥ śāśvasadbhir dhanāni |
 1.030.16c sa no hiraṇyārathaṃ daṃsanāvān sa naḥ sanitā sanaye sa no 'dāt ||
 1.030.17a āśvināv aśvāvatyēṣā yātaṃ śavīrayā |
 1.030.17c gomad dasrā hiraṇyavat ||
 1.030.18a samānayo jano hi vāṃ ratho dasrāv amartyaḥ |
 1.030.18c samudre aśvineyate ||
 1.030.19a ny aghnyasya mūrdhani cakraṃ rathasya yemathuḥ |
 1.030.19c pari dyām anyad iyate ||
 1.030.20a kas ta uṣaḥ kadhapriye bhujē marto amartye |
 1.030.20c kaṃ nakṣase vibhāvāri ||
 1.030.21a vayaṃ hi te amanmahy āntād ā parākāt |
 1.030.21c aśve na citre aruṣi ||
 1.030.22a tvam tyebhir ā gahi vājebhir duhitar divaḥ |
 1.030.22c asme rayim ni dhāraya ||

1.031.01a tvam agne prathamo aṅgirā ṛṣir devo devānām abhavaḥ śivaḥ sakhā |
 1.031.01c tava vrata kavayo vidmanāpaso 'jāyanta maruto bhrājadṛṣṭayaḥ ||
 1.031.02a tvam agne prathamo aṅgirastamaḥ kavir devānām pari bhūṣasi vratam |
 1.031.02c vibhur viśvasmai bhuvanāya medhiro dvimātā śayuḥ katidhā cid āyave ||
 1.031.03a tvam agne prathamo mātariśvana āvir bhava sukratūyā vivasvate |
 1.031.03c arejetāṃ rodasī hotṛvūrye 'saghnor bhāram ayajo maho vaso ||
 1.031.04a tvam agne manave dyām avāśayaḥ purūravase sukṛte sukṛttaraḥ |
 1.031.04c śvātrena yat pitror mucyase pary ā tvā pūrvam anayann āparam punaḥ ||
 1.031.05a tvam agne vṛṣabhaḥ puṣṭivardhana udyatasruce bhavasi śravāyyaḥ |

1.031.05c ya āhutim pari vedā vaṣaṭkṛtim ekāyur agre viśa āvivāsasi ||
 1.031.06a tvam agne vṛjinavartaniṃ naraṃ sakman piparṣi vidathe vicarṣaṇe |
 1.031.06c yaḥ sūrasātā paritakmye dhane dabhrebhiś cit samṛtā haṃsi bhūyasaḥ ||
 1.031.07a tvam tam agne amṛtatva uttame martam dadhāsi śravase dive-dive |
 1.031.07c yas tāṭṣāṇa ubhayāya janmane mayāḥ kṛṇoṣi praya ā ca sūraye ||
 1.031.08a tvam no agne sanaye dhanānāṃ yaśasaṃ kārūṃ kṛṇuhi stavānaḥ |
 1.031.08c ṛdhyāma karmāpasā navena devair dyāvāpṛthivī prāvataṃ naḥ ||
 1.031.09a tvam no agne pitror upastha ā devo deveṣv anavadya jāgrviḥ |
 1.031.09c tanūkr̥d bodhi pramatīś ca kārave tvam kalyāṇa vasu viśvam opiṣe ||
 1.031.10a tvam agne pramatis tvam pitāsi nas tvam vayaskṛt tava jāmayo vayam |
 1.031.10c saṃ tvā rāyaḥ śatinaḥ saṃ sahasriṇaḥ suvīraṃ yanti vratapām adābhya ||
 1.031.11a tvām agne prathamam āyūṃ āyave devā akṛṇvan nahuṣasya viśpatim |
 1.031.11c idām akṛṇvan manuṣasya śāsanīm pitur yat putro mamakasya jāyate ||
 1.031.12a tvam no agne tava deva pāyubhir maghono rakṣa tanvaś ca vandya |
 1.031.12c trātā tokasya tanaye gavām asy animeṣaṃ rakṣamāṇas tava vrataḥ ||
 1.031.13a tvam agne yajyave pāyur antaro 'niṣaṅgāya caturakṣa idhyase |
 1.031.13c yo rātahavyo 'vṛkāya dhāyase kīreś cin mantram manasā vanoṣi tam ||
 1.031.14a tvam agna uruśamsāya vāghate spārhaṃ yad rekṇaḥ paramaṃ vanoṣi tat |
 1.031.14c ādhrasya cit pramatir ucyase pitā pra pākaṃ śāssi pra diśo viduṣṭaraḥ ||
 1.031.15a tvam agne prayatadakṣiṇaṃ naraṃ varmeva syūtam pari pāsi viśvataḥ |
 1.031.15c svādukṣadmā yo vasatau syonakṛj jīvayājaṃ yajate sopamā divaḥ ||
 1.031.16a imām agne śaraṇim mīmṛṣo na imam adhvānaṃ yam agāma dūrāt |
 1.031.16c āpiḥ pitā pramatih somyānām bhṛmir asy ṛṣikṛṇ martyānām ||
 1.031.17a manuṣvad agne aṅgirasvad aṅgiro yayātivat sadane pūrvavac chuce |
 1.031.17c acha yāhy ā vahā daivyaṃ janam ā sādaya barhiṣi yakṣi ca priyam ||
 1.031.18a etenagne brahmaṇā vāvṛdhasva śakti vā yat te cakṛmā vidā vā |
 1.031.18c uta pra ṇeṣy abhi vasyo asmān saṃ naḥ sṛja sumatyā vājavatyā ||

1.032.01a indrasya nu vīryāṇi pra vocaṃ yāni cakāra prathamāni vajrī |
 1.032.01c ahann ahim anv apas tatarda pra vakṣaṇā abhinat parvatānām ||
 1.032.02a ahann ahim parvate śisṛiyāṇaṃ tvaṣṭāsmāi vajraṃ svaryaṃ tatakṣa |
 1.032.02c vāśrā iva dhenavaḥ syandamānā añjaḥ samudram ava jagmur āpaḥ ||
 1.032.03a vṛṣāyamāṇo 'vṛṇīta somaṃ trikadrūkeṣv apibat sutasya |
 1.032.03c ā sāyakam maghavādatta vajram ahann enam prathamajām ahīnām ||
 1.032.04a yad indrāhan prathamajām ahīnām ān māyinām amināḥ prota māyāḥ |
 1.032.04c āt sūryaṃ janayan dyām uśasaṃ tāditnā śatruṃ na kilā vivitse ||
 1.032.05a ahan vṛtraṃ vṛtrataraṃ vyamsam indro vajreṇa mahatā vadhena |
 1.032.05c skandhāmsīva kuliśenā vivṛkṇāhiḥ śayata upapṛk pṛthivyāḥ ||
 1.032.06a ayoddheva durmada ā hi juhve mahāvīraṃ tuvibādham ṛjīsam |
 1.032.06c nātārīd asya samṛtiṃ vadhānām saṃ rujānāḥ pipīṣa indraśatruḥ ||
 1.032.07a apād ahasto apṛtanyad indram āsya vajram adhi sānau jaghāna |
 1.032.07c vṛṣṇo vadhriḥ pratimānam bubhūṣan purutrā vṛtro aśayad vyastaḥ ||
 1.032.08a nadaṃ na bhinnam amuyā śayānam mano ruhāṇā ati yanty āpaḥ |
 1.032.08c yāś cid vṛtro mahinā paryatiṣṭhat tāsām ahiḥ patsutaḥśīr babhūva ||
 1.032.09a nīcāvayā abhavad vṛtraputrendro asyā ava vadhar jabhāra |
 1.032.09c uttarā sūr adharaḥ putra āsīd dānuḥ śaye sahavatsā na dhenuḥ ||
 1.032.10a atiṣṭhantīnām aniveśanānām kāṣṭhānām madhye nihitaṃ śarīram |
 1.032.10c vṛtrasya niṇyaṃ vi caranty āpo dīrghaṃ tama āśayad indraśatruḥ ||

1.032.11a dāsapatnīr ahigopā atiṣṭhan niruddhā āpaḥ paṇineva gāvaḥ |
 1.032.11c apām bilam apihitaṃ yad āsīd vṛtraṃ jaghanvāṃś apa tad vavāra ||
 1.032.12a aśvyo vāro abhavas tad indra sṛke yat tvā pratyahan deva ekaḥ |
 1.032.12c ajayo gā ajayaḥ śūra somam avāsṛjaḥ sartave sapta sindhūn ||
 1.032.13a nāsmāi vidyun na tanyatuḥ siṣedha na yām miham akirad dhrāduniṃ ca |
 1.032.13c indraś ca yad yuyudhāte ahiś cotāparibhyo maghavā vi jigye ||
 1.032.14a aher yātāraṃ kam apaśya indra hṛdi yat te jaghnuṣo bhīr agachat |
 1.032.14c nava ca yan navatiṃ ca sravantiḥ śyeno na bhīto ataro rajāṃsi ||
 1.032.15a indro yāto 'vasitasya rājā śamasya ca śṛṅgiṇo vajrabāhuḥ |
 1.032.15c sed u rājā kṣayati carṣaṇinām arān na nemiḥ pari tā babhūva ||

1.033.01a etāyāmopa gavyanta indram asmākaṃ su pramatiṃ vāvṛdhāti |
 1.033.01c anāmṛṇaḥ kuvid ād asya rāyo gavāṃ ketam param āvarjate naḥ ||
 1.033.02a uped ahaṃ dhanadām apratītaṃ juṣṭāṃ na śyeno vasatim patāmi |
 1.033.02c indraṃ namasyann upamebhīr arkair ya stotṛbhyo havyo asti yāman ||
 1.033.03a ni sarvasena iṣudhīmṛ asakta sam aryo gā ajati yasya vaṣṭi |
 1.033.03c coṣkūyamāṇa indra bhūri vāmam mā paṇir bhūr asmad adhi pravṛddha ||
 1.033.04a vadhīr hi dasyuṃ dhaninaṃ ghanenaṃś ekaś carann upaśākebhīr indra |
 1.033.04c dhanor adhi viṣuṇak te vy āyann ayajvānaḥ sanakāḥ pretim īyuḥ ||
 1.033.05a parā cic chīrṣā vavṛjus ta indrāyajvāno yajvabhi spardhamānāḥ |
 1.033.05c pra yad divo hariva sthātar ugra nir avratāṃś adhamo rodasyoḥ ||
 1.033.06a ayuyutsann anavadyasya senām ayātayanta kṣitayo navagvāḥ |
 1.033.06c vṛṣāyudho na vadhrayo niraṣṭāḥ pravadbhīr indrāc citayanta āyan ||
 1.033.07a tvam etān rudato jakṣataś cāyodhayo rajasa indra pāre |
 1.033.07c avādaho diva ā dasyum uccā pra sunvata stuvataḥ śamsam āvaḥ ||
 1.033.08a cakrāṇāsaḥ pariṇaham pṛthivyā hiraṇyena maṇinā śumbhamānāḥ |
 1.033.08c na hinvānāsas titirus ta indram pari spaśo adadhāt sūryeṇa ||
 1.033.09a pari yad indra rodasī ubhe abubhojīr mahinā viśvataḥ sīm |
 1.033.09c amanyamānāṃś abhi manyamānair nir brahmabhīr adhamo dasyum indra ||
 1.033.10a na ye divaḥ pṛthivyā antam āpur na māyābhīr dhanadām paryabhūvan |
 1.033.10c yujaṃ vajraṃ vṛṣabhaś cakra indro nir jyotiṣā tamaso gā adukṣat ||
 1.033.11a anu svadhām akṣarann āpo asyāvārdhata madhya ā nāvyanām |
 1.033.11c sadhricīnena manasā tam indra ojiṣṭhena hanmanāhann abhi dyūn ||
 1.033.12a ny āvidhyad ilībīśasya dṛḍhā vi śṛṅgiṇam abhinac chuṣṇam indraḥ |
 1.033.12c yāvat taro maghavan yāvad ojo vajreṇa śatrum avadhīḥ pṛtanyum ||
 1.033.13a abhi sidhmo ajigād asya śatrūn vi tigmena vṛṣabheṇā puro 'bhet |
 1.033.13c saṃ vajreṇāsṛjad vṛtraṃ indraḥ pra svām matim atirac chāśadānaḥ ||
 1.033.14a āvaḥ kutsam indra yasmiṃś cākan prāvo yudhyantaṃ vṛṣabhaṃ daśadyum |
 1.033.14c śaphacyuto reṇur nakṣata dyām uc chvaitreyo nṛṣāhyāya tasthau ||
 1.033.15a āvaḥ śamaṃ vṛṣabhaṃ tugryāsu kṣetrajeṣe maghavaṃ chvitryaṃ gām |
 1.033.15c jyok cid atra tasthivāṃso akraṃ chatrūyatām adharā vedanākaḥ ||

1.034.01a triś cin no adyā bhavataṃ navedasā vibhur vām yāma uta rātir aśvinā |
 1.034.01c yuvor hi yantraṃ himyeva vāsaso 'bhyāyaṃsenyā bhavataṃ maṇīṣibhiḥ ||
 1.034.02a trayāḥ pavayo madhuvāhane rathe somasya venām anu viśva id viduḥ |
 1.034.02c traya skambhāsa skabhītāsa ārabhe trir naktam yāthas trir v aśvinā divā ||
 1.034.03a samāne ahan trir avadyagohanā trir adya yajñam madhunā mimikṣatam |

- 1.034.03c trir vājavatīr iṣo aśvinā yuvaṃ doṣā asmabhyam uṣasaś ca pinvatam ||
1.034.04a trir vartir yātaṃ trir anuvrate jane triḥ supravye tredheva śikṣatam |
1.034.04c trir nāndyaṃ vahatam aśvinā yuvaṃ triḥ pṛkṣo asme akṣareva pinvatam ||
1.034.05a trir no rayiṃ vahatam aśvinā yuvaṃ trir devatātā trir utāvataṃ dhiyaḥ |
1.034.05c triḥ saubhagatvaṃ trir uta śravāmsi nas triṣṭhaṃ vāṃ sūre duhitā ruhad ratham ||
1.034.06a trir no aśvinā divyāni bheṣajā triḥ pārthivāni trir u dattam adbhyaḥ |
1.034.06c omānaṃ śaṃyor mamakāya sūnave tridhātu śarma vahataṃ śubhas patī ||
1.034.07a trir no aśvinā yajatā dive-dive pari tridhātu pṛthivīm aśāyatam |
1.034.07c tisro nāsatyā rathyā parāvata ātmeva vātaḥ svasarāṇi gachatam ||
1.034.08a trir aśvinā sindhubhiḥ saptamātr̥bhis traya āhāvās tredhā haviṣ kṛtam |
1.034.08c tisraḥ pṛthivīr upari pravā divo nākaṃ raksethe dyubhir aktubhir hitam ||
1.034.09a kva trī cakrā trivṛto rathasya kva trayo vandhuro ye sanīdāḥ |
1.034.09c kadā yogo vājino rāsabhasya yena yajñam nāsatyopayāthaḥ ||
1.034.10a ā nāsatyā gachataṃ hūyate havir madhvaḥ pibatam madhupebhir āsabhiḥ |
1.034.10c yuvor hi pūrvaṃ savitoṣaso ratham ṛtāya citraṃ ghṛtavantam iṣyati ||
1.034.11a ā nāsatyā tribhir ekādaśair iha devebhir yātaṃ madhupeyam aśvinā |
1.034.11c prāyus tāriṣṭhaṃ nī rapāmsi mṛkṣataṃ sedhataṃ dveṣo bhavataṃ sacābhuvā ||
1.034.12a ā no aśvinā trivṛtā rathenārvāñcaṃ rayiṃ vahataṃ suvīram |
1.034.12c śṛṇvantā vām avase johavīmi vṛdhe ca no bhavataṃ vājasātau ||

- 1.035.01a hvayāmy agnim prathamam svastaye hvayāmi mitrāvaruṇāv ihāvase |
1.035.01c hvayāmi rātrīm jagato niveśanīm hvayāmi devaṃ savitāram ūtaye ||
1.035.02a ā kṛṣṇena rajasā vartamāno niveśayann amṛtam martyaṃ ca |
1.035.02c hiraṇyayena savitā rathenā devo yāti bhuvanāni paśyan ||
1.035.03a yāti devaḥ pravatā yāty udvatā yāti śubhrābhyām yajato haribhyām |
1.035.03c ā devo yāti savitā parāvato 'pa viśvā duritā bādhamānaḥ ||
1.035.04a abhivṛtaṃ kṛśanair viśvarūpaṃ hiraṇyaśamyam yajato bṛhantam |
1.035.04c āsthād rathaṃ savitā citrabhānuḥ kṛṣṇā rajāmsi taviṣiṃ dadhānaḥ ||
1.035.05a vi janāñ chyāvāḥ śitipādo akhyaṇ rathaṃ hiraṇyapraūgaṃ vahantaḥ |
1.035.05c śaśvad viśaḥ savitur daivyasyopasthe viśvā bhuvanāni tasthuḥ ||
1.035.06a tisro dyāvāḥ savitur dvā upasthāṃ ekā yamasya bhuvane virāṣāt |
1.035.06c āṇiṃ na rathyam amṛtādhi tasthur iha bravītu ya u tac ciketat ||
1.035.07a vi suparṇo antarikṣāṇy akhyad gabhīravēpā asuraḥ sunīthaḥ |
1.035.07c kvedānīm sūryaḥ kaś ciketa katamām dyām raśmir asyā tatāna ||
1.035.08a aṣṭau vy akhyat kakubhaḥ pṛthivyās trī dhanva yojanā sapta sindhūn |
1.035.08c hiraṇyākṣaḥ savitā deva āgād dadhad ratnā dāsuse vāryāni ||
1.035.09a hiraṇyapāṇiḥ savitā vicarṣanir ubhe dyāvāpṛthivī antar iyate |
1.035.09c apāmivām bādhatē veti sūryam abhi kṛṣṇena rajasā dyām ṛnoti ||
1.035.10a hiraṇyahasto asuraḥ sunīthaḥ sumṛḍīkaḥ svavāṃ yātv arvān |
1.035.10c apasedhan rakṣaso yātudhānān āsthād devaḥ pratidoṣaṃ gṛṇānaḥ ||
1.035.11a ye te panthāḥ savitaḥ pūrvyāso 'reṇavaḥ sukṛtā antarikṣe |
1.035.11c tebhir no adya pathibhiḥ sugebhī rakṣā ca no adhi ca brūhi deva ||

- 1.036.01a pra vo yahvam purūṇām viśām devayatinām |
1.036.01c agniṃ sūktebhir vacobhir imahe | yaṃ sīm id anya īdate ||
1.036.02a janāso agniṃ dadhire sahovṛdhaṃ | haviṣmanto vidhema te |
1.036.02c sa tvaṃ no adya sumanā ihāvitā | bhavā vājeṣu santya ||

1.036.03a pra tvā dūtam vṛṇīmahe hotāraṃ viśvavedasam |
 1.036.03c mahas te sato vi caranty arcayo | divi sṛśanti bhānavaḥ ||
 1.036.04a devāsas tvā varuṇo mitro aryamā | saṃ dūtam pratnam indhate |
 1.036.04c viśvam so agne jayati tvayā dhanam | yas te dadāśa martyaḥ ||
 1.036.05a mandro hotā gṛhapatir agne dūto viśām asi |
 1.036.05c tve viśvā saṃgatāni vratā dhruvā | yāni devā akṛṇvata ||
 1.036.06a tve id agne subhage yaviṣṭhya | viśvam ā hūyate haviḥ |
 1.036.06c sa tvam no adya sumanā utāparaṃ | yakṣi devān suvīryā ||
 1.036.07a taṃ ghem itthā namasvina upa svarājam āsate |
 1.036.07c hotrābhir agnim manuṣaḥ sam indhate | titirvāṃso ati sridhaḥ ||
 1.036.08a ghnanto vṛtram ataran rodasī apa | uru kṣayāya cakrire |
 1.036.08c bhuvat kaṇve vṛṣā dyumny āhutaḥ | krandad āśvo gaviṣṭiṣu ||
 1.036.09a saṃ sīdasva mahāṃ asi śocasva devavītamah |
 1.036.09c vi dhūmam agne aruṣam miyedhya sṛja praśasta darśatam ||
 1.036.10a yaṃ tvā devāso manave dadhur iha | yajīṣṭham havayavāhana |
 1.036.10c yaṃ kaṇvo medhyātithir dhanasṛtaṃ | yaṃ vṛṣā yam upastutaḥ ||
 1.036.11a yam agnim medhyātithiḥ kaṇva īdha ṛtād adhi |
 1.036.11c tasya preṣo dīdiyus tam imā ṛcas | tam agniṃ vardhayāmasi ||
 1.036.12a rāyas pūrdhi svadhāvo 'sti hi | te 'gne deveṣv āpyam |
 1.036.12c tvam vājasya śrutyasya rājasi | sa no mṛḍa mahāṃ asi ||
 1.036.13a ūrdhva ū ṣu ṇa ūtaye tiṣṭhā devo na savitā |
 1.036.13c ūrdhvo vājasya sanitā yad añjibhir | vāghadbhir vihvayāmahe ||
 1.036.14a ūrdhvo naḥ pāhy aṃhaso ni ketunā | viśvam sam atrīṇaṃ daha |
 1.036.14c kṛdhī na ūrdhvāñ carathāya jīvase | vidā deveṣu no duvaḥ ||
 1.036.15a pāhi no agne rakṣasaḥ pāhi dhūrter arāvṇaḥ |
 1.036.15c pāhi riṣata uta vā jighāmsato | bṛhadbhāno yaviṣṭhya ||
 1.036.16a ghaneva viṣvag vi jahy arāvṇas | tapurjambha yo asmadhruk |
 1.036.16c yo martyaḥ śīśīte aty aktubhir | mā naḥ sa ripur īsata ||
 1.036.17a agnir vavne suvīryam agniḥ kaṇvāya saubhagam |
 1.036.17c agniḥ prāvan mitrota medhyātithim | agniḥ sātā upastutam ||
 1.036.18a agninā turvaśaṃ yadum parāvata | ugrādevaṃ havāmahe |
 1.036.18c agnir nayan navavāstvam bṛhadrathaṃ | turvītiṃ dasyave sahaḥ ||
 1.036.19a ni tvām agne manur dadhe jyotir janāya śāśvate |
 1.036.19c dīdetha kaṇva ṛtajāta ukṣito | yaṃ namasyanti kṛṣṭayaḥ ||
 1.036.20a tveṣāso agner amavanto arcayo | bhīmāso na pratītaye |
 1.036.20c rakṣasvinaḥ sadam id yātumāvato viśvam sam atrīṇaṃ daha ||

1.037.01a krīdam vaḥ śardho mārutam anarvāṇaṃ ratheśubham |
 1.037.01c kaṇvā abhi pra gāyata ||
 1.037.02a ye pṛṣatībhir ṛṣṭībhiḥ sākam vāśībhir añjibhiḥ |
 1.037.02c ajāyanta svabhānavaḥ ||
 1.037.03a iheva śṛṇva eṣām kaśā hasteṣu yad vadān |
 1.037.03c ni yāmañ citram ṛñjate ||
 1.037.04a pra vaḥ śardhāya ghrīṣvaye tveṣadyumnāya śuṣmiṇe |
 1.037.04c devattam brahma gāyata ||
 1.037.05a pra śamsā goṣv aghnyam krīdam yac chardho mārutam |
 1.037.05c jambhe rasasya vāvṛdhe ||
 1.037.06a ko vo varṣiṣṭha ā naro divas ca gmas ca dhūtayaḥ |

1.037.06c yat sīm antaṃ na dhūnutha ||
 1.037.07a ni vo yāmāya mānuṣo dadhra ugrāya manyave |
 1.037.07c jihīta parvato giriḥ ||
 1.037.08a yeṣāṃ ajmeṣu pṛthivī jujurvāṃ iva viśpatiḥ |
 1.037.08c bhiyā yāmeṣu rejate ||
 1.037.09a sthiraṃ hi jānam eṣāṃ vayo mātur niretave |
 1.037.09c yat sīm anu dvitā śavaḥ ||
 1.037.10a ud u tye sūnavo giraḥ kāṣṭhā ajmeṣv atnata |
 1.037.10c vāśrā abhijñu yātave ||
 1.037.11a tyāṃ cid ghā dīrgham pṛthum miho napātam amṛdhram |
 1.037.11c pra cyāvayanti yāmabhiḥ ||
 1.037.12a maruto yad dha vo balaṃ janāṃ acucyavītana |
 1.037.12c giriṃr acucyavītana ||
 1.037.13a yad dha yānti marutaḥ saṃ ha bruvate 'dhvann ā |
 1.037.13c śṛṇoti kaś cid eṣāṃ ||
 1.037.14a pra yāta śibham āsubhiḥ santi kaṇveṣu vo duvaḥ |
 1.037.14c tatro ṣu mādayādhvai ||
 1.037.15a asti hi śmā madāya vaḥ smasi śmā vayam eṣāṃ |
 1.037.15c viśvaṃ cid āyur jīvase ||

1.038.01a kad dha nūnaṃ kadhapriyaḥ pitā putraṃ na hastayoḥ |
 1.038.01c dadhidhve vṛktabarhiṣaḥ ||
 1.038.02a kva nūnaṃ kad vo arthaṃ gantā divo na pṛthivyāḥ |
 1.038.02c kva vo gāvo na raṇyanti ||
 1.038.03a kva vaḥ sumnā navyāṃsi marutaḥ kva suvitā |
 1.038.03c kvo viśvāni saubhagā ||
 1.038.04a yad yūyam pṛṣnimātaro martāsaḥ syātana |
 1.038.04c stotā vo amṛtaḥ syāt ||
 1.038.05a mā vo mṛgo na yavase jaritā bhūd ajoṣyaḥ |
 1.038.05c pathā yamasya gād upa ||
 1.038.06a mo ṣu ṇaḥ parā-parā nirṛtir durhaṇā vadhīt |
 1.038.06c paḍiṣṭa tṛṣṇayā saha ||
 1.038.07a satyaṃ tveṣā amavanto dhanvañ cid ā rudriyāsaḥ |
 1.038.07c mihaṃ kṛṇvanty avātām ||
 1.038.08a vāśreva vidyun mimāti vatsaṃ na mātā siṣakti |
 1.038.08c yad eṣāṃ vṛṣṭir asarji ||
 1.038.09a divā cit tamaḥ kṛṇvanti parjanyaenodavāhena |
 1.038.09c yat pṛthivīm vyundanti ||
 1.038.10a adha svanān marutām viśvam ā sadma pārthivam |
 1.038.10c arejanta pra mānuṣāḥ ||
 1.038.11a maruto viḍupāṇibhiś citrā rodhasvatir anu |
 1.038.11c yātem akhidrayāmabhiḥ ||
 1.038.12a sthirā vaḥ santu nemayo rathā aśvāsa eṣāṃ |
 1.038.12c susaṃskṛtā abhīśavaḥ ||
 1.038.13a achā vadā tanā girā jarāyai brahmaṇas patim |
 1.038.13c agnim mitraṃ na darśatam ||
 1.038.14a mimīhi ślokaṃ āsye parjanya iva tātanaḥ |
 1.038.14c gāya gāyatram ukthyam ||

1.038.15a vandasva mārutaṃ gaṇaṃ tveṣam panasyum arkiṇam |
1.038.15c asme vṛddhā asann iha ||

1.039.01a pra yad itthā parāvataḥ śocir na mānam asyatha |
1.039.01c kasya kratvā marutaḥ kasya varpasā kaṃ yātha kaṃ ha dhūtayaḥ ||
1.039.02a sthirā vaḥ santv āyudhā parāṇude vīdū uta pratiṣkabhe |
1.039.02c yuṣmākam astu taviṣī paṇīyasī mā martyasya māyinaḥ ||
1.039.03a parā ha yat sthiraṃ hatha naro vartayathā guru |
1.039.03c vi yāthana vaninaḥ pṛthivyā vy āśāḥ parvatānām ||
1.039.04a nahi vaḥ śatrur vivide adhi dyavi na bhūmyāṃ riśādasah |
1.039.04c yuṣmākam astu taviṣī tanā yujā rudrāso nū cid ādhṛṣe ||
1.039.05a pra vepayanti parvatān vi viñcanti vanaspatīn |
1.039.05c pro ārata maruto durmadā iva devāsaḥ sarvayā viśā ||
1.039.06a upo ratheṣu pṛṣatīr ayugdhvam praṣṭīr vahati rohitaḥ |
1.039.06c ā vo yāmāya pṛthivī cid aśrod abibhayanta mānuṣāḥ ||
1.039.07a ā vo makṣū tanāya kaṃ rudrā avo vṛṇīmahe |
1.039.07c gantā nūnaṃ no 'vasā yathā purethā kaṇvāya bibhyuṣe ||
1.039.08a yuṣmeṣito maruto martyeṣita ā yo no abhva iṣate |
1.039.08c vi taṃ yuyota śavasā vy ojasā vi yuṣmākābhir ūtibhiḥ ||
1.039.09a asāmi hi prayajyaḥ kaṇvaṃ dada pracetasah |
1.039.09c asāmibhir maruta ā na ūtibhir gantā vṛṣṭim na vidyutaḥ ||
1.039.10a asāmy ojo bibhṛthā sudānavo 'sāmi dhūtayaḥ śavaḥ |
1.039.10c ṛṣidviṣe marutaḥ parimanyava iṣum na sṛjata dviṣam ||

1.040.01a ut tiṣṭha brahmaṇas pate devayantas tvemahe |
1.040.01c upa pra yantu marutaḥ sudānava indra prāsūr bhavā sacā ||
1.040.02a tvām id dhi sahasas putra martya upabrūte dhane hite |
1.040.02c suvīryam maruta ā svaśvyam dadhīta yo va ācake ||
1.040.03a praitu brahmaṇas patiḥ pra devy etu sūnṛtā |
1.040.03c achā vīraṃ naryam paṅktirādhasaṃ devā yajñam nayantu naḥ ||
1.040.04a yo vāghate dadāti sūnaraṃ vasu sa dhatte akṣiti śravaḥ |
1.040.04c tasmā idāṃ suvīrām ā yajāmahe supratūrtim anehasam ||
1.040.05a pra nūnam brahmaṇas patir mantraṃ vadaty ukthyam |
1.040.05c yasminn indro varuṇo mitro aryamā devā okāṃsi cakrire ||
1.040.06a tam id vocemā vidatheṣu sambhuvam mantraṃ devā anehasam |
1.040.06c imāṃ ca vācam pratiharyathā naro viśved vāmā vo aśnavat ||
1.040.07a ko devayantam aśnavaj janam ko vṛktabarhiṣam |
1.040.07c pra-pra dāśvān pastyābhir asthitāntarvāvat kṣayam dadhe ||
1.040.08a upa kṣatram pṛñcīta hanti rājabhir bhaye cit sukṣitīm dadhe |
1.040.08c nāsya vartā na tarutā mahādthane nārbhe asti vajriṇaḥ ||

1.041.01a yaṃ rakṣanti pracetaso varuṇo mitro aryamā |
1.041.01c nū cit sa dabhyate janaḥ ||
1.041.02a yaṃ bāhuteva piprati pānti martyam riṣaḥ |
1.041.02c ariṣṭaḥ sarva edhate ||
1.041.03a vi durgā vi dviṣaḥ puro ghnanti rājāna eṣām |

1.041.03c nayanti duritā tiraḥ ||
 1.041.04a sugaḥ panthā anṛkṣara ādityāsa ṛtaṃ yate |
 1.041.04c nātrāvakhādo asti vaḥ ||
 1.041.05a yaṃ yajñam nayathā nara ādityā ṛjunā pathā |
 1.041.05c pra vaḥ sa dhītaye naśat ||
 1.041.06a sa ratnam martyo vasu viśvaṃ tokam uta tmanā |
 1.041.06c achā gachaty astrītaḥ ||
 1.041.07a kathā rādhāma sakhāya stomam mitrasyāryamṇaḥ |
 1.041.07c mahi psaro varuṇasya ||
 1.041.08a mā vo ghnantam mā śapantam prati voce devayantam |
 1.041.08c sumnair id va ā vivāse ||
 1.041.09a caturaś cid dadamānād bibhīyād ā nidhātoḥ |
 1.041.09c na duruktāya sprīhayet ||

1.042.01a sam pūṣann adhvanas tira vy aṃho vimuco napāt |
 1.042.01c sakṣvā deva pra ṇas puraḥ ||
 1.042.02a yo naḥ pūṣann agho vṛko duḥśeva ādideśati |
 1.042.02c apa sma tam patho jahi ||
 1.042.03a apa tyam paripanthinam muṣīvāṇam huraścitam |
 1.042.03c dūram adhi sruter aja ||
 1.042.04a tvaṃ tasya dvayāvino 'ghaśaṃsasya kasya cit |
 1.042.04c padābhi tiṣṭha tapuṣim ||
 1.042.05a ā tat te dasra mantumaḥ pūṣann avo vṛṇīmahe |
 1.042.05c yena pitṛn acodayaḥ ||
 1.042.06a adhā no viśvasaubhaga hiraṇyavāśīmattama |
 1.042.06c dhanāni suṣaṇā kṛdhi ||
 1.042.07a ati naḥ saścato naya sugā naḥ supathā kṛṇu |
 1.042.07c pūṣann iha kratuṃ vidaḥ ||
 1.042.08a abhi sūyavasam naya na navajvāro adhvane |
 1.042.08c pūṣann iha kratuṃ vidaḥ ||
 1.042.09a śagdhi pūrdhi pra yaṃsi ca śīśīhi prāsy udaram |
 1.042.09c pūṣann iha kratuṃ vidaḥ ||
 1.042.10a na pūṣaṇam methāmasi sūktair abhi gṛṇīmasi |
 1.042.10c vasūni dasmam īmahe ||

1.043.01a kad rudrāya pracetase mīdhuṣṭamāya tavyase |
 1.043.01c vocema śaṃtamaṃ hṛde ||
 1.043.02a yathā no aditiḥ karat paśve nṛbhyo yathā gave |
 1.043.02c yathā tokāya rudriyam ||
 1.043.03a yathā no mitro varuṇo yathā rudraś ciketati |
 1.043.03c yathā viśve sajośasaḥ ||
 1.043.04a gāthapatim medhapatim rudraṃ jalāśabheśajam |
 1.043.04c tac chaṃyoḥ sumnam īmahe ||
 1.043.05a yaḥ śukra iva sūryo hiraṇyam iva rocate |
 1.043.05c śreṣṭho devānām vasuḥ ||
 1.043.06a śaṃ naḥ karaty arvate sugam meṣāya meṣye |
 1.043.06c nṛbhyo nāribhyo gave ||

- 1.043.07a asme soma śriyam adhi ni dhehi śatasya nṛṇām |
1.043.07c mahi śravas tuvinṛmṇam ||
1.043.08a mā naḥ somaparibādho mārātayo juhuranta |
1.043.08c ā na indo vāje bhaja ||
1.043.09a yās te prajā amṛtasya parasmin dhāmann ṛtasya |
1.043.09c mūrdhā nābhā soma vena ābhūṣantīḥ soma vedah ||
- 1.044.01a agne vivasvad uṣasaś citraṃ rādho amartya |
1.044.01c ā dāśuṣe jātavedo vahā tvam adyā devāṃ uṣarbudhaḥ ||
1.044.02a juṣṭo hi dūto asi havyvāhano 'gne rathīr adhvarāṇām |
1.044.02c sajūr aśvibhyām uṣasā suvīryam asme dhehi śravo bṛhat ||
1.044.03a adyā dūtaṃ vṛṇīmahe vasum agnim purupriyam |
1.044.03c dhūmaketum bhārjikaṃ vyuṣṭīṣu yajñānām adhvaraśriyam ||
1.044.04a śreṣṭham yaviṣṭham atithiṃ svāhutaṃ juṣṭam janāya dāśuṣe |
1.044.04c devāṃ achā yātave jātavedasam agnim īde vyuṣṭīṣu ||
1.044.05a staviṣyāmi tvām ahaṃ viśvasyāmṛta bhojana |
1.044.05c agne trātāram amṛtam miyedhya yajīṣṭham havyvāhana ||
1.044.06a suśamso bodhi gṛṇate yaviṣṭhya madhujihvaḥ svāhutaḥ |
1.044.06c praskaṇvasya pratirann āyur jīvase namasyā daivyaṃ janam ||
1.044.07a hotāram viśvavedasam sam hi tvā viśa indhate |
1.044.07c sa ā vaha puruhūta pracetaso 'gne devāṃ iha dravat ||
1.044.08a savitāram uṣasam aśvinā bhagam agniṃ vyuṣṭīṣu kṣapaḥ |
1.044.08c kaṇvāsas tvā sutasomāsa indhate havyvāham svadhvara ||
1.044.09a patir hy adhvarāṇām agne dūto viśām asi |
1.044.09c uṣarbudha ā vaha somapītaye devāṃ adya svardṛśaḥ ||
1.044.10a agne pūrvā anūśaso vibhāvaso dīdetha viśvadarśataḥ |
1.044.10c asi grāmeṣv avitā purohito 'si yajñeṣu mānuṣaḥ ||
1.044.11a ni tvā yajñasya sādhanam agne hotāram ṛtvijam |
1.044.11c manuṣvad deva dhīmahi pracetasam jīraṃ dūtam amartyam ||
1.044.12a yad devānām mitramahaḥ purohito 'ntaro yāsi dūtyam |
1.044.12c sindhor iva prasvanitāsa ūrmayo 'gner bhrājante arcayaḥ ||
1.044.13a śrudhi śrutkarṇa vahnibhir devair agne sayāvabhiḥ |
1.044.13c ā sīdantu barhiṣi mitro aryamā prātaryāvāṇo adhvaram ||
1.044.14a śṛṇvantu stomam marutaḥ sudānavo 'gnijihvā ṛtāvṛdhaḥ |
1.044.14c pibatu somam varuṇo dhṛtavrato 'śvibhyām uṣasā sajūḥ ||
- 1.045.01a tvam agne vasūṃr iha rudrāṃ ādityāṃ uta |
1.045.01c yajā svadhvaram janam manujātaṃ ghṛtapruṣam ||
1.045.02a śruṣṭivāno hi dāśuṣe devā agne vicetasah |
1.045.02c tān rohidaśva girvaṇas trayastrimśatam ā vaha ||
1.045.03a priyamedhavad atrivaj jātavedo virūpavat |
1.045.03c aṅgirasvan mahivrata praskaṇvasya śrudhī havam ||
1.045.04a mahikerava ūtaye priyamedhā ahūṣata |
1.045.04c rājantam adhvarāṇām agniṃ śukreṇa śociṣā ||
1.045.05a ghṛtāhavana santyemā u ṣu śrudhī giraḥ |
1.045.05c yābhiḥ kaṇvasya sūnavo havante 'vase tvā ||
1.045.06a tvām citraśravastama havante vikṣu jantavaḥ |

1.045.06c śociškeśam purupriyāgne havvyāya voḍhave ||
 1.045.07a ni tvā hotāram ṛtvijaṃ dadhire vasuvittamam |
 1.045.07c śrutkarṇaṃ saprathastamaṃ viprā agne diviṣṭiṣu ||
 1.045.08a ā tvā viprā acucyavuh sutasomā abhi prayaḥ |
 1.045.08c bṛhad bhā bibhrato havir agne martāya dāsuse ||
 1.045.09a prātaryāvṇaḥ sahaskrta somapeyāya santya |
 1.045.09c ihādya daivyaṃ janam barhir ā sādāyā vaso ||
 1.045.10a arvāñcaṃ daivyaṃ janam agne yakṣva sahūtibhiḥ |
 1.045.10c ayaṃ somaḥ sudānavas tam pāta tiroahnyam ||

1.046.01a eṣo uṣā apūrvyā vy uchatī priyā divaḥ |
 1.046.01c stuṣe vām aśvinā bṛhat ||
 1.046.02a yā dasrā sindhumātarā manotarā rayiṇām |
 1.046.02c dhiyā devā vasuvidā ||
 1.046.03a vacyante vām kakuhāso jūrṇāyām adhi viṣṭapi |
 1.046.03c yad vām ratho vibhiṣ patāt ||
 1.046.04a haviṣā jāro apām piparti papurir narā |
 1.046.04c pitā kuṭasya carṣaṇiḥ ||
 1.046.05a ādāro vām matinām nāsatyā matavacasā |
 1.046.05c pātaṃ somasya dhṛṣṇuyā ||
 1.046.06a yā naḥ pīparad aśvinā jyotiṣmatī tamas tiraḥ |
 1.046.06c tām asme rāsāthām iṣam ||
 1.046.07a ā no nāvā matinām yātam pārāya gantave |
 1.046.07c yuñjāthām aśvinā ratham ||
 1.046.08a aritraṃ vām divas pṛthu tīrthe sindhūnām rathaḥ |
 1.046.08c dhiyā yuyujra indavaḥ ||
 1.046.09a divas kaṇvāsa indavo vasu sindhūnām pade |
 1.046.09c svam vavriṃ kuha dhitsathaḥ ||
 1.046.10a abhūd u bhā u aṃśave hiraṇyam prati sūryaḥ |
 1.046.10c vy akhyaḥ jihvayāsitaḥ ||
 1.046.11a abhūd u pāram etave panthā ṛtasya sādhyā |
 1.046.11c adarśī vi srutir divaḥ ||
 1.046.12a tat-tad id aśvinor avo jaritā prati bhūṣati |
 1.046.12c made somasya pipratoḥ ||
 1.046.13a vāvasānā vivasvati somasya pītyā girā |
 1.046.13c manuṣvac chambhū ā gatam ||
 1.046.14a yuvor uṣā anu śriyam pariḥmanor upācarat |
 1.046.14c ṛtā vanatho aktubhiḥ ||
 1.046.15a ubhā pibatam aśvinobhā naḥ śarma yachatam |
 1.046.15c avidriyābhir ūtibhiḥ ||

1.047.01a ayaṃ vām madhumattamaḥ sutaḥ soma ṛtāvṛdhā |
 1.047.01c tam aśvinā pibatam tiroahnyam dhattam ratnāni dāsuse ||
 1.047.02a trivandhureṇa trivṛtā supeśasā rathenā yātam aśvinā |
 1.047.02c kaṇvāso vām brahma kṛṇvanty adhvare teṣāṃ su śṛṇutaṃ havam ||
 1.047.03a aśvinā madhumattamam pātaṃ somam ṛtāvṛdhā |
 1.047.03c athādya dasrā vasu bibhratā rathe dāsvāṃsam upa gachatam ||

1.047.04a triṣadhasthe barhiṣi viśvavedasā madhvā yajñam mimikṣatam |
 1.047.04c kaṇvāso vāṃ sutasomā abhidyo yuvāṃ havante aśvinā ||
 1.047.05a yābhiḥ kaṇvam abhiṣtibhiḥ prāvataṃ yuvam aśvinā |
 1.047.05c tābhiḥ ṣv asmāṃ avataṃ śubhas patī pātaṃ somam ṛtāvṛdhā ||
 1.047.06a sudāse dasrā vasu bibhratā rathe pṛkṣo vahatam aśvinā |
 1.047.06c rayiṃ samudrād uta vā divas pary asme dhattam purusprham ||
 1.047.07a yan nāsatyā parāvati yad vā stho adhi turvaśe |
 1.047.07c ato rathena suvṛtā na ā gataṃ sākaṃ sūryasya raśmibhiḥ ||
 1.047.08a arvāñcā vāṃ saptayo 'dhvaraśriyo vahantu savaned upa |
 1.047.08c iṣam pṛñcantā sukṛte sudānava ā barhiḥ sīdataṃ narā ||
 1.047.09a tena nāsatyā gataṃ rathena sūryatvacā |
 1.047.09c yena śaśvad ūhathur dāśuṣe vasu madhvaḥ somasya pītaye ||
 1.047.10a ukthebhir arvāg avase purūvasū arkaiś ca ni hvayāmahe |
 1.047.10c śaśvat kaṇvānāṃ sadasi priye hi kaṃ somam papathur aśvinā ||

1.048.01a saha vāmena na uṣo vy uchā duhitar divaḥ |
 1.048.01c saha dyumnena bṛhatā vibhāvāri rāyā devi dāsvatī ||
 1.048.02a aśvāvatīr gomatīr viśvasuvido bhūri cyavanta vastave |
 1.048.02c ud īraya prati mā sūnṛtā uṣaś coda rādho maghonām ||
 1.048.03a uvāsoṣā uchāc ca nu devī jīrā rathānām |
 1.048.03c ye asyā ācaraṇeṣu dadhīre samudre na śravasyavaḥ ||
 1.048.04a uṣo ye te pra yāmeṣu yuñjate mano dānāya sūrayaḥ |
 1.048.04c atrāha tat kaṇva eṣāṃ kaṇvatamo nāma gṛṇāti nṛṇām ||
 1.048.05a ā ghā yoṣeva sūnary uṣā yāti prabhuñjatī |
 1.048.05c jarayantī vṛjanam padvad iyata ut pātayati pakṣiṇaḥ ||
 1.048.06a vi yā sṛjati samanāṃ vy arthinaḥ padaṃ na vety odatī |
 1.048.06c vayo nakiṣ ṭe paptivāṃsa āsate vyuṣṭau vājinīvati ||
 1.048.07a eṣāyukta parāvataḥ sūryasyodayanād adhi |
 1.048.07c śataṃ rathebhiḥ subhagoṣā iyaṃ vi yāty abhi mānuṣān ||
 1.048.08a viśvam asyā nānāma cakṣase jagaj jyotiṣ kṛṇoti sūnarī |
 1.048.08c apa dveṣo maghonī duhitā diva uṣā uchad apa sridhaḥ ||
 1.048.09a uṣā ā bhāhi bhānunā candreṇa duhitar divaḥ |
 1.048.09c āvahantī bhūry asmabhyam saubhagam vyuchantī diviṣṭiṣu ||
 1.048.10a viśvasya hi prāṇanam jīvanam tve vi yad uchasi sūnari |
 1.048.10c sā no rathena bṛhatā vibhāvāri śrudhi citrāmaghe havam ||
 1.048.11a uṣo vājam hi vaṃsva yaś citro mānuṣe jane |
 1.048.11c tenā vaha sukṛto adhvarāṃ upa ye tvā gṛṇanti vahnayaḥ ||
 1.048.12a viśvān devāṃ ā vaha somapītaye 'ntarikṣād uṣas tvam |
 1.048.12c sāsmāsu dhā gomad aśvāvad ukthyam uṣo vājam suvīryam ||
 1.048.13a yasyā ruśanto arcayaḥ prati bhadrā adṛkṣata |
 1.048.13c sā no rayiṃ viśvavāram supesāsam uṣā dadātu sugmyam ||
 1.048.14a ye cid dhi tvām ṛsayāḥ pūrva ūtaye juhūre 'vase mahi |
 1.048.14c sā na stomāṃ abhi gṛṇihi rādhasoṣaḥ śukreṇa śociṣā ||
 1.048.15a uṣo yad adya bhānunā vi dvārāv ṛṇavo divaḥ |
 1.048.15c pra no yachatād avṛkam pṛthu chardiḥ pra devi gomatīr iṣaḥ ||
 1.048.16a saṃ no rāyā bṛhatā viśvapeśasā mimikṣvā sam idābhir ā |
 1.048.16c saṃ dyumnena viśvaturōṣo mahi saṃ vājair vājinīvati ||

1.049.01a uṣo bhadrebhir ā gahi divas̄ cid rocanād adhi |
 1.049.01c vahantv aruṇapsava upa tvā somino gṛham ||
 1.049.02a supeśasaṃ sukhaṃ rathaṃ yam adhyasthā uṣas tvam |
 1.049.02c tenā suśravasaṃ janam prāvādyā duhitar divaḥ ||
 1.049.03a vayas̄ cit te patatṛiṇo dvipac catuṣpad arjuni |
 1.049.03c uṣaḥ prārann ṛtūṃ anu divo antebhyas pari ||
 1.049.04a vyuchantī hi raśmibhir viśvam ābhāsi rocanam |
 1.049.04c tām tvām uṣar vasūyavo gīrbhiḥ kaṇvā ahūṣata ||

1.050.01a ud u tyam jātavedasaṃ devaṃ vahanti ketavaḥ |
 1.050.01c dṛṣe viśvāya sūryam ||
 1.050.02a apa tye tāyavo yathā nakṣatrā yanty aktubhiḥ |
 1.050.02c sūrāya viśvacakṣase ||
 1.050.03a adṛśram asya ketavo vi raśmayo janāṃ anu |
 1.050.03c bhrājanto agnayo yathā ||
 1.050.04a taraṇir viśvadarśato jyotiṣkṛd asi sūrya |
 1.050.04c viśvam ā bhāsi rocanam ||
 1.050.05a pratyañ devānāṃ viśaḥ pratyaññ ud eṣi mānuṣān |
 1.050.05c pratyañ viśvaṃ svar dṛṣe ||
 1.050.06a yenā pāvaka cakṣasā bhuraṇyantam janāṃ anu |
 1.050.06c tvam varuṇa paśyasi ||
 1.050.07a vi dyām eṣi rajas pṛthv ahā mimāno aktubhiḥ |
 1.050.07c paśyañ janmāni sūrya ||
 1.050.08a sapta tvā harito rathe vahanti deva sūrya |
 1.050.08c śociṣkeśaṃ vicakṣaṇa ||
 1.050.09a ayukta sapta śundhyuvaḥ sūro rathasya naptyaḥ |
 1.050.09c tābhir yāti svayuktibhiḥ ||
 1.050.10a ud vayaṃ tamasaḥ pari jyotiṣ paśyanta uttaram |
 1.050.10c devaṃ devatrā sūryam aganma jyotir uttamam ||
 1.050.11a udyann adya mitramaha ārohann uttarāṃ divam |
 1.050.11c hṛdrogam mama sūrya harimāṇaṃ ca nāśaya ||
 1.050.12a śukeṣu me harimāṇaṃ ropañākāsu dadhmasi |
 1.050.12c atho hāridraveṣu me harimāṇaṃ ni dadhmasi ||
 1.050.13a ud agād ayam ādityo viśvena sahasā saha |
 1.050.13c dviṣantam mahyaṃ randhayan mo aham dviṣate radham ||

1.051.01a abhi tyam meṣam puruhūtam ṛgmiyam indraṃ gīrbhir madatā vasvo arṇavam |
 1.051.01c yasya dyāvo na vicaranti mānuṣā bhujē maṃhiṣṭham abhi vipram arcata ||
 1.051.02a abhīm avanvan svabhiṣṭim ūtayo 'ntarikṣaprām taviṣibhir āvṛtam |
 1.051.02c indraṃ dakṣāsa ṛbhavo madacyutaṃ śatakṛtaṃ javanī sūnṛtāruhat ||
 1.051.03a tvam gotram aṅgirobhyo 'vṛṇor apotātraye śatadureṣu gātuvit |
 1.051.03c sasena cid vimadāyāvaho vasv ājāv adriṃ vāvasānasya nartayan ||
 1.051.04a tvam apām apidhānāvṛṇor apādhārayaḥ parvate dānumad vasu |
 1.051.04c vṛtram yad indra śavasāvadhīr ahim ād it sūryaṃ divy ārohayo dṛṣe ||
 1.051.05a tvam māyābhir apa māyino 'dhamaḥ svadhābhir ye adhi śuptāv ajuhvata |
 1.051.05c tvam pipror nṛmaṇaḥ prārujaḥ puraḥ pra ṛjīsvānaṃ dasyuhatyēṣv āvitha ||

1.051.06a tvam kutsam śuṣṇahatyēṣv āvithārandhayo 'tithigvāya śambaram |
 1.051.06c mahāntam cid arbudaṃ ni kramiḥ padā sanād eva dasyuhatyāya jajñiṣe ||
 1.051.07a tve viśvā taviṣi sadhryag ghitā tava rādhaḥ somapīthāya harṣate |
 1.051.07c tava vajras cikite bāhvor hito vṛścā śatoror ava viśvāni vṛṣṇyā ||
 1.051.08a vi jānihy āryān ye ca dasyavo barhiṣmate randhayā śāsad avratān |
 1.051.08c śākī bhava yajamānasya coditā viśvet tā te sadhamādeṣu cākana ||
 1.051.09a anuvratāya randhayann apavratān ābhūbhir indraḥ śnathayann anābhuvah |
 1.051.09c vṛddhasya cid vardhato dyām inakṣata stavāno vamro vi jaghāna samdihah ||
 1.051.10a takṣad yat ta uśanā sahasā saho vi rodasī majmanā bādgate śavaḥ |
 1.051.10c ā tvā vātasya nṛmaṇo manoyuja ā pūryamāṇam avahann abhi śravaḥ ||
 1.051.11a mandīṣṭa yad uśane kāvyē sacāṃ indro vaṅkū vaṅkutarādhi tiṣṭhati |
 1.051.11c ugro yayim nir apah srotasāsṛjad vi śuṣṇasya dṛmhitā airayat puraḥ ||
 1.051.12a ā smā ratham vṛṣapāṇeṣu tiṣṭhasi śāryātasya prabhṛtā yeṣu mandase |
 1.051.12c indra yathā sutasomeṣu cākano 'narvāṇam ślokaṃ ā rohase divi ||
 1.051.13a adadā arbhām mahate vacasyave kakṣivate vṛcayām indra sunvate |
 1.051.13c menābhavo vṛṣaṇasvasya suktrato viśvet tā te savaneṣu pravācyā ||
 1.051.14a indro aśrāyi sudhyo nireke pajreṣu stomo duryo na yūpaḥ |
 1.051.14c aśvayur gavyū rathayur vasūyur indra id rāyaḥ kṣayati prayantā ||
 1.051.15a idaṃ namo vṛṣabhāya svarāje satyaśuṣmāya tavase 'vāci |
 1.051.15c asminn indra vṛjane sarvavirāḥ smat sūribhis tava śarman syāma ||

1.052.01a tyam su meṣam mahayā svarvidam śatam yasya subhvaḥ sākam irate |
 1.052.01c atyam na vājam havanasyadam ratham endram vavṛtyām avase suvṛktibhiḥ ||
 1.052.02a sa parvato na dharuṇeṣv acyutaḥ sahasramūtis taviṣiṣu vāvṛdhe |
 1.052.02c indro yad vṛtram avadhīn nadivṛtam ubjann arṇāṃsi jarhṣāṇo andhasā ||
 1.052.03a sa hi dvaro dvariṣu vavra ūdhani candrabudhno madavṛddho maṇiṣibhiḥ |
 1.052.03c indram tam ahve svapasyayā dhiyā mamhiṣṭharātīm sa hi paprir andhasaḥ ||
 1.052.04a ā yam pṛṇanti divi sadmabarhiṣaḥ samudram na subhvaḥ svā abhiṣṭayaḥ |
 1.052.04c tam vṛtrahatye anu tasthur ūtayaḥ śuṣmā indram avātā ahrutapsavaḥ ||
 1.052.05a abhi svavṛṣṭim made asya yudhyato raghvīr iva pravaṇe sasrur ūtayaḥ |
 1.052.05c indro yad vajrī dhṛṣamāṇo andhasā bhinad valasya paridhīm iva tritaḥ ||
 1.052.06a pariṃ ghrṇā carati titviṣe śavo 'po vṛtvī rajaso budhnam āśayat |
 1.052.06c vṛtrasya yat pravaṇe durgrbhiśvano nijaghantha hanvor indra tanyatum ||
 1.052.07a hradam na hi tvā nyṣanty ūrmayo brahmāṇindra tava yāni vardhanā |
 1.052.07c tvaṣṭā cit te yuyam vāvṛdhe śavas tatakṣa vajram abhibhūtyojasam ||
 1.052.08a jaghanvām u haribhiḥ sambhṛtakratav indra vṛtram manuṣe gātuyann apah |
 1.052.08c ayachathā bāhvor vajram āyasam adhārayo divy ā sūryam dṛṣe ||
 1.052.09a bṛhat svaścandram amavad yad ukthyam akṛṇvata bhīyasā rohaṇam divaḥ |
 1.052.09c yan mānuṣapradhanā indram ūtayaḥ svar nṛṣāco maruto 'madann anu ||
 1.052.10a dyauś cid asyāmavām aheḥ svanād ayoyavid bhīyasā vajra indra te |
 1.052.10c vṛtrasya yad badbadhānasya rodasī made sutasya śavasābhinac chirah ||
 1.052.11a yad in nv indra pṛthivī daśabhujir ahāni viśvā tatananta kṛṣṭayaḥ |
 1.052.11c atrāha te maghavan viśrutam saho dyām anu śavasā barhaṇā bhuvat ||
 1.052.12a tvam asya pāre rajaso vyomanah svabhūtyojā avase dhṛṣanmanah |
 1.052.12c cakṛṣe bhūmim pratimānam ojaso 'paḥ svaḥ paribhūr eṣy ā divam ||
 1.052.13a tvam bhuvah pratimānam pṛthivyā ṛṣavīrasya bṛhataḥ patir bhūḥ |
 1.052.13c viśvam āprā antarikṣam mahitvā satyam addhā nakir anyas tvāvān ||
 1.052.14a na yasya dyāvāpṛthivī anu vyaco na sindhavo rajaso antam ānaśuḥ |

1.052.14c nota svavṛṣṭim made asya yudhyata eko anyac cakṛṣe viśvam ānuṣak ||
 1.052.15a ārcann atra marutaḥ sasminn ājau viśve devāso amadann anu tvā |
 1.052.15c vṛtrasya yad bhṛṣṭimatā vadhena ni tvam indra praty ānaṃ jaghantha ||

1.053.01a ny ū ṣu vācam pra mahe bharāmahe gira indrāya sadane vivasvataḥ |
 1.053.01c nū cid dhi ratnaṃ sasatām ivāvidan na duṣṭutir draviṇodeṣu śasyate ||
 1.053.02a duro aśvasya dura indra gor asi duro yavasya vasuna inas patiḥ |
 1.053.02c śikṣānaraḥ pradivo akāmakarśanaḥ sakhā sakhibhyas tam idam gṛṇīmasi ||
 1.053.03a śacīva indra purukṛd dyumattama taved idam abhitaś cekite vasu |
 1.053.03c ataḥ samgṛbhyābhībḥūta ā bhara mā tvāyato jarituḥ kāmam ūnayiḥ ||
 1.053.04a ebhir dyubhiḥ sumanā ebhir indubhir nirundhāno amatim gobhir aśvinā |
 1.053.04c indreṇa dasyuṃ darayanta indubhir yutadveṣasaḥ sam iṣā rabhemahi ||
 1.053.05a sam indra rāyā sam iṣā rabhemahi sam vājebhiḥ puruścandrair abhidyubhiḥ |
 1.053.05c sam devyā pramatyā vīraśuṣmayā goagrayāśvāvatyā rabhemahi ||
 1.053.06a te tvā madā amadan tāni vṛṣṇyā te somāso vṛtrahatyēṣu satpate |
 1.053.06c yat kārave daśa vṛtrāṇy aprati barhiṣmate ni sahasrāṇi barhayaḥ ||
 1.053.07a yudhā yudham upa ghed eṣi dhṛṣṇuyā purā puraṃ sam idam haṃsy ojasā |
 1.053.07c namyā yad indra sakhyā parāvati nibarhayo namuciṃ nāma māyinam ||
 1.053.08a tvam karañjam uta parṇayaṃ vadhīs tejiṣṭhayātithigvasya vartanī |
 1.053.08c tvam śatā vaṅṛdasyābhinat puro 'nānudaḥ pariṣūtā ṛjīśvanā ||
 1.053.09a tvam etāñ janarājño dvir daśābandhunā suśravasopajagmuṣaḥ |
 1.053.09c ṣaṣṭim sahasrā navatim nava śruto ni cakreṇa rathyā duṣpadāvṛṇak ||
 1.053.10a tvam āvitha suśravasaṃ tavotibhis tava trāmabhir indra tūrvayāṇam |
 1.053.10c tvam asmai kutsam atithigvam āyur mahe rājñe yūne arandhanāyaḥ ||
 1.053.11a ya udṛcīndra devagopāḥ sakhāyas te śivatamā asāma |
 1.053.11c tvāṃ stoṣāma tvayā suvīrā drāghīya āyuh prataraṃ dadhānāḥ ||

1.054.01a mā no asmin maghavan pṛtsv aṃhasi nahi te antaḥ śavasah pariṇaśe |
 1.054.01c akrandayo nadyo roruvad vanā kathā na kṣoṇir bhīyasā sam ārata ||
 1.054.02a arcā śakrāya śākinē śacivate śṛṇvantam indram mahayann abhi ṣṭuhi |
 1.054.02c yo dhṛṣṇunā śavasā rodasī ubhe vṛṣā vṛṣatvā vṛṣabho nyṛñjate ||
 1.054.03a arcā dive bṛhate sūṣyaṃ vacaḥ svakṣatram yasya dhṛṣato dhṛṣan manaḥ |
 1.054.03c bṛhacchravā asuro barhaṇā kṛtaḥ puro haribhyāṃ vṛṣabho ratho hi ṣaḥ ||
 1.054.04a tvam divo bṛhataḥ sānu kopayo 'va tmanā dhṛṣatā śambaram bhinat |
 1.054.04c yan māyino vrandino mandinā dhṛṣac chitām gabhastim aśanim pṛtanyasi ||
 1.054.05a ni yad vṛṇakṣi śvasanasya mūrdhani śuṣṇasya cid vrandino roruvad vanā |
 1.054.05c prācīnena manasā barhaṇāvātā yad adyā cit kṛṇavaḥ kas tvā pari ||
 1.054.06a tvam āvitha naryaṃ turvaśaṃ yaduṃ tvam turvītim vayyaṃ śatakrato |
 1.054.06c tvam ratham etaśaṃ kṛtvye dhane tvam puro navatim dambhayo nava ||
 1.054.07a sa ghā rājā satpatiḥ sūśuvaj jano rātahavyaḥ prati yaḥ śāsam invati |
 1.054.07c ukthā vā yo abhigṛṇāti rādhasā dānur asmā uparā pivate divaḥ ||
 1.054.08a asamam kṣatram asamā maṇiṣā pra somapā apasā santu neme |
 1.054.08c ye ta indra daduṣo vardhayanti mahi kṣatram sthaviraṃ vṛṣṇyaṃ ca ||
 1.054.09a tubhyed ete bahulā adridugdḥās camūṣadaś camasā indrapānāḥ |
 1.054.09c vy aśnuhi tarpayā kāmam eṣām athā mano vasudeyāya kṛṣva ||
 1.054.10a apām atiṣṭhad dharuṇahvaraṃ tamo 'ntar vṛtrasya jaṭharaṣu parvataḥ |
 1.054.10c abhīm indro nadyo vavriṇā hitā viśvā anuṣṭhāḥ pravaneṣu jighnate ||

- 1.054.11a sa śevṛdham adhi dhā dyumnam asme mahi kṣatram janāśād indra tavyam |
1.054.11c rakṣā ca no maghonaḥ pāhi sūrīn rāye ca naḥ svapatyā iṣe dhāḥ ||
- 1.055.01a divaś cid asya varimā vi papratha indram na mahnā pṛthivī cana prati |
1.055.01c bhīmas tuviṣmāñ carṣaṇibhya ātapaḥ śīśīte vajram tejase na vaṃsagaḥ ||
1.055.02a so arṇavo na nadyaḥ samudriyaḥ prati gṛbhṇāti viśritā varīmabhiḥ |
1.055.02c indraḥ somasya pītaye vṛṣāyate sanāt sa yudhma ojasā panasyate ||
1.055.03a tvam tam indra parvatam na bhojase maho nṛmṇasya dharmanām irajyasi |
1.055.03c pra vīryeṇa devatāti cekite viśvasmā ugraḥ karmaṇe purohitaḥ ||
1.055.04a sa id vane namasyubhir vacasyate cāru janeṣu prabruvāṇa indriyam |
1.055.04c vṛṣā chandur bhavati haryato vṛṣā kṣemeṇa dhenām maghavā yad invati ||
1.055.05a sa in mahāni samithāni majmanā kṛṇoti yudhma ojasā janebhyaḥ |
1.055.05c adhā cana śrad dadhati tviṣimata indrāya vajram nighanighnate vadham ||
1.055.06a sa hi śravasyuḥ sadanāni kṛtrimā kṣmayā vṛdhāna ojasā vināśayan |
1.055.06c jyotīṃṣi kṛṇvann avṛkāni yajyave 'va sukratuḥ sartavā apaḥ sṛjat ||
1.055.07a dānāya manaḥ somapāvann astu te 'rvāñcā harī vandanaśrud ā kṛdhi |
1.055.07c yamiṣṭhāsaḥ sārathayo ya indra te na tvā ketā ā dabhnuvanti bhūrṇayaḥ ||
1.055.08a aprakṣitam vasu bibharṣi hastayor aśādham sahas tanvi śruto dadhe |
1.055.08c āvṛtāso 'vatāso na kartṛbhis tanūṣu te kratava indra bhūrayaḥ ||
- 1.056.01a eṣa pra pūrvīr ava tasya camriṣo 'tyo na yoṣām ud ayamsta bhurvaṇiḥ |
1.056.01c dakṣam mahe pāyayate hiraṇyayam ratham āvṛtyā hariyogam ṛbhvasam ||
1.056.02a tam gūrtayo nemanniṣaḥ pariṇasaḥ samudram na saṃcaraṇe saniṣyavaḥ |
1.056.02c patim dakṣasya vidathasya nū saho girim na venā adhi roha tejasā ||
1.056.03a sa turvaṇir mahām areṇu paumsye girer bhṛṣṭir na bhrājate tujā śavaḥ |
1.056.03c yena śuṣṇam māyinam āyaso made dudhra ābhūṣu rāmayan ni dāmani ||
1.056.04a devī yadi taviṣi tvāvṛdhotaya indram siṣakty uṣasam na sūryaḥ |
1.056.04c yo dhṛṣṇunā śavasā bādgate tama iyarti reṇum bṛhad arhariṣvaṇiḥ ||
1.056.05a vi yat tiro dharuṇam acyutam rajo 'tiṣṭhipo diva ātāsu barhaṇā |
1.056.05c svarmīdhe yan mada indra harṣyāhan vṛtram nir apām aubjo arṇavam ||
1.056.06a tvam divo dharuṇam dhiṣa ojasā pṛthivyā indra sadaneṣu māhinaḥ |
1.056.06c tvam sutasya made ariṇā apo vi vṛtrasya samayā pāṣyārujaḥ ||
- 1.057.01a pra maṃhiṣṭhāya bṛhate bṛhadraye satyaśuṣmāya tavase matim bhare |
1.057.01c apām iva pravaṇe yasya durdharām rādho viśvāyu śavase apāvṛtam ||
1.057.02a adha te viśvam anu hāsad iṣṭaya āpo nimneva savanā haviṣmataḥ |
1.057.02c yat parvate na samaśita haryata indrasya vajraḥ śnathitā hiraṇyayaḥ ||
1.057.03a asmaī bhīmāya namasā sam adhvara uṣo na śubhra ā bharā paṇiyase |
1.057.03c yasya dhāma śravase nāmendriyam jyotir akāri harito nāyase ||
1.057.04a ime ta indra te vayam puruṣtuta ye tvārabhya carāmasi prabhūvaso |
1.057.04c nahi tvad anyo girvaṇo giraḥ saghat kṣoṇīr iva prati no harya tad vacaḥ ||
1.057.05a bhūri ta indra vīryam tava smasy asya stotur maghavan kāmam ā pṛṇa |
1.057.05c anu te dyaur bṛhatī vīryam mama iyam ca te pṛthivī nema ojase ||
1.057.06a tvam tam indra parvatam mahām urum vajreṇa vajrin parvaśaś cakartitha |
1.057.06c avāsrjo nivṛtāḥ sartavā apaḥ satrā viśvam dadhiṣe kevalam sahaḥ ||

1.058.01a nū cit sahojā amṛto ni tundate hotā yad dūto abhavad vivasvataḥ |
 1.058.01c vi sādhiṣṭhebhīḥ pathibhī rajo mama ā devatātā haviṣā vivāsati ||
 1.058.02a ā svam adma yuvamāno ajaras tṛṣv aviṣyann ataseṣu tiṣṭhati |
 1.058.02c atyo na pṛṣṭham pṛṣitasya rocate divo na sānu stanayann acikradat ||
 1.058.03a krānā rudrebhir vasubhiḥ purohito hotā niṣatto rayiṣād amartyaḥ |
 1.058.03c ratho na vikṣv ṛñjasāna āyūṣu vy ānuṣag vāryā deva ṛṇvati ||
 1.058.04a vi vātajūto ataseṣu tiṣṭhate vṛthā juhūbhiḥ sṛṇyā tuviṣvaṇiḥ |
 1.058.04c tṛṣu yad agne vanino vṛṣāyase kṛṣṇam ta ema ruśadūrme ajara ||
 1.058.05a tapurjambho vana ā vātacodito yūthe na sāhvām̃ ava vāti vaṃsagaḥ |
 1.058.05c abhivrajann akṣitam pājasā raja sthātuś caratham bhayate patatṛiṇaḥ ||
 1.058.06a dadhuṣ ṭvā bhṛgavo mānuṣeṣv ā rayim na cāruṃ suhavaṃ janebhyaḥ |
 1.058.06c hotāram agne atithim vareṇyam mitraṃ na śevaṃ divyāya janmane ||
 1.058.07a hotāraṃ sapta juhvo yajiṣṭhaṃ yaṃ vāghato vṛṇate adhvareṣu |
 1.058.07c agnim viśveśām aratim vasūnām saparyāmi prayasā yāmi ratnam ||
 1.058.08a achidrā sūno sahaso no adya stotṛbhyo mitramahaḥ śarma yacha |
 1.058.08c agne gṛṇantam aṃhasa uruṣyorjo napāt pūrbhir āyasibhiḥ ||
 1.058.09a bhavā varūthaṃ gṛṇate vibhāvo bhavā maghavan maghavadbhyaḥ śarma |
 1.058.09c uruṣyāgne aṃhaso gṛṇantam prātar makṣū dhiyāvasur jagamyāt ||

1.059.01a vayā id agne agnayas te anye tve viśve amṛtā mādayante |
 1.059.01c vaiśvānara nābhir asi kṣitīnām sthūṇeva janām̃ upamid yayantha ||
 1.059.02a mūrdhā divo nābhir agniḥ pṛthivyā athābhavad aratī rodasyoḥ |
 1.059.02c taṃ tvā devāso 'janayanta devaṃ vaiśvānara jyotir id āryāya ||
 1.059.03a ā sūrye na raśmayo dhruvāso vaiśvānare dadhire 'gnā vasūni |
 1.059.03c yā parvateṣv ośadhiṣv apsu yā mānuṣeṣv asi tasya rājā ||
 1.059.04a bṛhatī iva sūnave rodasī giro hotā manuṣyo na dakṣaḥ |
 1.059.04c svarvate satyaśuṣmāya pūrvīr vaiśvānarāya nṛtamāya yahviḥ ||
 1.059.05a divaś cit te bṛhato jātavedo vaiśvānara pra ririce mahitvam |
 1.059.05c rājā kṛṣṭīnām asi mānuṣiṇām yudhā devebhyo varivaś cakartha ||
 1.059.06a pra nū mahitvaṃ vṛṣabhasya vocaṃ yaṃ pūravo vṛtrahaṇaṃ sacante |
 1.059.06c vaiśvānaro dasyum agnir jaghanvām̃ adhūnot kāṣṭhā ava śambaram bhet ||
 1.059.07a vaiśvānaro mahimnā viśvakṛṣṭir bharadvājeṣu yajato vibhāvā |
 1.059.07c śātavaneye śatinībhir agniḥ puruṇithe jarate sūnṛtāvān ||

1.060.01a vahniṃ yaśasaṃ vidathasya ketuṃ suprāvyam dūtaṃ sadyoartham |
 1.060.01c dvijanmānaṃ rayim iva praśastaṃ rātim bharad bhṛgave mātariśvā ||
 1.060.02a asya śāsura ubhayāsaḥ sacante haviṣmanta uśijo ye ca martāḥ |
 1.060.02c divaś cit pūrvo ny asādi hotāpṛchyo viśpatir vikṣu vedhāḥ ||
 1.060.03a taṃ navyasī hṛda ā jāyamānam asmat sukīrtir madhujihvam aśyāḥ |
 1.060.03c yaṃ ṛtvijo vṛjane mānuṣāsaḥ prayasvanta āyavo jījananta ||
 1.060.04a uśik pāvako vasura mānuṣeṣu vareṇyo hotādihāyi vikṣu |
 1.060.04c damūnā gṛhapatir dama āṃ agnir bhuvad rayipatī rayiṇām ||
 1.060.05a taṃ tvā vayam patim agne rayiṇām pra śaṃsāmo matibhir gotamāsaḥ |
 1.060.05c āsum na vājambharam marjayantaḥ prātar makṣū dhiyāvasur jagamyāt ||

- 1.061.01a asmā id u pra tavase turāya prayo na harmi stomam māhināya |
1.061.01c ṛciṣamāyādhrigava oham indrāya brahmāṇi rātataṃ ||
1.061.02a asmā id u praya iva pra yaṃsi bharāmy āṅgūṣam bādhe suvṛkti |
1.061.02c indrāya hṛdā manasā maṇṣā pratnāya patye dhiyo marjayanta ||
1.061.03a asmā id u tyam upamaṃ svarṣam bharāmy āṅgūṣam āsyena |
1.061.03c maṃhiṣṭham achoktibhir matinām suvṛktibhiḥ sūriṃ vāvṛdhadyai ||
1.061.04a asmā id u stomam saṃ hinomi ratham na taṣṭeva tatsināya |
1.061.04c giras ca girvāhase suvṛktīndrāya viśvaminvam medhirāya ||
1.061.05a asmā id u saptim iva śravyendrayārkaṃ juhvā sam aṅje |
1.061.05c viraṃ dānaukaṣam vandadyai purāṃ gūrtaśravyaṣam darmāṇam ||
1.061.06a asmā id u tvaṣṭā takṣad vajraṃ svapastamaṃ svaryaṃ raṇāya |
1.061.06c vṛtrasya cid vidad yena marma tujann iśānas tujatā kiyedhāḥ ||
1.061.07a asyed u mātuḥ savaneṣu sadyo mahaḥ pitum papivāñ cārv annā |
1.061.07c muṣāyad viṣṇuḥ pacataṃ sahiyān vidhyad varāham tiro adrim astā ||
1.061.08a asmā id u gnās cid devapatnīr indrayārkaṃ ahihatya ūvuḥ |
1.061.08c pari dyāvāpṛthivī jabhra urvī nāsyā te mahimānam pari ṣṭaḥ ||
1.061.09a asyed eva pra ririce mahitvam divas pṛthivyāḥ pary antarikṣāt |
1.061.09c svarāḍ indro dama ā viśvagūrtaḥ svarir amatro vavakṣe raṇāya ||
1.061.10a asyed eva śavasā śuṣantaṃ vi vṛṣcad vajreṇa vṛtram indraḥ |
1.061.10c gā na vrāṇā avanīr amuñcad abhi śravo dāvane sacetāḥ ||
1.061.11a asyed u tveṣasā ranta sindhavaḥ pari yad vajreṇa sīm ayachat |
1.061.11c iśānakṛd dāśuṣe daśasyan turvītaye gādham turvaṇiḥ kaḥ ||
1.061.12a asmā id u pra bharā tūtujāno vṛtrāya vajram iśānaḥ kiyedhāḥ |
1.061.12c gor na parva vi radā tiraśceṣyann arṇāmsy apāṃ caradhyai ||
1.061.13a asyed u pra brūhi pūrvyāṇi turasya karmāṇi navya ukthaiḥ |
1.061.13c yudhe yad iṣṇāna āyudhāny ṛghāyamāṇo niriṇāti śatrūn ||
1.061.14a asyed u bhiyā girayaś ca dṛḍhā dyāvā ca bhūmā januṣas tujete |
1.061.14c upo venasya joguvāna oṇim sadyo bhuvad vīryāya nodhāḥ ||
1.061.15a asmā id u tyad anu dāyy eṣām eko yad vavne bhūrer iśānaḥ |
1.061.15c praitaṣam sūrye paspṛdhānam sauvaśvye suṣvim āvad indraḥ ||
1.061.16a evā te hāriyojanā suvṛktīndra brahmāṇi gotamāso akran |
1.061.16c aiṣu viśvapeśasaṃ dhiyaṃ dhāḥ prātar makṣū dhiyāvasur jagamyāt ||

- 1.062.01a pra manmahe śavasānāya sūṣam āṅgūṣam girvaṇase aṅgirasvat |
1.062.01c suvṛktibhi stuvata ṛgmīyārcāmārkaṃ nare viśrutāya ||
1.062.02a pra vo mahe mahi namo bharadvam āṅgūṣyaṃ śavasānāya sāmā |
1.062.02c yenā naḥ pūrve pitarāḥ padajñā arcanto aṅgirasō gā avindan ||
1.062.03a indrasyāṅgirasām ceṣṭau vidat saramā tanayāya dhāsim |
1.062.03c bṛhaspatir bhinad adriṃ vidad gāḥ sam usriyābhir vāvaśanta naraḥ ||
1.062.04a sa suṣṭubhā sa stubhā sapta vipraiḥ svareṇādrim svaryo navagvaiḥ |
1.062.04c saranyubhiḥ phaligam indra śakra valaṃ ravena darayo daśagvaiḥ ||
1.062.05a gṛṇāno aṅgirobhir dasma vi var uṣasā sūryeṇa gobhir andhaḥ |
1.062.05c vi bhūmyā aprathaya indra sānu divo raja uparam astabhāyaḥ ||
1.062.06a tad u prayakṣatamam asya karma dasmasya cārutamam asti daṃsaḥ |
1.062.06c upahvare yad uparā apinvan madhvarṇaso nadyaś catasraḥ ||
1.062.07a dvitā vi vavre sanajā sanīḍe ayāsya stavamānebhir arkaiḥ |
1.062.07c bhago na mene parame vyomann adhārayad rodasī sudamsāḥ ||
1.062.08a sanād divam pari bhūmā virūpe punarbhuvā yuvatī svebhir evaiḥ |

- 1.062.08c kṛṣṇebhir aktoṣā ruśadbhir vapurbhir ā carato anyānyā ||
1.062.09a sanemi sakhyaṃ svapasyamānaḥ sūnur dādḥāra śavasā sudamśaḥ |
1.062.09c āmasu cid dadhiṣe pakvam antaḥ payaḥ kṛṣṇāsu ruśad rohiṇiṣu ||
1.062.10a sanāt sanidā avanir avātā vratā rakṣante amṛtāḥ sahoḥbhīḥ |
1.062.10c purū sahasrā janayo na patnir duvasyanti svasāro ahrayānam ||
1.062.11a sanāyuvo namasā navyo arkair vasūyavo matayo dasma dadruḥ |
1.062.11c patiṃ na patnir uśatir uśantaṃ sprśanti tvā śavasāvan maṇiśaḥ ||
1.062.12a sanād eva tava rāyo gabhastau na kṣiyante nopa dasyanti dasma |
1.062.12c dyumāṃ asi kratumāṃ indra dhīraḥ śikṣā śacīvas tava naḥ śacibhiḥ ||
1.062.13a sanāyate gotama indra navyam atakṣad brahma hariyojanāya |
1.062.13c sunīthāya naḥ śavasāna nodhāḥ prātar makṣū dhiyāvasur jagamyāt ||
- 1.063.01a tvam mahāṃ indra yo ha śuṣmair dyāvā jajñānaḥ pṛthivī ame dhāḥ |
1.063.01c yad dha te viśvā girayaś cid abhvā bhiyā dṛḍhāsaḥ kiraṇā naijan ||
1.063.02a ā yad dharī indra vivratā ver ā te vajraṃ jaritā bāhvor dhāt |
1.063.02c yenāviharyatakrato amitran pura iṣṇāsi puruhūta pūrvīḥ ||
1.063.03a tvam satya indra dhṛṣṇur etān tvam ṛbhukṣā naryas tvam śāt |
1.063.03c tvam śuṣṇaṃ vṛjane pṛkṣa āṇau yūne kutsāya dyumate sacāhan ||
1.063.04a tvam ha tyad indra codīḥ sakhā vṛtraṃ yad vajrin vṛṣakarmann ubhnāḥ |
1.063.04c yad dha sūra vṛṣamaṇaḥ parācair vi dasyūṃr yonāv akrto vṛthāśāt ||
1.063.05a tvam ha tyad indrarīṣaṇyan dṛḍhasya cin martānām ajuṣṭau |
1.063.05c vy asmad ā kāṣṭhā arvate var ghaneva vajriṇ chnathihy amitran ||
1.063.06a tvāṃ ha tyad indrarṇasātau svarmīdhe nara ājā havante |
1.063.06c tava svadhāva iyam ā samarya ūtir vājeṣv atasāyyā bhūt ||
1.063.07a tvam ha tyad indra sapta yudhyan puro vajrin purukutsāya dardaḥ |
1.063.07c barhir na yat sudāse vṛthā varg aṃho rājan varivaḥ pūrave kaḥ ||
1.063.08a tvam tyāṃ na indra deva citrām iṣam āpo na pīpayāḥ parijman |
1.063.08c yayā sūra praty asmabhyaṃ yaṃsi tmanam ūrjaṃ na viśvadha kṣaradhyai ||
1.063.09a akāri ta indra gotamebhir brahmāṇy oktā namasā haribhyām |
1.063.09c supeśasaṃ vājam ā bharā naḥ prātar makṣū dhiyāvasur jagamyāt ||
- 1.064.01a vṛṣṇe śardhāya sumakhāya vedhase nodhaḥ suvṛktim pra bharā marudbhyaḥ |
1.064.01c apo na dhīro manasā suhastyo giraḥ sam aṅje vidatheṣv ābhuvaḥ ||
1.064.02a te jajñire diva ṛṣvāsa ukṣaṇo rudrasya maryā asurā arepasaḥ |
1.064.02c pāvakāsaḥ śucayaḥ sūryā iva satvāno na drapsino ghoravarpasaḥ ||
1.064.03a yuvāno rudrā ajarā abhogghano vavakṣur adhrigāvaḥ parvatā iva |
1.064.03c dṛḍhā cid viśvā bhuvanāni pāṛthivā pra cyāvayanti divyāni majmanā ||
1.064.04a citrair aṅjibhir vapuṣe vy aṅjate vakṣassu rukmāṃ adhi yetire śubhe |
1.064.04c aṃseṣv eṣāṃ ni mimṛkṣur ṛṣṭayaḥ sākaṃ jajñire svadhayā divo naraḥ ||
1.064.05a iśānakṛto dhunayo riśādaso vātān vidyutas taviṣibhir akrata |
1.064.05c duhanty ūdhar divyāni dhūtayo bhūmim pinvanti payasā parijrayaḥ ||
1.064.06a pinvanty apo marutaḥ sudānavaḥ payo ghṛtavād vidatheṣv ābhuvaḥ |
1.064.06c atyaṃ na mihe vi nayanti vājinam utsaṃ duhanti stanayantam akṣitam ||
1.064.07a mahiṣāso māyinaś citrabhānavo girayo na svatavaso raghuṣyadaḥ |
1.064.07c mṛgā iva hastinaḥ khādathā vanā yad āruṇiṣu taviṣir ayugdhvam ||
1.064.08a siṃhā iva nānadati pracetasāḥ piśā iva supiśo viśvavedasaḥ |
1.064.08c kṣapo jinvantaḥ pṛṣatibhir ṛṣṭibhiḥ sam it sabādhaḥ śavasāhimanyavaḥ ||

1.064.09a rodasī ā vadatā gaṇasriyo nṛṣācaḥ śūrāḥ śavasāhimanyavaḥ |
 1.064.09c ā vandhureṣv amatir na darśatā vidyun na tasthau maruto ratheṣu vaḥ ||
 1.064.10a viśvavedaso rayibhiḥ samokasaḥ sammiślāsas taviṣibhir virapśinaḥ |
 1.064.10c astāra iṣum dadhire gabhastyor anantaśuśmā vṛṣakhādayo naraḥ ||
 1.064.11a hiraṇyayebhiḥ pavibhiḥ payovṛdha ujjiḡhanta āpathyo na parvatān |
 1.064.11c makhā ayāsaḥ svasṛto dhruvacyuto dudhrakṛto maruto bhrājadrṣṭayaḥ ||
 1.064.12a ghrṣum pāvakaḥ vaninaḥ vicarṣaṇiḥ rudrasya sūnum havasā grṇimasi |
 1.064.12c rajasturaḥ tavasam mārutaḥ gaṇam rjīṣiṇaḥ vṛṣaṇaḥ saścata śriye ||
 1.064.13a pra nū sa marataḥ śavasā janāḥ ati tasthau va ūtī maruto yam āvata |
 1.064.13c arvadbhir vājam bharate dhanā nṛbhir āpṛchyaḥ kratum ā kṣeti puṣyati ||
 1.064.14a carḥṛtyam marutaḥ pṛtsu duṣṭaraḥ dyumantaḥ śuśmam maghavatsu dhattana |
 1.064.14c dhanasṛtaḥ ukthyaḥ viśvacarṣaṇiḥ tokam puṣyema tanayaḥ śataḥ himāḥ ||
 1.064.15a nū ṣṭhīram maruto vīravantaḥ ṛṭiśāhaḥ rayim asmāsu dhatta |
 1.064.15c sahasriṇaḥ śatinaḥ sūśuvāṃsam prātar makṣū dhiyāvasur jagamyāt ||

1.065.01 paśvā na tāyum guhā catantaḥ namo yujānaḥ namo vahantaḥ |
 1.065.02 sajoṣā dhīrāḥ padair anu gmann upa tvā sīdan viśve yajatrāḥ ||
 1.065.03 ṛtasya devā anu vratā gur bhuvat pariṣṭir dyaur na bhūma |
 1.065.04 vardhantīm āpaḥ panvā suśiśvim ṛtasya yonā garbhe sujātam ||
 1.065.05 puṣṭir na raṇvā kṣitir na pṛthvī girir na bhujma kṣodo na śambhu |
 1.065.06 atyo nājman sargapratakataḥ sindhur na kṣodaḥ ka im varāte ||
 1.065.07 jāmiḥ sindhūnām bhrāteva svasrām ibhyān na rājā vanāny atti |
 1.065.08 yad vātajūto vanā vy asthād agnir ha dāti romā pṛthivyāḥ ||
 1.065.09 śvasity apsu haṃso na sīdan kratvā cetiṣṭho viśām uṣarbhut |
 1.065.10 somo na vedhā ṛtaprajātaḥ paśur na śiśvā vibhur dūrebhāḥ ||

1.066.01 rayir na citrā sūro na saṃdṛḡ āyur na prāṇo nityo na sūnuḥ |
 1.066.02 takvā na bhūrṇir vanā siṣakti payo na dhenuḥ śucir vibhāvā ||
 1.066.03 dādihāra kṣemam oko na raṇvo yavo na pakvo jetā janānām |
 1.066.04 ṛṣir na stubhvā vikṣu praśasto vājī na pṛito vayo dadhāti ||
 1.066.05 durokaśociḥ kratur na nityo jāyeva yonāv araḥ viśvasmai |
 1.066.06 citro yad abhrāṭ chveto na vikṣu ratho na rukmī tveṣaḥ samatsu ||
 1.066.07 seneva sṛṣṭāmaḥ dadhāty astur na didyut tveṣapratikā |
 1.066.08 yamo ha jāto yamo janitvaḥ jāraḥ kanīnām patir janīnām ||
 1.066.09 taḥ vaś carāthā vayaḥ vasatyāstaḥ na gāvo nakṣanta iddham |
 1.066.10 sindhur na kṣodaḥ pra nīcīr ainon navanta gāvaḥ svar dṛśīke ||

1.067.01 vaneṣu jāyur marteṣu mitro vṛṇīte śruṣṭim rājevājyuram |
 1.067.02 kṣemo na sādhuḥ kratur na bhadro bhuvat svādhīr hotā havyavāt ||
 1.067.03 haste dadhāno nṛmṇā viśvāny ame devān dhād guhā niśidan |
 1.067.04 vidantīm atra naro dhiyaṃdhā hṛdā yat taṣṭān mantrāḥ aśaṃsan ||
 1.067.05 ajo na kṣām dādihāra pṛthivīm tastambha dyām mantrebhiḥ satyaiḥ |
 1.067.06 priyā padāni paśvo ni pāhi viśvāyur agne guhā guhaḥ gāḥ ||
 1.067.07 ya im ciketa guhā bhavantaḥ ā yaḥ sasāda dhārām ṛtasya |
 1.067.08 vi ye cṛtanty ṛtā sapanta ād id vasūni pra vavācāsmi ||
 1.067.09 vi yo vīrutsu rodhan mahitvota prajā uta prasūṣv antaḥ |

- 1.067.10 cittir apāṃ dame viśvāyuh sadmeva dhirāḥ sammāya cakruḥ ||
- 1.068.01 śrīnann upa sthād divam bhuraṇyu sthātuś caratham aktūn vy ūrṇot |
1.068.02 pari yad eṣām eko viśveṣām bhuvad devo devānām mahitvā ||
1.068.03 ād it te viśve kratuṃ juṣanta śuṣkād yad deva jīvo janiṣṭhāḥ |
1.068.04 bhajanta viśve devatvaṃ nāma ṛtaṃ sapanto amṛtam evaiḥ ||
1.068.05 ṛtasya preṣā ṛtasya dhītir viśvāyur viśve apāṃsi cakruḥ |
1.068.06 yas tubhyaṃ dāsād yo vā te śikṣāt tasmai cikitvān rayiṃ dayasva ||
1.068.07 hotā niṣatto manor apatye sa cin nv āsām patī rayiṇām |
1.068.08 ichanta reto mithas tanūṣu saṃ jānata svair dakṣair amūrāḥ ||
1.068.09 pitur na putrāḥ kratuṃ juṣanta śroṣan ye asya śāsaṃ turāsaḥ |
1.068.10 vi rāya aurnod duraḥ purukṣuḥ pipeśa nākaṃ str̥bhir damūnāḥ ||
- 1.069.01 śukraḥ śuśukvāṃ uṣo na jāraḥ paprā samīcī divo na jyotiḥ |
1.069.02 pari prajātaḥ kratvā babhūtha bhuvo devānām pitā putraḥ san ||
1.069.03 vedhā adṛpto agnir vijānann ūdhar na gonāṃ svādmā pitūnām |
1.069.04 jane na śeva āhūryaḥ san madhye niṣatto raṇvo duroṇe ||
1.069.05 putro na jāto raṇvo duroṇe vājī na pṛito viśo vi tārit |
1.069.06 viśo yad ahve nṛbhiḥ sanīdā agnir devatvā viśvāny aśyāḥ ||
1.069.07 nakiṣ ṭa etā vratā minanti nṛbhyo yad ebhyaḥ śruṣṭiṃ cakartha |
1.069.08 tat tu te daṃso yad ahan samānair nṛbhir yad yukto vive rapāṃsi ||
1.069.09 uṣo na jāro vibhāvosaḥ saṃjñātarūpaś ciketad asmai |
1.069.10 tmanā vahanto duro vy ṛṇvan navanta viśve svar dṛśīke ||
- 1.070.01 vanema pūrvīr aryo manīṣā agniḥ suśoko viśvāny aśyāḥ |
1.070.02 ā daivyāni vratā cikitvān ā mānuṣasya janasya janma ||
1.070.03 garbho yo apāṃ garbho vanānām garbhaś ca sthātāṃ garbhaś carathām |
1.070.04 adrau cid asmā antar duroṇe viśāṃ na viśvo amṛtaḥ svādhiḥ ||
1.070.05 sa hi kṣapāvāṃ agnī rayiṇām dāsād yo asmā araṃ sūktaiḥ |
1.070.06 etā cikitvo bhūmā ni pāhi devānām janma martāṃś ca vidvān ||
1.070.07 vardhān yam pūrvīḥ kṣapo virūpā sthātuś ca ratham ṛtapravītam |
1.070.08 arādhi hotā svar niṣattaḥ kṛṇvan viśvāny apāṃsi satyā ||
1.070.09 goṣu praśastiṃ vaneṣu dhiṣe bharanta viśve balim svar ṇaḥ |
1.070.10 vi tvā naraḥ purutrā saparyan pitur na jivrer vi vedo bharanta ||
1.070.11 sādhur na gṛdhnur asteva śūro yāteva bhīmas tveṣaḥ samatsu ||
- 1.071.01a upa pra jinvann uśatīr uśantam patim na nityaṃ janayaḥ sanīdāḥ |
1.071.01c svasāraḥ śyāvīm aruṣim ajuṣrañ citram uchantim uśasaṃ na gāvaḥ ||
1.071.02a viḍu cid dṛdhā pitaro na ukthair adriṃ rujann āngiraso raveṇa |
1.071.02c cakrur divo bṛhato gātum asme ahaḥ svar vividuḥ ketum usrāḥ ||
1.071.03a dadhann ṛtaṃ dhanayann asya dhītim ād id aryo didhiṣvo vibhṛtrāḥ |
1.071.03c atṛṣyantīr apaso yanty achā devāñ janma prayasā vardhayantiḥ ||
1.071.04a mathīd yad im vibhṛto mātariśvā gṛhe-gṛhe śyeto jenyo bhūt |
1.071.04c ād im rājñe na sahiyase sacā sann ā dūtyam bhṛgavāṇo vivāya ||
1.071.05a mahe yat pitra im rasaṃ dive kar ava tsarat pṛśanyaś cikitvān |

1.071.05c sṛjad astā dhṛṣatā didyum asmai svāyāṃ devo duhitari tviṣiṃ dhāt ||
 1.071.06a sva ā yas tubhyaṃ dama ā vibhāti namo vā dāsād uśato anu dyūn |
 1.071.06c vardho agne vayo asya dvibarhā yāsad rāyā sarathaṃ yaṃ junāsi ||
 1.071.07a agniṃ viśvā abhi pṛkṣaḥ sacante samudraṃ na sravataḥ sapta yahviḥ |
 1.071.07c na jāmbhir vi cikite vayo no vidā deveṣu pramatiṃ cikitvān ||
 1.071.08a ā yad iṣe nṛpatiṃ teja ānaṭ chuci reto niṣiktaṃ dyaur abhike |
 1.071.08c agniḥ śardham anavadyaṃ yuvānaṃ svādhyāṃ janayat sūdayac ca ||
 1.071.09a mano na yo 'dhvanaḥ sadya ety ekaḥ satrā sūro vasva īse |
 1.071.09c rājānā mitrāvaruṇā supāṇi goṣu priyam amṛtaṃ rakṣamāṇā ||
 1.071.10a mā no agne sakhyā pitryāṇi pra marṣiṣṭhā abhi viduṣ kavīḥ san |
 1.071.10c nabho na rūpaṃ jarimā mināti purā tasyā abhiśaster adhīhi ||

1.072.01a ni kāvyā vedhasaḥ śasvatas kar haste dadhāno naryā purūṇi |
 1.072.01c agnir bhuvad rayipatī rayiṇām satrā cakraṇo amṛtāni viśvā ||
 1.072.02a asme vatsam pari śantaṃ na vindann ichanto viśve amṛtā amūrāḥ |
 1.072.02c śramayuvaḥ padavyo dhiyaṃdhās tasthuḥ pade parame cārv agneḥ ||
 1.072.03a tisro yad agne śaradas tvām ic chuciṃ ghr̥tena śucayaḥ saparyān |
 1.072.03c nāmāni cid dadhire yajñiyāny asūdayanta tanvaḥ sujātāḥ ||
 1.072.04a ā rodasī bṛhatī vevidānāḥ pra rudriyā jabhrire yajñiyāsaḥ |
 1.072.04c vidan marto nemadhitā cikitvān agniṃ pade parame tasthivāṃsam ||
 1.072.05a saṃjānānā upa sīdann abhijñu patnīvanto namasyaṃ namasyan |
 1.072.05c ririvāṃsas tanvaḥ kṛṇvata svāḥ sakhā sakhyur nimiṣi rakṣamāṇāḥ ||
 1.072.06a triḥ sapta yad guhyāni tve it padāvidan nihitā yajñiyāsaḥ |
 1.072.06c tebhī rakṣante amṛtaṃ sajoṣāḥ paśūñ ca sthātṛñ carathaṃ ca pāhi ||
 1.072.07a vidvāñ agne vayunāni kṣitinām vy ānuṣak churudho jivase dhāḥ |
 1.072.07c antarvidvāñ adhvano devayānān atandro dūto abhavo havirvāt ||
 1.072.08a svādhyo diva ā sapta yahvī rāyo duro vy ṛtajñā ajānan |
 1.072.08c vidad gavyaṃ saramā dṛdham ūrvaṃ yenā nu kam mānuṣi bhojate viḥ ||
 1.072.09a ā ye viśvā svapatyāni tasthuḥ kṛṇvānāso amṛtatvāya gātum |
 1.072.09c mahnā mahadbhiḥ pṛthivī vi tasthe mātā putrair aditir dhāyase veḥ ||
 1.072.10a adhi śriyaṃ ni dadhuś cārum asmin divo yad akṣi amṛtā akṛṇvan |
 1.072.10c adha kṣaranti sindhavo na sṛṣṭāḥ pra nīcīr agne aruṣir ajānan ||

1.073.01a rayir na yaḥ pitṛvitto vayodhāḥ supraṇitīś cikutuṣo na śāsuḥ |
 1.073.01c syonaśir atithir na pṛiṇāno hoteva sadma vidhato vi tārit ||
 1.073.02a devo na yaḥ savitā satyamanmā kratvā nipāti vṛjanāni viśvā |
 1.073.02c purupraśasto amatir na satya ātmeva śevo didhiṣāyyo bhūt ||
 1.073.03a devo na yaḥ pṛthivīm viśvadhāyā upakṣeti hitamitro na rājā |
 1.073.03c puraḥsadaḥ śarmasado na vīrā anavadyā patijūṣṭeva nārī ||
 1.073.04a taṃ tvā naro dama ā nityam iddham agne sacanta kṣitiṣu dhruvāsu |
 1.073.04c adhi dyumnaṃ ni dadhur bhūry asmin bhavā viśvāyur dharuṇo rayiṇām ||
 1.073.05a vi pṛkṣo agne maghavāno aśyur vi sūrayo dadato viśvam āyuḥ |
 1.073.05c sanema vājaṃ samitheṣv aryo bhāgaṃ deveṣu śravase dadhānāḥ ||
 1.073.06a ṛtasya hi dhenavo vāvaśānāḥ smadūdhniḥ pīpayanta dyubhaktāḥ |
 1.073.06c parāvataḥ sumatim bhikṣamāṇā vi sindhavaḥ samayā sasrur adrim ||
 1.073.07a tve agne sumatim bhikṣamāṇā divi śravo dadhire yajñiyāsaḥ |
 1.073.07c naktā ca cakrur uśasā virūpe kṛṣṇaṃ ca varṇaṃ aruṇaṃ ca saṃ dhuḥ ||

1.073.08a yān rāye martān suṣūdo agne te syāma maghavāno vyaṃ ca |
1.073.08c chāyeva viśvam bhuvanam sisakṣy āpaprivān rodasī antarikṣam ||
1.073.09a arvadhir agne arvato nṛbhir nṛṇ vīrair vīrān vanuyāmā tvotāḥ |
1.073.09c iśānāsaḥ pitṛvittasya rāyo vi sūrayaḥ śatahimā no aśyuh ||
1.073.10a etā te agna ucathāni vedho juṣṭāni santu manase hṛde ca |
1.073.10c śakema rāyaḥ sudhuro yamaṃ te 'dhi śravo devabhaktam dadhānāḥ ||

1.074.01a upaprayanto adhvaram mantram vocemāgnaye |
1.074.01c āre asme ca śṛṇvate ||
1.074.02a yaḥ snīhitiṣu pūrvyaḥ saṃjagmānāsu kṛṣṭiṣu |
1.074.02c arakṣad dāśuṣe gayam ||
1.074.03a uta bruvantu jantava ud agnir vṛtrahājani |
1.074.03c dhanamjayo raṇe-raṇe ||
1.074.04a yasya dūto asi kṣaye veṣi havyaṇi vītaye |
1.074.04c dasmat kṛṇoṣy adhvaram ||
1.074.05a tam it suhavyam aṅgiraḥ sudevam sahaso yaho |
1.074.05c janā āhuḥ subarhiṣam ||
1.074.06a ā ca vahāsi tāṃ iha devāṃ upa praśastaye |
1.074.06c havyaḥ suścandra vītaye ||
1.074.07a na yor upabdir aśvyaḥ śṛṇve rathasya kac cana |
1.074.07c yad agne yāsi dūtyam ||
1.074.08a tvoto vājy ahrayo 'bhi pūrvasmād aparaḥ |
1.074.08c pra dāśvāṃ agne asthāt ||
1.074.09a uta dyumat suvīryam bṛhad agne vivāsasi |
1.074.09c devebhyo deva dāśuṣe ||

1.075.01a juṣasva saprathastamam vaco devapsarastamam |
1.075.01c havyaḥ juhvāna āsani ||
1.075.02a athā te aṅgirastamāgne vedhastama priyam |
1.075.02c vocema brahma sāsani ||
1.075.03a kas te jāmir janānām agne ko dāśvadhvaraḥ |
1.075.03c ko ha kasminn asi śritaḥ ||
1.075.04a tvaṃ jāmir janānām agne mitro asi priyaḥ |
1.075.04c sakhā sakhibhya iḍyaḥ ||
1.075.05a yajā no mitrāvaruṇā yajā devāṃ ṛtam bṛhat |
1.075.05c agne yakṣi svam damam ||

1.076.01a kā ta upetir manaso varāya bhuvad agne śamtamā kā manīṣā |
1.076.01c ko vā yajñaiḥ pari dakṣam ta āpa kena vā te manasā dāsama ||
1.076.02a ehy agna iha hotā ni śidādabdhaḥ su puraetā bhavā naḥ |
1.076.02c avatām tvā rodasī viśvaminve yajā mahe saumanasāya devān ||
1.076.03a pra su viśvān rakṣaso dhakṣy agne bhavā yajñānām abhiśastipāvā |
1.076.03c athā vaha somapatim haribhyām ātithyam asmai cakṛmā sudāvne ||
1.076.04a prajāvatā vacasā vahnir āsā ca huve ni ca satsiḥa devaiḥ |
1.076.04c veṣi hotram uta potram yajatra bodhi prayantar janitar vasūnām ||
1.076.05a yathā viprasya manuṣo havirbhir devāṃ ayajaḥ kavibhiḥ kaviḥ san |

1.076.05c evā hotaḥ satyatara tvam adyāgne mandrayā juhvā yajasva ||

1.077.01a kathā dāsemāgnaye kāsmai devajuṣṭocyate bhāmine gīḥ |
1.077.01c yo martyeṣv amṛta ṛtāvā hotā yajiṣṭha it kṛṇoti devān ||
1.077.02a yo adhvaṛeṣu śaṃtama ṛtāvā hotā tam ū namobhir ā kṛṇudhvam |
1.077.02c agnir yad ver martāya devān sa cā bodhāti manasā yajāti ||
1.077.03a sa hi kratuḥ sa maryaḥ sa sādhur mitro na bhūd adbhutasya rathīḥ |
1.077.03c tam medheṣu prathamam devayantīr viśa upa bruvate dasmam āriḥ ||
1.077.04a sa no nṛṇām nṛtamo riśādā agnir giro 'vasā vetu dhītim |
1.077.04c tanā ca ye maghavānaḥ śaviṣṭhā vājaprasūtā iṣayanta manma ||
1.077.05a evāgnir gotamebhir ṛtāvā viprebhir astoṣṭa jātavedāḥ |
1.077.05c sa eṣu dyumnam pīpayat sa vājam sa puṣṭim yāti joṣam ā cikivān ||

1.078.01a abhi tvā gotamā girā jātavedo vicarṣaṇe |
1.078.01c dyumnair abhi pra ṇonumaḥ ||
1.078.02a tam u tvā gotamo girā rāyaskāmo duvasyati |
1.078.02c dyumnair abhi pra ṇonumaḥ ||
1.078.03a tam u tvā vājasātamaṃ aṅgirasvad dhavāmahe |
1.078.03c dyumnair abhi pra ṇonumaḥ ||
1.078.04a tam u tvā vṛtrahantamaṃ yo dasyūṃr avadhūnuṣe |
1.078.04c dyumnair abhi pra ṇonumaḥ ||
1.078.05a avocāma rahūgaṇā agnaye madhumad vacaḥ |
1.078.05c dyumnair abhi pra ṇonumaḥ ||

1.079.01a hiraṇyakeśo rajaso visāre 'hir dhunir vāta iva dhrajīmān |
1.079.01c śucibhrājā uṣaso navedā yaśasvatīr apasyuvo na satyāḥ ||
1.079.02a ā te suparṇā aminantaṃ evaiḥ kṛṣṇo nonāva vṛṣabho yadīdam |
1.079.02c śivābhir na smayamānābhir āgāt patanti miha stanayanty abhrā ||
1.079.03a yad im ṛtasya payasā piyāno nayann ṛtasya pathibhī rajīṣṭhaiḥ |
1.079.03c aryamā mitro varuṇaḥ pariḥmā tvacam pṛṅcānti uparasya yonau ||
1.079.04a agne vājasya gomata īśānaḥ sahaso yaho |
1.079.04c asme dhehi jātavedo mahi śravaḥ ||
1.079.05a sa idhāno vasuṣ kavir agnir īdenyo girā |
1.079.05c revad asmabhyam purvaṇīka dīdihi ||
1.079.06a kṣapo rājann uta tmanāgne vastor utośasaḥ |
1.079.06c sa tigmajambha rakṣaso daha prati ||
1.079.07a avā no agna ūtibhir gāyatrasya prabharmaṇi |
1.079.07c viśvāsu dhīṣu vandya ||
1.079.08a ā no agne rayim bhara satrāsāhaṃ vareṇyam |
1.079.08c viśvāsu pṛtsu duṣṭaram ||
1.079.09a ā no agne sucetunā rayim viśvāyupośasam |
1.079.09c mārḍīkaṃ dhehi jīvase ||
1.079.10a pra pūtās tigmaśociṣe vāco gotamāgnaye |
1.079.10c bharasva sumnayur giraḥ ||
1.079.11a yo no agne 'bhidāsaty anti dūre padīṣṭa saḥ |
1.079.11c asmākam id vṛdhe bhava ||

1.079.12a sahasrākṣo vicarṣaṇir agnī rakṣāṃsi sedhati |

1.079.12c hotā gṛṇīta ukthyaḥ ||

1.080.01a itthā hi soma in made brahmā cakāra vardhanam |

1.080.01c śaviṣṭha vajrinn ojasā pṛthivyā niḥ śasā ahim arcann anu svarājyam ||

1.080.02a sa tvāmadaḍ vṛṣā madaḥ somaḥ śyenābhṛtaḥ sutaḥ |

1.080.02c yenā vṛtram nir adbhyo jaghantha vajrinn ojasārcann anu svarājyam ||

1.080.03a prehy abhihi dhṛṣṇuhi na te vajro ni yaṃsate |

1.080.03c indra nṛmṇam hi te śavo hano vṛtram jayā apo 'rcann anu svarājyam ||

1.080.04a nir indra bhūmyā adhi vṛtram jaghantha nir divaḥ |

1.080.04c sṛjā marutvatīr ava jīvadhanyā imā apo 'rcann anu svarājyam ||

1.080.05a indro vṛtrasya dodhataḥ sānuḥ vajreṇa hīḍitaḥ |

1.080.05c abhikramyāva jighnate 'paḥ sarmāya codayann arcann anu svarājyam ||

1.080.06a adhi sānu ni jighnate vajreṇa śataparvaṇā |

1.080.06c mandāna indro andhasaḥ sakhibhyo gātum ichaty arcann anu svarājyam ||

1.080.07a indra tubhyam id adrivo 'nuttam vajrin vīryam |

1.080.07c yad dha tyam māyinam mṛgam tam u tvam māyayāvadhīr arcann anu svarājyam ||

1.080.08a vi te vajrāso asthīran navatiḥ nāvyaḥ anu |

1.080.08c mahat ta indra vīryam bāhvō te balaḥ hitam arcann anu svarājyam ||

1.080.09a sahasram sākam arcata pari ṣṭobhata viṃśatiḥ |

1.080.09c śatainam anv anonavur indrāya brahmodyatam arcann anu svarājyam ||

1.080.10a indro vṛtrasya taviṣim nir ahan sahasā sahaḥ |

1.080.10c mahat tad asya paumsyam vṛtram jaghanvām asṛjad arcann anu svarājyam ||

1.080.11a ime cit tava manyave vepete bhiyasā mahī |

1.080.11c yad indra vajrinn ojasā vṛtram marutvām avadhīr arcann anu svarājyam ||

1.080.12a na vepasā na tanyatendram vṛtro vi bībhayat |

1.080.12c abhy enam vajra āyasaḥ sahasrabhṛṣṭir āyatārcann anu svarājyam ||

1.080.13a yad vṛtram tava cāsanim vajreṇa samayodhayaḥ |

1.080.13c ahim indra jighāṃsato divi te badbadhe śavo 'rcann anu svarājyam ||

1.080.14a abhiṣtane te adrivo yat sthā jagac ca rejate |

1.080.14c tvaṣṭā cit tava manyava indra vevijyate bhiyārcann anu svarājyam ||

1.080.15a nahi nu yād adhīmasīndram ko vīryā paraḥ |

1.080.15c tasmin nṛmṇam uta kratuḥ devā ojaṃsi sam dadhur arcann anu svarājyam ||

1.080.16a yām atharvā manuṣ pitā dadhyaṇ dhiyam atnata |

1.080.16c tasmin brahmāṇi pūrvathendra ukthā sam agmatārcann anu svarājyam ||

1.081.01a indro madāya vāvṛdhe śavase vṛtrahā nṛbhiḥ |

1.081.01c tam in mahatsv ājīṣūtem arbhe havāmahe sa vājeṣu pra no 'viṣat ||

1.081.02a asi hi vīra senyo 'si bhūri parādadiḥ |

1.081.02c asi dabhrasya cid vṛdho yajamānāya śikṣasi sunvate bhūri te vasu ||

1.081.03a yad udīrata ājāyo dhṛṣṇave dhīyate dhanā |

1.081.03c yukṣvā madacyutā harī kaḥ hanaḥ kaḥ vasau dadho 'smām indra vasau dadhaḥ ||

1.081.04a kratvā mahām anuṣvadham bhīma ā vāvṛdhe śavaḥ |

1.081.04c śriya iṣva upākayor ni śiprī harivān dadhe hastayor vajram āyasam ||

1.081.05a ā paprau pārthivam rajo badbadhe rocanā divi |

1.081.05c na tvāvām indra kaś cana na jāto na janīyate 'ti viśvam vavakṣitha ||

1.081.06a yo aryo martabhojanam parādadāti dāśuṣe |

1.081.06c indro asmabhyam śikṣatu vi bhajā bhūri te vasu bhakṣīya tava rādhasaḥ ||
 1.081.07a made-made hi no dadir yūthā gavām ṛjukratuḥ |
 1.081.07c sam gr̥bhāya purū śatobhayāhastyā vasu śīśīhi rāya ā bhara ||
 1.081.08a mādayasva sute sacā śavase sūra rādhasa |
 1.081.08c vidmā hi tvā purūvasum upa kāmān sasṛjmahe 'thā no 'vitā bhava ||
 1.081.09a ete ta indra jantavo viśvam puṣyanti vāryam |
 1.081.09c antar hi khyo janānām aryo vedo adāśuśam teṣam no veda ā bhara ||

1.082.01a upo ṣu śṛṇuhī giro maghavan mātathā iva |
 1.082.01c yadā naḥ sūnrtāvataḥ kara ād arthayāsa id yojā nv indra te harī ||
 1.082.02a akṣann amīmadanta hy ava priyā adhūṣata |
 1.082.02c astoṣata svabhānavo viprā naviṣṭhayā matī yojā nv indra te harī ||
 1.082.03a susamdr̥śam tvā vayam maghavan vandiṣīmahi |
 1.082.03c pra nūnam pūrṇavandhura stuto yāhi vaśāṁ anu yojā nv indra te harī ||
 1.082.04a sa ghā tam vṛṣaṇam ratham adhi tiṣṭhāti govidam |
 1.082.04c yaḥ pātram hāriyojanam pūrṇam indra ciketati yojā nv indra te harī ||
 1.082.05a yuktas te astu dakṣiṇa uta savyaḥ śatakrato |
 1.082.05c tena jāyām upa priyām mandāno yāhy andhaso yojā nv indra te harī ||
 1.082.06a yunajmi te brahmaṇā keśinā harī upa pra yāhi dadhiṣe gabhastyoḥ |
 1.082.06c ut tvā sutāso rabhasā amandiṣuḥ pūṣaṇvān vajrin sam u patnyāmadaḥ ||

1.083.01a aśvāvati prathamo goṣu gachati suprāvīr indra martyas tavotibhiḥ |
 1.083.01c tam it pṛṇakṣi vasunā bhavīyasā sindhum āpo yathābhito vicetasah ||
 1.083.02a āpo na devīr upa yanti hotriyam avaḥ paśyanti vitataṁ yathā rajaḥ |
 1.083.02c prācair devāsaḥ pra ṇayanti devayum brahmapriyam joṣayante varā iva ||
 1.083.03a adhi dvayor adadhā ukthyam vaco yatasrucā mithunā yā saparyataḥ |
 1.083.03c asaṁyatto vrata te kṣeti puṣyati bhadrā śaktir yajamānāya sunvate ||
 1.083.04a ād aṅgirāḥ prathamam dadhire vaya iddhāgnayaḥ śamyā ye sukṛtyayā |
 1.083.04c sarvam paṇeḥ sam avindanta bhojanam aśvāvantaṁ gomantam ā paśum naraḥ ||
 1.083.05a yajñair atharvā prathamam pathas tate tataḥ sūryo vratapā vena ājani |
 1.083.05c ā gā ājad uśanā kāvyaḥ sacā yamasya jātam amṛtam yajāmahe ||
 1.083.06a barhir vā yat svapatyāya vṛjyate 'rko vā ślokaṁ āghoṣate divi |
 1.083.06c grāvā yatra vadati kārur ukthyas tasyed indro abhipitveṣu raṇyati ||

1.084.01a asāvi soma indra te śaviṣṭha dhṛṣṇav ā gahi |
 1.084.01c ā tvā pṛṇaktv indriyam rajaḥ sūryo na raśmibhiḥ ||
 1.084.02a indram id dharī vahato 'pratidhṛṣṭaśavasam |
 1.084.02c ṛṣiṇam ca stutīr upa yajñam ca mānuṣāṇām ||
 1.084.03a ā tiṣṭha vṛtrahan ratham yuktā te brahmaṇā harī |
 1.084.03c arvācīnam su te mano grāvā kṛṇotu vagnunā ||
 1.084.04a imam indra sutam piba jyeṣṭham amartyam madam |
 1.084.04c śukrasya tvābhy akṣaran dhārā ṛtasya sādane ||
 1.084.05a indrāya nūnam arcatokthāni ca bravītana |
 1.084.05c sutā amatsur indavo jyeṣṭham namasyatā sahaḥ ||
 1.084.06a nakiṣ tvad rathītarō harī yad indra yachase |
 1.084.06c nakiṣ tvānu majmanā nakiḥ svaśva ānaśe ||

- 1.084.07a ya eka id vidayate vasu martāya dāśuṣe |
1.084.07c iśāno apratiṣkuta indro aṅga ||
1.084.08a kadā martam arādhasam padā kṣumpam iva sphurat |
1.084.08c kadā naḥ śuśravad gira indro aṅga ||
1.084.09a yaś cid dhi tvā bahubhya ā sutāvāṃ āvivāsati |
1.084.09c ugraṃ tat patyate śava indro aṅga ||
1.084.10a svādor itthā viṣūvato madhvah pibanti gauryah |
1.084.10c yā indreṇa sayāvarīr vṛṣṇā madanti śobhase vasvīr anu svarājyam ||
1.084.11a tā asya pṛśanāyuvah somaṃ śrīṇanti pṛśnayah |
1.084.11c priyā indrasya dhenavo vajraṃ hinvanti sāyakam vasvīr anu svarājyam ||
1.084.12a tā asya namasā sahaḥ saparyanti pracetasah |
1.084.12c vratāny asya saścire purūṇi pūrvacittaye vasvīr anu svarājyam ||
1.084.13a indro dadhico asthabhir vṛtrāṇy apratiṣkutaḥ |
1.084.13c jaghāna navatīr nava ||
1.084.14a ichann aśvasya yac chirah parvateṣv apaśritam |
1.084.14c tad vidac charyaṇāvati ||
1.084.15a atrāha gor amanvata nāma tvaṣṭur apīcyam |
1.084.15c itthā candramaso gṛhe ||
1.084.16a ko adya yunkte dhuri gā ṛtasya śimivato bhāmīno durhṛṇāyūn |
1.084.16c āsanniṣūn hṛtsvaso mayobhūn ya eṣām bhṛtyām ṛnadhat sa jīvāt ||
1.084.17a ka iṣate tujyate ko bibhāya ko maṃsate santam indraṃ ko anti |
1.084.17c kas tokāya ka ibhāyota rāye 'dhi bravat tanve ko janāya ||
1.084.18a ko agnim iṭṭe haviṣā ghṛtena srucā yajātā ṛtubhir dhruvebhiḥ |
1.084.18c kasmai devā ā vahān āśu homa ko maṃsate vītihotraḥ sudevah ||
1.084.19a tvam aṅga pra śaṃsiṣo devah śaviṣṭha martyam |
1.084.19c na tvad anyo maghavann asti marḍitendra bravīmi te vacah ||
1.084.20a mā te rādhamṣi mā ta ūtayo vaso 'smān kadā canā dabhan |
1.084.20c viśvā ca na upamimīhi mānuṣa vasūni carṣaṇibhya ā ||
- 1.085.01a pra ye śumbhante janayo na saptayo yāman rudrasya sūnavah sudamṣasaḥ |
1.085.01c rodasī hi marutaś cakrire vṛdhe madanti vīrā vidatheṣu ghṛṣvayah ||
1.085.02a ta ukṣitāso mahimānam āśata divi rudrāso adhi cakrire sadaḥ |
1.085.02c arcanto arkaṃ janayanta indriyam adhi śriyo dadhire pṛśnimātarah ||
1.085.03a gomātaro yac chubhayante añjibhis tanūṣu śubhrā dadhire virukmataḥ |
1.085.03c bādhante viśvam abhimātinam apa vartmāny eṣām anu rīyate ghṛtam ||
1.085.04a vi ye bhrājante sumakhāsa ṛṣṭibhiḥ pracyāvayanto acyutā cid ojasā |
1.085.04c manojuvo yan maruto ratheṣv ā vṛṣavrātāsaḥ pṛṣatīr ayugdhumam ||
1.085.05a pra yad ratheṣu pṛṣatīr ayugdhumam vāje adrim maruto ramhayantaḥ |
1.085.05c utāruṣasya vi ṣyanti dhārās carnevodabhir vy undanti bhūma ||
1.085.06a ā vo vahantu saptayo raghuṣyado raghupatvānaḥ pra jigāta bāhubhiḥ |
1.085.06c sīdatā barhir uru vah sadas kṛtam mādayadhvam maruto madhvo andhasah ||
1.085.07a te 'vardhanta svatavaso mahitvanā nākaṃ tasthur uru cakrire sadaḥ |
1.085.07c viṣṇur yad dhāvad vṛṣaṇam madacyutam vayo na sīdann adhi barhiṣi priye ||
1.085.08a sūrā ived yuyudhayo na jagmayah śravasyavo na pṛtanāsu yetire |
1.085.08c bhayante viśvā bhuvanā marudbhyo rājāna iva tveṣasaṃdrśo narah ||
1.085.09a tvaṣṭā yad vajraṃ sukṛtam hiranyayam sahasrabhṛṣṭim svapā avartayat |
1.085.09c dhatta indro nary apāṃsi kartave 'han vṛtraṃ nir apām aubjad arṇavam ||
1.085.10a ūrdhumam nunudre 'vatam ta ojasā dādṛhāṇam cid bibhidur vi parvatam |

1.085.10c dhamanto vāṇam marutaḥ sudānavo made somasya raṇyāni cakrire ||
 1.085.11a jihmaṃ nunudre 'vataṃ tayā diśāsiñcann utsaṃ gotamāya tṛṣṇaje |
 1.085.11c ā gachantim avasā citrabhānavaḥ kāmam viprasya tarpayanta dhāmabhiḥ ||
 1.085.12a yā vaḥ śarma śasāmānāya santi tridhātūni dāsuse yachatādhi |
 1.085.12c asmabhyam tāni maruto vi yanta rayiṃ no dhatta vṛṣaṇaḥ suvīram ||

1.086.01a maruto yasya hi kṣaye pāthā divo vimahasaḥ |
 1.086.01c sa sugopātamo janaḥ ||
 1.086.02a yajñair vā yajñavāhaso viprasya vā matinām |
 1.086.02c marutaḥ śṛṇutā havam ||
 1.086.03a uta vā yasya vājino 'nu vipram atakṣata |
 1.086.03c sa gantā gomati vraje ||
 1.086.04a asya vīrasya barhiṣi sutaḥ somo diviṣṭiṣu |
 1.086.04c uktham madaś ca śasyate ||
 1.086.05a asya śroṣantv ā bhuvo viśvā yaś carṣaṇīr abhi |
 1.086.05c sūraṃ cit sasruṣīr iṣaḥ ||
 1.086.06a pūrvibhir hi dadāśima śaradbhir maruto vayam |
 1.086.06c avobhiś carṣaṇīnām ||
 1.086.07a subhagaḥ sa prayajyavo maruto astu martyaḥ |
 1.086.07c yasya prayāṃsi parṣatha ||
 1.086.08a śasāmānasya vā naraḥ svedasya satyaśavasaḥ |
 1.086.08c vidā kāmasya venataḥ ||
 1.086.09a yūyam tat satyaśavasa āviṣ karta mahitvanā |
 1.086.09c vidhyatā vidyutā rakṣaḥ ||
 1.086.10a gūhatā guhyaṃ tamo vi yāta viśvam atriṇam |
 1.086.10c jyotiṣ kartā yad uśmasi ||

1.087.01a pratvakṣasaḥ pratavaso virapśino 'nānatā avithurā ṛjīṣiṇaḥ |
 1.087.01c juṣṭatamāso nṛtamāso añjibhir vy ānajre ke cid usrā iva str̥bhiḥ ||
 1.087.02a upahvareṣu yad acidhvaṃ yayiṃ vāya iva marutaḥ kena cit pathā |
 1.087.02c ścotanti kośā upa vo ratheṣv ā ghṛtam ukṣatā madhuvarṇam arcate ||
 1.087.03a praiśām ajmeṣu vithureva rejate bhūmir yāmeṣu yad dha yuñjate śubhe |
 1.087.03c te kṛḍayo dhunayo bhrājadṛṣṭayaḥ svayam mahitvam panayanta dhūtayaḥ ||
 1.087.04a sa hi svasṛt pṛṣadaśvo yuvā gaṇo 'yā isānas taviṣibhir āvṛtaḥ |
 1.087.04c asi satya ṛṇayāvānedyo 'syā dhiyaḥ prāvitāthā vṛṣā gaṇaḥ ||
 1.087.05a pituḥ pratnasya janmanā vadāmasi somasya jihvā pra jigāti cakṣasā |
 1.087.05c yad im indraṃ śamy ṛkvāṇa āsatād in nāmāni yajñiyāni dadhire ||
 1.087.06a śriyase kam bhānubhiḥ sam mimikṣire te raśmibhis ta ṛkvabhiḥ sukhādayaḥ |
 1.087.06c te vāśimanta iṣmiṇo abhīravo vidre priyasya mārutasya dhāmnaḥ ||

1.088.01a ā vidyunmadbhir marutaḥ svarkai rathebhīr yāta ṛṣṭimadbhir aśvaparnaiḥ |
 1.088.01c ā varṣiṣṭhayā na iṣā vayo na paptatā sumāyāḥ ||
 1.088.02a te 'ruṇebhir varam ā piśaṅgaiḥ śubhe kaṃ yānti rathatūrbhir aśvaiḥ |
 1.088.02c rukmo na citraḥ svadhitiṅvān pavyā rathasya jaṅghananta bhūma ||
 1.088.03a śriye kaṃ vo adhi tanūṣu vāśīr medhā vanā na kṛṇavanta ūrdhvā |
 1.088.03c yuṣmabhyam kam marutaḥ sujātās tuvidyumnāso dhanayante adrim ||

- 1.088.04a ahāni ḡḡhrāḡ pary ā va āgur imāḡ dhiyaḡ vārkāryāḡ ca devīm |
1.088.04c brahma kṛṇvanto gotamāso arkair ūrdhvaḡ nunudra utsadhim pibadhyai ||
1.088.05a etat tyan na yojanam aceti sasvar ha yan maruto gotamo vaḡ |
1.088.05c paśyan hiraṇyacakrān ayodaḡṡṡrān vidhāvato varāhūn ||
1.088.06a eṡā syā vo maruto 'nubhartrī prati ṡṡobhati vāghato na vāṇī |
1.088.06c astobhayad vṛthāsām anu svadhāḡ gabhastyoḡ ||
- 1.089.01a ā no bhadrāḡ kratavo yantu viśvato 'dabdhāso aparītāsa udbhidaḡ |
1.089.01c devā no yathā sadam id vṛdhe asann aprāyuvō rakṡitāro dive-dive ||
1.089.02a devānām bhadrā sumatir ṛjūyatām devānām rātir abhi no ni vartatām |
1.089.02c devānām sakhyam upa sedimā vayaḡ devā na āyuh pra tirantu jīvase ||
1.089.03a tān pūrvayā nividā hūmahe vayam bhagam mitram aditiḡ dakṡam asridham |
1.089.03c aryamaṇaḡ varuṇaḡ somam aśvinā sarasvatī naḡ subhagā mayas karat ||
1.089.04a tan no vāto mayobhu vātu bheṡajaḡ tan mātā pṛthivī tat pitā dyauḡ |
1.089.04c tad grāvāṇaḡ somasuto mayobhuvas tad aśvinā ṡṛṇutaḡ dhiṡṇyā yuvam ||
1.089.05a tam iśānaḡ jagatas tasthuṡas patiḡ dhiyaḡjinvam avase hūmahe vayam |
1.089.05c pūṡā no yathā vedasām asad vṛdhe rakṡitā pāyur adabdhaḡ svastaye ||
1.089.06a svasti na indro vṛddhaśravāḡ svasti naḡ pūṡā viśvavedāḡ |
1.089.06c svasti nas tārksyo ariṡṡanemiḡ svasti no bṛhaspatir dadhātu ||
1.089.07a pṛṡadaśvā marutaḡ pṛṡnimātaraḡ śubhamaṡyāvāno vidatheṡu jagmayaḡ |
1.089.07c agnijihvā manavaḡ sūracakṡaso viśve no devā avasā gamann iha ||
1.089.08a bhadraḡ karṇebhiḡ ṡṛṇuyāma devā bhadram paśyemākṡabhir yajatrāḡ |
1.089.08c sthirair aṅgais tuṡṡuvāḡsas tanūbhir vy aśema devahitaḡ yad āyuh ||
1.089.09a śatam in nu śarado anti devā yatrā naś cakrā jarasaḡ tanūnām |
1.089.09c putrāso yatra pitaro bhavanti mā no madhyā rīriṡatāyur gantoḡ ||
1.089.10a aditir dyaur aditir antarikṡam aditir mātā sa pitā sa putraḡ |
1.089.10c viśve devā aditiḡ pañca janā aditir jātam aditir janitvam ||
- 1.090.01a ṛjunītī no varuṇo mitro nayatu vidvān |
1.090.01c aryamā devaiḡ sajoṡāḡ ||
1.090.02a te hi vasvo vasavānās te apramūrā mahobhiḡ |
1.090.02c vratā rakṡante viśvāhā ||
1.090.03a te asmabhyaḡ śarma yaḡsann amṛtā martyebhyaḡ |
1.090.03c bādhamānā apa dviṡāḡ ||
1.090.04a vi naḡ pathaḡ suvitāya ciyantv indro marutaḡ |
1.090.04c pūṡā bhago vandyāsaḡ ||
1.090.05a uta no dhiyo goagrāḡ pūṡan viṡṇav evayāvaḡ |
1.090.05c kartā naḡ svastimataḡ ||
1.090.06a madhu vātā ṛtāyate madhu kṡaranti sindhavaḡ |
1.090.06c mādhvīr naḡ santv oṡadhīḡ ||
1.090.07a madhu naktam utōṡaso madhumat pārthivaḡ rajaḡ |
1.090.07c madhu dyaur astu naḡ pitā ||
1.090.08a madhumān no vanaspatir madhumāḡ astu sūryaḡ |
1.090.08c mādhvīr gāvo bhavantu naḡ ||
1.090.09a śaḡ no mitraḡ śaḡ varuṇaḡ śaḡ no bhavatv aryamā |
1.090.09c śaḡ na indro bṛhaspatiḡ śaḡ no viṡṇur urukramaḡ ||

- 1.091.01a tvam soma pra cikito manīṣā tvam rajiṣṭham anu neṣi panthām |
1.091.01c tava praṇīti pitaro na indo deveṣu ratnam abhajanta dhīrāḥ ||
1.091.02a tvam soma kratubhiḥ sukratur bhūs tvam dakṣaiḥ sudakṣo viśvavedāḥ |
1.091.02c tvam vṛṣā vṛṣatvebhir mahitvā dyumnebhīr dyumny abhavo nṛcakṣāḥ ||
1.091.03a rājño nu te varuṇasya vratāni bṛhad gabhīram tava soma dhāma |
1.091.03c śuciṣṭvam asi priyo na mitro dakṣāyṇo aryamevāsi soma ||
1.091.04a yā te dhāmāni divi yā pṛthivyām yā parvateṣv oṣadhīṣv apsu |
1.091.04c tebhīr no viśvaiḥ sumanā aheḍan rājan soma prati havyā gṛbhāya ||
1.091.05a tvam somāsi satpatis tvam rājota vṛtrahā |
1.091.05c tvam bhadro asi kratuḥ ||
1.091.06a tvam ca soma no vaśo jīvātum na marāmahe |
1.091.06c priyastotro vanaspatiḥ ||
1.091.07a tvam soma mahe bhagaṃ tvam yūna ṛtāyate |
1.091.07c dakṣam dadhāsi jīvase ||
1.091.08a tvam naḥ soma viśvato rakṣā rājann aghāyataḥ |
1.091.08c na riṣyet tvāvataḥ sakhā ||
1.091.09a soma yās te mayobhuva ūtayaḥ santi dāsūṣe |
1.091.09c tābhīr no 'vitā bhava ||
1.091.10a imaṃ yajñam idaṃ vaco jujuṣāṇa upāgahi |
1.091.10c soma tvam no vṛdhe bhava ||
1.091.11a soma gīrbhiṣṭvā vayam vardhayāmo vacovidāḥ |
1.091.11c sumṛḍīko na ā viśa ||
1.091.12a gayasphāno amīvahā vasuvit puṣṭivardhanaḥ |
1.091.12c sumitraḥ soma no bhava ||
1.091.13a soma rārandhi no hṛdi gāvo na yavaseṣv ā |
1.091.13c marya iva sva okye ||
1.091.14a yaḥ soma sakhye tava rāraṇad deva martyaḥ |
1.091.14c taṃ dakṣaḥ sacate kaviḥ ||
1.091.15a uruṣyā ṇo abhiśasteḥ soma ni pāhy aṃhasaḥ |
1.091.15c sakhā suśeva edhi naḥ ||
1.091.16a ā pyāyasva sam etu te viśvataḥ soma vṛṣṇyam |
1.091.16c bhavā vājasya saṃgathe ||
1.091.17a ā pyāyasva madintama soma viśvebhīr aṃśubhiḥ |
1.091.17c bhavā naḥ suśravastamaḥ sakhā vṛdhe ||
1.091.18a saṃ te payāṃsi sam u yantu vājāḥ saṃ vṛṣṇyāny abhimātiṣāhaḥ |
1.091.18c āpyāyamāno amṛtāya soma divi śravāṃsy uttamāni dhiṣva ||
1.091.19a yā te dhāmāni haviṣā yajanti tā te viśvā paribhūr astu yajñam |
1.091.19c gayasphānaḥ prataraṇaḥ suvīro 'vīrahā pra carā soma duryān ||
1.091.20a somo dhenum somo arvantam āśum somo vīram karmaṇyam dadāti |
1.091.20c sādanyam vidathyam sabheyam pitṛśravaṇam yo dadāśad asmaḥ ||
1.091.21a aśādham yutsu pṛtanāsu papriṃ svarṣam apsām vṛjanasya gopām |
1.091.21c bhareṣujām sukṣitiṃ suśravasaṃ jayantaṃ tvām anu madema soma ||
1.091.22a tvam imā oṣadhīḥ soma viśvās tvam apo ajanayas tvam gāḥ |
1.091.22c tvam ā tatanthorv antarikṣam tvam jyotiṣā vi tamo vavartha ||
1.091.23a devena no manasā deva soma rāyo bhāgam sahasāvann abhi yudhya |
1.091.23c mā tvā tanad īṣiṣe vīryasyobhayebhyaḥ pra cikitsā gaviṣṭau ||

1.092.01a etā u tyā uṣasaḥ ketum akrata pūrve ardhe rajaso bhānum añjate |
 1.092.01c niṣkṛṇvānā āyudhānīva dhṛṣṇavaḥ prati gāvo 'ruṣīr yanti mātaraḥ ||
 1.092.02a ud apaptann aruṇā bhānavo vṛthā svāyujō aruṣīr gā ayukṣata |
 1.092.02c akrann uṣāso vayunāni pūrvathā ruśantam bhānum aruṣīr aśīśrayuḥ ||
 1.092.03a arcanti nārīr apaso na viṣṭibhiḥ samānena yojanena parāvataḥ |
 1.092.03c iṣaṃ vahantiḥ sukṛte sudānave viśved aha yajamānāya sunvate ||
 1.092.04a adhi peśāmsi vapate nṛtūr ivāporṇute vakṣa usreva barjaham |
 1.092.04c jyotir viśvasmai bhuvanāya kṛṇvatī gāvo na vrajaṃ vy uṣā āvar tamaḥ ||
 1.092.05a praty arcī ruśad asyā adarśī vi tiṣṭhate bādḥate kṛṣṇam abhvam |
 1.092.05c svaruṃ na peśo vidatheṣv añjañ citraṃ divo duhitā bhānum aśret ||
 1.092.06a atāriṣma tamasas pāram asyoṣā uchanti vayunā kṛṇoti |
 1.092.06c śriye chando na smayate vibhātī supratikā saumanasāyājigaḥ ||
 1.092.07a bhāsvatī netrī sūnṛtānām diva stave duhitā gotamebhiḥ |
 1.092.07c prajāvato nṛvato aśvabudhyān uṣo goagrām̃ upa māsi vājān ||
 1.092.08a uṣas tam aśyām yaśasaṃ suvīraṃ dāsapravargaṃ rayim aśvabudhyam |
 1.092.08c sudamśasā śravasā yā vibhāsi vājaprasūtā subhage bṛhantam ||
 1.092.09a viśvāni devī bhuvanābhicakṣyā praticī cakṣur urviyā vi bhāti |
 1.092.09c viśvaṃ jīvaṃ carase bodhayanti viśvasya vācam avidan manāyoḥ ||
 1.092.10a punaḥ-punar jāyamānā purāñi samānaṃ varṇam abhi śumbhamānā |
 1.092.10c śvaghñīva kṛtnur vija āminānā martasya devī jarayanty āyuh ||
 1.092.11a vyūrṇvatī divo antām̃ abodhy apa svasāraṃ sanutar yuyoti |
 1.092.11c praminatī manuṣyā yugāni yoṣā jārasya cakṣasā vi bhāti ||
 1.092.12a paśūn na citrā subhagā prathānā sindhur na kṣoda urviyā vy aśvait |
 1.092.12c aminatī daivyāni vratāni sūryasya ceti raśmibhir dṛśānā ||
 1.092.13a uṣas tac citram ā bharāsmabhyaṃ vājīnīvati |
 1.092.13c yena tokaṃ ca tanayaṃ ca dhāmahe ||
 1.092.14a uṣo adyeha gomaty aśvāvati vibhāvāri |
 1.092.14c revad asme vy ucha sūnṛtāvati ||
 1.092.15a yukṣvā hi vājīnīvaty aśvām̃ adyāruṇām̃ uṣaḥ |
 1.092.15c athā no viśvā saubhagāny ā vaha ||
 1.092.16a aśvinā vartir asmad ā gomad dasrā hiraṇyavat |
 1.092.16c arvāg rathaṃ samanāsā ni yachatam ||
 1.092.17a yāv itthā ślokaṃ ā divo jyotir janāya cakrathuḥ |
 1.092.17c ā na ūrjaṃ vahatam aśvinā yuvam ||
 1.092.18a eha devā mayobhuvā dasrā hiraṇyavartanī |
 1.092.18c uṣarbudho vahantu somapītaye ||

1.093.01a agniṣomāv imaṃ su me śṛṇutam vṛṣaṇā havam |
 1.093.01c prati sūktāni haryatam bhavatam dāsūṣe mayaḥ ||
 1.093.02a agniṣomā yo adya vām idam vacaḥ saparyati |
 1.093.02c tasmai dhattam suvīryam gavām poṣam svasvīyam ||
 1.093.03a agniṣomā ya āhutiṃ yo vām dāsād dhaviṣkṛtim |
 1.093.03c sa prajayā suvīryam viśvam āyur vy aśnavat ||
 1.093.04a agniṣomā ceti tad vīryam vām yad amuṣṇitam avasam pañim gāḥ |
 1.093.04c avātiratam bṛsayasya śeṣo 'vindatam jyotir ekam bahubhyaḥ ||
 1.093.05a yuvam etāni divi rocanāny agniś ca soma sakratū adhattam |
 1.093.05c yuvaṃ sindhūm̃r abhiśaster avadyād agniṣomāv amuñcatam gṛbhītān ||
 1.093.06a ānyam̃ divo mātariśvā jabhārām̃athnād anyam pari śyeno adreḥ |

1.093.06c agniṣomā brahmaṇā vāvṛdhānoruṃ yajñāya cakrathur ulokam ||
 1.093.07a agniṣomā haviṣaḥ prasthitasya vītaṃ haryataṃ vṛṣaṇā juṣethām |
 1.093.07c suśarmāṇā svavasā hi bhūtam athā dhattaṃ yajamānāya śaṃ yoḥ ||
 1.093.08a yo agniṣomā haviṣā saparyād devadrīcā manasā yo ghr̥tena |
 1.093.08c tasya vrataṃ rakṣatam pātam aṃhaso viśe janāya mahi śarma yachatam ||
 1.093.09a agniṣomā savedasā sahūti vanataṃ giraḥ |
 1.093.09c saṃ devatrā babhūvathuḥ ||
 1.093.10a agniṣomāv anena vām yo vām ghr̥tena dāśati |
 1.093.10c tasmai dīdayatam bṛhat ||
 1.093.11a agniṣomāv imāni no yuvaṃ havyaḥ jujoṣatam |
 1.093.11c ā yātam upa naḥ sacā ||
 1.093.12a agniṣomā pipṛtam arvato na ā pyāyantām usriyā havyasūdaḥ |
 1.093.12c asme balāni maghavatsu dhattaṃ kṛṇutam no adhvaraṃ śruṣṭimantam ||

1.094.01a imaṃ stomam arhate jātavedase ratham iva sam mahemā maṇiṣayā |
 1.094.01c bhadrā hi naḥ pramatir asya saṃsady agne sakhye mā riṣāmā vayaṃ tava ||
 1.094.02a yasmai tvam āyajase sa sādhaty anarvā kṣeti dadhate suvīryam |
 1.094.02c sa tūtāva nainam aśnoty aṃhatir agne sakhye mā riṣāmā vayaṃ tava ||
 1.094.03a śakema tvā samidhaṃ sādhayā dhiyas tve devā havir adanty āhutam |
 1.094.03c tvam ādityāṃ ā vaha tān hy uśmasy agne sakhye mā riṣāmā vayaṃ tava ||
 1.094.04a bharāmedhmaṃ kṛṇavāmā haviṃṣi te citayantaḥ parvaṇā-parvaṇā vayam |
 1.094.04c jīvātave prataraṃ sādhayā dhiyo 'gne sakhye mā riṣāmā vayaṃ tava ||
 1.094.05a viśāṃ gopā asya caranti jantavo dvipac ca yad uta catuṣpad aktubhiḥ |
 1.094.05c citraḥ praketa uṣaso mahāṃ asy agne sakhye mā riṣāmā vayaṃ tava ||
 1.094.06a tvam adhvaryur uta hotāsi pūrvyaḥ praśāstā potā januṣā purohitaḥ |
 1.094.06c viśvā vidvāṃ ārtvijyā dhīra puṣyasy agne sakhye mā riṣāmā vayaṃ tava ||
 1.094.07a yo viśvataḥ supratikaḥ sadr̥ṇṇ asi dūre cit san taḍid ivāti rocase |
 1.094.07c rātryāś cid andho ati deva paśyasy agne sakhye mā riṣāmā vayaṃ tava ||
 1.094.08a pūrvo devā bhavatu sunvato ratho 'smākaṃ śaṃso abhy astu dūḍhyaḥ |
 1.094.08c tad ā jānītota puṣyatā vaco 'gne sakhye mā riṣāmā vayaṃ tava ||
 1.094.09a vadhair duḥśaṃsāṃ apa dūḍhyo jahi dūre vā ye anti vā ke cid atrinaḥ |
 1.094.09c athā yajñāya gṛṇate sugaṃ kṛdhy agne sakhye mā riṣāmā vayaṃ tava ||
 1.094.10a yad ayukthā aruṣā rohitā rathe vātajūtā vṛṣabhasyeva te ravaḥ |
 1.094.10c ād invasi vanino dhūmaketunāgne sakhye mā riṣāmā vayaṃ tava ||
 1.094.11a adha svanād uta bibhyuḥ patatriṇo drapsā yat te yavasādo vy asthiran |
 1.094.11c sugaṃ tat te tāvakebhyo rathebhyo 'gne sakhye mā riṣāmā vayaṃ tava ||
 1.094.12a ayam mitrasya varuṇasya dhāyase 'vayātām marutāṃ heḍo adbhutaḥ |
 1.094.12c mṛdā su no bhūtv eṣāṃ manaḥ punar agne sakhye mā riṣāmā vayaṃ tava ||
 1.094.13a devo devānām asi mitro adbhuto vasur vasūnām asi cārur adhware |
 1.094.13c śarman syāma tava saprathastame 'gne sakhye mā riṣāmā vayaṃ tava ||
 1.094.14a tat te bhadrāṃ yat samiddhaḥ sve dame somāhuto jarase mṛdayattamaḥ |
 1.094.14c dadhāsi ratnaṃ draviṇaṃ ca dāśuṣe 'gne sakhye mā riṣāmā vayaṃ tava ||
 1.094.15a yasmai tvam sudraviṇo dadāśo 'nāgāstvam adite sarvatātā |
 1.094.15c yam bhadreṇa śavasā codayāsi prajāvatā rādhasā te syāma ||
 1.094.16a sa tvam agne saubhagatvasya vidvān asmākam āyuḥ pra tireha deva |
 1.094.16c tan no mitro varuṇo māmahantām aditiḥ sindhuḥ pṛthivī uta dyauḥ ||

1.095.01a dve virūpe carataḥ svarthe anyānyā vatsam upa dhāpayete |
 1.095.01c harir anyasyām bhavati svadhāvāñ chukro anyasyām dadṛṣe suvarcāḥ ||
 1.095.02a daśemaṃ tvaṣṭur janayanta garbham atandrāso yuvatayo vibhṛtram |
 1.095.02c tigmānikam svayaśasaṃ janeṣu virocamānam pari ṣiṃ nayanti ||
 1.095.03a trīni jānā pari bhūṣanty asya samudra ekaṃ divy ekam apsu |
 1.095.03c pūrvām anu pra diśam pārthivānām ṛtūn praśāsad vi dadhāv anuṣṭhu ||
 1.095.04a ka imaṃ vo niṇyam ā ciketa vatso mātṛ janayata svadhābhiḥ |
 1.095.04c bahvinām garbho apasām upasthān mahān kavir niś carati svadhāvān ||
 1.095.05a āviṣṭyo vardhate cārur āsu jihmānām ūrdhvaḥ svayaśā upasthe |
 1.095.05c ubhe tvaṣṭur bibhyatur jāyamānāt pracīci ṣiṃham prati joṣayete ||
 1.095.06a ubhe bhadre joṣayete na mene gāvo na vāśrā upa tasthur evaiḥ |
 1.095.06c sa dakṣaṇām dakṣapatir babhūvāñjanti yaṃ dakṣiṇato havirbhiḥ ||
 1.095.07a ud yaṃyamīti saviteva bāhū ubhe sicau yatate bhīma ṛñjan |
 1.095.07c uc chukram atkam ajate simasmān navā mātṛbhyo vasanā jahāti ||
 1.095.08a tveṣaṃ rūpaṃ kṛṇuta uttaraṃ yat sampr̥cānaḥ sadane gobhir adbhiḥ |
 1.095.08c kavir budhnam pari marmr̥jyate dhīḥ sā devatātā samitir babhūva ||
 1.095.09a uru te jrayaḥ pary eti budhnaṃ virocamānam mahiṣasya dhāma |
 1.095.09c viśvebhir agne svayaśobhir iddho 'dabdhebhiḥ pāyubhiḥ pāhy asmān ||
 1.095.10a dhanvan srotaḥ kṛṇute gātum ūrmiṃ śukrair ūrmibhir abhi nakṣati kṣām |
 1.095.10c viśvā sanāni jaṭharaṣu dhatte 'ntar navāsu carati prasūṣu ||
 1.095.11a evā no agne samidhā vṛdhāno revat pāvaka śravase vi bhāhi |
 1.095.11c tan no mitro varuṇo māmahantām aditiḥ sindhuḥ pṛthivī uta dyauḥ ||

1.096.01a sa pratnathā sahasā jāyamānaḥ sadyaḥ kāvyāni baḍ adhatta viśvā |
 1.096.01c āpaś ca mitraṃ dhiṣaṇā ca sādhan devā agniṃ dhārayan draviṇodām ||
 1.096.02a sa pūrvayā nividā kavyatāyor imāḥ prajā ajanayan manūnām |
 1.096.02c vivasvatā cakṣasā dyām apaś ca devā agniṃ dhārayan draviṇodām ||
 1.096.03a tam iḍata prathamam yajñasādham viśā ārīr āhutam ṛñjasānam |
 1.096.03c ūrjaḥ putram bharaṭam sṛpradānum devā agniṃ dhārayan draviṇodām ||
 1.096.04a sa mātariśvā puruvārapuṣṭir vidad gātum tanayāya svarvit |
 1.096.04c viśam gopā janitā rodasyor devā agniṃ dhārayan draviṇodām ||
 1.096.05a naktośāsā varṇam āmemyāne dhāpayete śiśum ekaṃ samīci |
 1.096.05c dyāvākṣāmā rukmo antar vi bhāti devā agniṃ dhārayan draviṇodām ||
 1.096.06a rāyo budhnaḥ saṃgamano vasūnām yajñasya ketur manmasādhanō veḥ |
 1.096.06c amṛtatvaṃ rakṣamāṇāsa enaṃ devā agniṃ dhārayan draviṇodām ||
 1.096.07a nū ca purā ca sadanaṃ rayiṇām jātasya ca jāyamānasya ca kṣām |
 1.096.07c sataś ca gopām bhavataś ca bhūrer devā agniṃ dhārayan draviṇodām ||
 1.096.08a draviṇodā draviṇasas turasya draviṇodāḥ sanarasya pra yaṃsat |
 1.096.08c draviṇodā vīravatīm iṣaṃ no draviṇodā rāsate dīrgham āyuh ||
 1.096.09a evā no agne samidhā vṛdhāno revat pāvaka śravase vi bhāhi |
 1.096.09c tan no mitro varuṇo māmahantām aditiḥ sindhuḥ pṛthivī uta dyauḥ ||

1.097.01a apa naḥ śośucad agham agne śuśugdhy ā rayim |
 1.097.01c apa naḥ śośucad agham ||
 1.097.02a sukṣetriyā sugātuyā vasūyā ca yajāmahe |
 1.097.02c apa naḥ śośucad agham ||
 1.097.03a pra yad bhandiṣṭha eṣām prāsmākāsaś ca sūrayaḥ |

- 1.097.03c apa naḥ śośucad agham ||
1.097.04a pra yat te agne sūrayo jāyemahi pra te vayam |
1.097.04c apa naḥ śośucad agham ||
1.097.05a pra yad agneḥ sahasvato viśvato yanti bhānavaḥ |
1.097.05c apa naḥ śośucad agham ||
1.097.06a tvam hi viśvatomukha viśvataḥ paribhūr asi |
1.097.06c apa naḥ śośucad agham ||
1.097.07a dviṣo no viśvatomukhāti nāveva pāraya |
1.097.07c apa naḥ śośucad agham ||
1.097.08a sa naḥ sindhum iva nāvayāti parṣā svastaye |
1.097.08c apa naḥ śośucad agham ||
- 1.098.01a vaiśvānarasya sumatau syāma rājā hi kam bhuvanānām abhiśriḥ |
1.098.01c ito jāto viśvam idaṃ vi caṣṭe vaiśvānaro yatate sūryeṇa ||
1.098.02a pṛṣṭo divi pṛṣṭo agniḥ pṛthivyām pṛṣṭo viśvā oṣadhīr ā viveśa |
1.098.02c vaiśvānaraḥ sahasā pṛṣṭo agniḥ sa no divā sa riṣaḥ pātu naktam ||
1.098.03a vaiśvānara tava tat satyam astv asmān rāyo maghavānaḥ sacantām |
1.098.03c tan no mitro varuṇo māmahantām aditiḥ sindhuḥ pṛthivī uta dyauḥ ||
- 1.099.01a jātavedase sunavāma somam arātiyato ni dahāti vedaḥ |
1.099.01c sa naḥ parṣad ati durgāni viśvā nāveva sindhum duritāty agniḥ ||
- 1.100.01a sa yo vṛṣā vṛṣṇyebhiḥ samokā maho divaḥ pṛthivyās ca samrāt |
1.100.01c satīnasatvā havyo bhareṣu marutvān no bhavatv indra ūtī ||
1.100.02a yasyānāptaḥ sūryasyeva yāmo bhare-bhare vṛtrahā śuṣmo asti |
1.100.02c vṛṣantamaḥ sakhibhiḥ svebhir evair marutvān no bhavatv indra ūtī ||
1.100.03a divo na yasya retaso dughānāḥ panthāso yanti śavasāparitāḥ |
1.100.03c taraddveṣāḥ sāsahiḥ paum̐syebhir marutvān no bhavatv indra ūtī ||
1.100.04a so aṅgirobhir aṅgirastamo bhūd vṛṣā vṛṣabhiḥ sakhibhiḥ sakhā san |
1.100.04c ṛgmibhir ṛgmī gātubhir jyeṣṭho marutvān no bhavatv indra ūtī ||
1.100.05a sa sūnubhir na rudrebhir ṛbhvā nṛṣāhye sāsahvām̐ amitrān |
1.100.05c sanīḍebhiḥ śravasyāni tūrvan marutvān no bhavatv indra ūtī ||
1.100.06a sa manyumīḥ samadanasya kartāsmākebhir nṛbhiḥ sūryaṃ sanat |
1.100.06c asminn ahan satpatiḥ puruhūto marutvān no bhavatv indra ūtī ||
1.100.07a tam ūtayo raṇayañ chūrasātau taṃ kṣemasya kṣitayaḥ kṛṇvata trām |
1.100.07c sa viśvasya karuṇasyeśa eko marutvān no bhavatv indra ūtī ||
1.100.08a tam apsanta śavasa utsaveṣu naro naram avase taṃ dhanāya |
1.100.08c so andhe cit tamasi jyotir vidan marutvān no bhavatv indra ūtī ||
1.100.09a sa savyena yamati vrādhataś cit sa dakṣiṇe samḡṛbhītā kṛtāni |
1.100.09c sa kīriṇā cit sanitā dhanāni marutvān no bhavatv indra ūtī ||
1.100.10a sa grāmebhiḥ sanitā sa rathebhīr vide viśvābhiḥ kṛṣṭibhir nv adya |
1.100.10c sa paum̐syebhir abhibhūr aśastīr marutvān no bhavatv indra ūtī ||
1.100.11a sa jāmibhir yat samajāti mīḍhe 'jāmibhir vā puruhūta evaiḥ |
1.100.11c apām̐ tokasya tanayasya jeṣe marutvān no bhavatv indra ūtī ||
1.100.12a sa vajrabhṛd dasyuhā bhīma ugraḥ sahasracetāḥ śatanītha ṛbhvā |
1.100.12c camṛiṣo na śavasā pāñcajanya marutvān no bhavatv indra ūtī ||

1.100.13a tasya vajraḥ krandati smat svarṣā divo na tveṣo ravathaḥ śimivān |
 1.100.13c taṃ sacante sanayas taṃ dhanāni marutvān no bhavativ indra ūti ||
 1.100.14a yasyājasraṃ śavasā mānam uktham paribhujad rodasī viśvataḥ sīm |
 1.100.14c sa pārīṣat kratubhir mandasāno marutvān no bhavativ indra ūti ||
 1.100.15a na yasya devā devatā na martā āpaś cana śvaso antam āpuḥ |
 1.100.15c sa prarīkvā tvakṣasā kṣmo divas ca marutvān no bhavativ indra ūti ||
 1.100.16a rohic chyāvā sumadaṃśur lalāmīr dyukṣā rāya ṛjṛāśvasya |
 1.100.16c vṛṣaṇvantam bibhratī dhūrṣu ratham mandrā ciketa nāhuṣīṣu vikṣu ||
 1.100.17a etat tyat ta indra vṛṣṇa uktham vārṣāgirā abhi gṛṇanti rādhaḥ |
 1.100.17c ṛjṛāśvaḥ praṣṭibhir ambarīṣaḥ sahadevo bhayamānaḥ surādhaḥ ||
 1.100.18a dasyūñ chimyūṃś ca puruhūta evair hatvā pṛthivyām śarvā ni barhīt |
 1.100.18c sanat kṣetraṃ sakhibhiḥ śvitnyebhiḥ sanat sūryaṃ sanad apaḥ suvajraḥ ||
 1.100.19a viśvāhendro adhivaktā no astv aparīhvṛtāḥ sanuyāma vājam |
 1.100.19c tan no mitro varuṇo māmahantām aditiḥ sindhuḥ pṛthivī uta dyauḥ ||

1.101.01a pra mandine pitumad arcatā vaco yaḥ kṛṣṇagarbhā nirahann ṛjīśvanā |
 1.101.01c avasyavo vṛṣaṇam vajradakṣiṇam marutvantam sakhyāya havāmahe ||
 1.101.02a yo vyamsaṃ jāhṛṣāṇena manyunā yaḥ śambaram yo ahan piprum avratam |
 1.101.02c indro yaḥ śuṣṇam aśuṣaṃ ny āvṛṇaṅ marutvantam sakhyāya havāmahe ||
 1.101.03a yasya dyāvāpṛthivī paumsyam mahad yasya vrata varuṇo yasya sūryaḥ |
 1.101.03c yasyendrasya sindhavaḥ saścati vratam marutvantam sakhyāya havāmahe ||
 1.101.04a yo aśvānām yo gavām gopatir vaśī ya āritaḥ karmaṇi-karmaṇi sthiraḥ |
 1.101.04c vīdoś cid indro yo asunvato vadho marutvantam sakhyāya havāmahe ||
 1.101.05a yo viśvasya jagataḥ prānatas patir yo brahmaṇe prathamō gā avindat |
 1.101.05c indro yo dasyūñr adharāñ avātiran marutvantam sakhyāya havāmahe ||
 1.101.06a yaḥ sūrebhir havyo yaś ca bhīrubhir yo dhāvadbhir hūyate yaś ca jigyubhiḥ |
 1.101.06c indram yaṃ viśvā bhuvanābhi saṃdadhur marutvantam sakhyāya havāmahe ||
 1.101.07a rudrānām eti pradiśā vicakṣaṇo rudrebhir yoṣā tanute pṛthu jrayaḥ |
 1.101.07c indram manīṣā abhy arcati śrutam marutvantam sakhyāya havāmahe ||
 1.101.08a yad vā marutvaḥ parame sadhasthe yad vāvame vṛjane mādayāse |
 1.101.08c ata ā yāhy adhvaram no achā tvāyā haviś cakṛmā satyarādhaḥ ||
 1.101.09a tvāyendra somaṃ suṣumā sudakṣa tvāyā haviś cakṛmā brahmavāhaḥ |
 1.101.09c adhā niyutvaḥ sagaṇo marudbhir asmin yajñe barhiṣi mādayasva ||
 1.101.10a mādayasva haribhir ye ta indra vi ṣyasva śipre vi sṛjasva dhene |
 1.101.10c ā tvā suśipra harayo vahantūsan havyanī prati no juṣasva ||
 1.101.11a marutstotrasya vṛjanasya gopā vayam indreṇa sanuyāma vājam |
 1.101.11c tan no mitro varuṇo māmahantām aditiḥ sindhuḥ pṛthivī uta dyauḥ ||

1.102.01a imāṃ te dhiyam pra bhare maho mahīm asya stotre dhiṣaṇā yat ta ānaje |
 1.102.01c tam utsave ca prasave ca sāsahim indram devāsaḥ śavasāmadann anu ||
 1.102.02a asya śravo nadyaḥ sapta bibhrati dyāvākṣāmā pṛthivī darśataṃ vapuḥ |
 1.102.02c asme sūryācandramasābhicakṣe śraddhe kam indra carato vitarturam ||
 1.102.03a taṃ smā ratham maghavan prāva sātaye jaitram yaṃ te anumadāma saṃgame |
 1.102.03c ājā na indra manasā puruṣtuta tvāyadbhyo maghavañ charma yacha naḥ ||
 1.102.04a vyaṃ jayema tvayā yujā vṛtam asmākam aṃsam ud avā bhare-bhare |
 1.102.04c asmabhyam indra varivaḥ sugaṃ kṛdhi pra śatrūṇām maghavan vṛṣṇyā ruja ||
 1.102.05a nānā hi tvā havamānā janā ime dhanānām dhartar avasā vipanyavaḥ |

1.102.05c asmākaṃ smā ratham ā tiṣṭha sātaye jaitraṃ hīndra nibhṛtam manas tava ||
 1.102.06a gojitā bāhū amitakratuḥ simaḥ karman-karmañ chatamūtiḥ khajaṃkaraḥ |
 1.102.06c akalpa indraḥ pratimānam ojasāthā janā vi hvayante siśāsavaḥ ||
 1.102.07a ut te śatān maghavann uc ca bhūyasa ut sahasrād ririce kṛṣṭiṣu śravaḥ |
 1.102.07c amātraṃ tvā dhiṣaṇā titviṣe mahy adhā vṛtrāṇi jighnase puram̐dara ||
 1.102.08a triviṣṭidhātu pratimānam ojasas tisro bhūmīr nṛpate trīṇi rocanā |
 1.102.08c atīdam viśvam bhuvanam vavakṣithāśatrur indra januṣā sanād asi ||
 1.102.09a tvām deveṣu prathamam havāmahe tvam babhūtha pṛtanāsu sāsahiḥ |
 1.102.09c semam naḥ kārum upamanyum udbhidam indraḥ kṛṇotu prasave ratham puraḥ ||
 1.102.10a tvam̐ jigetha na dhanā rurodhithārbheṣv ājā maghavan mahatsu ca |
 1.102.10c tvām ugram avase sam̐ śiśīmasy athā na indra havaneṣu codaya ||
 1.102.11a viśvāhendro adhivaktā no astv aparivṛtāḥ sanuyāma vājam |
 1.102.11c tan no mitro varuṇo māmahantām aditiḥ sindhuḥ pṛthivī uta dyauḥ ||

1.103.01a tat ta indriyam paramam parācair adhārayanta kavayaḥ puredam |
 1.103.01c kṣamedam anyad divy anyad asya sam̐ i pṛcyate samaneva ketuḥ ||
 1.103.02a sa dhārayat pṛthivīm paprathac ca vajreṇa hatvā nir apaḥ sasarja |
 1.103.02c ahann ahim abhinad rauhiṇam vy ahan vyamsam maghavā śacībhiḥ ||
 1.103.03a sa jātūbharmā śraddadhāna ojaḥ puro vibhindann acarad vi dāsīḥ |
 1.103.03c vidvān vajrin dasyave hetim asyāryam̐ saho vardhayā dyumnam indra ||
 1.103.04a tad ūcuṣe mānuṣemā yugāni kīrtenyam maghavā nāma bibhrat |
 1.103.04c upaprayan dasyuhatyāya vajrī yad dha sūnuḥ śravase nāma dadhe ||
 1.103.05a tad asyedam paśyatā bhūri puṣṭam̐ śrad indrasya dhattana vīryāya |
 1.103.05c sa gā avindat so avindad aśvān sa ośadhīḥ so apaḥ sa vanāni ||
 1.103.06a bhūrikarmane vṛṣabhāya vṛṣṇe satyaśuṣmāya sunavāma somam |
 1.103.06c ya ādṛtyā paripanthīva sūro 'yajvano vibhajann eti vedaḥ ||
 1.103.07a tad indra preva vīryam̐ cakartha yat sasantaṃ vajreṇābodhayo 'him |
 1.103.07c anu tvā patnīr hṛṣitaṃ vayas ca viśve devāso amadann anu tvā ||
 1.103.08a śuṣṇam pipruṃ kuyavam̐ vṛtram indra yadāvadhīr vi puraḥ śambarasya |
 1.103.08c tan no mitro varuṇo māmahantām aditiḥ sindhuḥ pṛthivī uta dyauḥ ||

1.104.01a yoniṣ ṭa indra niṣade akāri tam ā ni ṣīda svāno nārvā |
 1.104.01c vimucyā vayo 'vasāyāśvān doṣā vastor vahīyasaḥ prapitve ||
 1.104.02a o tye nara indram ūtaye gur nū cit tān sadyo adhvano jagamyāt |
 1.104.02c devāso manyum̐ dāsasya ścamnan te na ā vakṣan suvitāya varṇam ||
 1.104.03a ava tmanā bharate ketavedā ava tmanā bharate phenam udan |
 1.104.03c kṣīreṇa snātaḥ kuyavasya yoṣe hate te syātām pravane śīphāyāḥ ||
 1.104.04a yuyopa nābhir uparasyāyoḥ pra pūrvābhis tirate rāṣṭi sūraḥ |
 1.104.04c añjasī kuliśī vīrapatnī payo hinvānā udabhir bharante ||
 1.104.05a prati yat syā nīthādarsi dasyor oko nāchā sadanam̐ jānatī gāt |
 1.104.05c adha smā no maghavañ carkr̐tād in mā no magheva niṣṣapī parā dāḥ ||
 1.104.06a sa tvam̐ na indra sūrye so apsv anāgāstva ā bhaja jīvaśam̐se |
 1.104.06c māntarām bhujam ā ririṣo naḥ śraddhitam̐ te mahata indriyāya ||
 1.104.07a adhā manye śrat te asmā adhāyi vṛṣā codasva mahate dhanāya |
 1.104.07c mā no akr̐te puruhūta yonāv indra kṣudhyadbhyo vaya āsutim̐ dāḥ ||
 1.104.08a mā no vadhīr indra mā parā dā mā naḥ priyā bhojanāni pra moṣiḥ |
 1.104.08c āṇḍā mā no maghavañ chakra nir bhen mā naḥ pātrā bhet sahajānuṣāṇi ||

- 1.104.09a arvāñ ehi somakāmaṃ tvāhur ayam sutas tasya pibā madāya |
1.104.09c uruvyacā jaṭhara ā vṛṣasva piteva naḥ śṛṇuhi hūyamānaḥ ||
- 1.105.01a candramā apsv antar ā suparṇo dhāvate divi |
1.105.01c na vo hiraṇyanemayaḥ padaṃ vindanti vidyuto vittam me asya rodasī ||
1.105.02a artham id vā u arthina ā jāyā yuvate patim |
1.105.02c tuñjāte vṛṣṇyam payaḥ paridāya rasaṃ duhe vittam me asya rodasī ||
1.105.03a mo ṣu devā adaḥ svar ava pādi divas pari |
1.105.03c mā somyasya śambhuvaḥ śūne bhūma kadā cana vittam me asya rodasī ||
1.105.04a yajñam pṛchāmy avamaṃ sa tad dūto vi vocati |
1.105.04c kva ṛtam pūrvyaṃ gataṃ kas tad bibharti nūtano vittam me asya rodasī ||
1.105.05a amī ye devā sthana triṣv ā rocane divaḥ |
1.105.05c kad va ṛtam kad anṛtam kva pratnā va āhutir vittam me asya rodasī ||
1.105.06a kad va ṛtasya dharṇasi kad varuṇasya cakṣaṇam |
1.105.06c kad aryamṇo mahas pathāti krāmema dūḍhyo vittam me asya rodasī ||
1.105.07a ahaṃ so asmi yaḥ purā sute vadāmi kāni cit |
1.105.07c tam mā vyanty ādhyo vṛko na tṛṣṇajam mṛgaṃ vittam me asya rodasī ||
1.105.08a sam mā tapanty abhitaḥ sapatnīr iva parśavaḥ |
1.105.08c mūṣo na śíśnā vy adanti mādhyā stotāraṃ te śatakrato vittam me asya rodasī ||
1.105.09a amī ye sapta raśmayas tatrā me nābhīr ātatā |
1.105.09c tritas tad vedāptyaḥ sa jāmitvāya rebhati vittam me asya rodasī ||
1.105.10a amī ye pañcokṣaṇo madhye tasthur maho divaḥ |
1.105.10c devatrā nu pravācyam sadhrīcīnā ni vāvṛtur vittam me asya rodasī ||
1.105.11a suparṇā eta āsate madhya ārodhane divaḥ |
1.105.11c te sedhanti patho vṛkaṃ tarantaṃ yahvatīr apo vittam me asya rodasī ||
1.105.12a navyaṃ tad ukthyaṃ hitaṃ devāsaḥ supravācanam |
1.105.12c ṛtam arṣanti sindhavaḥ satyaṃ tātāna sūryo vittam me asya rodasī ||
1.105.13a agne tava tyad ukthyaṃ deveṣv asty āpyam |
1.105.13c sa naḥ satto manuṣvad ā devān yakṣi viduṣṭaro vittam me asya rodasī ||
1.105.14a satto hotā manuṣvad ā devāñ achā viduṣṭaraḥ |
1.105.14c agnir havyā suṣūdati devo deveṣu medhiro vittam me asya rodasī ||
1.105.15a brahmā kṛṇoti varuṇo gātuvidaṃ tam īmahe |
1.105.15c vy ūrṇoti hṛdā matim navyo jāyatām ṛtam vittam me asya rodasī ||
1.105.16a asau yaḥ panthā ādityo divi pravācyam kṛtaḥ |
1.105.16c na sa devā atikrame tam martāso na paśyatha vittam me asya rodasī ||
1.105.17a tritaḥ kūpe 'vahito devān havata ūtaye |
1.105.17c tac chuśrāva bṛhaspatiḥ kṛṇvann aṃhūraṇād uru vittam me asya rodasī ||
1.105.18a aruṇo mā sakṛd vṛkaḥ pathā yantaṃ dadarśa hi |
1.105.18c uj jihīte nicāyyā taṣṭeva pṛṣṭyāmayī vittam me asya rodasī ||
1.105.19a enāṅgūṣeṇa vayam indravanto 'bhi śyāma vṛjane sarvavīrāḥ |
1.105.19c tan no mitro varuṇo māmahantām aditiḥ sindhuḥ pṛthivī uta dyauḥ ||
- 1.106.01a indram mitraṃ varuṇam agnim ūtaye mārutaṃ śardho aditiṃ havāmahe |
1.106.01c rathaṃ na durgād vasavaḥ sudānavo viśvasmān no aṃhaso niṣ pipartana ||
1.106.02a ta ādityā ā gatā sarvatātaye bhūta devā vṛtratūryeṣu śambhuvaḥ |
1.106.02c rathaṃ na durgād vasavaḥ sudānavo viśvasmān no aṃhaso niṣ pipartana ||
1.106.03a avantu naḥ pitarāḥ supravācanā uta devī devaputre ṛtāvṛdhā |

1.106.03c ratham na durgād vasavaḥ sudānavo viśvasmān no aṃhaso niṣ pipartana ||
 1.106.04a narāśamsaṃ vājinam vājayann iha kṣayadvīram pūṣaṇam sunnair īmahe |
 1.106.04c ratham na durgād vasavaḥ sudānavo viśvasmān no aṃhaso niṣ pipartana ||
 1.106.05a bṛhaspate sadam in naḥ sugaṃ kṛdhi śaṃ yor yat te manurhitam tad īmahe |
 1.106.05c ratham na durgād vasavaḥ sudānavo viśvasmān no aṃhaso niṣ pipartana ||
 1.106.06a indram kutso vṛtrahaṇam śacīpatim kāte nibāḍha ṛṣir ahvad ūtaye |
 1.106.06c ratham na durgād vasavaḥ sudānavo viśvasmān no aṃhaso niṣ pipartana ||
 1.106.07a devair no devy aditir ni pātu devas trātā trāyatām aprayuchan |
 1.106.07c tan no mitro varuṇo māmahantām aditiḥ sindhuḥ pṛthivī uta dyauḥ ||

1.107.01a yajño devānām praty eti sunnam ādityāso bhavatā mṛḍayantaḥ |
 1.107.01c ā vo 'rvācī sumatir vavṛtyād aṃhoś cid yā varivovittarāsat ||
 1.107.02a upa no devā avasā gamantv aṅgirasāṃ sāmabhi stūyamānāḥ |
 1.107.02c indra indriyair maruto marudbhīr ādityair no aditiḥ śarma yaṃsat ||
 1.107.03a tan na indras tad varuṇas tad agnis tad aryamā tat savitā cano dhāt |
 1.107.03c tan no mitro varuṇo māmahantām aditiḥ sindhuḥ pṛthivī uta dyauḥ ||

1.108.01a ya indrāgnī citratamo ratho vām abhi viśvāni bhuvanāni caṣṭe |
 1.108.01c tenā yātam saratham tasthivāṃsāthā somasya pibatam sutasya ||
 1.108.02a yāvad idam bhuvanam viśvam asty uruvyacā varimatā gabhīram |
 1.108.02c tāvāñ ayam pātave somo astv aram indrāgnī manase yuvabhyām ||
 1.108.03a cakrāthe hi sadhryaṇ nāma bhadram sadhrīcīnā vṛtrahaṇā uta sthaḥ |
 1.108.03c tāv indrāgnī sadhryaṇcā niṣadyā vṛṣṇaḥ somasya vṛṣaṇā vṛṣethām ||
 1.108.04a samiddheṣv agniṣv ānajānā yatasrucā barhir u tistirāṇā |
 1.108.04c tīvraiḥ somaiḥ pariṣiktebhīr arvāg endrāgnī saumanasāya yātam ||
 1.108.05a yānindrāgnī cakrathur vīryāni yāni rūpāṇy uta vṛṣṇyāni |
 1.108.05c yā vām pratnāni sakhyā śivāni tebhīḥ somasya pibatam sutasya ||
 1.108.06a yad abravam prathamam vām vṛṇāno 'yaṃ somo asurair no vihavyaḥ |
 1.108.06c tāṃ satyām śraddhām abhy ā hi yātam athā somasya pibatam sutasya ||
 1.108.07a yad indrāgnī madathaḥ sve duroṇe yad brahmaṇi rājani vā yajatrā |
 1.108.07c ataḥ pari vṛṣaṇāv ā hi yātam athā somasya pibatam sutasya ||
 1.108.08a yad indrāgnī yaduṣu turvaśeṣu yad druhyuṣv anuṣu pūruṣu sthaḥ |
 1.108.08c ataḥ pari vṛṣaṇāv ā hi yātam athā somasya pibatam sutasya ||
 1.108.09a yad indrāgnī avamasyām pṛthivyām madhyamasyām paramasyām uta sthaḥ |
 1.108.09c ataḥ pari vṛṣaṇāv ā hi yātam athā somasya pibatam sutasya ||
 1.108.10a yad indrāgnī paramasyām pṛthivyām madhyamasyām avamasyām uta sthaḥ |
 1.108.10c ataḥ pari vṛṣaṇāv ā hi yātam athā somasya pibatam sutasya ||
 1.108.11a yad indrāgnī divi ṣṭho yat pṛthivyām yat parvateṣv ośadhīṣv apsu |
 1.108.11c ataḥ pari vṛṣaṇāv ā hi yātam athā somasya pibatam sutasya ||
 1.108.12a yad indrāgnī uditā sūryasya madhye divaḥ svadhayā mādayethe |
 1.108.12c ataḥ pari vṛṣaṇāv ā hi yātam athā somasya pibatam sutasya ||
 1.108.13a evendrāgnī papivāmsā sutasya viśvāsmabhyam saṃ jayatam dhanāni |
 1.108.13c tan no mitro varuṇo māmahantām aditiḥ sindhuḥ pṛthivī uta dyauḥ ||

1.109.01a vi hy akhyam manasā vasya ichann indrāgnī jñāsa uta vā sajātān |
 1.109.01c nānyā yuvat pramatir asti mahyam sa vām dhiyam vājayantīm atakṣam ||

- 1.109.02a aśravam hi bhūridāvattarā vāṃ vijāmātur uta vā ghā syālāt |
1.109.02c athā somasya prayatī yuvabhyām indrāgnī stomam janayāmi navyam ||
1.109.03a mā chedma rāsmīm̐r iti nādhamānāḥ pitṛṇām śaktir anuyachamānāḥ |
1.109.03c indrāgnibhyām kaṃ vṛṣaṇo madanti tā hy adri dhiṣaṇāyā upasthe ||
1.109.04a yuvābhyām devī dhiṣaṇā madāyendrāgnī somam uśatī sunoti |
1.109.04c tāv aśvinā bhadrahastā supāṇī ā dhāvataṃ madhunā pṛṅktam apsu ||
1.109.05a yuvām indrāgnī vasuno vibhāge tavastamā śuśrava vṛtrahatyē |
1.109.05c tāv āsadyā barhiṣi yajñe asmin pra carṣaṇī mādayethām sutasya ||
1.109.06a pra carṣaṇibhyaḥ pṛtanāhaveṣu pra pṛthivyā riricāthe divāś ca |
1.109.06c pra sindhubhyaḥ pra giribhyo mahitvā prendrāgnī viśvā bhuvanāty anyā ||
1.109.07a ā bharataṃ śikṣataṃ vajrabāhū asmāṃ indrāgnī avataṃ śacībhiḥ |
1.109.07c ime nu te rāsmayaḥ sūryasya yebhiḥ sapitvam pitaro na āsan ||
1.109.08a puraṃdarā śikṣataṃ vajrahastāsmāṃ indrāgnī avataṃ bhareṣu |
1.109.08c tan no mitro varuṇo māmahantām aditiḥ sindhuḥ pṛthivī uta dyauḥ ||
- 1.110.01a tatam me apas tad u tāyate punaḥ svādiṣṭhā dhītir ucathāya śasyate |
1.110.01c ayam samudra iha viśvadevyaḥ svāhākṛtasya sam u tṛṇuta ṛbhavaḥ ||
1.110.02a ābhogayam pra yad ichanta aitanāpākāḥ pṛāñco mama ke cid āpayāḥ |
1.110.02c saudhanvanāśaś caritasya bhūmanāgachata savitur dāśuṣo gṛham ||
1.110.03a tat savitā vo 'mṛtatvam āsuvaḍ agohyam yac chravayanta aitana |
1.110.03c tyam cic camasam asurasya bhakṣaṇam ekam santam akṛṇutā caturvayam ||
1.110.04a viṣṭvī śamī taraṇitvena vāghato martāśaḥ santo amṛtatvam ānaśuḥ |
1.110.04c saudhanvanā ṛbhavaḥ sūracakṣasaḥ saṃvatsare sam aṛcyanta dhītibhiḥ ||
1.110.05a kṣetram iva vi mamus tejanenaṃ ekam pātram ṛbhavo jehamānam |
1.110.05c upastutā upamaṃ nādhamānā amartyeṣu śrava ichamānāḥ ||
1.110.06a ā maṇiṣām antarikṣasya nṛbhyaḥ sruceva ghṛtam juhavāma vidmanā |
1.110.06c taraṇitvā ye pitur asya saścira ṛbhavo vājam aruhan divo rajaḥ ||
1.110.07a ṛbhur na indraḥ śavasā navīyān ṛbhur vājebhir vasubhir vasur dadiḥ |
1.110.07c yuṣmākaṃ devā avasāhani priye 'bhi tiṣṭhema pṛtsutir asunvatām ||
1.110.08a niś carmaṇa ṛbhavo gām apimśata saṃ vatsenāsṛjatā mātaram punaḥ |
1.110.08c saudhanvanāśaḥ svapasyayā naro jivirī yuvānā pitarākṛṇotana ||
1.110.09a vājebhir no vājasātāv avidḍhy ṛbhumāṃ indra citram ā darṣi rādhaḥ |
1.110.09c tan no mitro varuṇo māmahantām aditiḥ sindhuḥ pṛthivī uta dyauḥ ||
- 1.111.01a takṣan ratham suvṛtam vidmanāpasas takṣan harī indravāhā vṛṣaṇvasū |
1.111.01c takṣan pitṛbhyām ṛbhavo yuvad vayas takṣan vatsāya mātaram sacābhuvam ||
1.111.02a ā no yajñāya takṣata ṛbhumad vayaḥ kratve dakṣāya suprajāvatim iṣam |
1.111.02c yathā kṣayāma sarvavīrayā viśā tan naḥ śardhāya dhāsathā sv indriyam ||
1.111.03a ā takṣata sātīm asmabhyam ṛbhavaḥ sātīm rathāya sātīm arvate naraḥ |
1.111.03c sātīm no jaitrīm sam maheta viśvahā jānim ajāmim pṛtanāsu sakṣaṇim ||
1.111.04a ṛbhukṣaṇam indram ā huva ūtaya ṛbhūn vājān marutaḥ somapitaye |
1.111.04c ubhā mitrāvaruṇā nūnam aśvinā te no hinvantu sātaye dhiye jiṣe ||
1.111.05a ṛbhur bharāya saṃ śiśātu sātīm samaryajid vājo asmāṃ aviṣṭu |
1.111.05c tan no mitro varuṇo māmahantām aditiḥ sindhuḥ pṛthivī uta dyauḥ ||
- 1.112.01a iḍe dyāvāpṛthivī pūrvacittaye 'gnim gharmam surucaṃ yāmann iṣṭaye |

- 1.112.01c yābhir bhare kāram aṃśāya jinvathas tābhir ū ṣu ūtibhir aśvinā gatam ||
- 1.112.02a yuvor dānāya subharā asaścato ratham ā tasthur vacasaṃ na mantave |
- 1.112.02c yābhir dhiyo 'vathaḥ karmann iṣṭaye tābhir ū ṣu ūtibhir aśvinā gatam ||
- 1.112.03a yuvaṃ tāsāṃ divyasya prasāsane viśāṃ kṣayatho amṛtasya majmanā |
- 1.112.03c yābhir dhenum asvam pinvatho narā tābhir ū ṣu ūtibhir aśvinā gatam ||
- 1.112.04a yābhiḥ pariṃmā tanayasya majmanā dvimātā tūrṣu taraṇir vibhūṣati |
- 1.112.04c yābhis trimantur abhavad vicakṣaṇas tābhir ū ṣu ūtibhir aśvinā gatam ||
- 1.112.05a yābhī rebhaṃ nivṛtaṃ sitam adbhya ud vandanam airayataṃ svar drṣe |
- 1.112.05c yābhiḥ kaṇvam pra siṣāsantam āvataṃ tābhir ū ṣu ūtibhir aśvinā gatam ||
- 1.112.06a yābhir antakaṃ jasamānam āraṇe bhujyuṃ yābhir avyathibhir jijinvathuḥ |
- 1.112.06c yābhiḥ karkandhuṃ vayyaṃ ca jinvathas tābhir ū ṣu ūtibhir aśvinā gatam ||
- 1.112.07a yābhiḥ śucantiṃ dhanasāṃ suṣaṃsadaṃ taptaṃ gharmam omyāvantaṃ atraye |
- 1.112.07c yābhiḥ pṛṣnigum purukutsam āvataṃ tābhir ū ṣu ūtibhir aśvinā gatam ||
- 1.112.08a yābhiḥ śacībhir vṛṣaṇā parāvṛjam prāndhaṃ śroṇaṃ cakṣasa etave kṛthaḥ |
- 1.112.08c yābhir vartikāṃ grasitām amuñcataṃ tābhir ū ṣu ūtibhir aśvinā gatam ||
- 1.112.09a yābhiḥ sindhum madhumantam asaścataṃ vasiṣṭhaṃ yābhir ajarāv ajinvatam |
- 1.112.09c yābhiḥ kutsaṃ śrutaryaṃ naryam āvataṃ tābhir ū ṣu ūtibhir aśvinā gatam ||
- 1.112.10a yābhir viśpalāṃ dhanasāṃ atharvyam sahasramiḍha ājāv ajinvatam |
- 1.112.10c yābhir vaśam aśvyam preṇim āvataṃ tābhir ū ṣu ūtibhir aśvinā gatam ||
- 1.112.11a yābhiḥ sudānū auśijāya vaṇije dīrghaśravase madhu kośo akṣarat |
- 1.112.11c kakṣivantaṃ stotāraṃ yābhir āvataṃ tābhir ū ṣu ūtibhir aśvinā gatam ||
- 1.112.12a yābhī rasāṃ kṣodasodnaḥ pipinvathur anaśvaṃ yābhī ratham āvataṃ jiṣe |
- 1.112.12c yābhis triśoka usriyā udājata tābhir ū ṣu ūtibhir aśvinā gatam ||
- 1.112.13a yābhiḥ sūryam pariyāthaḥ parāvati mandhātāraṃ kṣaitrapatyeshv āvataṃ |
- 1.112.13c yābhir vipram pra bharadvājam āvataṃ tābhir ū ṣu ūtibhir aśvinā gatam ||
- 1.112.14a yābhir mahām atithigvaṃ kaśojuvaṃ divodāsaṃ śambarahatya āvataṃ |
- 1.112.14c yābhiḥ pūrbhidye trasadasyum āvataṃ tābhir ū ṣu ūtibhir aśvinā gatam ||
- 1.112.15a yābhir vamraṃ vipipānam upastutaṃ kaliṃ yābhir vittajāniṃ duvasyathaḥ |
- 1.112.15c yābhir vyaśvam uta pṛthim āvataṃ tābhir ū ṣu ūtibhir aśvinā gatam ||
- 1.112.16a yābhir narā śayave yābhir atraye yābhiḥ purā manave gātum iṣathuḥ |
- 1.112.16c yābhiḥ śārīr ājataṃ syūmaraśmaye tābhir ū ṣu ūtibhir aśvinā gatam ||
- 1.112.17a yābhiḥ paṭharvā jaṭharasya majmanāgnir nādīdec cita iddho ajmann ā |
- 1.112.17c yābhiḥ śaryātā avatho mahādthane tābhir ū ṣu ūtibhir aśvinā gatam ||
- 1.112.18a yābhir aṅgiro manasā niranyaṭho 'graṃ gachatho vivare goarṇasaḥ |
- 1.112.18c yābhir manuṃ sūram iṣā samāvataṃ tābhir ū ṣu ūtibhir aśvinā gatam ||
- 1.112.19a yābhiḥ patnīr vimadāya nyūhathur ā gha vā yābhir aruṇir aśikṣatam |
- 1.112.19c yābhiḥ sudāsa ūhathuḥ sudevyam tābhir ū ṣu ūtibhir aśvinā gatam ||
- 1.112.20a yābhiḥ śamtātī bhavatho dadāśuṣe bhujyuṃ yābhir avatho yābhir adhrigum |
- 1.112.20c omyāvatiṃ subharām ṛtastubhaṃ tābhir ū ṣu ūtibhir aśvinā gatam ||
- 1.112.21a yābhiḥ kṛśānum asane duvasyatho jave yābhir yūno arvantaṃ āvataṃ |
- 1.112.21c madhu priyam bharatho yat saraḍbhyas tābhir ū ṣu ūtibhir aśvinā gatam ||
- 1.112.22a yābhir naraṃ goṣuyudhaṃ nṛṣāhye kṣetrasya sātā tanayasya jinvathaḥ |
- 1.112.22c yābhī rathāṃ avatho yābhir arvatas tābhir ū ṣu ūtibhir aśvinā gatam ||
- 1.112.23a yābhiḥ kutsam ārjuneyaṃ śatakratū pra turvītim pra ca dabhītim āvataṃ |
- 1.112.23c yābhir dhvasantim puruṣantim āvataṃ tābhir ū ṣu ūtibhir aśvinā gatam ||
- 1.112.24a apnasvatīm aśvinā vācam asme kṛtaṃ no dasrā vṛṣaṇā maṇiśām |
- 1.112.24c adyūtye 'vase ni hvaye vāṃ vṛdhe ca no bhavataṃ vājasātau ||
- 1.112.25a dyubhir aktubhiḥ pari pātāsmān ariṣṭebhir aśvinā saubhagebhiḥ |
- 1.112.25c tan no mitro varuṇo māmahantām aditiḥ sindhuḥ pṛthivī uta dyauḥ ||

1.113.01a idaṃ śreṣṭhaṃ jyotiṣāṃ jyotir āgāc citraḥ praketo ajaniṣṭa vibhvā |
 1.113.01c yathā prasūtā savituḥ savāyaṃ evā rātry uṣase yonim āraik ||
 1.113.02a ruśadvatsā ruśatī śvetyāgād āraig u kṛṣṇā sadanāny asyāḥ |
 1.113.02c samānabandhū amṛte anūcī dyāvā varṇaṃ carata āmināne ||
 1.113.03a samāno adhvā svasror anantas tam anyānyā carato devaśiṣṭe |
 1.113.03c na methete na tasthatuḥ sumeke naktoṣāsā samanasā virūpe ||
 1.113.04a bhāsvatī netrī sūnṛtānām aceti citrā vi duro na āvaḥ |
 1.113.04c prārpyā jagad vy u no rāyo akhyad uṣā ajīgar bhuvanāni viśvā ||
 1.113.05a jihmaśye caritave maghony ābhogaya iṣṭaye rāya u tvam |
 1.113.05c dabhram paśyadbhya urviyā vicakṣa uṣā ajīgar bhuvanāni viśvā ||
 1.113.06a kṣatrāya tvam śravase tvam mahiyā iṣṭaye tvam artham iva tvam ityai |
 1.113.06c visadṛśā jīvitābhīpracakṣa uṣā ajīgar bhuvanāni viśvā ||
 1.113.07a eṣā divo duhitā praty adarśī vyuchantī yuvatīḥ śukravāsāḥ |
 1.113.07c viśvasyeśānā pārthivasya vasva uṣo adyeha subhage vy ucha ||
 1.113.08a parāyatīnām anv eti pātha āyatīnām prathamā śaśvatīnām |
 1.113.08c vyuchantī jīvam udīrayanty uṣā mṛtaṃ kaṃ cana bodhayantī ||
 1.113.09a uṣo yad agniṃ samidhe cakartha vi yad āvaś cakṣasā sūryasya |
 1.113.09c yan mānuṣān yakṣyamāṇāṃ ajīgas tad deveṣu cakṛṣe bhadram apnaḥ ||
 1.113.10a kiyāty ā yat samayā bhavāti yā vyūṣur yās ca nūnaṃ vyuchān |
 1.113.10c anu pūrvāḥ kṛpate vāvaśānā pradīdhyānā joṣam anyābhir eti ||
 1.113.11a iyuṣ ṭe ye pūrvatarām apaśyan vyuchantīm uṣasam martyāsaḥ |
 1.113.11c asmābhir ū nu praticakṣyābhūd o te yanti ye aparīṣu paśyān ||
 1.113.12a yāvayaddveṣā ṛtapā ṛtejāḥ sumnāvārī sūnṛtā irayantī |
 1.113.12c sumaṅgalīr bibhratī devavitim ihādyoṣaḥ śreṣṭhatamā vy ucha ||
 1.113.13a śaśvat puroṣā vy uvāsa devy atho adyedam vy āvo maghonī |
 1.113.13c atho vy uchād uttarāṃ anu dyūn ajarāmṛtā carati svadhābhiḥ ||
 1.113.14a vy añjibhir diva ātāsv adyaud apa kṛṣṇāṃ nirṇijam devy āvaḥ |
 1.113.14c prabodhayanty aruṇebhir aśvair oṣā yāti suyujā rathena ||
 1.113.15a āvahantī poṣyā vāryāṇi citraṃ ketuṃ kṛṇute cekitānā |
 1.113.15c iyuṣiṇām upamā śaśvatīnām vibhātīnām prathamōṣā vy aśvait ||
 1.113.16a ud īrdhvaṃ jīvo asur na āgād apa prāgāt tama ā jyotir eti |
 1.113.16c āraik panthāṃ yātave sūryāyāganma yatra pratiranta āyuh ||
 1.113.17a syūmanā vāca ud iyarti vahni stavāno rebha uṣaso vibhātīḥ |
 1.113.17c adyā tad ucha gṛṇate maghony asme āyur ni didīhi prajāvat ||
 1.113.18a yā gomatīr uṣasaḥ sarvavīrā vyuchanti dāsūṣe martyāya |
 1.113.18c vāyor iva sūnṛtānām udarke tā aśvadā aśnavat somasutvā ||
 1.113.19a mātā devānām aditer anīkaṃ yajñasya ketur bṛhatī vi bhāhi |
 1.113.19c praśastikṛd brahmaṇe no vy uchā no jane janaya viśvavāre ||
 1.113.20a yac citram apna uṣaso vahantījānāya śaśamānāya bhadram |
 1.113.20c tan no mitro varuṇo māmahantām aditiḥ sindhuḥ pṛthivī uta dyauḥ ||

1.114.01a imā rudrāya tavase kapardine kṣayadvīrāya pra bharāmahe matīḥ |
 1.114.01c yathā śam asad dvipade catuṣpade viśvam puṣṭaṃ grāme asmīn anāturam ||
 1.114.02a mṛdā no rudrota no mayas kṛdhi kṣayadvīrāya namasā vidhema te |
 1.114.02c yac chaṃ ca yoś ca manur āyeje pitā tad aśyāma tava rudra praṇiṣṭu ||
 1.114.03a aśyāma te sumatiṃ devayajyayā kṣayadvīrasya tava rudra mīdhvaḥ |

1.114.03c sumnāyann id viśo asmākam ā carāriṣṭavīrā juhavāma te haviḥ ||
 1.114.04a tveṣaṃ vayaṃ rudraṃ yajñasādhaṃ vaṅkuṃ kavim avase ni hvayāmahe |
 1.114.04c āre asmad daivyaṃ heḍo asyatu sumatim id vyaṃ asyā vṛṇīmahe ||
 1.114.05a divo varāham aruṣaṃ kapardinaṃ tveṣaṃ rūpaṃ namaśā ni hvayāmahe |
 1.114.05c haste bibhrad bheṣajā vāryāṇi śarma varma chardir asmabhyaṃ yaṃsat ||
 1.114.06a idam pitre marutām ucyate vacaḥ svādoḥ svādiyo rudrāya vardhanam |
 1.114.06c rāsvā ca no amṛta martabhojanaṃ tmane tokāya tanayāya mṛḍa ||
 1.114.07a mā no mahāntam uta mā no arbhakam mā na ukṣantam uta mā na ukṣitam |
 1.114.07c mā no vadhiḥ pitaram mota mātaram mā naḥ priyās tanvo rudra rīriṣaḥ ||
 1.114.08a mā nas toke tanaye mā na āyau mā no goṣu mā no aśveṣu rīriṣaḥ |
 1.114.08c vīrān mā no rudra bhāmīto vadhīr haviṣmantāḥ sadam it tvā havāmahe ||
 1.114.09a upa te stomān paśupā ivākaraṃ rāsvā pitar marutām sumnam asme |
 1.114.09c bhadrā hi te sumatir mṛḍayattamāthā vyaṃ ava it te vṛṇīmahe ||
 1.114.10a āre te gogham uta pūruṣaghaṇaṃ kṣayadvīra sumnam asme te astu |
 1.114.10c mṛḍā ca no adhi ca brūhi devādihā ca naḥ śarma yacha dvibarhāḥ ||
 1.114.11a avocāma namo asmā avasyavaḥ śṛṇotu no havaṃ rudro marutvān |
 1.114.11c tan no mitro varuṇo māmahantām aditiḥ sindhuḥ pṛthivī uta dyauḥ ||

1.115.01a citraṃ devānām ud agād anikaṃ cakṣur mitrasya varuṇasyāgneḥ |
 1.115.01c āprā dyāvāpṛthivī antarikṣaṃ sūrya ātmā jagatas tasthuśāś ca ||
 1.115.02a sūryo devīm uṣasaṃ rocamānām maryo na yoṣām abhy eti paścāt |
 1.115.02c yatrā naro devayanto yugāni vitanvate prati bhadrāya bhadrām ||
 1.115.03a bhadrā aśvā haritaḥ sūryasya citrā etagvā anumādyāśaḥ |
 1.115.03c namasyanto diva ā pṛṣṭham asthuḥ pari dyāvāpṛthivī yanti sadyaḥ ||
 1.115.04a tat sūryasya devatvaṃ tan mahitvam madhyā kartor vitatam sam jabhāra |
 1.115.04c yaded ayukta haritaḥ sadhasthād ād rātrī vāsas tanute simasmai ||
 1.115.05a tan mitrasya varuṇasyābhicakṣe sūryo rūpaṃ kṛṇute dyor upasthe |
 1.115.05c anantam anyad ruśad asya pājaḥ kṛṣṇam anyad dharitaḥ sam bharanti ||
 1.115.06a adyā devā uditā sūryasya nir aṃhasaḥ pipṛtā nir avadyāt |
 1.115.06c tan no mitro varuṇo māmahantām aditiḥ sindhuḥ pṛthivī uta dyauḥ ||

1.116.01a nāsatyābhyām barhir iva pra vṛñje stomāṃ iyarmy abhriyeva vātaḥ |
 1.116.01c yāv arbhagāya vimadāya jāyāṃ senājuvā nyūhatū rathena ||
 1.116.02a viḍupatmabhir āsuhemabhir vā devānām vā jūtibhiḥ śāsādānā |
 1.116.02c tad rāsabho nāsatyā sahasram ājā yamasya pradhane jigāya ||
 1.116.03a tugro ha bhujyum aśvinodameghe rayim na kaś cin mamṛvāṃ avāhāḥ |
 1.116.03c tam ūhathur naubhir ātmanvatibhir antarikṣaprudbhir apodakābhiḥ ||
 1.116.04a tisraḥ kṣapas trir ahātivrajadbhir nāsatyā bhujyum ūhathuḥ patamgaiḥ |
 1.116.04c samudrasya dhanvann ādrasya pāre tribhī rathaiḥ śatapadbhiḥ ṣaḍaśvaiḥ ||
 1.116.05a anārambhane tad avīrayethām anāsthāne agrabhane samudre |
 1.116.05c yad aśvinā ūhathur bhujyum astam śatāritrām nāvam ātasthivāmsam ||
 1.116.06a yam aśvinā dadathuḥ śvetam aśvam aghāśvāya śāśvad it svasti |
 1.116.06c tad vām dātram mahi kīrtenyam bhūt paidvo vājī sadam id dhavyo aryaḥ ||
 1.116.07a yuvaṃ narā stuvate pajriyāya kakṣivate aradatam puramdhim |
 1.116.07c kārotarāc chaphād aśvasya vṛṣṇaḥ śatam kumbhāṃ asiñcataṃ surāyāḥ ||
 1.116.08a himenāgniṃ ghraṃsam avārayethām pitumatīm ūrjam asmā adhattam |
 1.116.08c ṛbīse atrim aśvināvanītam un ninyathuḥ sarvagaṇaṃ svasti ||

1.116.09a parāvataṃ nāsatyānudethām uccābudhnaṃ cakrathur jihmabāram |
 1.116.09c kṣarann āpo na pāyanāya rāye sahasrāya tṛṣyate gotamasya ||
 1.116.10a jujuruṣo nāsatyota vavrim prāmuñcataṃ drāpim iva cyavānāt |
 1.116.10c prātirataṃ jahitasyāyur dasrād it patim akṛṇutaṃ kaninām ||
 1.116.11a tad vām narā śaṃsyam rādhyam cābhiṣṭiman nāsatyā varūtham |
 1.116.11c yad vidvāmsā nidhim ivāpagūḍham ud darśatād ūpathur vandanāya ||
 1.116.12a tad vām narā sanaye daṃsa ugram āviṣ kṛṇomi tanyatur na vṛṣṭim |
 1.116.12c dadhyañ ha yan madhv ātharvaṇo vām aśvasya śīrṣṇā pra yad im uvāca ||
 1.116.13a ajohavīn nāsatyā karā vām mahe yāman purubhujā puraṃdhiḥ |
 1.116.13c śrutam tac chāsura iva vadhrimatyā hiraṇyahastam aśvināv adattam ||
 1.116.14a āsno vṛkasya vartikām abhike yuvaṃ narā nāsatyāmumuktaṃ |
 1.116.14c uto kavim purubhujā yuvaṃ ha kṛpamāṇam akṛṇutaṃ vicakṣe ||
 1.116.15a caritraṃ hi ver ivāchedi paṇam ājā khelasya paritakmyāyām |
 1.116.15c sadyo jaṅghām āyasīm viśpalāyai dhane hite sartave praty adhattam ||
 1.116.16a śatam meṣān vṛkya cakṣadānam ṛjṛāśvam tam pitāndham cakāra |
 1.116.16c tasmā akṣi nāsatyā vicakṣa ādhattam dasrā bhiṣajāv anarvan ||
 1.116.17a ā vām ratham duhitā sūryasya kārṣmevātiṣṭhad arvatā jayanti |
 1.116.17c viśve devā anv amanyanta hṛdbhiḥ sam u śriyā nāsatyā sacethe ||
 1.116.18a yad ayātam divodāsāya vartir bharadvājāyāśvinā hayantā |
 1.116.18c revad uvāha sacano ratho vām vṛṣabhaś ca śiṃśumāraś ca yuktā ||
 1.116.19a rayim sukṣatraṃ svapatyam āyuhḥ suvīryam nāsatyā vahantā |
 1.116.19c ā jahnāvīm samanasa vājais trir ahno bhāgaṃ dadhatim ayātam ||
 1.116.20a pariviṣṭam jāhuṣam viśvataḥ sīm sugebhir naktam ūhathū rajobhiḥ |
 1.116.20c vibhindunā nāsatyā rathena vi parvatām ajarayū ayātam ||
 1.116.21a ekasyā vastor āvataṃ raṇāya vaśam aśvinā sanaye sahasrā |
 1.116.21c nir ahataṃ duchunā indravantā pṛthuśravaso vṛṣaṇāv arātiḥ ||
 1.116.22a śarasya cid ārcatkasyāvatād ā nicād uccā cakrathuḥ pātave vāḥ |
 1.116.22c śayave cin nāsatyā śacibhir jasuraye staryam pipyathur gām ||
 1.116.23a avasyate stuvate kṛṣṇiyāya ṛjūyate nāsatyā śacibhiḥ |
 1.116.23c paśum na naṣtam iva darśanāya viṣṇāpvaṃ dadathur viśvakāya ||
 1.116.24a daśa rātrir aśivenā nava dyūn avanaddham śnathitam apsv antaḥ |
 1.116.24c viprutam rebham udani pravṛktam un ninyathuḥ somam iva sruveṇa ||
 1.116.25a pra vām daṃsāmsy aśvināv avocam asya patiḥ syām sugavaḥ suvīraḥ |
 1.116.25c uta paśyann aśnuvan dīrgham āyur astam ivej jarimāṇam jagamyām ||

1.117.01a madhvaḥ somasyāśvinā madāya pratno hotā vivāsate vām |
 1.117.01c barhiṣmatī rātir viśritā gīr iṣā yātam nāsatyopa vājaiḥ ||
 1.117.02a yo vām aśvinā manaso javiyān rathaḥ svaśvo viśa ājigāti |
 1.117.02c yena gachathaḥ sukṛto duroṇam tena narā vartir asmabhyam yātam ||
 1.117.03a ṛṣim narāv aṃhasaḥ pāñcajanyaṃ ṛbisād atrim muñcatho gaṇena |
 1.117.03c minantā dasyor aśivasya māyā anupūrvam vṛṣaṇā codayantā ||
 1.117.04a aśvam na gūḍham aśvinā durevair ṛṣim narā vṛṣaṇā rebham apsu |
 1.117.04c sam tam riñitho viprutam daṃsobhir na vām jūryanti pūrvyā kṛtāni ||
 1.117.05a suśupvāmsam na nirṛter upasthe sūryam na dasrā tamasi kṣiyantam |
 1.117.05c śubhe rukmaṃ na darśataṃ nikhātam ud ūpathur aśvinā vandanāya ||
 1.117.06a tad vām narā śaṃsyam pajriyeṇa kakṣivatā nāsatyā pariḥman |
 1.117.06c śaphād aśvasya vājino janāya śatam kumbhām asiñcataṃ madhūnām ||
 1.117.07a yuvaṃ narā stuvate kṛṣṇiyāya viṣṇāpvaṃ dadathur viśvakāya |

1.117.07c ghoṣāyai cit pitṛṣade durone patim jūryantyā aśvināv adattam ||
 1.117.08a yuvaṃ śyāvāya ruṣatim adattam mahāḥ kṣoṇasyāśvinā kaṇvāya |
 1.117.08c pravācyam tad vṛṣaṇā kṛtam vām yan nārṣadāya śravo adhyadhattam ||
 1.117.09a purū varpāmsy aśvinā dadhānā ni pedava ūhathur āsum aśvam |
 1.117.09c sahasrasām vājinam apratitam ahihanam śravasyam tarutram ||
 1.117.10a etāni vām śravasyā sudānū brahmāṅgūṣam sadanam rodasyoḥ |
 1.117.10c yad vām pajrāso aśvinā havante yātam iṣā ca viduṣe ca vājam ||
 1.117.11a sūnor mānenāśvinā gṛṇānā vājam viprāya bhuraṇā radantā |
 1.117.11c agastye brahmaṇā vāvṛdhānā sam viśpalām nāsatyāriṇitam ||
 1.117.12a kuha yāntā suṣṭutim kāvyasya divo napātā vṛṣaṇā śayutrā |
 1.117.12c hiraṇyasyeva kalaśam nikhātam ud ūpathur daśame aśvināhan ||
 1.117.13a yuvaṃ cyavānam aśvinā jarantam punar yuvānam cakrathuḥ śacībhiḥ |
 1.117.13c yuvo ratham duhitā sūryasya saha śriyā nāsatyāvṛṇita ||
 1.117.14a yuvaṃ tigrāya pūrvyebhir evaiḥ punarmanyāv abhavatam yuvānā |
 1.117.14c yuvaṃ bhujyum arṇaso niḥ samudrād vibhir ūhathur ṛjrebhir aśvaiḥ ||
 1.117.15a ajohavid aśvinā taugryo vām proḍhaḥ samudram avyathir jaganvān |
 1.117.15c niṣ ṭam ūhathuḥ suyujā rathena manojavasā vṛṣaṇā svasti ||
 1.117.16a ajohavid aśvinā vartikā vām āsno yat sīm amuñcatam vṛkasya |
 1.117.16c vi jayuṣā yayathuḥ sānv adrer jātam viṣvāco ahatam viṣeṇa ||
 1.117.17a śatam meṣān vṛkye māmahānam tamaḥ praṇitam aśivena pitrā |
 1.117.17c ākṣi ṛjṛāśve aśvināv adhattam jyotir andhāya cakrathur vicakṣe ||
 1.117.18a śunam andhāya bharam ahvayat sā vṛkīr aśvinā vṛṣaṇā nareti |
 1.117.18c jāraḥ kanīna iva cakṣadāna ṛjṛāśvaḥ śatam ekaṃ ca meṣān ||
 1.117.19a mahī vām ūtir aśvinā mayobhūr uta srāmaṃ dhiṣṇyā sam riṇithaḥ |
 1.117.19c athā yuvām id ahvayat puraṃdhir āgachataṃ sīm vṛṣaṇāv avobhiḥ ||
 1.117.20a adhenum dasrā staryam viṣaktām apinvataṃ śayave aśvinā gām |
 1.117.20c yuvaṃ śacībhir vimadāya jāyām ny ūhathuḥ purumitrasya yoṣām ||
 1.117.21a yavam vṛkeṇāśvinā vapanteṣam duhantā manuṣāya dasrā |
 1.117.21c abhi dasyum bakureṇā dhamantoru jyotiś cakrathur āryāya ||
 1.117.22a ātharvaṇyāśvinā dadhice 'śvyaṃ śiraḥ praty airayatam |
 1.117.22c sa vām madhu pra vocad ṛtāyan tvāṣṭram yad dasrāv apikakṣyam vām ||
 1.117.23a sadā kavī sumatim ā cake vām viśvā dhiyo aśvinā prāvataṃ me |
 1.117.23c asme rayim nāsatyā bṛhantam apatyasācam śrutyaṃ rarāthām ||
 1.117.24a hiraṇyahastam aśvinā rarānā putram narā vadhrimatyā adattam |
 1.117.24c tridhā ha śyāvam aśvinā vikastam uj jīvasa airayatam sudānū ||
 1.117.25a etāni vām aśvinā vīryāṇi pra pūrvyāṇy āyavo 'vocan |
 1.117.25c brahma kṛṇvanto vṛṣaṇā yuvabhyām suvirāso vidatham ā vadema ||

1.118.01a ā vām ratho aśvinā śyenapatvā sumṛḍikaḥ svavāṃ yātv arvān |
 1.118.01c yo martyasya manaso javiyān trivandhuro vṛṣaṇā vātaramhāḥ ||
 1.118.02a trivandhureṇa trivṛtā rathena tricakreṇa suvṛtā yātam arvāk |
 1.118.02c pinvatam gā jinvatam arvato no vardhayatam aśvinā vīram asme ||
 1.118.03a pravadyāmanā suvṛtā rathena dasrāv imam śṛṇutam ślokaṃ adreḥ |
 1.118.03c kim aṅga vām praty avartim gamiṣṭhāhur viprāso aśvinā purājāḥ ||
 1.118.04a ā vām śyenāso aśvinā vahantu rathe yuktāsa āśavaḥ patamgāḥ |
 1.118.04c ye apturo divyāso na gṛdhrā abhi prayo nāsatyā vahanti ||
 1.118.05a ā vām ratham yuvatis tiṣṭhad atra juṣṭvī narā duhitā sūryasya |
 1.118.05c pari vām aśvā vapuṣaḥ patamgā vayo vahantv aruṣā abhīke ||

- 1.118.06a ud vandanam airataṃ daṃsanābhir ud rebhaṃ dasrā vṛṣaṇā śacībhiḥ |
1.118.06c niṣ ṭaugryam pārayathaḥ samudrāt punaś cyavānaṃ cakrathur yuvānam ||
1.118.07a yuvam atraye 'vanitāya taptam ūrjam omānam aśvināv adhattam |
1.118.07c yuvaṃ kaṇvāyāpiriptāya cakṣuḥ praty adhattam suṣṭuṭim jujuṣāṇā ||
1.118.08a yuvaṃ dhenuṃ śayave nādhitāyāpinvatam aśvinā pūrvyāya |
1.118.08c amuñcataṃ vartikām aṃhaso niḥ prati jaṅghām viśpalāyā adhattam ||
1.118.09a yuvaṃ śvetam pedava indrajūtam ahihanam aśvinādattam aśvam |
1.118.09c johūtram aryo abhibhūtim ugraṃ sahasrasām vṛṣaṇaṃ viḍvaṅgam ||
1.118.10a tā vām narā sv avase sujātā havāmahe aśvinā nādhamānāḥ |
1.118.10c ā na upa vasumatā rathena giro juṣāṇā suvitāya yātam ||
1.118.11a ā śyenasya javasā nūtanenāsme yātaṃ nāsatyā sajoṣāḥ |
1.118.11c have hi vām aśvinā rātahavyaḥ śaśvattamāyā uśaso vyuṣṭau ||
- 1.119.01a ā vām ratham purumāyam manojuvaṃ jīrāśvaṃ yajñiyam jīvase huve |
1.119.01c sahasraketuṃ vaninaṃ śatadvasuṃ śruṣṭivānaṃ varivodhām abhi prayaḥ ||
1.119.02a ūrdhvā dhītiḥ praty asya prayāmany adhāyi śasman sam ayanta ā diśaḥ |
1.119.02c svadāmi gharmam prati yanty ūtaya ā vām ūrjānī ratham aśvināruhat ||
1.119.03a saṃ yan mithaḥ paspṛdhānāso agmata śubhe makhā amitā jāyavo raṇe |
1.119.03c yuvor aha pravaṇe cekite ratho yad aśvinā vahathaḥ sūrim ā varam ||
1.119.04a yuvam bhujyum bhuramāṇaṃ vibhir gataṃ svayuktibhir nivahantā pitṛbhya ā |
1.119.04c yāsiṣṭaṃ vartir vṛṣaṇā vijenyaṃ divodāsāya mahi ceti vām avaḥ ||
1.119.05a yuvor aśvinā vapuṣe yuvāyujam rathaṃ vāṇī yematur asya śardhyam |
1.119.05c ā vām patitvaṃ sakhyāya jagmuṣi yoṣāvṛṇīta jenyā yuvām patī ||
1.119.06a yuvaṃ rebham pariṣūter uruṣyatho himena gharmam paritaptam atraye |
1.119.06c yuvaṃ śayor avasam pipyathur gavi pra dīrghena vandanas tāry āyuṣā ||
1.119.07a yuvaṃ vandanam nirṛtaṃ jaranyayā rathaṃ na dasrā karaṇā sam invathaḥ |
1.119.07c kṣetrād ā vipraṃ janatho vipanyayā pra vām atra vidhate daṃsanā bhuvat ||
1.119.08a agachataṃ kṛpamāṇam parāvati pituḥ svasya tyajasā nibādhitam |
1.119.08c svarvatīr ita ūtīr yuvor aha citrā abhīke abhavann abhiṣṭayaḥ ||
1.119.09a uta syā vām madhuman makṣikāraṇaṃ made somasyauśijo huvanyati |
1.119.09c yuvaṃ dadhīco mana ā vivāsatho 'thā śiraḥ prati vām aśvyam vadat ||
1.119.10a yuvam pedave puruvāram aśvinā spṛdhām śvetam tarutāram duvasyathaḥ |
1.119.10c śaryair abhidyum pṛtanāsu duṣṭaram carakṛtyam indram iva carṣaṇīsam ||
- 1.120.01a kā rādhad dhotrāśvinā vām ko vām joṣa ubhayoḥ |
1.120.01c kathā vidhāty apracetāḥ ||
1.120.02a vidvāmsāv id durāḥ pṛched avidvān itthāparo acetāḥ |
1.120.02c nū cin nu marte akrau ||
1.120.03a tā vidvāmsā havāmahe vām tā no vidvāmsā manma vocetam adya |
1.120.03c pṛrcad dayamāno yuvākuḥ ||
1.120.04a vi pṛchāmi pākyā na devān vaṣaṭkṛtasyādbhutasya dasrā |
1.120.04c pātaṃ ca sahyaso yuvaṃ ca rabhyaso naḥ ||
1.120.05a pra yā ghoṣe bhṛgavāne na śobhe yayā vācā yajati pajriyo vām |
1.120.05c praiṣayur na vidvān ||
1.120.06a śrutam gāyatraṃ takavānasyāham cid dhi rirebhāśvinā vām |
1.120.06c ākṣī śubhas patī dan ||
1.120.07a yuvaṃ hy āstam maho ran yuvaṃ vā yan niratatamsatam |

- 1.120.07c tā no vasū sugopā syātam pātaṃ no vṛkāḍ aghāyoḥ ||
1.120.08a mā kasmai dhātam abhy amitriṇe no mākuṭrā no gṛhebhyo dhenavo guḥ |
1.120.08c stanābhujō aśiśviḥ ||
1.120.09a duhīyan mitradhitaye yuvāku rāye ca no mimītaṃ vājavatyai |
1.120.09c iṣe ca no mimītaṃ dhenumatyai ||
1.120.10a aśvinor asanaṃ rathaṃ anaśvaṃ vājinīvatoḥ |
1.120.10c tenāham bhūri cākana ||
1.120.11a ayaṃ samaha mā tanūhyāte janāṃ anu |
1.120.11c somapeyaṃ sukho rathaḥ ||
1.120.12a adha svapnasya nir vide 'bhuñjatas ca revataḥ |
1.120.12c ubhā tā basri naśyataḥ ||
- 1.121.01a kad itthā nīṃḥ pātraṃ devayatāṃ śravād giro aṅgirasāṃ turāṇyan |
1.121.01c pra yad ānaḍ viśa ā harmyasyoru kraṃsate adhvare yajatraḥ ||
1.121.02a stambhīd dha dyāṃ sa dharuṇam pruśāyad ṛbhur vājāya draviṇaṃ naro goḥ |
1.121.02c anu svajāṃ mahiśaś cakṣata vrām menām aśvasya pari mātaram goḥ ||
1.121.03a nakṣad dhavam aruṇiḥ pūrvyaṃ rāṭ turo viśām aṅgirasāṃ anu dyūn |
1.121.03c takṣad vajraṃ niyutaṃ tastambhad dyāṃ catuṣpade naryāya dvipāde ||
1.121.04a asya made svaryaṃ dā ṛtāyāpivṛtam usriyāṇām anīkam |
1.121.04c yad dha prasarge trikakuṃ nivartad apa druho mānuṣasya duro vaḥ ||
1.121.05a tubhyam payo yat pitarāv anītāṃ rādhaḥ suretas turāṇe bhuraṇyū |
1.121.05c śuci yat te rekṇa āyajanta sabardughāyāḥ paya usriyāyāḥ ||
1.121.06a adha pra jajñe taraṇir mamattu pra rocy asyā uśaso na sūraḥ |
1.121.06c indur yebhir āṣṭa sveduhavyaiḥ sruveṇa siñcañ jaraṇābhi dhāma ||
1.121.07a svidhmā yad vanadhitir apasyāt sūro adhvare pari rodhanā goḥ |
1.121.07c yad dha prabhāsi kṛtvyaṃ anu dyūn anarviśe paśviśe turāya ||
1.121.08a aṣṭā maho diva ādo hari iha dyumnāsāham abhi yodhāna utsam |
1.121.08c hariṃ yat te mandinaṃ dukṣan vṛdhe gorabhasam adribhir vātāpyam ||
1.121.09a tvam āyasam prati vartayo gor divo aśmānam upanītam ṛbhvā |
1.121.09c kutsāya yatra puruhūta vanvañ chuṣṇam anantaiḥ pariyaśi vadhaiḥ ||
1.121.10a purā yat sūras tamaso apītes tam adri vaḥ phaligaṃ hetim asya |
1.121.10c śuṣṇasya cit parihitaṃ yad ojo divas pari sugrathitaṃ tad ādaḥ ||
1.121.11a anu tvā mahī pājasī acakre dyāvākṣāmā madatām indra karman |
1.121.11c tvam vṛtram āśayānaṃ sirāsu maho vajreṇa siṣvapo varāhum ||
1.121.12a tvam indra naryo yāṃ avo nīn tiṣṭhā vātasya suyojo vahiṣṭhān |
1.121.12c yaṃ te kāvya uśanā mandinaṃ dād vṛtrahaṇam pāryaṃ tatakṣa vajram ||
1.121.13a tvam sūro harito rāmāyo nīn bharac cakram etaśo nāyam indra |
1.121.13c prāsya pāram navatiṃ nāvyaṇām api kartam avartayo 'yajyūn ||
1.121.14a tvam no asyā indra durhaṇāyāḥ pāhi vajrivo duritād abhike |
1.121.14c pra no vājān rathyo aśvabudhyān iṣe yandhi śravase sūnṛtāyai ||
1.121.15a mā sā te asmat sumatir vi dasad vājapramahaḥ sam iṣo varanta |
1.121.15c ā no bhaja maghavan goṣv aryo maṃhiṣṭhās te sadhamādaḥ syāma ||
- 1.122.01a pra vaḥ pāntaṃ raghumanyavo 'ndho yajñam rudrāya miḍhuṣe bharadhvam |
1.122.01c divo astoṣy asurasya vīrair iṣudhyeva maruto rodasyoḥ ||
1.122.02a patnīva pūrvahūtiṃ vāvṛdhadhyā uśāsānaktā purudhā vidāne |
1.122.02c starīr nātkaṃ vyutaṃ vasānā sūryasya śriyā sudṛśī hiraṇyaiḥ ||

1.122.03a mamattu naḥ pariḥmā vasarhā mamattu vāto apāḥ vṛṣaṇvān |
 1.122.03c śīṣitam indrāparvatā yuvaḥ nas tan no viśve varivasyantu devāḥ ||
 1.122.04a uta tyā me yaśasā śvetanāyai vyantā pāntauśijo huvadhyaḥ |
 1.122.04c pra vo napātam apāḥ kṛṇudhvam pra mātārā rāspinasyāyoḥ ||
 1.122.05a ā vo ruvaṇyūm auśijo huvadhyaḥ ghoṣeva śamsam arjunasya naḥse |
 1.122.05c pra vaḥ pūṣṇe dāvana āḥ achā voceya vasutātim agneḥ ||
 1.122.06a śrutam me mitrāvaruṇā havemota śrutam sadane viśvataḥ sīm |
 1.122.06c śrotu naḥ śroturātiḥ suśrotuḥ sukṣetrā sindhur adbhiḥ ||
 1.122.07a stuṣe sā vāḥ varuṇa mitra rātir gavāḥ śatā pṛkṣayāmeṣu pajre |
 1.122.07c śrutarathe priyarathe dadhānāḥ sadyaḥ puṣṭim nirundhānāso agman ||
 1.122.08a asya stuṣe mahimaghasya rādhaḥ sacā sanema nahuṣaḥ suvirāḥ |
 1.122.08c jano yaḥ pajrebhyo vājīnīvān aśvāvato rathino mahyaḥ sūriḥ ||
 1.122.09a jano yo mitrāvaruṇāv abhidhrug apo na vāḥ sunoty akṣṇayādhrug |
 1.122.09c svayaḥ sa yakṣmaḥ hṛdaye ni dhatta āpa yad im hotrābhir ṛtāvā ||
 1.122.10a sa vrādhato nahuṣo daṃsujūtaḥ śardhastaro narāḥ gūrtaśravāḥ |
 1.122.10c visṛṣṭarātir yāti bādhasṛtvā viśvāsu pṛtsu sadam ic chūraḥ ||
 1.122.11a adha gmantā nahuṣo havaḥ sūreḥ śrotā rājāno amṛtasya mandrāḥ |
 1.122.11c nabhojuvo yan niravasya rādhaḥ praśastaye mahinā rathavate ||
 1.122.12a etaḥ śardham dhāma yasya sūrer ity avocan daśatayasya naḥse |
 1.122.12c dyumnāni yeṣu vasutāti rāran viśve sanvantu prabhṛtheṣu vājam ||
 1.122.13a mandāmahe daśatayasya dhāser dvir yat pañca bibhrato yanty annā |
 1.122.13c kim iṣṭāśva iṣṭaraśmir eta iśānāśas taruṣa ṛñjate nṛn ||
 1.122.14a hiraṇyakarṇam maṇigrīvam arṇas tan no viśve varivasyantu devāḥ |
 1.122.14c aryo giraḥ sadya ā jagmuṣir osrās cākantūbhayeṣv asme ||
 1.122.15a catvāro mā maśarśārasya śiśvas trayo rājña āyavasasya jiṣṇoḥ |
 1.122.15c ratho vāḥ mitrāvaruṇā dīrghāpsāḥ syūmagabhastih sūro nādyaut ||

1.123.01a pṛthū ratho dakṣiṇāyā ayojy ainam devāso amṛtāso asthuḥ |
 1.123.01c kṛṣṇād ud asthād aryā vihāyāś cikitsantī mānuṣāya kṣayāya ||
 1.123.02a pūrvā viśvasmād bhuvanād abodhi jayantī vājam bṛhatī sanutrī |
 1.123.02c uccā vy akhyad yuvatih punarbhūr oṣā agan prathamā pūrvahūtau ||
 1.123.03a yad adya bhāgam vibhajasi nṛbhya uṣo devi martyatrā sujāte |
 1.123.03c devo no atra savitā damūnā anāgaso vocati sūryāya ||
 1.123.04a gṛham-gṛham ahanā yāty achā dive-dive adhi nāmā dadhānā |
 1.123.04c siṣāsantī dyotanā śaśvad āgād agram-agram id bhajate vasūnām ||
 1.123.05a bhagasya svasā varuṇasya jāmir uṣaḥ sūnṛte prathamā jarasva |
 1.123.05c paścā sa daghyā yo aghasya dhātā jayema tam dakṣiṇāyā rathena ||
 1.123.06a ud iratām sūnṛtā ut puramdhīr ud agnayaḥ śusucānāso asthuḥ |
 1.123.06c spārhā vasūni tamasāpagūdhāviṣ kṛṇvanty uṣaso vibhātih ||
 1.123.07a apānyad ety abhy anyad eti viṣurūpe ahanī sam carete |
 1.123.07c parikṣitos tamo anyā guhākar adyaud uṣaḥ śosucatā rathena ||
 1.123.08a sadṛśir adya sadṛśir id u śvo dīrgham sacante varuṇasya dhāma |
 1.123.08c anavadyās trimśataḥ yojanāny ekaikā kratum pari yanti sadyaḥ ||
 1.123.09a jānaty ahnaḥ prathamasya nāma śukrā kṛṣṇād ajaniṣṭa śvitici |
 1.123.09c ṛtasya yoṣā na mināti dhāmāhar-ahar niṣkṛtam ācarantī ||
 1.123.10a kanyeva tanvā śāśadānāḥ eṣi devi devam iyakṣamānam |
 1.123.10c saṃsmayamānā yuvatih purastād āvir vaksāṃsi kṛṇuṣe vibhātih ||
 1.123.11a susamkāsā mātṛmrṣṭeva yoṣāvis tanvam kṛṇuṣe dṛśe kam |

1.123.11c bhadrā tvam uṣo vitaraṃ vy ucha na tat te anyā uṣaso naśanta ||
 1.123.12a aśvāvātīr gomatīr viśvavārā yatamānā raśmibhiḥ sūryasya |
 1.123.12c parā ca yanti punar ā ca yanti bhadrā nāma vahamānā uṣāsaḥ ||
 1.123.13a ṛtasya raśmim anuyachamānā bhadrām-bhadrām kratum asmāsu dhehi |
 1.123.13c uṣo no adya suhavā vy uchāsmāsu rāyo maghavatsu ca syuḥ ||

1.124.01a uṣā uchantī samidhāne agnā udyan sūrya urviyā jyotir aśret |
 1.124.01c devo no atra savitā nv artham prāsāvid dvipat pra catuṣpad ityai ||
 1.124.02a aminatī daivyāni vratāni praminatī manuṣyā yugāni |
 1.124.02c iyuṣiṇām upamā śāśvatīnām āyatīnām prathamōṣā vy adyaut ||
 1.124.03a eṣā divo duhitā praty adarśī jyotir vasānā samanā purastāt |
 1.124.03c ṛtasya panthām anv eti sādhu prajānatīva na diśo mināti ||
 1.124.04a upo adarśī śundhyuvo na vakṣo nodhā ivāvīr akṛta priyāni |
 1.124.04c admasan na sasato bodhayantī śāśvattamāgāt punar eyuṣiṇām ||
 1.124.05a pūrve ardhe rajaso aptyasya gavām janitry akṛta pra ketum |
 1.124.05c vy u prathate vitaraṃ varīya obhā pṛnantī pitror upasthā ||
 1.124.06a eved eṣā purutamā dṛṣe kaṃ nājāmiṃ na pari vṛṇakti jāmiṃ |
 1.124.06c arepasā tanvā śāśadānā nārbhād iṣate na maho vibhātī ||
 1.124.07a abhrāteva puṃsa eti praticī gartārug iva sanaye dhanānām |
 1.124.07c jāyeva patya uśatī suvāsā uṣā hasreva ni riṇite apsaḥ ||
 1.124.08a svasā svasre jyāyasyai yonim āraig apaity asyāḥ praticakṣyeva |
 1.124.08c vyuchantī raśmibhiḥ sūryasyāñjy ankte samanagā iva vrāḥ ||
 1.124.09a āsām pūrvāsām ahasu svasṛṇām aparā pūrvām abhy eti paścāt |
 1.124.09c tāḥ pratnavan navyasīr nūnam asme revad uchantu sudinā uṣāsaḥ ||
 1.124.10a pra bodhayoṣaḥ pṛṇato maghony abudhyamānāḥ paṇayaḥ sasantu |
 1.124.10c revad ucha maghavadbhyo maghoni revat stotre sūnṛte jārayantī ||
 1.124.11a aveyam aśvaidd yuvatīḥ purastād yuñkte gavām aruṇānām anīkam |
 1.124.11c vi nūnam uchād asati pra ketur gṛhaṃ-gṛham upa tiṣṭhāte agniḥ ||
 1.124.12a ut te vayas cid vasater apaptan naraś ca ye pitubhājo vyuṣṭau |
 1.124.12c amā sate vahasi bhūri vāmam uṣo devi dāsūṣe martyāya ||
 1.124.13a astoḍhvaṃ stomyā brahmaṇā me 'vīvr̥dhadhvam uśatīr uṣāsaḥ |
 1.124.13c yuṣmākaṃ devīr avasā sanema sahasriṇaṃ ca śatināṃ ca vājam ||

1.125.01a prātā ratnam prātaritvā dadhāti taṃ cikivān pratigṛhyā ni dhatte |
 1.125.01c tena prajāṃ vardhayamāna āyū rāyas poṣeṇa sacate suviraḥ ||
 1.125.02a sugur asat suhiraṇyaḥ svasvo bṛhad asmaī vāya indro dadhāti |
 1.125.02c yas tvāyantam vasunā prātaritvo mukṣijayeva padim utsināti ||
 1.125.03a āyam adya sukṛtam prātar ichann iṣṭeḥ putram vasumatā rathena |
 1.125.03c aṃsoḥ sutam pāyaya matsarasya kṣayadvīram vardhaya sūnṛtābhiḥ ||
 1.125.04a upa kṣaranti sindhavo mayobhuva ijānaṃ ca yakṣyamānaṃ ca dhenavaḥ |
 1.125.04c pṛṇantaṃ ca papuriṃ ca śravasyavo ghṛtasya dhārā upa yanti viśvataḥ ||
 1.125.05a nākasya pṛṣṭhe adhi tiṣṭhati śrito yaḥ pṛṇāti sa ha deveṣu gachati |
 1.125.05c tasmā āpo ghṛtam arṣanti sindhavas tasmā iyaṃ dakṣiṇā pivate sadā ||
 1.125.06a dakṣiṇāvātām id imāni citrā dakṣiṇāvātāṃ divi sūryāsaḥ |
 1.125.06c dakṣiṇāvanto amṛtam bhajante dakṣiṇāvantaḥ pra tiranta āyuh ||
 1.125.07a mā pṛṇanto duritam ena āran mā jāriṣuḥ sūrayaḥ suvratāsaḥ |
 1.125.07c anyas teṣām paridhir astu kaś cid aprṇantaṃ abhi sam yantu śokāḥ ||

- 1.126.01a amandān stomān pra bhare maṇiṣā sindhāv adhi kṣiyato bhāvyasya |
1.126.01c yo me sahasram amimīta savān atūrto rājā śrava ichamānaḥ ||
1.126.02a śataṃ rājño nādhamānasya niṣkāñ chatam aśvān prayatān sadya ādam |
1.126.02c śataṃ kakṣivāṃ asurasya gonāṃ divi śravo 'jaram ā tatāna ||
1.126.03a upa mā śyāvāḥ svanayena dattā vadhūmanto daśa rathāso asthuḥ |
1.126.03c ṣaṣṭiḥ sahasram anu gavyam āgāt sanat kakṣivāṃ abhipitve ahnām ||
1.126.04a catvāriṃśad daśarathasya śoṇāḥ sahasrasyāgre śreṇiṃ nayanti |
1.126.04c madacyutaḥ kṛśanāvato atyān kakṣivanta ud amṛkṣanta pajrāḥ ||
1.126.05a pūrvām anu prayatim ā dade vas trīn yuktāṃ aṣṭāv aridhāyaso gāḥ |
1.126.05c subandhavo ye viśyā iva vrā anasvantaḥ śrava aiṣanta pajrāḥ ||
1.126.06a āgadhitā parigadhitā yā kaśikeva jaṅgahe |
1.126.06c dadāti mahyaṃ yādurī yāsūnām bhojyā śatā ||
1.126.07a upopa me parā mṛśa mā me dabhrāṇi manyathāḥ |
1.126.07c sarvāham asmi romaśā gandhāriṇām ivāvikā ||
- 1.127.01a agniṃ hotāram manye dāsvantaṃ vasuṃ sūnuṃ sahaso jātavedasaṃ vipraṃ na
jātavedasaṃ |
1.127.01d ya ūrdhvayā svadhvaro devo devācyā kṛpā |
1.127.01f ghṛtasya vibhrāṣṭim anu vaṣṭi śociṣājuhvānasya sarpiṣaḥ ||
1.127.02a yajiṣṭham tvā yajamānā huvema jyeṣṭham aṅgirasāṃ vipra manmabhir viprebhiḥ
śukra manmabhiḥ |
1.127.02d pariṃmānam iva dyām hotāraṃ carṣaṇīnām |
1.127.02f śociṣkeśaṃ vṛṣaṇaṃ yam imā viśaḥ prāvantu jūtaye viśaḥ ||
1.127.03a sa hi purū cid ojasā virukmatā didyāno bhavati druhaṃtaraḥ paraśur na
druhaṃtaraḥ |
1.127.03d vīḍu cid yasya samṛtau śruvad vaneva yat sthiram |
1.127.03f niḥśahamāṇo yamate nāyate dhanvāsahā nāyate ||
1.127.04a dṛḍhā cid asmā anu dur yathā vide tejiṣṭhābhir araṇibhir dāṣṭy avase 'gnaye dāṣṭy
avase |
1.127.04d pra yaḥ purūṇi gāhate takṣad vaneva śociṣā |
1.127.04f sthirā cid annā ni riṇāty ojasā ni sthirāṇi cid ojasā ||
1.127.05a tam asya pṛkṣam uparāsu dhīmahi naktam yaḥ sudarśataro divātarād aprāyuṣe
divātarāt |
1.127.05d ād asyāyur grabhaṇavad vīḍu śarma na sūnave |
1.127.05f bhaktam abhaktam avo vyanto ajarā agnayo vyanto ajarāḥ ||
1.127.06a sa hi śardho na mārutaṃ tuviṣvaṇir apnasvatīṣūrvarāsv iṣṭanir ārtanāsv iṣṭaniḥ |
1.127.06d ādad dhavyāny ādadir yajñasya ketur arhaṇā |
1.127.06f adha smāsyā harṣato hr̥ṣivato viśve juṣanta panthām
1.127.06h naraḥ śubhe na panthām ||
1.127.07a dvitā yad im kistāso abhidyo namasyanta upavocanta bhṛgavo mathnanto dāsā
bhṛgavaḥ |
1.127.07d agniḥ iśe vasūnām śucir yo dharṇir eṣām |
1.127.07f priyāṃ apidhīm̐r vaniṣiṣṭa medhira ā vaniṣiṣṭa medhiraḥ ||
1.127.08a viśvāsāṃ tvā viśāṃ patim havāmahe sarvāsāṃ samānaṃ dampatim bhujе
satyagirvāhasam bhujе |
1.127.08d atithim mānuṣāṇām pitur na yasyāsayā |

- 1.127.08f amī ca viśve amṛtāsa ā vayo havyā deveṣv ā vayaḥ ||
- 1.127.09a tvam agne sahasā sahanamaḥ śuṣmintamo jāyase devatātaye rayir na devatātaye |
- 1.127.09d śuṣmintamo hi te mado dyumnintama uta kratuḥ |
- 1.127.09f adha smā te pari caranty ajara śruṣṭivāno nājara ||
- 1.127.10a pra vo mahe sahasā sahasvata uṣarbudhe paśuṣe nāgnaye stomo babhūtv agnaye |
- 1.127.10d prati yad im haviṣmān viśvāsu kṣāsu joguve |
- 1.127.10f agre rebho na jarata ṛṣūṇām jūrṇir hota ṛṣūṇām ||
- 1.127.11a sa no nediṣṭham dadṛśāna ā bharāgne devebhiḥ sacanāḥ sucetunā maho rāyaḥ sucetunā |
- 1.127.11d mahi śaviṣṭha nas kṛdhi saṃcakṣe bhujē asyai |
- 1.127.11f mahi stotṛbhyo maghavan suvīryam mathīr ugro na śavasā ||
-
- 1.128.01a ayaṃ jāyata manuṣo dharīmaṇi hotā yajīṣṭha uśijām anu vratam agniḥ svam anu vratam |
- 1.128.01d viśvaśruṣṭiḥ sakhīyate rayir iva śravasyate |
- 1.128.01f adabdho hotā ni śadad iḍas pade parivīta iḍas pade ||
- 1.128.02a taṃ yajñasādham api vātayāmasy ṛtasya pathā namasā haviṣmatā devatātā haviṣmatā |
- 1.128.02d sa na ūrjām upābhṛty ayā kṛpā na jūryati |
- 1.128.02f yam mātariśvā manave parāvato devam bhāḥ parāvataḥ ||
- 1.128.03a evena sadyaḥ pary eti pārthivam muhurgī reto vṛṣabhaḥ kanikradad dadhad retaḥ kanikradat |
- 1.128.03d śataṃ cakṣāṇo akṣabhir devo vaneṣu turvaṇiḥ |
- 1.128.03f sado dadhāna upareṣu sānuṣv agniḥ pareṣu sānuṣu ||
- 1.128.04a sa sukratuḥ purohito dame-dame 'gnir yajñasyādhvarasya cetati kratvā yajñasya cetati |
- 1.128.04d kratvā vedhā iṣūyate viśvā jātāni paspaśe |
- 1.128.04f yato ghr̥taśrīr atithir ajāyata vahnir vedhā ajāyata ||
- 1.128.05a kratvā yad asya taviṣīṣu pṛñcate 'gnir avena marutāṃ na bhojye 'śirāya na bhojyā |
- 1.128.05d sa hi śmā dānam invati vasūnām ca majmanā |
- 1.128.05f sa nas trāsate duritād abhihrutaḥ śaṃsād aghād abhihrutaḥ ||
- 1.128.06a viśvo vihāyā aratir vasur dadhe haste dakṣiṇe taraṇir na śīsrathac chravasyayā na śīsrathat |
- 1.128.06d viśvasmā id iṣudhyate devatrā havyam ohiṣe |
- 1.128.06f viśvasmā it sukṛte vāram ṛṇvaty agnir dvārā vy ṛṇvati ||
- 1.128.07a sa mānuṣe vṛjane śaṃtamo hito 'gnir yajñeṣu jenyo na viśpatiḥ priyo yajñeṣu viśpatiḥ |
- 1.128.07d sa havyā mānuṣāṇām idā kṛtāni patyate |
- 1.128.07f sa nas trāsate varuṇasya dhūrter maho devasya dhūrteḥ ||
- 1.128.08a agniṃ hotāram idate vasudhitim priyaṃ cetiṣṭham aratiṃ ny erire havyavāham ny erire |
- 1.128.08d viśvāyūṃ viśvavedasaṃ hotāram yajataṃ kavim |
- 1.128.08f devāso raṇvam avase vasūyavo gīrbhī raṇvam vasūyavaḥ ||

- 1.129.01a yaṃ tvam̐ ratham indra medhasātaye 'pākā santam̐ iṣira praṇayasi prānavadya
nayasi |
- 1.129.01d sadyas̐ cit tam abhiṣṭaye karo vaśas̐ ca vājinam |
- 1.129.01f sāsmaḥkam anavadya tūtujāna vedhasām imām vācam̐ na vedhasām ||
- 1.129.02a sa śrudhi yaḥ smā pṛtanāsu kāsu cid dakṣāyya indra bharahūtaye nṛbhir asi
pratūrtaye nṛbhiḥ |
- 1.129.02d yaḥ śūraiḥ svaḥ sanitā yo viprair vājam̐ tarutā |
- 1.129.02f tam īśānāsa iradhanta vājinam pṛkṣam atyaṃ na vājinam ||
- 1.129.03a dasmo hi śmā vṛṣaṇam pinvasi tvacam̐ kam̐ cid yāvīr ararum̐ śūra martyam
parivṛṇakṣi martyam |
- 1.129.03d indrota tubhyaṃ tad dive tad rudrāya svayaśase |
- 1.129.03f mitrāya vocam̐ varuṇāya saprathaḥ sumṛḍikāya saprathaḥ ||
- 1.129.04a asmākam̐ va indram̐ uśmasiṣṭaye sakhāyam̐ viśvāyum̐ prāsaham̐ yujam̐ vājeṣu
prāsaham̐ yujam̐ |
- 1.129.04d asmākam̐ brahmotaye 'vā pṛtsuṣu kāsu cit |
- 1.129.04f nahi tvā śatru starate str̥ṇoṣi yaṃ viśvam̐ śatrum̐ str̥ṇoṣi yam̐ ||
- 1.129.05a ni ṣū namātimatim̐ kayasya cit tejiṣṭhābhir araṇibhir notibhir ugrābhir ugrotibhiḥ |
- 1.129.05d neṣi ṇo yathā purānenāḥ śūra manyase |
- 1.129.05f viśvāni pūrora apa parṣi vahnir āsā vahnir no acha ||
- 1.129.06a pra tad voceyam̐ bhavyāyendave havyo na ya iṣavān manma rejati rakṣohā
manma rejati |
- 1.129.06d svayaṃ so asmad ā nido vadhair ajeta durmatim |
- 1.129.06f ava sraved aghaśam̐so 'vataram̐ ava kṣudram̐ iva sravet ||
- 1.129.07a vanema tad dhotrayā citantyā vanema rayim̐ rayivaḥ suvīryam̐ raṇvam̐ santam̐
suvīryam̐ |
- 1.129.07d durmanmānam̐ sumantubhir em iṣā pṛcīmahī |
- 1.129.07f ā satyābhir indram̐ dyumnahūtibhir yajatraṃ dyumnahūtibhiḥ ||
- 1.129.08a pra-prā vo asme svayaśobhir ūtī parivarga indro durmatīnām darīman durmatīnām
|
- 1.129.08d svayaṃ sā riṣayadhyai yā na upeṣe atraiḥ |
- 1.129.08f hatem asan na vakṣati kṣiptā jūrṇir na vakṣati ||
- 1.129.09a tvam̐ na indra rāyā pariṇasā yāhi pathāṃ anehasā puro yāhy arakṣasā |
- 1.129.09d sacasva naḥ parāka ā sacasvāstamīka ā |
- 1.129.09f āhi no dūrād ārād abhiṣṭibhiḥ sadā pāhy abhiṣṭibhiḥ ||
- 1.129.10a tvam̐ na indra rāyā tarūṣasograṃ cit tvā mahimā sakṣad avase mahe mitram̐
nāvase |
- 1.129.10d ojiṣṭha trātar avitā ratham̐ kam̐ cid amartya |
- 1.129.10f anyam̐ asmad ririṣeḥ kam̐ cid adrivo ririkṣantaṃ cid adrivaḥ ||
- 1.129.11a pāhi na indra suṣṭuta sridho 'vayātā sadam̐ id durmatīnām devaḥ san durmatīnām
|
- 1.129.11d hantā pāpasya rakṣasas trātā viprasya māvataḥ |
- 1.129.11f adhā hi tvā janitā jījanad vaso rakṣohaṇam̐ tvā jījanad vaso ||
- 1.130.01a endra yāhy upa naḥ parāvato nāyam̐ achā vidathānīva satpatir astam̐ rājeva
satpatiḥ |
- 1.130.01d havāmahe tvā vayam̐ prayasvantaḥ sute sacā |
- 1.130.01f putrāso na pitaram̐ vājasātaye mam̐hiṣṭham̐ vājasātaye ||

- 1.130.02a pibā somam indra suvānam adribhiḥ kośena siktam avataṃ na vaṃsagaḥ tātṛṣāṇo na vaṃsagaḥ |
- 1.130.02d madāya haryatāya te tuviṣṭamāya dhāyase |
- 1.130.02f ā tvā yachantu harito na sūryam ahā viśveva sūryam ||
- 1.130.03a avindad divo nihitaṃ guhā nidhiṃ ver na garbham parivītam aśmany anante antar aśmani |
- 1.130.03d vrajaṃ vajrī gavām iva siṣāsann aṅgirastamaḥ |
- 1.130.03f apāvṛṇod iṣa indraḥ parivṛtā dvāra iṣaḥ parivṛtāḥ ||
- 1.130.04a dādṛhāṇo vajram indro gabhastyoḥ kṣadmeva tigmam asanāya saṃ śyad ahihatyāya saṃ śyat |
- 1.130.04d saṃvivyāna ojasā śavobhir indra majmanā |
- 1.130.04f taṣṭeva vṛkṣaṃ vanino ni vṛścasi paraśveva ni vṛścasi ||
- 1.130.05a tvam vṛthā nadya indra sartave 'chā samudram asṛjo rathāṃ iva vājayato rathāṃ iva |
- 1.130.05d ita ūtir ayuñjata samānam artham akṣitam |
- 1.130.05f dhenūr iva manave viśvadohaso janāya viśvadohasaḥ ||
- 1.130.06a imāṃ te vācam vasūyanta āyavo rathaṃ na dhīraḥ svapā atakṣiṣuḥ sumnāya tvām atakṣiṣuḥ |
- 1.130.06d śumbhanto jenyam yathā vājeṣu vipra vājinam |
- 1.130.06f atyam iva śavase sātaye dhanā viśvā dhanāni sātaye ||
- 1.130.07a bhinat puro navatim indra pūrave divodāsāya mahi dāsūṣe nṛto vajreṇa dāsūṣe nṛto |
- 1.130.07d atithigvāya śambaram girer ugro avābharat |
- 1.130.07f maho dhanāni dayamāna ojasā viśvā dhanāny ojasā ||
- 1.130.08a indraḥ samatsu yajamānam āryam prāvad viśveṣu śatamūtir ājiṣu svarmīdheṣv ājiṣu |
- 1.130.08d manave śāsad avratān tvacam kṛṣṇām arandhayat |
- 1.130.08f dakṣan na viśvam tatṛṣāṇam oṣati ny arśasānam oṣati ||
- 1.130.09a sūraś cakram pra vṛhaj jāta ojasā prapitve vācam aruṇo muṣāyati 'śāna ā muṣāyati |
- 1.130.09d uśanā yat parāvato 'jagann ūtaye kave |
- 1.130.09f sumnāni viśvā manuṣeva turvaṇir ahā viśveva turvaṇiḥ ||
- 1.130.10a sa no navyebhir vṛṣakarmann ukthaiḥ purāṃ dartaḥ pāyubhiḥ pāhi śagmaiḥ | divodāsebhir indra stavāno vāvṛdhīthā ahobhir iva dyauḥ ||
- 1.131.01a indrāya hi dyaur asuro anamnatendrāya mahi pṛthivī varīmabhir dyumnasātā varīmabhiḥ |
- 1.131.01d indraṃ viśve sajoṣaso devāso dadhire puraḥ |
- 1.131.01f indrāya viśvā savanāni mānuṣā rātāni santu mānuṣā ||
- 1.131.02a viśveṣu hi tvā savaneṣu tuñjate samānam ekaṃ vṛsamānyavaḥ pṛthak svah saniṣyavaḥ pṛthak |
- 1.131.02d taṃ tvā nāvam na parṣaṇiṃ śūṣasya dhuri dhīmahī |
- 1.131.02f indraṃ na yajñaiś citayanta āyava stomebhir indram āyavaḥ ||
- 1.131.03a vi tvā tatasre mithunā avasyavo vrajasya sātā gavyasya niḥsrjaḥ sakṣanta indra niḥsrjaḥ |
- 1.131.03d yad gavyantā dvā janā svar yantā samūhasi |
- 1.131.03f āviṣ karikrad vṛṣaṇaṃ sacābhuvam vajram indra sacābhuvam ||
- 1.131.04a viduṣ te asya vīryasya pūravaḥ puro yad indra śāradīr avātiraḥ sāsahāno avātiraḥ |
- 1.131.04d śāsas tam indra martyam ayajyum śavasas pate |

- 1.131.04f mahim amuṣṇāḥ pṛthivīm imā apo mandasāna imā apaḥ ||
- 1.131.05a ād it te asya vīryasya cakṛkiran madeṣu vṛṣann uśijo yad āvitha sakhīyato yad āvitha |
- 1.131.05d cakartha kāram ebhyaḥ pṛtanāsu pravantave |
- 1.131.05f te anyām-anyām nadyam saniṣṇata śravasyantaḥ saniṣṇata ||
- 1.131.06a uto no asyā uṣaso juṣeta hy arkasya bodhi haviṣo havīmabhiḥ svarṣātā havīmabhiḥ |
- 1.131.06d yad indra hantave mṛdho vṛṣā vajriṅ ciketasi |
- 1.131.06f ā me asya vedhaso navīyaso manma śrudhi navīyasaḥ ||
- 1.131.07a tvam tam indra vāvṛdhāno asmayur amitrayantaḥ tuvijāta martyam vajreṇa śūra martyam |
- 1.131.07d jahi yo no aghāyati śṛṇuṣva suśravastamaḥ |
- 1.131.07f riṣṭam na yāmann apa bhūtu durmatir viśvāpa bhūtu durmatih ||
-
- 1.132.01a tvayā vayam maghavan pūrvye dhana indratvotāḥ sāsahyāma pṛtanyato vanuyāma vanuṣyataḥ |
- 1.132.01d nediṣṭhe asminn ahany adhi vocā nu sunvate |
- 1.132.01f asmin yajñe vi cayemā bhare kṛtam vājayanto bhare kṛtam ||
- 1.132.02a svarjeṣe bhara āprasya vakmany uṣarbudhaḥ svasminn añjasi krāṇasya svasminn añjasi |
- 1.132.02d ahann indro yathā vide śīrṣṇā-śīrṣṇopavācyāḥ |
- 1.132.02f asmatrā te sadhryak santu rātayo bhadrā bhadrasya rātayaḥ ||
- 1.132.03a tat tu prayāḥ pratnathā te śusūkvanam yasmin yajñe vāram akṛṇvata kṣayam ṛtasya vār asi kṣayam |
- 1.132.03d vi tad vocer adha dvitāntaḥ paśyanti raśmibhiḥ |
- 1.132.03f sa ghā vide anv indro gaveṣaṇo bandhukṣidbhyo gaveṣaṇaḥ ||
- 1.132.04a nū itthā te pūrvathā ca pravācyam yad aṅgirobhyo 'vṛṇor apa vrajam indra śikṣann apa vrajam |
- 1.132.04d aibhyaḥ samānyā diśāsmabhyam jeṣi yotsi ca |
- 1.132.04f sunvadbhyo randhayā kam cid avrataḥ hṛṇāyantaḥ cid avratam ||
- 1.132.05a sam yaj janān kratubhiḥ śūra ikṣayad dhane hite taruṣanta śravasyavaḥ pra yakṣanta śravasyavaḥ |
- 1.132.05d tasmā āyuḥ prajāvad id bādhe arcanty ojasā |
- 1.132.05f indra okyam didhiṣanta dhītayo devāṃ achā na dhītayaḥ ||
- 1.132.06a yuвам tam indrāparvatā puroyudhā yo naḥ pṛtanyād apa tam-tam id dhatam vajreṇa tam-tam id dhatam |
- 1.132.06d dūre cattāya chantsad gahanam yad inakṣat |
- 1.132.06f asmākam śatrūn pari śūra viśvato darmā darṣiṣṭa viśvataḥ ||
-
- 1.133.01a ubhe punāmi rodasī ṛtena druho dahāmi sam mahīr anindrāḥ |
- 1.133.01c abhivlagya yatra hatā amitrā vailasthānam pari tṛdhā aśeran ||
- 1.133.02a abhivlagyā cid adrivaḥ śīrṣā yātumatīnām |
- 1.133.02c chindhi vaṭūriṇā padā mahāvaṭūriṇā padā ||
- 1.133.03a avāsām maghavañ jahi śardho yātumatīnām |
- 1.133.03c vailasthānake armake mahāvailasthe armake ||
- 1.133.04a yāsām tisraḥ pañcāśato 'bhivlaṅgair apāvapaḥ |
- 1.133.04c tat su te manāyati takat su te manāyati ||

1.133.05a piśaṅgabhrṣṭim ambhṛṇam piśācim indra sam mṛṇa |
 1.133.05c sarvaṃ rakṣo ni barhaya ||
 1.133.06a avar maha indra dādṛhi śrudhī naḥ śuśoca hi dyauḥ kṣā na bhīṣāṃ adriṃ ghrṇān
 na bhīṣāṃ adriṃ |
 1.133.06d śuśmintamo hi śuśmibhir vadhair ugrebhir iyase |
 1.133.06f apūruṣaghno apratīta śūra satvabhis trisaptaiḥ śūra satvabhiḥ ||
 1.133.07a vanoti hi sunvan kṣayam paṛiṇasaḥ sunvāno hi śmā yajaty ava dviṣo devānām ava
 dviṣaḥ |
 1.133.07d sunvāna it siśāsati sahasrā vājy avṛtaḥ |
 1.133.07f sunvānāyendro dadāty ābhuvam rayiṃ dadāty ābhuvam ||

1.134.01a ā tvā juvo rārahāṇā abhi prayo vāyo vahantv iha pūrvapītaye somasya
 pūrvapītaye |
 1.134.01d ūrdhvā te anu sūnṛtā manas tiṣṭhatu jānatī |
 1.134.01f niyutvatā rathenā yāhi dāvane vāyo makhasya dāvane ||
 1.134.02a mandantu tvā mandino vāyav indavo 'smat krāṇāsaḥ sukṛtā abhidyo gōbhiḥ
 krāṇā abhidyo |
 1.134.02d yad dha krāṇā iradhyai dakṣam sacanta ūtayaḥ |
 1.134.02f sadhrīcinā niyuto dāvane dhiya upa bruvata iṃ dhiyaḥ ||
 1.134.03a vāyur yuṅkte rohitā vāyur aruṇā vāyū rathe ajirā dhuri voḍhave vahiṣṭhā dhuri
 voḍhave |
 1.134.03d pra bodhayā puramdhiṃ jāra ā sasatīm iva |
 1.134.03f pra cakṣaya rodasī vāsayoṣasaḥ śravase vāsayoṣasaḥ ||
 1.134.04a tubhyam uśasaḥ śucayaḥ parāvati bhadrā vastrā tanvate daṃsu raśmiṣu citrā
 navyeṣu raśmiṣu |
 1.134.04d tubhyam dhenuḥ sabardughā viśvā vasūni dohate |
 1.134.04f ajanayo maruto vakṣaṇābhyo diva ā vakṣaṇābhyaḥ ||
 1.134.05a tubhyam śukrāsaḥ śucayas turaṇyavo madeṣūgrā iṣaṇanta bhurvaṇy apām iṣanta
 bhurvaṇi |
 1.134.05d tvām tsārī dasamāno bhagam iṭṭe takvaviye |
 1.134.05f tvaṃ viśvasmād bhuvanāt pāsi dharmaṇāsurāt pāsi dharmaṇā ||
 1.134.06a tvaṃ no vāyav eṣām apūrvyaḥ somānām prathamaḥ pītim arhasi sutānām pītim
 arhasi |
 1.134.06d uto vihutmatinām viśam vavarjuṣiṇām |
 1.134.06f viśvā it te dhenavo duhra āśiram ghr̥taṃ duhrata āśiram ||

1.135.01a stīrṇam barhir upa no yāhi vītaye sahasreṇa niyutā niyutvate śatinibhir niyutvate |
 1.135.01d tubhyam hi pūrvapītaye devā devāya yemire |
 1.135.01f pra te sutāso madhumanto asthiraṇ madāya kratve asthiraṇ ||
 1.135.02a tubhyāyam somaḥ paripūto adribhi spārḥā vasānaḥ pari kośam arṣati śukrā
 vasāno arṣati |
 1.135.02d tavāyam bhāga āyūṣu somo deveṣu hūyate |
 1.135.02f vaha vāyo niyuto yāhy asmayur juṣāṇo yāhy asmayuḥ ||
 1.135.03a ā no niyudbhiḥ śatinibhir adhvaraṃ sahasriṇibhir upa yāhi vītaye vāyo havyaṇi
 vītaye |
 1.135.03d tavāyam bhāga ṛtviyaḥ saraśmiḥ sūrye sacā |
 1.135.03f adhvaryubhir bharamāṇā ayamsata vāyo śukrā ayamsata ||

- 1.135.04a ā vāṃ ratho niyutvān vakṣad avase 'bhi prayāṃsi sudhitāni vītaye vāyo havyaṇi vītaye |
- 1.135.04d pibatam madhvo andhasaḥ pūrvapeyaṃ hi vāṃ hitam |
- 1.135.04f vāyav ā candreṇa rādhasā gatam indraś ca rādhasā gatam ||
- 1.135.05a ā vāṃ dhiyo vavṛtyur adhvarāṃ upemam indum marmṛjanta vājinam āsum atyaṃ na vājinam |
- 1.135.05d teṣāṃ pibatam asmayū ā no gantam ihotyā |
- 1.135.05f indravāyū sutānām adribhir yuvam madāya vājadā yuvam ||
- 1.135.06a ime vāṃ somā apsv ā sutā ihādhvaryubhir bharamāṇā ayaṃsata vāyo śukrā ayaṃsata |
- 1.135.06d ete vāṃ abhy asṛkṣata tiraḥ pavitram āśavaḥ |
- 1.135.06f yuvāyavo 'ti romāṇy avyayā somāso aty avyayā ||
- 1.135.07a ati vāyo sasato yāhi śāsvaro yatra grāvā vadati tatra gachatam gṛham indraś ca gachatam |
- 1.135.07d vi sūnṛtā dadṛṣe riyate gṛtam ā pūrṇayā niyutā yātho adhvaram
- 1.135.07f indraś ca yātho adhvaram ||
- 1.135.08a atrāha tad vahethe madhva āhutiṃ yam aśvattham upatiṣṭhanta jāyavo 'sme te santu jāyavaḥ |
- 1.135.08d sākam gāvaḥ suvate pacyate yavo na te vāya upa dasyanti dhenavo
- 1.135.08f nāpa dasyanti dhenavaḥ ||
- 1.135.09a ime ye te su vāyo bāhvojaso 'ntar nadī te patayanty ukṣaṇo mahi vrādhanta ukṣaṇaḥ |
- 1.135.09d dhanvañ cid ye anāśavo jīrās cid agiraukasah |
- 1.135.09f sūryasyeva raśmayo durniyantavo hastayor durniyantavaḥ ||
- 1.136.01a pra su jyeṣṭham nicirābhyām bṛhan namo havyam matim bharaṭā mṛdayadbhyām svādiṣṭham mṛdayadbhyām |
- 1.136.01d tā samrājā ghṛtāsutī yajñe-yajña upastutā |
- 1.136.01f athainoḥ kṣatram na kutaś canādhṛṣe devatvaṃ nū cid ādhṛṣe ||
- 1.136.02a adarśi gātur urave variyasī panthā ṛtasya sam ayaṃsta raśmibhiś cakṣur bhagasya raśmibhiḥ |
- 1.136.02d dyukṣam mitrasya sādhanam ayaṃno varuṇasya ca |
- 1.136.02f athā dadhāte bṛhad ukthyaṃ vāya upastutyam bṛhad vayaḥ ||
- 1.136.03a jyotiṣmatīm aditiṃ dhārayatksitiṃ svarvatīm ā sacete dive-dive jāgrvāṃsā dive-dive |
- 1.136.03d jyotiṣmat kṣatram āsāte ādityā dānunas patī |
- 1.136.03f mitras taylor varuṇo yātayajjano 'ryamā yātayajjanaḥ ||
- 1.136.04a ayam mitrāya varuṇāya śaṃtamaḥ somo bhūtv avapāneṣv ābhago devo deveṣv ābhagaḥ |
- 1.136.04d tam devāso juṣerata viśve adya sajoṣasaḥ |
- 1.136.04f tathā rājānā karatho yad īmaha ṛtāvānā yad īmahe ||
- 1.136.05a yo mitrāya varuṇāyāvidhaj jano 'narvāṇam tam pari pāto aṃhaso dāśvāṃsam martam aṃhasaḥ |
- 1.136.05d tam ayaṃmābhi rakṣaty ṛjūyantam anu vratam |
- 1.136.05f ukthair ya enoḥ paribhūṣati vratam stomair ābhūṣati vratam ||
- 1.136.06a namo dive bṛhate rodasibhyām mitrāya vocaṃ varuṇāya mīdhuṣe sumṛḍikāya mīdhuṣe |
- 1.136.06d indram agnim upa stuhi dyukṣam ayaṃnam bhagam |

- 1.136.06f jyog jīvantaḥ prajayā sacemahi somasyotī sacemahi ||
1.136.07a ūtī devānāṃ vayam indravanto maṃsīmahi svayaśaso marudbhiḥ |
1.136.07c agnir mitro varuṇaḥ śarma yaṃsan tad aśyāma maghavāno vayam ca |
- 1.137.01a suṣumā yātam adribhir gośrītā matsarā ime somāso matsarā ime |
1.137.01d ā rājānā diviṣṛṣāsmatrā gantam upa naḥ |
1.137.01f ime vām mitrāvaruṇā gavāśiraḥ somāḥ śukrā gavāśiraḥ ||
1.137.02a ima ā yātam indavaḥ somāso dadhyāśiraḥ sutāso dadhyāśiraḥ |
1.137.02d uta vām uśaso budhi sākam sūryasya raśmibhiḥ |
1.137.02f suto mitrāya varuṇāya pītaye cārur ṛtāya pītaye ||
1.137.03a tāṃ vāṃ dhenuṃ na vāsarīm aṃṣuṃ duhanty adribhiḥ somaṃ duhanty adribhiḥ |
1.137.03d asmatrā gantam upa no 'rvāñcā somapītaye |
1.137.03f ayaṃ vām mitrāvaruṇā nṛbhiḥ sutaḥ soma ā pītaye sutaḥ ||
- 1.138.01a pra-pra pūṣṇas tuvijātasya śasyate mahitvam asya tavaso na tandate stotram
asya na tandate |
1.138.01d arcāmi sumnayann aham antyūtim mayobhuvam |
1.138.01f viśvasya yo mana āyuyuve makho deva āyuyuve makhaḥ ||
1.138.02a pra hi tvā pūṣann ajiraṃ na yāmani stomebhiḥ kṛṇva ṛṇavo yathā mṛdha uṣṭro na
pīparo mṛdhaḥ |
1.138.02d huve yat tvā mayobhuvam devam sakhyāya martyaḥ |
1.138.02f asmākam āṅgūṣān dyumninas kṛdhi vājeṣu dyumninas kṛdhi ||
1.138.03a yasya te pūṣan sakhye vipanyavaḥ kratvā cit santo 'vasā bubhujrira iti kratvā
bubhujrire |
1.138.03d tām anu tvā navīyasīm niyutaṃ rāya īmahe |
1.138.03f aheḍamāna uruśaṃsa sarī bhava vāje-vāje sarī bhava ||
1.138.04a asyā ū ṣu ṇa upa sātaye bhuvo 'heḍamāno rarivāñ ajāśva śravasyatām ajāśva |
1.138.04d o ṣu tvā vavṛtimahi stomebhir dasma sādhubhiḥ |
1.138.04f nahi tvā pūṣann atimanya āghṛṇe na te sakhyam apahnuve ||
- 1.139.01a astu śrauṣaṭ puro agnīm dhiyā dadha ā nu tac chardho divyam vṛṇīmaha
indravāyū vṛṇīmahe |
1.139.01d yad dha krāṇā vivasvati nābhā saṃdāyi navyasī |
1.139.01f adha pra sū na upa yantu dhītayo devāñ achā na dhītayaḥ ||
1.139.02a yad dha tyan mitrāvaruṇāv ṛtād adhy ādadāthe anṛtaṃ svena manyunā dakṣasya
svena manyunā |
1.139.02d yuvor itthādhi sadmasv apaśyāma hiraṇyayam ||
1.139.02f dhībhiś cana manasā svebhir akṣabhiḥ somasya svebhir akṣabhiḥ ||
1.139.03a yuvāṃ stomebhir devayanto aśvināśrāvayanta iva ślokaṃ āyavo yuvāṃ havyaḥ
āvayaḥ |
1.139.03d yuvor viśvā adhi śriyaḥ pṛkṣaś ca viśvavedasā |
1.139.03f pruśāyante vām pavayo hiraṇyaye rathe dasrā hiraṇyaye ||
1.139.04a aceti dasrā vy u nākam ṛṇvatho yuñjate vāṃ rathayujo diviṣṭiṣv adhvasmāno
diviṣṭiṣu |
1.139.04d adhi vāṃ sthāma vandhure rathe dasrā hiraṇyaye |
1.139.04f patheva yantāv anuśāsātā rajo 'ñjasā śāsātā rajaḥ ||
1.139.05a śacībhir naḥ śacīvasū divā naktam daśasyatam |

- 1.139.05c mā vāṃ rātir upa dasat kadā canāsmad rātiḥ kadā cana ||
- 1.139.06a vṛṣann indra vṛṣapāṇāsa indava ime sutā adriṣutāsa udbhidas tubhyaṃ sutāsa udbhidaḥ |
- 1.139.06d te tvā mandantu dāvane mahe citrāya rādhasē |
- 1.139.06f gīrbhir girvāha stavamāna ā gahi sumṛḍiko na ā gahi ||
- 1.139.07a o śu ṇo agne śṛṇuhi tvam iḍito devebhyo bravasi yajñiyebhyo rājabhyo yajñiyebhyaḥ |
- 1.139.07d yad dha tyām aṅgirobhyo dhenum devā adattana |
- 1.139.07f vi tām duhre aryamā kartarī sacāṃ eṣa tām veda me sacā ||
- 1.139.08a mo śu vo asmad abhi tāni paumṣyā sanā bhūvan dyumnāni mota jāriṣur asmat purota jāriṣuḥ |
- 1.139.08d yad vaś citraṃ yuge-yuge navyaṃ ghoṣād amartyam |
- 1.139.08f asmāsu tan maruto yac ca duṣṭaraṃ didhṛtā yac ca duṣṭaram ||
- 1.139.09a dadhyañ ha me januṣam pūrvo aṅgirāḥ priyamedhaḥ kaṇvo atrir manur vidus te me pūrve manur viduḥ |
- 1.139.09d teṣāṃ deveṣv āyatir asmākam teṣu nābhayaḥ |
- 1.139.09f teṣāṃ padena mahy ā name girendrāgni ā name girā ||
- 1.139.10a hotā yakṣad vanino vanta vāryam bṛhaspatir yajati vena ukṣabhiḥ puruvārebhir ukṣabhiḥ |
- 1.139.10d jagṛbhmā dūraādīṣaṃ ślokaṃ adrer adha tmanā |
- 1.139.10f adhārayad ararindāni sukratuḥ purū sadmāni sukratuḥ ||
- 1.139.11a ye devāso divy ekādaśa stha pṛthivyām adhy ekādaśa stha |
- 1.139.11c apsuḥṣito mahinaikādaśa stha te devāso yajñam imaṃ juṣadhvam ||
- 1.140.01a vediṣade priyadhāmāya sudyute dhāsim iva pra bharā yonim agnaye |
- 1.140.01c vastreṇeva vāsayā manmanā śucim jyotīratham śukravarṇaṃ tamohanam ||
- 1.140.02a abhi dvijanmā trivṛd annam ṛjyate samvatsare vāvṛdhe jagdham ī punaḥ |
- 1.140.02c anyasyāsā jihvayā jenyo vṛṣā ny anyena vanino mṛṣṭa vāraṇaḥ ||
- 1.140.03a kṛṣṇaprutau vevije asya sakṣitā ubhā tarete abhi mātārā śīsum |
- 1.140.03c prācājihvam dhvasayantaṃ tṛṣucyutam ā sācyam kupayam vardhanam pituḥ ||
- 1.140.04a mumukṣvo manave mānavasyate raghudruvaḥ kṛṣṇasitāsa ū juvaḥ |
- 1.140.04c asamanā ajirāso raghuṣyado vātajūtā upa yujyanta āśavaḥ ||
- 1.140.05a ād asya te dhvasayanto vṛtherate kṛṣṇam abhvam mahi varpaḥ karikrataḥ |
- 1.140.05c yat sim mahim avanim prābhi marmṛṣad abhiśvasan stanayann eti nānadat ||
- 1.140.06a bhūṣan na yo 'dhi babhrūṣu namnate vṛṣeva patnīr abhy eti roruvat |
- 1.140.06c ojāyamānas tanvaś ca śumbhate bhīmo na śṛṅgā davidhāva durgṛbhiḥ ||
- 1.140.07a sa samstiro viṣṭiraḥ saṃ gṛbhāyati jānann eva jānatīr nitya ā śaye |
- 1.140.07c punar vardhante api yanti devyam anyad varpaḥ pitroḥ kṛṇvate sacā ||
- 1.140.08a tam agruvaḥ keśinīḥ saṃ hi rebhira ūrdhvās tasthur mamruṣīḥ prāyave punaḥ |
- 1.140.08c tāsāṃ jarām pramuñcann eti nānadat asum paraṃ janayañ jīvam aśṛtam ||
- 1.140.09a adhīvāsam pari mātū rihann aha tuvigrebhiḥ satvabhir yāti vi jrayaḥ |
- 1.140.09c vayo dadhat padvate rerihat sadānu śyenī sacate vartanīr aha ||
- 1.140.10a asmākam agne maghavatsu didihy adha śvasivān vṛṣabho damūnāḥ |
- 1.140.10c avāsyā śīsumatīr adīder varmeva yutsu parijarbhurāṇaḥ ||
- 1.140.11a idam agne sudhitam durdhitād adhi priyād u cin manmanaḥ preyo astu te |
- 1.140.11c yat te śukraṃ tanvo rocate śuci tenāsmabhyam vanase ratnam ā tvam ||
- 1.140.12a rathāya nāvam uta no gṛhāya nityāritrām padvatim rāsy agne |
- 1.140.12c asmākam vīrām uta no maghono janāmś ca yā pārayāc charma yā ca ||

1.140.13a abhī no agna uktham ij juguryā dyāvākṣāmā sindhavaś ca svagūrtāḥ |
1.140.13c gavyaṃ yavyaṃ yanto dīrghāheṣaṃ varam aruṇyo varanta ||

1.141.01a baḍ itthā tad vapuṣe dhāyi darśataṃ devasya bhargaḥ sahaso yato jani |
1.141.01c yad im upa hvarate sādgate matir ṛtasya dhenā anayanta sasrutaḥ ||
1.141.02a pṛkṣo vapuḥ pitumān nitya ā śāye dvitīyam ā saptaśivāsu mātṛṣu |
1.141.02c tṛtīyam asya vṛṣabhasya dohase daśapramatiṃ janayanta yoṣaṇaḥ ||
1.141.03a nir yad im budhnān mahiṣasya varpasa īśānāsaḥ śavasā kranta sūrayaḥ |
1.141.03c yad im anu pradivo madhva ādhave guhā santam mātariśvā mathāyati ||
1.141.04a pra yat pituḥ paramān nīyate pary ā pṛkṣudho vīrudho daṃsu rohati |
1.141.04c ubhā yad asya januṣaṃ yad invata ād id yaviṣṭho abhavad ghrṇā śuciḥ ||
1.141.05a ād in mātṛ āviśad yāsv ā śucir ahiṃsyamāna urviyā vi vāvṛdhe |
1.141.05c anu yat pūrvā aruhat sanājuvo ni navyasiṣv avarāsu dhāvate ||
1.141.06a ād id dhotāraṃ vṛṇate diviṣṭiṣu bhagam iva paṇḍānāsa ṛṇjate |
1.141.06c devān yat kratvā majmanā puruṣtuto martam śaṃsam viśvadhā veti dhāyase ||
1.141.07a vi yad asthād yajato vātacodito hvāro na vakvā jaraṇā anākṛtaḥ |
1.141.07c tasya patman dakṣuṣaḥ kṛṣṇajamhasaḥ śucijanmano raja ā vyadhvanaḥ ||
1.141.08a ratho na yātaḥ śikvabhiḥ kṛto dyām aṅgebhir aruṣebhir iyate |
1.141.08c ād asya te kṛṣṇāso dakṣi sūrayaḥ sūrasyeva tveṣathād iṣate vayaḥ ||
1.141.09a tvayā hy agne varuṇo dhṛtavrato mitraḥ śāśadre aryamā sudānavaḥ |
1.141.09c yat sim anu kratunā viśvathā vibhur arān na nemiḥ paribhūr ajāyathāḥ ||
1.141.10a tvam agne śāśamānāya sunvate ratnaṃ yaviṣṭha devatātīm invasi |
1.141.10c taṃ tvā nu navyaṃ sahaso yuvan vayam bhagaṃ na kāre mahiratna dhīmahi ||
1.141.11a asme rayiṃ na svarthaṃ damūnasam bhagaṃ dakṣaṃ na paṇḍāsi dharṇasim |
1.141.11c raśmīṃr iva yo yamati janmanī ubhe devānām śaṃsam ṛta ā ca sukratuḥ ||
1.141.12a uta naḥ sudyotmā jirāśvo hotā mandraḥ śṛṇavac candrarathaḥ |
1.141.12c sa no neṣan neṣatamair amūro 'gnir vāmaṃ suvitam vasyo acha ||
1.141.13a astāvya agniḥ śimivadbhir arkaiḥ sāmṛājyāya prataram dadhānaḥ |
1.141.13c amī ca ye maghavāno vayaṃ ca mihaṃ na sūro ati niṣ ṭatanyuḥ ||

1.142.01a samiddho agna ā vaha devāṃ adya yatasruce |
1.142.01c tantuṃ tanuṣva pūrvyaṃ sutasomāya dāśuṣe ||
1.142.02a ghṛtavantam upa māsi madhumantaṃ tanūnapāt |
1.142.02c yajñam viprasya māvataḥ śāśamānasya dāśuṣaḥ ||
1.142.03a śuciḥ pāvako adbhuto madhvā yajñam mimikṣati |
1.142.03c narāśaṃsaḥ trir ā divo devo deveṣu yajñīyaḥ ||
1.142.04a īdito agna ā vahendraṃ citram iha priyam |
1.142.04c iyaṃ hi tvā matir mamāchā sujihva vacyate ||
1.142.05a strṇānāso yatasruco barhir yajñe svadhvare |
1.142.05c vṛñje devavyacastamam indrāya śarma saprathaḥ ||
1.142.06a vi śrayantām ṛtāvṛdhaḥ prayai devebhyo mahiḥ |
1.142.06c pāvakāsaḥ purusprho dvāro devīr asaścataḥ ||
1.142.07a ā bhandamāne upāke naktoṣāsā supeśāsā |
1.142.07c yahvī ṛtasya mātaraḥ sidatām barhir ā sumat ||
1.142.08a mandrajihvā jugurvaṇī hotārā daivyā kavī |
1.142.08c yajñam no yakṣatām imaṃ sidhram adya diviṣṭam ||
1.142.09a śucir deveṣv arpitā hotrā marutsu bhāratī |

1.142.09c idā sarasvatī mahī barhiḥ sīdantu yajñiyāḥ ||
 1.142.10a tan nas turīpam adbhutam puru vāram puru tmanā |
 1.142.10c tvaṣṭā poṣāya vi ṣyatu rāye nābhā no asmayuḥ ||
 1.142.11a avasṛjann upa tmanā devān yakṣi vanaspate |
 1.142.11c agnir havyā suṣūdati devo deveṣu medhiraḥ ||
 1.142.12a pūṣaṇvate marutvate viśvadevāya vāyave |
 1.142.12c svāhā gāyatravepase havyam indrāya kartana ||
 1.142.13a svāhākṛtāny ā gahy upa havyāni vītaye |
 1.142.13c indrā gahi śrudhī havam tvām havante adhvare ||

1.143.01a pra tavyasīm navyasīm dhītim agnaye vāco matiḥ sahasaḥ sūnave bhare |
 1.143.01c apām napād yo vasubhiḥ saha priyo hotā pṛthivyām ny asīdad ṛtviyaḥ ||
 1.143.02a sa jāyamānaḥ parame vyomany āvir agnir abhavan mātariśvane |
 1.143.02c asya kratvā samidhānasya majmanā pra dyāvā śociḥ pṛthivī arocayat ||
 1.143.03a asya tveṣā ajarā asya bhānavaḥ susamdr̥ṣaḥ supratīkasya sudyutaḥ |
 1.143.03c bhātvakṣaso aty aktur na sindhavo 'gne rejante asasanto ajarāḥ ||
 1.143.04a yam erire bhṛgavo viśvavedasaḥ nābhā pṛthivyā bhuvanasya majmanā |
 1.143.04c agniḥ tam gīrbhir hinuhi sva ā dame ya eko vasvo varuṇo na rājati ||
 1.143.05a na yo varāya marutām iva svanaḥ seneva sṛṣṭā divyā yathāśaniḥ |
 1.143.05c agnir jambhais tigitair atti bhārvati yodho na śatrūn sa vanā ny ṛñjate ||
 1.143.06a kuvin no agnir ucathasya vīr asad vasuḥ kuvid vasubhiḥ kāmam āvarat |
 1.143.06c codaḥ kuvit tutujyāt sātaye dhīyaḥ śucipratīkaḥ tam ayā dhīyā gr̥ṇe ||
 1.143.07a ghṛtapratīkaḥ va ṛtasya dhūrṣadam agnim mitram na samidhāna ṛñjate |
 1.143.07c indhāno akro vidatheṣu dīdyac chukravarṇām ud u no yaṃsate dhīyam ||
 1.143.08a aprayuchann aprayuchadbhir agne śivebhir naḥ pāyubhiḥ pāhi śagmaiḥ |
 1.143.08c adabdhebhīr adṛpītebhīr iṣṭe 'nimiṣadbhiḥ pari pāhi no jāḥ ||

1.144.01a eti pra hotā vratam asya māyayordhvām dadhānaḥ śucipeśasaḥ dhīyam |
 1.144.01c abhi srucaḥ kramate dakṣiṇāvṛto yā asya dhāma prathamam ha niṃsate ||
 1.144.02a abhīm ṛtasya dohanā anūṣata yonau devasya sadane parīvṛtāḥ |
 1.144.02c apām upasthe vibhṛto yad āvasad adha svadhā adhayad yābhir iyate ||
 1.144.03a yuyūṣataḥ savayasā tad id vapuḥ samānam artham vitaritratā mithaḥ |
 1.144.03c ād īm bhago na havyaḥ sam asmad ā voḍhur na raśmīn sam ayamsta sārathiḥ ||
 1.144.04a yam īm dvā savayasā saparyataḥ samāne yonā mithunā samokasā |
 1.144.04c divā na naktam palito yuvājani purū carann ajaro mānuṣā yugā ||
 1.144.05a tam īm hinvanti dhītayo daśa vriśo devam martāsa ūtaye havāmahe |
 1.144.05c dhanor adhi pravata ā sa ṛṇvaty abhivrajadbhir vayunā navādhita ||
 1.144.06a tvam hy agne divyasya rājasi tvam pārthivasya paśupā iva tmanā |
 1.144.06c enī ta ete bṛhatī abhiśriyā hiraṇyayī vakvarī barhir āśāte ||
 1.144.07a agne juṣasva prati harya tad vaco mandra svadhāva ṛtajāta suktrato |
 1.144.07c yo viśvataḥ pratyaññ asi darśato raṇvaḥ samdr̥ṣṭau pitumām iva kṣayaḥ ||

1.145.01a tam pṛchatā sa jagāmā sa veda sa cikitvām iyate sā nv iyate |
 1.145.01c tasmin santi praśiṣas tasminn iṣṭayaḥ sa vājasya śavasaḥ śuṣṃiṇas patiḥ ||
 1.145.02a tam it pṛchanti na simo vi pṛchati sveneva dhīro manasā yad agrabhīt |
 1.145.02c na mṛṣyate prathamam nāparam vaco 'sya kratvā sacate apradṛpitaḥ ||

1.145.03a tam id gachanti juhvas tam arvatīr viśvāny ekaḥ śṛṇavad vacāmsi me |
 1.145.03c purupraiśas taturir yajñasādhanō 'chidrotiḥ śiśur ādatta saṃ rabhaḥ ||
 1.145.04a upasthāyaṃ carati yat samārata sadyo jātas tatsāra yuyjebhiḥ |
 1.145.04c abhi śvāntam mṛsate nāndye mude yad īm gachanty uśatīr apiṣṭhitam ||
 1.145.05a sa īm mṛgo apyo vanargur upa tvacy upamasyāṃ ni dhāyi |
 1.145.05c vy abravīd vayunā martyebhyo 'gnir vidvāṃ ṛtacid dhi satyaḥ ||

1.146.01a trimūrdhānaṃ saptaraśmiṃ gṛṇiṣe 'nūnam agnim pitror upasthe |
 1.146.01c niṣattam asya carato dhruvasya viśvā divo rocanāpaprivāṃsam ||
 1.146.02a ukṣā mahāṃ abhi vavakṣa ene ajaras tasthāv itaūtīr ṛṣvaḥ |
 1.146.02c urvyāḥ pado ni dadhāti sānau rihanty ūdho aruśāso asya ||
 1.146.03a samānaṃ vatsam abhi saṃcarantī viśvag dhenū vi carataḥ sumeke |
 1.146.03c anapavṛjyāṃ adhvano mimāne viśvān ketāṃ adhi maho dadhāne ||
 1.146.04a dhīrāsaḥ padaṃ kavayo nayanti nānā hṛdā rakṣamānā ajuryam |
 1.146.04c siśāsantaḥ pary apaśyanta sindhum āvir ebhyo abhavat sūryo nṛn ||
 1.146.05a didṛkṣeṇyaḥ pari kāṣṭhāsu jenya īdenyo maho arbhāya jīvase |
 1.146.05c purutrā yad abhavat sūr ahaibhyo garbhebhyo maghavā viśvadarśataḥ ||

1.147.01a kathā te agne śucayanta āyor dadāśur vājebhir āśuśāṇāḥ |
 1.147.01c ubhe yat toke tanaye dadhānā ṛtasya sāmānaṃ raṇayanta devāḥ ||
 1.147.02a bodhā me asya vacaso yaviṣṭha maṃhiṣṭhasya prabhṛtasya svadhāvaḥ |
 1.147.02c pīyati tvo anu tvo gṛṇāti vandārus te tanvaṃ vande agne ||
 1.147.03a ye pāyavo māmāteyaṃ te agne paśyanto andhaṃ duritād arakṣan |
 1.147.03c rarakṣa tān sukr̥to viśvavedā dipsanta id ripavo nāha debhuḥ ||
 1.147.04a yo no agne ararivāṃ aghāyur arātīvā marcayati dvayena |
 1.147.04c mantra guruḥ punar astu so asmā anu mṛkṣiṣṭa tanvaṃ duruktaiḥ ||
 1.147.05a uta vā yaḥ sahasya pravidvān marto martam marcayati dvayena |
 1.147.05c ataḥ pāhi stavamāna stuvantam agne mākir no duritāya dhāyīḥ ||

1.148.01a mathīd yad īm viṣṭo mātariśvā hotāraṃ viśvāpsuṃ viśvadevyam |
 1.148.01c ni yaṃ dadhur manuṣyāsu vikṣu svar ṇa citraṃ vapuṣe vibhāvam ||
 1.148.02a dadānam in na dadabhanta manmāgnir varūtham mama tasya cākan |
 1.148.02c juṣanta viśvāny asya karmopastutim bharamāṇasya kāroḥ ||
 1.148.03a nitye cin nu yaṃ sadane jagṛbhre praśastibhir dadhire yajñiyāsaḥ |
 1.148.03c pra sū nayanta gṛbhayanta iṣṭāv aśvāso na rathyo rārahāṇāḥ ||
 1.148.04a purūṇi dasmo ni riṇāti jambhair ād rocate vana ā vibhāvā |
 1.148.04c ād asya vāto anu vāti śocir astur na śaryām asanām anu dyūn ||
 1.148.05a na yaṃ ripavo na riṣaṇyavo garbhe santaṃ reṣaṇā reṣayanti |
 1.148.05c andhā apaśyā na dabhann abhikhyā nityāsa īm pretāro arakṣan ||

1.149.01a mahaḥ sa rāya eṣate patir dann ina inasya vasunaḥ pada ā |
 1.149.01c upa dhrajantam adrayo vidhann it ||
 1.149.02a sa yo vṛṣā narāṃ na rodasyoḥ śravobhir asti jīvapītasargaḥ |
 1.149.02c pra yaḥ sasrāṇaḥ śiśrīta yonau ||
 1.149.03a ā yaḥ puram nārmiṇim adided atyaḥ kavir nabhanyo nārvā |

- 1.149.03c sūro na rurukvāñ chatātmā ||
1.149.04a abhi dvijanmā trī rocanāni viśvā rajāṃsi śuśucāno asthāt |
1.149.04c hotā yajīṣṭho apāṃ sadhasthe ||
1.149.05a ayam sa hotā yo dvijanmā viśvā dadhe vāryāñi śravasyā |
1.149.05c marto yo asmaṃ sutuko dadāśa ||
- 1.150.01a puru tvā dāśvān voce 'rir agne tava svid ā |
1.150.01c todasyeva śaraṇa ā mahasya ||
1.150.02a vy aninasya dhaninaḥ prahoṣe cid araruṣaḥ |
1.150.02c kadā cana prajigato adevayoḥ ||
1.150.03a sa candro vipra martyo maho vrādhantamo divi |
1.150.03c pra-pret te agne vanuṣaḥ syāma ||
- 1.151.01a mitraṃ na yaṃ śimyā goṣu gavyavaḥ svādhyo vidathe apsu jījanan |
1.151.01c arejetāṃ rodasī pājasā girā prati priyaṃ yajataṃ januṣāṃ avah ||
1.151.02a yad dha tyad vām purumīdhasya sominaḥ pra mitrāso na dadhire svābhavaḥ |
1.151.02c adha kratuṃ vidataṃ gātum arcata uta śrutuṃ vṛṣaṇā pastyāvataḥ ||
1.151.03a ā vām bhūṣan kṣitayo janma rodasyoḥ pravācyam vṛṣaṇā dakṣase mahe |
1.151.03c yad im ṛtāya bharatho yad arvate pra hotrayā śimyā vītho adhvaram ||
1.151.04a pra sā kṣitir asura yā mahi priya ṛtāvānāv ṛtam ā ghoṣatho bṛhat |
1.151.04c yuvaṃ divo bṛhato dakṣam ābhavaṃ gāṃ na dhury upa yuñjāthe apaḥ ||
1.151.05a mahī atra mahinā vāram ṛvatho 'reṇavas tuja ā sadman dhenavaḥ |
1.151.05c svaranti tā uparatāti sūryam ā nimruca uṣasas takvavīr iva ||
1.151.06a ā vām ṛtāya keśinīr anūṣata mitra yatra varuṇa gātum arcathaḥ |
1.151.06c ava tmanā sṛjatam pinvataṃ dhiyo yuvaṃ viprasya manmanām irajyathaḥ ||
1.151.07a yo vām yajñaiḥ śāśamāno ha dāśati kavir hotā yajati manmasādhanah |
1.151.07c upāha taṃ gachatho vītho adhvaram achā giraḥ sumatiṃ gantam asmayū ||
1.151.08a yuvāṃ yajñaiḥ prathamā gobhir añjata ṛtāvānā manaso na prayuktiṣu |
1.151.08c bharanti vām manmanā saṃyatā giro 'dṛpyatā manasā revad āśāthe ||
1.151.09a revad vayo dadhāthe revad āśāthe narā māyābhir itaūti māhinam |
1.151.09c na vām dyāvo 'habhir nota sindhavo na devatvam paṇayo nānaśur magham ||
- 1.152.01a yuvaṃ vastrāñi pīvasā vasāthe yuvor achidrā mantavo ha sargāḥ |
1.152.01c avātiratam anṛtāni viśva ṛtena mitrāvaruṇā sacethe ||
1.152.02a etac cana tvo vi ciketad eṣāṃ satyo mantraḥ kaviśasta ṛghāvān |
1.152.02c triraśriṃ hanti caturaśrir ugro devanido ha prathamā ajūryan ||
1.152.03a apād eti prathamā padvatīnām kas tad vām mitrāvaruṇā ciketa |
1.152.03c garbho bhāram bharaty ā cid asya ṛtam piparty anṛtaṃ ni tārit ||
1.152.04a prayantam it pari jāraṃ kanīnām paśyāmasi nopanipadyamānam |
1.152.04c anavapṛṅṇā vitatā vasānam priyam mitrasya varuṇasya dhāma ||
1.152.05a anaśvo jāto anabhīśur arvā kanikradat patayad ūrdhvasānuḥ |
1.152.05c acittam brahma jujuṣur yuvānaḥ pra mitre dhāma varuṇe gṛṇantaḥ ||
1.152.06a ā dhenavo māmateyam avantīr brahmapriyam pīpayan sasminn ūdhan |
1.152.06c pitvo bhikṣeta vayunāni vidvān āsāvivāsann aditim uruṣyet ||
1.152.07a ā vām mitrāvaruṇā havyajūṣṭiṃ namasā devāv avasā vavṛtyām |
1.152.07c asmākam brahma pṛtanāsu sahyā asmākam vṛṣṭir divyā supārā ||

1.153.01a yajāmahe vām mahāḥ sajoṣā havyebhir mitrāvaruṇā namobhiḥ |
 1.153.01c ghṛtair ghṛtasnū adha yad vām asme adhvaryavo na dhītibhir bharanti ||
 1.153.02a prastutir vām dhāma na prayuktir ayāmi mitrāvaruṇā suvṛktiḥ |
 1.153.02c anakti yad vām vidatheṣu hotā sumnam vām sūrir vṛṣaṇāv iyakṣan ||
 1.153.03a pīpāya dhenur aditir ṛtāya janāya mitrāvaruṇā havirde |
 1.153.03c hinoti yad vām vidathe saparyan sa rātahavyo mānuṣo na hotā ||
 1.153.04a uta vām vikṣu madyāsv andho gāva āpaś ca pīpayanta devīḥ |
 1.153.04c uto no asya pūrvyaḥ patir dan vītam pātam payasa usriyāyāḥ ||

1.154.01a viṣṇor nu kaṃ vīryāṇi pra vocaṃ yaḥ pārthivāni vimame rajāṃsi |
 1.154.01c yo askabhāyad uttaraṃ sadhasthaṃ vicakramāṇas tredhorugāyaḥ ||
 1.154.02a pra tad viṣṇu stavate vīryeṇa mṛgo na bhīmaḥ kucaro giriṣṭhāḥ |
 1.154.02c yasyoruṣu triṣu vikramaṇeṣv adhikṣiyanti bhuvanāni viśvā ||
 1.154.03a pra viṣṇave sūṣam etu manma girikṣita urugāyāya vṛṣṇe |
 1.154.03c ya idaṃ dīrgham prayataṃ sadhastham eko vimame tribhir it padebhiḥ ||
 1.154.04a yasya trī pūrṇā madhunā padāny akṣiyamāṇā svadhayā madanti |
 1.154.04c ya u tridhātu pṛthivīm uta dyām eko dādihāra bhuvanāni viśvā ||
 1.154.05a tad asya priyam abhi pātho aśyāṃ nara yatra devayavo madanti |
 1.154.05c urukramasya sa hi bandhur itthā viṣṇoḥ pade parame madhva utsaḥ ||
 1.154.06a tā vām vāstūny uśmasi gamadhyai yatra gāvo bhūriśṛṅgā ayāsaḥ |
 1.154.06c atrāha tad urugāyasya vṛṣṇaḥ paramam padam ava bhāti bhūri ||

1.155.01a pra vaḥ pāntam andhaso dhiyāyate mahe sūrāya viṣṇave cārcata |
 1.155.01c yā sānuni parvatānām adābhyā mahas tasthatu arvateva sādhunā ||
 1.155.02a tveṣam itthā samaraṇaṃ śimivator indrāviṣṇū sutapā vām uruṣyati |
 1.155.02c yā martyāya pratidhīyamānam it kṛṣānor astur asanām uruṣyathaḥ ||
 1.155.03a tā im vardhanti mahy asya paumṣyaṃ ni mātārā nayati retase bhuje |
 1.155.03c dadhāti putro 'varam param pitur nāma tṛtiyam adhi rocane divaḥ ||
 1.155.04a tat-tad id asya paumṣyaṃ gṛṇimasīnasya trātur avṛkasya mīdhuṣaḥ |
 1.155.04c yaḥ pārthivāni tribhir id vigāmabhir uru kramiṣṭorugāyāya jīvase ||
 1.155.05a dve id asya kramaṇe svardṛśo 'bhikhyāya martyo bhuraṇyati |
 1.155.05c tṛtiyam asya nakir ā dadharṣati vayasā cana patayantaḥ patatṛiṇaḥ ||
 1.155.06a caturbhiḥ sākaṃ navatiṃ ca nāmabhiś cakraṃ na vṛttaṃ vyatīmr avīvipat |
 1.155.06c bṛhaccharīro vimimāna ṛkvabhir yuvākumāraḥ praty ety āhavam ||

1.156.01a bhavā mitro na śevyo ghṛtāsutir vibhūtadyumna evayā u saprathāḥ |
 1.156.01c adhā te viṣṇo viduṣā cid ardhya stomo yajñas ca rādhyo haviṣmatā ||
 1.156.02a yaḥ pūrvyāya vedhase naviyase sumajjānaye viṣṇave dadāśati |
 1.156.02c yo jātam asya mahato mahi bravat sed u śravobhir yujyaṃ cid abhy asat ||
 1.156.03a tam u stotāraḥ pūrvyaṃ yathā vida ṛtasya garbhaṃ januṣā pipartana |
 1.156.03c āsya jānanto nāma cid vivaktana mahas te viṣṇo sumatim bhajāmahe ||
 1.156.04a tam asya rājā varuṇas tam aśvinā kratuṃ sacanta mārutasya vedhasaḥ |
 1.156.04c dādihāra dakṣam uttamam aharvidaṃ vrajaṃ ca viṣṇuḥ sakhivāṃ aporṇute ||
 1.156.05a ā yo vivāya sacathāya daivya indrāya viṣṇuḥ sukṛte sukṛttaraḥ |

1.156.05c vedhā ajinvat triṣadhastha āryam ṛtasya bhāge yajamānam ābhajat ||

1.157.01a abodhy agnir jma ud eti sūryo vy uṣās candrā mahy āvo arcīṣā |
1.157.01c āyukṣātām aśvinā yātave ratham prāsāvid devaḥ savitā jagat pṛthak ||
1.157.02a yad yuñjāthe vṛṣaṇam aśvinā ratham ghr̥tena no madhunā kṣatram ukṣatam |
1.157.02c asmākam brahma pṛtanāsu jinvataṃ vayaṃ dhanā śūrasātā bhajemahi ||
1.157.03a arvān tricakro madhuvāhano ratho jīrāsvo aśvinor yātu suṣṭutaḥ |
1.157.03c trivandhuro maghavā viśvasaubhagaḥ śaṃ na ā vakṣad dvipade catuṣpade ||
1.157.04a ā na ūrjaṃ vahatam aśvinā yuvam madhumatyā naḥ kaśayā mimikṣatam |
1.157.04c prāyus tāriṣṭam nī rapāmsi mṛkṣatam sedhatam dveṣo bhavataṃ sacābhuvā ||
1.157.05a yuvaṃ ha garbhaṃ jagatiṣu dhattho yuvaṃ viśveṣu bhuvaneṣv antaḥ |
1.157.05c yuvam agniṃ ca vṛṣaṇāv apaś ca vanaspatiṃr aśvināv airayethām ||
1.157.06a yuvaṃ ha stho bhiṣajā bheṣajebhir atho ha stho rathyā rāthyebhiḥ |
1.157.06c atho ha kṣatram adhi dhattha ugrā yo vām haviṣmān manasā dadāsa ||

1.158.01a vasū rudrā purumantū vṛdhantā daśasyataṃ no vṛṣaṇāv abhiṣtau |
1.158.01c dasrā ha yad rekṇa aucathyo vām pra yat sasrāthe akavābhir ūti ||
1.158.02a ko vām dāśat sumataye cid asyai vasū yad dhethe namasā pade goḥ |
1.158.02c jigṛtam asme revatiḥ puraṃdhiḥ kāmāpreṇeva manasā carantā ||
1.158.03a yukto ha yad vām taugryāya perur vi madhye arṇaso dhāyi pajraḥ |
1.158.03c upa vām avaḥ śaraṇaṃ gameyaṃ śūro nājma patayadbhir evaiḥ ||
1.158.04a upastutir aucathyam uruṣyen mā mām ime patatriṇi vi dugdhām |
1.158.04c mā mām edho daśatayaś cito dhāk pra yad vām baddhas tmani khādati kṣām ||
1.158.05a na mā garan nadyo mātṛtamā dāsā yad iṃ susamubdham avādhuḥ |
1.158.05c śiro yad asya traitano vitakṣat svayaṃ dāsa uro aṃsāv api gdha ||
1.158.06a dīrghatamā māmāteyo jujurvān daśame yuge |
1.158.06c apām arthaṃ yatīnām brahmā bhavati sārathiḥ ||

1.159.01a pra dyāvā yajñaiḥ pṛthivī ṛtāvṛdhā mahī stuṣe vidatheṣu pracetasā |
1.159.01c devebhir ye devaputre sudāmsasetthā dhiyā vāryāṇi prabhūṣataḥ ||
1.159.02a uta manye pitur adruho mano mātūr mahi svatavas tad dhavīmabhiḥ |
1.159.02c suretasā pitarā bhūma cakratur uru prajāyā amṛtaṃ varīmabhiḥ ||
1.159.03a te sūnavaḥ svapasaḥ sudāmsaso mahī jajñūr mātārā pūrvacittaye |
1.159.03c sthātuś ca satyaṃ jagataś ca dharmāṇi putrasya pāthaḥ padam advayāvinaḥ ||
1.159.04a te māyino mamire supracetaso jāmi sayonī mithunā samokasā |
1.159.04c navyaṃ-navyaṃ tantum ā tanvate divi samudre antaḥ kavayaḥ sudītayaḥ ||
1.159.05a tad rādho adya savitur vareṇyaṃ vayaṃ devasya prasave manāmahe |
1.159.05c asmabhyaṃ dyāvāpṛthivī sucetunā rayiṃ dhattam vāsumantaṃ śatagvinam ||

1.160.01a te hi dyāvāpṛthivī viśvaśambhuva ṛtāvarī rajaso dhārayatkavi |
1.160.01c sujanmanī dhiṣaṇe antar iyate devo devī dharmāṇā sūryaḥ śuciḥ ||
1.160.02a uruvyacasā mahinī asaścatā pitā mātā ca bhuvanāni rakṣataḥ |
1.160.02c sudhr̥ṣṭame vapuṣye na rodasi pitā yat sim abhi rūpair avāsayat ||
1.160.03a sa vahniḥ putraḥ pitroḥ pavitravān punāti dhīro bhuvanāni māyayā |
1.160.03c dhenum ca pṛṣṇiṃ vṛṣabhaṃ suretasam viśvāhā śukram payo asya dukṣata ||

1.160.04a ayam devānām apasām apastamo yo jajāna rodasī viśvaśambhuvā |
 1.160.04c vi yo mame rajasī sukratūyayājarebhi skambhanebhiḥ sam ānṛce ||
 1.160.05a te no gr̥ṇāne mahinī mahi śravaḥ kṣatram dyāvāpṛthivī dhāsatho bṛhat |
 1.160.05c yenābhi kṛṣṭīs tatanāma viśvahā panāyayam ojo asme sam invatam ||

1.161.01a kim u śreṣṭhaḥ kiṃ yaviṣṭho na ājagan kim iyate dūtyam kad yad ūcima |
 1.161.01c na nindima camasaṃ yo mahākulo 'gne bhrātar druṇa id bhūtim ūdima ||
 1.161.02a ekaṃ camasaṃ caturaḥ kṛṇotana tad vo devā abruvan tad va āgamam |
 1.161.02c saudhanvanā yady evā kariṣyatha sākaṃ devair yajñiyāso bhaviṣyatha ||
 1.161.03a agniṃ dūtam prati yad abravītanāśvaḥ kartvo ratha uteha kartvaḥ |
 1.161.03c dhenuḥ kartvā yuvaśā kartvā dvā tāni bhrātar anu vaḥ kṛtvvy emasi ||
 1.161.04a cakṛvāṃsa ṛbhavas tad aṛchata kved abhūd yaḥ sya dūto na ājagan |
 1.161.04c yadāvākhyac camasāñ caturaḥ kṛtān ād it tvaṣṭā gnāsv antar ny ānaje ||
 1.161.05a hanāmaināñ itī tvaṣṭā yad abravīc camasaṃ ye devapānam anidiṣuḥ |
 1.161.05c anyā nāmāni kṛṇvate sute sacāñ anyair enān kanyā nāmabhi sparat ||
 1.161.06a indro harī yuyuje aśvinā ratham bṛhaspatir viśvarūpām upājata |
 1.161.06c ṛbhur vibhvā vājo devāñ agachata svapaso yajñiyam bhāgam aitana ||
 1.161.07a niś carmaṇo gām ariṇīta dhītibhir yā jarantā yuvaśā tākṛṇotana |
 1.161.07c saudhanvanā aśvād aśvam atakṣata yuktivā ratham upa devāñ ayātana ||
 1.161.08a idam udakam pibatety abravītanedaṃ vā ghā pibatā muñjanejanam |
 1.161.08c saudhanvanā yadi tan neva haryatha tṛṭīye ghā savane mādayādhvai ||
 1.161.09a āpo bhūyiṣṭhā ity eko abravīd agnir bhūyiṣṭha ity anyo abravīt |
 1.161.09c vadharyantīm bahubhyaḥ praiko abravīd ṛtā vadantaś camasāñ apimśata ||
 1.161.10a śronām eka udakaṃ gām avājati māṃsam ekaḥ piṃśati sūnayābhṛtam |
 1.161.10c ā nimrucaḥ śakṛd eko apābharat kiṃ svit putrebhyaḥ pitarā upāvatuḥ ||
 1.161.11a udvatsv asmā akṛṇotanā tṛṇam nivatsv apaḥ svapasyayā naraḥ |
 1.161.11c agohyasya yad asastanā gṛhe tad adyedam ṛbhavo nānu gachatha ||
 1.161.12a sammilya yad bhuvanā paryasarpata kva svit tātyā pitarā va āsatuḥ |
 1.161.12c aśapata yaḥ karasnaṃ va ādade yaḥ prābravīt pro tasmā abravītana ||
 1.161.13a suṣupvāṃsa ṛbhavas tad aṛchatāgohya ka idam no abūbudhat |
 1.161.13c śvānam basto bodhayitāram abravīt samvatsara idam adyā vy akhyata ||
 1.161.14a divā yānti maruto bhūmyāgnir ayam vāto antarikṣeṇa yāti |
 1.161.14c adbhir yāti varuṇaḥ samudrair yuṣmāñ ichantaḥ śavaso napātaḥ ||

1.162.01a mā no mitro varuṇo aryamāyur indra ṛbhukṣā marutaḥ pari khyan |
 1.162.01c yad vājino devajātasya sapteḥ pravakṣyāmo vidathe vīryāni ||
 1.162.02a yan nirñijā rekṇasā prāvṛtasya rātiṃ gr̥bhītām mukhato nayanti |
 1.162.02c suprāñ ajo memyad viśvarūpa indrāpūṣṇoḥ priyam apy eti pāthaḥ ||
 1.162.03a eṣa chāgaḥ puro aśvena vājinā pūṣṇo bhāgo nīyate viśvadevyaḥ |
 1.162.03c abhipriyam yat purodāsam arvatā tvaṣṭed enaṃ sauśravasāya jinvati ||
 1.162.04a yad dhaviṣyam ṛtuśo devayānaṃ trir mānuṣāḥ pary aśvam nayanti |
 1.162.04c atrā pūṣṇaḥ prathamo bhāga eti yajñam devebhyaḥ prativedayann ajaḥ ||
 1.162.05a hotādhvaryur āvayā agnimindho grāvagrābha uta śamstā suvipraḥ |
 1.162.05c tena yajñena svaramkṛtena sviṣṭena vakṣaṇā ā pṛṇadhvam ||
 1.162.06a yūpavaskā uta ye yūpavāhās caśālam ye aśvayūpāya takṣati |
 1.162.06c ye cārvate pacanaṃ sambharanty uto teṣāṃ abhigūrtir na invatu ||
 1.162.07a upa prāgāt suman me 'dhāyi manma devānām āśā upa vītapṛṣṭhaḥ |

- 1.162.07c anv enam viprā ṛṣayo madanti devānām puṣṭe cakṛmā subandhum ||
1.162.08a yad vājino dāma saṃdānam arvato yā śīrṣaṇyā raśanā rajjur asya |
1.162.08c yad vā ghāsya prabhṛtam āsyē tṛṇam sarvā tā te api deveṣv astu ||
1.162.09a yad aśvasya kraviṣo makṣikāśa yad vā svarau svadhītau riptam asti |
1.162.09c yad dhastayoḥ śamitur yan nakheṣu sarvā tā te api deveṣv astu ||
1.162.10a yad ūvadyam udarasyāpavāti ya āmasya kraviṣo gandho asti |
1.162.10c sukṛtā tac chamitāraḥ kṛṇvantūta medham śṛtapākam pacantu ||
1.162.11a yat te gātrād agninā pacyamānād abhi sūlam nihatasyāvadhāvati |
1.162.11c mā tad bhūmyām ā śriṣan mā tṛṇeṣu devebhyas tad uśadbhyo rātam astu ||
1.162.12a ye vājinam paripaśyanti pakvaṃ ya im āhuḥ surabhir nir hreti |
1.162.12c ye cārvato māmsabhikṣām upāsata uto teṣām abhigūrtir na invatu ||
1.162.13a yan nīkṣaṇam māṃspacanyā ukhāyā yā pātrāṇi yūṣṇa āsecanāni |
1.162.13c ūṣmaṇyāpidhānā carūṇām ankāḥ sūnāḥ pari bhūṣanty aśvam ||
1.162.14a nikramaṇam niśadanam vivartanam yac ca paḍbīsam arvataḥ |
1.162.14c yac ca papau yac ca ghāsiṃ jaghāsa sarvā tā te api deveṣv astu ||
1.162.15a mā tvāgnir dhvanayīd dhūmagandhir mokhā bhrājanty abhi vikta jaghriḥ |
1.162.15c iṣṭam vītam abhigūrtam vaṣaṭkṛtam tam devāsaḥ prati gṛbhṇanty aśvam ||
1.162.16a yad aśvāya vāsa upastrṇanty adhivāsam yā hiraṇyāny asmai |
1.162.16c saṃdānam arvantam paḍbīsam priyā deveṣv ā yāmayanti ||
1.162.17a yat te sāde mahasā sūkṛtasya pārṣṇyā vā kaśayā vā tutoda |
1.162.17c sruceva tā haviṣo adhivareṣu sarvā tā te brahmaṇā sūdayāmi ||
1.162.18a catustriṃśad vājino devabandhor vaṅkrīr aśvasya svadhitiḥ sam eti |
1.162.18c achidrā gātrā vayunā kṛṇota paruṣ-parur anughuṣyā vi śasta ||
1.162.19a ekas tvaṣtur aśvasyā viśastā dvā yantārā bhavatas tatha ṛtuḥ |
1.162.19c yā te gātrāṇām ṛtuthā kṛṇomi tā-tā piṇḍānām pra juhomy agnau ||
1.162.20a mā tvā tapat priya ātmāpiyantam mā svadhitis tanva ā tiṣṭhipat te |
1.162.20c mā te gṛdhnur avisastātihāya chidrā gātrāṇy asinā mithū kaḥ ||
1.162.21a na vā u etan mriyase na riṣyasi devāṃ id eṣi pathibhiḥ sugebhiḥ |
1.162.21c harī te yuñjā pṛṣati abhūtām upāsthād vājī dhuri rāsabhasya ||
1.162.22a sugavyam no vājī svaśvyam puṃsaḥ putrāṃ uta viśvāpuṣam rayim |
1.162.22c anāgāstvam no aditiḥ kṛṇotu kṣatram no aśvo vanatām haviṣmān ||
- 1.163.01a yad akrandaḥ prathamam jāyamāna udyan samudrād uta vā puriṣāt |
1.163.01c śyenasya pakṣā hariṇasya bāhū upastutyam mahi jātam te arvan ||
1.163.02a yamena dattam trita enam āyunag indra eṇam prathamo adhy atiṣṭhat |
1.163.02c gandharvo asya raśanām agrbhṇāt sūrād aśvam vasavo nir ataṣṭa ||
1.163.03a asi yamo asy ādityo arvann asi trito guhyena vratena |
1.163.03c asi somena samayā vipṛkta āhus te trīṇi divi bandhanāni ||
1.163.04a trīṇi ta āhur divi bandhanāni trīṇy apsu trīṇy antaḥ samudre |
1.163.04c uteva me varuṇas chantsy arvan yatrā ta āhuḥ paramam janitram ||
1.163.05a imā te vājinn avamārjanānimā śaphānām sanitur nidhānā |
1.163.05c atrā te bhadrā raśanā apaśyam ṛtasya yā abhirakṣanti gopāḥ ||
1.163.06a ātmānam te manasārād ajānām avo divā patayantam patamgam |
1.163.06c śiro apaśyam pathibhiḥ sugebhir areṇubhir jehamānam patatri ||
1.163.07a atrā te rūpam uttamam apaśyam jigīṣamānam iṣa ā pade goḥ |
1.163.07c yadā te marto anu bhogam ānaḍ ād id grasiṣṭha oṣadhīr ajīgaḥ ||
1.163.08a anu tvā ratho anu maryo arvann anu gāvo 'nu bhagaḥ kanīnām |
1.163.08c anu vrātāsas tava sakhyam iyur anu devā mamire vīryam te ||

1.163.09a hiraṇyaśṛṅgo 'yo asya pādā manojavā avara indra āsīt |
 1.163.09c devā id asya haviradyam āyan yo arvantam prathamo adhyatiṣṭhat ||
 1.163.10a ṛmāntāsaḥ silikamadhyamāsaḥ saṃ śūraṇāso divyāso atyāḥ |
 1.163.10c haṃsā iva śreṇīso yatante yad ākṣiṣur divyam ajmam aśvāḥ ||
 1.163.11a tava śarīram patayiṣṇv arvan tava cittam vāta iva dhrajimān |
 1.163.11c tava śṛṅgāṇi viṣṭhitā purutrāraṇyeṣu jarbhurāṇā caranti ||
 1.163.12a upa prāgāc chasanam vājy arvā devadrīcā manasā dīdhyānaḥ |
 1.163.12c ajaḥ puro nīyate nābhir asyānu paścāt kavayo yanti rebhāḥ ||
 1.163.13a upa prāgāt paramam yat sadhastham arvāṃ achā pitaram mātaram ca |
 1.163.13c adyā devāñ juṣṭatamo hi gamyā athā śāste dāsūṣe vāryāṇi ||

1.164.01a asya vāmasya palitasya hotus tasya bhrātā madhyamo asty aśnaḥ |
 1.164.01c ṛṭiyo bhrātā ghr̥tapṛṣṭho asyātrāpaśyam viśpatiṃ saptaputram ||
 1.164.02a sapta yuñjanti ratham ekacakram eko aśvo vahati saptanāmā |
 1.164.02c trinābhi cakram ajaram anarvam yatremā viśvā bhuvanādhi tasthuḥ ||
 1.164.03a imaṃ ratham adhi ye sapta tasthuḥ saptacakram sapta vahanty aśvāḥ |
 1.164.03c sapta svasāro abhi saṃ navante yatra gavāṃ nihitā sapta nāma ||
 1.164.04a ko dadarśa prathamam jāyamānam asthanvantam yad anasthā bibharti |
 1.164.04c bhūmyā asur aśṛg ātmā kva svit ko vidvāṃsam upa gāt praṣṭum etat ||
 1.164.05a pākaḥ pṛchāmi manasāvijānan devānām enā nihitā padāni |
 1.164.05c vatse baṣkaye 'dhi sapta tantūn vi tatnire kavaya otavā u ||
 1.164.06a acikivāñ cikituśaś cid atra kavīn pṛchāmi vidmane na vidvān |
 1.164.06c vi yas tastambha ṣaḍ imā rajāṃsy ajasya rūpe kim api svid ekam ||
 1.164.07a iha bravītu ya īm aṅga vedāsyā vāmasya nihitam padaṃ veḥ |
 1.164.07c śīrṣṇaḥ kṣīram duhrate gāvo asya vavriṃ vasānā udakam padāpuḥ ||
 1.164.08a mātā pitaram ṛta ā babhāja dhīty agre manasā saṃ hi jagme |
 1.164.08c sā bībhatsur garbharasā nividdhā namasvanta id upavākam iyuh ||
 1.164.09a yuktā mātāsīd dhuri dakṣiṇāyā atiṣṭhad garbho vṛjanīṣv antaḥ |
 1.164.09c amīmed vatso anu gām apaśyad viśvarūpyam triṣu yojaneṣu ||
 1.164.10a tisro mātṛs trin pitṛn bibhrad eka ūrdhvas tasthau nem ava glāpayanti |
 1.164.10c mantrayante divo amuṣya pṛṣṭhe viśvavidam vācam aviśvaminvām ||
 1.164.11a dvādaśāram nahi taj jarāya varvarti cakram pari dyām ṛtasya |
 1.164.11c ā putrā agne mithunāso atra sapta śatāni viṃśatiś ca tasthuḥ ||
 1.164.12a pañcapādam pitaram dvādaśākṛtiṃ diva āhuḥ pare ardhe puriṣiṇam |
 1.164.12c atheme anya upare vicakṣaṇam saptacakre ṣaḍara āhur arpitam ||
 1.164.13a pañcāre cakre parivartamāne tasminn ā tasthur bhuvanāni viśvā |
 1.164.13c tasya nākṣas tapyate bhūribhārah sanād eva na śīryate sanābhiḥ ||
 1.164.14a sanemi cakram ajaram vi vāvṛta uttānāyām daśa yuktā vahanti |
 1.164.14c sūryasya cakṣū rajasaity āvṛtam tasminn ārpitā bhuvanāni viśvā ||
 1.164.15a sākaṃjānām saptatham āhur ekajam ṣaḍ id yamā ṛsayo devajā iti |
 1.164.15c teṣām iṣṭāni vihītāni dhāmasā sthātre rejante vikṛtāni rūpaśaḥ ||
 1.164.16a striyaḥ satis tāṃ u me puṃsa āhuḥ paśyad akṣaṇvān na vi cetad andhaḥ |
 1.164.16c kavir yaḥ putraḥ sa īm ā ciketa yas tā vijānāt sa pituṣ pitāsat ||
 1.164.17a avaḥ pareṇa para enāvareṇa padā vatsam bibhrati gaur ud asthāt |
 1.164.17c sā kadrīci kam svid ardham parāgāt kva svit sūte nahi yūthe antaḥ ||
 1.164.18a avaḥ pareṇa pitaram yo asyānuveda para enāvareṇa |
 1.164.18c kavīyamānaḥ ka iha pra vocad devam manaḥ kuto adhi prajātam ||
 1.164.19a ye arvāñcas tāṃ u parāca āhur ye parāñcas tāṃ u arvāca āhuḥ |

- 1.164.19c indraś ca yā cakrathuḥ soma tāni dhurā na yuktā rajaso vahanti ||
1.164.20a dvā suparṇā sayujā sakhāyā samānaṃ vṛkṣam pari śasvajāte |
1.164.20c tayor anyañ pippalaṃ svādv atty anaśnann anyo abhi cākaśīti ||
1.164.21a yatrā suparṇā amṛtasya bhāgam animeṣaṃ vidathābhisvaranti |
1.164.21c ino viśvasya bhuvanasya gopāḥ sa mā dhīraḥ pākam atrā viveśa ||
1.164.22a yasmin vṛkṣe madhvadaḥ suparṇā nivīśante suvate cādhi viśve |
1.164.22c tasyed āhuḥ pippalaṃ svādv agre tan non naśad yaḥ pitaraṃ na veda ||
1.164.23a yad gāyatre adhi gāyatram āhitam traīṣṭubhād vā traīṣṭubham niratakṣata |
1.164.23c yad vā jagaj jagaty āhitam padaṃ ya it tad vidus te amṛtatvam ānaśuḥ ||
1.164.24a gāyatreṇa prati mimīte arkam arkeṇa sāma traīṣṭubhena vākam |
1.164.24c vākena vākam dvipadā catuṣpadākṣareṇa mimate sapta vāñīḥ ||
1.164.25a jagatā sindhuṃ divy astabhāyad rathaṃtare sūryam pary apaśyat |
1.164.25c gāyatrasya samidhas tistra āhus tato mahnā pra ririce mahitvā ||
1.164.26a upa hvaye sudughāṃ dhenum etāṃ suhasto godhug uta dohad enām |
1.164.26c śreṣṭhaṃ savam savitā sāviṣan no 'bhīddho gharmas tad u ṣu pra vocam ||
1.164.27a hiñkṛṇvati vasupatnī vasūnām vatsam ichantī manasābhy āgāt |
1.164.27c duhām aśvibhyām payo aghnyeyam sā vardhatām mahate saubhagāya ||
1.164.28a gaur amīmed anu vatsam miśantam mūrdhānaṃ hiññ akṛṇon mātavā u |
1.164.28c sṛkvāṇam gharmam abhi vāvaśānā mimāti māyum payate payobhiḥ ||
1.164.29a ayam sa śīñkte yena gaur abhivṛtā mimāti māyum dhvasanāv adhi śritā |
1.164.29c sā cittibhir ni hi cakāra martyaṃ vidyud bhavanti prati vavrim auhata ||
1.164.30a anac chaye turagātu jīvam ejad dhruvam madhya ā pastyānām |
1.164.30c jīvo mṛtasya carati svadhābhir amartyo martyenā sayoniḥ ||
1.164.31a apaśyam gopām anipadyamānam ā ca parā ca pathibhiś carantam |
1.164.31c sa sadhrīcīḥ sa viśūcīr vasāna ā varīvarti bhuvaneṣv antaḥ ||
1.164.32a ya im cakāra na so asya veda ya im dadarśa hirug in nu tasmāt |
1.164.32c sa mātur yonā parivīto antar bahuprajā nirṛtim ā viveśa ||
1.164.33a dyaur me pitā janitā nābhir atra bandhur me mātā pṛthivī mahīyam |
1.164.33c uttānayoś camvor yonir antar atrā pitā duhitur garbham ādhāt ||
1.164.34a pṛchāmi tvā param antam pṛthivyāḥ pṛchāmi yatra bhuvanasya nābhiḥ |
1.164.34c pṛchāmi tvā vṛṣṇo aśvasya retaḥ pṛchāmi vācaḥ paramam vyoma ||
1.164.35a iyam vedīḥ paro antaḥ pṛthivyā ayam yajño bhuvanasya nābhiḥ |
1.164.35c ayam somo vṛṣṇo aśvasya reto brahmāyam vācaḥ paramam vyoma ||
1.164.36a saptārdhagarbhā bhuvanasya reto viṣṇos tiṣṭhanti pradiśā vidharmaṇi |
1.164.36c te dhītibhir manasā te vipaścitaḥ paribhuvaḥ pari bhavanti viśvataḥ ||
1.164.37a na vi jānāmi yad ivedam asmi niṇyaḥ samnaddho manasā carāmi |
1.164.37c yadā māgan prathamajā ṛtasyād id vāco aśnuve bhāgam asyāḥ ||
1.164.38a apāñ prāñ eti svadhayā gṛbhīto 'martyo martyenā sayoniḥ |
1.164.38c tā śaśvantā viśūcīnā viyantā ny anyam cikyur na ni cikyur anyam ||
1.164.39a ṛco akṣare parame vyoman yasmin devā adhi viśve niṣeduḥ |
1.164.39c yas tan na veda kim ṛcā kariṣyati ya it tad vidus ta ime sam āsate ||
1.164.40a sūyavasād bhagavati hi bhūyā atho vayam bhagavantaḥ syāma |
1.164.40c addhi tṛṇam aghnye viśvadānīm piba śuddham udakam ācaranti ||
1.164.41a gaurīr mimāya salilāni takṣaty ekapadī dvipadī sā catuṣpadī |
1.164.41c aṣṭapadī navapadī babhūvuṣī sahasrākṣarā parame vyoman ||
1.164.42a tasyāḥ samudrā adhi vi kṣaranti tena jīvanti pradiśāś catasraḥ |
1.164.42c tataḥ kṣaraty akṣaram tad viśvam upa jīvati ||
1.164.43a śakamayaṃ dhūmam ārād apaśyam viśūvatā para enāvareṇa |
1.164.43c ukṣāṇam pṛśnim apacanta vīrās tāni dharmāṇi prathamāny āsan ||

1.164.44a trayaḥ keśina ṛtuthā vi cakṣate saṃvatsare vapata eka eṣām |
 1.164.44c viśvam eko abhi caṣṭe śacībhir dhrājir ekasya dadṛṣe na rūpam ||
 1.164.45a catvāri vāk parimitā padāni tāni vidur brāhmaṇā ye maṇiṣiṇaḥ |
 1.164.45c guhā trīṇi nihitā neṅgayanti turīyaṃ vāco manuṣyā vadanti ||
 1.164.46a indram mitraṃ varuṇam agnim āhur atho divyaḥ sa suparṇo garutmān |
 1.164.46c ekaṃ sad viprā bahudhā vadanty agniṃ yamam mātariśvānam āhuḥ ||
 1.164.47a kṛṣṇaṃ niyānaṃ harayaḥ suparṇā apo vasānā divam ut patanti |
 1.164.47c ta āvavṛtran sadanād ṛtasyād id ghṛtena pṛthivī vy udyate ||
 1.164.48a dvādaśa pradhayaś cakram ekaṃ trīṇi nabhyāni ka u tac ciketa |
 1.164.48c tasmin sākaṃ triśatā na śaṅkavo 'rpitāḥ ṣaṣṭir na calācalāsaḥ ||
 1.164.49a yas te stanaḥ śaśayo yo mayobhūr yena viśvā puṣyasi vāryāṇi |
 1.164.49c yo ratnadhā vasuvid yaḥ sudatraḥ sarasvati tam iha dhātave kaḥ ||
 1.164.50a yajñena yajñam ayajanta devās tāni dharmāṇi prathamāny āsan |
 1.164.50c te ha nākam mahimānaḥ sacanta yatra pūrve sādhyāḥ santi devāḥ ||
 1.164.51a samānam etad udakam uc caity ava cāhabhiḥ |
 1.164.51c bhūmim parjanyaṃ jinvanti divaṃ jinvanty agnayaḥ ||
 1.164.52a divyaṃ suparṇaṃ vāyasam bṛhantam apāṃ garbhaṃ darśatam oṣadhīnām |
 1.164.52c abhīpato vṛṣṭibhis tarpayantaṃ sarasvantam avase johavīmi ||

1.165.01a kayā śubhā savayasāḥ sanīdāḥ samānyā marutaḥ sam mimikṣuḥ |
 1.165.01c kayā matī kuta etāsa ete 'rcanti śuṣmaṃ vṛṣaṇo vasūyā ||
 1.165.02a kasya brahmāṇi jujuṣur yuvānaḥ ko adhvare maruta ā vavarta |
 1.165.02c śyenāṃ iva dhrajato antarikṣe kena mahā manasā rīramāma ||
 1.165.03a kutas tvam indra māhinaḥ sann eko yāsi satpate kiṃ ta itthā |
 1.165.03c sam pṛchase samarāṇaḥ śubhānair voces tan no harivo yat te asme ||
 1.165.04a brahmāṇi me matayaḥ śaṃ sutāsaḥ śuṣma iyarti prabhṛto me adriḥ |
 1.165.04c ā śāsate prati haryanty ukthemā harī vahatas tā no acha ||
 1.165.05a ato vayam antamebhir yujānāḥ svakṣatrebhis tanvaḥ śumbhamānāḥ |
 1.165.05c mahobhir etāṃ upa yujmahe nv indra svadhām anu hi no babhūtha ||
 1.165.06a kva syā vo marutaḥ svadhāsīd yan mām ekaṃ samadhattāhihatye |
 1.165.06c ahaṃ hy ūgras taviṣas tuviṣmān viśvasya śator anamaṃ vadhasnaiḥ ||
 1.165.07a bhūri cakartha yujyebhir asme samānebhir vṛṣabha paumṣyebhiḥ |
 1.165.07c bhūrīṇi hi kṛṇavāmā śaviṣṭhendra kratvā maruto yad vaśāma ||
 1.165.08a vadhīm vṛtram maruta indriyeṇa svena bhāmena taviṣo babhūvān |
 1.165.08c aham etā manave viśvaścandrāḥ sugā apaś cakara vajrabāhuḥ ||
 1.165.09a anuttam ā te maghavan nakir nu na tvāvāṃ asti devatā vidānaḥ |
 1.165.09c na jāyamāno naśate na jāto yāni kariṣyā kṛṇuhi pravṛddha ||
 1.165.10a ekasya cin me vibhv astv ojo yā nu dadhṛṣvān kṛṇavai maṇiṣā |
 1.165.10c ahaṃ hy ūgro maruto vidāno yāni cyavam indra id īsa eṣām ||
 1.165.11a amandan mā maruta stomo atra yan me naraḥ śrutyam brahma cakra |
 1.165.11c indrāya vṛṣṇe sumakhāya mahyaṃ sakhye sakhāyas tanve tanūbhiḥ ||
 1.165.12a eved ete prati mā rocamānā anedyāḥ śrava eṣo dadhānāḥ |
 1.165.12c saṃcakṣyā marutaś candravarṇā achānta me chadayāthā ca nūnam ||
 1.165.13a ko nv atra maruto māmāhe vaḥ pra yātana sakhiṃr achā sakhāyaḥ |
 1.165.13c manmāni citrā apivātayanta eṣām bhūta navedā ma ṛtānām ||
 1.165.14a ā yad duvasyād duvase na kānur asmāñ cakre mānyasya medhā |
 1.165.14c o ṣu vartta maruto vipram achemā brahmāṇi jaritā vo arcāt ||
 1.165.15a eṣa va stomo maruta iyaṃ gīr mādāryasya mānyasya kāroḥ |

1.165.15c eṣā yāsīṣṭa tanve vayāṃ vidyāmeṣaṃ vṛjanaṃ jīradānum ||

- 1.166.01a tan nu vocāma rabhasāya janmane pūrvam mahitvaṃ vṛṣabhasya ketave |
1.166.01c aidheva yāman marutas tuviṣvaṇo yudheva śakrās taviṣāṇi kartana ||
1.166.02a nityaṃ na sūnum madhu bibhrata upa krīḍanti krīḍā vidatheṣu ghr̥ṣvayaḥ |
1.166.02c nakṣanti rudrā avasā namasvināṃ na mardhanti svatavaso haviṣkṛtam ||
1.166.03a yasmā ūmāso amṛtā arāsata rāyas poṣaṃ ca haviṣā dadāśuṣe |
1.166.03c ukṣanty asmai maruto hitā iva purū rajāṃsi payasā mayobhuvāḥ ||
1.166.04a ā ye rajāṃsi taviṣibhir avyata pra va evāsaḥ svayatāso adhrajan |
1.166.04c bhayante viśvā bhuvanāni harmyā citro vo yāmaḥ prayatāsv ṛṣṭiṣu ||
1.166.05a yat tveṣayāmā nadayanta parvatān divo vā pṛṣṭhaṃ naryā acucyavuh |
1.166.05c viśvo vo ajman bhayate vanaspatī rathiyantīva pra jihīta oṣadhiḥ ||
1.166.06a yūyaṃ na ugrā marutaḥ sucetunāriṣṭagrāmāḥ sumatim pipartana |
1.166.06c yatrā vo didyud radati krivirdatī riṇāti paśvaḥ sudhiteva barhaṇā ||
1.166.07a pra skambhadeṣṇā anavabhrarādhaso 'lātṛṇāso vidatheṣu suṣṭutāḥ |
1.166.07c arcanty arkam madirasya pītaye vidur vīrasya prathamāni paumṣyā ||
1.166.08a śatabhujibhis tam abhihruter aghāt pūrbhī rakṣatā maruto yam āvata |
1.166.08c janāṃ yam ugrās tavaso virapśinaḥ pāthanā śamsāt tanayasya puṣṭiṣu ||
1.166.09a viśvāni bhadrā maruto ratheṣu vo mithaspr̥dhyeva taviṣāṇy āhitā |
1.166.09c aṃseṣv ā vaḥ prapatheṣu khādayo 'kṣo vaś cakrā samayā vi vāvṛte ||
1.166.10a bhūriṇi bhadrā naryeṣu bāhuṣu vakṣassu rukmā rabhasāso añjayaḥ |
1.166.10c aṃseṣv etāḥ paviṣu kṣurā adhi vayo na pakṣān vy anu śriyo dhire ||
1.166.11a mahānto mahnā vibhvo vibhūtayo dūredṛso ye divyā iva stṛbhīḥ |
1.166.11c mandrāḥ sujihvāḥ svaritāra āsabhiḥ sammiślā indre marutaḥ pariṣṭubhaḥ ||
1.166.12a tad vaḥ sujātā maruto mahitvanāṃ dīrghaṃ vo dātram aditer iva vratam |
1.166.12c indraś cana tyajasā vi hruṇāti taj janāya yasmai sukṛte arādhvam ||
1.166.13a tad vo jāmitvam marutaḥ pare yuge purū yac chaṃsam amṛtāsa āvata |
1.166.13c ayā dhiyā manave śruṣṭim āvyā sākāṃ naro daṃsanair ā cikitrire ||
1.166.14a yena dīrgham marutaḥ śūsavāma yuṣmākena pariṇasā turāsaḥ |
1.166.14c ā yat tatanan vṛjane janāsa ebhir yajñebhis tad abhiṣṭim aśyām ||
1.166.15a eṣa va stomo maruta iyaṃ gīr mādāryasya mānyasya kāroḥ |
1.166.15c eṣā yāsīṣṭa tanve vayāṃ vidyāmeṣaṃ vṛjanaṃ jīradānum ||

- 1.167.01a sahasraṃ ta indrotayo naḥ sahasram iṣo harivo gūrtatamāḥ |
1.167.01c sahasraṃ rāyo mādayadhyai sahasriṇa upa no yantu vājāḥ ||
1.167.02a ā no 'vobhir maruto yāntv achā jyeṣṭhebhīr vā bṛhaddivaiḥ sumāyāḥ |
1.167.02c adha yad eṣāṃ niyutaḥ paramāḥ samudrasya cid dhanayanta pāre ||
1.167.03a mīmīyakṣa yeṣu sudhitā ghṛtācī hiraṇyanirṇig uparā na ṛṣṭiḥ |
1.167.03c guhā carantī manuṣo na yoṣā sabhāvati vidathyeva saṃ vāk ||
1.167.04a parā śubhrā ayāso yavyā sādharāṇyeva maruto mimikṣuh |
1.167.04c na rodasī apa nudanta ghorā juṣanta vṛdham sakhyāya devāḥ ||
1.167.05a joṣad yad īm asuryā sacadhyai viṣitastukā rodasī nṛmaṇāḥ |
1.167.05c ā sūryeva vidhato rathaṃ gāt tveṣapratikā nabhaso netyā ||
1.167.06a āsthāpayanta yuvatim yuvānaḥ śubhe nimiślām vidatheṣu pajrām |
1.167.06c arko yad vo maruto haviṣmān gāyad gāthaṃ sutasomo duvasyan ||
1.167.07a pra taṃ vivakmi vakmyo ya eṣāṃ marutām mahimā satyo asti |
1.167.07c sacā yad īm vṛṣamaṇā ahamyu sthirā cij janīr vahate subhāgāḥ ||

- 1.167.08a pānti mitrāvaruṇāv avadyāc cayata īm aryamo aprasastān |
1.167.08c uta cyavante acyutā dhruvāṇi vāvṛdha īm maruto dātivāraḥ ||
1.167.09a nahī nu vo maruto anty asme ārāttāc cic chavaso antam āpuḥ |
1.167.09c te dhṛṣṇunā śavasā śūsuvāṃso 'rṇo na dveṣo dhṛṣatā pari ṣṭhuḥ ||
1.167.10a vayam adyendrasya preṣṭhā vayam śvo vocemahi samarye |
1.167.10c vayam purā mahi ca no anu dyūn tan na ṛbhukṣā narām anu ṣyāt ||
1.167.11a eṣa va stomo maruta iyaṃ gīr mādāryasya mānyasya kāroḥ |
1.167.11c eṣā yāsīṣṭa tanve vayāṃ vidyāmeṣaṃ vṛjanaṃ jīradānum ||
- 1.168.01a yajñā-yajñā vaḥ samanā tuturvaṇir dhiyaṃ-dhiyaṃ vo devayā u dadhidhve |
1.168.01c ā vo 'rvācaḥ suvitāya rodasyor mahe vavṛtyām avase suvrktibhiḥ ||
1.168.02a vavrāso na ye svajāḥ svatavasa iṣaṃ svar abhijāyanta dhūtayaḥ |
1.168.02c sahasriyāso apāṃ normaya āsā gāvo vandyāso nokṣaṇaḥ ||
1.168.03a somāso na ye sutās tṛptāmśavo hrtsu pītāso duvaso nāsate |
1.168.03c aiśām amseṣu rambhiṇīva rārabhe hasteṣu khādīś ca kṛtīś ca saṃ dadhe ||
1.168.04a ava svayuktā diva ā vṛthā yayur amartyāḥ kaśayā codata tmanā |
1.168.04c areṇavas tuvijātā acucyavur dṛdhāni cin maruto bhrājadṛṣṭayaḥ ||
1.168.05a ko vo 'ntar maruta ṛṣṭividyo rehati tmanā hanveva jihvayā |
1.168.05c dhanvacyuta iśāṃ na yāmani purupraiṣā ahanyo naitaśaḥ ||
1.168.06a kva svid asya rajaso mahas paraṃ kvāvaram maruto yasminn āyaya |
1.168.06c yac cyāvayatha vithureva saṃhitam vy adriṇā patatha tveṣam arṇavam ||
1.168.07a sātir na vo 'mavati svarvati tveṣā vipākā marutaḥ pipiṣvati |
1.168.07c bhadrā vo rātiḥ pṛṇato na dakṣiṇā pṛthujrayī asuryeva jañjati ||
1.168.08a prati ṣṭobhanti sindhavaḥ pavibhyo yad abhriyām vācam udīrayanti |
1.168.08c ava smayanta vidyutaḥ pṛthivyām yadī ghṛtam marutaḥ pruṣṇuvanti ||
1.168.09a asūta pṛśnir mahate raṇāya tveṣam ayāsām marutām anīkam |
1.168.09c te sapsarāso 'janayantābhvam ād it svadhām iṣirām pary apaśyan ||
1.168.10a eṣa va stomo maruta iyaṃ gīr mādāryasya mānyasya kāroḥ |
1.168.10c eṣā yāsīṣṭa tanve vayāṃ vidyāmeṣaṃ vṛjanaṃ jīradānum ||
- 1.169.01a mahaś cit tvam indra yata etān mahaś cid asi tyajaso varūtā |
1.169.01c sa no vedho marutām cikivān sumnā vanuṣva tava hi preṣṭhā ||
1.169.02a ayujran ta indra viśvakṛṣṭir vidānāso niṣṣidho martyatrā |
1.169.02c marutām pṛtsutir hāsamānā svarmīḍhasya pradhanasya satau ||
1.169.03a amyak sā ta indra ṛṣṭir asme sanemy abhvam maruto junanti |
1.169.03c agniś cid dhi śmātase śusukvān āpo na dvīpaṃ dadhati prayāṃsi ||
1.169.04a tvam tū na indra taṃ rayiṃ dā ojiṣṭhayā dakṣiṇayeva rātim |
1.169.04c stutaś ca yās te cakananta vāyo stanam na madhvaḥ pīpayanta vājaiḥ ||
1.169.05a tve rāya indra tośatamāḥ praṇetāraḥ kasya cid ṛtāyoḥ |
1.169.05c te ṣu ṇo maruto mṛdayantu ye smā purā gātūyantiva devāḥ ||
1.169.06a prati pra yāhindra mīḍhuṣo nīn mahaḥ pārhive sadane yatasva |
1.169.06c adha yad eṣām pṛthubudhnāsa etās tīrthe nāryaḥ paumśyāni tasthuḥ ||
1.169.07a prati ghorāṇām etānām ayāsām marutām śṛṇva āyatām upabdiḥ |
1.169.07c ye martyam pṛtanāyantam ūmair ṛṇāvānaṃ na patayanta sargaiḥ ||
1.169.08a tvam mānebhya indra viśvajanyā radā marudbhiḥ śurudho goagrāḥ |
1.169.08c stavānebhi stavase deva devair vidyāmeṣaṃ vṛjanaṃ jīradānum ||

1.170.01a na nūnam asti no śvaḥ kas tad veda yad adbhutam |
 1.170.01c anyasya cittam abhi samcareṇyam utādhītaṃ vi naśyati ||
 1.170.02a kiṃ na indra jighāṃsasi bhrātaro marutas tava |
 1.170.02c tebhiḥ kalpasva sādhyā mā naḥ samaraṇe vadhiḥ ||
 1.170.03a kiṃ no bhrātar agastya sakhā sann ati manyase |
 1.170.03c vidmā hi te yathā mano 'smabhyam in na ditsasi ||
 1.170.04a araṃ kṛṇvantu vedim sam agnim indhatām puraḥ |
 1.170.04c tatrāmṛtasya cetanaṃ yajñam te tanavāvahai ||
 1.170.05a tvam īśiṣe vasupate vasūnām tvam mitrāṇām mitrapate dheṣṭhaḥ |
 1.170.05c indra tvam marudbhiḥ sam vadasvādha prāsāna ṛtuthā havimṣi ||

1.171.01a prati va enā namasāham emi sūktena bhikṣe sumatiṃ turāṇām |
 1.171.01c rarāṇatā maruto vedyābhir ni heḍo dhatta vi mucadhvam aśvān ||
 1.171.02a eṣa va stomo maruto namasvān hṛdā taṣṭo manasā dhāyi devāḥ |
 1.171.02c upem ā yāta manasā juṣāṇā yūyaṃ hi ṣṭhā namasa id vṛdhāsaḥ ||
 1.171.03a stutāso no maruto mṛdayantūta stuto maghavā śambhaviṣṭhaḥ |
 1.171.03c ūrdhvā naḥ santu komyā vanāny ahāni viśvā maruto jigīṣā ||
 1.171.04a asmād ahaṃ taviṣād iṣamāṇa indrād bhiyā maruto rejamānaḥ |
 1.171.04c yuṣmabhyam havyā niśitāny āsan tāny āre cakṛmā mṛdatā naḥ ||
 1.171.05a yena mānāsaś citayanta usrā vyuṣṭiṣu śavasā śaśvatinām |
 1.171.05c sa no marudbhir vṛṣabha śravo dhā ugra ugrebhi sthaviraḥ sahodāḥ ||
 1.171.06a tvam pāhindra sahiyaso nṛṇ bhavā marudbhir avayātaheḍāḥ |
 1.171.06c supraketebhiḥ sāsahir dadhāno vidyāmeṣam vṛjanaṃ jīradānum ||

1.172.01a citro vo 'stu yāmaś citra ūti sudānavaḥ |
 1.172.01c maruto ahibhānavaḥ ||
 1.172.02a āre sā vaḥ sudānavo maruta ṛñjatī śaruḥ |
 1.172.02c āre asmā yam asyatha ||
 1.172.03a tṛṇaskandasya nu viśaḥ pari vṛṅkta sudānavaḥ |
 1.172.03c ūrdhvān naḥ karta jīvase ||

1.173.01a gāyat sāma nabhanyaṃ yathā ver arcāma tad vāvṛdhānaṃ svarvat |
 1.173.01c gāvo dhenavo barhiṣy adabdhā ā yat sadmānaṃ divyaṃ vivāsān ||
 1.173.02a arcad vṛṣā vṛṣabhiḥ sveduhavyair mṛgo nāśno ati yaj juguryāt |
 1.173.02c pra mandayur manām gūrta hotā bharate maryo mithunā yajatraḥ ||
 1.173.03a nakṣad dhotā pari sadma mitā yan bharad garbham ā śaradaḥ pṛthivyāḥ |
 1.173.03c krandad aśvo nayamāno ruvad gaur antar dūto na rodasī carad vāk ||
 1.173.04a tā karmāṣatarāsmāi pra cyautnāni devayanto bharante |
 1.173.04c jujoṣad indro dasmavarcā nāsatyeva sugmyo ratheṣṭhāḥ ||
 1.173.05a tam u ṣṭuhindraṃ yo ha satvā yaḥ śūro maghavā yo ratheṣṭhāḥ |
 1.173.05c pratīcaś cid yodhiyān vṛṣaṇvān vavavruṣāś cit tamaso vihantā ||
 1.173.06a pra yad itthā mahinā nṛbhyo asty araṃ rodasī kakṣye nāsmāi |
 1.173.06c sam vivya indro vṛjanaṃ na bhūmā bharti svadhāvāṃ opaśam iva dyām ||
 1.173.07a samatsu tvā śūra satām urāṇam prapathintamam paritaṃsayadhyai |
 1.173.07c sajoṣasa indram made kṣoṇiḥ sūrim cid ye anumadanti vājaiḥ ||

1.173.08a evā hi te śaṃṣavanā samudra āpo yat ta āsu madanti devīḥ |
 1.173.08c viśvā te anu joṣyā bhūd gauḥ sūrīṃś cid yadi dhiṣā veṣi janān ||
 1.173.09a asāma yathā suśakhāya ena svabhiṣṭayo narāṃ na śaṃsaiḥ |
 1.173.09c asad yathā na indro vandaneṣṭhās turo na karma nayamāna ukthā ||
 1.173.10a viṣpardhaso narāṃ na śaṃsair asmākāsad indro vajrahastaḥ |
 1.173.10c mitrāyuvo na pūrpatim suśiṣṭau madhyāyuva upa śikṣanti yajñaiḥ ||
 1.173.11a yajño hi śmendram kaś cid ṛndhañ juhurāṇas cin manasā pariyan |
 1.173.11c tīrthe nāchā tāṭṛṣāṇam oko dirgho na sidhram ā kṛṇoty adhvā ||
 1.173.12a mo ṣū ṇa indrātra pṛtsu devair asti hi śmā te śuśminn avayāḥ |
 1.173.12c mahaś cid yasya mīdhuṣo yavyā haviṣmato maruto vandate giḥ ||
 1.173.13a eṣa stoma indra tubhyam asme etena gātum harivo vido naḥ |
 1.173.13c ā no vavṛtyāḥ suvitāya deva vidyāmeṣaṃ vṛjanam jīradānum ||

1.174.01a tvam rājendra ye ca devā rakṣā nṛn pāhy asura tvam asmān |
 1.174.01c tvam satpatir maghavā nas tarutras tvam satyo vasavānaḥ sahodāḥ ||
 1.174.02a dano viśa indra mṛdhra vācaḥ sapta yat puraḥ śarma śāradir dart |
 1.174.02c ṛṇor apo anavadyārṇā yūne vṛtram purukutsāya randhiḥ ||
 1.174.03a ajā vṛta indra śūrapatnī dyām ca yebhiḥ puruhūta nūnam |
 1.174.03c rakṣo agnim aśuṣaṃ tūrvayāṇaṃ siṃho na dame apāṃsi vastoḥ ||
 1.174.04a šeṣan nu ta indra sasmin yonau praśastaye pavīravasya mahnā |
 1.174.04c sṛjad arṇāṃsy ava yad yudhā gās tiṣṭhad dharī dhṛṣatā mṛṣṭa vājān ||
 1.174.05a vaha kutsam indra yasmiñ cākan syūmanyū ṛjā vātasyāśvā |
 1.174.05c pra sūras cakram vṛhatād abhike 'bhi spṛdho yāsiṣad vajrabāhuḥ ||
 1.174.06a jaghanvāñ indra mitrerūñ codapravṛddho harivo adāsūn |
 1.174.06c pra ye paśyann aryamaṇaṃ sacāyos tvayā śūrtā vahamānā apatyam ||
 1.174.07a rapat kavir indrārkaśatau kṣaṃ dāsāyopabarhaṇim kaḥ |
 1.174.07c karat tisro maghavā dānucitrā ni duryoṇe kuyavācam mṛdhi śret ||
 1.174.08a sanā tā ta indra navyā āguḥ saho nabho 'viraṇāya pūrvīḥ |
 1.174.08c bhinat puro na bhido adevīr nanamo vadhar adevasya pīyoḥ ||
 1.174.09a tvam dhunir indra dhunimatīr ṛṇor apaḥ sīrā na sravantiḥ |
 1.174.09c pra yat samudram ati sūra parṣi pārayā turvaśaṃ yaduṃ svasti ||
 1.174.10a tvam asmākam indra viśvadha syā avṛkatamo narāṃ nṛpātā |
 1.174.10c sa no viśvāsāṃ spṛdhāṃ sahodā vidyāmeṣaṃ vṛjanam jīradānum ||

1.175.01a matsy apāyi te mahaḥ pātrasyeva harivo matsaro madaḥ |
 1.175.01c vṛṣā te vṛṣṇa indur vājī sahasrasātamaḥ ||
 1.175.02a ā nas te gantu matsaro vṛṣā mado vareṇyaḥ |
 1.175.02c sahāvāñ indra sānasiḥ pṛtanāṣād amartyaḥ ||
 1.175.03a tvam hi sūraḥ sanitā codayo manuṣo ratham |
 1.175.03c sahāvān dasyum avratam oṣaḥ pātraṃ na śociṣā ||
 1.175.04a muṣāya sūryaṃ kave cakram iśāna ojasā |
 1.175.04c vaha śuśṇāya vadhaṃ kutsaṃ vātasyāśvaiḥ ||
 1.175.05a śuśmintamo hi te mado dyumnintama uta kratuḥ |
 1.175.05c vṛtraghnā varivovidā maṃsiṣṭhā aśvasātamaḥ ||
 1.175.06a yathā pūrvebhyo jaritṛbhya indra maya ivāpo na ṭṛṣyate babhūtha |
 1.175.06c tām anu tvā nividam johavīmi vidyāmeṣaṃ vṛjanam jīradānum ||

1.176.01a matsi no vasyaiṣṭaya indram indo vṛṣā viśa |
 1.176.01c ṛghāyamāṇa invasi śatrum anti na vindasi ||
 1.176.02a tasminn ā veśayā giro ya ekaś carṣaṇinām |
 1.176.02c anu svadhā yam upyate yavaṃ na carḥṣad vṛṣā ||
 1.176.03a yasya viśvāni hastayoḥ pañca kṣitīnām vasu |
 1.176.03c spāśayasva yo asmadrug divyevāśanir jahi ||
 1.176.04a asunvantam samaṃ jahi dūṇāsam yo na te mayaḥ |
 1.176.04c asmabhyam asya vedanam daddhi sūrīś cid ohate ||
 1.176.05a āvo yasya dvibarhaso 'rkeṣu sānuṣag asat |
 1.176.05c ājāv indrasyendo prāvo vājeṣu vājinam ||
 1.176.06a yathā pūrvebhyo jaritṛbhya indra maya ivāpo na tṛṣyate babhūtha |
 1.176.06c tām anu tvā nividam johanīmi vidyāmeṣam vṛjanam jīradānum ||

1.177.01a ā carṣaṇiprā vṛṣabho janānām rājā kṛṣṭīnām puruhūta indraḥ |
 1.177.01c stutaḥ śravasyann avasopa madrig yuktvā harī vṛṣaṇā yāhy arvān ||
 1.177.02a ye te vṛṣaṇo vṛṣabhāsa indra brahmayujo vṛṣarathāso atyāḥ |
 1.177.02c tāṃ ā tiṣṭha tebhīr ā yāhy arvān havāmahe tvā suta indra some ||
 1.177.03a ā tiṣṭha ratham vṛṣaṇam vṛṣā te sutaḥ somaḥ pariṣiktā madhūni |
 1.177.03c yuktvā vṛṣabhyām vṛṣabha kṣitīnām haribhyām yāhi pravatopa madrik ||
 1.177.04a ayam yajño devayā ayam miyedha imā brahmāṇy ayam indra somaḥ |
 1.177.04c stīrnam barhīr ā tu śakra pra yāhi pibā niṣadya vi mucā harī iha ||
 1.177.05a o suṣṭuta indra yāhy arvān upa brahmāṇi mānyasya kāroḥ |
 1.177.05c vidyāma vastor avasā gṛṇanto vidyāmeṣam vṛjanam jīradānum ||

1.178.01a yad dha syā ta indra śruṣṭir asti yayā babhūtha jaritṛbhya ūtī |
 1.178.01c mā naḥ kāmam mahayantam ā dhag viśvā te aśyām pary āpa āyoḥ ||
 1.178.02a na ghā rājendra ā dabhan no yā nu svasārā kṛṇavanta yonau |
 1.178.02c āpaś cid asmaī sutukā aveṣan gaman na indraḥ sakhyā vayaś ca ||
 1.178.03a jetā nṛbhīr indraḥ pṛtsu sūraḥ śrotā havam nādhamānasya kāroḥ |
 1.178.03c prabhartā ratham dāśuṣa upāka udyantā giro yadi ca tmanā bhūt ||
 1.178.04a evā nṛbhīr indraḥ suśravasyā prakhādaḥ pṛkṣo abhi mitriṇo bhūt |
 1.178.04c samarya iṣa stavate vivāci satrākaro yajamānasya śaṃsaḥ ||
 1.178.05a tvayā vayam maghavann indra śatrūn abhi ṣyāma mahato manyamānān |
 1.178.05c tvam trātā tvam u no vṛdhe bhūr vidyāmeṣam vṛjanam jīradānum ||

1.179.01a pūrvīr aham śaradaḥ śaśramāṇā doṣā vastor uṣaso jarayantīḥ |
 1.179.01c mināti śriyam jarimā tanūnām apy ū nu patnīr vṛṣaṇo jagamyuḥ ||
 1.179.02a ye cid dhi pūrva ṛtasāpa āsan sākam devebhīr avadann ṛtāni |
 1.179.02c te cid avāsuraḥ nahy antam āpuḥ sam ū nu patnīr vṛṣabhir jagamyuḥ ||
 1.179.03a na mṛṣā śrāntam yad avanti devā viśvā it spṛdho abhy aśnavāva |
 1.179.03c jayāved atra śatanītham ājīm yat samyañcā mithunāv abhy ajāva ||
 1.179.04a nadasya mā rudhataḥ kāma āgann ita ājāto amutaḥ kutaś cit |
 1.179.04c lopāmudrā vṛṣaṇam nī riṇāti dhīram adhīrā dhayati śvasantam ||
 1.179.05a imaṃ nu somam antito hṛtsu pītam upa bruve |
 1.179.05c yat sīm āgaś cakrāmā tat su mṛdatu pulukāmo hi martyaḥ ||

1.179.06a agastyaḥ khanamānaḥ̣ khanitraiḥ̣ prajāṃ apatyaṃ balaṃ ichamānaḥ̣ |
1.179.06c ubhau varṇāṿ ṛṣiṛ ugraḥ̣ pupoṣa satyā deveṣṿ āśiṣo jagāma ||

1.180.01a yuvo rajāṃsi suyamāso aśvā ratho yad vām pary arṇāṃsi dīyat |
1.180.01c hiraṇyayā vām pavayaḥ̣ pruṣāyan madhvaḥ̣ pibantā uṣasaḥ̣ sacethe ||
1.180.02a yuvaṃ atyasyāva nakṣatho yad vipatmano naryasya prayajyoḥ̣ |
1.180.02c svasā yad vāṃ viśvagūrti bharāti vājāyeṭṭe madhupāṿ iṣe ca ||
1.180.03a yuvaṃ paya usriyāyāṃ adhattaṃ pakvaṃ āmāyāṃ ava pūrvyaṃ goḥ̣ |
1.180.03c antar yad vanino vāṃ ṛtapsū hvāro na śuciṛ yajate haviṣmāṇ ||
1.180.04a yuvaṃ ha gharmaṃ madhumantaṃ atraye 'po na kṣodo 'vṛṇitaṃ eṣe |
1.180.04c tad vāṃ narāṿ aśvinā paśvaiṣṭī rathyeva cakrā prati yanti madhvaḥ̣ ||
1.180.05a ā vāṃ dānāya vavṛṭīya dasrā gor oheṇa taugryō na jivriḥ̣ |
1.180.05c apaḥ̣ kṣoṇī sacate māhinā vāṃ jūrṇo vāṃ akṣuṛ aṃhaso yajatrā ||
1.180.06a ni yad yuvethe niyutaḥ̣ sudānū upa svadhābhiḥ̣ sṛjathaḥ̣ puram̄dhiṃ |
1.180.06c preṣad veṣad vāto na sūr̄iṛ ā mahe dade suvrato na vājaṃ ||
1.180.07a vayaṃ cid dhi vāṃ jaritāraḥ̣ satyā vipanyāmahe vi paṇiṛ hitāvāṇ |
1.180.07c adhā cid dhi śmāśvināṿ anindyā pātho hi śmā vṛṣaṇāṿ antidevaṃ ||
1.180.08a yuvāṃ cid dhi śmāśvināṿ anu dyūṇ virudrasya prasravaṇasya sātāu |
1.180.08c agastyo narāṃ nṛṣu praśastaḥ̣ kārādhunīva citayat sahasraiḥ̣ ||
1.180.09a pra yad vahethe mahinā rathasya pra syandrā yātho manuṣo na hotā |
1.180.09c dhattaṃ sūribhya uta vā svaśvyaṃ nāsatyā rayiṣācaḥ̣ syāma ||
1.180.10a taṃ vāṃ rathaṃ vayaṃ adyā huvema stomaiṛ aśvinā suvitāya navyaṃ |
1.180.10c ariṣṭānemiṃ pari dyāṃ iyānaṃ vidyāmeṣaṃ vṛjanaṃ jīradānuṃ ||

1.181.01a kad u preṣṭāṿ iṣāṃ rayiṇāṃ adhvaryantā yad unninītho apāṃ |
1.181.01c ayaṃ vāṃ yajño akṛta praśastiṃ vasudhitī avitārā janānāṃ ||
1.181.02a ā vāṃ aśvāsaḥ̣ śucayaḥ̣ payaspā vātaram̄haso divyāso atyāḥ̣ |
1.181.02c manojuvo vṛṣaṇo vītapṛṣṭhā eha svarājo aśvinā vahantu ||
1.181.03a ā vāṃ ratho 'vaniṛ na pravatvāṇ sṛpravandhuraḥ̣ suvitāya gamyāḥ̣ |
1.181.03c vṛṣṇa sthātārā manaso javīyāṇ ahampūrvo yajato dhiṣṇyā yaḥ̣ ||
1.181.04a iheha jātā sam avāvaśītāṃ arepasā tanvā nāmabhiḥ̣ svaiḥ̣ |
1.181.04c jiṣṇuṛ vāṃ anyāḥ̣ sumakhasya sūr̄iṛ divo anyāḥ̣ subhagaḥ̣ putra ūhe ||
1.181.05a pra vāṃ niceruḥ̣ kakuho vaśāṃ anu piśaṅgarūpaḥ̣ sadanāni gamyāḥ̣ |
1.181.05c harī anyasya pīpayanta vājaiṛ mathrā rajāṃsy aśvinā vi ghoṣaiḥ̣ ||
1.181.06a pra vāṃ śaradvāṇ vṛṣabho na niṣṣāṭ pūrvīṛ iṣaś carati madhva iṣṇaṇ |
1.181.06c evaiṛ anyasya pīpayanta vājaiṛ veṣantīṛ ūrdhvā nadyo na āguḥ̣ ||
1.181.07a asarji vāṃ sthavirā vedhasā gīṛ bādhe aśvinā tredhā kṣarantī |
1.181.07c upastutāṿ avataṃ nādhamānaṃ yāmanṇ ayāmaṇ̃ chṛṇutaṃ havaṃ me ||
1.181.08a uta syā vāṃ ruśato vapsaso gīṣ tribarhiṣi sadasi pinvate nṛṇ̣ |
1.181.08c vṛṣā vāṃ megho vṛṣaṇā pīpāya gor na seke manuṣo daśasyaṇ ||
1.181.09a yuvāṃ pūṣevāśvinā puram̄dhiṛ agniṃ uṣāṃ na jarate haviṣmāṇ |
1.181.09c huve yad vāṃ varivasyā grṇāno vidyāmeṣaṃ vṛjanaṃ jīradānuṃ ||

1.182.01a abhūḍ idaṃ̣ vayunaṃ o ṣu bhūṣatā ratho vṛṣaṇvāṇ madatā manīṣiṇaḥ̣ |
1.182.01c dhiyam̄jinvā dhiṣṇyā viśpalāvasū divo napātā sukṛte śucivratā ||
1.182.02a indratamā hi dhiṣṇyā maruttamā dasrā damsiṣṭhā rathyā rathitamā |

1.182.02c pūrṇaṃ rathaṃ vahethe madhva ācitaṃ tena dāśvāmsam upa yātho aśvinā ||
 1.182.03a kim atra dasrā kṛṇuthaḥ kim āsāthe jano yaḥ kaś cid ahavir mahīyate |
 1.182.03c ati kramiṣṭaṃ juratam paṇer asuṃ jyotir viprāya kṛṇutaṃ vacasyave ||
 1.182.04a jambhayatam abhito rāyataḥ śuno hatam mṛdho vidathus tāny aśvinā |
 1.182.04c vācaṃ-vācaṃ jaritū ratninīm kṛtam ubhā śaṃsaṃ nāsatyāvataṃ mama ||
 1.182.05a yuvam etaṃ cakrathuḥ sindhuṣu plavam ātmanvantam pakṣiṇaṃ taugryāya kam |
 1.182.05c yena devatrā manasā nirūhathuḥ supaptanī petathuḥ kṣodaso mahaḥ ||
 1.182.06a avavidhṃ taugryam apsv antar anārambhaṇe tamasi pravidhṃ |
 1.182.06c catasro nāvo jaṭhalasya juṣṭā ud aśvibhyām iṣitāḥ pārayanti ||
 1.182.07a kaḥ svid vṛkṣo niṣṭhito madhye arṇaso yaṃ taugryo nādhitaḥ paryāśvasvajat |
 1.182.07c parṇā mṛgasya pataror ivārabha ud aśvinā ūhathuḥ śromatāya kam ||
 1.182.08a tad vāṃ narā nāsatyāv anu ṣyād yad vāṃ mānāsa ucatham avocan |
 1.182.08c asmād adya sadasaḥ somyād ā vidyāmeṣaṃ vṛjanaṃ jīradānum ||

1.183.01a taṃ yuñjāthām manaso yo javīyān trivandhuro vṛṣaṇā yas tricakraḥ |
 1.183.01c yenopayāthaḥ sukṛto duroṇaṃ tridhātunā patatho vir na parṇaiḥ ||
 1.183.02a suvṛd ratho vartate yann abhi kṣāṃ yat tiṣṭhathaḥ kratumantānu pṛkṣe |
 1.183.02c vapur vapuṣyā sacatām iyaṃ gīr divo duhitroṣasā sacethe ||
 1.183.03a ā tiṣṭhataṃ suvṛtaṃ yo ratho vām anu vratāni vartate haviṣmān |
 1.183.03c yena narā nāsatyēṣayadhyai vartir yāthas tanayāya tmane ca ||
 1.183.04a mā vāṃ vṛko mā vṛkīr ā dadharṣin mā pari varktam uta māti dhaktam |
 1.183.04c ayaṃ vām bhāgo nihita iyaṃ gīr dasrāv ime vāṃ nidhayo madhūnām ||
 1.183.05a yuvāṃ gotamaḥ purumīdho atrir dasrā havate 'vase haviṣmān |
 1.183.05c diśaṃ na diṣṭām ṛjūyeva yantā me havaṃ nāsatyopa yātam ||
 1.183.06a atāriṣma tamasas pāram asya prati vāṃ stomo aśvināv adhāyi |
 1.183.06c eha yātam pathibhir devayānair vidyāmeṣaṃ vṛjanaṃ jīradānum ||

1.184.01a tā vāṃ adya tāv aparaṃ huvemochantyām uṣasi vahnir ukthaiḥ |
 1.184.01c nāsatyā kuha cit santāv aryo divo napātā sudāstarāya ||
 1.184.02a asme ū ṣu vṛṣaṇā mādayethām ut pañimr hatam ūrmyā madantā |
 1.184.02c śrutam me achoktibhir matinām eṣṭā narā nicetārā ca karṇaiḥ ||
 1.184.03a śriye pūṣann iṣukṛteva devā nāsatyā vahatam sūryāyāḥ |
 1.184.03c vacyante vāṃ kakuhā apsu jātā yugā jūrṇeva varuṇasya bhūreḥ ||
 1.184.04a asme sā vām mādhvī rātir astu stomaṃ hinotam mānyasya kāroḥ |
 1.184.04c anu yad vāṃ śravyā sudānū suvīryāya carṣaṇayo madanti ||
 1.184.05a eṣa vāṃ stomo aśvināv akāri mānebhir maghavānā suvṛkti |
 1.184.05c yātam vartis tanayāya tmane cāgastye nāsatyā madantā ||
 1.184.06a atāriṣma tamasas pāram asya prati vāṃ stomo aśvināv adhāyi |
 1.184.06c eha yātam pathibhir devayānair vidyāmeṣaṃ vṛjanaṃ jīradānum ||

1.185.01a katarā pūrvā katarāparāyoḥ kathā jāte kavayaḥ ko vi veda |
 1.185.01c viśvaṃ tmanā bibhrto yad dha nāma vi vartete ahanī cakriyeva ||
 1.185.02a bhūriṃ dve acarantī carantam padvantaṃ garbham apadī dadhāte |
 1.185.02c nityaṃ na sūnum pitror upasthe dyāvā rakṣatam pṛthivī no abhvāt ||
 1.185.03a aneho dātram aditer anarvaṃ huve svarvad avadhaṃ namasvat |
 1.185.03c tad rodasī janayatam jaritre dyāvā rakṣatam pṛthivī no abhvāt ||

1.185.04a atapyamāne avasāvanti anu śyāma rodasī devaputre |
 1.185.04c ubhe devānām ubhayebhir ahnām dyāvā rakṣatam pṛthivī no abhvāt ||
 1.185.05a saṃgachamāne yuvatī samante svasārā jāmi pitror upasthe |
 1.185.05c abhijighranti bhuvanasya nābhiṃ dyāvā rakṣatam pṛthivī no abhvāt ||
 1.185.06a urvī sadmanī bṛhatī ṛtena huve devānām avasā janitrī |
 1.185.06c dadhāte ye amṛtaṃ supratike dyāvā rakṣatam pṛthivī no abhvāt ||
 1.185.07a urvī pṛthvī bahule dūreante upa bruve namasā yajñe asmin |
 1.185.07c dadhāte ye subhage supratūrti dyāvā rakṣatam pṛthivī no abhvāt ||
 1.185.08a devān vā yac cakṛmā kac cid āgaḥ sakhāyaṃ vā sadam ij jāspatiṃ vā |
 1.185.08c iyaṃ dhīr bhūyā avayānam eṣāṃ dyāvā rakṣatam pṛthivī no abhvāt ||
 1.185.09a ubhā śamsā naryā mām aviṣṭām ubhe mām ūtī avasā sacetām |
 1.185.09c bhūri cid ayaḥ sudāstarāyeṣā madanta iṣayema devāḥ ||
 1.185.10a ṛtaṃ dive tad avocam pṛthivyā abhiśrāvāya prathamam sumedhāḥ |
 1.185.10c pātām avadyād duritād abhike pitā mātā ca rakṣatām avobhiḥ ||
 1.185.11a idaṃ dyāvāpṛthivī satyam astu pitar mātā yad ihopabruve vām |
 1.185.11c bhūtaṃ devānām avame avobhir vidyāmeṣam vṛjanam jīradānum ||

1.186.01a ā na iḍābhir vidathe suśasti viśvānaraḥ savitā deva etu |
 1.186.01c api yathā yuvāno matsathā no viśvam jagad abhipitve manīṣā ||
 1.186.02a ā no viśva āskṛā gamantu devā mitro aryamā varuṇaḥ sajoṣāḥ |
 1.186.02c bhuvan yathā no viśve vṛdhāsaḥ karan suśāhā vithuram na śavaḥ ||
 1.186.03a preṣṭham vo atithiṃ grñiṣe 'gnim śastibhis turvaṇiḥ sajoṣāḥ |
 1.186.03c asad yathā no varuṇaḥ sukīrtir iṣaś ca parṣad arigūrtaḥ sūriḥ ||
 1.186.04a upa va eṣe namasā jigīṣoṣāsānaktā sudugheva dhenuḥ |
 1.186.04c samāne ahan vimimāno arkaṃ viṣurūpe payasi sasminn ūdhan ||
 1.186.05a uta no 'hir budhnyo mayas kaḥ śiśuṃ na pipyuṣiva veti sindhuḥ |
 1.186.05c yena napātam apāṃ junāma manojuvo vṛṣaṇo yaṃ vahanti ||
 1.186.06a uta na im tvaṣṭā gantv achā smat sūribhir abhipitve sajoṣāḥ |
 1.186.06c ā vṛtrahendraś carṣaṇiprās tuviṣṭamo narāṃ na iha gamyāḥ ||
 1.186.07a uta na im matayo 'śvayogāḥ śiśuṃ na gāvas taruṇam rihanti |
 1.186.07c tam im giro janayo na patniḥ surabhiṣṭamam narāṃ nasanta ||
 1.186.08a uta na im maruto vṛddhasenāḥ smad rodasī samanasaḥ sadantu |
 1.186.08c pṛṣadaśvāso 'vanayo na rathā riśādaso mitrayujo na devāḥ ||
 1.186.09a pra nu yad eṣām mahinā cikitre pra yuñjate prayujas te suvṛkti |
 1.186.09c adha yad eṣāṃ sudine na śarur viśvam eriṇam pruṣāyanta senāḥ ||
 1.186.10a pro aśvināv avase kṛṇudhvam pra pūṣaṇam svatavaso hi santi |
 1.186.10c adveṣo viṣṇur vāta ṛbhukṣā achā sumnāya vavṛtiya devān ||
 1.186.11a iyaṃ sā vo asme dīdhitir yajatrā apiprāṇī ca sadanī ca bhūyāḥ |
 1.186.11c ni yā deveṣu yatate vasūyur vidyāmeṣam vṛjanam jīradānum ||

1.187.01a pituṃ nu stoṣam maho dharmāṇam taviṣim |
 1.187.01c yasya trito vy ojasā vṛtraṃ viparvam ardayat ||
 1.187.02a svādo pito madho pito vayaṃ tvā vavṛmahe |
 1.187.02c asmākam avitā bhava ||
 1.187.03a upa naḥ pitav ā cara śivaḥ śivābhir ūtibhiḥ |
 1.187.03c mayobhur adviṣeṇyaḥ sakhā suśevo advayāḥ ||
 1.187.04a tava tye pito rasā rajāmsy anu viṣṭhitāḥ |

1.187.04c divi vātā iva śritāḥ ||
 1.187.05a tava tye pito dadatas tava svādiṣṭha te pito |
 1.187.05c pra svādmāno rasānām tuvigrīvā iverate ||
 1.187.06a tve pito mahānām devānām mano hitam |
 1.187.06c akāri cāru ketunā tavāhim avasāvadhīt ||
 1.187.07a yad ado pito ajaḡan vivasva parvatānām |
 1.187.07c atrā cin no madho pito 'ram bhakṣāya gamyāḥ ||
 1.187.08a yad apām oṣadhinām pariṃśam āriśāmahe |
 1.187.08c vātāpe pīva id bhava ||
 1.187.09a yat te soma gavāśiro yavāśiro bhajāmahe |
 1.187.09c vātāpe pīva id bhava ||
 1.187.10a karambha oṣadhe bhava pīvo vṛkka udārathiḥ |
 1.187.10c vātāpe pīva id bhava ||
 1.187.11a taṃ tvā vayam pito vacobhir gāvo na havyā suṣūdimā |
 1.187.11c devebhyas tvā sadhamādam asmabhyaṃ tvā sadhamādam ||

1.188.01a samiddho adya rājasi devo devaiḥ sahasrajit |
 1.188.01c dūto havyā kavir vaha ||
 1.188.02a tanūnapād ṛtaṃ yate madhvā yajñāḥ sam alyate |
 1.188.02c dadhat sahasriṇīr iṣaḥ ||
 1.188.03a ājuhvāno na īdyo devāṃ ā vakṣi yajñiyān |
 1.188.03c agne sahasrasā asi ||
 1.188.04a prācīnam barhir ojasā sahasravīram astrṇan |
 1.188.04c yatrādityā virājatha ||
 1.188.05a virāṭ samrād vibhviḥ prabhvir bahviś ca bhūyasīś ca yāḥ |
 1.188.05c duro ghṛtāny akṣaran ||
 1.188.06a surukme hi supeśasādhi śriyā virājataḥ |
 1.188.06c uśāsāv eha sīdatām ||
 1.188.07a prathamā hi suvācasā hotārā daivyā kavī |
 1.188.07c yajñam no yakṣatām imam ||
 1.188.08a bhāratīde sarasvati yā vaḥ sarvā upabruve |
 1.188.08c tā naś codayata śriye ||
 1.188.09a tvaṣṭā rūpāni hi prabhuh paśūn viśvān samānaje |
 1.188.09c teṣām na sphātīm ā yaja ||
 1.188.10a upa tmanyā vanaspate pātho devebhyaḥ sṛja |
 1.188.10c agnir havyanī siṣvadat ||
 1.188.11a purogā agnir devānām gāyatreṇa sam alyate |
 1.188.11c svāhākṛtiṣu rocate ||

1.189.01a agne naya supathā rāye asmān viśvāni deva vayunāni vidvān |
 1.189.01c yuyodhy asmaj juhuraṇam eno bhūyisṭhām te namaūktiṃ vidhema ||
 1.189.02a agne tvam pārayā navyo asmān svastibhir ati durgāni viśvā |
 1.189.02c pūś ca pṛthvī bahulā na urvī bhavā tokāya tanayāya śam yoḥ ||
 1.189.03a agne tvam asmad yuyodhy amivā anagnitrā abhy amanta kṛṣṭiḥ |
 1.189.03c punar asmabhyaṃ suvitāya deva kṣām viśvebhir amṛtebhir yajatra ||
 1.189.04a pāhi no agne pāyubhir ajasrair uta priye sadana ā śusūkvān |
 1.189.04c mā te bhayaṃ jaritāraṃ yaviṣṭha nūnam vidan māparaṃ sahasvaḥ ||

1.189.05a mā no agne 'va sṛjo aghāyāviṣyave ripave duchunāyai |
 1.189.05c mā datvate daśate mādāte no mā rīṣate sahasāvan parā dāḥ ||
 1.189.06a vi gha tvāvāṃ ṛtajāta yamsad gṛṇāno agne tanve varūtham |
 1.189.06c viśvād ririkṣor uta vā ninitṣor abhihṛutām asi hi deva viṣpaḥ ||
 1.189.07a tvam tāṃ agna ubhayān vi vidvān veṣi prapitve manuṣo yajatra |
 1.189.07c abhipitve manave śāsyo bhūr marmṛjenya uśigbhir nākraḥ ||
 1.189.08a avocāma nivacanāny asmin mānasya sūnuḥ sahasāne agnau |
 1.189.08c vyaṃ sahasram ṛṣibhiḥ sanema vidyāmeṣaṃ vṛjanam jīradānum ||

1.190.01a anarvāṇam vṛṣabham mandrajihvam bṛhaspatiṃ vardhayā navyam arkaiḥ |
 1.190.01c gāthānyaḥ suruco yasya devā āśṛṇvanti navamānasya martāḥ ||
 1.190.02a tam ṛtvīyā upa vācaḥ sacante sargo na yo devayatām asarji |
 1.190.02c bṛhaspatiḥ sa hy añjo varāṃsi vibhvābhavat sam ṛte mātariśvā ||
 1.190.03a upastutiṃ namasa udyatiṃ ca ślokaṃ yaṃsat saviteva pra bāhū |
 1.190.03c asya kratvāhanyo yo asti mṛgo na bhīmo arakṣasas tuviṣmān ||
 1.190.04a asya śloko diviyate pṛthivyām atyo na yaṃsad yakṣabhṛd vicetāḥ |
 1.190.04c mṛgāṇām na hetayo yanti cemā bṛhaspater ahimāyāṃ abhi dyūn ||
 1.190.05a ye tvā devosrikam manyamānāḥ pāpā bhadrām upajīvanti pajrāḥ |
 1.190.05c na dūḍhye anu dadāsi vāmam bṛhaspate cayasa it piyārum ||
 1.190.06a supraituḥ sūyavaso na panthā durniyantuḥ pariprito na mitraḥ |
 1.190.06c anarvāṇo abhi ye cakṣate no 'pivṛtā aporṇuvanto asthuḥ ||
 1.190.07a saṃ yaṃ stubho 'vanayo na yanti samudram na sravato rodhacakraḥ |
 1.190.07c sa vidvāṃ ubhayaṃ caṣṭe antar bṛhaspatis tara āpaś ca gṛdhraḥ ||
 1.190.08a evā mahas tuvijātas tuviṣmān bṛhaspatir vṛṣabho dhāyi devaḥ |
 1.190.08c sa na stuto vīravād dhātu gomad vidyāmeṣaṃ vṛjanam jīradānum ||

1.191.01a kaṅkato na kaṅkato 'tho satīnakaṅkataḥ |
 1.191.01c dvāv iti pluṣi iti ny adṛṣṭā alipsata ||
 1.191.02a adṛṣṭān hantya āyaty atho hanti parāyati |
 1.191.02c atho avaghnati hantya atho pinaṣṭi piṃṣati ||
 1.191.03a śarāsaḥ kuśarāso darbhāsaḥ sairyaḥ uta |
 1.191.03c mauñjā adṛṣṭā vairiṇāḥ sarve sākaṃ ny alipsata ||
 1.191.04a ni gāvo goṣṭhe asadan ni mṛgāso avikṣata |
 1.191.04c ni ketavo janānām ny adṛṣṭā alipsata ||
 1.191.05a eta u tye praty adṛśran pradoṣaṃ taskarā iva |
 1.191.05c adṛṣṭā viśvadṛṣṭāḥ pratibuddhā abhūtana ||
 1.191.06a dyaur vaḥ pitā pṛthivī mātā somo bhrātāditiḥ svasā |
 1.191.06c adṛṣṭā viśvadṛṣṭās tiṣṭhatelayatā su kam ||
 1.191.07a ye aṃsyā ye aṅgyāḥ sūcīkā ye prakāṅkatāḥ |
 1.191.07c adṛṣṭāḥ kiṃ caneha vaḥ sarve sākaṃ ni jasyata ||
 1.191.08a ut purastāt sūrya eti viśvadṛṣṭo adṛṣṭahā |
 1.191.08c adṛṣṭān sarvāñ jambhayan sarvāś ca yātudhānyaḥ ||
 1.191.09a ud apaptad asau sūryaḥ puru viśvāni jūrvan |
 1.191.09c ādityaḥ parvatebhyo viśvadṛṣṭo adṛṣṭahā ||
 1.191.10a sūrye viṣam ā sajāmi dṛtiṃ surāvato gṛhe |
 1.191.10c so cin nu na marāti no vyaṃ marāmāre asya
 1.191.10e yojanam hariṣṭhā madhu tvā madhulā cakāra ||

- 1.191.11a iyattikā śakuntikā sakā jaghāsa te viṣam |
1.191.11c so cin nu na marāti no vayam marāmāre asya
1.191.11e yojanaṃ hariṣṭhā madhu tvā madhulā cakāra ||
1.191.12a triḥ sapta viṣpuliṅgakā viṣasya puṣyam akṣan |
1.191.12c tāś cin nu na maranti no vayam marāmāre asya
1.191.12e yojanaṃ hariṣṭhā madhu tvā madhulā cakāra ||
1.191.13a navānāṃ navatīnāṃ viṣasya ropuṣiṇām |
1.191.13c sarvāsām agrabhaṃ nāmāre asya
1.191.13d yojanaṃ hariṣṭhā madhu tvā madhulā cakāra ||
1.191.14a triḥ sapta mayūryaḥ sapta svasāro agruvaḥ |
1.191.14c tās te viṣam vi jabhrira udakaṃ kumbhinīr iva ||
1.191.15a iyattakaḥ kuṣumbhakas takam bhinadmy aśmanā |
1.191.15c tato viṣam pra vāvṛte parācīr anu saṃvataḥ ||
1.191.16a kuṣumbhakas tad abravīd gireḥ pravartamānakaḥ |
1.191.16c vṛścikasyārasaṃ viṣam arasaṃ vṛścika te viṣam ||

2. Mandala

- 2.001.01a tvam agne dyubhis tvam āśuśukṣaṇis tvam adbhyas tvam aśmanas pari |
2.001.01c tvam vanebhyas tvam oṣadhībhyas tvam nṛṇām nṛpate jāyase śuciḥ ||
2.001.02a tavāgne hotraṃ tava potraṃ ṛtviyaṃ tava neṣṭraṃ tvam agnid ṛtāyataḥ |
2.001.01c tvam vanebhyas tvam oṣadhībhyas tvam nṛṇām nṛpate jāyase śuciḥ ||
2.001.02c tava praśāstraṃ tvam adhvariṃyasi brahmā cāsi gṛhapatīś ca no dame ||
2.001.03a tvam agna indro vṛṣabhaḥ satām asi tvam viṣṇur urugāyo namasyaḥ |
2.001.03c tvam brahmā rayivid brahmaṇas pate tvam vidhartaḥ sacase puraṃdhyā ||
2.001.04a tvam agne rājā varuṇo dhṛtavratas tvam mitro bhavasi dasma idyaḥ |
2.001.04c tvam aryamā satpatir yasya sambhujam tvam amśo vidathe deva bhājayuh ||
2.001.05a tvam agne tvaṣṭā vidhate suvīryam tava gnāvo mitramahaḥ sajātyam |
2.001.05c tvam āśuhemā rariṣe svaśvyam tvam narām śardho asi purūvasuh ||
2.001.06a tvam agne rudro asuro maho divas tvam śardho mārutam pṛkṣa īśiṣe |
2.001.06c tvam vātaṃ aruṇair yāsi śaṃgayas tvam pūṣā vidhataḥ pāsi nu tmanā ||
2.001.07a tvam agne draviṇodā aramḥṛte tvam devaḥ savitā ratnadhā asi |
2.001.07c tvam bhago nṛpate vasva īśiṣe tvam pāyur dame yas te 'vidhat ||
2.001.08a tvām agne dama ā viśpatiṃ viśas tvām rājānam suvidatram ṛñjate |
2.001.08c tvam viśvāni svanika patyase tvam sahasrāni śatā daśa prati ||
2.001.09a tvām agne pitaram iṣṭibhir naras tvām bhrātrāya śamyā tanūrucam |
2.001.09c tvam putro bhavasi yas te 'vidhat tvam sakhā suśevaḥ pāsy ādhṛṣaḥ ||
2.001.10a tvam agna ṛbhur āke namasyas tvam vājasya kṣumato rāya īśiṣe |
2.001.10c tvam vi bhāsy anu dakṣi dāvane tvam viśikṣur asi yajñam ātaniḥ ||
2.001.11a tvam agne aditir deva dāśuṣe tvam hotrā bhāratī vardhase girā |
2.001.11c tvam idā śatahimāsi dakṣase tvam vṛtrahā vasupate sarasvatī ||
2.001.12a tvam agne subhṛta uttamaṃ vayas tava spārhe varṇa ā saṃdṛśi śriyaḥ |
2.001.12c tvam vājaḥ prataraṇo bṛhann asi tvam rayir bahulo viśvatas pṛthuh ||
2.001.13a tvām agna ādityāsa āsyam tvām jihvām śucayaś cakrire kave |
2.001.13c tvām rātiṣāco adhvaraṣu saścire tve devā havir adanty āhutam ||
2.001.14a tve agne viśve amṛtāso adruha āsā devā havir adanty āhutam |
2.001.14c tvayā martāsaḥ svadanta āsutiṃ tvam garbho vīrudhām jajñiṣe śuciḥ ||
2.001.15a tvam tān sam ca prati cāsi majmanāgne sujāta pra ca deva ricyase |
2.001.15c pṛkṣo yad atra mahinā vi te bhuvad anu dyāvāpṛthivī rodasī ubhe ||
2.001.16a ye stotrḥbhyo goagrām aśvapeśasam agne rātim upasṛjanti sūrayaḥ |
2.001.16c asmān ca tāṃś ca pra hi neṣi vasya ā bṛhad vadema vidathe suvīrāḥ ||
- 2.002.01a yajñena vardhata jātavedasam agniṃ yajadhvam haviṣā tanā girā |
2.002.01c samidhānam suprayasaṃ svarṇaram dyukṣam hotāram vṛjaneṣu dhūrṣadam ||
2.002.02a abhi tvā naktīr uśaso vavāsire 'gne vatsam na svasareṣu dhenavaḥ |
2.002.02c diva ived aratir mānuṣā yugā kṣapo bhāsi puruvāra saṃyataḥ ||
2.002.03a tam devā budhne rajasaḥ sudamśasam divaspṛthivyor aratiṃ ny erire |
2.002.03c ratham iva vedyaṃ śukraśociṣam agniṃ mitram na kṣitiṣu praśamśyam ||
2.002.04a tam ukṣamānam rajasi sva ā dame candram iva surucam hvāra ā dadhuḥ |
2.002.04c pṛśnyāḥ pataram citayantam akṣabhiḥ pātho na pāyum janasī ubhe anu ||
2.002.05a sa hotā viśvam pari bhūtv adhvaram tam u havyair manuṣa ṛñjate girā |
2.002.05c hiriṣipro vṛdhasānāsu jarbhurad dyaur na stṛbhiś citayad rodasī anu ||

2.002.06a sa no revat samidhānaḥ svastaye saṃdadasvān rayim asmāsu dīdhi |
 2.002.06c ā naḥ kṛṇuṣva suvitāya rodasī agne havyā manuṣo deva vītaye ||
 2.002.07a dā no agne bṛhato dāḥ sahasriṇo duro na vājaṃ śrutya apā vṛdhi |
 2.002.07c prācī dyāvāpṛthivī brahmaṇā kṛdhi svar ṇa śukram uṣaso vi didyutaḥ ||
 2.002.08a sa idhāna uṣaso rāmyā anu svar ṇa dīded aruṣeṇa bhānunā |
 2.002.08c hotrābhir agnir manuṣaḥ svadhvaro rājā viśām atithīś cārur āyave ||
 2.002.09a evā no agne amṛteṣu pūrva dhīṣ pīpāya bṛhaddiveṣu mānuṣā |
 2.002.09c duhānā dhenur vṛjaneṣu kārave tmanā śatinam pururūpam iṣaṇi ||
 2.002.10a vayam agne arvatā vā suvīryam brahmaṇā vā citayemā janāṃ ati |
 2.002.10c asmākaṃ dyumnā adhi pañca kṛṣṭiṣūccā svar ṇa śusūcīta duṣṭaram ||
 2.002.11a sa no bodhi sahasya praśamsyo yasmin sujātā iṣayanta sūrayaḥ |
 2.002.11c yam agne yajñam upayanti vājino nitye toke dīdivāmsaṃ sve dame ||
 2.002.12a ubhayāso jātavedaḥ syāma te stotāro agne sūrayaś ca śarmaṇi |
 2.002.12c vasvo rāyaḥ puruścandrasya bhūyasaḥ prajāvataḥ svapatyasya śagdhi naḥ ||
 2.002.13a ye stotṛbhyo goagrām āsvapeśasam agne rātim upasṛjanti sūrayaḥ |
 2.002.13c asmāñ ca tāṃś ca pra hi neṣi vasya ā bṛhad vadema vidathe suvīrāḥ ||

2.003.01a samiddho agnir nihitaḥ pṛthivyām pratyañ viśvāni bhuvanāny asthāt |
 2.003.01c hotā pāvakaḥ pradivaḥ sumedhā devo devān yajatv agnir arhan ||
 2.003.02a narāśamsaḥ prati dhāmāny añjan tisro divaḥ prati mahnā svarciḥ |
 2.003.02c ghṛtapruṣā manasā havyam undan mūrdhan yajñasya sam anaktu devān ||
 2.003.03a idīto agne manasā no arhan devān yakṣi mānuṣāt pūrvo adya |
 2.003.03c sa ā vaha marutāṃ śardho acyutam indraṃ naro barhiśadaṃ yajadhvam ||
 2.003.04a deva barhir vardhamānaṃ suvīraṃ stīraṃ rāye subharaṃ vedy asyām |
 2.003.04c ghṛtenāktam vasavaḥ sīdatedaṃ viśve devā ādityā yajñiyāsaḥ ||
 2.003.05a vi śrayantām urviyā hūyamānā dvāro devīḥ suprāyaṇā namobhiḥ |
 2.003.05c vyacasvatīr vi prathantām ajuryā varṇam punānā yaśasaṃ suvīram ||
 2.003.06a sādhv apāmsi sanatā na ukṣite uṣāsānaktā vayyeva raṇvite |
 2.003.06c tantuṃ tataṃ saṃvayantī samīcī yajñasya peśaḥ sudughe payasvatī ||
 2.003.07a daivyā hotārā prathamā viduṣṭara ṛju yakṣataḥ sam ṛcā vapuṣṭarā |
 2.003.07c devān yajantāv ṛtuthā sam añjato nābhā pṛthivyā adhi sānuṣu triṣu ||
 2.003.08a sarasvatī sādhyantī dhiyaṃ na idā devī bhāratī viśvatūrīḥ |
 2.003.08c tisro devīḥ svadhayā barhir edam achidram pāntu śaraṇaṃ niṣadya ||
 2.003.09a piśaṅgarūpaḥ subharo vayodhāḥ śruṣṭi vīro jāyate devakāmaḥ |
 2.003.09c prajāṃ tvaṣṭā vi śyatu nābhim asme athā devānām apy etu pāthaḥ ||
 2.003.10a vanaspatir avasṛjann upa sthād agnir haviḥ sūdayāti pra dhībhiḥ |
 2.003.10c tridhā samaktaṃ nayatu prajānan devebhyo daivyaḥ śamitopa havyam ||
 2.003.11a ghṛtam mimikṣe ghṛtam asya yonir ghṛte śrito ghṛtam v asya dhāma |
 2.003.11c anuṣvadhā ā vaha mādayasva svāhākṛtam vṛṣabha vakṣi havyam ||

2.004.01a huve vaḥ sudyotmānaṃ suvṛkṭim viśām agnim atithim suprayasam |
 2.004.01c mitra iva yo didhiṣāyyo bhūd deva ādeve jane jātavedāḥ ||
 2.004.02a imaṃ vidhanto apāṃ sadhasthe dvitādadhur bhṛgavo vikṣv āyoḥ |
 2.004.02c eṣa viśvāny abhy astu bhūmā devānām agnir aratir jīrāśvaḥ ||
 2.004.03a agnim devāso mānuṣīṣu vikṣu priyaṃ dhuḥ kṣeṣyanto na mitram |
 2.004.03c sa dīdayad uśatīr ūrmyā ā dakṣāyyo yo dāsvate dama ā ||
 2.004.04a asya raṇvā svasyeva puṣṭiḥ saṃdṛṣṭir asya hiyānasya dakṣoḥ |

2.004.04c vi yo bharibhrad oṣadhīṣu jihvām atyo na rathyo dodhavīti vārān ||
 2.004.05a ā yan me abhvaṃ vanadaḥ panantośigbhyo nāmimīta varṇam |
 2.004.05c sa citreṇa cikite raṃsu bhāsā jujurvāṃ yo muhur ā yuvā bhūt ||
 2.004.06a ā yo vanā tātrṣāṇo na bhāti vār ṇa pathā rathyeva svānīt |
 2.004.06c kṛṣṇādhvā tapū raṇvaś ciketa dyaur iva smayamāno nabhobhiḥ ||
 2.004.07a sa yo vy asthād abhi dakṣad urvīm paśur naiti svayur agopāḥ |
 2.004.07c agniḥ śociṣmāṃ atasāny uṣṇan kṛṣṇavyathir asvadayan na bhūma ||
 2.004.08a nū te pūrvasyāvaso adhītau tṛtiye vidathe manma śaṃsi |
 2.004.08c asme agne saṃyadvīram bṛhantaṃ kṣumantaṃ vājaṃ svapatyaṃ rayiṃ dāḥ ||
 2.004.09a tvayā yathā gṛtsamadāso agne guhā vanvanta uparāṃ abhi ṣyuh |
 2.004.09c suvīrāso abhimātiṣāhaḥ smat sūribhyo gṛṇate tad vayo dhāḥ ||

2.005.01a hotājaniṣṭa cetanaḥ pitā pitṛbhya ūtaye |
 2.005.01c prayakṣāñ janyaṃ vasu śakema vājino yamam ||
 2.005.02a ā yasmin sapta raśmayas tatā yajñasya netari |
 2.005.02c manuṣvad daivyam aṣṭamam potā viśvaṃ tad invati ||
 2.005.03a dadhanve vā yad im anu vocad brahmāṇi ver u tat |
 2.005.03c pari viśvāni kāvyā nemiś cakram ivābhavat ||
 2.005.04a sākam hi śucinā śuciḥ praśāstā kratunājani |
 2.005.04c vidvāṃ asya vratā dhruvā vayā ivānu rohate ||
 2.005.05a tā asya varṇam āyuvo neṣṭuh sacanta dhenavaḥ |
 2.005.05c kuvit tisṛbhya ā varam svasāro yā idam yayuh ||
 2.005.06a yadi mātur upa svasā ghṛtam bharanty asthita |
 2.005.06c tāsām adhvaryur āgatau yavo vṛṣṭiva modate ||
 2.005.07a svaḥ svāya dhāyase kṛṇutām ṛtvig ṛtvijam |
 2.005.07c stomam yajñam cād aram vanemā rarimā vayam ||
 2.005.08a yathā vidvāṃ aram karad viśvebhyo yajatebhyaḥ |
 2.005.08c ayam agne tve api yam yajñam cakṛmā vayam ||

2.006.01a imām me agne samidham imām upasadam vaneḥ |
 2.006.01c imā u ṣu śrudhī giraḥ ||
 2.006.02a ayā te agne vidhemorjo napād aśvamiṣṭe |
 2.006.02c enā sūktena sujāta ||
 2.006.03a tam tvā gīrbhir girvaṇasaṃ draviṇasyuṃ draviṇodaḥ |
 2.006.03c saparyema saparyavaḥ ||
 2.006.04a sa bodhi sūrīr maghavā vasupate vasudāvan |
 2.006.04c yuyodhy asmad dveṣāmsi ||
 2.006.05a sa no vṛṣṭiṃ divas pari sa no vājam anarvāṇam |
 2.006.05c sa naḥ sahasriṇīr iṣaḥ ||
 2.006.06a idānāyāvasyave yaviṣṭha dūta no girā |
 2.006.06c yajīṣṭha hotar ā gahi ||
 2.006.07a antar hy agna iyase vidvāñ janmobhayā kave |
 2.006.07c dūto janyeva mitryaḥ ||
 2.006.08a sa vidvāṃ ā ca piprayo yakṣi cikitva ānuṣak |
 2.006.08c ā cāsmin satsi barhiṣi ||

2.007.01a śreṣṭhaṃ yaviṣṭha bhāratāgne dyumantam ā bhara |
2.007.01c vaso puruspṛhaṃ rayim ||
2.007.02a mā no arātir īsata devasya martyasya ca |
2.007.02c parṣi tasyā uta dviṣaḥ ||
2.007.03a viśvā uta tvayā vyaṃ dhārā udanyā iva |
2.007.03c ati gāhemahi dviṣaḥ ||
2.007.04a śuciḥ pāvaka vandyo 'gne bṛhad vi rocase |
2.007.04c tvam ghr̥tebhir āhutaḥ ||
2.007.05a tvam no asi bhāratāgne vaśābhir ukṣabhiḥ |
2.007.05c aṣṭāpadībhir āhutaḥ ||
2.007.06a drvannaḥ sarpirāsutiḥ pratno hotā vareṇyaḥ |
2.007.06c sahasas putro adbhutaḥ ||

2.008.01a vājayann iva nū rathān yogāṃ agner upa stuhi |
2.008.01c yaśastamasya mīdhuṣaḥ ||
2.008.02a yaḥ sunītho dadāśuṣe 'juryo jarayann arim |
2.008.02c cārupratīka āhutaḥ ||
2.008.03a ya u śriyā dameṣv ā doṣoṣasi praśasyate |
2.008.03c yasya vratam na mīyate ||
2.008.04a ā yaḥ svar ṇa bhānunā citro vibhāty arciṣā |
2.008.04c añjāno ajarair abhi ||
2.008.05a atrim anu svarājyam agnim ukthāni vāvṛdhuḥ |
2.008.05c viśvā adhi śriyo dadhe ||
2.008.06a agner indrasya somasya devānām ūtibhir vyaṃ |
2.008.06c ariṣyantaḥ sacemahy abhi ṣyāma pṛtanyataḥ ||

2.009.01a ni hotā hotṛṣadane vidānas tveṣo dīdivāṃ asadat sudakṣaḥ |
2.009.01c adabdhavratapramatir vasiṣṭhaḥ sahasrambharaḥ śucijihvo agniḥ ||
2.009.02a tvam dūtas tvam u naḥ paraspās tvam vasya ā vṛṣabha praṇetā |
2.009.02c agne tokasya nas tane tanūnām aprayuchan dīdyad bodhi gopāḥ ||
2.009.03a vidhema te parame janmann agne vidhema stomair avare sadhasthe |
2.009.03c yasmād yoner udārithā yaje tam pra tve havīmṣi juhure samiddhe ||
2.009.04a agne yajasva haviṣā yajiyāñ chruṣṭi deṣṇam abhi gṛñiḥi rādhaḥ |
2.009.04c tvam hy asi rayipatī rayiṇām tvam śukrasya vacaso manotā ||
2.009.05a ubhayaṃ te na kṣiyate vasavyaṃ dive-dive jāyamānasya dasma |
2.009.05c kṛdhi kṣumantaṃ jaritāram agne kṛdhi patim svapatyasya rāyaḥ ||
2.009.06a sainānikena suvidatro asme yaṣṭā devāṃ āyajiṣṭhaḥ svasti |
2.009.06c adabdho gopā uta naḥ paraspā agne dyumad uta revad didiḥi ||

2.010.01a johūtro agniḥ prathamāḥ pitevedas pade manuṣā yat samiddhaḥ |
2.010.01c śriyaṃ vasāno amṛto vicetā marmṛjenyaḥ śravasyaḥ sa vājī ||
2.010.02a śrūyā agniś citrabhānur havam me viśvābhir gīrbhir amṛto vicetāḥ |
2.010.02c śyāvā rathaṃ vahato rohitā votāruṣāha cakre vibhṛtraḥ ||
2.010.03a uttānāyām ajanayan suṣūtam bhuvad agniḥ purupeśāsu garbhaḥ |
2.010.03c śiriṇāyām cid aktunā mahobhir aparivṛto vasati pracetāḥ ||
2.010.04a jigharmy agnim haviṣā ghr̥tena pratikṣiyantam bhuvanāni viśvā |

2.010.04c pṛthum tiraścā vayasā bṛhantam vyaciṣṭham annai rabhasam dṛṣānam ||
 2.010.05a ā viśvataḥ pratyañcam jigharmy arakṣasā manasā taj juṣeta |
 2.010.05c maryaśrī spr̥hayadvarṇo agnir nābhimṛṣe tanvā jarbhurāṇaḥ ||
 2.010.06a jñeyā bhāgam sahasāno vareṇa tvādūtāso manuvad vadema |
 2.010.06c anūnam agniṃ juhvā vacasyā madhupṛcam dhanasā johavīmi ||

2.011.01a śrudhī havam indra mā riṣaṇyaḥ syāma te dāvane vasūnām |
 2.011.01c imā hi tvām ūrjo vardhayanti vasūyavaḥ sindhavo na kṣarantaḥ ||
 2.011.02a sṛjo mahīr indra yā apinvaḥ pariṣṭhitā ahinā śūra pūrvīḥ |
 2.011.02c amartyam cid dāsam manyamānam avābhinad ukthair vāvṛdhānaḥ ||
 2.011.03a uktheṣv in nu śūra yeṣu cākan stomeṣv indra rudriyeṣu ca |
 2.011.03c tubhyed etā yāsu mandasānaḥ pra vāyave sisrate na śubhrāḥ ||
 2.011.04a śubhram nu te śuṣmam vardhayantaḥ śubhram vajram bāhvor dadhānāḥ |
 2.011.04c śubhras tvam indra vāvṛdhāno asme dāsīr viśaḥ sūryeṇa sahyāḥ ||
 2.011.05a guhā hitam guhyam gūḍham apsv apivṛtam māyinaṃ kṣiyantam |
 2.011.05c uto apo dyām tastabhvāmsam ahann ahiṃ śūra vīryeṇa ||
 2.011.06a stavā nu ta indra pūrvyā mahāny uta stavāma nūtanā kṛtāni |
 2.011.06c stavā vajram bāhvor uśantaṃ stavā harī sūryasya ketū ||
 2.011.07a harī nu ta indra vājayantā ghṛtaścutam svāram asvārṣṭām |
 2.011.07c vi samanā bhūmir aprathiṣṭāramsta parvataś cit sariṣyan ||
 2.011.08a ni parvataḥ sādya aprayuchan sam mātr̥bhir vāvasāno akrān |
 2.011.08c dūre pāre vāṇim vardhayanta indreṣitām dhamanim paprathan ni ||
 2.011.09a indro mahām sindhum āśayānam māyāvinam vṛtram asphuran niḥ |
 2.011.09c arejetām rodasī bhiyāne kanikradato vṛṣṇo asya vajrāt ||
 2.011.10a aroravid vṛṣṇo asya vajro 'mānuṣam yan mānuṣo nijūrvāt |
 2.011.10c ni māyino dānavasya māyā apādayat papivān sutasya ||
 2.011.11a pibā-pibed indra śūra somam mandantu tvā mandinaḥ sutāsaḥ |
 2.011.11c pṛṇantas te kukṣī vardhayantv itthā sutaḥ paura indram āva ||
 2.011.12a tve indrāpy abhūma viprā dhiyam vanema ṛtayā sapantaḥ |
 2.011.12c avasyavo dhīmahi praśastiṃ sadyas te rāyo dāvane syāma ||
 2.011.13a syāma te ta indra ye ta ūtī avasyava ūrjam vardhayantaḥ |
 2.011.13c śuṣmintamaṃ yaṃ cākanāma devāsme rayiṃ rāsi vīravantam ||
 2.011.14a rāsi kṣayam rāsi mitram asme rāsi śardha indra mārutaṃ naḥ |
 2.011.14c sajoṣaso ye ca mandasānāḥ pra vāyavaḥ pānty agrāṇitim ||
 2.011.15a vyantv in nu yeṣu mandasānas tṛpat somam pāhi drahyad indra |
 2.011.15c asmān su pṛtsv ā tarutrāvardhayo dyām bṛhadbhir arkaiḥ ||
 2.011.16a bṛhanta in nu ye te tarutrokthebhir vā sumnam āvivāsān |
 2.011.16c str̥ṇānāso barhiḥ pastyāvāt tvotā id indra vājam agman ||
 2.011.17a ugreṣv in nu śūra mandasānas trikadrūkeṣu pāhi somam indra |
 2.011.17c pradodhuvac chmaśruṣu pṛiṇāno yāhi haribhyām sutasya pītim ||
 2.011.18a dhiṣvā śavaḥ śūra yena vṛtram avābhinad dānum aurnāvābham |
 2.011.18c apāvṛṇor jyotir āryāya ni savyataḥ sādi dasyur indra ||
 2.011.19a sanema ye ta ūtibhis taranto viśvā spr̥dha āryeṇa dasyūn |
 2.011.19c asmabhyam tat tvāṣṭram viśvarūpam arandhayaḥ sākhyasya tritāya ||
 2.011.20a asya suvānasya mandinas tritasya ny arbudaṃ vāvṛdhāno astaḥ |
 2.011.20c avartayat sūryo na cakram bhinad valam indro aṅgirasvān ||
 2.011.21a nūnam sā te prati varam jaritre duhīyad indra dakṣiṇā maghonī |
 2.011.21c śikṣā stotr̥bhyo māti dhag bhago no bṛhad vadema vidathe suvirāḥ ||

2.012.01a yo jāta eva prathamo manasvān devo devān kratunā paryabhūṣat |
 2.012.01c yasya śuṣmād rodasī abhyasetām nṛmṇasya mahnā sa janāsa indraḥ ||
 2.012.02a yaḥ pṛthivīm vyathamānām adṛmhad yaḥ parvatān prakupitām aramṇāt |
 2.012.02c yo antarikṣam vimame variyo yo dyām astabhnāt sa janāsa indraḥ ||
 2.012.03a yo hatvāhim ariṇāt sapta sindhūn yo gā udājad apadhā valasya |
 2.012.03c yo aśmanor antar agniṃ jajāna samvṛk samatsu sa janāsa indraḥ ||
 2.012.04a yenemā viśvā cyavanā kṛtāni yo dāsam varṇam adharam guhākaḥ |
 2.012.04c śvaghnīva yo jigivām lakṣam ādad ayaḥ puṣṭāni sa janāsa indraḥ ||
 2.012.05a yaṃ smā pṛchanti kuha seti ghoram utem āhur naiṣo astīty enam |
 2.012.05c so ayaḥ puṣṭir vija ivā mināti śrad asmai dhatta sa janāsa indraḥ ||
 2.012.06a yo radhrasya coditā yaḥ kṛśasya yo brahmaṇo nādhamānasya kīreḥ |
 2.012.06c yuktagrāvṇo yo 'vitā suśiprah sutasomasya sa janāsa indraḥ ||
 2.012.07a yasyāśvāsaḥ pradiśi yasya gāvo yasya grāmā yasya viśve rathāsaḥ |
 2.012.07c yaḥ sūryam ya uśasaṃ jajāna yo apām netā sa janāsa indraḥ ||
 2.012.08a yaṃ krandasī samyati vihveyete pare 'vara ubhayā amitrah |
 2.012.08c samānam cid ratham ātasthivāmsā nānā havete sa janāsa indraḥ ||
 2.012.09a yasmān na ṛte vijayante janāso yaṃ yudhyamānā avase havante |
 2.012.09c yo viśvasya pratimānam babhūva yo acyutacyut sa janāsa indraḥ ||
 2.012.10a yaḥ śāsvato mahy eno dadhānān amanyamānāñ charvā jaghāna |
 2.012.10c yaḥ śardhate nānudadāti śṛdhyām yo dasyor hantā sa janāsa indraḥ ||
 2.012.11a yaḥ śambaram parvateṣu kṣiyantam catvāriṃśyām śarady anvavindat |
 2.012.11c ojāyamānam yo ahiṃ jaghāna dānum śayānam sa janāsa indraḥ ||
 2.012.12a yaḥ saptaraśmir vṛṣabhas tuviṣmān avāsṛjat sartave sapta sindhūn |
 2.012.12c yo rauhiṇam asphurad vajrabāhur dyām ārohantam sa janāsa indraḥ ||
 2.012.13a dyāvā cid asmai pṛthivī namete śuṣmāc cid asya parvatā bhayante |
 2.012.13c yaḥ somapā nicito vajrabāhur yo vajrahastaḥ sa janāsa indraḥ ||
 2.012.14a yaḥ sunvantam avati yaḥ pacantam yaḥ śamsantam yaḥ śāśamānam ūtī |
 2.012.14c yasya brahma vardhanam yasya somo yasyedaṃ rādhaḥ sa janāsa indraḥ ||
 2.012.15a yaḥ sunvate pacate dudhra ā cid vājam dardarṣi sa kilāsi satyaḥ |
 2.012.15c vayam ta indra viśvaha priyāsaḥ suvīrāso vidatham ā vadema ||

2.013.01a ṛtur janitrī tasyā apas pari makṣū jāta āviśad yāsu vardhate |
 2.013.01c tad āhanā abhavat pipyuṣi payo 'mśoḥ piyūṣam prathamam tad ukthyam ||
 2.013.02a sadhrim ā yanti pari bibhratīḥ payo viśvapsnyāya pra bharanta bhojanam |
 2.013.02c samāno adhvā pravatām anuṣyade yas tākṛṇoḥ prathamam sāsya ukthyaḥ ||
 2.013.03a anv eko vadati yad dadāti tad rūpā minan tadapā eka iyate |
 2.013.03c viśvā ekasya vinudas titikṣate yas tākṛṇoḥ prathamam sāsya ukthyaḥ ||
 2.013.04a prajābhyaḥ puṣṭim vibhajanta āsate rayim iva pṛṣṭham prabhavantam āyate |
 2.013.04c asinvan daṃṣṭraiḥ pitur atti bhojanam yas tākṛṇoḥ prathamam sāsya ukthyaḥ ||
 2.013.05a adhākṛṇoḥ pṛthivīm samḍṛṣe dive yo dhautinām ahihann āriṇak pathaḥ |
 2.013.05c tam tvā stomebhir udabhir na vājinam devam devā ajanan sāsya ukthyaḥ ||
 2.013.06a yo bhojanam ca dayase ca vardhanam ādrād ā śuṣkam madhumad dudohitha |
 2.013.06c sa śevadhīm ni dadhiṣe vivasvati viśvasyaika īṣiṣe sāsya ukthyaḥ ||
 2.013.07a yaḥ puṣpiṇiś ca prasvaś ca dharmanādhi dāne vy avanir adhārayaḥ |
 2.013.07c yaś cāsamā ajano didyuto diva urur ūrvām abhitaḥ sāsya ukthyaḥ ||
 2.013.08a yo nārmaram sahasasum nihantave pṛkṣāya ca dāsavesāya cāvahaḥ |

2.013.08c ūrjayantyā apariviṣṭam āsyam utaivādya purukṛt sāsya ukthyaḥ ||
 2.013.09a śatam vā yasya daśa sākam ādya ekasya śruṣṭau yad dha codam āvitha |
 2.013.09c arajjau dasyūn sam unab dabhītaye suprāvyo abhavaḥ sāsya ukthyaḥ ||
 2.013.10a viśved anu rodhanā asya paumsyaṃ dadur asmai dadhire kṛtnave dhanam |
 2.013.10c ṣaḍ astabhñā viṣṭiraḥ pañca samdrśaḥ pari paro abhavaḥ sāsya ukthyaḥ ||
 2.013.11a supravācanam tava vīra vīryam yad ekena kratunā vindase vasu |
 2.013.11c jātūṣṭhirasya pra vayaḥ sahasvato yā cakārtha sendra viśvāsya ukthyaḥ ||
 2.013.12a aramayaḥ sarapasas tarāya kaṃ turvītaye ca vayyāya ca srutim |
 2.013.12c nīcā santam ud anayaḥ parāvṛjam prāndham śroṇam śravayan sāsya ukthyaḥ ||
 2.013.13a asmabhyam tad vaso dānāya rādhaḥ sam arthayasva bahu te vasavyam |
 2.013.13c indra yac citram śravasyā anu dyūn bṛhad vadema vidathe suvīrāḥ ||

2.014.01a adhvaryavo bharatendrāya somam āmatrebhiḥ siñcatā madyam andhaḥ |
 2.014.01c kāmī hi vīraḥ sadam asya pītim juhota vṛṣṇe tad id eṣa vaṣṭi ||
 2.014.02a adhvaryavo yo apo vavrivāmsam vṛtram jaghānāśanyeva vṛkṣam |
 2.014.02c tasmā etam bhārata tadvaśāyaṃ eṣa indro arhati pītim asya ||
 2.014.03a adhvaryavo yo dṛbhīkam jaghāna yo gā udājad apa hi valam vaḥ |
 2.014.03c tasmā etam antarikṣe na vātam indram somair orṇuta jūr na vastraiḥ ||
 2.014.04a adhvaryavo ya uraṇam jaghāna nava cakhvāmsam navatiṃ ca bāhūn |
 2.014.04c yo arbudam ava nīcā babādhe tam indram somasya bhṛthe hinota ||
 2.014.05a adhvaryavo yaḥ sv aśnam jaghāna yaḥ śuṣṇam aśuṣam yo vyamsam |
 2.014.05c yaḥ piprum namuciṃ yo rudhikrām tasmā indrāyāndhaso juhota ||
 2.014.06a adhvaryavo yaḥ śatam śambarasya puro bibhedāśmaneva pūrvīḥ |
 2.014.06c yo varcinaḥ śatam indraḥ sahasram apāvapad bhārata somam asmai ||
 2.014.07a adhvaryavo yaḥ śatam ā sahasram bhūmyā upasthe 'vapaj jaghanvān |
 2.014.07c kutsasyāyor atithigvasya vīrān ny āvṛṇag bhārata somam asmai ||
 2.014.08a adhvaryavo yan naraḥ kāmayādhve śruṣṭi vahanto naśathā tad indre |
 2.014.08c gabhastipūtam bhārata śrutāyendrāya somam yajyavo juhota ||
 2.014.09a adhvaryavaḥ kartanā śruṣṭim asmai vane nipūtam vana un nayadhvam |
 2.014.09c juṣāṇo hastyam abhi vāvaśe va indrāya somam madiram juhota ||
 2.014.10a adhvaryavaḥ payasodhar yathā goḥ somebhir im pṛṇatā bhojam indram |
 2.014.10c vedāham asya nibhṛtam ma etad ditsantam bhūyo yajataś ciketa ||
 2.014.11a adhvaryavo yo divyasya vasvo yaḥ pārthivasya kṣamyasya rājā |
 2.014.11c tam ūrdaram na pṛṇatā yavenendram somebhis tad apo vo astu ||
 2.014.12a asmabhyam tad vaso dānāya rādhaḥ sam arthayasva bahu te vasavyam |
 2.014.12c indra yac citram śravasyā anu dyūn bṛhad vadema vidathe suvīrāḥ ||

2.015.01a pra ghā nv asya mahato mahāni satyā satyasya karaṇāni vocam |
 2.015.01c trikadrakeṣv apibat sutasyāsyā made ahim indro jaghāna ||
 2.015.02a avamśe dyām astabhāyad bṛhantam ā rodasī aprṇad antarikṣam |
 2.015.02c sa dhārayat pṛthivīm paprathac ca somasya tā mada indraś cakāra ||
 2.015.03a sadmeva prāco vi mimāya mānair vajreṇa khāny atrṇan nadinām |
 2.015.03c vṛthāsṛjat pathibhir dirghayāthaiḥ somasya tā mada indraś cakāra ||
 2.015.04a sa pravodhṛn parigatyā dabhīter viśvam adhāg āyudham iddhe agnau |
 2.015.04c sam gobhir aśvair aśṛjad rathebhiḥ somasya tā mada indraś cakāra ||
 2.015.05a sa im mahīm dhunim etor aramṇāt so asnātṛn apārayat svasti |
 2.015.05c ta utsnāya rayim abhi pra tasthuḥ somasya tā mada indraś cakāra ||

2.015.06a sodañcaṃ sindhum ariṇān mahitvā vajreṇāna uṣasaḥ sam pipeṣa |
 2.015.06c ajavaṣo javinībhīr vivṛṣcaṇ somasya tā mada indraś cakāra ||
 2.015.07a sa vidvāṃ apagoḥaṃ kaṇinām āvir bhavann ud atiṣṭhat parāvṛk |
 2.015.07c prati śroṇa sthād vy anag acaṣṭa somasya tā mada indraś cakāra ||
 2.015.08a bhīnad valam aṅgirobhir gṛṇāno vi parvatasya dṛṃhitāny airat |
 2.015.08c riṇag rodhāmsi kṛtrimāṇy eṣāṃ somasya tā mada indraś cakāra ||
 2.015.09a svapnenābhyupyā cumuriṃ dhuniṃ ca jaghantha dasyum pra dabhītim āvaḥ |
 2.015.09c rambhī cid atra vivide hiraṇyaṃ somasya tā mada indraś cakāra ||
 2.015.10a nūnaṃ sā te prati varam jaritre duhīyad indra dakṣiṇā maghonī |
 2.015.10c śikṣā stotṛbhyo māti dhag bhago no bṛhad vadema vidathe suvīrāḥ ||

2.016.01a pra vaḥ satāṃ jyeṣṭhatamāya suṣṭutim agnāv iva samidhāne havir bhare |
 2.016.01c indram ajuryaṃ jarayantam ukṣitam sanād yuvānam avase havāmahe ||
 2.016.02a yasmād indrād bṛhataḥ kiṃ canem ṛte viśvāny asmin sambhṛtādhi vīryā |
 2.016.02c jaṭhare somaṃ tanvī saho maho haste vajram bharati śīrṣaṇi kratum ||
 2.016.03a na kṣoṇibhyām paribhve ta indriyaṃ na samudraiḥ parvatāir indra te rathaḥ |
 2.016.03c na te vajram anv aśnoti kaś cana yad āsubhiḥ patasi yojanā puru ||
 2.016.04a viśve hy asmai yajatāya dhr̥ṣṇave kratum bharanti vṛṣabhāya saścate |
 2.016.04c vṛṣā yajasva haviṣā viduṣṭaraḥ pibendra somaṃ vṛṣabheṇa bhānunā ||
 2.016.05a vṛṣṇaḥ kośaḥ pavate madhva ūrmir vṛṣabhānnāya vṛṣabhāya pātave |
 2.016.05c vṛṣaṇādhvaryū vṛṣabhāso adrayo vṛṣaṇaṃ somaṃ vṛṣabhāya suṣvati ||
 2.016.06a vṛṣā te vajra uta te vṛṣā ratho vṛṣaṇā harī vṛṣabhāṇy āyudhā |
 2.016.06c vṛṣṇo madasya vṛṣabha tvam īśiṣa indra somasya vṛṣabhasya tṛpṇuhi ||
 2.016.07a pra te nāvaṃ na samane vacasyuvam brahmaṇā yāmi savaneṣu dādhr̥ṣiḥ |
 2.016.07c kuvin no asya vacaso nibodhiṣad indram utsaṃ na vasunaḥ sicāmahe ||
 2.016.08a purā sambādhdād abhy ā vavṛtsva no dhenur na vatsaṃ yavasasya pipyuṣī |
 2.016.08c sakṛt su te sumatibhiḥ śatakrato sam patnībhīr na vṛṣaṇo nasīmahi ||
 2.016.09a nūnaṃ sā te prati varam jaritre duhīyad indra dakṣiṇā maghonī |
 2.016.09c śikṣā stotṛbhyo māti dhag bhago no bṛhad vadema vidathe suvīrāḥ ||

2.017.01a tad asmai navyam aṅgirasvad arcata śuṣmā yad asya pratnathodīrate |
 2.017.01c viśvā yad gotrā sahasā parivṛtā made somasya dṛṃhitāny airayat ||
 2.017.02a sa bhūtu yo ha prathamāya dhāyasa ojo mimāno mahimānam ātirat |
 2.017.02c śūro yo yutsu tanvam parivyata śīrṣaṇi dyām mahinā praty amuñcata ||
 2.017.03a adhākṛṇoḥ prathamam vīryam mahad yad asyāgre brahmaṇā śuṣmam airayaḥ |
 2.017.03c ratheṣṭhena haryaśvena vicyutāḥ pra jīrayaḥ sistrate sadhryak pṛthak ||
 2.017.04a adhā yo viśvā bhuvanābhi majmanesānakṛt pravayā abhy avardhata |
 2.017.04c ād rodasī jyotiṣā vahnir ātanot sīvyan tamāṃsi dudhitā sam avyayat ||
 2.017.05a sa prācīnān parvatān dṛṃhad ojasādhārācīnam akṛṇod apām apaḥ |
 2.017.05c adhārayat pṛthivīm viśvadhāyasam astabhnān māyayā dyām avasrasaḥ ||
 2.017.06a sāsmā aram bāhubhyāṃ yam pitākṛṇod viśvasmād ā januṣo vedasas pari |
 2.017.06c yena pṛthivyāṃ ni krivim śayadhyai vajreṇa hatvy avṛṇak tuviṣvaṇiḥ ||
 2.017.07a amājūr iva pitroḥ sacā satī samānād ā sadasas tvām iye bhagam |
 2.017.07c kṛdhi praketaṃ upa māsy ā bhara daddhi bhāgaṃ tanvo yena māmahaḥ ||
 2.017.08a bhojaṃ tvām indra vayaṃ huvema dadiṣ tvam indrapāmsi vājān |
 2.017.08c avidḍhīndra citrayā na ūtī kṛdhi vṛṣann indra vasyaso naḥ ||
 2.017.09a nūnaṃ sā te prati varam jaritre duhīyad indra dakṣiṇā maghonī |

2.017.09c śikṣā stotṛbhyo māti dhag bhago no bṛhad vadema vidathe suvīrāḥ ||

2.018.01a prātā ratho navo yoji sasniś caturyugas trikaśaḥ saptaraśmiḥ |
2.018.01c daśāritro manuṣyaḥ svarṣāḥ sa iṣṭibhir matibhī raṁhyo bhūt ||
2.018.02a sāsmā aram prathamam sa dvitīyam uto tṛtīyam manuṣaḥ sa hotā |
2.018.02c anyasyā garbham anya ū jananta so anyebhiḥ sacate jenyo vṛṣā ||
2.018.03a harī nu kaṁ ratha indrasya yojam āyai sūktena vacasā navena |
2.018.03c mo ṣu tvām atra bahavo hi viprā ni rīraman yajamānāso anye ||
2.018.04a ā dvābhyām haribhyām indra yāhy ā caturbhir ā ṣaḍbhir hūyamānaḥ |
2.018.04c aṣṭābhir daśabhiḥ somapeyam ayaṁ sutāḥ sumakha mā mṛdhas kaḥ ||
2.018.05a ā viṁśatyā triṁśatā yāhy arvān ā catvāriṁśatā haribhir yujānaḥ |
2.018.05c ā pañcāśatā surathebhir indrā ṣaṣṭyā saptatyā somapeyam ||
2.018.06a āśītyā navatyā yāhy arvān ā śatena haribhir uhyamānaḥ |
2.018.06c ayaṁ hi te śunahotreṣu soma indra tvāyā pariṣikto madāya ||
2.018.07a mama brahmendra yāhy achā viśvā harī dhuri dhiṣvā rathasya |
2.018.07c purutrā hi vihavyo babhūthāsmiñ chūra savane mādayasva ||
2.018.08a na ma indreṇa sakhyam vi yoṣad asmabhyam asya dakṣiṇā duhīta |
2.018.08c upa jyeṣṭhe varūthe gabhastau prāye-prāye jigīvāṁsaḥ syāma ||
2.018.09a nūnam sā te prati varam jaritre duhīyad indra dakṣiṇā maghonī |
2.018.09c śikṣā stotṛbhyo māti dhag bhago no bṛhad vadema vidathe suvīrāḥ ||

2.019.01a apāyy asyāndhaso madāya manīṣiṇaḥ suvānasya prayasaḥ |
2.019.01c yasminn indraḥ pradivi vāvṛdhāna oko dadhe brahmaṇyantaś ca naraḥ ||
2.019.02a asya mandāno madhvo vajrahasto 'him indro arṇovṛtam vi vṛscat |
2.019.02c pra yad vayo na svasarāṇy achā prayāṁsi ca nadīnām cakramanta ||
2.019.03a sa māhina indro arṇo apām prairayad ahihāchā samudram |
2.019.03c ajanayat sūryam vidad gā aktunāhnām vayunāni sādhat ||
2.019.04a so apratīni manave purūṇindro dāśad dāśuṣe hanti vṛtram |
2.019.04c sadyo yo nṛbhyo atasāyvo bhūt paspṛdhānebhyaḥ sūryasya sātau ||
2.019.05a sa sunvata indraḥ sūryam ā devo riṇaṇ martyāya stavān |
2.019.05c ā yad rayiṁ guhadavadyam asmai bharad aṁśam naitaśo daśasyan ||
2.019.06a sa randhayat sadivaḥ sārathaye śuṣṇam aśuṣam kuyavam kutsāya |
2.019.06c divodāsāya navatiṁ ca navendraḥ puro vy airac chambarasya ||
2.019.07a evā ta indrocatham ahema śravasyā na tmanā vājayantaḥ |
2.019.07c aśyāma tat sāptam āśuṣāṇā nanamo vadhar adevasya pīyoḥ ||
2.019.08a evā te gṛtsamadāḥ śūra manmāvasyavo na vayunāni takṣuḥ |
2.019.08c brahmaṇyanta indra te navīya iṣam ūrjam sukṣitiṁ sumnam aśyuḥ ||
2.019.09a nūnam sā te prati varam jaritre duhīyad indra dakṣiṇā maghonī |
2.019.09c śikṣā stotṛbhyo māti dhag bhago no bṛhad vadema vidathe suvīrāḥ ||

2.020.01a vayam te vayo indra viddhi ṣu ṇaḥ pra bharāmahe vājayur na ratham |
2.020.01c vipanyavo dīdhyato manīṣā sumnam iyakṣantas tvāvato nṛn ||
2.020.02a tvam na indra tvābhir ūti tvāyato abhiṣṭipāsi janān |
2.020.02c tvam ino dāśuṣo varūtetthādhīr abhi yo nakṣati tvā ||
2.020.03a sa no yuvendro johūtraḥ sakhā śivo narām astu pātā |
2.020.03c yaḥ śamsantam yaḥ śāsāmānam ūti pacantam ca stuvantam ca praṇeṣat ||

2.020.04a tam u stuṣa indraṃ taṃ gr̥ṇīṣe yasmin purā vāvṛdhuḥ śāsāduś ca |
 2.020.04c sa vasvaḥ kāmam pīparad iyāno brahmaṇyato nūtanasyāyoḥ ||
 2.020.05a so aṅgirasām ucathā jujuṣvān brahmā tūtod indro gātum iṣṇan |
 2.020.05c muṣṇann uṣasaḥ sūryeṇa stavān aśnasya cic chiśnathat pūrvyāṇi ||
 2.020.06a sa ha śruta indro nāma deva ūrdhvo bhuvan manuṣe dasmatamaḥ |
 2.020.06c ava priyam arśasānasya sāhvāñ chiro bharad dāsasya svadhāvān ||
 2.020.07a sa vṛtrahendraḥ kṛṣṇayonīḥ puraṃdaro dāsīr airayad vi |
 2.020.07c ajanayan manave kṣām apaś ca satrā śamsaṃ yajamānasya tūtot ||
 2.020.08a tasmai tavasyam anu dāyi satrendrāya devebhir arṇasātau |
 2.020.08c prati yad asya vajram bāhvor dhur hatvī dasyūn pura āyasīr ni tārit ||
 2.020.09a nūnam sā te prati varam jaritre duhiyad indra dakṣiṇā maghonī |
 2.020.09c śikṣā stotr̥bhyo māti dhag bhago no bṛhad vadema vidathe suvīrāḥ ||

2.021.01a viśvajite dhanajite svarjite satrājite nṛjita urvarājite |
 2.021.01c aśvajite gojite abjite bharendrāya somaṃ yajatāya haryatam ||
 2.021.02a abhibhuve 'bhibhaṅgāya vanvate 'śādhāya sahamānāya vedhase |
 2.021.02c tuvigraye vahnaye duṣṭarītave satrāsāhe nama indrāya vocata ||
 2.021.03a satrāsāho janabhakṣo janaṃsahaś cyavano yudhmo anu joṣam ukṣitaḥ |
 2.021.03c vṛtaṃcayaḥ sahurir vikṣv ārita indrasya vocam pra kṛtāni vīryā ||
 2.021.04a anānudo vṛṣabho dodhato vadho gambhīra ṛṣvo asamaṣṭakāvyaḥ |
 2.021.04c radhracodaḥ śnathano vīditas pṛthur indraḥ suyajña uṣasaḥ svar janat ||
 2.021.05a yajñena gātum apturo vividrire dhiyo hinvānā uśijo manīṣiṇaḥ |
 2.021.05c abhisvarā niṣadā gā avasyava indre hinvānā draviṇāny āśata ||
 2.021.06a indra śreṣṭhāni draviṇāni dhehi cittim dakṣasya subhagatvam asme |
 2.021.06c poṣaṃ rayiṇām ariṣṭim tanūnām svādmānam vācaḥ sudinatvam ahnām ||

2.022.01a trikadrūkeṣu mahiṣo yavāsīram tuviśuṣmas
 2.022.01c tṛpat somam apibad viṣṇunā sutam yathāvaśat |
 2.022.01e sa im mamāda mahi karma kartave mahām uruṃ
 2.022.01g sainam saścad devo devaṃ satyam indraṃ satya induḥ ||
 2.022.02a adha tviṣimāñ abhy ojasā kriviṃ yudhābhavad
 2.022.02c ā rodasī aprṇad asya majmanā pra vāvṛdhe |
 2.022.02e adhattānyam jaṭhare prem aricyata
 2.022.02f sainam saścad devo devaṃ satyam indraṃ satya induḥ ||
 2.022.03a sākam jātaḥ kratunā sākam ojasā vavakṣitha
 2.022.03c sākam vṛddho vīryaiḥ sāsahir mṛdho vicarṣaṇiḥ |
 2.022.03e dātā rādha stuvate kāmyaṃ vasu
 2.022.03f sainam saścad devo devaṃ satyam indraṃ satya induḥ ||
 2.022.04a tava tyan naryam nṛto 'pa indra prathamam pūrvyam divi pravācyam kṛtam |
 2.022.04c yad devasya śavasā prāriṇā asuṃ riṇann apaḥ |
 2.022.04e bhuvad viśvam abhy ādevam ojasā vidād ūrjam śatakatur vidād iṣam ||

2.023.01a gaṇānām tvā gaṇapatiṃ havāmahe kavim kavīnām upamaśravastamam |
 2.023.01c jyeṣṭharājam brahmaṇām brahmaṇas pata ā naḥ śṛṇvann ūtibhiḥ sīda sādānam ||
 2.023.02a devās cit te asurya pracetaso bṛhaspate yajñiyam bhāgam ānaśuḥ |
 2.023.02c usrā iva sūryo jyotiṣā maho viśveṣām ij janitā brahmaṇām asi ||

2.023.03a ā vibādhyā parirāpas tamāṃsi ca jyotiṣmantam ratham ṛtasya tiṣṭhasi |
 2.023.03c bṛhaspate bhīmam amitradambhanam rakṣoḥaṇam gotrabhidam svarvidam ||
 2.023.04a sunitibhir nayasi trāyase janam yas tubhyam dāsān na tam aṃho aśnavat |
 2.023.04c brahmadviṣas tapano manyumīr asi bṛhaspate mahi tat te mahitvanam ||
 2.023.05a na tam aṃho na duritam kutaś cana nārātayas titirur na dvayāvinaḥ |
 2.023.05c viśvā id asmād dhvaraso vi bādhasse yam sugopā rakṣasi brahmaṇas pate ||
 2.023.06a tvam no gopāḥ pathikṛd vicakṣaṇas tava vratāya matibhir jarāmahe |
 2.023.06c bṛhaspate yo no abhi hvaro dadhe svā tam marmartu duchunā harasvatī ||
 2.023.07a uta vā yo no marcayād anāgaso 'rātīvā marthaḥ sānuko vṛkaḥ |
 2.023.07c bṛhaspate apa tam vartayā pathaḥ sugam no asyai devavitaye kṛdhi ||
 2.023.08a trātāram tvā tanūnām havāmahe 'vaspartar adhivaktāram asmayum |
 2.023.08c bṛhaspate devanido ni barhaya mā durevā uttaram sumnam un naśan ||
 2.023.09a tvayā vayam suvṛdhā brahmaṇas pate spārḥā vasu manuṣyā dadīmahi |
 2.023.09c yā no dūre tadito yā arātayo 'bhi santi jambhayā tā anapnasaḥ ||
 2.023.10a tvayā vayam uttamaḥ dhīmahe vayo bṛhaspate papriṇā sasinā yujā |
 2.023.10c mā no duḥśamso abhidipsur īsata pra suśamsā matibhis tāriṣīmahi ||
 2.023.11a anānudo vṛṣabho jagmir āhavam niṣṭaptā śatrum pṛtanāsu sāsahiḥ |
 2.023.11c asi satya ṛṇayā brahmaṇas pata ugrasya cid damitā vīduharṣiṇaḥ ||
 2.023.12a adevena manasā yo riṣaṇyati śāsām ugro manyamāno jighāmsati |
 2.023.12c bṛhaspate mā praṇak tasya no vadho ni karma manyum durevasya śardhataḥ ||
 2.023.13a bhareṣu havyo namasopasadyo gantā vājeṣu sanitā dhanam-dhanam |
 2.023.13c viśvā id aryo abhidipsvo mṛdho bṛhaspatir vi vavarhā rathāṃ iva ||
 2.023.14a tejiṣṭhayā tapanī rakṣasas tapa ye tvā nide dadhire dṛṣṭavīryam |
 2.023.14c āvis tat kṛṣva yad asat ta ukthyam bṛhaspate vi parirāpo ardaya ||
 2.023.15a bṛhaspate ati yad aryo arhād dyumad vibhāti kratumaj janeṣu |
 2.023.15c yad dīdayac chavasa ṛtaprajāta tad asmāsu draviṇam dhehi citram ||
 2.023.16a mā na stenebhyo ye abhi druhas pade nirāmiṇo ripavo 'nneṣu jāgṛdhuḥ |
 2.023.16c ā devānām ohate vi vrayo hṛdi bṛhaspate na paraḥ sāmno viduḥ ||
 2.023.17a viśvebhyo hi tvā bhuvanebhyas pari tvaṣṭājanat sāmnaḥ-sāmnaḥ kavīḥ |
 2.023.17c sa ṛṇacid ṛṇayā brahmaṇas patir druho hantā maha ṛtasya dhartari ||
 2.023.18a tava śriye vy ajihīta parvato gavām gotram udasṛjo yad aṅgiraḥ |
 2.023.18c indreṇa yujā tamasā parivṛtam bṛhaspate nir apām aubjo arṇavam ||
 2.023.19a brahmaṇas pate tvam asya yantā sūktasya bodhi tanayam ca jinva |
 2.023.19c viśvam tad bhadram yad avanti devā bṛhad vadema vidathe suvīrāḥ ||

2.024.01a semām avidḍdhi prabhṛtiṃ ya īśiṣe 'yā vidhema navayā mahā girā |
 2.024.01c yathā no miḍhvān stavate sakhā tava bṛhaspate sīśadhaḥ sota no matim ||
 2.024.02a yo nantvāny anaman ny ojasotādardar manyunā śambarāṇi vi |
 2.024.02c prācyāvayad acyutā brahmaṇas patir ā cāvīśad vasumantam vi parvatam ||
 2.024.03a tad devānām devatamāya kartvam aśrathnan dṛḍhāvradanta vīditā |
 2.024.03c ud gā ājad abhinad brahmaṇā valam agūhat tamo vy acakṣayat svaḥ ||
 2.024.04a aśmāsyam avatam brahmaṇas patir madhudhāram abhi yam ojasātṛṇat |
 2.024.04c tam eva viśve papire svardṛśo bahu sākam sisicur utsam udriṇam ||
 2.024.05a sanā tā kā cid bhuvanā bhavitvā mādbhiḥ śaradbhir duro varanta vaḥ |
 2.024.05c ayatantā carato anyad-anyad id yā cakāra vayunā brahmaṇas patiḥ ||
 2.024.06a abhinakṣanto abhi ye tam ānaśur nidhim paṇinām paramam guhā hitam |
 2.024.06c te vidvāmsaḥ praticakṣyānrṭā punar yata u āyan tad ud iyur āvīsam ||
 2.024.07a ṛtāvānaḥ praticakṣyānrṭā punar āta ā tasthuḥ kavayo mahas pathaḥ |

- 2.024.07c te bāhubhyāṃ dhamitam agnim aśmani nakiḥ ṣo asty araṇo jahur hi tam ||
 2.024.08a ṛtajyena kṣipreṇa brahmaṇas patir yatra vaṣṭi pra tad aśnoti dhanvanā |
 2.024.08c tasya sādhvīr iṣavo yābhir asyati nṛcakṣaso dṛśaye karṇayonayaḥ ||
 2.024.09a sa saṃnayaḥ sa vinayaḥ purohitaḥ sa suṣṭutaḥ sa yudhi brahmaṇas patiḥ |
 2.024.09c cākṣmo yad vājam bharate matī dhanād it sūryas tapati tapyatur vṛthā ||
 2.024.10a vibhu prabhu prathamam mehanāvato bṛhaspateḥ suvidatrāṇi rādhyā |
 2.024.10c imā sātāni venyasya vājino yena janā ubhaye bhuñjate viśaḥ ||
 2.024.11a yo 'vare vṛjane viśvathā vibhur mahām u raṇvaḥ śavasā vavakṣitha |
 2.024.11c sa devo devān prati paprathe pṛthu viśved u tā paribhūr brahmaṇas patiḥ ||
 2.024.12a viśvaṃ satyam maghavānā yuvor id āpaś cana pra minanti vrataṃ vām |
 2.024.12c achendrābrahmaṇaspatī havir no 'nnaṃ yujeva vājinā jigātam ||
 2.024.13a utāśiṣṭhā anu śṛṇvanti vahnayaḥ sabheyo vipro bharate matī dhanā |
 2.024.13c viḍudveṣā anu vaśa ṛṇam ādadiḥ sa ha vājī samithe brahmaṇas patiḥ ||
 2.024.14a brahmaṇas pater abhavad yathāvaśaṃ satyo manyur mahi karmā kariṣyataḥ |
 2.024.14c yo gā udājat sa dive vi cābhajan mahīva rītiḥ śavasāsarat pṛthak ||
 2.024.15a brahmaṇas pate suyamasya viśvahā rāyaḥ syāma rathyo vayasvataḥ |
 2.024.15c vīreṣu vīrāṃ upa pṛndhi nas tvam yad īśāno brahmaṇā veṣi me havam ||
 2.024.16a brahmaṇas pate tvam asya yantā sūktasya bodhi tanayaṃ ca jinva |
 2.024.16c viśvaṃ tad bhadrāṃ yad avanti devā bṛhad vadema vidathe suvīrāḥ ||
- 2.025.01a indhāno agniṃ vanavad vanuṣyataḥ kṛtabrahmā śūśuvad rātahavya it |
 2.025.01c jātēna jātām ati sa pra sarsṛte yaṃ-yaṃ yujaṃ kṛṇute brahmaṇas patiḥ ||
 2.025.02a vīrebhir vīrān vanavad vanuṣyato gobhī rayim paprathad bodhati tmanā |
 2.025.02c tokaṃ ca tasya tanayaṃ ca vardhate yaṃ-yaṃ yujaṃ kṛṇute brahmaṇas patiḥ ||
 2.025.03a sindhur na kṣodaḥ śimivāṃ ṛghāyato vṛṣeva vadhrīm̄r abhi vaṣṭy ojasā |
 2.025.03c agner iva prasitir nāha vartave yaṃ-yaṃ yujaṃ kṛṇute brahmaṇas patiḥ ||
 2.025.04a tasmā arṣanti divyā asaścataḥ sa satvabhiḥ prathamō goṣu gachati |
 2.025.04c anibhṛṣṭataviṣir hanty ojasā yaṃ-yaṃ yujaṃ kṛṇute brahmaṇas patiḥ ||
 2.025.05a tasmā id viśve dhunayanta sindhavo 'chidrā śarma dadhire purūṇi |
 2.025.05c devānām sumne subhagaḥ sa edhate yaṃ-yaṃ yujaṃ kṛṇute brahmaṇas patiḥ ||
- 2.026.01a ṛjur ic chaṃso vanavad vanuṣyato devayann id adevayantam abhy asat |
 2.026.01c suprāvīr id vanavat pṛtsu duṣṭaram yaḥved ayajyor vi bhajāti bhojanam ||
 2.026.02a yajasva vīra pra vihi manāyato bhadrām manaḥ kṛṇuṣva vṛtratūrye |
 2.026.02c haviṣ kṛṇuṣva subhago yathāsasi brahmaṇas pater ava ā vṛṇīmahe ||
 2.026.03a sa ij janena sa viśā sa janmanā sa putrair vājam bharate dhanā nṛbhiḥ |
 2.026.03c devānām yaḥ pitaram āvivāsati śraddhāmanā haviṣā brahmaṇas patim ||
 2.026.04a yo asmai havyaiḥ ghṛtavadbhir avidhat pra tam prācā nayati brahmaṇas patiḥ |
 2.026.04c uruṣyatim aṃhaso rakṣatī riṣo 'mhoś cid asmā urucakrir adbhutaḥ ||
- 2.027.01a imā gira ādityebhyo ghṛtasnūḥ sanād rājabhyo juhvā juhomi |
 2.027.01c śṛṇotu mitro aryamā bhago nas tuvijāto varuṇo dakṣo aṃśaḥ ||
 2.027.02a imaṃ stomam sakratavo me adya mitro aryamā varuṇo juṣanta |
 2.027.02c ādityāsaḥ śucayo dhārapūtā avṛjinā anavadyā ariṣṭāḥ ||
 2.027.03a ta ādityāsa uravo gabhīrā adabdhāso dipsanto bhūryakṣāḥ |
 2.027.03c antaḥ paśyanti vṛjinota sādhu sarvaṃ rājabhyaḥ paramā cid anti ||

2.027.04a dhārayanta ādityāso jagat sthā devā viśvasya bhuvanasya gopāḥ |
 2.027.04c dīrghādhiyo rakṣamānā asuryam ṛtāvānāś cayamānā ṛṇāni ||
 2.027.05a vidyām ādityā avaso vo asya yad aryaman bhaya ā cin mayobhu |
 2.027.05c yuṣmākam mitrāvaruṇā praṇītau pari śvabhreva duritāni vṛjyām ||
 2.027.06a sugo hi vo aryaman mitra panthā anṛkṣaro varuṇa sādhu asti |
 2.027.06c tenādityā adhi vocatā no yachatā no duṣparihantu śarma ||
 2.027.07a pipartu no aditī rājaputrāti dveṣāṃsy aryamā sugebhiḥ |
 2.027.07c bṛhan mitrasya varuṇasya śarmopa syāma puruvīrā ariṣṭāḥ ||
 2.027.08a tisro bhūmīr dhārayan trīṃr uta dyūn trīṇi vratā vidathe antar eṣām |
 2.027.08c ṛtenādityā mahi vo mahitvaṃ tad aryaman varuṇa mitra cāru ||
 2.027.09a trī rocanā divyā dhārayanta hiraṇyayāḥ śucayo dhārapūtāḥ |
 2.027.09c asvapnajo animiṣā adabdhā uruśaṃsā ṛjave martyāya ||
 2.027.10a tvam viśveṣāṃ varuṇāsi rājā ye ca devā asura ye ca martāḥ |
 2.027.10c śataṃ no rāsva śarado vicakṣe 'śyāmāyūṃṣi sudhitāni pūrvā ||
 2.027.11a na dakṣiṇā vi cikite na savyā na prācīnam ādityā nota paścā |
 2.027.11c pākya cid vasavo dhīryā cid yuṣmānīto abhayaṃ jyotir aśyām ||
 2.027.12a yo rājabhya ṛtanibhyo dadāśa yaṃ vardhayanti puṣṭayaś ca nityāḥ |
 2.027.12c sa revān yāti prathamo rathena vasudāvā vidatheṣu praśastaḥ ||
 2.027.13a śucir apaḥ sūyavasā adabdha upa kṣeti vṛddhavayāḥ suvīraḥ |
 2.027.13c nakiṣ ṭaṃ ghnanty antito na dūrād ya ādityānām bhavati praṇītau ||
 2.027.14a adite mitra varuṇota mṛḍa yad vo vayaṃ cakṛmā kac cid āgaḥ |
 2.027.14c urv aśyām abhayaṃ jyotir indra mā no dīrghā abhi naśan tamisrāḥ ||
 2.027.15a ubhe asmai pīpayataḥ samīci divo vṛṣṭiṃ subhago nāma puṣyan |
 2.027.15c ubhā kṣayāv ājayan yāti pṛtsūbhāv ardhau bhavataḥ sādhu asmai ||
 2.027.16a yā vo māyā abhidruhe yajatrāḥ pāsā ādityā ripave vicṛttāḥ |
 2.027.16c aśviva tāṃ ati yeṣaṃ rathenāriṣṭā urāv ā śarman syāma ||
 2.027.17a māham maghono varuṇa priyasya bhūridāvna ā vidam sūnam āpeḥ |
 2.027.17c mā rāyo rājan suyamād ava sthām bṛhad vadema vidathe suvīrāḥ ||

2.028.01a idam kaver ādityasya svarājo viśvāni sānty abhy astu mahnā |
 2.028.01c ati yo mandro yajathāya devaḥ sukīrtim bhikṣe varuṇasya bhūreḥ ||
 2.028.02a tava vrata subhaḡāsaḥ syāma svādhyo varuṇa tuṣṭuvāṃsaḥ |
 2.028.02c upāyana uṣasāṃ gomatinām agnayo na jaramānā anu dyūn ||
 2.028.03a tava syāma puruvīrasya śarmann uruśaṃsasya varuṇa praṇetaḥ |
 2.028.03c yūyaṃ naḥ putrā aditer adabdhā abhi kṣamadhvaṃ yujyāya devāḥ ||
 2.028.04a pra sīm ādityo asṛjad vidhartāṃ ṛtaṃ sindhavo varuṇasya yanti |
 2.028.04c na śrāmyanti na vi mucanty ete vayo na paptū raghuyā pariḡman ||
 2.028.05a vi mac chrathāya raśanām ivāga ṛdhyāma te varuṇa khām ṛtasya |
 2.028.05c mā tantuś chedi vayato dhiyam me mā mātrā śāry apasaḥ pura ṛtoḥ ||
 2.028.06a apo su myakṣa varuṇa bhiyasam mat samrād ṛtāvo 'nu mā gṛbhāya |
 2.028.06c dāmeva vatsād vi mumugdhy aṃho nahi tvad āre nimiṣāś caneśe ||
 2.028.07a mā no vadhair varuṇa ye ta iṣṭāv enaḥ kṛṇvantam asura bhrīṇanti |
 2.028.07c mā jyotiṣaḥ pravasaṭhāni ganma vi ṣū mṛdhaḥ śīśratho jīvase naḥ ||
 2.028.08a namaḥ purā te varuṇota nūnam utāparaṃ tuvijāta bravāma |
 2.028.08c tve hi kam parvate na śritāny apracyutāni dūḡabha vratāni ||
 2.028.09a para ṛṇā sāvīr adha matkṛtāni māham rājann anyakṛtena bhojam |
 2.028.09c avyuṣṭā in nu bhūyasīr uṣāsa ā no jīvān varuṇa tāsu sādhi ||
 2.028.10a yo me rājan yujyo vā sakhā vā svapne bhayam bhīrave mahyam āha |

- 2.028.10c steno vā yo dipsati no vṛko vā tvam tasmād varuṇa pāhy asmān ||
2.028.11a māham maghono varuṇa priyasya bhūridāvna ā vidaṃ sūnam āpeḥ |
2.028.11c mā rāyo rājan suyamād ava sthām bṛhad vadema vidathe suvirāḥ ||
- 2.029.01a dhṛtavratā ādityā iṣirā āre mat karta rahasūr ivāgaḥ |
2.029.01c śṛṅvato vo varuṇa mitra devā bhadrasya vidvāṃ avase huve vaḥ ||
2.029.02a yūyaṃ devāḥ pramatir yūyam ojo yūyaṃ dveṣāṃsi sanutar yuyota |
2.029.02c abhikṣattāro abhi ca kṣamadhvam adyā ca no mṛdayatāparam ca ||
2.029.03a kim ū nu vaḥ kṛṇavāmāpareṇa kiṃ sanena vasava āpyena |
2.029.03c yūyaṃ no mitrāvaruṇādite ca svastim indrāmaruto dadhāta ||
2.029.04a haye devā yūyam id āpaya stha te mṛdata nādhamānāya mahyam |
2.029.04c mā vo ratho madhyamavādṛte bhūn mā yuṣmāvatsv āpiṣu śramiṣma ||
2.029.05a pra va eko mimaya bhūry āgo yan mā piteva kitavaṃ śasāsa |
2.029.05c āre pāsā āre aghāni devā mā mādhi putre vim iva grabhīṣṭa ||
2.029.06a arvāñco adyā bhavatā yajatrā ā vo hārdi bhayamāno vyayeyam |
2.029.06c trādhvam no devā nijuro vṛkasya trādhvam kartād avapado yajatrāḥ ||
2.029.07a māham maghono varuṇa priyasya bhūridāvna ā vidaṃ sūnam āpeḥ |
2.029.07c mā rāyo rājan suyamād ava sthām bṛhad vadema vidathe suvirāḥ ||
- 2.030.01a ṛtaṃ devāya kṛṇvate savitra indrāyāhighne na ramanta āpaḥ |
2.030.01c ahar-ahar yāty aktur apāṃ kiyāty ā prathamah sarga āsām ||
2.030.02a yo vṛtrāya sinam atrābhariṣyat pra taṃ janitrī viduṣa uvāca |
2.030.02c patho radantir anu joṣam asmaḥ dive-dive dhunayo yanty artham ||
2.030.03a ūrdhvo hy asthād adhy antarikṣe 'dhā vṛtrāya pra vadham jabhāra |
2.030.03c miham vasāna upa hīm adudrot tigmāyudho ajayac chatrum indrah ||
2.030.04a bṛhaspate tapuśāsneva vidhya vṛkadvaraso asurasya vīrān |
2.030.04c yathā jaghantha dhṛṣatā purā cid evā jahi śatrum asmākam indra ||
2.030.05a ava kṣipa divo aśmānam uccā yena śatrum mandasāno nijūrvāḥ |
2.030.05c tokasya sātāu tanayasya bhūrer asmāṃ ardham kṛṇutād indra gonām ||
2.030.06a pra hi kratuṃ vṛhatho yaṃ vanutho radhrasya stho yajamānasya codau |
2.030.06c indrāsomā yuvam asmāṃ aviṣtam asmin bhayasthe kṛṇutam ulokam ||
2.030.07a na mā taman na śraman nota tandran na vocāma mā sunoteti somam |
2.030.07c yo me pṛṇād yo dadad yo nibodhād yo mā sunvantam upa gobhir āyat ||
2.030.08a sarasvati tvam asmāṃ avidḍhi marutvatī dhṛṣatī jeṣi śatrūn |
2.030.08c tyam cic chardhantaṃ taviṣiyamāṇam indro hanti vṛṣabham śaṅḍikānām ||
2.030.09a yo naḥ sanutya uta vā jighatnur abhikhyāya taṃ tigitena vidhya |
2.030.09c bṛhaspata āyudhair jeṣi śatrūn druhe riṣantam pari dhehi rājan ||
2.030.10a asmākebhiḥ satvabhiḥ sūra sūrain vīryā kṛdhi yāni te kartvāni |
2.030.10c jyog abhūvann anudhūpitāso hatvī teṣām ā bharā no vasūni ||
2.030.11a taṃ vaḥ śardham mārutaṃ sunnayur giropa bruve namasā daivyaṃ janam |
2.030.11c yathā rayiṃ sarvavīraṃ naśāmahā apatyasācam śrutyaṃ dive-dive ||
- 2.031.01a asmākam mitrāvaruṇāvataṃ ratham ādityai rudrair vasubhiḥ sacābhuvā |
2.031.01c pra yad vayo na paptan vasmanas pari śravasyavo hṛṣivanto vanarṣadaḥ ||
2.031.02a adha smā na ud avatā sajoṣaso ratham devāso abhi vikṣu vājayum |
2.031.02c yad āsavaḥ padyābhis titrato rajaḥ pṛthivyāḥ sānu jaṅghananta pāṇibhiḥ ||

2.031.03a uta sya na indro viśvacarṣaṇir divaḥ śardhena mārutena sukratuḥ |
 2.031.03c anu nu sthāty avṛkābhir ūtibhī ratham mahe sanaye vājasātaye ||
 2.031.04a uta sya devo bhuvanasya sakṣaṇis tvaṣṭā gnābhiḥ sajoṣā jūjuvad ratham |
 2.031.04c idā bhago bṛhaddivota rodasī pūṣā puramḍhir aśvināv adhā patī ||
 2.031.05a uta tye devī subhage mithūdr̥śoṣāsānaktā jagatām apījuvā |
 2.031.05c stuṣe yad vām pṛthivi navyasā vaca sthātuś ca vayas trivayā upastire ||
 2.031.06a uta vaḥ śamsam uśijām iva śmasy ahir budhnyo 'ja ekapād uta |
 2.031.06c trita ṛbhukṣāḥ savitā cano dadhe 'pām napād āsuhemā dhiyā śami ||
 2.031.07a etā vo vaśmy udyatā yajatrā atakṣann āyavo navyase sam |
 2.031.07c śravasyavo vājam cakānāḥ saptir na rathyo aha dhītim aśyāḥ ||

2.032.01a asya me dyāvāpṛthivi ṛtāyato bhūtam avitrī vacasaḥ siṣāsataḥ |
 2.032.01c yayor āyuh prataram te idam pura upastute vasūyur vām maho dadhe ||
 2.032.02a mā no guhyā ripa āyor ahan dabhan mā na ābhyo rīradho duchunābhyaḥ |
 2.032.02c mā no vi yauḥ sakhyā viddhi tasya naḥ sumnāyatā manasā tat tvemahe ||
 2.032.03a aheḍatā manasā śruṣṭim ā vaha duhānām dhenum pipyuṣim asaścatam |
 2.032.03c padyābhir āsum vacasā ca vājinam tvām hinomi puruhūta viśvahā ||
 2.032.04a rākām aham suhavam suṣṭutī huve śṛṇotu naḥ subhagā bodhatu tmanā |
 2.032.04c sīvyatv apaḥ sūcyāchidyamānayā dadātu vīram śatadāyam ukthyam ||
 2.032.05a yās te rāke sumatayaḥ supeśaso yābhir dadāsi dāśuṣe vasūni |
 2.032.05c tābhir no adya sumanā upāgahi sahasrapoṣam subhage rarāṇā ||
 2.032.06a sinīvālī pṛthuṣṭuke yā devānām asi svasā |
 2.032.06c juṣasva havyam āhutam prajām devi didiḍḍhi naḥ ||
 2.032.07a yā subāhuḥ svaṅguriḥ suṣūmā bahusūvarī |
 2.032.07c tasyai viśpatnyai haviḥ sinīvālyai juhótana ||
 2.032.08a yā guṅgūr yā sinīvālī yā rākā yā sarasvatī |
 2.032.08c indrāṇīm ahva ūtaye varuṇāṇīm svastaye ||

2.033.01a ā te pitar marutām sumnam etu mā naḥ sūryasya samdr̥śo yuyothāḥ |
 2.033.01c abhi no vīro arvati kṣameta pra jāyemahi rudra prajābhiḥ ||
 2.033.02a tvādattebhī rudra śaṃtamebhiḥ śatam himā aśīya bheṣajebhiḥ |
 2.033.02c vy asmād dveṣo vitaram vy amho vy amivās cātayasvā viśūciḥ ||
 2.033.03a śreṣṭho jātasya rudra śriyāsi tavastamas tavasām vajrabāho |
 2.033.03c parṣi naḥ pāram amhasaḥ svasti viśvā abhīti rapaso yuyodhi ||
 2.033.04a mā tvā rudra cukrudhāmā namobhir mā duṣṭutī vṛṣabha mā sahūtī |
 2.033.04c un no vīrām arpayā bheṣajebhir bhiṣaktamam tvā bhiṣajām śṛṇomi ||
 2.033.05a havīmabhir havate yo havirbhir ava stomebhī rudram diśīya |
 2.033.05c ṛdūdarah suhavo mā no asyai babhruḥ suśipro rīradhan manāyai ||
 2.033.06a un mā mamanda vṛṣabho marutvān tvakṣīyasā vayasā nādhamānam |
 2.033.06c ghr̥ṇiva chāyām arapā aśīyā vivāseyam rudrasya sumnam ||
 2.033.07a kva sya te rudra mṛḍayākur hasto yo asti bheṣajo jalāṣaḥ |
 2.033.07c apabhartā rapaso daivyasyābhī nu mā vṛṣabha cakṣamīthāḥ ||
 2.033.08a pra babhrave vṛṣabhāya śvitice maho mahīm suṣṭutim irayāmi |
 2.033.08c namasyā kalmalīkinam namobhir gṛṇīmasi tveṣam rudrasya nāma ||
 2.033.09a sthīrebhir aṅgaiḥ pururūpa ugro babhruḥ śukrebhiḥ pipīse hiranyaiḥ |
 2.033.09c iśānād asya bhuvanasya bhūrer na vā u yoṣad rudrād asuryam ||
 2.033.10a arhan bibharṣi sāyakāni dhanvārhan niṣkam yajatam viśvarūpam |

- 2.033.10c arhann idam dayase viśvam abhvaṃ na vā ojīyo rudra tvad asti ||
2.033.11a stuhi śrutam gartasadam yuvānam mṛgam na bhīmam upahatnum ugram |
2.033.11c mṛḍā jaritre rudra stavāno 'nyam te asman ni vapantu senāḥ ||
2.033.12a kumāraś cit pitaram vandamānam prati nānāma rudropayantam |
2.033.12c bhūrer dātaram satpatim gr̥ṇiṣe stutas tvam bheṣajā rāsy asme ||
2.033.13a yā vo bheṣajā marutaḥ śucīni yā śamtamā vṛṣaṇo yā mayobhu |
2.033.13c yāni manur avṛṇītā pitā nas tā śam ca yoś ca rudrasya vaśmi ||
2.033.14a pari ṇo hetī rudrasya vṛjyāḥ pari tveṣasya durmatir mahī gāt |
2.033.14c ava sthirā maghavadbhyas tanuṣva mīdhvas tokāya tanayāya mṛḍa ||
2.033.15a evā babhro vṛṣabha cakitāna yathā deva na hr̥ṇiṣe na hamsi |
2.033.15c havanaśrun no rudreha bodhi bṛhad vadema vidathe suvirāḥ ||
- 2.034.01a dhārāvarā maruto dhṛṣṇvojaso mṛgā na bhīmās taviṣibhir arcinaḥ |
2.034.01c agnayo na śusucānā r̥jīṣiṇo bhṛmim dhamanto apa gā avṛṇvata ||
2.034.02a dyāvo na stṛbhiś citayanta khādino vy abhriyā na dyutayanta vṛṣṭayaḥ |
2.034.02c rudro yad vo maruto rukmavakṣaso vṛṣājani pṛṣṇyāḥ śukra ūdhani ||
2.034.03a ukṣante aśvāṃ atyāṃ ivājiṣu nadasya karṇais turayanta āsubhiḥ |
2.034.03c hiraṇyaśiprā maruto davidhvataḥ pṛkṣam yātha pṛṣatibhiḥ samanyavaḥ ||
2.034.04a pṛkṣe tā viśvā bhuvanā vavakṣire mitrāya vā sadam ā jīradānavaḥ |
2.034.04c pṛṣadaśvāso anavabhrarādhasa r̥jipyāso na vayuneṣu dhūrṣadaḥ ||
2.034.05a indhanvabhir dhenubhī rapśadūdhabhir adhvasmabhiḥ pathibhir bhrājadrṣṭayaḥ |
2.034.05c ā hamsāso na svasarāṇi gantana madhor madāya marutaḥ samanyavaḥ ||
2.034.06a ā no brahmāṇi marutaḥ samanyavo narāṃ na śamsaḥ savanāni gantana |
2.034.06c aśvām iva pipyata dhenum ūdhani kartā dhiyam jaritre vājapeśasam ||
2.034.07a tam no dāta maruto vājinam ratha āpānam brahma citayad dive-dive |
2.034.07c iṣam stotṛbhyo vṛjaneṣu kārave sanim medhām ariṣtam duṣṭaram sahaḥ ||
2.034.08a yad yuñjate maruto rukmavakṣaso 'śvān ratheṣu bhaga ā sudānavaḥ |
2.034.08c dhenur na śiśve svasareṣu pivate janāya rātahaviṣe mahim iṣam ||
2.034.09a yo no maruto vṛkatāti martyo ripur dadhe vasavo rakṣatā riṣaḥ |
2.034.09c vartayata tapuṣā cakriyābhi tam ava rudrā aśaso hantanā vadhaḥ ||
2.034.10a citram tad vo maruto yāma cekite pṛṣnyā yad ūdhar apy āpayo duhuḥ |
2.034.10c yad vā nide navamānasya rudriyās tritam jarāya juratām adābhyāḥ ||
2.034.11a tān vo maho maruta evayāvno viṣṇor eṣasya prabhṛthe havāmahe |
2.034.11c hiraṇyavarṇān kakuhān yatasruco brahmaṇyantaḥ śamsyam rādha īmahe ||
2.034.12a te daśagvāḥ prathamā yajñam ūhire te no hinvantūṣaso vyuṣṭiṣu |
2.034.12c uṣā na rāmīr aruṇair aporṇute maho jyotiṣā śucatā goarṇasā ||
2.034.13a te kṣoṇibhir aruṇebhir nāñjibhī rudrā ṛtasya sadaneṣu vāvṛdhuḥ |
2.034.13c nimeghamānā atyena pājasā suścandram varṇam dadhire supeśasam ||
2.034.14a tāṃ iyāno mahi varūtham ūtaya upa ghed enā namasā gr̥ṇimasi |
2.034.14c trito na yān pañca hotṛn abhiṣṭaya āvavartad avarāñ cakriyāvase ||
2.034.15a yayā radhram pārayathāty amho yayā nido muñcatha vanditāram |
2.034.15c arvācī sā maruto yā va ūtir o ṣu vāsreva sumatir jigātu ||
- 2.035.01a upem asṛkṣi vājayur vacasyām cano dadhita nādyo giro me |
2.035.01c apām napād āsuhemā kuvit sa supeśasas karati joṣiṣad dhi ||
2.035.02a imaṃ sv asmai hṛda ā sutaṣtam mantraṃ vocema kuvid asya vedat |
2.035.02c apām napād asuryasya mahnā viśvāny aryo bhuvanā jajāna ||

- 2.035.03a sam anyā yanty upa yanty anyāḥ samānam ūrvam nadyaḥ pṛṇanti |
 2.035.03c tam ū śucim śucayo dīdivāmsam apāṃ napātam pari tasthur āpaḥ ||
 2.035.04a tam asmerā yuvatayo yuvānam marmṛjyamānāḥ pari yanty āpaḥ |
 2.035.04c sa śukrebhiḥ śikvabhī revad asme dīdāyānidhmo ghṛtanirṇig apsu ||
 2.035.05a asmai tisro avyathyāya nārīr devāya devīr didhiṣanty annam |
 2.035.05c kṛtā ivopa hi prasarsre apsu sa pīyūṣam dhayati pūrvasūnām ||
 2.035.06a aśvasyātra janimāsyā ca svar druho riṣaḥ samprcaḥ pāhi sūrīn |
 2.035.06c āmāsu pūrṣu paro apramṛṣyam nārātayo vi naśan nānṛtāni ||
 2.035.07a sva ā dame sudughā yasya dhenuḥ svadhām pīpāya subhv annam atti |
 2.035.07c so apāṃ napād ūrjayann apsv antar vasudeyāya vidhate vi bhāti ||
 2.035.08a yo apsv ā śucinā daivyena ṛtāvājasra urviyā vibhāti |
 2.035.08c vayā id anyā bhuvanāny asya pra jāyante vīrudhaś ca prajābhiḥ ||
 2.035.09a apāṃ napād ā hy asthād upastham jihmānām ūrdhvo vidyutam vasānaḥ |
 2.035.09c tasya jyeṣṭham mahimānam vahantīr hiraṇyavarṇāḥ pari yanti yahviḥ ||
 2.035.10a hiraṇyarūpaḥ sa hiraṇyasamdr̥g apāṃ napāt sed u hiraṇyavarṇaḥ |
 2.035.10c hiraṇyayāt pari yoner niṣadyā hiraṇyadā dadaty annam asmai ||
 2.035.11a tad asyānikam uta cāru nāmāpicyam vardhate naptur apāṃ |
 2.035.11c yam indhate yuvatayaḥ sam itthā hiraṇyavarṇam ghṛtam annam asya ||
 2.035.12a asmai bahūnām avamāya sakhye yajñair vidhema namasā havirbhiḥ |
 2.035.12c sam sānu mārjmi didhiṣāmi bilmair dadhāmy annaiḥ pari vanda ṛgbhiḥ ||
 2.035.13a sa im vṛṣājanayat tāsū garbham sa im śīśur dhayati tam rihanti |
 2.035.13c so apāṃ napād anabhimlātavarṇo 'nyasyeveha tanvā viveṣa ||
 2.035.14a asmin pade parame tasthivāmsam adhvasmabhir viśvahā dīdivāmsam |
 2.035.14c āpo naptre ghṛtam annam vahantiḥ svayam atkaiḥ pari dīyanti yahviḥ ||
 2.035.15a ayāmsam agne suksitim janāyāyāmsam u maghavadbhyaḥ suvr̥ktim |
 2.035.15c viśvam tad bhadrām yad avanti devā bṛhad vadema vidathe suvirāḥ ||
- 2.036.01a tubhyam hinvāno vasiṣṭa gā apo 'dhuksan sim avibhir adribhir naraḥ |
 2.036.01c pibendra svāhā prahutaṃ vaṣaṭkṛtam hotrād ā somam prathamo ya īsiṣe ||
 2.036.02a yajñaiḥ sammiślāḥ pṛṣatībhir ṛṣṭībhir yāmañ chubhrāso añjiṣu priyā uta |
 2.036.02c āsadyā barhir bharatasya sūnavaḥ potrād ā somam pibatā divo naraḥ ||
 2.036.03a ameva naḥ suhavā ā hi gantana ni barhiṣi sadatanā raṇiṣṭana |
 2.036.03c athā mandasva jujuṣāno andhasas tvaṣṭar devebhir janibhiḥ sumadgaṇaḥ ||
 2.036.04a ā vakṣi devāñ iha vipra yakṣi cośan hotar ni ṣadā yoniṣu triṣu |
 2.036.04c prati vīhi prasthitam somyam madhu pibāgnīdhrāt tava bhāgasya tṛpṇuhi ||
 2.036.05a eṣa sya te tanvo nṛmṇavardhanaḥ saha ojaḥ pradivi bāhvor hitaḥ |
 2.036.05c tubhyam suto maghavan tubhyam ābhṛtas tvam asya brāhmaṇād ā tṛpat piba ||
 2.036.06a juṣethām yajñam bodhatam havasya me satto hotā nividāḥ pūrvyā anu |
 2.036.06c achā rājānā nama ety āvṛtam prasāstrād ā pibatam somyam madhu ||
- 2.037.01a mandasva hotrād anu joṣam andhaso 'dhvaryavaḥ sa pūrṇam vaṣṭy āsicam |
 2.037.01c tasmā etam bhārata tadvaśo dadir hotrād somam draviṇodaḥ piba ṛtubhiḥ ||
 2.037.02a yam u pūrvam ahuve tam idaṃ huve sed u havyo dadir yo nāma patyate |
 2.037.02c adhvaryubhiḥ prasthitam somyam madhu potrāt somam draviṇodaḥ piba ṛtubhiḥ
 ||
 2.037.03a medyantu te vahnayo yebhir iyase 'riṣaṇyan vīdayasvā vanaspate |
 2.037.03c āyūyā dhr̥ṣṇo abhigūryā tvam neṣṭrāt somam draviṇodaḥ piba ṛtubhiḥ ||

2.037.04a apād dhotrād uta potrād amattota neṣṭrād ajuṣata prayo hitam |
 2.037.04c turīyam pātram amṛktam amartyaṃ draviṇodāḥ pibatu drāviṇodasaḥ ||
 2.037.05a arvāñcam adya yayyaṃ nṛvāhaṇaṃ rathaṃ yuñjāthām iha vāṃ vimocanam |
 2.037.05c pṛñktaṃ havīmṣi madhunā hi kaṃ gatam athā somam pibataṃ vājīnivasū ||
 2.037.06a joṣy agne samidhaṃ joṣy āhutiṃ joṣi brahma janyaṃ joṣi suṣṭutim |
 2.037.06c viśvebhīr viśvāṃ ṛtunā vaso maha uśan devāṃ uśataḥ pāyayā haviḥ ||

2.038.01a ud u ṣya devaḥ savitā savāya śaśvattamaṃ tadapā vahnir asthāt |
 2.038.01c nūnaṃ devebhyo vi hi dhāti ratnam athābhajad vītihotraṃ svastau ||
 2.038.02a viśvasya hi śruṣṭaye deva ūrdhvaḥ pra bāhavā pṛthupāṇiḥ sisarti |
 2.038.02c āpaś cid asya vrata ā nimṛgrā ayaṃ cid vāto ramate pariḥman ||
 2.038.03a āsubhīś cid yān vi mucāti nūnam arīramad atamānaṃ cid etoḥ |
 2.038.03c ahyarṣūṇāṃ cin ny ayāṃ aṣyāṃ anu vrataṃ savitur moky āgāt ||
 2.038.04a punaḥ sam avyad vitataṃ vayantī madhyā kartor ny adhāc chakma dhīraḥ |
 2.038.04c ut saṃhāyāsthād vy ṛtūṃr adardhar aramatiḥ savitā deva āgāt ||
 2.038.05a nānaukāṃsi duryo viśvam āyur vi tiṣṭhate prabhavaḥ śoko agneḥ |
 2.038.05c jyeṣṭham mātā sūnave bhāgam ādhād anv asya ketam iṣitaṃ savitrā ||
 2.038.06a samāvavarti viṣṭhito jigīṣur viśveṣāṃ kāmaś caratām amābhūt |
 2.038.06c śaśvāṃ apo vikṛtaṃ hitvy āgād anu vrataṃ savitur daivyasya ||
 2.038.07a tvayā hitam apyam apsu bhāgaṃ dhanvānv ā mṛgayaso vi tasthuḥ |
 2.038.07c vanāni vibhyo nakir asya tāni vratā devasya savitur minanti ||
 2.038.08a yādrādhyam varuṇo yonim apyam anīṣitaṃ nimiṣi jarbhurāṇaḥ |
 2.038.08c viśvo mārtaṇḍo vrajam ā paśur gāt sthaśo janmāni savitā vy ākaḥ ||
 2.038.09a na yasyendro varuṇo na mitro vratam aryamā na minanti rudraḥ |
 2.038.09c nārātayas tam idam svasti huve devaṃ savitāraṃ namobhiḥ ||
 2.038.10a bhagaṃ dhiyaṃ vājayantaḥ puramdhim narāśaṃso gnāspatir no avyāḥ |
 2.038.10c āye vāmasya saṃgathe rayīṇām priyā devasya savituḥ syāma ||
 2.038.11a asmabhyam tad divo adbhyaḥ pṛthivyās tvayā dattaṃ kāmyaṃ rādha ā gāt |
 2.038.11c śaṃ yat stotṛbhya āpaye bhavāty uruśaṃsāya savitar jaritre ||

2.039.01a grāvāṇeva tad id arthaṃ jarethe ḡrdhreva vṛkṣaṃ nidhimantam acha |
 2.039.01c brahmāṇeva vidatha ukthaśāsā dūteva havyaḥ janyā purutrā ||
 2.039.02a prātaryāvāṇā rathyeva vīrājeva yamā varam ā sacethe |
 2.039.02c mene iva tanvā śumbhamāne dampatīva kratuvidā janeṣu ||
 2.039.03a śṛṅgeva naḥ prathamā gantam arvāk chaphāv iva jarbhurāṇā tarobhiḥ |
 2.039.03c cakravākeva prati vastor usrārvāñcā yātaṃ rathyeva śakrā ||
 2.039.04a nāveva naḥ pārayataṃ yugeva nabhyeva na upadhīva pradhīva |
 2.039.04c śvāneva no ariṣaṇyā tanūnām khṛgaleva visrasaḥ pātam asmān ||
 2.039.05a vātevājuryā nadyeva rītir akṣi iva cakṣuṣā yātam arvāk |
 2.039.05c hastāv iva tanve śambhaviṣṭhā pādeva no nayataṃ vasyo acha ||
 2.039.06a oṣṭhāv iva madhv āsne vadantā stanāv iva pipyataṃ jīvase naḥ |
 2.039.06c nāseva nas tanvo rakṣitārā karṇāv iva suśrutā bhūtam asme ||
 2.039.07a hasteva śaktim abhi saṃdadī naḥ kṣāmeva naḥ sam ajataṃ rajāṃsi |
 2.039.07c imā giro aśvinā yuṣmayantiḥ kṣṇotreṇeva svadhitiṃ saṃ śīṣitam ||
 2.039.08a etāni vām aśvinā vardhanāni brahma stomaṃ ḡṛtsamadāso akran |
 2.039.08c tāni narā jujuṣāṇopa yātam bṛhad vadema vidathe suvīrāḥ ||

2.040.01a somāpūṣaṇā janānā rayīṇāṃ janānā divo janānā pṛthivyāḥ |
 2.040.01c jātau viśvasya bhuvanasya gopau devā akṛṇvann amṛtasya nābhim ||
 2.040.02a imau devau jāyamānau juṣantemau tamāṃsi gūhatām ajuṣṭā |
 2.040.02c ābhyām indraḥ pakvam āmāsv antaḥ somāpūṣabhyām janad usriyāsu ||
 2.040.03a somāpūṣaṇā rajaso vimānaṃ saptacakraṃ ratham aviśvaminvam |
 2.040.03c viśūvṛtam manasā yujyamānaṃ taṃ jinvaṭho vṛṣaṇā pañcaraśmim ||
 2.040.04a divy anyāḥ sadanaṃ cakra uccā pṛthivyām anyo adhy antarikṣe |
 2.040.04c tāv asmabhyam puruvāram purukṣuṃ rāyas poṣaṃ vi ṣyatām nābhim asme ||
 2.040.05a viśvāny anyo bhuvanā jajāna viśvam anyo abhicakṣāṇa eti |
 2.040.05c somāpūṣaṇāv avataṃ dhiyam me yuvābhyām viśvāḥ pṛtanā jayema ||
 2.040.06a dhiyam pūṣā jinvaṭu viśvaminvo rayiṃ somo rayipatir dadhātu |
 2.040.06c avatu devy aditir anarvā bṛhad vadema vidathe suvirāḥ ||

2.041.01a vāyo ye te sahasriṇo rathāsas tebhir ā gahi |
 2.041.01c niyutvān somapītaye ||
 2.041.02a niyutvān vāyav ā gahy ayaṃ śukro ayāmi te |
 2.041.02c gantāsi sunvato gṛham ||
 2.041.03a śukrasyādya gavāsira indravāyū niyutvataḥ |
 2.041.03c ā yātam pibatam narā ||
 2.041.04a ayaṃ vām mitrāvaruṇā sutāḥ soma ṛtāvṛdhā |
 2.041.04c mamed iha śrutam havam ||
 2.041.05a rājānāv anabhidruhā dhruve sadasy uttame |
 2.041.05c sahasrasthūṇa āsāte ||
 2.041.06a tā samrājā ghṛtāsutī ādityā dānunas patī |
 2.041.06c sacete anavahvaram ||
 2.041.07a gomad ū ṣu nāsatyāśvāvad yātam aśvinā |
 2.041.07c vartī rudrā nṛpāyyam ||
 2.041.08a na yat paro nāntara ādadharṣad vṛṣaṇvasū |
 2.041.08c duḥśaṃso martyo ripuḥ ||
 2.041.09a tā na ā voḍham aśvinā rayim piśaṅgasamdr̥sam |
 2.041.09c dhiṣṇyā varivovidam ||
 2.041.10a indro aṅga mahad bhayam abhī ṣad apa cucyavat |
 2.041.10c sa hi sthīro vicarṣaṇiḥ ||
 2.041.11a indraś ca mṛḍayāti no na naḥ paścād agham naśat |
 2.041.11c bhadram bhavāti naḥ puraḥ ||
 2.041.12a indra āśābhyas pari sarvābhyo abhayaṃ karat |
 2.041.12c jetā śatrūn vicarṣaṇiḥ ||
 2.041.13a viśve devāsa ā gata śṛṇutā ma imaṃ havam |
 2.041.13c edam barhir ni ṣidata ||
 2.041.14a tīvro vo madhumāṃ ayaṃ śunahotreṣu matsaraḥ |
 2.041.14c etam pibata kāmyam ||
 2.041.15a indrajyeṣṭhā marudgaṇā devāsaḥ pūṣarātayaḥ |
 2.041.15c viśve mama śrutā havam ||
 2.041.16a ambitame naditame devitame sarasvati |
 2.041.16c apraśastā iva smasi praśastim amba nas kṛdhi ||
 2.041.17a tve viśvā sarasvati śritāyūṃṣi devyām |
 2.041.17c śunahotreṣu matsva prajāṃ devi didiḍdhi naḥ ||

2.041.18a imā brahma sarasvati juṣasva vājinīvati |
2.041.18c yā te manma gr̥tsamadā ṛtāvāri priyā deveṣu juhvati ||
2.041.19a pretāṃ yajñasya śambhuvā yuvām id ā vṛṇīmahe |
2.041.19c agniṃ ca havyvāhanam ||
2.041.20a dyāvā naḥ pṛthivī imaṃ sidhram adya diviṣṛṣam |
2.041.20c yajñam deveṣu yachatām ||
2.041.21a ā vām upastham adruhā devāḥ sīdantu yajñiyāḥ |
2.041.21c ihādya somapītaye ||

2.042.01a kanikradaj januṣam prabruvāṇa iyarti vācam ariteva nāvam |
2.042.01c sumaṅgalaś ca śakune bhavāsi mā tvā kā cid abhibhā viśvyā vidat ||
2.042.02a mā tvā śyena ud vadhīn mā suparṇo mā tvā vidad iṣumān viro astā |
2.042.02c pitryām anu pradiśam kanikradat sumaṅgalo bhadravādī vadeha ||
2.042.03a ava kranda dakṣiṇato gr̥hāṇām sumaṅgalo bhadravādī śakunte |
2.042.03c mā na stena īśata māghaśamso bṛhad vadema vidathe suvīrāḥ ||

2.043.01a pradakṣiṇid abhi gr̥ṇanti kāravo vayo vadanta ṛtuthā śakuntayaḥ |
2.043.01c ubhe vācau vadati sāmagā iva gāyatraṃ ca traiṣṭubhaṃ cānu rājati ||
2.043.02a udgāteva śakune sāma gāyasi brahmaputra iva savaneṣu śamsasi |
2.043.02c vṛṣeva vājī śiśumatir apītyā sarvato naḥ śakune bhadram ā vada viśvato naḥ
śakune puṇyam ā vada ||
2.043.03a āvadaṃs tvam śakune bhadram ā vada tūṣṇim āsīnaḥ sumatiṃ cikiddhi naḥ |
2.043.03c yad utpatan vadasi karkarir yathā bṛhad vadema vidathe suvīrāḥ ||

3. Mandala

- 3.001.01a somasya mā tavasaṃ vakṣy agne vahniṃ cakartha vidathe yajadhyai |
3.001.01c devāṃ achā dīdyad yuñje adriṃ śamāye agne tanvaṃ juṣasva ||
3.001.02a prāñcaṃ yajñam cakṛma vardhatām gīḥ samidbhir agniṃ namasā duvasyan |
3.001.02c divaḥ śasāsura vidathā kavīnām gr̥tsāya cit tavase gātum iṣuḥ ||
3.001.03a mayo dadhe medhiraḥ pūtadakṣo divaḥ subandhur januṣā pṛthivyāḥ |
3.001.03c avindann u darśatam apsv antar devāso agnim apasi svasīṇām ||
3.001.04a avardhayan subhagaṃ sapta yāvīḥ śvetam jajñānam aruṣam mahitvā |
3.001.04c śīsum na jātam abhy ārur aśvā devāso agniṃ janiman vapuṣyan ||
3.001.05a śukrebhir aṅgai raja ātatanvān kratum punānaḥ kavibhiḥ pavitraiḥ |
3.001.05c śocir vasānaḥ pary āyur apām śriyo mimīte bṛhatīr anūnāḥ ||
3.001.06a vavrājā sīm anadatīr adabdhā divo yāvīr avasānā anagnāḥ |
3.001.06c sanā atra yuvatayaḥ sayonīr ekaṃ garbham dadhire sapta vānīḥ ||
3.001.07a stīrṇā asya saṃhato viśvarūpā ghṛtasya yonau sravathe madhūnām |
3.001.07c asthur atra dhenavaḥ pinvamānā mahī dasmasya mātārā samīcī ||
3.001.08a babhrānaḥ sūno sahaso vy adyaud dadhānaḥ śukrā rabhasā vapūṃṣi |
3.001.08c ścotanti dhārā madhuno ghṛtasya vṛṣā yatra vāvṛdhe kāvyena ||
3.001.09a pituś cid ūdhar januṣā viveda vy asya dhārā asṛjad vi dhenāḥ |
3.001.09c guhā carantaṃ sakhībhiḥ śivebhir divo yāvībhir na guhā babhūva ||
3.001.10a pituś ca garbham janituś ca babhre pūrvīr eko adhayat pīpyānāḥ |
3.001.10c vṛṣṇe sapatnī śucaye sabandhū ubhe asmaī manuṣye ni pāhi ||
3.001.11a urau mahāṃ anibādhe vavardhāpo agniṃ yaśasaḥ saṃ hi pūrvīḥ |
3.001.11c ṛtasya yonāv aśayad damūnā jāminām agnir apasi svasīṇām ||
3.001.12a akro na babhriḥ samithe mahīnām didṛkṣeyaḥ sūnave bhāṛjīkaḥ |
3.001.12c ud usriyā janitā yo jajānāpām garbho nṛtamo yahvo agniḥ ||
3.001.13a apām garbham darśatam oṣadhīnām vanā jajāna subhagā virūpam |
3.001.13c devāsaś cin manasā saṃ hi jagmuḥ paniṣṭham jātam tavasaṃ duvasyan ||
3.001.14a bṛhanta id bhānavo bhāṛjīkam agniṃ sacanta vidyuto na śukrāḥ |
3.001.14c guheva vṛddham sadasi sve antar apāra ūrve amṛtam duhānāḥ ||
3.001.15a īde ca tvā yajamāno havirbhir īde sakhitvaṃ sumatiṃ nikāmaḥ |
3.001.15c devair avo mimihi saṃ jaritre rakṣā ca no damyebhir anikaiḥ ||
3.001.16a upakṣetāras tava supraṇīte 'gne viśvāni dhanyā dadhānāḥ |
3.001.16c suretasā śravasā tuñjamānā abhi śyāma pṛtanāyūmr̥ adevān ||
3.001.17a ā devānām abhavaḥ ketur agne mandro viśvāni kāvyāni vidvān |
3.001.17c prati martāṃ avāsayo damūnā anu devān rathiro yāsi sādhan ||
3.001.18a ni durōṇe amṛto martyānām rājā sasāda vidathāni sādhan |
3.001.18c ghṛtapratīka urviyā vy adyaud agnir viśvāni kāvyāni vidvān ||
3.001.19a ā no gahi sakhyebhiḥ śivebhir mahān mahībhir ūtibhiḥ saraṇyan |
3.001.19c asme rayim bahulaṃ saṃtarutraṃ suvācam bhāgaṃ yaśasaṃ kṛdhī naḥ ||
3.001.20a etā te agne janimā sanāni pra pūrvyāya nūtanāni vocam |
3.001.20c mahānti vṛṣṇe savanā kṛtemā janmañ-janman nihito jātavedāḥ ||
3.001.21a janmañ-janman nihito jātavedā viśvāmitrebhir idhyate ajasraḥ |
3.001.21c tasya vayaṃ sumatau yajñīyasyāpi bhadre saumanase syāma ||
3.001.22a imaṃ yajñam sahasāvan tvaṃ no devatrā dhehi suktrato rarānaḥ |
3.001.22c pra yamsi hotar bṛhatīr iṣo no 'gne mahi draviṇam ā yajasva ||
3.001.23a idām agne purudaṃsam sanim goḥ śasvattamaṃ havamānāya sādha |

3.001.23c syān naḥ sūnus tanayo vijāvāgne sā te sumatir bhūtv asme ||

- 3.002.01a vaiśvānarāya dhiṣaṇām ṛtāvṛdhe ghṛtaṃ na pūtam agnaye janāmasi |
3.002.01c dvitā hotāram manuṣaś ca vāghato dhiyā rathaṃ na kuliśaḥ sam ṛṇvati ||
3.002.02a sa rocayaj januṣā rodasī ubhe sa mātror abhavat putra iḍyaḥ |
3.002.02c havyvād agnir ajaraś canohito dūḍabho viśām atithir vibhāvasuḥ ||
3.002.03a kratvā dakṣasya taruṣo vidharmaṇi devāso agniṃ janayanta cittibhiḥ |
3.002.03c rurucānam bhānunā jyotiṣā mahām atyaṃ na vājaṃ saniṣyann upa bruve ||
3.002.04a ā mandrasya saniṣyanto vareṇyaṃ vṛṇīmahe ahraṃ vājam ṛgmiyam |
3.002.04c rātim bhṛgūṇām uśijaṃ kavikratum agniṃ rājantaṃ divyena śociṣā ||
3.002.05a agniṃ sumnāya dadhire puro janā vājaśravasam iha vṛktabarhiṣaḥ |
3.002.05c yatasrucaḥ surucaṃ viśvadevyāṃ rudraṃ yajñānām sādhadīṣṭim apasām ||
3.002.06a pāvakaśoce tava hi kṣayam pari hotar yajñeṣu vṛktabarhiṣo naraḥ |
3.002.06c agne duva ichamānāsa āpyam upāsate draviṇaṃ dhehi tebhyaḥ ||
3.002.07a ā rodasī aprṇad ā svar mahaj jātaṃ yad enam apaso adhārayan |
3.002.07c so adhvarāya pari ṇiyate kavir atyo na vājasātaye canohitaḥ ||
3.002.08a namasyata havvadātiṃ svadhvaraṃ duvasyata dāmyaṃ jātavedasam |
3.002.08c rathir ṛtasya bṛhato vicarṣaṇir agnir devānām abhavat purohitaḥ ||
3.002.09a tisro yahvasya samidhaḥ pariṃmano 'gner apunann uśijo amṛtyavaḥ |
3.002.09c tāsām ekām adadhur martye bhujam u lokam u dve upa jānim iyatuḥ ||
3.002.10a viśām kavim viśpatim mānuṣir iṣaḥ saṃ sīm akṛṇvan svadhitiṃ na tejase |
3.002.10c sa udvato nivato yāti veviṣat sa garbham eṣu bhuvaneṣu dīdharat ||
3.002.11a sa jinvate jaṭhāreṣu prajajñivān vṛṣā citreṣu nānadan na siṃhaḥ |
3.002.11c vaiśvānaraḥ pṛthupājā amartyo vasu ratnā dayamāno vi dāsuṣe ||
3.002.12a vaiśvānaraḥ pratnathā nākam āruhad divas pṛṣṭham bhandamānaḥ sumanmabhiḥ |
3.002.12c sa pūrvavaj janayañ jantave dhanam samānam ajmam pary eti jāgṛviḥ ||
3.002.13a ṛtāvānaṃ yajñiyaṃ vipram ukthyam ā yaṃ dadhe mātariśvā divi kṣayam |
3.002.13c taṃ citrayāmaṃ harikeśam īmahe sudītim agniṃ suvitāya navyase ||
3.002.14a śucim na yāmann iṣiraṃ swardṛśaṃ ketuṃ divo rocanasthām uṣarbudham |
3.002.14c agnim mūrdhānaṃ divo apratiṣkutaṃ tam īmahe namasā vājinam bṛhat ||
3.002.15a mandraṃ hotāram śucim advayāvinaṃ damūnasam ukhyaṃ viśvacarṣaṇim |
3.002.15c rathaṃ na citraṃ vapuṣāya darśatam manurhitaṃ sadam id rāya īmahe ||

- 3.003.01a vaiśvānarāya pṛthupājase vipo ratnā vidhanta dharuṇeṣu gātave |
3.003.01c agnir hi devāñ amṛto duvasyaty athā dharmāṇi sanatā na dūduṣat ||
3.003.02a antar dūto rodasī dasma iyate hotā niṣatto manuṣaḥ purohitaḥ |
3.003.02c kṣayam bṛhantaṃ pari bhūṣati dyubhir devebhir agnir iṣito dhiyāvasuḥ ||
3.003.03a ketuṃ yajñānām vidathasya sādhanam viprāso agnim mahayanta cittibhiḥ |
3.003.03c apāṃsi yasminn adhi saṃdadhur giras tasmin sumnāni yajamāna ā cake ||
3.003.04a pitā yajñānām asuro vipaścitām vimānam agnir vayunaṃ ca vāghatām |
3.003.04c ā viveśa rodasī bhūrivarpasā purupriyo bhandate dhāmabhiḥ kaviḥ ||
3.003.05a candram agniṃ candrarathaṃ harivrataṃ vaiśvānaram apsuṣadaṃ svarvidam |
3.003.05c vigāhaṃ tūrṇim taviṣibhir āvṛtam bhūrṇim devāsa iha suśriyaṃ dadhuḥ ||
3.003.06a agnir devebhir manuṣaś ca jantubhis tanvāno yajñam purupeśasaṃ dhiyā |
3.003.06c rathir antar iyate sādhadīṣṭibhir jiro damūnā abhiśasticātanaḥ ||
3.003.07a agne jarasva svapatya āyuny ūrjā pinvasva sam iṣo didihi naḥ |

3.003.07c vayāṃsi jinva bṛhataś ca jāgṛva uśig devānām asi sukratur vipām ||
 3.003.08a viśpatiṃ yahvam atithiṃ naraḥ sadā yantāraṃ dhinām uśijaṃ ca vāghatām |
 3.003.08c adhvarāṇām cetanaṃ jātavedasam pra śaṃsanti namasā jūtibhir vṛdhe ||
 3.003.09a vibhāvā devaḥ suraṇaḥ pari kṣitir agnir babhūva śavasā sumadrathaḥ |
 3.003.09c tasya vratāni bhūripoṣiṇo vayam upa bhūṣema dama ā suvrktibhiḥ ||
 3.003.10a vaiśvānara tava dhāmāny ā cake yebhiḥ svarvid abhavo vicakṣaṇa |
 3.003.10c jāta āpṛṇo bhuvanāni rodasī agne tā viśvā paribhūr asi tmanā ||
 3.003.11a vaiśvānarasya daṃsanābhyo bṛhad ariṇād ekaḥ svapasyayā kaviḥ |
 3.003.11c ubhā pitarā mahayann ajāyatāgnir dyāvāpṛthivī bhūriretasā ||

3.004.01a samit-samit sumanā bodhy asme śucā-śucā sumatiṃ rāsi vasvaḥ |
 3.004.01c ā deva devān yajathāya vakṣi sakhā sakhin sumanā yakṣy agne ||
 3.004.02a yaṃ devāśas trir ahann āyajante dive-dive varuṇo mitro agniḥ |
 3.004.02c semaṃ yajñam madhumantaṃ kṛdhī nas tanūnapād ghṛtayoṇiṃ vidhantam ||
 3.004.03a pra dīdhitir viśvavārā jigāti hotāram iḍaḥ prathamam yajadhyai |
 3.004.03c achā namobhir vṛṣabham vandadhyai sa devān yakṣad iṣito yajiyān ||
 3.004.04a ūrdhvo vām gātur adhvare akāry ūrdhvā śociṃṣi prasthitā rajāṃsi |
 3.004.04c divo vā nābhā ny asādi hotā strṇīmahi devavyacā vi barhiḥ ||
 3.004.05a sapta hotrāni manasā vṛṇānā invanto viśvam prati yann ṛtena |
 3.004.05c nṛpeśaso vidatheṣu pra jātā abhīmam yajñam vi caranta pūrvīḥ ||
 3.004.06a ā bhandamāne uśasā upāke uta smayete tanvā virūpe |
 3.004.06c yathā no mitro varuṇo jujoṣad indro marutvām̃ uta vā mahobhiḥ ||
 3.004.07a daivyā hotārā prathamā ny ṛñje sapta pṛkṣāsaḥ svadhayā madanti |
 3.004.07c ṛtam śaṃsanta ṛtam it ta āhur anu vrataṃ vratapā dīdhyānāḥ ||
 3.004.08a ā bhāratī bhāratībhiḥ sajoṣā iḍā devair manuṣyebhir agniḥ |
 3.004.08c sarasvatī sārāsvatebhir arvāk tisro devīr barhir edaṃ sadantu ||
 3.004.09a tan nas turīpam adha poṣayitnu deva tvaṣṭar vi rarāṇaḥ syasva |
 3.004.09c yato vīraḥ karmaṇyaḥ sudakṣo yuktagrāvā jāyate devakāmaḥ ||
 3.004.10a vanaspate 'va sṛjopa devān agnir haviḥ śamitā sūdayāti |
 3.004.10c sed u hotā satyataro yajāti yathā devānām janimāni veda ||
 3.004.11a ā yāhy agne samidhāno arvān indreṇa devaiḥ saratham turebhiḥ |
 3.004.11c barhir na āstām aditiḥ suputrā svāhā devā amṛtā mādayantām ||

3.005.01a praty agnir uśasāś cekitāno 'bodhi vipraḥ padaviḥ kavīnām |
 3.005.01c pṛthupājā devayadbhiḥ samiddho 'pa dvārā tamaso vahnir āvaḥ ||
 3.005.02a pred v agnir vāvṛdhe stomebhir gīrbhi stotṛṇām namasya ukthaiḥ |
 3.005.02c pūrvīr ṛtasya saṃdṛśāś cakānaḥ saṃ dūto adyaud uśaso viroke ||
 3.005.03a adhāyy agnir mānuṣīṣu vikṣv apām garbho mitra ṛtena sādhan |
 3.005.03c ā haryato yajataḥ sānv asthād abhūd u vipro havyo matīnām ||
 3.005.04a mitro agnir bhavati yat samiddho mitro hotā varuṇo jātavedāḥ |
 3.005.04c mitro adhvaryur iṣiro damūnā mitraḥ sindhūnām uta parvatānām ||
 3.005.05a pāti priyam ripo agram padaṃ veḥ pāti yahvaś caraṇam sūryasya |
 3.005.05c pāti nābhā saptaśīrṣāṇam agniḥ pāti devānām upamādam ṛśvaḥ ||
 3.005.06a ṛbhūś cakra īdyaṃ cāru nāma viśvāni devo vayunāni vidvān |
 3.005.06c sasasya carma ghṛtavat padaṃ ves tad id agnī rakṣaty aprayuchan ||
 3.005.07a ā yonim agnir ghṛtavantam asthāt pṛthupragāṇam uśantam uśānaḥ |
 3.005.07c dīdyānaḥ śucir ṛśvaḥ pāvakaḥ punaḥ-punar mātārā navyasī kaḥ ||

3.005.08a sadyo jāta oṣadhībhīr vavakṣe yadī vardhanti prasvo ghr̥tena |
 3.005.08c āpa iva pravatā śumbhamānā uruṣyad agniḥ pitror upasthe ||
 3.005.09a ud u ṣṭutaḥ samidhā yahvo adyaud varṣman divo adhi nābhā pṛthivyāḥ |
 3.005.09c mitro agnir īdyo mātariśvā dūto vakṣad yajathāya devān ||
 3.005.10a ud astambhīt samidhā nākam iṣvo 'gnir bhavann uttamo rocanānām |
 3.005.10c yadī bhṛgubhyaḥ pari mātariśvā guhā santam havyavāham samidhe ||
 3.005.11a idām agne purudaṃsam sanim goḥ śaśvattamaḥ havamānāya sādha |
 3.005.11c syān naḥ sūnus tanayo vijāvāgne sā te sumatir bhūtv asme ||

3.006.01a pra kāravo mananā vacyamānā devadr̥cīm nayata devayantaḥ |
 3.006.01c dakṣiṇāvāḍ vājini prācy eti havir bharanty agnaye ghr̥tācī ||
 3.006.02a ā rodasī apr̥ṇā jāyamāna uta pra rikthā adha nu prayajyo |
 3.006.02c divas cid agne mahinā pṛthivyā vacyantam te vahnayaḥ saptajihvāḥ ||
 3.006.03a dyauś ca tvā pṛthivī yajñiyāso ni hotāram sādāyante damāya |
 3.006.03c yadī viśo mānuṣir devayantiḥ prayasvatir idate śukram arcīḥ ||
 3.006.04a mahān sadhasthe dhruva ā niṣatto 'ntar dyāvā māhine haryamānaḥ |
 3.006.04c āskre sapatnī ajare amṛkte sabardughe urugāyasya dhenū ||
 3.006.05a vratā te agne mahato mahāni tava kratvā rodasī ā tatantha |
 3.006.05c tvam dūto abhavo jāyamānas tvam netā vṛṣabha carṣaṇinām ||
 3.006.06a ṛtasya vā keśinā yogyābhīr ghr̥tasnuvā rohitā dhuri dhiṣva |
 3.006.06c athā vaha devān deva viśvān svadhvarā kṛṇuhi jātavedaḥ ||
 3.006.07a divas cid ā te rucayanta rokā uṣo vibhātir anu bhāsi pūrvīḥ |
 3.006.07c apo yad agna uśadhag vaneṣu hotur mandrasya panayanta devāḥ ||
 3.006.08a urau vā ye antarikṣe madanti divo vā ye rocane santi devāḥ |
 3.006.08c ūmā vā ye suhavāso yajatrā āyemire rathyo agne aśvāḥ ||
 3.006.09a aibhir agne saratham yāhy arvān nānāratham vā vibhavo hy aśvāḥ |
 3.006.09c patnīvatas trimśataḥ trimś ca devān anuṣvadham ā vaha mādayasva ||
 3.006.10a sa hotā yasya rodasī cid urvī yajñam-yajñam abhi vṛdhe gṛṇītaḥ |
 3.006.10c prācī adhvareva tasthatuḥ sumeke ṛtāvari ṛtajātasya satye ||
 3.006.11a idām agne purudaṃsam sanim goḥ śaśvattamaḥ havamānāya sādha |
 3.006.11c syān naḥ sūnus tanayo vijāvāgne sā te sumatir bhūtv asme ||

3.007.01a pra ya āruḥ śitipṛṣṭhasya dhāser ā mātārā viviśuḥ sapta vāñīḥ |
 3.007.01c parikṣitā pitarā sam carete pra sarsrāte dīrgham āyuh prayakṣe ||
 3.007.02a divakṣaso dhenavo vṛṣṇo aśvā devīr ā tasthau madhumad vahantiḥ |
 3.007.02c ṛtasya tvā sadasi kṣemayantam pary ekā carati vartanim gauḥ ||
 3.007.03a ā sīm arohat suyamā bhavantiḥ patiś cikitvān rayivid rayīnām |
 3.007.03c pra nilapṛṣṭho atasasya dhāses tā avāsayat purudhapratīkaḥ ||
 3.007.04a mahi tvāṣṭram ūrjayantir ajuryam stabhūyamānam vahato vahanti |
 3.007.04c vy āṅgebhīr didyutānaḥ sadhastha ekām iva rodasī ā viveśa ||
 3.007.05a jānanti vṛṣṇo aruṣasya śevam uta bradhnasya śāsane raṇanti |
 3.007.05c divorucaḥ suruco rocamānā idā yeṣam gaṇyā māhinā gīḥ ||
 3.007.06a uto pitṛbhyām pravidānu ghoṣam maho mahadbhyām anayanta sūṣam |
 3.007.06c ukṣā ha yatra pari dhānam aktor anu svam dhāma jaritur vavakṣa ||
 3.007.07a adhvaryubhiḥ pañcabhiḥ sapta viprāḥ priyam rakṣante nihitam padaḥ veḥ |
 3.007.07c prāñco madanty ukṣaṇo ajuryā devā devānām anu hi vratā guḥ ||
 3.007.08a daivyā hotārā prathamā ny rñje sapta pṛkṣāsaḥ svadhayā madanti |

3.007.08c ṛtaṃ śamsanta ṛtaṃ it ta āhur anu vratam vratapā dīdhyānāḥ ||
 3.007.09a vṛṣāyante mahe atyāya pūrvīr vṛṣṇe citrāya raśmayāḥ suyāmāḥ |
 3.007.09c deva hotar mandratarasā cikivān maho devān rodasī eha vakṣi ||
 3.007.10a pṛkṣaprayajo draviṇaḥ suvācaḥ suketava uṣaso revad uṣuḥ |
 3.007.10c uto cid agne mahinā pṛthivyāḥ kṛtaṃ cid enaḥ sam mahe daśasya ||
 3.007.11a idām agne purudaṃsam sanim goḥ śaśvattamaṃ havamānāya sādha |
 3.007.11c syān naḥ sūnus tanayo vijāvāgne sā te sumatir bhūtv asme ||

3.008.01a añjanti tvām adhvare devayanto vanaspate madhunā daivyena |
 3.008.01c yad ūrdhvas tiṣṭhā draviṇeha dhattād yad vā kṣayo mātūr asyā upasthe ||
 3.008.02a samiddhasya śrayamāṇaḥ purastād brahma vanvāno ajaraṃ suvīram |
 3.008.02c āre asmad amatim bādhamāna uc chrayasva mahate saubhagāya ||
 3.008.03a uc chrayasva vanaspate varṣman pṛthivyā adhi |
 3.008.03c sumiti mīyamāno varco dhā yajñavāhase ||
 3.008.04a yuvā suvāsāḥ parivīta āgāt sa u śreyān bhavati jāyamānaḥ |
 3.008.04c taṃ dhīrāsaḥ kavaya un nayanti svādhyo manasā devayantaḥ ||
 3.008.05a jāto jāyate sudinatve ahnām samarya ā vidathe vardhamānaḥ |
 3.008.05c punanti dhīrā apaso maṇṣā devayā vipra ud iyarti vācam ||
 3.008.06a yān vo naro devayanto nimimyur vanaspate svadhitir vā tatakṣa |
 3.008.06c te devāsaḥ svaravas tasthivāṃsaḥ prajāvad asme didhiṣantu ratnam ||
 3.008.07a ye vṛkṇāso adhi kṣami nimitāso yatasrucaḥ |
 3.008.07c te no vyantu vāryam devatrā kṣetrasādhasaḥ ||
 3.008.08a ādityā rudrā vasavaḥ sunīthā dyāvākṣāmā pṛthivī antarikṣam |
 3.008.08c sajoṣaso yajñam avantu devā ūrdhvaṃ kṛṇvantv adhvarasya ketum ||
 3.008.09a haṃsā iva śreṇīso yatānāḥ śukrā vasānāḥ svaravo na āguḥ |
 3.008.09c unnīyamānāḥ kavibhiḥ purastād devā devānām api yanti pāthaḥ ||
 3.008.10a śṛṅgāṇivec chṛṅgiṇām sam dadṛṣre caśālavantaḥ svaravaḥ pṛthivyām |
 3.008.10c vāghadbhir vā vihava śroṣamānā asmām avantu pṛtanājyeṣu ||
 3.008.11a vanaspate śatavalśo vi roha sahasravalśā vi vayam ruhema |
 3.008.11c yaṃ tvām ayaṃ svadhitis tejamānaḥ praṇināya mahate saubhagāya ||

3.009.01a sakhāyas tvā vavṛmahe devam martāsa ūtaye |
 3.009.01c apām napātaṃ subhagaṃ sudīditim supratūrtim anehasam ||
 3.009.02a kāyamāno vanā tvam yan mātīr ajagann apaḥ |
 3.009.02c na tat te agne pramṛṣe nivartanaṃ yad dūre sann ihābhavaḥ ||
 3.009.03a ati tṛṣṭam vavakṣithāthaiva sumanā asi |
 3.009.03c pra-prānye yanti pary anya āsate yeṣām sakhye asi śritāḥ ||
 3.009.04a iyivāṃsam ati sridhaḥ śaśvatīr ati saścataḥ |
 3.009.04c anv im avindan nicirāso adruho 'psu siṃham iva śritam ||
 3.009.05a sasṛvāṃsam iva tmanāgnim itthā tirohitam |
 3.009.05c ainam nayan mātariśvā parāvato devebhyo mathitam pari ||
 3.009.06a taṃ tvā martā aḡrbhṇata devebhyo havyaavāhana |
 3.009.06c viśvān yad yajñāṃ abhipāsi mānuṣa tava kratvā yaviṣṭhya ||
 3.009.07a tad bhadraṃ tava daṃsanā pākāya cic chadayati |
 3.009.07c tvām yad agne paśavaḥ samāsate samiddham apīsarvare ||
 3.009.08a ā juhota svadhvaraṃ śīram pāvakaśociṣam |
 3.009.08c āsum dūtam ajiram pratnam idyam śruṣṭi devam saparyata ||

3.009.09a trīṇi śatā trī sahasrāṇy agniṃ trimśac ca devā nava cāsaparyan |
3.009.09c aukṣan ghṛtair astrīṇan barhir asmā ād id dhotāraṃ ny asādayanta ||

3.010.01a tvām agne manīṣiṇaḥ samrājaṃ carṣaṇīnām |
3.010.01c devam martāsa indhate sam adhware ||
3.010.02a tvām yajñeṣv ṛtvijam agne hotāraṃ ṛdate |
3.010.02c gopā ṛtasya dīdhi sve dame ||
3.010.03a sa ghā yas te dadāśati samidhā jātavedase |
3.010.03c so agne dhatte suvīryaṃ sa puṣyati ||
3.010.04a sa ketur adhvarāṇām agnir devebhir ā gamat |
3.010.04c añjānaḥ sapta hotṛbhir haviṣmate ||
3.010.05a pra hotre pūrvyam vaco 'gnaye bharatā bṛhat |
3.010.05c vipām jyotiṃṣi bibhrate na vedhase ||
3.010.06a agniṃ vardhantu no giro yato jāyata ukthyaḥ |
3.010.06c mahe vājāya draviṇāya darśataḥ ||
3.010.07a agne yajīṣṭho adhware devān devayate yaja |
3.010.07c hotā mandro vi rājasy ati sridhaḥ ||
3.010.08a sa naḥ pāvaka dīdhi dyumad asme suvīryam |
3.010.08c bhavā stotṛbhyo antamaḥ svastaye ||
3.010.09a taṃ tvā viprā vipanyavo jāgrvāṃsaḥ sam indhate |
3.010.09c havyvāham amartyaṃ sahovṛdham ||

3.011.01a agnir hotā purohito 'dhvarasya vicarṣaṇiḥ |
3.011.01c sa veda yajñam ānuṣak ||
3.011.02a sa havyvavād amartya uśig dūtaś canohitaḥ |
3.011.02c agnir dhiyā sam ṛṇvati ||
3.011.03a agnir dhiyā sa cetati ketur yajñasya pūrvyāḥ |
3.011.03c arthaṃ hy asya taraṇi ||
3.011.04a agniṃ sūnuṃ sanaśrutam sahaso jātavedasam |
3.011.04c vahniṃ devā akṛṇvata ||
3.011.05a adābhyaḥ puraetā viśām agnir mānuṣiṇām |
3.011.05c tūrṇi rathaḥ sadā navaḥ ||
3.011.06a sāhvān viśvā abhiyujaḥ kratuḥ devānām amṛktaḥ |
3.011.06c agnis tuviśravastamaḥ ||
3.011.07a abhi prayāṃsi vāhasā dāśvām̐ aśnoti martyāḥ |
3.011.07c kṣayam pāvakaśociṣaḥ ||
3.011.08a pari viśvāni sudhitāgner aśyāma manmabhiḥ |
3.011.08c viprāso jātavedasaḥ ||
3.011.09a agne viśvāni vāryā vājeṣu saniṣāmahe |
3.011.09c tve devāsa erire ||

3.012.01a indrāgnī ā gataṃ sutam gīrbhir nabho vareṇyam |
3.012.01c asya pātam dhiyeṣitā ||
3.012.02a indrāgnī jarituḥ sacā yajño jigāti cetanaḥ |
3.012.02c ayā pātam imaṃ sutam ||
3.012.03a indram agniṃ kavichadā yajñasya jūtyā vṛṇe |

3.012.03c tā somasyeha tṛmpatām ||
 3.012.04a tośā vṛtrahaṇā huve sajivvānāparājitā |
 3.012.04c indrāgnī vājasātāmā ||
 3.012.05a pra vām arcanty ukthino nīthāvīdo jaritārah |
 3.012.05c indrāgnī iṣa ā vṛṇe ||
 3.012.06a indrāgnī navatim puro dāsapatnīr adhūnutam |
 3.012.06c sākam ekena karmaṇā ||
 3.012.07a indrāgnī apasas pary upa pra yanti dhītayaḥ |
 3.012.07c ṛtasya pathyā anu ||
 3.012.08a indrāgnī taviṣāṇi vām sadhasthāni prayāmsi ca |
 3.012.08c yuvor aptūryaṃ hitam ||
 3.012.09a indrāgnī rocanā divaḥ pari vājeṣu bhūṣathaḥ |
 3.012.09c tad vām ceti pra vīryam ||

3.013.01a pra vo devāyāgnaye barhiṣṭham arcāsmāi |
 3.013.01c gamad devebhir ā sa no yajīṣṭho barhir ā sadat ||
 3.013.02a ṛtāvā yasya rodasī dakṣaṃ sacanta ūtayaḥ |
 3.013.02c haviṣmantas tam īdate taṃ saniṣyanto 'vase ||
 3.013.03a sa yantā vipra eṣāṃ sa yajñānām athā hi ṣaḥ |
 3.013.03c agniṃ taṃ vo duvasyata dātā yo vanitā magham ||
 3.013.04a sa naḥ śarmāni vītaye 'gnir yachatu śaṃtamā |
 3.013.04c yato naḥ pruṣṇavad vasu divi kṣitibhyo apsv ā ||
 3.013.05a dīdivāmsam apūrvyaṃ vasvibhir asya dhītibhiḥ |
 3.013.05c ṛkvāṇo agnim indhate hotāraṃ viśpatiṃ viśām ||
 3.013.06a uta no brahmann aviṣa uktheṣu devahūtamaḥ |
 3.013.06c śaṃ naḥ śocā marudvṛdho 'gne sahasrasātamaḥ ||
 3.013.07a nū no rāsva sahasravat tokavat puṣṭimad vasu |
 3.013.07c dyumad agne suvīryaṃ varṣiṣṭham anupakṣitam ||

3.014.01a ā hotā mandro vidathāny asthāt satyo yajvā kavītamāḥ sa vedhāḥ |
 3.014.01c vidyudrathaḥ sahasas putro agniḥ śociṣkeśaḥ pṛthivyām pājo aśret ||
 3.014.02a ayāmi te namaūktim juṣasva ṛtāvas tubhyaṃ cetate sahasvaḥ |
 3.014.02c vidvāṃ ā vakṣi viduṣo ni ṣatsi madhya ā barhir ūtaye yajatra ||
 3.014.03a dravatāṃ ta uṣasā vājayantī agne vātasya pathyābhir acha |
 3.014.03c yat sīm añjanti pūrvyaṃ havirbhir ā vandhureva tasthatur duroṇe ||
 3.014.04a mitraś ca tubhyaṃ varuṇaḥ sahasvo 'gne viśve marutaḥ sumnam arcan |
 3.014.04c yac chociṣā sahasas putra tiṣṭhā abhi kṣitih prathayan sūryo nṛṇ ||
 3.014.05a vayaṃ te adya rarimā hi kāmam uttānahastā namasopasadya |
 3.014.05c yajīṣṭhena manasā yakṣi devān asredhatā manmanā vipro agne ||
 3.014.06a tvad dhi putra sahaso vi pūrvīr devasya yanty ūtayo vi vājāḥ |
 3.014.06c tvam dehi sahasriṇaṃ rayim no 'drogheṇa vacasā satyam agne ||
 3.014.07a tubhyaṃ dakṣa kavikrato yānimā deva martāso adhvare akarma |
 3.014.07c tvam viśvasya surathasya bodhi sarvaṃ tad agne amṛta svadeha ||

3.015.01a vi pājasā pṛthunā śosucāno bādhasva dviṣo rakṣaso amīvāḥ |
 3.015.01c suśarmaṇo bṛhataḥ śarmaṇi syām agner aham suhavyasya praṇītau ||

3.015.02a tvam no asyā uṣaso vyuṣṭau tvam sūra udite bodhi gopāḥ |
 3.015.02c janmeva nityam tanayam juṣasva stomam me agne tanvā sujāta ||
 3.015.03a tvam nṛcakṣā vṛṣabhānu pūrvīḥ kṛṣṇāsv agne aruṣo vi bhāhi |
 3.015.03c vaso neṣi ca parṣi cāty amhaḥ kṛdhī no rāya uśijo yaviṣṭha ||
 3.015.04a aṣādho agne vṛṣabho didīhi puro viśvāḥ saubhagā samjigivān |
 3.015.04c yajñasya netā prathamasya pāyor jātavedo bṛhataḥ supranīte ||
 3.015.05a achidrā śarma jaritaḥ purūṇi devāṃ achā dīdyānaḥ sumedhāḥ |
 3.015.05c ratho na sasnir abhi vakṣi vājam agne tvam rodasī naḥ sumeke ||
 3.015.06a pra pīpaya vṛṣabha jinva vājān agne tvam rodasī naḥ sudoghe |
 3.015.06c devebhir deva surucā rucāno mā no martasya durmatih pari ṣṭhāt ||
 3.015.07a idām agne purudaṃsam sanim goḥ śāśvattamaḥ havamānāya sādha |
 3.015.07c syān naḥ sūnus tanayo vijāvāgne sā te sumatir bhūtv asme ||

3.016.01a ayam agnih suvīryasyeśe mahaḥ saubhagasya |
 3.016.01c rāya īse svapatyasya gomata īse vṛtrahathānām ||
 3.016.02a imaḥ naro marutaḥ saścatā vṛdham yasmin rāyaḥ śevṛdhāsaḥ |
 3.016.02c abhi ye santi pṛtanāsu dūḍhyo viśvāhā śatrum ādabhuḥ ||
 3.016.03a sa tvam no rāyaḥ śiśihi mīdhvo agne suvīryasya |
 3.016.03c tuvidyumna varṣiṣṭhasya prajāvato 'namīvasya śuṣmīnaḥ ||
 3.016.04a cakrir yo viśvā bhuvanābhi sāsahīś cakrir deveṣv ā duvaḥ |
 3.016.04c ā deveṣu yatata ā suvīrya ā śamsa uta nṛṇām ||
 3.016.05a mā no agne 'mataye māvīratāyai rīradhaḥ |
 3.016.05c māgotāyai sahasas putra mā nide 'pa dveṣāṃsy ā kṛdhi ||
 3.016.06a śagdhi vājasya subhaga prajāvato 'gne bṛhato adhvare |
 3.016.06c sam rāyā bhūyasā sṛja mayobhunā tuvidyumna yaśasvatā ||

3.017.01a samidhyamānaḥ prathamānu dharmā sam aktubhir aiyate viśvavāraḥ |
 3.017.01c śociṣkeśo ghṛtanirṇik pāvakaḥ suyajño agnir yajathāya devān ||
 3.017.02a yathāyajo hotram agne pṛthivyā yathā divo jātavedaś cikivān |
 3.017.02c evānena haviṣā yakṣi devān manuṣvad yajñam pra tiremam adya ||
 3.017.03a trīṇy āyūṃṣi tava jātavedas tisra ājānīr uṣasas te agne |
 3.017.03c tābhir devānām avo yakṣi vidvān athā bhava yajamānāya śam yoh ||
 3.017.04a agniḥ sudītiḥ sudṛṣam gṛṇanto namasyāmas tveḍyam jātavedaḥ |
 3.017.04c tvām dūtam aratiḥ havyvāham devā akṛṇvann amṛtasya nābhim ||
 3.017.05a yas tvad dhotā pūrvo agne yajiyān dvitā ca sattā svadhayā ca śambhuḥ |
 3.017.05c tasyānu dharmā pra yajā cikivto 'tha no dhā adhvaram devavītau ||

3.018.01a bhavā no agne sumanā upetau sakheva sakhye pitareva sādhuḥ |
 3.018.01c purudruho hi kṣitayo janānām prati pratīcīr dahatād arātīḥ ||
 3.018.02a tapo śv agne antarām amitrān tapā śamsam araruṣaḥ parasya |
 3.018.02c tapo vaso cikitāno acittān vi te tiṣṭhantām ajarā ayāsaḥ ||
 3.018.03a idhmenāgna ichamāno ghṛtena juhomi havyam tarase balāya |
 3.018.03c yāvad īse brahmaṇā vandamāna imām dhiyam śataseyāya devīm ||
 3.018.04a uc choṣiṣā sahasas putra stuto bṛhad vayaḥ śāsamāneṣu dhehi |
 3.018.04c revad agne viśvāmitreṣu śam yor marmṛjmā te tanvam bhūri kṛtvaḥ ||
 3.018.05a kṛdhi ratnam susanitar dhanānām sa ghed agne bhavasi yat samiddhaḥ |

3.018.05c stotur durone subhagasya revat sṛprā karasnā dadhiṣe vapūṃṣi ||

3.019.01a agniṃ hotāram pra vṛṇe miyedhe gṛtsaṃ kaviṃ viśvavidam amūram |
3.019.01c sa no yakṣad devatātā yajiyān rāye vājāya vanate maghāni ||
3.019.02a pra te agne haviṣmatim iyarmy achā sudyumnām rātinim ghṛtācīm |
3.019.02c pradakṣiṇid devatātim urāṇaḥ saṃ rātibhir vasubhir yajñam aśret ||
3.019.03a sa tejiyasā manasā tvota uta śikṣa svapatyasya śikṣoḥ |
3.019.03c agne rāyo nṛtamasya prabhūtau bhūyāma te suṣṭutayaś ca vasvaḥ ||
3.019.04a bhūrīni hi tve dadhire anikāgne devasya yajyavo janāsaḥ |
3.019.04c sa ā vaha devatātim yaviṣṭha śardho yad adya divyaṃ yajāsi ||
3.019.05a yat tvā hotāram anajan miyedhe niśādayanto yajathāya devāḥ |
3.019.05c sa tvam no agne 'viteha bodhy adhi śravāṃsi dhehi nas tanūṣu ||

3.020.01a agnim uṣasam aśvinā dadhikrām vyuṣṭiṣu havate vahnir ukthaiḥ |
3.020.01c sujyotiṣo naḥ śṛṇvantu devāḥ sajoṣaso adhvaram vāvaśānāḥ ||
3.020.02a agne trī te vājinā trī śadhasthā tisras te jihvā ṛtajāta pūrvih |
3.020.02c tisra u te tanvo devavātās tābhir naḥ pāhi giro aprayuchan ||
3.020.03a agne bhūrīni tava jātavedo deva svadhāvo 'mṛtasya nāma |
3.020.03c yāś ca māyā māyinām viśvaminva tve pūrvih samdadhuḥ pṛṣṭabandho ||
3.020.04a agnir netā bhaga iva kṣitīnām daivīnām deva ṛtupā ṛtāvā |
3.020.04c sa vṛtrahā sanayo viśvavedāḥ parśad viśvāti duriṭā gṛṇantam ||
3.020.05a dadhikrām agnim uṣasam ca devīm bṛhaspatim savitāram ca devam |
3.020.05c aśvinā mitrāvaruṇā bhagam ca vasūn rudrām ādityām iha huve ||

3.021.01a imaṃ no yajñam amṛteṣu dhehimā havya jātavedo juṣasva |
3.021.01c stokānām agne medaso ghṛtasya hotaḥ prāśāna prathamō niśadya ||
3.021.02a ghṛtavantaḥ pāvaka te stokā ścotanti medasaḥ |
3.021.02c svadharman devavitaye śreṣṭham no dhehi vāryam ||
3.021.03a tubhyaṃ stokā ghṛtaścuto 'gne viprāya santya |
3.021.03c ṛṣiḥ śreṣṭhaḥ sam idhyase yajñasya prāvitā bhava ||
3.021.04a tubhyaṃ ścotanty adhrigo śacīva stokāso agne medaso ghṛtasya |
3.021.04c kaviśasto bṛhatā bhānunāgā havya juṣasva medhira ||
3.021.05a ojiṣṭham te madhyato meda udbhṛtam pra te vyaṃ dadāmahe |
3.021.05c ścotanti te vaso stokā adhi tvaci prati tān devaśo vihi ||

3.022.01a ayaṃ so agnir yasmin somam indraḥ sutam dadhe jaṭhare vāvaśānaḥ |
3.022.01c sahasriṇam vājam atyaṃ na saptim sasavān san stūyase jātavedaḥ ||
3.022.02a agne yat te divi varcaḥ pṛthivyām yad ośadhiṣv apsv ā yajatra |
3.022.02c yenāntariṣam urv ātatantha tveṣaḥ sa bhānur arṇavo nṛcakṣāḥ ||
3.022.03a agne divo arṇam achā jigāsy achā devām ūciṣe dhiṣṇyā ye |
3.022.03c yā rocane parastāt sūryasya yāś cāvastād upatiṣṭhanta āpaḥ ||
3.022.04a puriṣyāso agnayaḥ prāvaṇebhiḥ sajoṣasaḥ |
3.022.04c juṣantām yajñam adruho 'namivā iṣo mahiḥ ||
3.022.05a iḍām agne purudaṃsam saniṃ goḥ śaśvattamaṃ havamānāya sādha |
3.022.05c syān naḥ sūnus tanayo vijāvāgne sā te sumatir bhūtv asme ||

3.023.01a nirmathitaḥ sudhita ā sadhasthe yuvā kavir adhvarasya praṇetā |
 3.023.01c jūryatsv agnir ajaro vaneṣv atrā dadhe amṛtaṃ jātavedāḥ ||
 3.023.02a amanthiṣṭām bhāratā revad agniṃ devaśravā devavātaḥ sudakṣam |
 3.023.02c agne vi paśya bṛhatābhi rāyeṣāṃ no netā bhavatād anu dyūn ||
 3.023.03a daśa kṣipaḥ pūrvyaṃ sīm ajijanan sujātam mātṛṣu priyam |
 3.023.03c agniṃ stuhi daivavātaṃ devaśravo yo janānām asad vaśi ||
 3.023.04a ni tvā dadhe vara ā pṛthivyā idāyās pade sudinatve ahnām |
 3.023.04c dṛṣadvatyām mānuṣa āpayāyām sarasvatyām revad agne didīhi ||
 3.023.05a idām agne purudaṃsaṃ saniṃ goḥ śaśvattamaṃ havamānāya sādha |
 3.023.05c syān naḥ sūnus tanayo vijāvāgne sā te sumatir bhūtv asme ||

3.024.01a agne sahasva pṛtanā abhimātir apāsya |
 3.024.01c duṣṭaras tarann arātir varco dhā yajñavāhase ||
 3.024.02a agna idā sam idhyase vītihoto amartyaḥ |
 3.024.02c juṣasva sū no adhvaram ||
 3.024.03a agne dyumnena jāgrve sahasaḥ sūnav āhuta |
 3.024.03c edam barhiḥ sado mama ||
 3.024.04a agne viśvebhir agnibhir devebhir mahayā giraḥ |
 3.024.04c yajñeṣu ya u cāyavaḥ ||
 3.024.05a agne dā dāśuṣe rayiṃ vīravantam pariṇasam |
 3.024.05c śiśiḥi naḥ sūnumataḥ ||

3.025.01a agne divaḥ sūnur asi pracetās tanā pṛthivyā uta viśvavedāḥ |
 3.025.01c ṛdhag devāṃ iha yajā cikitvaḥ ||
 3.025.02a agniḥ sanoti vīryāṇi vidvān sanoti vājam amṛtāya bhūṣan |
 3.025.02c sa no devāṃ eha vahā purukṣo ||
 3.025.03a agnir dyāvāpṛthivī viśvajanye ā bhāti devī amṛte amūraḥ |
 3.025.03c kṣayan vājaiḥ puruścandro namobhiḥ ||
 3.025.04a agna indraś ca dāśuṣo durone sutāvato yajñam ihopa yātam |
 3.025.04c amardhantā somapeyāya devā ||
 3.025.05a agne apāṃ sam idhyase durone nityaḥ sūno sahaso jātavedaḥ |
 3.025.05c sadhasthāni mahayamāna ūti ||

3.026.01a vaiśvānaram manasāgniṃ nicāyyā haviṣmanto anuṣatyam svarvidam |
 3.026.01c sudānuṃ devaṃ rathiraṃ vasūyavo gīrbhī raṇvaṃ kuśikāso havāmahe ||
 3.026.02a taṃ śubhram agniṃ avase havāmahe vaiśvānaram mātariśvānam ukthyam |
 3.026.02c bṛhaspatim manuṣo devatātaye vipraṃ śrotāram atithiṃ raghuṣyadam ||
 3.026.03a aśvo na krandañ janibhiḥ sam idhyate vaiśvānaraḥ kuśikebhir yuge-yuge |
 3.026.03c sa no agniḥ suvīryaṃ svaśvyam dadhātu ratnam amṛteṣu jāgrviḥ ||
 3.026.04a pra yantu vājās taviṣibhir agnayaḥ śubhe sammiślāḥ pṛṣatir ayukṣata |
 3.026.04c bṛhadukṣo maruto viśvavedasaḥ pra vepayanti parvatāṃ adābhyāḥ ||
 3.026.05a agniśriyo maruto viśvakṛṣṭaya ā tveṣam ugram ava īmahe vayam |
 3.026.05c te svānino rudriyā varṣanirñijaḥ siṃhā na heṣakratavaḥ sudānavaḥ ||
 3.026.06a vrātaṃ-vrātaṃ gaṇaṃ-gaṇaṃ suśastibhir agner bhāmam marutām oja īmahe |

3.026.06c pṛṣadaśvāso anavabhrarādhaso gantāro yajñam vidatheṣu dhīrāḥ ||
3.026.07a agnir asmi janmanā jātavedā ghṛtam me cakṣur amṛtam ma āsan |
3.026.07c arkas tridhātū rajaso vimāno 'jasro gharmo havir asmi nāma ||
3.026.08a tribhiḥ pavitrait apupod dhy arkam hṛdā matim jyotir anu prajānan |
3.026.08c varṣiṣṭham ratnam akṛta svadhābhir ād id dyāvapṛthivī pary apaśyat ||
3.026.09a śatadhāram utsam akṣīyamānam vipāscitam pitaram vaktvānām |
3.026.09c meḍim madantam pitror upasthe tam rodasī pipṛtam satyavācam ||

3.027.01a pra vo vājā abhidyo haviṣmanto ghṛtācyā |
3.027.01c devāñ jigāti sumnayuḥ ||
3.027.02a iḍe agniṃ vipāscitam girā yajñasya sādhanam |
3.027.02c śruṣṭivānam dhitāvānam ||
3.027.03a agne śakema te vayam yamaṃ devasya vājinaḥ |
3.027.03c ati dveṣāmsi tarema ||
3.027.04a samidhyamāno adhware 'gniḥ pāvaka iḍyaḥ |
3.027.04c śociṣkeśas tam imahe ||
3.027.05a pṛthupājā amartyo ghṛtanirṇik svāhutaḥ |
3.027.05c agnir yajñasya havyavāt ||
3.027.06a tam sabādho yatasruca itthā dhiyā yajñavantaḥ |
3.027.06c ā cakrur agnim ūtaye ||
3.027.07a hotā devo amartyaḥ purastād eti māyayā |
3.027.07c vidathāni pracodayan ||
3.027.08a vājī vājeṣu dhīyate 'dhvareṣu pra nīyate |
3.027.08c vipro yajñasya sādhanāḥ ||
3.027.09a dhiyā cakre vareṇyo bhūtānām garbham ā dadhe |
3.027.09c dakṣasya pitaram tanā ||
3.027.10a ni tvā dadhe vareṇyam dakṣasyedā sahaskrta |
3.027.10c agne sudītim uśijam ||
3.027.11a agniṃ yanturam apturam ṛtasya yoge vanuṣaḥ |
3.027.11c viprā vājaiḥ sam indhate ||
3.027.12a ūrjo napātam adhware dīdivāmsam upa dyavi |
3.027.12c agnim iḍe kavikratum ||
3.027.13a iḍenyo namasyas tiras tamāmsi darśataḥ |
3.027.13c sam agnir idhyate vṛṣā ||
3.027.14a vṛṣo agniḥ sam idhyate 'śvo na devavāhanaḥ |
3.027.14c tam haviṣmanta iḍate ||
3.027.15a vṛṣaṇam tvā vayam vṛṣan vṛṣaṇaḥ sam idhīmahī |
3.027.15c agne dīdyatam bṛhat ||

3.028.01a agne juṣasva no haviḥ puroḍāsam jātavedaḥ |
3.028.01c prātaḥsāve dhiyāvaso ||
3.028.02a puroḍā agne pacatas tubhyaṃ vā ghā pariṣkrtaḥ |
3.028.02c tam juṣasva yaviṣṭhya ||
3.028.03a agne vihi puroḍāsam āhutam tiroahnyam |
3.028.03c sahasaḥ sūnur asy adhware hitaḥ ||
3.028.04a mādhyamādye savane jātavedaḥ puroḍāsam iha kave juṣasva |
3.028.04c agne yahvasya tava bhāgadheyam na pra minanti vidatheṣu dhīrāḥ ||

3.028.05a agne ṛṭīye savane hi kāniṣaḥ puroḍāśaṃ sahasaḥ sūnav āhutam |
 3.028.05c athā deveṣv adhvaraṃ vipanyayā dhā ratnavantam amṛteṣu jāgrvim ||
 3.028.06a agne vṛdhāna āhutim puroḍāśaṃ jātavedaḥ |
 3.028.06c juṣasva tiroahnyam ||

3.029.01a astīdam adhimanthanam asti prajananaṃ kṛtam |
 3.029.01c etāṃ viśpatnīm ā bharāgnim manthāma pūrvathā ||
 3.029.02a aranyor nihito jātavedā garbha iva sudhito garbhiniṣu |
 3.029.02c dive-diva īḍyo jāgrvadbhir haviṣmadbhir manuṣyebhir agniḥ ||
 3.029.03a uttānāyām ava bharā cikitvān sadyaḥ pravītā vṛṣaṇaṃ jajāna |
 3.029.03c aruṣastūpo ruśad asya pāja iḍāyās putro vayune 'janiṣṭa ||
 3.029.04a iḍāyās tvā pade vyaṃ nābhā pṛthivyā adhi |
 3.029.04c jātavedo ni dhīmahy agne havyāya voḍhave ||
 3.029.05a manthatā naraḥ kavim advayantam pracetasam amṛtaṃ supratīkam |
 3.029.05c yajñasya ketum prathamam purastād agniṃ naro janayatā suśevam ||
 3.029.06a yadī manthanti bāhubhir vi rocate 'śvo na vājy aruṣo vaneṣv ā |
 3.029.06c citro na yāmann aśvinor anivṛtaḥ pari vṛṇakty aśmanas ṛṇā dahan ||
 3.029.07a jāto agni rocate cekitāno vājī vipraḥ kaviśastaḥ sudānuḥ |
 3.029.07c yaṃ devāsa īḍyaṃ viśvavidam havyavāham adadhur adhvaraṣu ||
 3.029.08a sīda hotaḥ sva u loke cikitvān sādāyā yajñaṃ sukṛtasya yonau |
 3.029.08c devāvīr devān haviṣā yajāsy agne bṛhad yajamāne vayo dhāḥ ||
 3.029.09a kṛṇota dhūmaṃ vṛṣaṇaṃ sakhāyo 'sredhanta itana vājam acha |
 3.029.09c ayam agniḥ pṛtanāṣaṭ suvīro yena devāso asahanta dasyūn ||
 3.029.10a ayam te yonir ṛtviyo yato jāto arocathāḥ |
 3.029.10c taṃ jānann agna ā sīdāthā no vardhayā giraḥ ||
 3.029.11a tanūnapād ucyate garbha āsuro narāśaṃso bhavati yad vijāyate |
 3.029.11c mātariśvā yad amimīta mātari vātasya sargo abhavat sarīmaṇi ||
 3.029.12a sunirmathā nirmathitaḥ sunidhā nihitaḥ kaviḥ |
 3.029.12c agne svadhvarā kṛṇu devān devayate yaja ||
 3.029.13a ajījanann amṛtam martyāso 'sremāṇaṃ taraṇiṃ viḍujambham |
 3.029.13c daśa svasāro agruvaḥ samīciḥ pumāṃsaṃ jātam abhi saṃ rabhante ||
 3.029.14a pra saptahotā sanakād arocata mātur upasthe yad aśocad ūdhani |
 3.029.14c na ni miṣati suraṇo dive-dive yad asurasya jaṭharād ajāyata ||
 3.029.15a amitṛāyudho marutām iva prayāḥ prathamajā brahmaṇo viśvam id viduḥ |
 3.029.15c dyumnavad brahma kuśikāsa erira eka-eko dame agniṃ sam īdhire ||
 3.029.16a yad adya tvā prayati yajñe asmin hotaś cikitvo 'vṛṇimahīha |
 3.029.16c dhruvam ayā dhruvam utāśamiṣṭhāḥ prajānan vidvām̐ upa yāhi somam ||

3.030.01a ichanti tvā somyāsaḥ sakhāyaḥ sunvanti somaṃ dadhati prayāmsi |
 3.030.01c titikṣante abhiśastiṃ janānām indra tvad ā kaś cana hi praketaḥ ||
 3.030.02a na te dūre paramā cid rajāmsy ā tu pra yāhi harivo haribhyām |
 3.030.02c sthirāya vṛṣṇe savanā kṛtemā yuktā grāvāṇaḥ samidhāne agnau ||
 3.030.03a indraḥ suśipro maghavā tarutro mahāvṛtāṣ tuvikūrmir ṛghāvān |
 3.030.03c yad ugro dhā bādhitō martyeṣu kva tyā te vṛṣabha vīryāni ||
 3.030.04a tvaṃ hi śmā cyāvayann acyutāny eko vṛtrā carasi jighnamānaḥ |
 3.030.04c tava dyāvāpṛthivī parvatāso 'nu vratāya nimitēva tasthuḥ ||
 3.030.05a utābhaye puruhūta śravobhir eko dṛḍham avado vṛtrahā san |

3.030.05c ime cid indra rodasī apāre yat samgr̥bhñā maghavan kāśir it te ||
 3.030.06a pra sū ta indra pravatā haribhyām pra te vajraḥ pramṛṇann etu śatrūn |
 3.030.06c jahi pratiḥco anūcaḥ parāco viśvaṃ satyaṃ kṛṇuhi viṣṭam astu ||
 3.030.07a yasmai dhāyur adadhā martyāyābhaktaṃ cid bhajate gehyaṃ saḥ |
 3.030.07c bhadrā ta indra sumatir ghṛtācī sahasradānā puruhūta rātiḥ ||
 3.030.08a sahadānum puruhūta kṣiyantam ahastam indra sam piṇak kuṇārum |
 3.030.08c abhi vṛtraṃ vardhamānam piyārum apādam indra tavasā jaghantha ||
 3.030.09a ni sāmanām iṣirām indra bhūmim mahim apārāṃ sadane sasattha |
 3.030.09c astabhnād dyām vṛṣabho antarikṣam arṣantv āpas tvayeha prasūtāḥ ||
 3.030.10a alātṛṇo vala indra vrajo goḥ purā hantor bhayamāno vy āra |
 3.030.10c sugān patho akr̥ṇon niraje gāḥ prāvan vāṇiḥ puruhūtaṃ dhamantiḥ ||
 3.030.11a eko dve vasumatī samīcī indra ā paprau pṛthivīm uta dyām |
 3.030.11c utāntarikṣād abhi naḥ samīka iṣo rathiḥ sayujaḥ śūra vājān ||
 3.030.12a diśaḥ sūryo na mināti pradiṣṭā dive-dive haryaśvaprasūtāḥ |
 3.030.12c saṃ yad ānaḍ adhvana ād id aśvair vimocanaṃ kṛṇute tat tv asya ||
 3.030.13a didṛkṣanta uśaso yāmann aktor vivasvatyā mahi citram anīkam |
 3.030.13c viśve jānanti mahinā yad āgād indrasya karma sukṛtā purūṇi ||
 3.030.14a mahi jyotir nihitaṃ vakṣaṇāsv āmā pakvaṃ carati bibhratī gauḥ |
 3.030.14c viśvaṃ svādma sambhṛtam usriyāyām yat sīm indro adadhād bhojanāya ||
 3.030.15a indra dṛhya yāmakośā abhūvan yajñāya śikṣa gṛṇate sakhibhyaḥ |
 3.030.15c durmāyavo durevā martyāso niṣaṅgiṇo ripavo hantvāsaḥ ||
 3.030.16a saṃ ghoṣaḥ śṛṇve 'vamair amitrair jahi ny eṣv aśaniṃ tapiṣṭhām |
 3.030.16c vṛścem adhastād vi rujā sahasva jahi rakṣo maghavan randhayasva ||
 3.030.17a ud vṛha rakṣaḥ sahamūlam indra vṛścā madhyam praty agram ṣṛṇihi |
 3.030.17c ā kīvataḥ salalūkaṃ cakartha brahmadviṣe tapuṣiṃ hetim asya ||
 3.030.18a svastaye vājibhiś ca praṇetaḥ saṃ yan mahir iṣa āsatsi pūrvīḥ |
 3.030.18c rāyo vantāro bṛhataḥ syāmāsme astu bhaga indra prajāvān ||
 3.030.19a ā no bhara bhagam indra dyumantaṃ ni te deṣṇasya dhīmahi prareke |
 3.030.19c ūrva iva paprathe kāmo asme tam ā pṛṇa vasupate vasūnām ||
 3.030.20a imaṃ kāmam mandayā gobhir aśvaiś candravatā rādhasā paprathaś ca |
 3.030.20c svaryavo matibhis tubhyaṃ viprā indrāya vāhaḥ kuśikāso akran ||
 3.030.21a ā no gotrā dardṛhi gopate gāḥ sam asmabhyaṃ sanayo yantu vājāḥ |
 3.030.21c divakṣā asi vṛṣabha satyaśuṣmo 'smabhyaṃ su maghavan bodhi godāḥ ||
 3.030.22a śunaṃ huvema maghavānam indram asmin bhare nṛtamaṃ vājasātau |
 3.030.22c śṛṇvantam ugram ūtaye samatsu ghnantaṃ vṛtrāṇi saṃjitaṃ dhanānām ||

3.031.01a śāsad vahnir duhitur napytaṃ gād vidvām ṛtasya dīdhitim saparyan |
 3.031.01c pitā yatra duhituḥ sekam ṛñjan saṃ śagmyena manasā dadhanve ||
 3.031.02a na jāmaye tānvo riktham āraik cakāra garbhaṃ sanitur nidhānam |
 3.031.02c yadī mātaro janayanta vahnim anyāḥ kartā sukṛtor anya ṛndhan ||
 3.031.03a agnir jajñe juhvā rejamāno mahas putrām aruṣasya prayakṣe |
 3.031.03c mahān garbho mahy ā jātam eṣām mahi pravṛd dharyaśvasya yajñaiḥ ||
 3.031.04a abhi jaitrīr asacanta spr̥dhānam mahi jyotis tamaso nir ajānan |
 3.031.04c taṃ jānatiḥ praty ud āyann uśasaḥ patir gavām abhavad eka indraḥ ||
 3.031.05a viḍau satīr abhi dhīrā atṛndan prācāhinvan manasā sapta viprāḥ |
 3.031.05c viśvām avindan pathyām ṛtasya prajānann it tā namasā viveśa ||
 3.031.06a vidad yadī saramā rugṇam adrer mahi pāthaḥ pūrvyaṃ sadhryak kaḥ |
 3.031.06c agram nayat supady akṣarāṇām achā ravam prathamā jānati gāt ||

3.031.07a agachad u vipratamaḥ sakhīyann asūdayat sukṛte garbham adriḥ |
 3.031.07c sasāna maryo yuvabhir makhasyann athābhavad aṅgirāḥ sadyo arcan ||
 3.031.08a sataḥ-sataḥ pratimānam purobhūr viśvā veda janimā hanti śuṣṇam |
 3.031.08c pra ṇo divaḥ padavīr gavyur arcan sakhā sakhīm̐r amuñcan nir avadyāt ||
 3.031.09a ni gavyatā manasā sedur arkaiḥ kṛṇvānāso amṛtatvāya gātum |
 3.031.09c idaṃ cin nu sadanam bhūry eṣāṃ yena māsāṃ asiṣāsann ṛtena ||
 3.031.10a sampāśyamānā amadann abhi svam payaḥ pratnasya retaso dughānāḥ |
 3.031.10c vi rodasī atapad ghoṣa eṣāṃ jāte niṣṭhām adadhur goṣu vīrān ||
 3.031.11a sa jātebhir vṛtrahā sed u havyair ud usriyā asṛjad indro arkaiḥ |
 3.031.11c urūcy asmai ghṛtavad bharantī madhu svādma duduhe jenyā gauḥ ||
 3.031.12a pitre cic cakruḥ sadanam sam asmai mahi tviṣimat sukṛto vi hi khyan |
 3.031.12c viṣkabhnanta skambhanenā janitrī āsīnā ūrdhvaṃ rabhasaṃ vi minvan ||
 3.031.13a mahī yadi dhiṣaṇā śisnathe dhāt sadyovṛdham vibhvaṃ rodasyoḥ |
 3.031.13c giro yasminn anavadyāḥ samīcīr viśvā indrāya taviṣīr anuttāḥ ||
 3.031.14a mahy ā te sakhyaṃ vaśmi śaktīr ā vṛtraghne niyuto yanti pūrvīḥ |
 3.031.14c mahi stotram ava āganma sūrer asmākaṃ su maghavan bodhi gopāḥ ||
 3.031.15a mahi kṣetram puru ścandram vividvān ād it sakhibhyaś carathaṃ sam airat |
 3.031.15c indro nṛbhir ajanad dīdyānaḥ sākāṃ sūryam uṣasaṃ gātum agnim ||
 3.031.16a apaś cid eṣa vibhvo damūnāḥ pra sadhrīcīr asṛjad viśvaścandrāḥ |
 3.031.16c madhvaḥ punānāḥ kavibhiḥ pavitair dyubhir hinvanty aktubhir dhanutrīḥ ||
 3.031.17a anu kṛṣṇe vasudhitī jihāte ubhe sūryasya maṃhanā yajatre |
 3.031.17c pari yat te mahimānaṃ vṛjadhyai sakhāya indra kāmyā ṛjipyāḥ ||
 3.031.18a patir bhava vṛtrahan sūnṛtānām girām viśvāyur vṛṣabho vayodhāḥ |
 3.031.18c ā no gahi sakhyebhiḥ śivebhir mahān mahībhir ūtibhiḥ saraṇyan ||
 3.031.19a tam aṅgirasvan namasā saparyan navyaṃ kṛṇomi sanyase purājām |
 3.031.19c druho vi yāhi bahulā adeviḥ svaś ca no maghavan sātaye dhāḥ ||
 3.031.20a mihāḥ pāvakāḥ pratatā abhūvan svasti naḥ pipṛhi pāram āsām |
 3.031.20c indra tvam rathiraḥ pāhi no riṣo makṣū-makṣū kṛṇuhi gojito naḥ ||
 3.031.21a adediṣṭa vṛtrahā gopatir gā antaḥ kṛṣṇāṃ aruṣair dhāmabhir gāt |
 3.031.21c pra sūnṛtā diśamāna ṛtena duraś ca viśvā avṛṇod apa svāḥ ||
 3.031.22a śunam huvema maghavānam indram asmin bhare nṛtamaṃ vājasātau |
 3.031.22c śṛṇvantam ugram ūtaye samatsu ghnantaṃ vṛtrāṇi samjitaṃ dhanānām ||

3.032.01a indra somaṃ somapate pibemam mādhyamdinam savanam cāru yat te |
 3.032.01c prapruthyā śipre maghavann ṛjīsin vimucyā harī iha mādayasva ||
 3.032.02a gavāsīram manthinam indra śukram pibā somaṃ rarimā te madāya |
 3.032.02c brahmakṛtā mārutenā gaṇena sajoṣā rudrais tṛpad ā vṛṣasva ||
 3.032.03a ye te śuṣmaṃ ye taviṣīm avardhann arcanta indra marutas ta ojaḥ |
 3.032.03c mādhyamdine savane vajrahasta pibā rudrebhiḥ saganāḥ suśipra ||
 3.032.04a ta in nv asya madhumad vivipra indrasya śardho maruto ya āsan |
 3.032.04c yebhir vṛtrasyeṣito vivedāmarmaṇo manyamānasya marma ||
 3.032.05a manuṣvad indra savanam juṣānaḥ pibā somaṃ śaśvate vīryāya |
 3.032.05c sa ā vavṛtsva haryaśva yajñaiḥ saraṇyubhir apo arṇā sisarṣi ||
 3.032.06a tvam apo yad dha vṛtraṃ jaghanvām̐ atyām̐ iva prāsṛjaḥ sartavājau |
 3.032.06c śayānam indra caratā vadhena vavrivāmsam pari devīr adevam ||
 3.032.07a yajāma in namasā vṛddham indram bṛhantam ṛṣvam ajaram yuvānam |
 3.032.07c yasya priye mamatur yajñiyasya na rodasī mahimānam mamāte ||
 3.032.08a indrasya karma sukṛtā purūṇi vratāni devā na minanti viśve |

3.032.08c dādhāra yaḥ pṛthivīm dyām utemām jajāna sūryam uṣasam sudamśāḥ ||
 3.032.09a adrogha satyaṃ tava tan mahitvaṃ sadyo yaj jāto apibo ha somam |
 3.032.09c na dyāva indra tavasas ta ojo nāhā na māsāḥ śarado varanta ||
 3.032.10a tvam sadyo apibo jāta indra madāya somam parame vyoman |
 3.032.10c yad dha dyāvāpṛthivi āviveśir athābhavaḥ pūrvyaḥ kārudhāyāḥ ||
 3.032.11a ahann ahim pariśayānam arṇa ojāyamānam tuvijāta tavyān |
 3.032.11c na te mahitvam anu bhūd adha dyaur yad anyayā sphigyā kṣām avasthāḥ ||
 3.032.12a yajño hi ta indra vardhano bhūd uta priyaḥ sutasomo miyedhaḥ |
 3.032.12c yajñena yajñam ava yajñiyaḥ san yajñas te vajram ahihatya āvat ||
 3.032.13a yajñenendram avasā cakre arvāg ainam sumnāya navyase vavṛtyām |
 3.032.13c ya stomebhir vāvṛdhe pūrvyebhir yo madhyamebhir uta nūtanebhiḥ ||
 3.032.14a viveṣa yan mā dhiṣaṇā jajāna stavai purā pāryād indram ahnaḥ |
 3.032.14c amhaso yatra pīparad yathā no nāveva yāntam ubhaye havante ||
 3.032.15a āpūrṇo asya kalaśaḥ svāhā sekteva kośam sisice pibadhyai |
 3.032.15c sam u priyā āvavṛtran madāya pradakṣiṇid abhi somāsa indram ||
 3.032.16a na tvā gabhīraḥ puruhūta sindhur nādrayaḥ pari śanto varanta |
 3.032.16c itthā sakhībhya iṣito yad indrā dṛḍham cid arujo gavyam ūrvam ||
 3.032.17a śunam huvema maghavānam indram asmin bhare nṛtamaṃ vājasātau |
 3.032.17c śṛṇvantam ugram ūtaye samatsu ghnantam vṛtrāṇi samjitaṃ dhanānām ||

3.033.01a pra parvatānām uśatī upasthād aśve iva viṣite hāsamāne |
 3.033.01c gāveva śubhre mātārā rihāṇe vipāṭ chatudrī payasā javete ||
 3.033.02a indreṣite prasavam bhikṣamāṇe achā samudram rathyeva yāthaḥ |
 3.033.02c samārāṇe ūrmibhiḥ pinvamāne anyā vām anyām apy eti śubhre ||
 3.033.03a achā sindhum mātṛtamām ayāsam vipāśam urvīm subhagām aganma |
 3.033.03c vatsam iva mātārā samrihāṇe samānam yonim anu samcarantī ||
 3.033.04a enā vayam payasā pinvamānā anu yoniṃ devakṛtam carantiḥ |
 3.033.04c na vartave prasavaḥ sargataктаḥ kiṃyur vipro nadyo johavīti ||
 3.033.05a ramadhvam me vacase somyāya ṛtāvarīr upa muhūrtam evaiḥ |
 3.033.05c pra sindhum achā bṛhatī maṇiśāvasyur ahve kuśikasya sūnuḥ ||
 3.033.06a indro asmāṃ aradad vajrabāhur apāhan vṛtram paridhiṃ nadinām |
 3.033.06c devo 'nayat savitā supāṇis tasya vayam prasave yāma urvīḥ ||
 3.033.07a pravācyam śaśvadhā vīryam tad indrasya karma yad ahim vivṛścat |
 3.033.07c vi vajreṇa pariśado jaghānāyann āpo 'yanam ichamānāḥ ||
 3.033.08a etad vaco jaritar māpi mṛṣṭhā ā yat te ghoṣān uttarā yugāni |
 3.033.08c uktheṣu kāro prati no juṣasva mā no ni kaḥ puruṣatrā namas te ||
 3.033.09a o ṣu svasāraḥ kārave śṛṇota yayau vo dūrād anasā rathena |
 3.033.09c ni ṣū namadhvam bhavatā supārā adhoakṣāḥ sindhavaḥ srotyābhiḥ ||
 3.033.10a ā te kāro śṛṇavāmā vacāṃsi yayātha dūrād anasā rathena |
 3.033.10c ni te naṃsai pīpyāneva yoṣā maryāyeva kanyā śaśvacai te ||
 3.033.11a yad aṅga tvā bharatāḥ samtareyur gavyan grāma iṣita indrajūtaḥ |
 3.033.11c arśād aha prasavaḥ sargataкта ā vo vṛṇe sumatiṃ yajñiyānām ||
 3.033.12a atāriṣur bharatā gavyavaḥ sam abhakta vipraḥ sumatiṃ nadinām |
 3.033.12c pra pinvadhvam iṣayantiḥ surādhā ā vakṣaṇāḥ pṛnadhvam yāta śībham ||
 3.033.13a ud va ūrmiḥ śamyā hantv āpo yoktrāṇi muñcata |
 3.033.13c māduṣkṛtau vyenasāghnyau sūnam āratām ||

3.034.01a indraḥ pūrbhid ātirad dāsam arkair vidadvasur dayamāno vi śatrūn |
 3.034.01c brahmajūtas tanvā vāvṛdhāno bhūridātra āpṛṇad rodasī ubhe ||
 3.034.02a makhasya te taviśasya pra jūtim iyarmi vācam amṛtāya bhūṣan |
 3.034.02c indra kṣitīnām asi mānuṣiṇām viśām daivīnām uta pūrvayāvā ||
 3.034.03a indro vṛtram avṛnoc chardhanītiḥ pra māyinām aminād varpaṇītiḥ |
 3.034.03c ahan vyamsam uśadhag vaneṣv āvir dhenā akrṇod rāmyāṇām ||
 3.034.04a indraḥ svarṣā janayann ahāni jigāyośigbhiḥ pṛtanā abhiṣṭiḥ |
 3.034.04c prārocayan manave ketum ahnām avindaj jyotir bṛhate raṇāya ||
 3.034.05a indras tujo barhaṇā ā viveśa nṛvad dadhāno naryā purūṇi |
 3.034.05c acetayad dhiya imā jaritre premaṃ varṇam atirac chukram āsām ||
 3.034.06a maho mahāni panayanty asyendrasya karma sukṛtā purūṇi |
 3.034.06c vṛjanena vṛjinān sam pipeṣa māyābhir dasyūṃr abhibhūtyojāḥ ||
 3.034.07a yudhendro mahnā varivaś cakāra devebhyaḥ satpatiś carṣaṇiprāḥ |
 3.034.07c vivasvataḥ sadane asya tāni viprā ukthebhiḥ kavayo gṛṇanti ||
 3.034.08a satrāsāhaṃ vareṇyaṃ sahodāṃ sasavāmsam svar apaś ca devīḥ |
 3.034.08c sasāna yaḥ pṛthiviṃ dyām utemām indram madanty anu dhīraṇāsaḥ ||
 3.034.09a sasānātyāṃ uta sūryaṃ sasānendraḥ sasāna purubhojasam gām |
 3.034.09c hiraṇyayam uta bhogaṃ sasāna hatvī dasyūn prāryaṃ varṇam āvat ||
 3.034.10a indra ośadhīr asanod ahāni vanaspatiṃ asanod antarikṣam |
 3.034.10c bibheda valaṃ nunude vivāco 'thābhavad damitābhikratūnām ||
 3.034.11a śunaṃ huvema maghavānam indram asmin bhare nṛtamaṃ vājasātau |
 3.034.11c śṛṇvantam ugram ūtaye samatsu ghnantaṃ vṛtrāṇi saṃjitaṃ dhanānām ||

3.035.01a tiṣṭhā harī ratha ā yujyamānā yāhi vāyur na niyuto no acha |
 3.035.01c pibāsy andho abhiṣṛṣṭo asme indra svāhā rarimā te madāya ||
 3.035.02a upājirā puruhūtāya saptī harī rathasya dhūrṣv ā yunajmi |
 3.035.02c dravad yathā sambhṛtaṃ viśvataś cid upemaṃ yajñam ā vahāta indram ||
 3.035.03a upo nayasva vṛṣaṇā tapuṣpotem ava tvam vṛṣabha svadhāvaḥ |
 3.035.03c grasetām aśvā vi muceha śoṇā dive-dive sadṛśīr addhi dhānāḥ ||
 3.035.04a brahmaṇā te brahmayujā yunajmi harī sakhāyā sadhamāda āsū |
 3.035.04c sthiraṃ rathaṃ sukham indrādhitīṣṭhan prajānan vidvāṃ upa yāhi somam ||
 3.035.05a mā te harī vṛṣaṇā vītapṛṣṭhā ni rīraman yajamānāso anye |
 3.035.05c atyāyāhi śāsṁvato vayaṃ te 'raṃ sutebhiḥ kṛṇavāma somaiḥ ||
 3.035.06a tavāyaṃ somas tvam ehy arvān chaśvattamaṃ sumanā asya pāhi |
 3.035.06c asmin yajñe barhiṣy ā niśadyā dadhiṣvemamaṃ jaṭhara indum indra ||
 3.035.07a stīrṇaṃ te barhiḥ suta indra somaḥ kṛtā dhānā attave te haribhyām |
 3.035.07c tadokase puruśākāya vṛṣṇe marutvate tubhyaṃ rātā haviṃṣi ||
 3.035.08a imaṃ naraḥ parvatās tubhyam āpaḥ sam indra gobhir madhumantam akran |
 3.035.08c tasyāgatyaḥ sumanā ṛṣva pāhi prajānan vidvān pathyā anu svāḥ ||
 3.035.09a yāṃ ābhajo maruta indra some ye tvām avardhann abhavan gaṇas te |
 3.035.09c tebhir etaṃ sajoṣā vāvaśāno 'gneḥ piba jihvayā somam indra ||
 3.035.10a indra piba svadhayā cit sutasyāgner vā pāhi jihvayā yajatra |
 3.035.10c adhvaryor vā prayataṃ śakra hastād dhotur vā yajñam haviṣo juṣasva ||
 3.035.11a śunaṃ huvema maghavānam indram asmin bhare nṛtamaṃ vājasātau |
 3.035.11c śṛṇvantam ugram ūtaye samatsu ghnantaṃ vṛtrāṇi saṃjitaṃ dhanānām ||

3.036.01a imām ū ṣu prabhṛtiṃ sātaye dhāḥ śāsṁvac-chaśvad ūtibhir yādamānaḥ |

3.036.01c sute-sute vāvṛdhe vardhanebhir yaḥ karmabhir mahadbhiḥ suśruto bhūt ||
 3.036.02a indrāya somāḥ pradivo vidānā ṛbhur yebhir vṛṣaparvā vihāyāḥ |
 3.036.02c prayamyamānān prati śū gṛbhāyendra piba vṛṣadhūtasya vṛṣṇaḥ ||
 3.036.03a pibā vardhasva tava ghā sutāsa indra somāsaḥ prathamā uteme |
 3.036.03c yathāpibaḥ pūrvyāṃ indra somāṃ evā pāhi panyo adyā navīyān ||
 3.036.04a mahāṃ amatro vṛjane virapśy ugram śavaḥ patyate dhṛṣṇv ojaḥ |
 3.036.04c nāha vivyāca pṛthivī canainaṃ yat somāso haryaśvam amandan ||
 3.036.05a mahāṃ ugro vāvṛdhe vīryāya samācakre vṛṣabhaḥ kāvyena |
 3.036.05c indro bhago vājadā asya gāvaḥ pra jāyante dakṣiṇā asya pūrvīḥ ||
 3.036.06a pra yat sindhavaḥ prasavaṃ yathāyann āpaḥ samudraṃ rathyeva jagmuḥ |
 3.036.06c ataś cid indraḥ sadaso varīyān yad iṃ somaḥ pṛṇati dugdho aṃśuḥ ||
 3.036.07a samudreṇa sindhavo yādāmānā indrāya somaṃ suśutam bharantaḥ |
 3.036.07c aṃśuṃ duhanti hastino bharitair madhvaḥ punanti dhārayā pavitraiḥ ||
 3.036.08a hradā iva kuṣayaḥ somadhānāḥ sam ī vivyāca savanā purūṇi |
 3.036.08c annā yad indraḥ prathamā vy āśa vṛtraṃ jaghanvāṃ avṛṇīta somam ||
 3.036.09a ā tū bhara mākir etat pari ṣṭhād vidmā hi tvā vasupatiṃ vasūnām |
 3.036.09c indra yat te māhinaṃ datram asty asmabhyaṃ tad dharyaśva pra yandhi ||
 3.036.10a asme pra yandhi maghavann ṛjīṣinn indra rāyo viśvavārasya bhūreḥ |
 3.036.10c asme śataṃ śarado jīvase dhā asme vīrāñ chaśvata indra śiprin ||
 3.036.11a śunaṃ huvema maghavānam indram asmin bhare nṛtamaṃ vājasātau |
 3.036.11c śṛṇvantam ugram ūtaye samatsu ghnantaṃ vṛtrāṇi samjitaṃ dhanānām ||

3.037.01a vātrahatyāya śavase pṛtanāśāhyāya ca |
 3.037.01c indra tvā vartayāmasi ||
 3.037.02a arvācīnaṃ su te mana uta cakṣuḥ śatakrato |
 3.037.02c indra kṛṇvantu vāghataḥ ||
 3.037.03a nāmāni te śatakrato viśvābhir gīrbhir īmahe |
 3.037.03c indrābhīmātiśāhye ||
 3.037.04a puruṣtutasya dhāmabhiḥ śatena mahayāmasi |
 3.037.04c indrasya carṣaṇīdhṛtaḥ ||
 3.037.05a indraṃ vṛtrāya hantave puruhūtam upa bruve |
 3.037.05c bhareṣu vājasātaye ||
 3.037.06a vājeṣu sāsahir bhava tvām īmahe śatakrato |
 3.037.06c indra vṛtrāya hantave ||
 3.037.07a dyumneṣu pṛtanāje pṛtsutūrṣu śravassu ca |
 3.037.07c indra sākṣvābhīmātiṣu ||
 3.037.08a śuṣmintamaṃ na ūtaye dyumminam pāhi jāgṛvim |
 3.037.08c indra somaṃ śatakrato ||
 3.037.09a indriyāṇi śatakrato yā te janeṣu pañcasu |
 3.037.09c indra tāni ta ā vṛṇe ||
 3.037.10a agann indra śravo bṛhad dyumnaṃ dadhiṣva duṣṭaram |
 3.037.10c ut te śuṣmaṃ tirāmasi ||
 3.037.11a arvāvato na ā gahy atho śakra parāvataḥ |
 3.037.11c u loko yas te adriya indreha tata ā gahi ||

3.038.01a abhi taṣṭeva dīdhayā maṇiṣām atyo na vājī sudhuro jihānaḥ |
 3.038.01c abhi priyāṇi marmṛśat parāṇi kavīm̐r ichāmi samdṛśe sumedhāḥ ||

3.038.02a inota pṛcha janimā kavīnām manodhṛtaḥ sukṛtas takṣata dyām |
 3.038.02c imā u te praṇyo vardhamānā manovātā adha nu dharmaṇi gman ||
 3.038.03a ni śim id atra guhyā dadhānā uta kṣatrāya rodasī sam añjan |
 3.038.03c sam mātrābhir mamire yemur urvī antar mahī samṛte dhāyase dhuḥ ||
 3.038.04a ātiṣṭhantam pari viśve abhūṣaṅ chriyo vasānaś carati svarociḥ |
 3.038.04c mahat tad vṛṣṇo asurasya nāmā viśvarūpo amṛtāni tasthau ||
 3.038.05a asūta pūrvo vṛṣabho jyāyān imā asya śurudhaḥ santi pūrvīḥ |
 3.038.05c divo napātā vidathasya dhībhiḥ kṣatram rājānā pradivo dadhāthe ||
 3.038.06a trīṇi rājānā vidathe purūṇi pari viśvāni bhūṣathaḥ sadāṃsi |
 3.038.06c apaśyam atra manasā jaganvān vrate gandharvāṃ api vāyukeśān ||
 3.038.07a tad in nv asya vṛṣabhasya dhenor ā nāmabhir mamire sakmyaṃ goḥ |
 3.038.07c anyad-anyad asuryaṃ vasānā ni māyino mamire rūpam asmin ||
 3.038.08a tad in nv asya savitur nakir me hiraṇyayīm amatim yām asīśret |
 3.038.08c ā suṣṭutī rodasī viśvaminve apīva yoṣā janimāni vavre ||
 3.038.09a yuvam pratnasya sādhathe maho yad daivī svastiḥ pari ṇaḥ syātam |
 3.038.09c gopājihvasya tasthuṣo virūpā viśve paśyanti māyinaḥ kṛtāni ||
 3.038.10a śunaṃ huvema maghavānam indram asmin bhare nṛtamaṃ vājasātau |
 3.038.10c śṛṇvantam ugram ūtaye samatsu ghnantam vṛtrāṇi samjitam dhanānām ||

3.039.01a indram matir hṛda ā vacyamānāchā patim stomataṣṭā jigāti |
 3.039.01c yā jāgṛvir vidathe śasyamānendra yat te jāyate viddhi tasya ||
 3.039.02a divaś cid ā pūrvyā jāyamānā vi jāgṛvir vidathe śasyamānā |
 3.039.02c bhadrā vastrāṇy arjunā vasānā seyam asme sanajā pitryā dhīḥ ||
 3.039.03a yamā cid atra yamasūr asūta jihvāyā agram patad ā hy asthāt |
 3.039.03c vapūṃṣi jātā mithunā sacete tamohanā tapuṣo budhna etā ||
 3.039.04a nakir eṣāṃ ninditā martyeṣu ye asmākam pitaro goṣu yodhāḥ |
 3.039.04c indra eṣāṃ dṛmhitā māhināvān ud gotrāṇi sasṛje daṃsanāvān ||
 3.039.05a sakhā ha yatra sakhibhir navagvair abhiḥnv ā satvabhir gā anugman |
 3.039.05c satyaṃ tad indro daśabhir daśagvaiḥ sūryaṃ viveda tamasi kṣiyantam ||
 3.039.06a indro madhu sambhṛtam usriyāyām padvad viveda śaphavan name goḥ |
 3.039.06c guhā hitam guhyaṃ gūḍham apsu haste dadhe dakṣiṇe dakṣiṇāvān ||
 3.039.07a jyotir vṛṇita tamaso vijānann āre syāma durityā abhīke |
 3.039.07c imā giraḥ somapāḥ somavṛddha juṣasvendra purutamasya kāroḥ ||
 3.039.08a jyotir yajñāya rodasī anu ṣyād āre syāma durityā bhūreḥ |
 3.039.08c bhūri cid dhi tujato martyasya supārāso vasavo barhaṇāvāt ||
 3.039.09a śunaṃ huvema maghavānam indram asmin bhare nṛtamaṃ vājasātau |
 3.039.09c śṛṇvantam ugram ūtaye samatsu ghnantam vṛtrāṇi samjitam dhanānām ||

3.040.01a indra tvā vṛṣabham vayaṃ sute some havāmahe |
 3.040.01c sa pāhi madhvo andhasaḥ ||
 3.040.02a indra kratuvidaṃ sutam somam harya puruṣtuta |
 3.040.02c pibā vṛṣasva tātrpim ||
 3.040.03a indra pra ṇo dhitāvānam yajñam viśvebhir devebhiḥ |
 3.040.03c tira stavāna viśpate ||
 3.040.04a indra somāḥ sutā ime tava pra yanti satpate |
 3.040.04c kṣayaṃ candrāsa indavaḥ ||
 3.040.05a dadhiṣvā jaṭhare sutam somam indra vareṇyam |

3.040.05c tava dyukṣāsa indavaḥ ||
 3.040.06a girvaṇaḥ pāhi naḥ sutam madhor dhārābhir ajoyase |
 3.040.06c indra tvādātam id yaśaḥ ||
 3.040.07a abhi dyumnāni vanina indraṃ sacante akṣitā |
 3.040.07c pītvī somasya vāvṛdhe ||
 3.040.08a arvāvato na ā gahi parāvataś ca vṛtrahan |
 3.040.08c imā juṣasva no giraḥ ||
 3.040.09a yad antarā parāvataṃ arvāvataṃ ca hūyase |
 3.040.09c indreha tata ā gahi ||

3.041.01a ā tū na indra madryag ghuvānaḥ somapītaye |
 3.041.01c haribhyāṃ yāhy adrivaḥ ||
 3.041.02a satto hotā na ṛtviyas tistire barhir ānuṣak |
 3.041.02c ayujran prātar adrayaḥ ||
 3.041.03a imā brahma brahmavāhaḥ kriyanta ā barhiḥ sīda |
 3.041.03c vīhi śūra puroḍāśam ||
 3.041.04a rārandhi savaneṣu ṇa eṣu stomeṣu vṛtrahan |
 3.041.04c uktheṣv indra girvaṇaḥ ||
 3.041.05a matayaḥ somapām uruṃ rihanti śavasas patim |
 3.041.05c indraṃ vatsaṃ na mātaraḥ ||
 3.041.06a sa mandasvā hy andhaso rādhasa tanvā mahe |
 3.041.06c na stotāraṃ nide karaḥ ||
 3.041.07a vayam indra tvāyavo haviṣmanto jarāmahe |
 3.041.07c uta tvam asmayur vaso ||
 3.041.08a māre asmad vi mumuco haripriyārvān yāhi |
 3.041.08c indra svadhāvo matsveha ||
 3.041.09a arvāñcaṃ tvā sukhe rathe vahatām indra keśinā |
 3.041.09c ghṛtasnū barhir āsade ||

3.042.01a upa naḥ sutam ā gahi somam indra gavāśiram |
 3.042.01c haribhyāṃ yas te asmayuḥ ||
 3.042.02a tam indra madam ā gahi barhiṣṭhām grāvabhiḥ sutam |
 3.042.02c kuvin nv asya tṛṇavaḥ ||
 3.042.03a indraṃ itthā giro mamāchāgur iṣitā itaḥ |
 3.042.03c āvṛte somapītaye ||
 3.042.04a indraṃ somasya pītaye stomair iha havāmahe |
 3.042.04c ukthebhiḥ kuvid āgamat ||
 3.042.05a indra somāḥ sutā ime tān dadhiṣva śatakrato |
 3.042.05c jaṭhare vājiniṣo ||
 3.042.06a vidmā hi tvā dhanamjayam vājeṣu dadhṛṣam kave |
 3.042.06c adhā te sumnam imahe ||
 3.042.07a imam indra gavāśiraṃ yavāśiraṃ ca naḥ piba |
 3.042.07c āgatyā vṛṣabhiḥ sutam ||
 3.042.08a tubhyed indra sva okye somaṃ codāmi pītaye |
 3.042.08c eṣa rārantu te ḥṛdi ||
 3.042.09a tvām sutasya pītaye pratnam indra havāmahe |
 3.042.09c kuśikāso avasyavaḥ ||

3.043.01a ā yāhy arvān upa vandhureṣṭhās taved anu pradivaḥ somapeyam |
 3.043.01c priyā sakhāyā vi mucopa barhis tvām ime havyavāho havante ||
 3.043.02a ā yāhi pūrvīr ati carṣaṇīr āṁ arya āśiṣa upa no haribhyām |
 3.043.02c imā hi tvā mataya stomataṣṭā indra havante sakhyam juṣāṇaḥ ||
 3.043.03a ā no yajñam namovṛdham sajoṣā indra deva haribhir yāhi tūyam |
 3.043.03c aham hi tvā matibhir johavīmi ghṛtaprayāḥ sadhamāde madhūnām ||
 3.043.04a ā ca tvām etā vṛṣaṇā vahāto hari sakhāyā sudhurā svaṅgā |
 3.043.04c dhānāvad indraḥ savanam juṣāṇaḥ sakhā sakhyuḥ śṛṇavad vandanāni ||
 3.043.05a kuvin mā gopām karase janasya kuvid rājānam maghavann ṛjīsin |
 3.043.05c kuvin ma ṛṣim papivāmsam sutasya kuvin me vasvo amṛtasya śikṣāḥ ||
 3.043.06a ā tvā bṛhanto harayo yujānā arvāg indra sadhamādo vahantu |
 3.043.06c pra ye dvitā diva ṛñjanty ātāḥ susammṛṣṭāso vṛṣabhasya mūrāḥ ||
 3.043.07a indra piba vṛṣadhūtasya vṛṣṇa ā yaṁ te śyena usate jabhāra |
 3.043.07c yasya made cyāvayasi pra kṛṣṭīr yasya made apa gotrā vavartha ||
 3.043.08a śunam huvema maghavānam indram asmin bhare nṛtamaṁ vājasātau |
 3.043.08c śṛṇvantam ugram ūtaye samatsu ghnantam vṛtrāṇi samjitam dhanānām ||

3.044.01a ayaṁ te astu haryataḥ soma ā haribhiḥ sutaḥ |
 3.044.01c juṣāṇa indra haribhir na ā gahy ā tiṣṭha haritam ratham ||
 3.044.02a haryann uṣasam arcayaḥ sūryam haryann arocayaḥ |
 3.044.02c vidvāms cikivān haryaśva vardhasa indra viśvā abhi śriyaḥ ||
 3.044.03a dyām indro haridhāyasam pṛthivīm harivarpasam |
 3.044.03c adhārayad dharitor bhūri bhojanam yayor antar hariś carat ||
 3.044.04a jajñāno harito vṛṣā viśvam ā bhāti rocanam |
 3.044.04c haryaśvo haritam dhatta āyudham ā vajram bāhvor harim ||
 3.044.05a indro haryantam arjunam vajram śukrair abhivṛtam |
 3.044.05c apāvṛṇod dharibhir adribhiḥ sutam ud gā haribhir ājata ||

3.045.01a ā mandrair indra haribhir yāhi mayūraromabhiḥ |
 3.045.01c mā tvā ke cin ni yaman viṁ nā pāsino 'ti dhanveva tāṁ ihi ||
 3.045.02a vṛtrakhādo valamrujaḥ purām darmo apām ajaḥ |
 3.045.02c sthātā rathasya haryor abhisvara indro dṛḍhā cid ārujaḥ ||
 3.045.03a gambhīrāṁ udadhīmīr iva kratum puṣyasi gā iva |
 3.045.03c pra sugopā yavasam dhenavo yathā hradam kulyā ivāśata ||
 3.045.04a ā nas tujam rayim bharāmsam na pratijānate |
 3.045.04c vṛkṣam pakvam phalam aṅkīva dhūnuhindra sampāraṇam vasu ||
 3.045.05a svayur indra svarād asi smaddiṣṭiḥ svayaśastaraḥ |
 3.045.05c sa vāvṛdhāna ojasā puruṣṭuta bhavā naḥ suśravastamaḥ ||

3.046.01a yudhmasya te vṛṣabhasya svarāja ugrasya yūna sthavirusya ghṛṣveḥ |
 3.046.01c ajūryato vajriṇo vīryānindra śrutasya mahato mahāni ||
 3.046.02a mahāṁ asi mahiṣa vṛṣṇyebhir dhanasṛd ugra sahamāno anyān |
 3.046.02c eko viśvasya bhuvanasya rājā sa yodhayā ca kṣayayā ca janān ||
 3.046.03a pra mātrābhī ririce rocamānaḥ pra devebhir viśvato apratitaḥ |

- 3.046.03c pra majmanā diva indraḥ pṛthivyāḥ proror maho antarikṣād ṛjīṣi ||
3.046.04a uruṃ gabhīraṃ januṣābhy ugraṃ viśvavyacasam avatam matinām |
3.046.04c indraṃ somāsaḥ pradivi sutāsaḥ samudraṃ na sravata ā viśanti ||
3.046.05a yaṃ somam indra pṛthivīdyāvā garbhaṃ na mātā bibhṛtas tvāyā |
3.046.05c taṃ te hinvanti tam u te mṛjanty adhvaryavo vṛṣabha pātavā u ||
- 3.047.01a marutvāṃ indra vṛṣabho raṇāya pibā somam anuṣvadham madāya |
3.047.01c ā siñcasva jaṭhara madhva ūrmiṃ tvaṃ rājāsi pradivaḥ sutānām ||
3.047.02a sajoṣā indra sagaṇo marudbhiḥ somam piba vṛtrahā śūra vidvān |
3.047.02c jahi śatrūṃr apa mṛdho nudasvāthābhayaṃ kṛṇuhi viśvato naḥ ||
3.047.03a uta ṛtubhir ṛtupāḥ pāhi somam indra devebhiḥ sakhibhiḥ sutam naḥ |
3.047.03c yāṃ ābhajo maruto ye tvānv ahan vṛtram adadhus tubhyam ojaḥ ||
3.047.04a ye tvāhihatye maghavann avaradhan ye sāmbarē harivo ye gaviṣṭau |
3.047.04c ye tvā nūnam anumadanti viprāḥ pibendra somaṃ sagaṇo marudbhiḥ ||
3.047.05a marutvantam vṛṣabham vāvṛdhānam akavāriṃ divyaṃ śāsam indram |
3.047.05c viśvāsāham avase nūtanāyogam sahodām iha taṃ huvema ||
- 3.048.01a sadyo ha jāto vṛṣabhaḥ kanīnaḥ prabhartum āvad andhasaḥ sutasya |
3.048.01c sādhoḥ piba pratikāmaṃ yathā te rasāsiraḥ prathamam somyasya ||
3.048.02a yaj jāyathās tad ahar asya kāme 'msoḥ piyūṣam apibo giriṣṭhām |
3.048.02c taṃ te mātā pari yoṣā janitrī mahaḥ pitur dama āsiñcad agre ||
3.048.03a upasthāya mātaram annam aiṭṭa tigmam apaśyad abhi somam ūdhaḥ |
3.048.03c prayāvayann acarad gṛtso anyān mahāni cakre purudhapratīkaḥ ||
3.048.04a ugras turāsāḍ abhibhūtyojā yathāvaśam tanvaṃ cakra eṣaḥ |
3.048.04c tvaṣṭāram indro januṣābhibhūyāmuṣyā somam apibac camūṣu ||
3.048.05a śunaṃ huvema maghavānam indram asmin bhare nṛtamaṃ vājasātau |
3.048.05c śṛṇvantam ugram ūtaye samatsu ghnantam vṛtrāṇi samjitam dhanānām ||
- 3.049.01a śamsā mahām indraṃ yasmin viśvā ā kṛṣṭayaḥ somapāḥ kāmam avyan |
3.049.01c yaṃ sukratuṃ dhiṣaṇe vibhvataṣṭam ghanam vṛtrāṇām janayanta devāḥ ||
3.049.02a yaṃ nu nakih pṛtanāsu svarājam dvitā tarati nṛtamaṃ hariṣṭhām |
3.049.02c inatamaḥ satvabhir yo ha śūṣaiḥ pṛthujrayā aminād āyur dasyoḥ ||
3.049.03a sahāvā pṛtsu taraṇir nārvā vyānaśī rodasī mehanāvān |
3.049.03c bhago na kāre havyo matinām piteva cāruḥ suhavo vayodhāḥ ||
3.049.04a dhartā divo rajadas pṛṣṭa ūrdhvo ratho na vāyur vasubhir niyutvān |
3.049.04c kṣapām vastā janitā sūryasya vibhaktā bhāgam dhiṣaṇeva vājam ||
3.049.05a śunaṃ huvema maghavānam indram asmin bhare nṛtamaṃ vājasātau |
3.049.05c śṛṇvantam ugram ūtaye samatsu ghnantam vṛtrāṇi samjitam dhanānām ||
- 3.050.01a indraḥ svāhā pibatu yasya soma āgatyā tumro vṛṣabho marutvān |
3.050.01c oruvyacāḥ pṛnatām ebhir annair āsya havis tanvaḥ kāmam ṛdhyāḥ ||
3.050.02a ā te saparyū javase yunajmi yayor anu pradivaḥ śruṣṭim āvaḥ |
3.050.02c iha tvā dheyur harayaḥ suśipra pibā tv asya suṣutasya cāroḥ ||
3.050.03a gobhir mimikṣuṃ dadhire supāram indraṃ jyaiṣṭhyāya dhāyase gṛṇānāḥ |
3.050.03c mandānaḥ somam papivāṃ ṛjīṣin sam asmabhyam purudhā gā iṣanya ||

3.050.04a imaṃ kāmam mandayā gobhir aśvais candravatā rādhasā paprathas ca |
 3.050.04c svaryavo matibhis tubhyaṃ viprā indrāya vāhaḥ kuśikāso akran ||
 3.050.05a śunaṃ huvema maghavānam indram asmin bhare nṛtamaṃ vājasātau |
 3.050.05c śṛṇvantam ugram ūtaye samatsu ghnantam vṛtrāṇi samjitaṃ dhanānām ||

3.051.01a carṣaṇīdhṛtam maghavānam ukthyaṃ indraṃ giro bṛhatīr abhy anūṣata |
 3.051.01c vāvṛdhānam puruhūtaṃ suvṛktibhir amartyaṃ jaramāṇaṃ dive-dive ||
 3.051.02a śatakratum arṇavaṃ śākiṇaṃ naraṃ giro ma indram upa yanti viśvataḥ |
 3.051.02c vājasanim pūrbhidaṃ tūrṇim apturaṃ dhāmasācam abhiśācam svarvidam ||
 3.051.03a ākare vasor jaritā panasyate 'nehasa stubha indro duvasyati |
 3.051.03c vivasvataḥ sadana ā hi pipriye satrāsāham abhimātihanaṃ stuhi ||
 3.051.04a nṛṇām u tvā nṛtamaṃ gīrbhir ukthair abhi pra vīram arcatā sabādhaḥ |
 3.051.04c saṃ sahase purumāyo jihīte namo asya pradiva eka īse ||
 3.051.05a pūrvīr asya niṣṣidho martyeṣu purū vasūni pṛthivī bibharti |
 3.051.05c indrāya dyāva ośadhīr utāpo rayiṃ rakṣanti jīrayo vanāni ||
 3.051.06a tubhyaṃ brahmāṇi gira indra tubhyaṃ satrā dadhire harivo juṣasva |
 3.051.06c bodhy āpir avaso nūtanasya sakhe vaso jaritṛbhyo vayo dhāḥ ||
 3.051.07a indra marutva iha pāhi somam yathā śāryāte apibaḥ sutasya |
 3.051.07c tava praṇīti tava śūra śarmann ā vivāsanti kavayaḥ suyajñāḥ ||
 3.051.08a sa vāvaśāna iha pāhi somam marudbhir indra sakhibhiḥ sutam naḥ |
 3.051.08c jātam yat tvā pari devā abhūṣan mahe bharāya puruhūta viśve ||
 3.051.09a aptūrye maruta āpir eṣo 'mandann indram anu dātivārāḥ |
 3.051.09c tebhīḥ sākam pibatu vṛtrakhādaḥ sutam somam dāsūṣaḥ sve sadhasthe ||
 3.051.10a idaṃ hy anv ojasā sutam rādhānām pate |
 3.051.10c pibā tv asya girvaṇaḥ ||
 3.051.11a yas te anu svadhām asat sute ni yacha tanvam |
 3.051.11c sa tvā mamattu somyam ||
 3.051.12a pra te aśnotu kukṣyoḥ prendra brahmaṇā śiraḥ |
 3.051.12c pra bāhū śūra rādhasē ||

3.052.01a dhānāvantaṃ karambhiṇam apūpavantaṃ ukthinam |
 3.052.01c indra prātar juṣasva naḥ ||
 3.052.02a puroḍāśam pacatyam juṣasvendrā gurasva ca |
 3.052.02c tubhyaṃ havyāni sistrate ||
 3.052.03a puroḍāśam ca no ghaso joṣayāse giraś ca naḥ |
 3.052.03c vadhūyur iva yoṣaṇām ||
 3.052.04a puroḍāśam sanaśruta prātaḥsāve juṣasva naḥ |
 3.052.04c indra kratuḥ hi te bṛhan ||
 3.052.05a mādhyamdinasya savanasya dhānāḥ puroḍāśam indra kṛṣveha cārum |
 3.052.05c pra yat stotā jaritā tūrṇyartho vṛṣāyamāṇa upa gīrbhir iṭṭe ||
 3.052.06a tṛṭīye dhānāḥ savane puruṣtuta puroḍāśam āhutam māmahasva naḥ |
 3.052.06c ṛbhūmantaṃ vājavantaṃ tvā kave prayasvanta upa śikṣema dhītibhiḥ ||
 3.052.07a pūṣaṇvate te cakṛmā karambham harivate haryaśvāya dhānāḥ |
 3.052.07c apūpam addhi sagaṇo marudbhiḥ somam piba vṛtrahā śūra vidvān ||
 3.052.08a prati dhānā bhārata tūyam asmaḥ puroḍāśam vīratamāya nṛṇām |
 3.052.08c dive-dive sadṛśīr indra tubhyaṃ vardhantu tvā somapeyāya dhṛṣṇo ||

- 3.053.01a indrāparvatā bṛhatā rathena vāmīr iṣa ā vahataṃ suvirāḥ |
3.053.01c vītaṃ havyaṅy adhvaṛeṣu devā vardhethāṃ gīrbhir iḍayā madantā ||
3.053.02a tiṣṭhā su kam maghavan mā parā gāḥ somasya nu tvā suṣutasya yakṣi |
3.053.02c pitur na putraḥ sicam ā rabhe ta indra svādiṣṭhayā girā śacīvaḥ ||
3.053.03a śamsāvādhvāryo prati me gṛṇihīndrāya vāhaḥ kṛṇavāva juṣṭam |
3.053.03c edam barhir yajamānasya sīdāthā ca bhūd uktham indrāya śastam ||
3.053.04a jāyed astam maghavan sed u yonis tad it tvā yuktā harayo vahantu |
3.053.04c yadā kadā ca sunavāma somam agniṣ ṭvā dūto dhanvāty acha ||
3.053.05a parā yāhi maghavann ā ca yāhīndra bhrātar ubhayatrā te artham |
3.053.05c yatrā rathasya bṛhato nidhānaṃ vimocanaṃ vājino rāsabhasya ||
3.053.06a apāḥ somam astam indra pra yāhi kalyāṅir jāyā suraṅam gṛhe te |
3.053.06c yatrā rathasya bṛhato nidhānaṃ vimocanaṃ vājino dakṣiṅāvāt ||
3.053.07a ime bhajā aṅgirasō virūpā divas putrāso asurasya vīrāḥ |
3.053.07c viśvāmitrāya dadato maghāni sahasrasāve pra tiranta āyuh ||
3.053.08a rūpaṃ-rūpaṃ maghavā bobhavīti māyāḥ kṛṇvānas tanvam pari svām |
3.053.08c trir yad divaḥ pari muhūrtam āgāt svair mantrair anṛtupā ṛtāvā ||
3.053.09a mahāṃ ṛṣir devajā devajūto 'stabhnāt sindhum arṇavam nṛcakṣāḥ |
3.053.09c viśvāmitro yad avahat sudāsam apriyāyata kuśikebhir indraḥ ||
3.053.10a haṃsā iva kṛṇutha ślokaṃ adribhir madanto gīrbhir adhvaṛe sute sacā |
3.053.10c devebhir viprā ṛṣayo nṛcakṣaso vi pibadhvam kuśikāḥ somyam madhu ||
3.053.11a upa preta kuśikāś cetayadhvam aśvam rāye pra muñcatā sudāsaḥ |
3.053.11c rājā vṛtraṃ jaṅghanat prāg apāg udag athā yajāte vara ā pṛthivyāḥ ||
3.053.12a ya ime rodasī ubhe aham indram atuṣṭavam |
3.053.12c viśvāmitrasya rakṣati brahmedam bhāratam janam ||
3.053.13a viśvāmitrā arāsata brahmendrāya vajriṇe |
3.053.13c karad in naḥ surādhasaḥ ||
3.053.14a kiṃ te kṛṇvanti kīkaṭeṣu gāvo nāsiraṃ duhre na tapanti gharmam |
3.053.14c ā no bhara pramagandasya vedo naicāsākham maghavan randhayā naḥ ||
3.053.15a sasarpārī amatim bādhamānā bṛhan mimāya jamadagnidattā |
3.053.15c ā sūryasya duhitā tatāna śravo deveṣv amṛtam ajuryam ||
3.053.16a sasarpārī abharat tūyam ebhyo 'dhi śravaḥ pāñcajanyaṣu kṛṣṭiṣu |
3.053.16c sā pakṣyā navyam āyur dadhānā yām me palastijamadagnayo daduḥ ||
3.053.17a sthirau gāvau bhavatām viḍur akṣo meṣā vi varhi mā yugaṃ vi śāri |
3.053.17c indraḥ pātalye dadatām śarītor ariṣṭaneme abhi naḥ sacasva ||
3.053.18a balaṃ dhehi tanūsu no balaṃ indrānaḍutsu naḥ |
3.053.18c balaṃ tokāya tanayāya jīvase tvam hi baladā asi ||
3.053.19a abhi vyayasva khadirasya sāram ojo dhehi spandane śiṃśapāyām |
3.053.19c akṣa viḍo viḍita viḍayasva mā yāmād asmād ava jīhipo naḥ ||
3.053.20a ayam asmān vanaspatir mā ca hā mā ca rīriṣat |
3.053.20c svasty ā gṛhebhya āvasā ā vimocanāt ||
3.053.21a indrotibhir bahulābhir no adya yācchreṣṭhābhir maghavañ chūra jinva |
3.053.21c yo no dveṣṭy adharaḥ sas paḍiṣṭa yam u dviṣmas tam u prāṇo jahātu ||
3.053.22a paraśuṃ cid vi tapati śimbalaṃ cid vi vṛscati |
3.053.22c ukhā cid indra yeṣanti prayastā phenam asyati ||
3.053.23a na sāyakasya cikite janāso lodham nayanti paśu manyamānāḥ |
3.053.23c nāvājinaṃ vājinaḥ hāsayanti na gardabham puro aśvān nayanti ||
3.053.24a ima indra bhāratasya putrā apapitvam cikitur na prapitvam |
3.053.24c hinvanty aśvam arāṅam na nityam jyāvājāṃ pari ṇayanty ājau ||

- 3.054.01a imam mahe vidathyāya śūṣaṃ śasvat kṛtva iḍyāya pra jabhruḥ |
3.054.01c śṛṇotu no damyebhir anikaiḥ śṛṇotv agnir divyair ajasraḥ ||
3.054.02a mahi mahe dive arcā pṛthivyai kāmo ma ichaṅ carati prajānan |
3.054.02c yayor ha stome vidatheṣu devāḥ saparyavo mādayante sacāyoḥ ||
3.054.03a yuvor ṛtaṃ rodasī satyam astu mahe ṣu ṇaḥ suvitāya pra bhūtam |
3.054.03c idaṃ dive namo agne pṛthivyai saparyāmi prayasā yāmi ratnam ||
3.054.04a uto hi vām pūrvyā āvividra ṛtāvarī rodasī satyavācaḥ |
3.054.04c naraś cid vām samithe śūrasātau vavandire pṛthivi vevidānāḥ ||
3.054.05a ko addhā veda ka iha pra vocad devāṃ achā pathyā kā sam eti |
3.054.05c dadṛśra eṣām avamā sadāmsi pareṣu yā guhyeṣu vrateṣu ||
3.054.06a kavir nṛcakṣā abhi ṣim acaṣṭa ṛtasya yonā vighṛte madantī |
3.054.06c nānā cakrāte sadanaṃ yathā veḥ samānena kratunā saṃvidāne ||
3.054.07a samānyā viyute dūreante dhruve pade tasthatur jāgarūke |
3.054.07c uta svasārā yuvatī bhavantī ād u bruvāte mithunāni nāma ||
3.054.08a viśved ete janimā saṃ vivikto maho devān bibhratī na vyathete |
3.054.08c ejad dhruvam patyate viśvam ekaṃ carat patatri viṣuṇaṃ vi jātam ||
3.054.09a sanā purāṇam adhy emy ārān mahaḥ pitur janitur jāmi tan naḥ |
3.054.09c devāso yatra panitāra evair urau pathi vyute tasthur antaḥ ||
3.054.10a imaṃ stomaṃ rodasī pra bravīmy ṛdūdarāḥ śṛṇavann agnijihvāḥ |
3.054.10c mitraḥ samrājo varuṇo yuvāna ādityāsaḥ kavayaḥ paprathānāḥ ||
3.054.11a hiraṇyapāṇiḥ savitā sujihvas trir ā divo vidathe patyamānaḥ |
3.054.11c deveṣu ca savitaḥ ślokaṃ aśrer ād asmabhyam ā suva sarvatātīm ||
3.054.12a sukṛt supāṇiḥ svavāṃ ṛtāvā devas tvaṣṭāvase tāni no dhāt |
3.054.12c pūṣaṇvanta ṛbhavo mādayadhvam ūrdhvagrāvāṇo adhvaram ataṣṭa ||
3.054.13a vidyudrathā maruta ṛṣṭimanto divo maryā ṛtajātā ayāsaḥ |
3.054.13c sarasvatī śṛṇavan yajñiyāso dhātā rayiṃ sahavīraṃ turāsaḥ ||
3.054.14a viṣuṇuṃ stomāsaḥ purudasmam arkā bhagasyeva kāriṇo yāmani gman |
3.054.14c urukramaḥ kakuho yasya pūrvīr na mardhanti yuvatayo janitrīḥ ||
3.054.15a indro viśvair vīryaiḥ patyamāna ubhe ā paprau rodasī mahitvā |
3.054.15c puraṃdaro vṛtrahā dhṛṣṇuṣeṇaḥ saṃgṛbhyā na ā bharā bhūri paśvaḥ ||
3.054.16a nāsatyā me pitarā bandhupṛchā sajātyam aśvinoś cāru nāma |
3.054.16c yuvaṃ hi stho rayidau no rayiṇāṃ dātraṃ rakṣethe akavair adabdhā ||
3.054.17a mahat tad vaḥ kavayaś cāru nāma yad dha devā bhavatha viśva indre |
3.054.17c sakha ṛbhuhīḥ puruhūta priyebhir imāṃ dhiyaṃ sātaye takṣatā naḥ ||
3.054.18a aryamā ṇo aditir yajñiyāso 'dabdhāni varuṇasya vratāni |
3.054.18c yuyota no anapatyāni gantoḥ prajāvān naḥ paśumāṃ astu gātuḥ ||
3.054.19a devānāṃ dūtaḥ purudha prasūto 'nāgān no vocatu sarvatātā |
3.054.19c śṛṇotu naḥ pṛthivī dyaur utāpaḥ sūryo nakṣatrain urv antarikṣam ||
3.054.20a śṛṇvantu no vṛṣaṇaḥ parvatāso dhruvakṣemāsa iḍayā madantaḥ |
3.054.20c ādityair no aditiḥ śṛṇotu yachantu no marutaḥ śarma bhadrām ||
3.054.21a sadā sugaḥ pitumāṃ astu panthā madhvā devā oṣadhiḥ sam pipṛkta |
3.054.21c bhago me agne sakhye na mṛdhyā ud rāyo aśyāṃ sadanam purukṣoḥ ||
3.054.22a svadasva havyā sam iṣo didihy asmadyak sam mimīhi śravāmsi |
3.054.22c viśvāṃ agne pṛtsu tāñ jeṣi śatrūn ahā viśvā sumanā didihī naḥ ||

3.055.01a uṣasaḥ pūrvā adha yad vyūṣur mahad vi jajñe akṣaram pade goḥ |

- 3.055.01c vratā devānām upa nu prabhūṣan mahad devānām asuratvam ekam ||
3.055.02a mo ṣu ṇo atra juhuranta devā mā pūrve agne pitarah padajñāḥ |
3.055.02c purāṇyoḥ sadmanoḥ ketur antar mahad devānām asuratvam ekam ||
3.055.03a vi me purutrā patayanti kāmāḥ śamy achā dīdye pūrvyāṇi |
3.055.03c samiddhe agnāv ṛtam id vadema mahad devānām asuratvam ekam ||
3.055.04a samāno rājā vibhṛtaḥ purutrā śaye śayāsu prayuto vanānu |
3.055.04c anyā vatsam bharati kṣeti mātā mahad devānām asuratvam ekam ||
3.055.05a ākṣit pūrvāsv aparā anūrut sadyo jātāsu taruṇiṣv antaḥ |
3.055.05c antarvatīḥ suvate apravitā mahad devānām asuratvam ekam ||
3.055.06a śayuḥ parastād adha nu dvimātābandhanaś carati vatsa ekaḥ |
3.055.06c mitrasya tā varuṇasya vratāni mahad devānām asuratvam ekam ||
3.055.07a dvimātā hotā vidatheṣu samrād anv agraṃ carati kṣeti budhnaḥ |
3.055.07c pra raṇyāni raṇyavāco bharante mahad devānām asuratvam ekam ||
3.055.08a śūrasyeva yudhyato antamasya pracīcīnaṃ dadṛṣe viśvam āyat |
3.055.08c antar matiś carati niṣṣidhaṃ gor mahad devānām asuratvam ekam ||
3.055.09a ni veveti palito dūta āsv antar mahāmś carati rocanena |
3.055.09c vapūṃṣi bibhrad abhi no vi caṣṭe mahad devānām asuratvam ekam ||
3.055.10a viṣṇur gopāḥ paramam pāti pāthaḥ priyā dhāmāny amṛtā dadhānaḥ |
3.055.10c agniḥ tā viśvā bhuvanāni veda mahad devānām asuratvam ekam ||
3.055.11a nānā cakrāte yamyā vapūṃṣi tayor anyad rocate kṛṣṇam anyat |
3.055.11c śyāvī ca yad aruṣī ca svasārau mahad devānām asuratvam ekam ||
3.055.12a mātā ca yatra duhitā ca dhenū sabardughe dhāpayete samīci |
3.055.12c ṛtasya te sadasīde antar mahad devānām asuratvam ekam ||
3.055.13a anyasyā vatsaṃ rihati mimāya kayā bhuvā ni dadhe dhenur ūdhaḥ |
3.055.13c ṛtasya sā payasāpinvateḍā mahad devānām asuratvam ekam ||
3.055.14a padyā vaste pururūpā vapūṃṣy ūrdhvā tasthau tryaviṃ rerihānā |
3.055.14c ṛtasya sadma vi carāmi vidvān mahad devānām asuratvam ekam ||
3.055.15a pade iva nihite dasme antas tayor anyad guhyam āvir anyat |
3.055.15c sadhricīnā pathyā sā viṣūci mahad devānām asuratvam ekam ||
3.055.16a ā dhenavo dhunayantām aśīsvīḥ sabardughāḥ śāśayā apradugdhāḥ |
3.055.16c navyā-navyā yuvatayo bhavantīr mahad devānām asuratvam ekam ||
3.055.17a yad anyāsu vṛṣabho roravīti so anyasmin yūthe ni dadhāti retaḥ |
3.055.17c sa hi kṣapāvān sa bhagaḥ sa rājā mahad devānām asuratvam ekam ||
3.055.18a vīrasya nu svaśvyam janāsaḥ pra nu vocāma vidur asya devāḥ |
3.055.18c ṣoḍhā yuktāḥ pañca-pañcā vahanti mahad devānām asuratvam ekam ||
3.055.19a devas tvaṣṭā savitā viśvarūpaḥ pupoṣa prajāḥ purudhā jajāna |
3.055.19c imā ca viśvā bhuvanāny asya mahad devānām asuratvam ekam ||
3.055.20a mahī sam airac camvā samīci ubhe te asya vasunā nyṛṣṭe |
3.055.20c śṛṇve vīro vindamāno vasūni mahad devānām asuratvam ekam ||
3.055.21a imāṃ ca naḥ pṛthivīm viśvadhāyā upa kṣeti hitamitro na rājā |
3.055.21c puraḥsadaḥ śarmasado na vīrā mahad devānām asuratvam ekam ||
3.055.22a niṣṣidhvarīs ta oṣadhīr utāpo rayim ta indra pṛthivī bibharti |
3.055.22c sakhāyas te vāmabhājaḥ syāma mahad devānām asuratvam ekam ||
- 3.056.01a na tā minanti māyino na dhīrā vratā devānām prathamā dhruvāṇi |
3.056.01c na rodasī adruhā vedyābhir na parvatā niname tasthivāmsaḥ ||
3.056.02a ṣaḍ bhārām eko acarān bibharti ṛtaṃ varṣiṣṭham upa gāva āguḥ |
3.056.02c tisro mahīr uparās tasthur atyā guhā dve nihite darśy ekā ||

3.056.03a tripājasyo vṛṣabho viśvarūpa uta tryudhā purudha prajāvān |
 3.056.03c tryanīkaḥ patyate māhināvān sa retodhā vṛṣabhaḥ śāsvatīnām ||
 3.056.04a abhika āsām padavīr abodhy ādityānām ahve cāru nāma |
 3.056.04c āpaś cid asmā aramanta devīḥ pṛthag vrajantīḥ pari śim avṛñjan ||
 3.056.05a trī ṣadhasthā sindhavas triḥ kavīnām uta trimātā vidatheṣu samrāt |
 3.056.05c ṛtāvārīr yoṣaṇās tisro apyās trir ā divo vidathe patyamānāḥ ||
 3.056.06a trir ā divaḥ savitar vāryāṇi dive-diva ā suva trir no ahnaḥ |
 3.056.06c tridhātu rāya ā suvā vasūni bhaga trātar dhiṣaṇe sātaye dhāḥ ||
 3.056.07a trir ā divaḥ savitā soṣavīti rājānā mitrāvaruṇā supāṇi |
 3.056.07c āpaś cid asya rodasī cid urvī ratnam bhikṣanta savituḥ savāya ||
 3.056.08a trir uttamā dūṇasā rocanāni trayo rājanty asurasya vīrāḥ |
 3.056.08c ṛtāvāna iṣirā dūḍabhāsas trir ā divo vidathe santu devāḥ ||

3.057.01a pra me vivikvāṁ avidan maṇiṣāṁ dhenuṁ carantīm prayutām agopām |
 3.057.01c sadyas cid yā duduhe bhūri dhāser indras tad agniḥ panitāro asyāḥ ||
 3.057.02a indraḥ su pūṣā vṛṣaṇā suhastā divo na pṛitāḥ śāśayaṁ duduhre |
 3.057.02c viśve yad asyāṁ raṇayanta devāḥ pra vo 'tra vasavaḥ sumnam aśyām ||
 3.057.03a yā jāmayo vṛṣṇa ichanti śaktim namasyantīr jānate garbham asmin |
 3.057.03c achā putraṁ dhenavo vāvasānā mahas caranti bibhrataṁ vapūṁṣi ||
 3.057.04a achā vivakmi rodasī sumeke grāvṇo yujāno adhware maṇiṣā |
 3.057.04c imā u te manave bhūrivārā ūrdhvā bhavanti darśatā yajatrāḥ ||
 3.057.05a yā te jihvā madhumatī sumedhā agne deveṣūcyata urūci |
 3.057.05c tayeha viśvāṁ avase yajatrān ā sādaya pāyayā cā madhūni ||
 3.057.06a yā te agne parvatasyeva dhārāsaścanti pīpayad deva citrā |
 3.057.06c tām asmabhyam pramatim jātavedo vaso rāsva sumatim viśvajanyām ||

3.058.01a dhenuḥ pratnasya kāmyaṁ duhānāntaḥ putras carati dakṣiṇāyāḥ |
 3.058.01c ā dyotaniṁ vahati śubhrayāmoṣasa stomo aśvināv ajigaḥ ||
 3.058.02a suyug vahanti prati vām ṛtenordhvā bhavanti pitareva medhāḥ |
 3.058.02c jarethām asmā vi paṇer maṇiṣāṁ yuvor avas cakṛmā yātam arvāk ||
 3.058.03a suyugbhir aśvaiḥ suvṛtā rathena dasrāv imaṁ śṛṇutaṁ ślokaṁ adreḥ |
 3.058.03c kim aṅga vām praty avartim gamiṣṭhāhur viprāso aśvinā purājāḥ ||
 3.058.04a ā manyethām ā gataṁ kac cid evair viśve janāso aśvinā havante |
 3.058.04c imā hi vām goṛjikā madhūni pra mitrāso na dadur usro agre ||
 3.058.05a tiraḥ purū cid aśvinā rajāṁsy āṅgūṣo vām maghavānā janeṣu |
 3.058.05c eha yātam pathibhir devayānair dasrāv ime vām nidhayo madhūnām ||
 3.058.06a purāṇam okaḥ sakhyaṁ śivam vām yuvor narā draviṇaṁ jahnāvyām |
 3.058.06c punaḥ kṛṇvānāḥ sakhyā śivāni madhvā madema saha nū samānāḥ ||
 3.058.07a aśvinā vāyunā yuvaṁ sudakṣā niyudbhiṣ ca sajoṣasā yuvānā |
 3.058.07c nāsatyā tiroahnyam juṣāṇā somam pibatam asridhā sudānū ||
 3.058.08a aśvinā pari vām iṣaḥ purūcīr iyur gīrbhir yatamānā amṛdhrāḥ |
 3.058.08c ratho ha vām ṛtajā adrijūtaḥ pari dyāvāpṛthivī yāti sadyaḥ ||
 3.058.09a aśvinā madhuṣuttamo yuvākuḥ somas tam pātam ā gataṁ durone |
 3.058.09c ratho ha vām bhūri varpaḥ karikrat sutāvato niṣkṛtam āgamiṣṭhaḥ ||

3.059.01a mitro janān yātayati bruvāṇo mitro dādihāra pṛthivīm uta dyām |

- 3.059.01c mitraḥ kṛṣṭīr animiṣābhi caṣṭe mitrāya havyaṃ ghṛtavaj juhota ||
3.059.02a pra sa mitra marto astu prayasvān yas ta āditya śikṣati vratena |
3.059.02c na hanyate na jiyate tvoto nainam amho aśnoty antito na dūrāt ||
3.059.03a anamivāsa iḍayā madanto mitajñavo varimann ā pṛthivyāḥ |
3.059.03c ādityasya vratam upakṣiyanto vayam mitrasya sumatau syāma ||
3.059.04a ayam mitro namasyaḥ suśevo rājā sukṣatro ajaniṣṭa vedhāḥ |
3.059.04c tasya vayam sumatau yajñiyasyāpi bhadre saumanase syāma ||
3.059.05a mahāṃ ādityo namasopasadyo yātayajjano gṛṇate suśevaḥ |
3.059.05c tasmā etat panyatamāya juṣṭam agnau mitrāya havir ā juhota ||
3.059.06a mitrasya carṣaṇīdhṛto 'vo devasya sānasi |
3.059.06c dyumnaṃ citraśravastamam ||
3.059.07a abhi yo mahinā divam mitro babhūva saprathāḥ |
3.059.07c abhi śravobhiḥ pṛthivīm ||
3.059.08a mitrāya pañca yemire janā abhiṣṭiśavase |
3.059.08c sa devān viśvān bibharti ||
3.059.09a mitro deveṣv āyūṣu janāya vṛktabarhiṣe |
3.059.09c iṣa iṣṭavratā akaḥ ||
- 3.060.01a iheha vo manasā bandhutā nara uśijo jagmur abhi tāni vedasā |
3.060.01c yābhir māyābhiḥ pratijūtivarpaṣaḥ saudhanvanā yajñiyam bhāgam ānaśa ||
3.060.02a yābhiḥ śacībhiś camasāṃ apimśata yayā dhiyā gām ariṇita carmaṇaḥ |
3.060.02c yena harī manasā nirataḥṣata tena devatvam ṛbhavaḥ sam ānaśa ||
3.060.03a indrasya sakhyam ṛbhavaḥ sam ānaśur manor napāto apaso dadhanvire |
3.060.03c saudhanvanāso amṛtatvam erire viṣṭvī śamībhiḥ sukṛtaḥ sukṛtyayā ||
3.060.04a indreṇa yātha sarathaṃ sute sacāṃ atho vaśānām bhavathā saha śriyā |
3.060.04c na vaḥ pratimai sukṛtāni vāghataḥ saudhanvanā ṛbhavo vīryāni ca ||
3.060.05a indra ṛbhubhir vājavadbhiḥ samukṣitaṃ sutam somam ā vṛṣasvā gabhastyoḥ |
3.060.05c dhiyeṣito maghavan dāśuṣo gṛhe saudhanvanebhiḥ saha matsvā nṛbhiḥ ||
3.060.06a indra ṛbhumān vājavān matsveha no 'smin savane śacyā puruṣṭuta |
3.060.06c imāni tubhyaṃ svasarāṇi yemire vratā devānām manuṣaś ca dharmabhiḥ ||
3.060.07a indra ṛbhubhir vājibhir vājayann iha stomaṃ jaritur upa yāhi yajñiyam |
3.060.07c śataṃ ketebhir iṣirebhir āyave sahasraṇītho adhvarasya homani ||
- 3.061.01a uṣo vājena vājini pracetā stomaṃ juṣasva gṛṇato maghoni |
3.061.01c purāṇi devi yuvatīḥ puraṃdhir anu vratam carasi viśvavāre ||
3.061.02a uṣo devy amartyā vi bhāhi candrarathā sūnṛtā irayanti |
3.061.02c ā tvā vahantu suyamāso aśvā hiraṇyavarṇām pṛthupājaso ye ||
3.061.03a uṣaḥ praticī bhuvanāni viśvordhvā tiṣṭhasy amṛtasya ketuḥ |
3.061.03c samānam arthaṃ caraṇīyamānā cakram iva navyasy ā vavṛtsva ||
3.061.04a ava syūmeva cinvatī maghony uṣā yāti svasarasya patnī |
3.061.04c svar jananti subhagā sudamśā āntād divaḥ papratha ā pṛthivyāḥ ||
3.061.05a achā vo devīm uṣasam vibhātīm pra vo bharadhvam namasā suvṛktim |
3.061.05c ūrdhvam madhudhā divi pājo aśret pra rocanā ruruce raṇvasaṃdṛk ||
3.061.06a ṛtāvarī divo arkair abodhy ā revatī rodasī citram asthāt |
3.061.06c āyatīm agna uṣasam vibhātīm vāmam eṣi draviṇam bhikṣamāṇaḥ ||
3.061.07a ṛtasya budhna uṣasām iṣaṇyan vṛṣā mahī rodasī ā viveśa |
3.061.07c mahī mitrasya varuṇasya māyā candreva bhānum vi dadhe purutrā ||

- 3.062.01a imā u vām bhṛmayo manyamānā yuvāvate na tujyā abhūvan |
3.062.01c kva tyad indrāvaruṇā yaśo vām yena smā sinam bharathaḥ sakhibhyaḥ ||
3.062.02a ayam u vām purutamo rayīyañ chaśvattamam avase johavīti |
3.062.02c sajoṣāv indrāvaruṇā marudbhir divā pṛthivyā śṛṇutaṃ havam me ||
3.062.03a asme tad indrāvaruṇā vasu ṣyād asme rayir marutaḥ sarvavīraḥ |
3.062.03c asmān varūtriḥ śaraṇair avantv asmān hotrā bhāratī dakṣiṇābhiḥ ||
3.062.04a bṛhaspate juṣasva no havyāni viśvadevya |
3.062.04c rāsva ratnāni dāsūṣe ||
3.062.05a śucim arkair bṛhaspatim adhvareṣu namasyata |
3.062.05c anāmy oja ā cake ||
3.062.06a vṛṣabhaṃ carṣaṇināṃ viśvarūpam adābhyam |
3.062.06c bṛhaspatim vareṇyam ||
3.062.07a iyaṃ te pūṣann āghṛṇe suṣṭutir deva navyasī |
3.062.07c asmābhis tubhyaṃ śasyate ||
3.062.08a tāṃ juṣasva giram mama vājayantīm avā dhiyam |
3.062.08c vadhūyur iva yoṣaṇām ||
3.062.09a yo viśvābhi vipaśyati bhuvanā saṃ ca paśyati |
3.062.09c sa naḥ pūṣāvitā bhuvat ||
3.062.10a tat savitur vareṇyam bhargo devasya dhīmahi |
3.062.10c dhiyo yo naḥ pracodayāt ||
3.062.11a devasya savitur vyaṃ vājayantaḥ puramdhya |
3.062.11c bhagasya rātim īmahe ||
3.062.12a devaṃ naraḥ savitāraṃ viprā yajñaiḥ suvṛktibhiḥ |
3.062.12c namasyanti dhiyeṣitāḥ ||
3.062.13a somo jigāti gātuvid devānām eti niṣkṛtam |
3.062.13c ṛtasya yonim āsadam ||
3.062.14a somo asmabhyaṃ dvipade catuṣpade ca paśave |
3.062.14c anamīvā iṣas karat ||
3.062.15a asmākam āyur vardhayann abhimātīḥ sahamānaḥ |
3.062.15c somaḥ sadhastham āsadat ||
3.062.16a ā no mitrāvaruṇā ghṛtair gavyūtim ukṣatam |
3.062.16c madhvā rajāṃsi sukratū ||
3.062.17a uruśaṃsā namovṛdhā mahnā dakṣasya rājathaḥ |
3.062.17c drāghīṣṭhābhiḥ śucivratā ||
3.062.18a gṛṇānā jamadagninā yonāv ṛtasya sīdatam |
3.062.18c pātāṃ somam ṛtāvṛdhā ||

4. Mandala

- 4.001.01a tvāṃ hy agne sadam it samanyavo devāso devam aratiṃ nyerira iti kratvā nyerire
|
- 4.001.01c amartyaṃ yajata martyeṣv ā devam ādevaṃ janata pracetasam viśvam ādevaṃ
janata pracetasam ||
- 4.001.02a sa bhrātaraṃ varuṇam agna ā vavṛtsva devāṃ achā sumatī yajñavanasam
jyeṣṭham yajñavanasam |
- 4.001.02c ṛtāvānam ādityaṃ carṣaṇīdhṛtam rājānam carṣaṇīdhṛtam ||
- 4.001.03a sakhe sakhāyam abhy ā vavṛtsvāsuṃ na cakram rathyeva raṃhyāsmabhyaṃ
dasma raṃhyā |
- 4.001.03c agne mṛḍikaṃ varuṇe sacā vido marutsu viśvabhānuṣu |
- 4.001.03d tokāya tuje śusucāna śam kṛdhy asmabhyaṃ dasma śam kṛdhi ||
- 4.001.04a tvam no agne varuṇasya vidvān devasya heḍo 'va yāsisīṣṭhāḥ |
- 4.001.04c yajiṣṭho vahnitamaḥ śosucāno viśvā dveṣāṃsi pra mumugdhy asmat ||
- 4.001.05a sa tvam no agne 'vamo bhavoti nediṣṭho asyā uṣaso vyuṣṭau |
- 4.001.05c ava yakṣva no varuṇam rarāṇo vihi mṛḍikaṃ suhavo na edhi ||
- 4.001.06a asya śreṣṭhā subhagasya samdṛg devasya citratamā martyeṣu |
- 4.001.06c śuci ghr̥tam na taptam aghnyāyā spārḥā devasya maṃhaneva dhenoh ||
- 4.001.07a trir asya tā paramā santi satyā spārḥā devasya janimāny agneḥ |
- 4.001.07c anante antaḥ parivīta āgāc chuciḥ śukro aryo rorucānaḥ ||
- 4.001.08a sa dūto viśved abhi vaṣṭi sadmā hotā hiraṇyaratho raṃsujihvaḥ
- 4.001.08c rohidaśvo vapuṣyo vibhāvā sadā raṇvaḥ pitumatīva saṃsat ||
- 4.001.09a sa cetayan manuṣo yajñabandhuḥ pra tam mahyā raśanayā nayanti
- 4.001.09c sa kṣety asya duryāsu sādhan devo martasya sadhanitvam āpa ||
- 4.001.10a sa tū no agnir nayatu prajānann achā ratnaṃ devabhaktaṃ yad asya |
- 4.001.10c dhiyā yad viśve amṛtā akr̥ṇvan dyauṣ pitā janitā satyam ukṣan ||
- 4.001.11a sa jāyata prathamāḥ pastyāsu maho budhne rajaso asya yonau |
- 4.001.11b apād aśirṣā guhamāno antāyoyuvāno vṛṣabhasya nīḍe ||
- 4.001.12a pra śardha ārta prathamam vipanyaṃ ṛtasya yonā vṛṣabhasya nīḍe |
- 4.001.12c spārḥo yuvā vapuṣyo vibhāvā sapta priyāso 'janayanta vṛṣṇe ||
- 4.001.13a asmākam atra pitaro manuṣyā abhi pra sedur ṛtam āsusāṇāḥ |
- 4.001.13c aśmavrajāḥ sudughā vavre antar ud usrā ājann uṣaso huvānāḥ ||
- 4.001.14a te marmṛjata dadṛvāṃso adriṃ tad eṣām anye abhito vi vocan |
- 4.001.14c paśvayantrāso abhi kāram arcan vidanta jyotiś cakṛpanta dhibhiḥ ||
- 4.001.15a te gavyatā manasā dṛdhram ubdham gā yemānam pari śantam adrim |
- 4.001.15c dṛdham naro vacasā daivyena vrajam gomantam usījo vi vavruḥ ||
- 4.001.16a te manvata prathamam nāma dhenos triḥ sapta mātuh paramāṇi vindan |
- 4.001.16c taj jānatīr abhy anūṣata vrā āvir bhuvad aruṇīr yaśasā goḥ ||
- 4.001.17a neśat tamo dudhitam rocata dyaur ud devyā uṣaso bhānur arta |
- 4.001.17c ā sūryo bṛhataḥ tiṣṭhad ajrāṃ ṛju marteṣu vṛjinā ca paśyan ||
- 4.001.18a ād it paścā bubudhānā vy akhyann ād id ratnaṃ dhārayanta dyubhaktam |
- 4.001.18c viśve viśvāsu duryāsu devā mitra dhiye varuṇa satyam astu ||
- 4.001.19a achā voceya śusucānam agniṃ hotāraṃ viśvabharaṣam yajiṣṭham |
- 4.001.19c śucy ūdho atr̥ṇan na gavām andho na pūtam pariṣiktam aṃśoh ||
- 4.001.20a viśveṣām aditir yajñīyānām viśveṣām atithir mānuṣāṇām |
- 4.001.20c agnir devānām ava āvṛṇānaḥ sumṛḍīko bhavatu jātavedāḥ ||

4.002.01a yo martyeṣv amṛta ṛtāvā devo deveṣv aratir nidhāyi |
 4.002.01c hotā yajiṣṭho mahnā śucadhyai havyait agnir manuṣa īrayadhyai ||
 4.002.02a iha tvam sūno sahaso no adya jāto jātām ubhayām antar agne |
 4.002.02c dūta iyase yuyujāna ṛṣva ṛjumuṣkān vṛṣaṇaḥ śukrāmś ca ||
 4.002.03a atyā vṛdhasnū rohitā ghṛtasnū ṛtasya manye manasā javiṣṭhā |
 4.002.03c antar iyase aruṣā yujāno yuṣmāmś ca devān viśa ā ca martān ||
 4.002.04a aryamaṇam varuṇam mitram eṣām indrāviṣṇū maruto aśvinota |
 4.002.04c svaśvo agne surathaḥ surādhā ed u vaha suhaviṣe janāya ||
 4.002.05a gomām agne 'vimām aśvī yajño nṛvatsakhā sadam id apramṛṣyaḥ |
 4.002.05c iḍāvām eṣo asura prajāvān dīrgho rayiḥ pṛthubudhnaḥ sabhāvān ||
 4.002.06a yas ta idhmaṇ jabharat siṣvidāno mūrdhānaṇ vā tatapate tvāyā |
 4.002.06c bhuvās tasya svatavāmḥ pāyur agne viśvasmāt sīm aghāyata uruṣya ||
 4.002.07a yas te bharād anniyate cid annaṇ niśiṣan mandram atithim udīrat |
 4.002.07c ā devayur inadhate duroṇe tasmin rayir dhruvo astu dāsvān ||
 4.002.08a yas tvā doṣā ya uṣasi praśamsāt priyaṇ vā tvā kṛṇavate haviṣmān |
 4.002.08c aśvo na sve dama ā hemyāvān tam aṇhasaḥ pīparo dāśvāmsam ||
 4.002.09a yas tubhyam agne amṛtāya dāśad duvas tve kṛṇavate yatasruk |
 4.002.09c na sa rāyā śāsāmāno vi yoṣan nainam aṇhaḥ pari varad aghāyoḥ ||
 4.002.10a yasya tvam agne adhvaraṇ jujoṣo devo martasya sudhitam rarāṇaḥ |
 4.002.10c pṛted asad dhotrā sā yaviṣṭhāsāma yasya vidhato vṛdhāsaḥ ||
 4.002.11a cittim acittim cinavad vi vidvān pṛṣṭheva vītā vṛjinā ca martān |
 4.002.11c rāye ca naḥ svapatyāya deva ditim ca rāsvāditim uruṣya ||
 4.002.12a kavim śāsāsuḥ kavayo 'dabdhā nidhārayanto duryāsv āyoḥ |
 4.002.12c atas tvam ḍṛśyām agna etān padbhiḥ paśyer adbhutām aya evaiḥ ||
 4.002.13a tvam agne vāghate supraṇitiḥ sutasomāya vidhate yaviṣṭha |
 4.002.13c ratnam bhara śāsāmānāya ghṛṣve pṛthu ścandram avase carṣaṇiprāḥ ||
 4.002.14a adhā ha yad vayam agne tvāyā padbhir hastebhiś cakṛmā tanūbhiḥ |
 4.002.14c rathaṇ na kranto apasā bhurijor ṛtam yemuḥ sudhya āśuṣāṇaḥ ||
 4.002.15a adhā mātur uṣasaḥ sapta viprā jāyemahi prathamā vedhaso nṛn |
 4.002.15c divas putrā aṅgirasō bhavemādrim rujema dhaninaṇ śucantaḥ ||
 4.002.16a adhā yathā naḥ pitarāḥ parāsaḥ pratnāso agna ṛtam āśuṣāṇaḥ |
 4.002.16c śucīd ayan dīdhitim ukthasāsaḥ kṣāmā bhindanto aruṇir apa vran ||
 4.002.17a sukarmāṇaḥ suruco devayanto 'yo na devā janimā dhamantaḥ |
 4.002.17c śucanto agnim vavṛdhanta indram ūrvaṇ gavyam pariśadanto agman ||
 4.002.18a ā yūtheva kṣumati paśvo akhyad devānāṇ yaj janimānty ugra |
 4.002.18c martānāṇ cid urvaśir akṛpran vṛdhe cid aya uparasyāyoḥ ||
 4.002.19a akarma te svapaso abhūma ṛtam avasrann uṣaso vibhātīḥ |
 4.002.19c anūnam agnim purudhā suścandram devasya marmṛjataś cāru cakṣuḥ ||
 4.002.20a etā te agna ucathāni vedho 'vocāma kavaye tā juṣasva |
 4.002.20c uc chocasva kṛṇuhi vasyaso no maho rāyaḥ puruvāra pra yandhi ||

4.003.01a ā vo rājānam adhvarasya rudraṇ hotāraṇ satyayajam rodasyoḥ |
 4.003.01c agnim purā tanayitnor acittād dhirāṇyarūpam avase kṛṇudhvam ||
 4.003.02a ayaṇ yoniś cakṛmā yaṇ vayam te jāyeva patya uśati suvāsāḥ |
 4.003.02c arvācīnaḥ parivito ni śīdemā u te svapāka praticīḥ ||
 4.003.03a āśṛṇvate adṛpitāya manma nṛcakṣase sumṛḍikāya vedhaḥ |

4.003.03c devāya śastim amṛtāya śamsa grāveva sotā madhuṣud yam īde ||
 4.003.04a tvam cin naḥ śamyā agne asyā ṛtasya bodhy ṛtacit svādhīḥ |
 4.003.04c kadā ta ukthā sadhamādyāni kadā bhavanti sakhyā gṛhe te ||
 4.003.05a kathā ha tad varuṇāya tvam agne kathā dive garhase kan na āgaḥ |
 4.003.05c kathā mitrāya miḍhuṣe pṛthivyai bravaḥ kad aryamṇe kad bhagāya ||
 4.003.06a kad dhiṣṇyāsu vṛdhasāno agne kad vātāya pratavase śubhamye |
 4.003.06c parijmane nāsatyāya kṣe bravaḥ kad agne rudrāya nṛghne ||
 4.003.07a kathā mahe puṣṭimbharāya pūṣṇe kad rudrāya sumakhāya havirde |
 4.003.07c kad viṣṇava urugāyāya reto bravaḥ kad agne śarave bṛhatyai ||
 4.003.08a kathā śardhāya marutām ṛtāya kathā sūre bṛhate pṛchyamānaḥ |
 4.003.08c prati bravo 'ditaye turāya sādā divo jātavedaś cikivān ||
 4.003.09a ṛtena ṛtaṃ niyatam īda ā gor āmā sacā madhumat pakvam agne |
 4.003.09c kṛṣṇā satī ruśatā dhāsinaiṣā jāmaryeṇa payasā pīpāya ||
 4.003.10a ṛtena hi śmā vṛṣabhaś cid aktaḥ pumām agniḥ payasā pṛṣṭhyena |
 4.003.10c aspandamāno acarad vayodhā vṛṣā śukraṃ duduhe pṛśnir ūdhaḥ ||
 4.003.11a ṛtenādrim vy asan bhidantaḥ sam aṅgirasō navanta gobhiḥ |
 4.003.11c śunaṃ naraḥ pari śadann uśāsam āviḥ svar abhavaj jāte agnau ||
 4.003.12a ṛtena devīr amṛtā amṛktā arṇobhir āpo madhumadbhir agne |
 4.003.12c vājī na sargeṣu prastubhānaḥ pra sadam it sravitave dadhanyuḥ ||
 4.003.13a mā kasya yakṣaṃ sadam id dhuro gā mā veśasya praminato māpeḥ |
 4.003.13c mā bhrātur agne anṛjor ṛnaṃ ver mā sakhyur dakṣaṃ ripor bhujema ||
 4.003.14a rakṣā no agne tava rakṣaṇebhī rārakṣānaḥ sumakha pṛnānaḥ |
 4.003.14c prati ṣphura vi ruja vīdv amho jahi rakṣo mahi cid vāvṛdhānam ||
 4.003.15a ebhir bhava sumanā agne arkair imān sprśa manmabhiḥ sūra vājān |
 4.003.15c uta brahmāṇy aṅgiro juṣasva saṃ te śastir devavātā jareta ||
 4.003.16a etā viśvā viduṣe tubhyaṃ vedho nīthāny agne niṇyā vacāmsi |
 4.003.16c nivacanā kavaye kāvyāny aśamsiṣam matibhir vipra ukthaiḥ ||

4.004.01a kṛṇuṣva pājaḥ prasitiṃ na pṛthvīm yāhi rājevāmavām ibhena |
 4.004.01c tṛṣvīm anu prasitiṃ drūṇāno 'stāsi vidhya rakṣasas tapiṣṭhaiḥ ||
 4.004.02a tava bhramāsa āsuyā patanty anu sprśa dhṛṣatā śośucānaḥ |
 4.004.02c tapūṃṣy agne juhvā patamgān asaṃdito vi sṛja viṣvag ulkāḥ ||
 4.004.03a prati spaśo vi sṛja tūrṇitamo bhavā pāyur viśo asyā adabdhaḥ |
 4.004.03c yo no dūre aghaśaṃso yo anty agne mākiṣ te vyathir ā dadharṣit ||
 4.004.04a ud agne tiṣṭha praty ā tanuṣva ny amitrām oṣatāt tigmahete |
 4.004.04c yo no arātiṃ samidhāna cakre nīcā taṃ dhakṣy atasam na śuṣkam ||
 4.004.05a ūrdhvo bhava prati vidhyādhy asmad āviṣ kṛṇuṣva daivyāny agne |
 4.004.05c ava sthirā tanuhi yātujūnām jānim ajāmim pra mṛṇihi śatrūn ||
 4.004.06a sa te jānāti sumatiṃ yaviṣṭha ya ivate brahmaṇe gātum airat |
 4.004.06c viśvāny asmai sudināni rāyo dyumnāny aryo vi duro abhi dyaut ||
 4.004.07a sed agne astu subhagaḥ sudānur yas tvā nityena haviṣā ya ukthaiḥ |
 4.004.07c pipṛṣati sva āyuṣi duroṇe viśved asmai sudinā sāsad iṣṭiḥ ||
 4.004.08a arcāmi te sumatiṃ ghoṣy arvāk saṃ te vāvātā jaratām iyam giḥ |
 4.004.08c svaśvās tvā surathā marjayemāsme kṣatrāṇi dhārayer anu dyūn ||
 4.004.09a iha tvā bhūry ā cared upa tman doṣāvastar dīdivāmsam anu dyūn |
 4.004.09c krīdantas tvā sumanasah sapemābhi dyumnā tasthivāṃso janānām ||
 4.004.10a yas tvā svaśvaḥ suhiraṇyo agna upayāti vasumatā rathena |
 4.004.10c tasya trātā bhavasi tasya sakhā yas ta ātithyam ānuṣag jujoṣat ||

4.004.11a maho rujāmi bandhutā vacobhis tan mā pitur gotamād anv iyāya |
 4.004.11c tvam no asya vacasaś cikiddhi hotar yaviṣṭha sukrato damūnāḥ ||
 4.004.12a asvapnajas taraṇayaḥ suśevā atandrāso 'vṛkā aśramiṣṭhāḥ |
 4.004.12c te pāyavaḥ sadhryaṅco niṣadyāgne tava naḥ pāntv amūra ||
 4.004.13a ye pāyavo māmatelyaṃ te agne paśyanto andhaṃ duritād arakṣan |
 4.004.13c rarakṣa tān sukṛto viśvedā dipsanta id ripavo nāha debhuḥ ||
 4.004.14a tvayā vayaṃ sadhanyas tvotās tava praṇīty aśyāma vājān |
 4.004.14c ubhā śaṃsā sūdaya satyatāte 'nuṣṭhuyā kṛṇuhy ahrayāṇa ||
 4.004.15a ayā te agne samidhā vidhema prati stomam śasyamānam gṛbhāya |
 4.004.15c dahāśaso rakṣasaḥ pāhy asmān druho nido mitramaho avadyāt ||

4.005.01a vaiśvānarāya mīdhuṣe sajośāḥ kathā dāśemāgnaye bṛhad bhāḥ |
 4.005.01c anūnena bṛhatā vakṣathenopa stabhāyad upamin na rodhaḥ ||
 4.005.02a mā nindata ya imām mahyaṃ rātiṃ devo dadau martyāya svadhāvān |
 4.005.02c pākāya gṛtso amṛto vicetā vaiśvānaro nṛtamo yahvo agniḥ ||
 4.005.03a sāma dvibarhā mahi tigmabhṛṣṭiḥ sahasraretā vṛṣabhas tuviṣmān |
 4.005.03c padaṃ na gor apagūḍham vividvān agnir mahyam pred u vocan manīṣām ||
 4.005.04a pra tāṃ agnir babhasat tigmajambhas tapiṣṭhena śociṣā yaḥ surādihāḥ |
 4.005.04c pra ye minanti varuṇasya dhāma priyā mitrasya cetato dhruvāṇi ||
 4.005.05a abhrātarō na yoṣaṇo vyantaḥ patiripo na janayo durevāḥ |
 4.005.05c pāpāsaḥ santo anṛtā asatyā idam padam ajanatā gabhīram ||
 4.005.06a idam me agne kiyate pāvakāminate gurum bhāram na manma |
 4.005.06c bṛhad dadhātha dhṛṣatā gabhīram yahvam pṛṣṭham prayasā saptadhātu ||
 4.005.07a tam in nv eva samanā samānam abhi kratvā punatī dhītir aśyāḥ |
 4.005.07c sasasya carmann adhi cāru pṛśner agre rupa ārupitaṃ jabāru ||
 4.005.08a pravācyam vacasaḥ kim me asya guhā hitam upa niṅig vadanti |
 4.005.08c yad usriyāṇām apa vār iva vran pāti priyaṃ rupo agram padaṃ veḥ ||
 4.005.09a idam u tyan mahi mahām anīkaṃ yad usriyā sacata pūrvyam gauḥ |
 4.005.09c ṛtasya pade adhi didyānam guhā raghuṣyad raghuyad viveda ||
 4.005.10a adha dyutānaḥ pitroḥ sacāsāmanuta guhyaṃ cāru pṛśneḥ |
 4.005.10c mātuṣ pade parame anti śad gor vṛṣṇaḥ śociṣaḥ prayatasya jihvā ||
 4.005.11a ṛtam voce namasā pṛchyamānas tavāśasā jātavedo yadidam |
 4.005.11c tvam asya kṣayasi yad dha viśvam divi yad u draviṇam yat pṛthivyām ||
 4.005.12a kiṃ no asya draviṇam kad dha ratnam vi no voco jātavedaś cikitvān |
 4.005.12c guhādhvanaḥ paramam yan no asya reku padaṃ na nidānā aganma ||
 4.005.13a kā maryādā vayunā kad dha vāmam achā gamema raghavo na vājam |
 4.005.13c kadā no devīr amṛtasya patniḥ sūro varṇena tatanann uśāsaḥ ||
 4.005.14a anireṇa vacasā phalgvena pratītyena kṛdhunātrpāsaḥ |
 4.005.14c adhā te agne kim ihā vadanty anāyudhāsa āsatā sacantām ||
 4.005.15a asya śriye samidhānasya vṛṣṇo vasor anīkaṃ dama ā ruoca |
 4.005.15c ruśad vasānaḥ sudṛśīkarūpaḥ kṣītir na rāyā puruvāro adyaut ||

4.006.01a ūrdhva ū ṣu ṇo adhvarasya hotar agne tiṣṭha devatātā yajiyān |
 4.006.01c tvam hi viśvam abhy asi manma pra vedhasā cit tirasi manīṣām ||
 4.006.02a amūro hotā ny asādi vikṣv agnir mandro vidatheṣu pracetāḥ |
 4.006.02c ūrdhvam bhānum savitevāśren meteva dhūmam stabhāyad upa dyām ||
 4.006.03a yatā sujūrṇi rātinī ghṛtāci pradakṣiṇid devatātim urāṇaḥ |

4.006.03c ud u svarur navajā nākraḥ paśvo anakti sudhitaḥ sumekaḥ ||
 4.006.04a stīrṇe barhiṣi samidhāne agnā ūrdhvo adhvaryur jujuṣāno asthāt |
 4.006.04c pary agniḥ paśupā na hotā triviṣṭy eti pradiva urāṇaḥ ||
 4.006.05a pari tmanā mitadrur eti hotāgnir mandro madhuvacā ṛtāvā |
 4.006.05c dravanty asya vājino na śokā bhayante viśvā bhuvanā yad abhrāt ||
 4.006.06a bhadrā te agne svanika samdṛg ghorasya sato viṣuṇasya cāruḥ |
 4.006.06c na yat te śocis tamasā varanta na dhvasmānas tanvī repa ā dhuḥ ||
 4.006.07a na yasya sātur janitor avāri na mātārāpitarā nū cid iṣṭau |
 4.006.07c adhā mitro na sudhitaḥ pāvako 'gnir didāya mānuṣiṣu vikṣu ||
 4.006.08a dvir yam pañca jījanan samvasānāḥ svasāro agnim mānuṣiṣu vikṣu |
 4.006.08c uṣarbudham atharyo na dantaḥ śukraḥ svāsam paraśuḥ na tigmam ||
 4.006.09a tava tye agne harito ghṛtasnā rohitāsa ṛjvañcaḥ svañcaḥ |
 4.006.09c aruṣāso vṛṣaṇa ṛjumuṣkā ā devatātim ahvanta dasmāḥ ||
 4.006.10a ye ha tye te sahamānā ayāsas tveṣāso agne arcayaś caranti |
 4.006.10c śyenāso na duvasanāso arthaḥ tuviṣvaṇaso mārutaḥ na śardhaḥ ||
 4.006.11a akāri brahma samidhāna tubhyaḥ śamsāty ukthaḥ yajate vy ū dhāḥ |
 4.006.11c hotāram agnim manuṣo ni ṣedur namasyanta uśijaḥ śamsam āyoḥ ||

4.007.01a ayam iha prathamo dhāyi dhātr̥bhir hotā yajīṣṭho adhvarēṣv iḍyaḥ |
 4.007.01c yam apnavāno bhṛgavo virurucur vaneṣu citraḥ vibhvaḥ viśe-viśe ||
 4.007.02a agne kadā ta ānuṣag bhuvad devasya cetanam |
 4.007.02c adhā hi tvā jagṛbhrire martāso vikṣv iḍyam ||
 4.007.03a ṛtāvānaḥ vicetasam paśyanto dyām iva stṛbhiḥ |
 4.007.03c viśveṣām adhvarānām haskartāraḥ dame-dame ||
 4.007.04a āśuḥ dūtaḥ vivasvato viśvā yaś carṣaṇīr abhi |
 4.007.04c ā jabhruḥ ketum āyavo bhṛgavāṇaḥ viśe-viśe ||
 4.007.05a tam im hotāram ānuṣak cikitvāṃsaḥ ni ṣedire |
 4.007.05c raṇvam pāvakaśociṣaḥ yajīṣṭhaḥ sapta dhāmabhiḥ ||
 4.007.06a taḥ śaśvatiṣu mātr̥ṣu vana ā vītam aśritam |
 4.007.06c citraḥ santaḥ guhā hitaḥ suvedaḥ kūcidarthinam ||
 4.007.07a sasasya yad viyutā sasminn ūdhann ṛtasya dhāman raṇayanta devāḥ |
 4.007.07c mahāṃ agnir namasā rātahavyo ver adhvarāya sadam id ṛtāvā ||
 4.007.08a ver adhvarasya dūtyāni vidvān ubhe antā rodasī samcikitvān |
 4.007.08c dūta iyase pradiva urāṇo viduṣṭaro diva ārodhanāni ||
 4.007.09a kṛṣṇaḥ ta ema ruśataḥ puro bhās carīṣṇv arcir vapuṣām id ekam |
 4.007.09c yad apravitā dadhate ha garbhaḥ sadyaś cij jāto bhavasid u dūtaḥ ||
 4.007.10a sadyo jātasya dadṛśānam ojo yad asya vāto anuvāti śociḥ |
 4.007.10c vṛṇakti tigmām ataseṣu jihvām sthirā cid annā dayate vi jambhaiḥ ||
 4.007.11a tr̥ṣu yad annā tr̥ṣuṇā vavakṣa tr̥ṣuḥ dūtaḥ kṛṇute yahvo agniḥ |
 4.007.11c vātasya meḍim sacate nijūrvann āśuḥ na vājayate hinve arvā ||

4.008.01a dūtaḥ vo viśvavedasaḥ havyavāham amartyam |
 4.008.01c yajīṣṭhaḥ ṛnjase girā ||
 4.008.02a sa hi vedā vasudhitim mahāṃ ārodhanaḥ divaḥ |
 4.008.02c sa devāṃ eha vakṣati ||
 4.008.03a sa veda deva ānamaḥ devāṃ ṛtāyate dame |
 4.008.03c dāti priyāni cid vasu ||

4.008.04a sa hotā sed u dūtyam cikitvāṁ antar īyate |
 4.008.04c vidvāṁ ārodhanam divaḥ ||
 4.008.05a te syāma ye agnaye dadāśur havyaḍātibhiḥ |
 4.008.05c ya im puṣyanta indhate ||
 4.008.06a te rāyā te suvīryaiḥ sasavāṁso vi śṛṇvire |
 4.008.06c ye agnā dadhire duvaḥ ||
 4.008.07a asme rāyo dive-dive sam carantu purusṛhaḥ |
 4.008.07c asme vājāsa iratām ||
 4.008.08a sa vipras carṣaṇinām śavasā mānuṣāṇām |
 4.008.08c ati kṣipreva vidhyati ||

4.009.01a agne mṛḍa mahāṁ asi ya im ā devayum janam |
 4.009.01c iyetha barhir āsadam ||
 4.009.02a sa mānuṣīṣu dūḍabho vikṣu prāvīr amartyaḥ |
 4.009.02c dūto viśveṣām bhuvat ||
 4.009.03a sa sadma pari ṇiyate hotā mandro diviṣṭiṣu |
 4.009.03c uta potā ni ṣīdati ||
 4.009.04a uta gnā agnir adhvara uto gṛhapatir dame |
 4.009.04c uta brahmā ni ṣīdati ||
 4.009.05a veṣi hy adhvariṇyatām upavaktā janānām |
 4.009.05b havya ca mānuṣāṇām ||
 4.009.06a veṣid v asya dūtyam yasya jujoṣo adhvaram |
 4.009.06b havyam martasya voḍhave ||
 4.009.07a asmākam joṣy adhvaram asmākam yajñam aṅgiraḥ |
 4.009.07c asmākam śṛṇudhī havam ||
 4.009.08a pari te dūḍabho ratho 'smāṁ aśnotu viśvataḥ |
 4.009.08c yena rakṣasi dāsuṣaḥ ||

4.010.01a agne tam adyāśvam na stomaiḥ kratum na bhadram hṛdisṛsam |
 4.010.01c ṛdhyāmā ta ohaiḥ ||
 4.010.02a adhā hy agne krator bhadrasya dakṣasya sādhoḥ |
 4.010.02c rathir ṛtasya bṛhato babhūtha ||
 4.010.03a ebhir no arkair bhavā no arvāṅ svar ṇa jyotiḥ |
 4.010.03c agne viśvebhiḥ sumanā anīkaiḥ ||
 4.010.04a ābhiṣ ṭe adya gīrbhir gṛṇanto 'gne dāsema |
 4.010.04c pra te divo na stanayanti śuṣmāḥ ||
 4.010.05a tava svādiṣṭhāgne samḍṛṣṭir idā cid ahna idā cid aktoḥ |
 4.010.05c śriye rukmo na rocata upāke ||
 4.010.06a ghṛtam na pūtam tanūr arepāḥ śuci hiraṇyam |
 4.010.06c tat te rukmo na rocata svadhāvaḥ ||
 4.010.07a kṛtam cid dhi ṣmā sanemi dveṣo 'gna inoṣi martāt |
 4.010.07c itthā yajamānād ṛtāvaḥ ||
 4.010.08a śivā naḥ sakhyā santu bhrātrāgne deveṣu yuṣme |
 4.010.08c sā no nābhiḥ sadane sasminn ūdhan ||

4.011.01a bhadram te agne sahasinn anīkam upāka ā rocate sūryasya |

4.011.01c ruśad dṛśe dadṛśe naktayā cid arūkṣitaṃ dṛśa ā rūpe annam ||
 4.011.02a vi śāhy agne gṛṇate maṇiśāṃ khaṃ vepasā tuvijāta stavānaḥ |
 4.011.02c viśvebhir yad vāvanaḥ śukra devais tan no rāsva sumaho bhūri manma ||
 4.011.03a tvad agne kāvyā tvan maṇiśās tvad ukthā jāyante rādhyāni |
 4.011.03c tvad eti draviṇaṃ vīrapeśā itthādhiye dāsūṣe martyāya ||
 4.011.04a tvad vājī vājambharo vihāyā abhiṣtikṛj jāyate satyaśuṣmaḥ |
 4.011.04c tvad rayir devajūto mayobhus tvad āsur jūjuvāṃ agne arvā ||
 4.011.05a tvām agne prathamam devayanto devam martā amṛta mandrajihvam |
 4.011.05c dveṣoyutam ā vivāsanti dhībhir damūnasaṃ gṛhapatim amūram ||
 4.011.06a āre asmad amatim āre aṃha āre viśvām durmatim yan nipāsi |
 4.011.06c doṣā śivaḥ sahasaḥ sūno agne yaṃ deva ā cit sacase svasti ||

4.012.01a yas tvām agna inadhate yatasruk tris te annam kṛṇavat sasminn ahan |
 4.012.01c sa su dyumnair abhy astu prasakṣat tava kratvā jātavedaś cikitvān ||
 4.012.02a idhmaṃ yas te jabharac chaśramāṇo maho agne anīkam ā saparyan |
 4.012.02c sa idhānaḥ prati doṣām uśāsam puṣyan rayiṃ sacate ghnann amitṛān ||
 4.012.03a agnir iśe bṛhataḥ kṣatriyasyāgnir vājasya paramasya rāyaḥ |
 4.012.03c dadhāti ratnaṃ vidhate yaviṣṭho vy ānuṣaṅ martyāya svadhāvān ||
 4.012.04a yac cid dhi te puruṣatrā yaviṣṭhācittibhiś cakṛmā kac cid āgaḥ |
 4.012.04c kṛdhī ṣv asmāṃ aditer anāgān vy enāṃsi śiśratho viṣvag agne ||
 4.012.05a mahaś cid agna enaso abhīka ūrvād devānām uta martyānām |
 4.012.05c mā te sakhāyaḥ sadam id riśāma yachā tokāya tanayāya śam yoḥ ||
 4.012.06a yathā ha tyad vasavo gauryaṃ cit padi ṣitām amuñcatā yajatrāḥ |
 4.012.06c evo ṣv asman muñcatā vy aṃhaḥ pra tāry agne prataraṃ na āyuḥ ||

4.013.01a praty agnir uśasām agram akhyad vibhātinām sumanā ratnadheyam |
 4.013.01c yātam aśvinā sukṛto duroṇam ut sūryo jyotiṣā deva eti ||
 4.013.02a ūrdhvam bhānuṃ savitā devo aśred drapsaṃ davidhvaḥ gaviṣo na satvā |
 4.013.02c anu vratam varuṇo yanti mitro yat sūryaṃ divy ārohayanti ||
 4.013.03a yaṃ sīm akṛṇvan tamase vipṛce dhruvakṣemā anavasyanto artham |
 4.013.03c tam sūryaṃ haritaḥ sapta yahvī spaśam viśvasya jagato vahanti ||
 4.013.04a vahiṣṭhebhīr viharan yāsi tantum avavyayann asitam deva vasma |
 4.013.04c davidhvato raśmayāḥ sūryasya carnevāvādhus tamo apsv antaḥ ||
 4.013.05a anāyato anibaddhaḥ kathāyaṃ nyaṅṅ uttāno 'va padyate na |
 4.013.05b kayā yāti svadhayā ko dadarśa diva skambhaḥ samṛtaḥ pāti nākam ||

4.014.01a praty agnir uśaso jātavedā akhyad devo rocamānā mahobhiḥ |
 4.014.01c ā nāsatorugāyā rathenemaṃ yajñam upa no yātam acha ||
 4.014.02a ūrdhvaṃ ketuṃ savitā devo aśrej jyotir viśvasmai bhuvanāya kṛṇvan |
 4.014.02c āprā dyāvāpṛthivī antarikṣam vi sūryo raśmibhiś cakitānaḥ ||
 4.014.03a āvahanty aruṇīr jyotiṣāgān mahī citrā raśmibhiś cakitānā |
 4.014.03c prabodhayanti suvitāya devy uśā iyate suyujā rathena ||
 4.014.04a ā vām vahiṣṭhā iha te vahantu rathā aśvāsa uśaso vyuṣṭau |
 4.014.04c ime hi vām madhupeyāya somā asmin yajñe vṛṣaṇā mādayethām ||
 4.014.05a anāyato anibaddhaḥ kathāyaṃ nyaṅṅ uttāno 'va padyate na |

4.015.01a agnir hotā no adhvare vāji san pari ṇiyate |
 4.015.01c devo deveṣu yajñiyaḥ ||
 4.015.02a pari triviṣṭy adhvaraṃ yāty agnī rathīr iva |
 4.015.02c ā deveṣu prayo dadhat ||
 4.015.03a pari vājapatiḥ kavir agnir havyāny akramīt |
 4.015.03c dadhad ratnāni dāsūṣe ||
 4.015.04a ayaṃ yaḥ sṛñjaye puro daivavāte samidhyate |
 4.015.04c dyumāñ amitradambhanaḥ ||
 4.015.05a asya ghā vīra ivato 'gner īśita martyaḥ |
 4.015.05c tigmajambhasya mīdhuṣaḥ ||
 4.015.06a tam arvantaṃ na sānasim aruṣaṃ na divaḥ śísuṃ |
 4.015.06c marmṛjyante dive-dive ||
 4.015.07a bodhad yan mā haribhyāṃ kumāraḥ sāhadevyāḥ |
 4.015.07c achā na hūta ud aram ||
 4.015.08a uta tyā yajatā harī kumārāt sāhadevyāt |
 4.015.08c prayatā sadya ā dade ||
 4.015.09a eṣa vāṃ devāv aśvinā kumāraḥ sāhadevyāḥ |
 4.015.09c dīrghāyur astu somakaḥ ||
 4.015.10a taṃ yuvaṃ devāv aśvinā kumāraṃ sāhadevyam |
 4.015.10c dīrghāyuṣaṃ kṛṇotana ||

4.016.01a ā satyo yātu maghavāñ ṛjīṣī dravantv asya haraya upa naḥ |
 4.016.01c tasmā id andhaḥ suṣumā sudakṣam ihābhipitvaṃ karate gṛṇānaḥ ||
 4.016.02a ava sya sūrādhvano nānte 'smin no adya savane mandadhyai |
 4.016.02c śamsāty uktham uśaneva vedhās cikituṣe asuryāya manma ||
 4.016.03a kavir na niṇyaṃ vidathāni sādhan vṛṣā yat sekaṃ vipipāno arcāt |
 4.016.03c diva itthā jījanat sapta kārūn ahnā cic cakrur vayunā gṛṇantaḥ ||
 4.016.04a svar yad vedi sudṛśīkam arkair mahi jyotī rurucur yad dha vastoḥ |
 4.016.04c andhā tamāṃsi dudhitā vicakṣe nṛbhyaś cakāra nṛtamo abhiṣṭau ||
 4.016.05a vavakṣa indro amitam ṛjīṣy ubhe ā paprau rodasī mahitvā |
 4.016.05c ataś cid asya mahimā vi recy abhi yo viśvā bhuvanā babhūva ||
 4.016.06a viśvāni śakro naryāṇi vidvān apo rireca sakhibhir nikāmaiḥ |
 4.016.06c aśmānaṃ cid ye bibhidur vacobhir vrajaṃ gomantam uśijo vi vavruḥ ||
 4.016.07a apo vṛtraṃ vavrivāṃsam parāhan prāvat te vajram pṛthivī sacetāḥ |
 4.016.07c prārṇāṃsi samudriyāny ainoḥ patir bhavañ chavasā sūra dhṛṣṇo ||
 4.016.08a apo yad adrim puruhūta dardar āvir bhuvat saramā pūrvyaṃ te |
 4.016.08c sa no netā vājam ā darṣi bhūriṃ gotrā rujann aṅgirobhir gṛṇānaḥ ||
 4.016.09a achā kavim nṛmaṇo gā abhiṣṭau svarṣātā maghavan nādhamānam |
 4.016.09c ūtibhis tam iṣaṇo dyumnahūtau ni māyāvān abrahmā dasyur arta ||
 4.016.10a ā dasyughnā manasā yāhy astam bhuvat te kutsaḥ sakhye nikāmaḥ |
 4.016.10c sve yonau ni ṣadantaṃ sarūpā vi vāṃ cikitsad ṛtacid dha nārī ||
 4.016.11a yāsi kutsena saratham avasyus todo vātasya haryor īśānaḥ |
 4.016.11c ṛjṛā vājam na gadhyaṃ yuyūṣan kavir yad ahan pāryāya bhūṣāt ||
 4.016.12a kutsāya śuṣṇam aśuṣaṃ ni barhiḥ prapitve ahnaḥ kuyavaṃ sahasrā |
 4.016.12c sadyo dasyūn pra mṛṇa kutsyena pra sūraś cakram vṛhatād abhike ||
 4.016.13a tvam piprum mṛgayam śūsuvāṃsam ṛjīsvane vaidathināya randhīḥ |
 4.016.13c pañcāśat kṛṣṇā ni vapaḥ sahasrātkam na puro jarimā vi dardaḥ ||

4.016.14a sūra upāke tanvaṃ dadhāno vi yat te cety amṛtasya varpaḥ |
 4.016.14c mṛgo na hasti taviṣim uṣāṇaḥ siṃho na bhīma āyudhāni bibhrat ||
 4.016.15a indraṃ kāmā vasūyanto agman svarmīḍhe na savane cakānāḥ |
 4.016.15c śravasyavaḥ śasāmānāsa ukthair oko na raṇvā sudṛśīva puṣṭiḥ ||
 4.016.16a tam id va indraṃ suhavaṃ huvema yas tā cakāra naryā purūṇi |
 4.016.16c yo māvate jaritre gadhyaṃ cin makṣū vājam bharati spārharādhāḥ ||
 4.016.17a tigmā yad antar aśaniḥ patāti kasmiñ cic chūra muhuke janānām |
 4.016.17c ghorā yad aṛya samṛtir bhavāty adha smā nas tanvo bodhi gopāḥ ||
 4.016.18a bhuvo 'vitā vāmadevasya dhīnām bhuvāḥ sakhāvṛko vājasātau |
 4.016.18c tvām anu pramatim ā jaganmoruśaṃso jaritre viśvadha syāḥ ||
 4.016.19a ebhir nṛbhir indra tvāyubhiḥ tvā maghavadbhir maghavan viśva ājau |
 4.016.19c dyāvo na dyumnair abhi santo aṛyaḥ kṣapo madema śaradaś ca pūrvīḥ ||
 4.016.20a eved indrāya vṛṣabhāya vṛṣṇe brahmākarma bhṛgavo na ratham |
 4.016.20c nū cid yathā naḥ sakhyā viyośad asan na ugro 'vitā tanūpāḥ ||
 4.016.21a nū ṣṭuta indra nū gṛṇāna iṣaṃ jaritre nadyo na pīpeḥ |
 4.016.21c akāri te harivo brahma navyaṃ dhiyā syāma rathyaḥ sadāsāḥ ||

4.017.01a tvam mahāṃ indra tubhyaṃ ha kṣā anu kṣatram maṃhanā manyata dyauḥ |
 4.017.01c tvam vṛtram śavasā jaghanvān sṛjaḥ sindhūṃr ahinā jagrasānān ||
 4.017.02a tava tviṣo janiman rejata dyau rejad bhūmir bhiyasā svasya manyoḥ |
 4.017.02c ṛghāyanta subhvaḥ parvatāsa ārdan dhanvāni sarayanta āpaḥ ||
 4.017.03a bhinad giriṃ śavasā vajram iṣṇann āviṣkṛṇvānaḥ sahasāna ojaḥ |
 4.017.03c vadhīd vṛtram vajreṇa mandasānaḥ sarann āpo javasā hatavṛṣṇiḥ ||
 4.017.04a suvīras te janitā manyata dyaur indrasya kartā svapastamo bhūt |
 4.017.04c ya im jājana svaryaṃ suvajram anapacyutaṃ sadaso na bhūma ||
 4.017.05a ya eka ic cyāvayati pra bhūmā rājā kṛṣṭinām puruhūta indraḥ |
 4.017.05c satyam enam anu viśve madanti rātim devasya gṛṇato maghonaḥ ||
 4.017.06a satrā somā abhavann asya viśve satrā madāso bṛhato madiṣṭhāḥ |
 4.017.06c satrābhavo vasupatir vasūnām datre viśvā adhithā indra kṛṣṭiḥ ||
 4.017.07a tvam adha prathamam jāyamāno 'me viśvā adhithā indra kṛṣṭiḥ |
 4.017.07c tvam prati pravata āsayānam ahim vajreṇa maghavan vi vṛścaḥ ||
 4.017.08a satrāhaṇam dādhrṣim tumram indram mahām apāram vṛṣabham suvajram |
 4.017.08c hantā yo vṛtram sanitota vājam dātā maghāni maghavā surādhāḥ ||
 4.017.09a ayam vṛtaś cātayate samīcīr ya ājiṣu maghavā śṛṇva ekaḥ |
 4.017.09c ayam vājam bharati yaṃ sanoty asya priyāsaḥ sakhye syāma ||
 4.017.10a ayam śṛṇve adha jayann uta ghnann ayam uta pra kṛṇute yudhā gāḥ |
 4.017.10c yadā satyam kṛṇute manyum indro viśvam dṛḍham bhayata ejad asmāt ||
 4.017.11a sam indro gā ajayat saṃ hiraṇyā sam aśviyā maghavā yo ha pūrvīḥ |
 4.017.11c ebhir nṛbhir nṛtamo asya śākai rāyo vibhaktā sambharaś ca vasvaḥ ||
 4.017.12a kiyat svid indro adhy eti mātuh kiyat pitur janitur yo jājana |
 4.017.12c yo asya śuṣmam muhukair iyarti vāto na jūta stanayadbhir abhraiḥ ||
 4.017.13a kṣiyantaṃ tvam akṣiyantaṃ kṛṇotiyarti reṇum maghavā samoham |
 4.017.13c vibhañjanur aśanimāṃ iva dyaur uta stotāram maghavā vasau dhāt ||
 4.017.14a ayam cakram iṣaṇat sūryasya ny etaśam rīramat sasṛmāṇam |
 4.017.14b ā kṛṣṇa im juhurāṇo jigharti tvaco budhne rajaso asya yonau ||
 4.017.15a asiknyām yajamāno na hotā ||
 4.017.16a gavyanta indraṃ sakhyāya viprā aśvāyanto vṛṣaṇam vājayantaḥ |
 4.017.16c janīyanto janidām akṣitotim ā cyāvayāmo 'vate na kośam ||

4.017.17a trātā no bodhi dadṛśāna āpir abhikhyātā marḍitā somyānām |
 4.017.17c sakhā pitā pitṛtamaḥ pitṛṇām kartem ulokam uśate vayodhāḥ ||
 4.017.18a sakhīyatām avitā bodhi sakhā gṛṇāna indra stuvate vayo dhāḥ |
 4.017.18c vyaṃ hy ā te cakṛmā sabādha ābhiḥ śamībhir mahayanta indra ||
 4.017.19a stuta indro maghavā yad dha vṛtrā bhūrīṇy eko apratīni hanti |
 4.017.19c asya priyo jaritā yasya śarman nakir devā vārayante na martāḥ |
 4.017.20a evā na indro maghavā virapśī karat satyā carṣaṇīdhṛd anarvā |
 4.017.20c tvam rājā januṣām dhehy asme adhi śravo māhinam yaj jaritre ||
 4.017.21a nū ṣṭuta indra nū gṛṇāna iṣam jaritre nadyo na pīpeḥ |
 4.017.21c akāri te harivo brahma navyam dhiyā syāma rathyaḥ sadāsāḥ ||

4.018.01a ayam panthā anuvittaḥ purāṇo yato devā udajāyanta viśve |
 4.018.01c ataś cid ā janiṣīṣṭa pravṛddho mā mātaram amuyā pattave kaḥ ||
 4.018.02a nāham ato nir ayā durgahaitat tiraścatā pārśvān nir gamāni |
 4.018.02c bahūni me akṛtā kartvāni yudhyai tvena sam tvena pṛchai ||
 4.018.03a parāyatim mātaram anv acaṣṭa na nānu gāny anu nū gamāni |
 4.018.03c tvaṣṭur gr̥he apibat somam indraḥ śatadhanyam camvoḥ sutasya ||
 4.018.04a kiṃ sa ṛdhak kṛṇavad yaṃ sahasram māso jabhāra śaradaś ca pūrvīḥ |
 4.018.04c nahī nv asya pratimānam asty antar jāteṣūta ye janitvāḥ ||
 4.018.05a avadyam iva manyamānā guhākar indram mātā vīryeṇā nyṛṣṭam |
 4.018.05c athod asthāt svayam atkaṃ vasāna ā rodasī aprṇāj jāyamānaḥ ||
 4.018.06a etā arṣanty alalābhavantīr ṛtāvarīr iva samkrośamānāḥ |
 4.018.06c etā vi pṛcha kim idam bhananti kam āpo adrim paridhiṃ rujanti ||
 4.018.07a kim u ṣvid asmai nivido bhanantendrasyāvadyam didhiṣanta āpaḥ |
 4.018.07c mamaitān putro mahatā vadhena vṛtram jaghanvām̐ asṛjad vi sindhūn ||
 4.018.08a mamac cana tvā yuvatīḥ parāsa mamac cana tvā kuṣavā jagāra |
 4.018.08c mamac cid āpaḥ śīsave mamṛḍyur mamac cid indraḥ sahasod atiṣṭhat ||
 4.018.09a mamac cana te maghavan vyaṃso nivividhvām̐ apa hanū jaghāna |
 4.018.09c adhā nividdha uttaro babhūvāñ chiro dāsasya sam piṇak vadhena ||
 4.018.10a gṛṣṭīḥ sasūva sthaviram tavāgām anādhṛṣyam vṛṣabham tumram indram |
 4.018.10c arīdham vatsam carathāya mātā svayam gātum tanva ichamānam ||
 4.018.11a uta mātā mahiṣam anv avenad amī tvā jahati putra devāḥ |
 4.018.11c athābravid vṛtram indro haniṣyan sakhe viṣṇo vitaram vi kramasva ||
 4.018.12a kas te mātaram vidhavām acakrac chayum kas tvām ajighāṃsac carantam |
 4.018.12c kas te devo adhi mārḍika āsīd yat prākṣiṇāḥ pitaram pādagr̥hya ||
 4.018.13a avartyā śuna āntrāni pece na deveṣu vivide marḍitāram |
 4.018.13c apaśyam jāyām amahiyamānām adhā me śyeno madhv ā jabhāra ||

4.019.01a evā tvām indra vajrinn atra viśve devāsaḥ suhavāsa ūmāḥ |
 4.019.01c mahām ubhe rodasī vṛddham ṛṣvam nir ekam id vṛnate vṛtrahatyē ||
 4.019.02a avāsṛjanta jivrayo na devā bhuvāḥ samrāḍ indra satyayoniḥ |
 4.019.02c ahann ahim pariśayānam arṇaḥ pra vartanīr arado viśvadhenāḥ ||
 4.019.03a atṛpṇuvantaṃ viyatam abudhyam abudhyamānam suṣupānam indra |
 4.019.03c sapta prati pravata āśayānam ahim vajreṇa vi riṇā aparvan ||
 4.019.04a akṣodayac chavasā kṣāma budhnam vār ṇa vātas taviṣībhir indraḥ |
 4.019.04c dṛḍhāny aubhnād uśamāna ojo 'vābhinat kakubhaḥ parvatānām ||
 4.019.05a abhi pra dadrur janayo na garbham rathā iva pra yayuḥ sākam adrayaḥ |

4.019.05c atarpayo viṣṛta ubja ūrmīn tvam vṛtām ariṇā indra sindhūn ||
 4.019.06a tvam mahīm avaniṃ viśvadhenām turvītaye vayyāya kṣarantīm |
 4.019.06c aramayo namasaijad arṇaḥ sutaraṇām akṛṇor indra sindhūn ||
 4.019.07a prāgruvo nabhanvo na vakvā dhvasrā apinvad yuvatīr ṛtajñāḥ |
 4.019.07c dhanvāny ajrām aprṇak tṛṣṇām adhog indra staryo daṃsupatnīḥ ||
 4.019.08a pūrvīr uśasaḥ śaradaś ca gūrtā vṛtram jaghanvām asṛjad vi sindhūn |
 4.019.08c pariṣṭhitā atṛnad badbadhānāḥ sirā indraḥ sravitave pṛthivyā ||
 4.019.09a vamrībhiḥ putram agruvo adānam niveśanād dhariva ā jabhartha |
 4.019.09c vy andho akhyad ahim ādadāno nir bhūd ukhachit sam aranta parva ||
 4.019.10a pra te pūrvāṇi karaṇāni viprāvidvām āha viduṣe karāṃsi |
 4.019.10c yathā-yathā vṛṣṇyāni svagūrtāpāṃsi rājan naryāviveṣīḥ ||
 4.019.11a nū ṣṭuta indra nū gṛṇāna iṣam jaritre nadyo na pīpeḥ |
 4.019.11c akāri te harivo brahma navyam dhiyā syāma rathyaḥ sadāsāḥ ||

4.020.01a ā na indro dūrād ā na āsād abhiṣṭikṛd avase yāsad ugraḥ |
 4.020.01c ojiṣṭhebhīr nṛpatir vajrabāhuḥ saṃge samatsu turvaṇiḥ pṛtanyūn ||
 4.020.02a ā na indro haribhir yātv achārvācīno 'vase rādhasa ca |
 4.020.02c tiṣṭhāti vajrī maghavā virapśīmaṃ yajñam anu no vājasātau ||
 4.020.03a imaṃ yajñam tvam asmākam indra puro dadhat saniṣyasi kratuṃ naḥ |
 4.020.03c śvaghñīva vajrin sanaye dhanānām tvayā vayam arya ājīm jayema ||
 4.020.04a uśann u ṣu ṇaḥ sumanā upāke somasya nu suṣutasya svadhāvaḥ |
 4.020.04c pā indra pratibhṛtasya madhvaḥ sam andhasā mamadaḥ pṛṣṭhyena ||
 4.020.05a vi yo rarapśa ṛṣibhir navebhir vṛkṣo na pakvaḥ sṛṇyo na jetā |
 4.020.05c maryo na yoṣām abhi manyamāno 'chā vivakmi puruhūtam indram ||
 4.020.06a girir na yaḥ svatavām ṛṣva indraḥ sanād eva sahase jāta ugraḥ |
 4.020.06c ādartaḥ vajram sthaviram na bhīma udneva kośam vasunā nyṛṣṭam ||
 4.020.07a na yasya vartā januṣā nv asti na rādhasa āmarītā maghasya |
 4.020.07c udvāvṛṣānas taviṣīva ugrāsmabhyam daddhi puruhūta rāyaḥ ||
 4.020.08a īkṣe rāyaḥ kṣayasya carṣaṇīnām uta vrajam apavartāsi gonām |
 4.020.08c śikṣānaraḥ samitheṣu prahāvān vasvo rāsim abhinetāsi bhūrim ||
 4.020.09a kayā tac chṛṇve śacyā śaciṣṭho yayā kṛṇoti muhu kā cid ṛṣvaḥ |
 4.020.09c puru dāsūṣe vicayiṣṭho aṃho 'thā dadhāti draviṇam jaritre ||
 4.020.10a mā no mardhīr ā bharā daddhi tan naḥ pra dāsūṣe dātave bhūri yat te |
 4.020.10c navye deṣṇe śaste asmin ta ukthe pra bravāma vayam indra stuvantaḥ ||
 4.020.11a nū ṣṭuta indra nū gṛṇāna iṣam jaritre nadyo na pīpeḥ |
 4.020.11c akāri te harivo brahma navyam dhiyā syāma rathyaḥ sadāsāḥ ||

4.021.01a ā yātv indro 'vasa upa na iha stutaḥ sadhamād astu sūraḥ |
 4.021.01c vāvṛdhānas taviṣīr yasya pūrvīr dyaur na kṣatram abhibhūti puṣyāt ||
 4.021.02a tasyed iha stavatha vṛṣṇyāni tuvidyumnasya tuvīrādhaso nṛn |
 4.021.02c yasya kratuḥ vidathyo na samrāt sāhvān tarutro abhy asti kṛṣṭīḥ ||
 4.021.03a ā yātv indro diva ā pṛthivyā makṣū samudrād uta vā puriṣāt |
 4.021.03c svarṇarād avase no marutvān parāvato vā sadanād ṛtasya ||
 4.021.04a sthūrasya rāyo bṛhato ya īse tam u ṣṭavāma vidatheṣv indram |
 4.021.04c yo vāyunā jayati gomatiṣu pra dhṛṣṇuyā nayati vasyo acha ||
 4.021.05a upa yo namo namasi stabhāyann iyarti vācam janayan yajadhyaḥ |
 4.021.05c rñjasānaḥ puruvāra ukthair endram kṛṇvita sadaneṣu hotā ||

4.021.06a dhiṣā yadi dhiṣaṅyantaḥ saraṅyān sadanto adrim auśijasya gohe |
 4.021.06c ā duroṣāḥ pāstyasya hotā yo no mahān samvaraṇeṣu vahniḥ ||
 4.021.07a satrā yad im bhārvarasya vṛṣṇaḥ siṣakti śuṣma stuvate bharāya |
 4.021.07c guhā yad im auśijasya gohe pra yad dhiye prāyase madāya ||
 4.021.08a vi yad varāṃsi parvatasya vṛṇve payobhir jinve apāṃ javāṃsi |
 4.021.08c vidad gaurasya gavayasya gohe yadī vājāya sudhyo vahanti ||
 4.021.09a bhadrā te hastā sukṛtota pāṇī prayantārā stuvate rādha indra |
 4.021.09c kā te niṣattiḥ kim u no mamatsi kiṃ nod-ud u harṣase dātavā u ||
 4.021.10a evā vasva indraḥ satyaḥ samrāḍ dhantā vṛtram varivaḥ pūrave kaḥ |
 4.021.10c puruṣtuta kratvā naḥ śagdhi rāyo bhakṣīya te 'vaso daivyasya ||
 4.021.11a nū ṣṭuta indra nū grṇāna iṣam jaritre nadyo na pīpeḥ |
 4.021.11c akāri te harivo brahma navyaṃ dhiyā syāma rathyaḥ sadāsāḥ ||

4.022.01a yan na indro jujuṣe yac ca vaṣṭi tan no mahān karati śuṣmy ā cit |
 4.022.01c brahma stomam maghavā somam ukthā yo āsmānaṃ śavasā bibhrad eti ||
 4.022.02a vṛṣā vṛṣandhiṃ caturaśrim asyann ugro bāhubhyāṃ nṛtamaḥ śacivān |
 4.022.02c śriye paruṣṇim uṣamāṇa ūrṇāṃ yasyāḥ parvāni sakhyāya vivye ||
 4.022.03a yo devo devatamo jāyamāno maho vājebhir mahadbhiś ca śuṣmaiḥ |
 4.022.03c dadhāno vajram bāhvor uśantaṃ dyām amena rejayat pra bhūma ||
 4.022.04a viśvā rodhāṃsi pravataś ca pūrvīr dyaur ṛṣvāj janiman rejata kṣāḥ |
 4.022.04c ā mātārā bhārati śuṣmy ā gor nṛvat pariḥman nonuvanta vātāḥ ||
 4.022.05a tā tū ta indra mahato mahāni viśveṣv it savaneṣu pravācyā |
 4.022.05c yac chūra dhṛṣṇo dhṛṣatā dadhṛṣvān ahim vajreṇa śavasāviveṣiḥ ||
 4.022.06a tā tū te satyā tuvinṛmṇa viśvā pra dhenavaḥ sisrate vṛṣṇa ūdhnaḥ |
 4.022.06c adhā ha tvad vṛṣamaṇo bhīyānāḥ pra sindhavo javasā cakramanta ||
 4.022.07a atrāha te harivas tā u devīr avobhir indra stavanta svasāraḥ |
 4.022.07c yat sim anu pra mucu badbadhānā dirghām anu prasitiṃ syandayadhyai ||
 4.022.08a pipīḍe aṃśur madyo na sindhur ā tvā śamī śaśamānasya śaktiḥ |
 4.022.08c asmadyak chuśucānasya yamyā āśur na raśmiṃ tuvyojasaṃ goḥ ||
 4.022.09a asme varṣiṣṭhā kṛṇuhi jyeṣṭhā nṛmṇāni satrā sahure sahāṃsi |
 4.022.09c asmabhyaṃ vṛtrā suhanāni randhi jahi vadhar vanuṣo martyasya ||
 4.022.10a asmākam it su śṛṇuhi tvam indrāsmabhyaṃ citrāṃ upa māhi vājān |
 4.022.10c asmabhyaṃ viśvā iṣaṇaḥ puramdhīr asmākam su maghavan bodhi godāḥ ||
 4.022.11a nū ṣṭuta indra nū grṇāna iṣam jaritre nadyo na pīpeḥ |
 4.022.11c akāri te harivo brahma navyaṃ dhiyā syāma rathyaḥ sadāsāḥ ||

4.023.01a kathā mahām avṛdhat kasya hotur yajñam juṣāṇo abhi somam ūdhaḥ |
 4.023.01c pibann uśāno juṣamāṇo andho vavakṣa ṛṣvaḥ śucate dhanāya ||
 4.023.02a ko asya vīraḥ sadhamādam āpa sam ānaṃśa sumatibhiḥ ko asya |
 4.023.02c kad asya citraṃ cikite kad ūtī vṛdhe bhuvac chaśamānasya yajyoḥ ||
 4.023.03a kathā śṛṇoti hūyamānam indraḥ kathā śṛṇvann avasām asya veda |
 4.023.03c kā asya pūrvīr upamātayo ha kathainam āhuḥ papuriṃ jaritre ||
 4.023.04a kathā sabādhaḥ śaśamāno asya naśad abhi draviṇam dīdhyānaḥ |
 4.023.04c devo bhuvan navedā ma ṛtānām namo jagṛbhvāṃ abhi yaj jujoṣat ||
 4.023.05a kathā kad asyā uṣaso vyuṣṭau devo martasya sakhyaṃ jujoṣa |
 4.023.05c kathā kad asya sakhyaṃ sakhibhyo ye asmin kāmam suyujam tatasre ||
 4.023.06a kim ād amatraṃ sakhyaṃ sakhibhyaḥ kadā nu te bhrātram pra bravāma |

- 4.023.06c śriye sudrśo vapur asya sargāḥ svar ṇa citratamam iṣa ā goḥ ||
4.023.07a druhaṃ jighāmsan dhvarasam anindrāṃ tetikte tigmā tujase anikā |
4.023.07c ṛṇā cid yatra ṛṇayā na ugro dūre ajñātā uśaso babādhe ||
4.023.08a ṛtasya hi śurudhaḥ santi pūrvīr ṛtasya dhītir vṛjināni hanti |
4.023.08c ṛtasya śloko badhirā tatarda karṇā budhānaḥ śucamāna āyoḥ ||
4.023.09a ṛtasya dṛḍhā dharuṇāni santi purūṇi candrā vapuṣe vapūṃṣi |
4.023.09c ṛtena dīrgham iṣaṇanta pṛkṣa ṛtena gāva ṛtam ā viveśuḥ ||
4.023.10a ṛtaṃ yemāna ṛtam id vanoty ṛtasya śuśmas turayā u gavyuḥ |
4.023.10c ṛtāya pṛthvī bahule gabhīre ṛtāya dhenū parame duhāte ||
4.023.11a nū ṣṭuta indra nū gṛṇāna iṣaṃ jaritre nadyo na pīpeḥ |
4.023.11c akāri te harivo brahma navyaṃ dhiyā syāma rathyaḥ sadāsāḥ ||
- 4.024.01a kā suṣṭutiḥ śavasah sūnum indram arvācīnaṃ rādhasa ā vavartat |
4.024.01c dadir hi vīro gṛṇate vasūni sa gopatir niṣṣidhāṃ no janāsaḥ ||
4.024.02a sa vṛtrahatyē havyaḥ sa īḍyaḥ sa suṣṭuta indraḥ satyarādhaḥ |
4.024.02c sa yāmān ā maghavā martyāya brahmaṇyate suṣvaye varivo dhāt ||
4.024.03a tam in naro vi hvayante samīke ririkvāṃsas tanvaḥ kṛṇvata trām |
4.024.03c mitho yat tyāgam ubhayāso agman naras tokasya tanayasya sātāu ||
4.024.04a kratūyanti kṣitayo yoga ugrāsuśāṇāso mitho arṇasātāu |
4.024.04c saṃ yad viśo 'vavṛtranta yudhmā ād in nema indrayante abhīke ||
4.024.05a ād id dha nema indriyaṃ yajanta ād it paktiḥ puroḍāśaṃ riricyāt |
4.024.05c ād it somo vi papṛcyād asuṣvīn ād ij jujoṣa vṛṣabhaṃ yajadhyaī ||
4.024.06a kṛṇoty asmai varivo ya itthendrāya somam uśate sunoti |
4.024.06c sadhricīnena manasāvivenan tam it sakhāyaṃ kṛṇute samatsu ||
4.024.07a ya indrāya sunavat somam adya pacāt paktīr uta bhrjyāti dhānāḥ |
4.024.07c prati manāyor ucathāni haryan tasmin dadhad vṛṣaṇaṃ śuśmam indraḥ ||
4.024.08a yadā samaryaṃ vy aced ṛghāvā dīrghaṃ yad ājim abhy akhyad aryaḥ |
4.024.08c acikradad vṛṣaṇaṃ patny achā duroṇa ā niśitaṃ somasudbhiḥ ||
4.024.09a bhūyasā vasnam acarat kaṇīyo 'vikrīto akāniṣaṃ punar yan |
4.024.09c sa bhūyasā kaṇīyo nārirecīd dīnā dakṣā vi duhanti pra vāṇam ||
4.024.10a ka imaṃ daśabhir mamendraṃ krīṇāti dhenubhiḥ |
4.024.10c yadā vṛtrāṇi jaṅghanad athainam me punar dadat ||
4.024.11a nū ṣṭuta indra nū gṛṇāna iṣaṃ jaritre nadyo na pīpeḥ |
4.024.11c akāri te harivo brahma navyaṃ dhiyā syāma rathyaḥ sadāsāḥ ||
- 4.025.01a ko adya naryo devakāma uśann indrasya sakhyaṃ jujoṣa |
4.025.01c ko vā mahe 'vase pāryāya samiddhe agnau sutasoma iṭṭe ||
4.025.02a ko nānāma vacasā somyāya manāyur vā bhavati vasta usrāḥ |
4.025.02c ka indrasya yujyaṃ kaḥ sakhitvaṃ ko bhrātraṃ vaṣṭi kavaye ka ūtī ||
4.025.03a ko devānām avo adyā vṛṇite ka ādityāṃ aditiṃ jyotir iṭṭe |
4.025.03c kasyāśvināv indro agniḥ sutasyāṃśoḥ pibanti manasāvivenam ||
4.025.04a tasmā agnir bhārataḥ śarma yaṃsaj jyok paśyāt sūryam uccarantam |
4.025.04c ya indrāya sunavāmety āha nare naryāya nṛtamāya nṛṇām ||
4.025.05a na taṃ jinanti bahavo na dabhrā urv asmā aditiḥ śarma yaṃsat |
4.025.05c priyaḥ sukṛt priya indre manāyuh priyaḥ suprāvīḥ priyo asya somī ||
4.025.06a suprāvyaḥ prāsusāḍ eṣa vīraḥ suṣveḥ paktiṃ kṛṇute kevalendraḥ |
4.025.06c nāsusver āpir na sakhā na jāmir duṣprāvyo 'vahanted avācaḥ ||

4.025.07a na revatā paṇinā sakhyam indro 'sunvatā sutapāḥ saṃ grṇīte |
 4.025.07c āsya vedaḥ khidati hanti nagnaṃ vi suṣvaye paktaye kevalo bhūt ||
 4.025.08a indram pare 'vare madhyamāsa indraṃ yānto 'vasitāsa indram |
 4.025.08c indraṃ kṣiyanta uta yudhyamānā indraṃ naro vājayanto havante ||

4.026.01a aham manur abhavaṃ sūryaś cāhaṃ kakṣivāṃ ṛṣir asmi vipraḥ |
 4.026.01c ahaṃ kutsam ārjuneyaṃ ny ṛñje 'haṃ kavir uśanā paśyatā mā ||
 4.026.02a aham bhūmim adadāṃ āryāyāhaṃ vṛṣṭiṃ dāsuṣe martyāya |
 4.026.02c aham apo anayaṃ vāvaśānā mama devāso anu ketam āyan ||
 4.026.03a aham puro mandasāno vy airaṃ nava sākāṃ navatiḥ śambarasya |
 4.026.03c śatatamaṃ veśyaṃ sarvatātā divodāsam atithigvaṃ yad āvam ||
 4.026.04a pra su ṣa vibhyo maruto vir astu pra śyenaḥ śyenebhya āsupatvā |
 4.026.04c acakrayā yat svadhayā suparṇo havyam bharan manave devajuṣṭam ||
 4.026.05a bharad yadi vir ato vevijānaḥ pathoruṇā manojavā asarji |
 4.026.05c tūyaṃ yayau madhunā somyenota śravo vivide śyeno atra ||
 4.026.06a ṛjipī śyeno dadamāno aṃśum parāvataḥ śakuno mandram madam |
 4.026.06c somam bharad dādṛhāno devāvān divo amuṣmād uttarād ādāya ||
 4.026.07a ādāya śyeno abharat somaṃ sahasraṃ savāṃ ayutaṃ ca sākam |
 4.026.07c atrā puraṃdhir ajahād arātīr made somasya mūrā amūraḥ ||

4.027.01a garbhe nu sann anv eṣāṃ avedam ahaṃ devānāṃ janimāni viśvā |
 4.027.01c śatam mā pura āyasīr arakṣann adha śyeno jivasā nir adīyam ||
 4.027.02a na ghā sa mām apa joṣaṃ jabhārābhīm āsa tvakṣasā vīryeṇa |
 4.027.02c īrmā puraṃdhir ajahād arātīr uta vātāṃ atarac chūśuvānaḥ ||
 4.027.03a ava yac chyeno asvanīd adha dyor vi yad yadi vāta ūhuḥ puraṃdhim |
 4.027.03c sṛjad yad asmā ava ha kṣipaj jyāṃ kṛśānur astā manasā bhuraṇyan ||
 4.027.04a ṛjipyā im indravato na bhujyūṃ śyeno jabhāra bṛhato adhi ṣṇoḥ |
 4.027.04c antaḥ patat patatry asya paṇam adha yāmani prasitasya tad veḥ ||
 4.027.05a adha śvetaṃ kalaśaṃ gobhir aktam āpipyānam maghavā śukram andhaḥ |
 4.027.05c adhvaryubhiḥ prayatam madhvo agram indro madāya prati dhat pibadhyaī sūro
 madāya prati dhat pibadhyaī ||

4.028.01a tvā yujā tava tat soma sakhya indro apo manave sasrutas kaḥ |
 4.028.01c ahann ahim ariṇāt sapta sindhūn apāvṛṇod apihiteva khāni ||
 4.028.02a tvā yujā ni khidat sūryasyendraś cakraṃ sahasā sadya indo |
 4.028.02c adhi ṣṇunā bṛhatā vartamānam maho druho apa viśvāyu dhāyi ||
 4.028.03a ahann indro adahad agnir indo purā dasyūn madhyamdinād abhīke |
 4.028.03c durge duroṇe kratvā na yātām purū sahasrā śarvā ni barhīt ||
 4.028.04a viśvasmāt sīm adhamāṃ indra dasyūn viśo dāsīr akṛṇor aprasastāḥ |
 4.028.04c abādhetthām amṛnataṃ ni śatrūn avindethām apacitiṃ vadhatraiḥ ||
 4.028.05a evā satyam maghavānā yuvaṃ tad indraś ca somorvam aśvyam goḥ |
 4.028.05c ādardṛtam apihitāny aśnā riricathuḥ kṣāś cit tatṛdānā ||

4.029.01a ā na stuta upa vājebhir ūtī indra yāhi haribhir mandasānaḥ |
 4.029.01c tiraś cid aryaḥ savanā purūṇy āṅgūṣebhir grṇānaḥ satyarādhāḥ ||

4.029.02a ā hi śmā yāti naryaś cikitvān hūyamānaḥ sotṛbhir upa yajñam |
 4.029.02c svaśvo yo abhīrur manyamānaḥ suśvāṇebhir madati saṃ ha vīraiḥ ||
 4.029.03a śrāvayed asya karṇā vājayadhyai juṣṭām anu pra diśam mandayadhyai |
 4.029.03c udvāvṛṣāno rādhasē tuviṣmān karan na indraḥ sutīrthābhayaṃ ca ||
 4.029.04a achā yo gantā nādhamānam ūtī itthā vipraṃ havamānam gṛṇantam |
 4.029.04c upa tmani dadhāno dhury āśūn sahasrāṇi śatāni vajrabāhuḥ ||
 4.029.05a tvotāso maghavann indra viprā vayaṃ te syāma sūrayo gṛṇantaḥ |
 4.029.05c bhejānāso bṛhaddivasya rāya ākāyyasya dāvane purukṣoḥ ||

4.030.01a nakir indra tvad uttaro na jyāyāṃ asti vṛtrahan |
 4.030.01c nakir evā yathā tvam ||
 4.030.02a satrā te anu kṛṣṭayo viśvā cakreva vāvṛtuḥ |
 4.030.02c satrā mahāṃ asi śrutaḥ ||
 4.030.03a viśve caned anā tvā devāsa indra yuyudhuḥ |
 4.030.03c yad ahā naktam ātiraḥ ||
 4.030.04a yatrota bādhibeḥyaś cakraṃ kutsāya yudhyate |
 4.030.04c muṣāya indra sūryam ||
 4.030.05a yatra devāṃ ṛghāyato viśvāṃ ayudhya eka it |
 4.030.05c tvam indra vanūṃr ahan ||
 4.030.06a yatrota martyāya kam ariṇā indra sūryam |
 4.030.06c prāvaḥ śacībhir etaśam ||
 4.030.07a kim ād utāsi vṛtrahan maghavan manyumattamaḥ |
 4.030.07c atrāha dānum ātiraḥ ||
 4.030.08a etad ghed uta vīryam indra cakartha paumśyam |
 4.030.08c striyaṃ yad durhaṇāyuvam vadhīr duhitaram divaḥ ||
 4.030.09a divaś cid ghā duhitaram mahān mahiyamānām |
 4.030.09c uśāsam indra sam piṇak ||
 4.030.10a apośā anasaḥ sarat sampiṣṭād aha bibhyuṣī |
 4.030.10c ni yat sīm śiśnathad vṛṣā ||
 4.030.11a etad asyā anaḥ śaye susampiṣṭam vipāśy ā |
 4.030.11c sasāra sīm parāvataḥ ||
 4.030.12a uta sindhuṃ vibālyam vitasthānām adhi kṣami |
 4.030.12c pari ṣṭhā indra māyayā ||
 4.030.13a uta suśṇasya dhṛṣṇuyā pra mṛkṣo abhi vedanam |
 4.030.13c puro yad asya sampiṇak ||
 4.030.14a uta dāsam kaulitaram bṛhataḥ parvatād adhi |
 4.030.14c avāhann indra śambaram ||
 4.030.15a uta dāsasya varcinaḥ sahasrāṇi śatāvadhīḥ |
 4.030.15c adhi pañca pradhīṃr iva ||
 4.030.16a uta tyam putram agruvaḥ parāvṛktaṃ śatakratuḥ |
 4.030.16c uktheṣv indra ābhajat ||
 4.030.17a uta tyā turvaśāyadū asnātārā śacīpatiḥ |
 4.030.17c indro vidvāṃ apārayat ||
 4.030.18a uta tyā sadya āryā sarayor indra pārataḥ |
 4.030.18c arṇācitrarathāvadhiḥ ||
 4.030.19a anu dvā jahitā nayo 'ndham śroṇam ca vṛtrahan |
 4.030.19c na tat te sumnam aṣṭave ||
 4.030.20a śatam aśmanmayīnām purām indro vy āsyat |

4.030.20c divodāsāya dāśuṣe ||
 4.030.21a asvāpayad dabhitaye sahasrā triṃśataṃ hathaiḥ |
 4.030.21c dāsānām indro māyayā ||
 4.030.22a sa gheda utāsi vṛtrahan samāna indra gopatiḥ |
 4.030.22c yas tā viśvāni cicyuṣe ||
 4.030.23a uta nūnaṃ yad indriyaṃ kariṣyā indra paumṣyam |
 4.030.23c adyā nakiṣ ṭad ā minat ||
 4.030.24a vāmaṃ-vāmaṃ ta ādure devo dadātv aryamā |
 4.030.24c vāmam pūṣā vāmam bhago vāmaṃ devaḥ karūdatī ||

4.031.01a kayā naś citra ā bhuvad ūtī sadāvṛdhaḥ sakhā |
 4.031.01c kayā śaciṣṭhayā vṛtā ||
 4.031.02a kas tvā satyo madānām maṃhiṣṭho matsad andhasaḥ |
 4.031.02c dṛḍhā cid āruje vasu ||
 4.031.03a abhī ṣu ṇaḥ sakhinām avitā jaritṛṇām |
 4.031.03c śatam bhavāsy ūtibhiḥ ||
 4.031.04a abhī na ā vavṛtsva cakraṃ na vṛttam arvataḥ |
 4.031.04c niyudbhiś carṣaṇinām ||
 4.031.05a pravatā hi kratūnām ā hā padeva gachasi |
 4.031.05c abhakṣi sūrye sacā ||
 4.031.06a saṃ yat ta indra manyavaḥ saṃ cakrāṇi dadhanvire |
 4.031.06c adha tve adha sūrye ||
 4.031.07a uta smā hi tvām āhur in maghavānaṃ śacīpate |
 4.031.07c dātāram avididhayum ||
 4.031.08a uta smā sadya it pari śāsamānāya sunvate |
 4.031.08c purū cin maṃhase vasu ||
 4.031.09a nahi śmā te śatam cana rādho varanta āmuraḥ |
 4.031.09c na cyautnāni kariṣyataḥ ||
 4.031.10a asmāṃ avantu te śatam asmān sahasram ūtayaḥ |
 4.031.10c asmān viśvā abhiṣṭayaḥ ||
 4.031.11a asmāṃ ihā vṛṇiṣva sakhyāya svastaye |
 4.031.11c maho rāye divitmate ||
 4.031.12a asmāṃ aviddhi viśvahendra rāyā pariṇasā |
 4.031.12c asmān viśvābhir ūtibhiḥ ||
 4.031.13a asmabhyaṃ tāṃ apā vṛdhi vrajāṃ asteva gomataḥ |
 4.031.13c navābhir indrotibhiḥ ||
 4.031.14a asmākam dhṛṣṇuyā ratho dyumāṃ indrānapacyutaḥ |
 4.031.14c gavyur aśvayur iyate ||
 4.031.15a asmākam uttamaṃ kṛdhi śravo deveṣu sūrya |
 4.031.15c varṣiṣṭham dyām ivopari ||

4.032.01a ā tū na indra vṛtrahann asmākam ardhama ā gahi |
 4.032.01c mahān mahībhir ūtibhiḥ ||
 4.032.02a bhṛmiś cid ghāsi tūtujir ā citra citriṇiṣv ā |
 4.032.02c citraṃ kṛṇoṣy ūtaye ||
 4.032.03a dabhrebhiś cic chaśīyāṃsaṃ haṃsi vrādhantama ojasā |
 4.032.03c sakhibhir ye tve sacā ||

- 4.032.04a vayam indra tve sacā vyaṃ tvābhi nonumaḥ |
4.032.04c asmāṃ-asmāṃ id ud ava ||
- 4.032.05a sa naś citrābhir adrivo 'navadyābhir ūtibhiḥ |
4.032.05c anādhṛṣṭābhir ā gahi ||
- 4.032.06a bhūyāmo ṣu tvāvataḥ sakhāya indra gomataḥ |
4.032.06c yujo vājāya ghr̥ṣvaye ||
- 4.032.07a tvam hy eka īśiṣa indra vājasya gomataḥ |
4.032.07c sa no yandhi mahim iṣam ||
- 4.032.08a na tvā varante anyathā yad ditsasi stuto magham |
4.032.08c stotṛbhya indra girvaṇaḥ ||
- 4.032.09a abhi tvā gotamā girānūṣata pra dāvane |
4.032.09c indra vājāya ghr̥ṣvaye ||
- 4.032.10a pra te vocāma vīryā yā mandasāna ārujaḥ |
4.032.10c puro dāsīr abhītya ||
- 4.032.11a tā te gṛṇanti vedhaso yāni cakartha paum̐syā |
4.032.11c suteṣv indra girvaṇaḥ ||
- 4.032.12a avīṛdhanta gotamā indra tve stomavāhasaḥ |
4.032.12c aiṣu dhā vīravat yaśaḥ ||
- 4.032.13a yac cid dhi śasvatām asindra sādharmaṇas tvam |
4.032.13c tam tvā vyaṃ havāmahe ||
- 4.032.14a arvācīno vaso bhavāsmē su matsvāndhasaḥ |
4.032.14c somānām indra somapāḥ ||
- 4.032.15a asmākaṃ tvā matinām ā stoma indra yachatu |
4.032.15c arvāg ā vartayā harī ||
- 4.032.16a puroḍāśam ca no ghaso joṣayāse giraś ca naḥ |
4.032.16c vadhūyur iva yoṣaṇām ||
- 4.032.17a sahasraṃ vyatinām yuktānām indram īmahe |
4.032.17c śataṃ somasya khāryaḥ ||
- 4.032.18a sahasrā te śatā vyaṃ gavām ā cyāvayāmasi |
4.032.18c asmatrā rādha etu te ||
- 4.032.19a daśa te kalaśānām hiraṇyānām adhīmahe |
4.032.19c bhūridā asi vṛtrahan ||
- 4.032.20a bhūridā bhūri dehi no mā dabhram bhūry ā bhara |
4.032.20c bhūri ghed indra ditsasi ||
- 4.032.21a bhūridā hy asi śrutaḥ purutrā sūra vṛtrahan |
4.032.21c ā no bhajasva rādhasi ||
- 4.032.22a pra te babhrū vicakṣaṇa śamsāmi goṣaṇo napāt |
4.032.22c mābhyām gā anu śīsrathaḥ ||
- 4.032.23a kanīnakeva vidradhe nave drupade arbhake |
4.032.23c babhrū yāmeṣu śobhete ||
- 4.032.24a aram ma usrayāmṇe 'ram anusrayāmṇe |
4.032.24c babhrū yāmeṣv asridhā ||
- 4.033.01a pra ṛbhubhyo dūtam iva vācam iṣya upastire śvaitarīm dhenum īde |
4.033.01c ye vātajūtās taraṇibhir evaiḥ pari dyām sadyo apaso babhūvuḥ ||
- 4.033.02a yadāram akrann ṛbhavaḥ pitṛbhyām pariviṣṭi veṣaṇā daṃsanābhiḥ |
4.033.02c ād id devānām upa sakhyam āyan dhīrāsaḥ puṣṭim avahan manāyai ||
- 4.033.03a punar ye cakruḥ pitarā yuvānā sanā yūpeva jaraṇā śayānā |

4.033.03c te vājo vibhvām̃ ṛbhur indravanto madhupsaraso no 'vantu yajñam ||
 4.033.04a yat samvatsam ṛbhavo gām arakṣan yat samvatsam ṛbhavo mā apimśan |
 4.033.04c yat samvatsam abharan bhāso asyās tābhiḥ śamībhir amṛtatvam āśuḥ ||
 4.033.05a jyeṣṭha āha camasā dvā kareti kaniyān trīn kṛṇavāmety āha |
 4.033.05c kaniṣṭha āha caturas kareti tvaṣṭa ṛbhavas tat panayad vaco vaḥ ||
 4.033.06a satyam ūcur nara evā hi cakrur anu svadhām ṛbhavo jagmur etām |
 4.033.06c vibhrājamānāmś camasām̃ ahevāvenat tvaṣṭā caturō dadṛśvān ||
 4.033.07a dvādaśa dyūn yad agohyasyātithye raṇann ṛbhavaḥ sasantaḥ |
 4.033.07c sukṣetrākṛṇvann anayanta sindhūn dhanvātiṣṭhann oṣadhīr nimnam āpaḥ ||
 4.033.08a rathaṃ ye cakruḥ suvṛtaṃ nareṣṭhām ye dhenuṃ viśvajuvam viśvarūpām |
 4.033.08c ta ā takṣantv ṛbhavo rayim naḥ svavasah svapasaḥ suhastāḥ ||
 4.033.09a apo hy eṣām ajuṣanta devā abhi kratvā manasā dīdhyanāḥ |
 4.033.09c vājo devānām abhavat sukarmendrasya ṛbhukṣā varuṇasya vibhvā ||
 4.033.10a ye harī medhayokthā madanta indrāya cakruḥ suyujā ye aśvā |
 4.033.10c te rāyas poṣam draviṇāny asme dhatta ṛbhavaḥ kṣemayanto na mitram ||
 4.033.11a idāhnaḥ pītim uta vo madam dhur na ṛte śrāntasya sakhyāya devāḥ |
 4.033.11c te nūnam asme ṛbhavo vasūni ṛṭīye asmin savane dadhāta ||

4.034.01a ṛbhur vibhvā vāja indro no achemaṃ yajñam ratnadheyopa yāta |
 4.034.01c idā hi vo dhiṣaṇā devy ahnām adhāt pītim sam madā agmatā vaḥ ||
 4.034.02a vidānāso janmano vājaratnā uta ṛtubhir ṛbhavo mādayadhvam |
 4.034.02c sam vo madā agmata sam puram̃dhiḥ suvirām asme rayim erayadhvam ||
 4.034.03a ayam vo yajña ṛbhavo 'kāri yam ā manuṣvat pradivo dadhidhve |
 4.034.03c pra vo 'chā juṣāṇāso asthur abhūta viśve agriyota vājāḥ ||
 4.034.04a abhūd u vo vidhate ratnadheyam idā naro dāśuṣe martyāya |
 4.034.04c pibata vājā ṛbhavo dade vo mahi ṛṭīyam savanam madāya ||
 4.034.05a ā vājā yātōpa na ṛbhukṣā maho naro draviṇaso gṛṇānāḥ |
 4.034.05c ā vaḥ pītayo 'bhipitve ahnām imā astam navasva iva gman ||
 4.034.06a ā napātaḥ śavaso yātanopemaṃ yajñam namasā hūyamānāḥ |
 4.034.06c sajośasaḥ sūrayo yasya ca stha madhvaḥ pāta ratnadhā indravantaḥ ||
 4.034.07a sajośā indra varuṇena somaṃ sajośāḥ pāhi girvaṇo marudbhiḥ |
 4.034.07c agrepābhir ṛtupābhiḥ sajośā gnāspatnībhiḥ ratnadhābhiḥ sajośāḥ ||
 4.034.08a sajośasa ādityair mādayadhvam sajośasa ṛbhavaḥ parvatebhiḥ |
 4.034.08c sajośaso daivyenā savitrā sajośasaḥ sindhubhiḥ ratnadhebhiḥ ||
 4.034.09a ye aśvinā ye pitarā ya ūti dhenuṃ tatakṣur ṛbhavo ye aśvā |
 4.034.09c ye aṃsatrā ya ṛdhag rodasī ye vibhvo naraḥ svapatyāni cakruḥ ||
 4.034.10a ye gomantaṃ vājavantaṃ suvirām rayim dhattha vasumantaṃ purukṣum |
 4.034.10c te agrepā ṛbhavo mandasānā asme dhatta ye ca rātim gṛṇanti ||
 4.034.11a nāpābhūta na vo 'tīṣṣāmāniḥśastā ṛbhavo yajñe asmin |
 4.034.11c sam indreṇa madatha sam marudbhiḥ sam rājabhī ratnadheyāya devāḥ ||

4.035.01a ihopa yāta śavaso napātaḥ saudhanvanā ṛbhavo māpa bhūta |
 4.035.01c asmin hi vaḥ savane ratnadheyam gamantv indram anu vo madāsaḥ ||
 4.035.02a āgann ṛbhūnām iha ratnadheyam abhūt somasya suṣutasya pītiḥ |
 4.035.02c sukṛtyayā yat svapasyayā caṃ ekaṃ vicakra camasaṃ caturdhā ||
 4.035.03a vy akṛṇota camasaṃ caturdhā sakhe vi śikṣety abravīta |
 4.035.03c athaita vājā amṛtasya panthām gaṇam devānām ṛbhavaḥ suhastāḥ ||

4.035.04a kimmayaḥ svic camasa eṣa āsa yaṃ kāvyena caturō vicakra |
 4.035.04c athā sunudhvaṃ savanam madāya pāta ṛbhavo madhunaḥ somyasya ||
 4.035.05a śacyākarta pitarā yuvānā śacyākarta camasaṃ devapānam |
 4.035.05c śacyā harī dhanutarāv ataṣṭendravāhāv ṛbhavo vājaratnāḥ ||
 4.035.06a yo vaḥ sunoty abhipitve ahnām tivrāṃ vājāsaḥ savanam madāya |
 4.035.06c tasmai rayim ṛbhavaḥ sarvavīram ā takṣata vṛṣaṇo mandasānāḥ ||
 4.035.07a prātaḥ sutam apibo haryaśva mādhyamdinam savanam kevalam te |
 4.035.07c sam ṛbhubhiḥ pibasva ratnadhebhīḥ sakhimr yām̐ indra cakṛṣe sukṛtyā ||
 4.035.08a ye devāso abhavatā sukṛtyā śyenā ived adhi divi niṣeda |
 4.035.08c te ratnam dhāta śavaso napātaḥ saudhanvanā abhavatāmṛtāsaḥ ||
 4.035.09a yat ṛṭiyam savanam ratnadheyam akr̥nudhvaṃ svapasyā suhastāḥ |
 4.035.09c tad ṛbhavaḥ pariṣiktaṃ va etat sam madebhir indriyebhiḥ pibadhvam ||

4.036.01a anaśvo jāto anabhiśur ukthyo rathas tricakraḥ pari vartate rajaḥ |
 4.036.01c mahat tad vo devyasya pravācanaṃ dyām ṛbhavaḥ pṛthivīm yac ca puṣyatha ||
 4.036.02a ratham ye cakruḥ suvṛtaṃ sucetaso 'vihvarantam manasas pari dhyayā |
 4.036.02c tām̐ ū nv asya savanasya pitaya ā vo vājā ṛbhavo vedayāmasi ||
 4.036.03a tad vo vājā ṛbhavaḥ supravācanaṃ deveṣu vibhvo abhavan mahitvanam |
 4.036.03c jivrī yat santā pitarā sanājurā punar yuvānā carathāya takṣatha ||
 4.036.04a ekaṃ vi cakra camasaṃ caturvayam niś carmaṇo gām ariṇita dhītibhiḥ |
 4.036.04c athā deveṣv amṛtatvam ānaśa śruṣṭī vājā ṛbhavas tad va ukthyam ||
 4.036.05a ṛbhuto rayiḥ prathamaśravastamo vājaśrutāso yam ajījanan naraḥ |
 4.036.05c vibhvataṣṭo vidatheṣu pravācyo yaṃ devāso 'vathā sa vicarṣaṇiḥ ||
 4.036.06a sa vājy arvā sa ṛṣir vacasyayā sa sūro astā pṛtanāsu duṣṭaraḥ |
 4.036.06c sa rāyas poṣam sa suvīryam dadhe yaṃ vājo vibhvām̐ ṛbhavo yam āviṣuḥ ||
 4.036.07a śreṣṭham vaḥ peśo adhi dhāyi darśataṃ stomo vājā ṛbhavas taṃ jujuṣṭana |
 4.036.07c dhīrāso hi ṣṭhā kavayo vipaścitas tām̐ va enā brahmaṇā vedayāmasi ||
 4.036.08a yūyam asmabhyam dhiṣaṇābhyas pari vidvāmso viśvā naryāṇi bhojanā |
 4.036.08c dyumantaṃ vājam vṛṣaśuṣmam uttamam ā no rayim ṛbhavas takṣatā vayaḥ ||
 4.036.09a iha prajām iha rayim rarāṇā iha śravo vīravat takṣatā naḥ |
 4.036.09c yena vayam citayemāty anyān taṃ vājam citram ṛbhavo dadā naḥ ||

4.037.01a upa no vājā adhvaram ṛbhukṣā devā yāta pathibhir devayānaiḥ |
 4.037.01c yathā yajñam manuṣo vikṣv āsu dadhidhve raṇvāḥ sudineṣv ahnām ||
 4.037.02a te vo hṛde manase santu yajñā juṣṭāso adya ghṛtanirṇijo guḥ |
 4.037.02c pra vaḥ sutāso harayanta pūrṇāḥ kratve dakṣāya harṣayanta pitāḥ ||
 4.037.03a tryudāyam devahitam yathā va stomo vājā ṛbhukṣaṇo dade vaḥ |
 4.037.03c juhve manuṣvad uparāsu vikṣu yuṣme sacā bṛhaddiveṣu somam ||
 4.037.04a pīvoaśvāḥ śucadrathā hi bhūtāyaḥśiprā vājinaḥ suniṣkāḥ |
 4.037.04c indrasya sūno śavaso napāto 'nu vaś cety agriyam madāya ||
 4.037.05a ṛbhum ṛbhukṣaṇo rayim vāje vājintamaṃ yujam |
 4.037.05c indrasvantaṃ havāmahe sadāsātamaṃ aśvinam ||
 4.037.06a sed ṛbhavo yam avatha yūyam indraś ca martyam |
 4.037.06c sa dhībhir astu sanitā medhasātā so arvatā ||
 4.037.07a vi no vājā ṛbhukṣaṇaḥ pathaś citana yaṣṭave |
 4.037.07c asmabhyam sūraya stutā viśvā āśās tarīṣaṇi ||
 4.037.08a taṃ no vājā ṛbhukṣaṇa indra nāsatyā rayim |

4.037.08c sam aśvam carṣaṇibhya ā puru śasta maghattaye ||

- 4.038.01a uto hi vāṃ dātrā santi pūrvā yā pūrubhyas trasadasyur nitośe |
4.038.01c kṣetrāsāṃ dadathur urvarāsāṃ ghaṇaṃ dasyubhyo abhibhūtim ugram ||
4.038.02a uta vājinam puruniṣṣidhvānaṃ dadhikrām u dadathur viśvakṛṣṭim |
4.038.02c ṛjipyam śyenam pruṣitapsuṃ āsum carkṛtyam aryo nṛpatim na sūram ||
4.038.03a yaṃ sīm anu pravateva dravantaṃ viśvaḥ pūrur madati harṣamāṇaḥ |
4.038.03c paḍbhir gṛdhyantam medhayuṃ na sūram rathaturam vātam iva dhrajantam ||
4.038.04a yaḥ smārundhāno gadhyā samatsu sanutaraś carati goṣu gachan |
4.038.04c āvirṛjiko vidathā nicikyat tiro aratim pary āpa āyoḥ ||
4.038.05a uta smainaṃ vastramathim na tāyum anu krośanti kṣitayo bhareṣu |
4.038.05c nīcāyamānaṃ jasurim na śyenam śravaś cāchā paśumac ca yūtham ||
4.038.06a uta smāsu prathamāḥ sariṣyan ni veveti śreṇibhī rathānām |
4.038.06c srajaṃ kṛṇvāno janyo na śubhvā reṇuṃ rerihat kiraṇaṃ dadaśvān ||
4.038.07a uta sya vāji sahurir ṛtāvā śuśrūṣamāṇas tanvā samarye |
4.038.07c turam yatīṣu turayann ṛjipyo 'dhi bhruvoḥ kirate reṇuṃ ṛñjan ||
4.038.08a uta smāsyā tanyator iva dyor ṛghāyato abhiyujō bhayante |
4.038.08c yadā sahasram abhi ṣim ayodhīd durvartuḥ smā bhavati bhīma ṛñjan ||
4.038.09a uta smāsyā panayanti janā jūtim kṛṣṭipro abhibhūtim āśoḥ |
4.038.09c utainam āhuḥ samithe viyantaḥ parā dadhikrā asarat sahasraiḥ ||
4.038.10a ā dadhikrāḥ śavasā pañca kṛṣṭiḥ sūrya iva jyotiṣāpas tatāna |
4.038.10c sahasrasāḥ śatasā vājy arvā pṛṇaktu madhvā sam imā vacāṃsi ||

- 4.039.01a āsum dadhikrām tam u nu ṣṭavāma divas pṛthivyā uta carkirāma |
4.039.01c uchantir mām uṣasaḥ sūdayantv ati viśvāni duritāni parṣan ||
4.039.02a mahaś carkarmy arvataḥ kratuprā dadhikrāvṇaḥ puruvārasya vṛṣṇaḥ |
4.039.02c yam pūrubhyo dīdivāmsam nāgnim dadathur mitrāvaruṇā taturim ||
4.039.03a yo aśvasya dadhikrāvṇo akārīt samiddhe agnā uṣaso vyuṣṭau |
4.039.03c anāgasam tam aditiḥ kṛṇotu sa mitreṇa varuṇenā sajoṣāḥ ||
4.039.04a dadhikrāvṇa iṣa ūrjo maho yad amanmahi marutām nāma bhadram |
4.039.04c svastaye varuṇam mitram agnim havāmaha indram vajrabāhum ||
4.039.05a indram ived ubhaye vi hvayanta udīrāṇā yajñam upaprayantaḥ |
4.039.05c dadhikrām u sūdanam martyāya dadathur mitrāvaruṇā no aśvam ||
4.039.06a dadhikrāvṇo akāriṣam jiṣṇor aśvasya vājinaḥ |
4.039.06c surabhi no mukhā karat pra ṇa āyūṃṣi tāriṣat ||

- 4.040.01a dadhikrāvṇa id u nu carkirāma viśvā in mām uṣasaḥ sūdayantu |
4.040.01c apām agner uṣasaḥ sūryasya bṛhaspater āṅgirasasya jiṣṇoḥ ||
4.040.02a satvā bhariṣo gaviṣo duvanyasac chravasyād iṣa uṣasas turanyasat |
4.040.02c satyo dravo dravaraḥ patamgaro dadhikrāveṣam ūrjam svar janat ||
4.040.03a uta smāsyā dravatas turanyataḥ parṇam na ver anu vāti pragardhinaḥ |
4.040.03c śyenasyeva dhrajato aṅkasam pari dadhikrāvṇaḥ sahorjā taritrateḥ ||
4.040.04a uta sya vāji kṣipaniṃ turanyati grīvāyām baddho apikakṣa āsani |
4.040.04c kratuṃ dadhikrā anu saṃtavitvat pathām aṅkāṃsy anv āpanīphaṇat ||
4.040.05a haṃsaḥ śuciṣad vasur antarikṣasad dhotā vediṣad atithir duroṇasat |
4.040.05c nṛṣad varasad ṛtasad vyomasad abjā gojā ṛtajā adrijā ṛtam ||

4.041.01a indrā ko vāṃ varuṇā sumnam āpa stomo haviṣmāṃ amṛto na hotā |
 4.041.01c yo vāṃ hṛdi kratumāṃ asmād uktaḥ pasparsād indrāvaruṇā namasvān ||
 4.041.02a indrā ha yo varuṇā cakra āpī devau marthaḥ sakhyāya prayasvān |
 4.041.02c sa hanti vṛtrā samitheṣu śatrūn avobhir vā mahadbhiḥ sa pra śṛṇve ||
 4.041.03a indrā ha ratnaṃ varuṇā dheṣṭhetthā nṛbhyaḥ śāsāmānebhyas tā |
 4.041.03c yadī sakhāyā sakhyāya somaiḥ sutebhiḥ suprayasā mādayaite ||
 4.041.04a indrā yuvaṃ varuṇā didyum asminn ojiṣṭham ugrā ni vadhiṣṭaṃ vajram |
 4.041.04c yo no durevo vṛkatir dabhītis tasmin mimāthām abhibhūty ojaḥ ||
 4.041.05a indrā yuvaṃ varuṇā bhūtam asyā dhiyaḥ pretārā vṛṣabheva dhenoh |
 4.041.05c sā no duhīyad yavaseva gatvī sahasradhārā payasā mahī gauḥ ||
 4.041.06a toke hite tanaya urvarāsu sūro dṛśīke vṛṣaṇas ca paumsye |
 4.041.06c indrā no atra varuṇā syātām avobhir dasmā paritakmyāyām ||
 4.041.07a yuvām id dhy avase pūrvyāya pari prabhūtī gaviṣaḥ svāpī |
 4.041.07c vṛṇīmahe sakhyāya priyāya sūrā maṃhiṣṭhā pitareva śambhū ||
 4.041.08a tā vāṃ dhiyo 'vase vājayantīr ājīm na jagmur yuvayūḥ sudānū |
 4.041.08c śriye na gāva upa somam asthur indraṃ giro varuṇam me maṇiṣāḥ ||
 4.041.09a imā indraṃ varuṇam me maṇiṣā agmann upa draviṇam ichamānāḥ |
 4.041.09c upem asthur joṣṭāra iva vasvo raghvīr iva śravaso bhikṣamānāḥ ||
 4.041.10a aśvyasya tmanā rathyasya puṣṭer nityasya rāyaḥ patayaḥ syāma |
 4.041.10c tā cakraṇā ūtibhir navyasībhir asmatrā rāyo niyutaḥ sacantām ||
 4.041.11a ā no bṛhantā bṛhatībhir ūtī indra yātaṃ varuṇa vājasātau |
 4.041.11c yad didyavaḥ pṛtanāsu prakriḍān tasya vāṃ syāma sanitāra ājeḥ ||

4.042.01a mama dvitā rāṣṭraṃ kṣatriyasya viśvāyor viśve amṛtā yathā naḥ |
 4.042.01c kratuṃ sacante varuṇasya devā rājāmi kṛṣṭer upamasya vavreḥ ||
 4.042.02a ahaṃ rājā varuṇo mahyaṃ tāny asuryāṇi prathamā dhārayanta |
 4.042.02c kratuṃ sacante varuṇasya devā rājāmi kṛṣṭer upamasya vavreḥ ||
 4.042.03a aham indro varuṇas te mahitvorvī gabhīre rajasī sumeke |
 4.042.03c tvaṣṭeva viśvā bhuvanāni vidvān sam airayaṃ rodasī dhārayaṃ ca ||
 4.042.04a aham apo apinvam ukṣamāṇā dhārayaṃ divaṃ sadana ṛtasya |
 4.042.04c ṛtena putro aditer ṛtāvota tridhātu prathayad vi bhūma ||
 4.042.05a māṃ naraḥ svaśvā vājayanto māṃ vṛtāḥ samaraṇe havante |
 4.042.05c kṛṇomy ājīm maghavāham indra iyarmi reṇum abhibhūtyojāḥ ||
 4.042.06a ahaṃ tā viśvā cakaraṃ nakir mā daivyaṃ saho varate apratītam |
 4.042.06c yan mā somāso mamadan yad ukthobhe bhayete rajasī apāre ||
 4.042.07a viduṣ te viśvā bhuvanāni tasya tā pra braviṣi varuṇāya vedhaḥ |
 4.042.07c tvaṃ vṛtrāṇi śṛṇviṣe jaghanvān tvaṃ vṛtāṃ ariṇā indra sindhūn ||
 4.042.08a asmākam atra pitaras ta āsan sapta ṛṣayo daurgahe badhyamāne |
 4.042.08c ta āyajanta trasadasyum asyā indraṃ na vṛtraturam ardhadevam ||
 4.042.09a purukutsānī hi vām adāśad dhavyebhir indrāvaruṇā namobhiḥ |
 4.042.09c athā rājānaṃ trasadasyum asyā vṛtrahaṇaṃ dadathur ardhadevam ||
 4.042.10a rāyā vayaṃ sasavāṃso madema havyena devā yavasena gāvaḥ |
 4.042.10c tāṃ dhenum indrāvaruṇā yuvaṃ no viśvāhā dhattam anapasphurantīm ||

4.043.01a ka u śravat katamo yajñiyānāṃ vandāru devaḥ katamo juṣāte |

4.043.01c kasyemām devīm amṛteṣu preṣṭhām hṛdi śreṣāma suṣṭuṭim suhavyām ||
 4.043.02a ko mṛḍāti katama āgamiṣṭho devānām u katamaḥ śambhaviṣṭhaḥ |
 4.043.02c rathaṃ kam āhur dravadaśvam āsum yaṃ sūryasya duhitāvṛṇita ||
 4.043.03a makṣū hi śmā gachatha īvato dyūn indro na śaktim paritakmyāyām |
 4.043.03c diva ājātā divyā suparṇā kayā śacīnām bhavathaḥ śaciṣṭhā ||
 4.043.04a kā vām bhūd upamātiḥ kayā na āśvinā gamatho hūyamānā |
 4.043.04c ko vām mahāś cit tyajaso abhika uruṣyatam mādhvī dasrā na ūtī ||
 4.043.05a uru vām rathaḥ pari nakṣati dyām ā yat samudrād abhi vartate vām |
 4.043.05c madhvā mādhvī madhu vām pruṣāyan yat sīm vām pṛkṣo bhurajanta pakvāḥ ||
 4.043.06a sindhur ha vām rasayā siñcad āśvān ghṛṇā vayo 'ruśāsaḥ pari gman |
 4.043.06c tad ū ṣu vām ajiraṃ ceti yānaṃ yena patī bhavathaḥ sūryāyāḥ ||
 4.043.07a iheha yad vām samanā papṛkṣe seyam asme sumatir vājaratnā |
 4.043.07c uruṣyatam jaritāram yuvaṃ ha śritaḥ kāmo nāsatyā yuvadrik ||

4.044.01a taṃ vām rathaṃ vayam adyā huvema pṛthujrayam āśvinā saṃgatim goḥ |
 4.044.01c yaḥ sūryām vahati vandhurāyur girvāhasam purutamam vasūyum ||
 4.044.02a yuvaṃ śriyam āśvinā devatā tāṃ divo napātā vanathaḥ śacibhiḥ |
 4.044.02c yuvor vapur abhi pṛkṣaḥ sacante vahanti yat kakuhāso rathe vām ||
 4.044.03a ko vām adyā karate rātahavya ūtaye vā sutapeyāya vārkaiḥ |
 4.044.03c ṛtasya vā vanuṣe pūrvyāya namo yemāno āśvinā vavartat ||
 4.044.04a hiraṇyayena purubhū rathenemaṃ yajñam nāsatyopa yātam |
 4.044.04c pibātha in madhunaḥ somyasya dadhatho ratnam vidhate janāya ||
 4.044.05a ā no yātam divo achā pṛthivyā hiraṇyayena suvṛtā rathena |
 4.044.05c mā vām anye ni yaman devayantaḥ saṃ yad dade nābhiḥ pūrvyā vām ||
 4.044.06a nū no rayim puruvīram bṛhantaṃ dasrā mimāthām ubhayeṣv asme |
 4.044.06c naro yad vām āśvinā stomam āvan sadhastutim ājamīdhāso agman ||
 4.044.07a iheha yad vām samanā papṛkṣe seyam asme sumatir vājaratnā |
 4.044.07c uruṣyatam jaritāram yuvaṃ ha śritaḥ kāmo nāsatyā yuvadrik ||

4.045.01a eṣa sya bhānur ud iyarti yujyate rathaḥ pariṃmā divo asya sānavi |
 4.045.01c pṛkṣāso asmin mithunā adhi trayo dṛtis turiyo madhuno vi rapśate ||
 4.045.02a ud vām pṛkṣāso madhumanta irate rathā āśvāsa uśaso vyuṣṭiṣu |
 4.045.02c aporṇuvantas tama ā parīvṛtam svar ṇa śukraṃ tanvanta ā rajaḥ ||
 4.045.03a madhvaḥ pibatam madhupebhir āsabhira uta priyam madhune yuñjāthām ratham |
 4.045.03c ā vartanim madhunā jinvaṭhas patho dṛtim vahethe madhumantam āśvinā ||
 4.045.04a haṃsāso ye vām madhumanto asridho hiraṇyaparṇā uhuva uṣarbudhaḥ |
 4.045.04c udapruto mandino mandinisprṣo madhvo na makṣaḥ savanāni gachathaḥ ||
 4.045.05a svadhvarāso madhumanto agnaya usrā jarante prati vastor āśvinā |
 4.045.05c yan niktahastas taraṇir vicakṣaṇaḥ somaṃ suśāva madhumantam adribhiḥ ||
 4.045.06a ākenipāso ahabhir davidhvataḥ svar ṇa śukraṃ tanvanta ā rajaḥ |
 4.045.06c sūraś cid āśvān yuyujāna iyate viśvām anu svadhayā cetathas pathaḥ ||
 4.045.07a pra vām avocam āśvinā dhiyamdhā rathaḥ svaśvo ajaro yo asti |
 4.045.07c yena sadyaḥ pari rajāṃsi yātho haviṣmantam taraṇim bhojam acha ||

4.046.01a agram pibā madhūnām sutam vāyo diviṣṭiṣu |
 4.046.01c tvam hi pūrvapā asi ||

4.046.02a śatenā no abhiṣṭibhir niyutvāṁ indrasārathiḥ |
 4.046.02c vāyo sutasya tṛmpatam ||
 4.046.03a ā vām sahasraṁ haraya indravāyū abhi prayah |
 4.046.03c vahantu somapītaye ||
 4.046.04a rathaṁ hiraṇyavandhuraṁ indravāyū svadhvaraṁ |
 4.046.04c ā hi sthātho diviṣṭṛśam ||
 4.046.05a rathena pṛthupājasā dāśvāṁsam upa gachatam |
 4.046.05c indravāyū ihā gatam ||
 4.046.06a indravāyū ayaṁ sutas taṁ devebhiḥ sajoṣasā |
 4.046.06c pibatam dāśuṣo gṛhe ||
 4.046.07a iha prayāṇam astu vām indravāyū vimocanam |
 4.046.07c iha vām somapītaye ||

4.047.01a vāyo śukro ayāmi te madhvo agraṁ diviṣṭiṣu |
 4.047.01c ā yāhi somapītaye spārho deva niyutvatā ||
 4.047.02a indraś ca vāyav eṣāṁ somānām pītim arhathaḥ |
 4.047.02c yuvāṁ hi yantindavo nimnam āpo na sadhryak ||
 4.047.03a vāyav indraś ca śuṣmiṇā sarathaṁ śavasas patī |
 4.047.03c niyutvantā na ūtaya ā yātaṁ somapītaye ||
 4.047.04a yā vām santi puruṣpṛho niyuto dāśuṣe narā |
 4.047.04c asme tā yajñavāhasendravāyū ni yachatam ||

4.048.01a vihi hotrā avītā vipo na rāyo aryaḥ |
 4.048.01c vāyav ā candreṇa rathena yāhi sutasya pītaye ||
 4.048.02a niryuvāṇo aśastir niyutvāṁ indrasārathiḥ |
 4.048.02c vāyav ā candreṇa rathena yāhi sutasya pītaye ||
 4.048.03a anu kṛṣṇe vasudhitī yemāte viśvapeśasā |
 4.048.03c vāyav ā candreṇa rathena yāhi sutasya pītaye ||
 4.048.04a vahantu tvā manoyujo yuktāso navatir nava |
 4.048.04c vāyav ā candreṇa rathena yāhi sutasya pītaye ||
 4.048.05a vāyo śatam hariṇāṁ yuvasva poṣyāṇām |
 4.048.05c uta vā te sahasriṇo ratha ā yātu pājasā ||

4.049.01a idaṁ vām āsye haviḥ priyam indrābṛhaspatī |
 4.049.01c uktham madaś ca śasyate ||
 4.049.02a ayaṁ vām pari śicyate soma indrābṛhaspatī |
 4.049.02c cārur madāya pītaye ||
 4.049.03a ā na indrābṛhaspatī gṛham indraś ca gachatam |
 4.049.03c somapā somapītaye ||
 4.049.04a asme indrābṛhaspatī rayiṁ dhattaṁ śatagvinam |
 4.049.04c aśvāvantaṁ sahasriṇam ||
 4.049.05a indrābṛhaspatī vayaṁ sute gīrbhir havāmahe |
 4.049.05c asya somasya pītaye ||
 4.049.06a somam indrābṛhaspatī pibatam dāśuṣo gṛhe |
 4.049.06c mādayethāṁ tadokasā ||

4.050.01a yas tastambha sahasā vi jmo antān bṛhaspatis triṣadhastho raveṇa |
 4.050.01c tam pratnāsa ṛṣayo dīdhyānāḥ puro viprā dadhire mandrajihvam ||
 4.050.02a dhunetayaḥ supraketaṃ madanto bṛhaspate abhi ye nas tatasre |
 4.050.02c pṛṣantaṃ sṛpraṃ adabdham ūrvam bṛhaspate rakṣatād asya yonim ||
 4.050.03a bṛhaspate yā paramā parāvada ā ta ṛtaspr̥so ni ṣeduḥ |
 4.050.03c tubhyaṃ khātā avatā adridugdhā madhva ścotanty abhito virapśam ||
 4.050.04a bṛhaspatiḥ prathamam jāyamāno maho jyotiṣaḥ parame vyoman |
 4.050.04c saptāsyaṣ tuvijāto raveṇa vi saptaraśmir adhamat tamāmsi ||
 4.050.05a sa suṣṭubhā sa ṛkvatā gaṇena valaṃ ruroja phaligaṃ raveṇa |
 4.050.05c bṛhaspatir usriyā havyaśūdaḥ kanikradad vāvaśatir ud ājat ||
 4.050.06a evā pitre viśvadevāya vṛṣṇe yajñair vidhema namasā havirbhiḥ |
 4.050.06c bṛhaspate suprajā vīravanto vyaṃ syāma patayo rayiṇām ||
 4.050.07a sa id rājā pratijanyāni viśvā śuṣmeṇa tasthāv abhi vīryeṇa |
 4.050.07c bṛhaspatiṃ yaḥ subhṛtam bibharti valgūyati vandate pūrvabhājam ||
 4.050.08a sa it kṣeti sudhita okasi sve tasmā idā pinvate viśvadānīm |
 4.050.08c tasmai viśaḥ svayam evā namante yasmin brahmā rājani pūrva eti ||
 4.050.09a apratīto jayati saṃ dhanāni pratijanyāny uta yā sajanyā |
 4.050.09c avasyave yo varivaḥ kṛṇoti brahmaṇe rājā tam avanti devāḥ ||
 4.050.10a indraś ca somam pibatam bṛhaspate 'smin yajñe mandasānā vṛṣaṇvasū |
 4.050.10c ā vām viśantv indavaḥ svābhūvo 'sme rayiṃ sarvavīraṃ ni yachatam ||
 4.050.11a bṛhaspata indra vardhataṃ naḥ sacā sā vām sumatir bhūtv asme |
 4.050.11c aviṣṭam dhiyo jigṛtam puramdhīr jajastam aryo vanuṣām arātīḥ ||

4.051.01a idam u tyat purutamam purastāj jyotis tamaso vayunāvad asthāt |
 4.051.01c nūnaṃ divo duhitaro vibhātīr gātuṃ kṛṇavann uśaso janāya ||
 4.051.02a asthur u citrā uśasaḥ purastān mitā iva svaravo 'dhvareṣu |
 4.051.02c vy ū vrasya tamaso dvārochantīr avrañ chucayaḥ pāvakāḥ ||
 4.051.03a uchantīr adya citayanta bhōjān rādhodeyāyośaso maghonīḥ |
 4.051.03c acitre antaḥ paṇayaḥ sasantv abudhyamānās tamaso vimadhye ||
 4.051.04a kuvit sa devīḥ sanayo navo vā yāmo babhūyād uśaso vo adya |
 4.051.04c yenā navagve aṅgire daśagve saptāsye revatī revad ūṣa ||
 4.051.05a yūyaṃ hi devīr ṛtayugbhir aśvaiḥ pariprayātha bhuvanāni sadyaḥ |
 4.051.05c prabodhayantīr uśasaḥ sasantaṃ dvipāc catuṣpāc carathāya jīvam ||
 4.051.06a kva svid āsām katamā purāṇi yayā vidhānā vidadhur ṛbhūṇām |
 4.051.06c śubhaṃ yac chubhrā uśasaś caranti na vi jñāyante sadṛśīr ajuryāḥ ||
 4.051.07a tā ghā tā bhadrā uśasaḥ purāsur abhiṣṭidyumnā ṛtajātasatyāḥ |
 4.051.07c yāsv ijānaḥ śaśamāna ukthai stuvañ chaṃsan draviṇaṃ sadya āpa ||
 4.051.08a tā ā caranti samanā purastāt samānataḥ samanā paprathānāḥ |
 4.051.08c ṛtasya devīḥ sadaso budhānā gavām na sargā uśaso jarante ||
 4.051.09a tā in nv eva samanā samānīr amītavarnā uśasaś caranti |
 4.051.09c gūhantīr abhvam asitaṃ ruśadbhiḥ śukrās tanūbhiḥ śucayo rucānāḥ ||
 4.051.10a rayiṃ divo duhitaro vibhātīḥ prajāvantam yachatāsmāsu devīḥ |
 4.051.10c syonād ā vaḥ pratibudhyamānāḥ suvīryasya patayaḥ syāma ||
 4.051.11a tad vo divo duhitaro vibhātīr upa bruva uśaso yajñaketuḥ |
 4.051.11c vyaṃ syāma yaśaso janeṣu tad dyauś ca dhattām pṛthivī ca devī ||

4.052.01a prati śyā sūnarī janī vyuchantī pari svasuḥ |
 4.052.01c divo adarśi duhitā ||
 4.052.02a aśveva citrāruṣi mātā gavām ṛtāvari |
 4.052.02c sakhābhūd aśvinor uśāḥ ||
 4.052.03a uta sakhāsy aśvinor uta mātā gavām asi |
 4.052.03c utoṣo vasva īśiṣe ||
 4.052.04a yāvayaddveśasaṃ tvā cikitvit sūnṛtāvari |
 4.052.04c prati stomair abhutsmaḥi ||
 4.052.05a prati bhadrā adṛkṣata gavām sargā na raśmayaḥ |
 4.052.05c oṣā aprā uru jrayaḥ ||
 4.052.06a āpaprūṣi vibhāvari vy āvar jyotiṣā tamaḥ |
 4.052.06c uṣo anu svadhām ava ||
 4.052.07a ā dyām tanoṣi raśmibhir āntarikṣam uru priyam |
 4.052.07c uśāḥ śukreṇa śociṣā ||

4.053.01a tad devasya savitur vāryam mahad vṛṇīmahe asurasya pracetasāḥ |
 4.053.01c chardir yena dāśuṣe yachati tmanā tan no mahāṃ ud ayān devo aktubhiḥ ||
 4.053.02a divo dhartā bhuvanasya prajāpatih piśaṅgam drāpim prati muñcate kavih |
 4.053.02c vicakṣaṇaḥ prathayann āpṛṇann urv ajījanat savitā sumnam ukthyam ||
 4.053.03a āprā rajāṃsi divyāni pārthivā ślokaṃ devaḥ kṛṇute svāya dharmaṇe |
 4.053.03c pra bāhū asrāk savitā savīmani niveśayan prasuvann aktubhir jagat ||
 4.053.04a adābhyo bhuvanāni pracākaśad vratāni devaḥ savitābhi rakṣate |
 4.053.04c prāsrāg bāhū bhuvanasya prajābhyo dhṛtavrato maho ajmasya rājati ||
 4.053.05a trir antarikṣam savitā mahitvanā trī rajāṃsi paribhus trīni rocanā |
 4.053.05c tisro divaḥ pṛthivīs tisra invati tribhir vratair abhi no rakṣati tmanā ||
 4.053.06a bṛhatsumnaḥ prasavitā niveśano jagata sthātur ubhayasya yo vaśi |
 4.053.06c sa no devaḥ savitā śarma yachatv asme kṣayāya trivarūtham aṃhasaḥ ||
 4.053.07a āgan deva ṛtubhir vardhatu kṣayam dadhātu naḥ savitā suprajām iṣam |
 4.053.07c sa naḥ kṣapābhir ahabhiś ca jinvatu prajāvantam rayim asme sam invatu ||

4.054.01a abhūd devaḥ savitā vandyo nu na idānīm ahna upavācyo nṛbhiḥ |
 4.054.01c vi yo ratnā bhajati mānavebhyaḥ śreṣṭham no atra draviṇam yathā dadhat ||
 4.054.02a devebhyo hi prathamam yajñiyebhyo 'mṛtatvam suvasi bhāgam uttamam |
 4.054.02c ād id dāmānam savitar vy ūrṇuṣe 'nūcinā jivitā mānuṣebhyaḥ ||
 4.054.03a acitti yac cakṛmā daivye jane dīnair dakṣaiḥ prabhūti pūruṣatvatā |
 4.054.03c deveṣu ca savitar mānuṣeṣu ca tvam no atra suvatād anāgasaḥ ||
 4.054.04a na pramiye savitur daivyasya tad yathā viśvam bhuvanam dhārayiṣyati |
 4.054.04c yat pṛthivyā varimann ā svaṅgurir varṣman divaḥ suvati satyam asya tat ||
 4.054.05a indrajyeṣṭhān bṛhadbhyaḥ parvatebhyaḥ kṣayāṃ ebhyaḥ suvasi pastyāvataḥ |
 4.054.05c yathā-yathā patayanto viyemira evaiva tasthuḥ savitaḥ savāya te ||
 4.054.06a ye te trir ahan savitaḥ savāso dive-dive saubhagam āsuvanti |
 4.054.06c indro dyāvāpṛthivī sindhur adbhīr ādityair no aditiḥ śarma yaṃsat ||

4.055.01a ko vas trātā vasavaḥ ko varūtā dyāvābhūmī adite trāsītham naḥ |
 4.055.01c sahiyaso varuṇa mitra martāt ko vo 'dhvare varivo dhāti devāḥ ||
 4.055.02a pra ye dhāmāni pūrvyāṅy arcān vi yad uchān viyotāro amūrāḥ |

4.055.02c vidhātāro vi te dadhur ajasrā ṛtadhītayo rurucanta dasmāḥ ||
 4.055.03a pra pastyām aditiṃ sindhum arkaiḥ svastim iḍe sakhyāya devīm |
 4.055.03c ubhe yathā no ahanī nipāta uṣāsānaktā karatām adabdhe ||
 4.055.04a vy aryamā varuṇas ceti panthām iṣas patih suvitam gātum agniḥ |
 4.055.04c indrāviṣṇū nṛvad u ṣu stavānā śarma no yantam amavad varūtham ||
 4.055.05a ā parvatasya marutām avāṃsi devasya trātur avri bhagasya |
 4.055.05c pāt patir janyād aṃhaso no mitro mitriyād uta na uruṣyet ||
 4.055.06a nū rodasī ahinā budhnyena stuvīta devī apyebhir iṣṭaiḥ |
 4.055.06c samudraṃ na saṃcaraṇe saniṣyavo gharmasvaraso nadyo apa vran ||
 4.055.07a devair no devy aditir ni pātu devas trātā trāyatām aprayuchan |
 4.055.07c nahi mitrasya varuṇasya dhāsim arhāmasi pramiyaṃ sānv agneḥ ||
 4.055.08a agnir iṣe vasavyasyāgnir mahaḥ saubhagasya |
 4.055.08c tāny asmabhyaṃ rāsate ||
 4.055.09a uṣo maghony ā vaha sūnrte vāryā puru |
 4.055.09c asmabhyaṃ vājinīvati ||
 4.055.10a tat su naḥ savitā bhago varuṇo mitro aryamā |
 4.055.10c indro no rādhasā gamat ||

4.056.01a mahī dyāvāpṛthivī iha jyeṣṭhe rucā bhavatām śucayadbhir arkaiḥ |
 4.056.01c yat sīm variṣṭhe bṛhatī viminvan ruvad dhokṣā paprathānebhīr evaiḥ ||
 4.056.02a devī devebhīr yajate yajatrair aminatī tasthatur ukṣamāṇe |
 4.056.02c ṛtāvarī adruhā devaputre yajñasya netrī śucayadbhir arkaiḥ ||
 4.056.03a sa it svapā bhuvaneṣv āsa ya ime dyāvāpṛthivī jajāna |
 4.056.03c urvī gabhīre rajasī sumeke avamṣe dhīraḥ śacyā sam airat ||
 4.056.04a nū rodasī bṛhadbhīr no varūthaiḥ patnīvadbhīr iṣayantī sajoṣāḥ |
 4.056.04c urūcī viśve yajate ni pātāṃ dhiyā syāma rathyaḥ sadāsāḥ ||
 4.056.05a pra vām mahi dyavī abhy upastutim bharāmahe |
 4.056.05c śucī upa praśastaye ||
 4.056.06a punāne tanvā mithaḥ svena dakṣeṇa rājathaḥ |
 4.056.06c ūhyāthe sanād ṛtam ||
 4.056.07a mahī mitrasya sādhatas tarantī pipratī ṛtam |
 4.056.07c pari yajñam ni śedathuḥ ||

4.057.01a kṣetrasya patinā vyaṃ hiteneva jayāmasi |
 4.057.01c gām āsvam poṣayitnv ā sa no mṛdātīdṛse ||
 4.057.02a kṣetrasya pate madhumantam ūrmiṃ dhenur iva payo asmāsu dhukṣva |
 4.057.02c madhuścutam ghṛtam iva supūtam ṛtasya naḥ patayo mṛdayantu ||
 4.057.03a madhumatir oṣadhīr dyāva āpo madhuman no bhavatv antarikṣam |
 4.057.03c kṣetrasya patir madhumān no astv ariṣyanto anv enaṃ carema ||
 4.057.04a śunaṃ vāhāḥ śunaṃ naraḥ śunaṃ kṛṣatu lāṅgalam |
 4.057.04c śunaṃ varatrā badhyantām śunam aṣṭrām ud iṅgaya ||
 4.057.05a śunāsīrāv imāṃ vācam juṣethām yad divi cakrathuḥ payaḥ |
 4.057.05c tenemām upa siñcatam ||
 4.057.06a arvācī subhage bhava site vandāmahe tvā |
 4.057.06c yathā naḥ subhagāsasi yathā naḥ suphalāsasi ||
 4.057.07a indraḥ sītāṃ ni gṛhṇātu tām pūṣānu yachatu |
 4.057.07c sā naḥ payasvatī duhām uttarām-uttarām samām ||

4.057.08a śunam naḥ phālā vi kṛṣantu bhūmiṃ śunam kīnāsā abhi yantu vāhaiḥ |
4.057.08c śunam parjanyo madhunā payobhiḥ śunāsirā śunam asmāsu dhattam ||

4.058.01a samudrād ūrmir madhumāṃ ud ārad upāṃśunā sam amṛtatvam ānaḥ |
4.058.01c ghṛtasya nāma guhyaṃ yad asti jihvā devānām amṛtasya nābhiḥ ||
4.058.02a vyaṃ nāma pra bravāmā ghṛtasyāsmiṃ yajñe dhārayāmā namobhiḥ |
4.058.02c upa brahmā śṛṅgāvac chasyamānaṃ catuḥśṛṅgo 'vamīd gaura etat ||
4.058.03a catvāri śṛṅgā trayo asya pādā dve śīrṣe sapta hastāso asya |
4.058.03c tridhā baddho vṛṣabho roravīti maho devo martyāṃ ā viveśa ||
4.058.04a tridhā hitam paṇibhir guhyamānaṃ gavi devāso ghṛtam anv avindan |
4.058.04c indra ekaṃ sūrya ekaṃ jajāna venād ekaṃ svadhayā niṣ ṭatakṣuḥ ||
4.058.05a etā arṣanti hṛdyāt samudrāc chatavrajā ripuṇā nāvacakṣe |
4.058.05c ghṛtasya dhārā abhi cākaśīmi hiraṇyayo vetaso madhya āsām ||
4.058.06a samyak sravanti sarito na dhenā antar hṛdā manasā pūyamānāḥ |
4.058.06c ete arṣanty ūrmayo ghṛtasya mṛgā iva kṣīpaṇor iṣamānāḥ ||
4.058.07a sindhor iva prādhvane sūghanāso vātapramiyāḥ patayanti yāvāḥ |
4.058.07c ghṛtasya dhārā aruṣo na vāji kāṣṭhā bhindann ūrmibhiḥ pinvamānāḥ ||
4.058.08a abhi pravanta samaneva yoṣāḥ kalyāṇyaḥ smayamānāso agnim |
4.058.08c ghṛtasya dhārāḥ samidho nasanta tā juṣāṇo haryati jātavedāḥ ||
4.058.09a kanyā iva vahatum etavā u añjy añjānā abhi cākaśīmi |
4.058.09c yatra somaḥ sūyate yatra yajño ghṛtasya dhārā abhi tat pavante ||
4.058.10a abhy arṣata suṣṭutiṃ gavyam ājim asmāsu bhadrā draviṇāni dhatta |
4.058.10c imaṃ yajñaṃ nayata devatā no ghṛtasya dhārā madhumat pavante ||
4.058.11a dhāman te viśvam bhuvanam adhi śritam antaḥ samudre hṛdy antar āyuṣi |
4.058.11c apām anīke samithe ya ābhṛtas tam aśyāma madhumantaṃ ta ūrmim ||

5. Mandala

- 5.001.01a abodhy agniḥ samidhā janānām prati dhenum ivāyatīm uṣāsam |
5.001.01c yahvā iva pra vayām ujjihānāḥ pra bhānavaḥ sistrate nākam acha ||
5.001.02a abodhi hotā yajathāya devān ūrdhvo agniḥ sumanāḥ prātar asthāt |
5.001.02c samiddhasya ruśad adarśi pājo mahān devas tamaso nir amoci ||
5.001.03a yad iṃ gaṇasya raśanām ajīgaḥ śucir ankte śucibhir gobhir agniḥ |
5.001.03c ād dakṣiṇā yujyate vājayanty uttānām ūrdhvo adhayaj juhūbhiḥ ||
5.001.04a agnim achā devayatām manāṃsi cakṣūṃṣīva sūrye saṃ caranti |
5.001.04c yad iṃ suvāte uṣasā virūpe śveto vāji jāyate agre ahnām ||
5.001.05a janiṣṭha hi jenyo agre ahnām hito hiteṣv aruṣo vaneṣu |
5.001.05c dame-dame sapta ratnā dadhāno 'gnir hotā ni śasādā yajīyān ||
5.001.06a agnir hotā ny asīdad yajīyān upasthe mātuḥ surabhā uloke |
5.001.06c yuvā kavīḥ puruniṣṭha ṛtāvā dhartā kṛṣṭīnām uta madhya iddhaḥ ||
5.001.07a pra ṇu tyam vipram adhvaṛeṣu sādhum agniḥ hotāram idate namobhiḥ |
5.001.07c ā yas tatāna rodasī ṛtena nityam mṛjanti vājinaṃ gṛtena ||
5.001.08a mārjālyo mṛjyate sve damūnāḥ kavipraśasto atithiḥ śivo naḥ |
5.001.08c sahasraśṛṅgo vṛṣabhas tadojā viśvām agne sahasā prāsy anyān ||
5.001.09a pra sadyo agne aty eṣy anyān āvir yasmai cārutamo babhūtha |
5.001.09c idenyo vapuṣyo vibhāvā priyo viśām atithir mānuṣiṇām ||
5.001.10a tubhyam bharanti kṣitayo yaviṣṭha balim agne antita ota dūrāt |
5.001.10c ā bhandiṣṭhasya sumatiṃ cikiddhi bṛhat te agne mahi śarma bhadram ||
5.001.11a ādya ratham bhānumo bhānumantam agne tiṣṭha yajatebhiḥ samantam |
5.001.11c vidvān pathinām urv antarikṣam eha devān haviradyāya vakṣi ||
5.001.12a avocāma kavaye medhyāya vaco vandāru vṛṣabhāya vṛṣṇe |
5.001.12c gaviṣṭhiro namasā stomam agnau divīva rukmam uruvyañcam aśret ||

- 5.002.01a kumāram mātā yuvatiḥ samubdham guhā bibharti na dadāti pitre |
5.002.01c anīkam asya na minaj janāsaḥ puraḥ paśyanti nihitam aratau ||
5.002.02a kam etaṃ tvam yuvate kumāram peṣi bibharṣi mahiṣi jajāna |
5.002.02c pūrvīr hi garbhaḥ śarado vavardhāpaśyam jātaṃ yad asūta mātā ||
5.002.03a hiraṇyadantaṃ śucivarṇam ārāt kṣetrād apaśyam āyudhā mimānam |
5.002.03c dadāno asmā amṛtaṃ vipṛkvat kim mām anindrāḥ kṛṇavann anukthāḥ ||
5.002.04a kṣetrād apaśyam sanutaś carantaṃ sumad yūthaṃ na puru śobhamānam |
5.002.04c na tā aḡṛbhṛann ajaniṣṭha hi ṣaḥ paliknīr id yuvatayo bhavanti ||
5.002.05a ke me maryakaṃ vi yavanta gobhir na yeṣām gopā araṇaś cid āsa |
5.002.05c ya iṃ jagṛbhur ava te sṛjantv ājāti paśva upa naś cikitvān ||
5.002.06a vasāṃ rājānaṃ vasatiṃ janānām arātayo ni dadhur martyeṣu |
5.002.06c brahmāny atreṛ ava taṃ sṛjantu ninditāro nindyāso bhavantu ||
5.002.07a śunaś cic chepaṃ niditaṃ sahasrād yūpād amuñco aśamiṣṭha hi ṣaḥ |
5.002.07c evāsmad agne vi mumugdhi pāsān hotaś cikitva iha tū niṣadya ||
5.002.08a hṛṇīyamāno apa hi mad aiyeh pra me devānām vratapā uvāca |
5.002.08c indro vidvām anu hi tvā cacakṣa tenāham agne anuṣiṣṭha āgām ||
5.002.09a vi jyotiṣā bṛhatā bhāty agnir āvir viśvāni kṛṇute mahitvā |
5.002.09c prādevīr māyāḥ sahate durevāḥ śiśīte śṛṅge rakṣase vinikṣe ||
5.002.10a uta svānāso divi śantv agnes tigmāyudhā rakṣase hantavā u |

5.002.10c made cid asya pra rujanti bhāmā na varante paribādho adeviḥ ||
 5.002.11a etaṃ te stomam tuvijāta vipro ratham na dhīraḥ svapā atakṣam |
 5.002.11c yadīd agne prati tvam deva haryāḥ svarvatīr apa enā jayema ||
 5.002.12a tuvigrīvo vṛṣabho vāvṛdhāno 'śatrv ayaḥ sam ajāti vedaḥ |
 5.002.12c itimam agnim amṛtā avocan barhiṣmate manave śarma yaṃsad dhaviṣmate
 manave śarma yaṃsat ||

5.003.01a tvam agne varuṇo jāyase yat tvam mitro bhavasi yat samiddhaḥ |
 5.003.01c tve viśve sahasas putra devās tvam indro dāsūṣe martyāya ||
 5.003.02a tvam aryamā bhavasi yat kanīnām nāma svadhāvan guhyam bibharṣi |
 5.003.02c añjanti mitram sudhitam na gobhir yad dampatī samanasā kṛṇoṣi ||
 5.003.03a tava śriye maruto marjayanta rudra yat te janima cāru citram |
 5.003.03c padaṃ yad viṣṇor upamaṃ nidhāyi tena pāsi guhyam nāma gonām ||
 5.003.04a tava śriyā sudṛśo deva devāḥ purū dadhānā amṛtam sapanta |
 5.003.04c hotāram agnim manuṣo ni śedur daśasyanta usijaḥ śamsam āyoḥ ||
 5.003.05a na tvad dhotā pūrvo agne yajiyān na kāvyaiḥ paro asti svadhāvaḥ |
 5.003.05c viśas ca yasyā atithir bhavāsi sa yajñena vanavad deva martān ||
 5.003.06a vayam agne vanuyāma tvotā vasūyavo haviṣā budhyamānāḥ |
 5.003.06c vayam samarye vidatheṣv ahnām vayam rāyā sahasas putra martān ||
 5.003.07a yo na āgo abhy eno bharāty adhīd agham aghaśamse dadhāta |
 5.003.07c jahī cikitvo abhiśastim etām agne yo no marcayati dvayena ||
 5.003.08a tvām asyā vyuṣi deva pūrve dūtam kṛṇvānā ayajanta havyaiḥ |
 5.003.08c samsthe yad agna iyase rayīnām devo martair vasubhir idhyamānaḥ ||
 5.003.09a ava spr̥dhi pitaram yodhi vidvān putro yas te sahasaḥ sūna ūhe |
 5.003.09c kadā cikitvo abhi cakṣase no 'gne kadām̃ ṛtacid yātayāse ||
 5.003.10a bhūri nāma vandamāno dadhāti pitā vaso yadi taj joṣayāse |
 5.003.10c kuvid devasya sahasā cakānaḥ sumnam agnir vanate vāvṛdhānaḥ ||
 5.003.11a tvam aṅga jaritāram yaviṣṭha viśvāny agne duritāti parṣi |
 5.003.11c stenā adṛśran ripavo janāso 'jñātaketā vṛjinā abhūvan ||
 5.003.12a ime yāmāsas tvadrig abhūvan vasave vā tad id āgo avāci |
 5.003.12c nāhāyam agnir abhiśastaye no na riṣate vāvṛdhānaḥ parā dāt ||

5.004.01a tvām agne vasupatiṃ vasūnām abhi pra mande adhvaṛṣu rājan |
 5.004.01c tvayā vājam vājayanto jayemābhi śyāma pṛtsutīr martyānām ||
 5.004.02a havyvāḍ agnir ajaraḥ pitā no vibhur vibhāvā sudṛśiko asme |
 5.004.02c sugārhapatyāḥ sam iṣo didihy asmadyak sam mimīhi śravāmsi ||
 5.004.03a viśam kavim viśpatim mānuṣiṇām śucim pāvakaṃ ghṛtapṛṣṭham agnim |
 5.004.03c ni hotāram viśvavidam dadhidhve sa deveṣu vanate vāryāni ||
 5.004.04a juṣasvāgna iḍayā sajoṣā yatamāno raśmibhiḥ sūryasya |
 5.004.04c juṣasva naḥ samidham jātaveda ā ca devān haviradyāya vakṣi ||
 5.004.05a juṣṭo damūnā atithir duroṇa imam no yajñam upa yāhi vidvān |
 5.004.05c viśvā agne abhiyujō vihatyā śatrūyatām ā bharā bhojanāni ||
 5.004.06a vadhena dasyum pra hi cātayasva vayah kṛṇvānas tanve svāyai |
 5.004.06c piparṣi yat sahasas putra devānt so agne pāhi nṛtama vāje asmān ||
 5.004.07a vayam te agna ukthair vidhema vayam havyaiḥ pāvaka bhadrāsoce |
 5.004.07c asme rayim viśvavāram sam invāsme viśvāni draviṇāni dhehi ||
 5.004.08a asmākam agne adhvaṛam juṣasva sahasaḥ sūno triṣadhastha havyam |

5.004.08c vyaṃ deveṣu sukṛtaḥ syāma śarmaṇā nas trivarūthena pāhi ||
 5.004.09a viśvāni no durgahā jātavedaḥ sindhuṃ na nāvā duritāti parṣi |
 5.004.09c agne atrivan namasā gṛṇāno 'smākam bodhy avitā tanūnām ||
 5.004.10a yas tvā hṛdā kīriṇā manyamāno 'martyam martyo jōhavīmi |
 5.004.10c jātavedo yaśo asmāsu dhehi prajābhir agne amṛtatvam aśyām ||
 5.004.11a yasmai tvaṃ sukṛte jātaveda ulokam agne kṛṇavaḥ syonam |
 5.004.11c aśvinaṃ sa putṛṇaṃ vīravantaṃ gomantaṃ rayiṃ naśate svasti ||

5.005.01a susamiddhāya śociṣe ghṛtaṃ tīvraṃ juhotana |
 5.005.01c agnaye jātavedase ||
 5.005.02a narāśamsaḥ suṣūdatīmaṃ yajñam adābhyaḥ |
 5.005.02c kavir hi madhuhastyaḥ ||
 5.005.03a iḍito agna ā vahendraṃ citram iha priyam |
 5.005.03c sukhai rathebhīr ūtaye ||
 5.005.04a ūṇamradā vi prathasvābhy arkā anūṣata |
 5.005.04c bhavā naḥ śubhra sātaye ||
 5.005.05a devīr dvāro vi śrayadhvaṃ supṛāyaṇā na ūtaye |
 5.005.05c pra-pra yajñam pṛṇītana ||
 5.005.06a supratīke vayovṛdhā yāvī ṛtasya mātārā |
 5.005.06c doṣām uṣāsam īmahe ||
 5.005.07a vātasya patmann iḍitā daivyā hotārā manuṣaḥ |
 5.005.07c imaṃ no yajñam ā gatam ||
 5.005.08a iḍā sarasvatī mahī tisro devīr mayobhavaḥ |
 5.005.08b barhiḥ sīdantv asridhaḥ ||
 5.005.09a śivas tvaṣṭar ihā gahi vibhuḥ poṣa uta tmanā |
 5.005.09c yajñe-yajñe na ud ava ||
 5.005.10a yatra vettha vanaspate devānām guhyā nāmāni |
 5.005.10c tatra havāni gāmaya ||
 5.005.11a svāhāgnaye varuṇāya svāhendrāya marudbhyaḥ svāhā devebhyo haviḥ |

5.006.01a agniṃ tam manye yo vasur astaṃ yaṃ yanti dhenavaḥ |
 5.006.01c astam arvanta āśavo 'staṃ nityāso vājina iṣaṃ stotṛbhya ā bhara ||
 5.006.02a so agnir yo vasur gṛṇe saṃ yaṃ āyanti dhenavaḥ |
 5.006.02c sam arvanto raghudruvaḥ saṃ sujātāsaḥ sūraya iṣaṃ stotṛbhya ā bhara ||
 5.006.03a agnir hi vājinaṃ viśe dadāti viśvacarṣaṇiḥ |
 5.006.03c agnī rāye svābhuvam sa pṛito yāti vāryam iṣaṃ stotṛbhya ā bhara ||
 5.006.04a ā te agna idhīmahi dyumantaṃ devājaram |
 5.006.04c yad dha syā te paṇiyasī samid dīdayati dyaviṣaṃ stotṛbhya ā bhara ||
 5.006.05a ā te agna ṛcā haviḥ śukrasya śociṣas pate |
 5.006.05c suścandra dasma viśpate havyaṃ tubhyaṃ hūyata iṣaṃ stotṛbhya ā bhara ||
 5.006.06a pro tye agnayo 'gṇiṣu viśvam puṣyanti vāryam |
 5.006.06c te hinvire ta invire ta iṣaṇyanti ānuṣag iṣaṃ stotṛbhya ā bhara ||
 5.006.07a tava tye agne arcayo mahi vrādhanta vājinaḥ |
 5.006.07c ye patvabhiḥ śaphānām vrajā bhuranta gonām iṣaṃ stotṛbhya ā bhara ||
 5.006.08a navā no agna ā bhara stotṛbhyaḥ sukṣītīr iṣaḥ |
 5.006.08c te syāma ya āṇṛcus tvādūtāso dame-dama iṣaṃ stotṛbhya ā bhara ||
 5.006.09a ubhe suścandra sarpiṣo darvī śrīṇiṣa āsani |

5.006.09c uto na ut pupūryā uktheṣu śavasaḥ pata iṣaṃ stotr̥bhya ā bhara ||
5.006.10a evāṃ agniṃ ajuryamur gīrbhir yajñebhir ānuṣak |
5.006.10c dadhad asme suvīryam uta tyad āśvasvyam iṣaṃ stotr̥bhya ā bhara ||

5.007.01a sakhāyaḥ saṃ vaḥ samyañcam iṣaṃ stomam cāgnaye |
5.007.01c varṣiṣṭhāya kṣitīnām ūrjo naptre sahasvate ||
5.007.02a kutrā cid yasya samṛtau raṇvā naro nṛṣadane |
5.007.02c arhantaś cid yam indhate samjanayanti jantavaḥ ||
5.007.03a saṃ yad iṣo vanāmahe saṃ havyā mānuṣāṇām |
5.007.03c uta dyumnasya śavasa ṛtasya raśmim ā dade ||
5.007.04a sa smā kṛṇoti ketum ā naktam cid dūra ā sate |
5.007.04c pāvako yad vanaspatīn pra smā mināty ajaraḥ ||
5.007.05a ava sma yasya veṣaṇe svedam pathiṣu juhvati |
5.007.05c abhīm aha svajenyam bhūmā pṛṣṭheva ruruhuḥ ||
5.007.06a yam martyaḥ puruspr̥ham vidad viśvasya dhāyase |
5.007.06c pra svādanam pitūnām astatātiṃ cid āyave ||
5.007.07a sa hi śmā dhanvākṣitam dātā na dāty ā paśuḥ |
5.007.07c hiriśmaśruḥ śucidann ṛbhur anibhṛṣṭataviṣiḥ ||
5.007.08a śuciḥ śmā yasmā atrivat pra svadhitīva riyate |
5.007.08c suṣūr asūta mātā krāṇā yad ānaśe bhagam ||
5.007.09a ā yas te sarpirāsute 'gne śam asti dhāyase |
5.007.09c aiṣu dyumnam uta śrava ā cittam martyeṣu dhāḥ ||
5.007.10a iti cin manyum adhrijaḥ tvādātam ā paśum dade |
5.007.10c ād agne apr̥ṇato 'triḥ sāsaḥyād dasyūn iṣaḥ sāsaḥyān nṛn ||

5.008.01a tvām agna ṛtāyavaḥ sam idhire pratnam pratnāsa ūtaye sahaskr̥ta |
5.008.01c puruścandram yajatam viśvadhāyasaṃ damūnasaṃ gṛhapatim vareṇyam ||
5.008.02a tvām agne atithim pūrvyam viśaḥ śociṣkeśam gṛhapatim ni ṣedire |
5.008.02c bṛhatketum pururūpaṃ dhanaspr̥tam suśarmāṇam svavasam jaradviṣam ||
5.008.03a tvām agne mānuṣir idate viśo hotrāvidam viviciṃ ratnadhātāmam |
5.008.03c guhā santam subhaga viśvadarśatam tuviṣvaṇasaṃ suyajam ghṛtaśriyam ||
5.008.04a tvām agne dharṇasiṃ viśvadhā vayam gīrbhir gṛṇanto namasopa sedima |
5.008.04c sa no juṣasva samidhāno aṅgiro devo martasya yaśasā sudītibhiḥ ||
5.008.05a tvam agne pururūpo viśe-viśe vayo dadhāsi pratnathā puruṣtuta |
5.008.05c purūṇy annā sahasā vi rājasi tviṣiḥ sā te titviṣāṇasya nādhr̥ṣe ||
5.008.06a tvām agne samidhānam yaviṣṭhya devā dūtam cakrire havyaḥvāhanam |
5.008.06c urujrayasaṃ ghṛtayonim āhutam tveṣam cakṣur dadhire codayanmati ||
5.008.07a tvām agne pradiva āhutam ghṛtaiḥ sumnāyavaḥ suṣamidhā sam idhire |
5.008.07c sa vāvṛdhāna oṣadhībhir ukṣito 'bhi jrayāmsi pārhivā vi tiṣṭhase ||

5.009.01a tvām agne haviṣmanto devam martāsa idate |
5.009.01c manye tvā jātavedasaṃ sa havyaḥ vakṣy ānuṣak ||
5.009.02a agnir hotā dāsvataḥ kṣayasya vṛktabarhiṣaḥ |
5.009.02c saṃ yajñāś caranti yaṃ saṃ saṃ vājasaḥ śravasyavaḥ ||
5.009.03a uta sma yaṃ śiṣum yathā navam janiṣṭāraṇi |
5.009.03c dhartāram mānuṣiṇām viśām agniṃ svadhvaram ||

5.009.04a uta sma durgr̥bhīyase putro na hvāryāṇām |
 5.009.04c purū yo dagdhāsi vanāgne paśur na yavase ||
 5.009.05a adha sma yasyārcayaḥ samyak saṃyanti dhūmināḥ |
 5.009.05c yad im aha trito divy upa dhmāteva dhamati śiśīte dhmātari yathā ||
 5.009.06a tavāham agna ūtibhir mitrasya ca praśastibhiḥ |
 5.009.06c dveṣoyuto na duritā turyāma martyānām ||
 5.009.07a taṃ no agne abhī naro rayiṃ sahasva ā bhara |
 5.009.07c sa kṣepayat sa poṣayad bhuvad vājasya sātaya utaidhi pṛtsu no vṛdhe ||

5.010.01a agna ojiṣṭham ā bhara dyumnam asmabhyam adhrigo |
 5.010.01c pra no rāyā pariṇasā ratsi vājāya panthām ||
 5.010.02a tvam no agne adbhuta kratvā dakṣasya mamhanā |
 5.010.02c tve asuryam āruhat krāṇā mitro na yajñiyaḥ ||
 5.010.03a tvam no agna eṣām gayam puṣṭiṃ ca vardhaya |
 5.010.03c ye stomebhiḥ pra sūrayo naro maghāny ānaśuḥ ||
 5.010.04a ye agne candra te giraḥ śumbhanty aśvarādhasaḥ |
 5.010.04c śuṣmebhiḥ śuṣmiṇo naro divaś cid yeṣām bṛhat sukīrtir bodhati tmanā ||
 5.010.05a tava tye agne arcayo bhrājanto yanti dhṛṣṇuyā |
 5.010.05c pariṃmāno na vidyutaḥ svāno ratho na vājayuh ||
 5.010.06a nū no agna ūtaye sabādhasaś ca rātaye |
 5.010.06c asmākāsaś ca sūrayo viśvā āśās tariṣaṇi ||
 5.010.07a tvam no agne aṅgira stuta stavāna ā bhara |
 5.010.07c hotar vibhvāsahaṃ rayiṃ stotr̥bhya stavase ca na utaidhi pṛtsu no vṛdhe ||

5.011.01a janasya gopā ajaniṣṭa jāgr̥vir agniḥ sudakṣaḥ suvitāya navyase |
 5.011.01c ghṛtapratīko bṛhatā diviṣṛṣā dyumad vi bhāti bharatebhyaḥ śuciḥ ||
 5.011.02a yajñasya ketum prathamam purohitam agniṃ naras triśadhasṭhe sam īdhire |
 5.011.02c indreṇa devaiḥ sarathaṃ sa barhiṣi sīdan ni hotā yajathāya sukratuḥ ||
 5.011.03a asammṛṣṭo jāyase mātroph śucir mandraḥ kavir ud atiṣṭho vivasvataḥ |
 5.011.03c ghṛtena tvāvardhayann agna āhuta dhūmas te ketur abhavad divi śritāḥ ||
 5.011.04a agnir no yajñam upa vetu sādhyāgniṃ naro vi bharante gṛhe-gṛhe |
 5.011.04c agnir dūto abhavad dhavyavāhano 'gniṃ vṛṇānā vṛṇate kavikratum ||
 5.011.05a tubhyedam agne madhumattamaṃ vacas tubhyam maṇiṣā iyam astu śaṃ hṛde |
 5.011.05c tvām giraḥ sindhum ivāvanir mahir ā pṛṇanti śavasā vardhayanti ca ||
 5.011.06a tvām agne aṅgirasō guhā hitam anv avindañ chiśriyāṇaṃ vane-vane |
 5.011.06c sa jāyase mathyamānaḥ saho mahat tvām āhuḥ sahasas putram aṅgiraḥ ||

5.012.01a prāgnaye bṛhate yajñiyāya ṛtasya vṛṣṇe asurāya manma |
 5.012.01c ghṛtaṃ na yajña āsye supūtaṃ giram bhare vṛṣabhāya praticim ||
 5.012.02a ṛtaṃ cikitva ṛtam ic cikiddhy ṛtasya dhārā anu tṛndhi pūrvih |
 5.012.02c nāham yātum sahasā na dvayena ṛtaṃ sapāmy aruṣasya vṛṣṇaḥ ||
 5.012.03a kayā no agna ṛtayann ṛtena bhuvo navedā ucathasya navyaḥ |
 5.012.03c vedā me deva ṛtupā ṛtūnām nāham patiṃ sanitur asya rāyaḥ ||
 5.012.04a ke te agne ripave bandhanāsaḥ ke pāyavaḥ saniṣanta dyumantaḥ |
 5.012.04c ke dhāsīm agne aṅṛtasya pānti ka āsato vacasaḥ santi gopāḥ ||
 5.012.05a sakhāyas te viṣuṇā agna ete śivāsaḥ santo aśivā abhūvan |

5.012.05c adhūrṣata svayam ete vacobhir ṛjūyate vṛjināni bruvantaḥ ||
5.012.06a yas te agne namasā yajñam iṭṭa ṛtaṃ sa pāty aruṣasya vṛṣṇaḥ |
5.012.06c tasya kṣayaḥ pṛthur ā sādhur etu prasarsrāṇasya nahuṣasya śeṣaḥ ||

5.013.01a arcantas tvā havāmahe 'rcantaḥ sam idhīmaḥ |
5.013.01c agne arcanta ūtaye ||
5.013.02a agne stomam manāmahe sidhram adya divisprśaḥ |
5.013.02c devasya draviṇasyavaḥ ||
5.013.03a agnir juṣata no giro hotā yo mānuṣeṣv ā |
5.013.03c sa yakṣad daivyaṃ janam ||
5.013.04a tvam agne saprathā asi juṣṭo hotā vareṇyaḥ |
5.013.04c tvayā yajñam vi tanvate ||
5.013.05a tvām agne vājasātamaṃ viprā vardhanti suṣṭutam |
5.013.05c sa no rāsva suvīryam ||
5.013.06a agne nemir arāṃ iva devāṃs tvam paribhūr asi |
5.013.06c ā rādhaś citram ṛñjase ||

5.014.01a agniṃ stomena bodhaya samidhāno amartyam |
5.014.01c havyā deveṣu no dadhat ||
5.014.02a tam adhvaṣv iḍate devam martā amartyam |
5.014.02c yajīṣṭham mānuṣe jane ||
5.014.03a taṃ hi śāsanta iḍate srucā devam ghṛtaścutā |
5.014.03c agniṃ havyāya voḍhave ||
5.014.04a agnir jāto arocata ghnān dasyūñ jyotiṣā tamaḥ |
5.014.04c avindad gā apaḥ svaḥ ||
5.014.05a agniṃ iḍenyaṃ kavim ghṛtapṛṣṭham saparyata |
5.014.05c vetu me śṛṇavad dhavam ||
5.014.06a agniṃ ghṛtena vāvṛdhu stomebhir viśvacarṣanim |
5.014.06c svādhibhir vacasyubhiḥ ||

5.015.01a pra vedhase kavaye vedyāya giram bhare yaśase pūrvyāya |
5.015.01c ghṛtaprasatto asuraḥ suśevo rāyo dhartā dharuṇo vasvo agniḥ ||
5.015.02a ṛtena ṛtaṃ dharuṇam dhārayanta yajñasya śāke parame vyoman |
5.015.02c divo dharman dharuṇe seduṣo nṛñ jātaiḥ ajātāñ abhi ye nanakṣuḥ ||
5.015.03a añhoyuvas tanvas tanvate vi vayo mahad duṣṭaram pūrvyāya |
5.015.03c sa saṃvato navajātas tuturyāt siñham na kruddham abhitaḥ pari ṣṭhuḥ ||
5.015.04a māteva yad bharse paprathāno janam-janam dhāyase cakṣase ca |
5.015.04c vayo-vayo jarase yad dadhānaḥ pari tmanā viṣurūpo jigāsi ||
5.015.05a vājo nu te śavasas pātv antam uruṃ dogham dharuṇam deva rāyaḥ |
5.015.05c padaṃ na tāyur guhā dadhāno maho rāye citayann atrim aspaḥ ||

5.016.01a bṛhad vayo hi bhānave 'rcā devāyāgnaye |
5.016.01c yam mitraṃ na praśastibhir martāso dadhire puraḥ ||
5.016.02a sa hi dyubhir janānām hotā dakṣasya bāhvoḥ |
5.016.02c vi havyam agnir ānuṣag bhago na vāram ṛṇvati ||

5.016.03a asya stome maghonaḥ sakhye vṛddhaśociṣaḥ |
5.016.03c viśvā yasmin tuviṣvaṇi sam arye śuṣmam ādadhuḥ ||
5.016.04a adhā hy agna eṣāṃ suvīryasya maṃhanā |
5.016.04c tam id yahvaṃ na rodasī pari śravo babhūvatuḥ ||
5.016.05a nū na ehi vāryam agne gṛṇāna ā bhara |
5.016.05c ye vayaṃ ye ca sūrayaḥ svasti dhāmahe sacotaidhi pṛtsu no vṛdhe ||

5.017.01a ā yajñair deva martya itthā tavyāṃsam ūtaye |
5.017.01c agniṃ kṛte svadhvare pūrur idītāvase ||
5.017.02a asya hi svayaśastara āsā vidharman manyase |
5.017.02c taṃ nākaṃ citraśociṣam mandram paro manīṣayā ||
5.017.03a asya vāsā u arciṣā ya āyukta tujā girā |
5.017.03c divo na yasya retasā bṛhac chocanty arcayaḥ ||
5.017.04a asya kratvā vicetaso dasmasya vasu ratha ā |
5.017.04c adhā viśvāsu havyo 'gnir vikṣu pra śasyate ||
5.017.05a nū na id dhi vāryam āsā sacanta sūrayaḥ |
5.017.05c ūrjo napād abhiṣṭaye pāhi śagdhi svastaya utaidhi pṛtsu no vṛdhe ||

5.018.01a prātar agniḥ purupriyo viśa stavetātithiḥ |
5.018.01c viśvāni yo amartyo havyaḥ marteṣu raṇyati ||
5.018.02a dvitāya mṛktavāhase svasya dakṣasya maṃhanā |
5.018.02c indum sa dhatta ānuṣak stotā cit te amartya ||
5.018.03a taṃ vo dīrghāyuśociṣam girā huve maghonām |
5.018.03c ariṣṭo yeṣāṃ ratho vy aśvadāvann iyate ||
5.018.04a citrā vā yeṣu dīdhitir āsann ukthā pānti ye |
5.018.04b stīrṇam barhiḥ svarṇare śravāṃsi dadhire pari ||
5.018.05a ye me pañcāsatam dadur aśvānām sadhastuti |
5.018.05b dyumad agne mahi śravo bṛhat kṛdhi maghonām nṛvad amṛta nṛṇām ||

5.019.01a abhy avasthāḥ pra jāyante pra vavrer vavriś ciketa |
5.019.01c upasthe mātur vi caṣṭe ||
5.019.02a juhure vi citayanto 'nimiṣam nṛmṇam pānti |
5.019.02c ā dṛḍhām puram viviśuḥ ||
5.019.03a ā śvaitreyasya jantavo dyumad vardhanta kṛṣṭayaḥ |
5.019.03b niṣkagrīvo bṛhaduktha enā madhvā na vājayuḥ ||
5.019.04a priyam dugdham na kāmyam ajāmi jāmyoḥ sacā |
5.019.04c gharmo na vājajaṭharo 'dabdhaḥ śāsvato dabhaḥ ||
5.019.05a krīḍan no raśma ā bhuvaḥ sam bhasmanā vāyunā vevidānaḥ |
5.019.05b tā asya san dhṛṣajo na tigmāḥ susaṃsitā vakṣyo vakṣaṇesthāḥ ||

5.020.01a yam agne vājasātama tvaṃ cin manyase rayim |
5.020.01c taṃ no gīrbhiḥ śravāyyam devatrā panayā yujam ||
5.020.02a ye agne nerayanti te vṛddhā ugrasya śavasah |
5.020.02b apa dveṣo apa hvaro 'nyavratasya saścire ||
5.020.03a hotāram tvā vṛṇīmahe 'gne dakṣasya sādhanam |

5.020.03b yajñeṣu pūrvyaṃ girā prayasvanto havāmahe ||
5.020.04a itthā yathā ta ūtaye sahasāvan dive-dive |
5.020.04b rāya ṛtāya suktrato gobhiḥ śyāma sadhamādo vīraiḥ syāma sadhamādaḥ ||

5.021.01a manuṣvat tvā ni dhīmahi manuṣvat sam idhīmahi |
5.021.01c agne manuṣvad aṅgiro devān devayate yaja ||
5.021.02a tvam hi mānuṣe jane 'gne supṛita idhyase |
5.021.02c srucas tvā yanty ānuṣak sujāta sarpirāsute ||
5.021.03a tvām viśve sajoṣaso devāso dūtam akrata |
5.021.03b saparyantas tvā kave yajñeṣu devam iḍate ||
5.021.04a devaṃ vo devayajyayāgnim iḍita martyaḥ |
5.021.04b samiddhaḥ śukra dīdihy ṛtasya yonim āsadaḥ sasasya yonim āsadaḥ ||

5.022.01a pra viśvasāmann atrivad arcā pāvakaśociṣe |
5.022.01c yo adhvaṣv iḍyo hotā mandratamo viśi ||
5.022.02a ny agnim jātavedasaṃ dadhātā devam ṛtvijam |
5.022.02c pra yajña etv ānuṣag adyā devavyacastamaḥ ||
5.022.03a cikitvinmanasaṃ tvā devam martāsa ūtaye |
5.022.03c vareṇyasya te 'vasa iyānāso amanmahi ||
5.022.04a agne cikiddhy asya na idam vacaḥ sahasya |
5.022.04c tam tvā suśipra dampate stomair vardhanty atrayo gīrbhiḥ śumbhanty atrayaḥ ||

5.023.01a agne sahintam ā bhara dyumnasya prāsahā rayim |
5.023.01c viśvā yaś carṣaṇīr abhy āsā vājeṣu sāsahat ||
5.023.02a tam agne pṛtanāṣahaṃ rayim sahasva ā bhara |
5.023.02b tvam hi satyo adbhuto dātā vājasya gomataḥ ||
5.023.03a viśve hi tvā sajoṣaso janāso vṛktabarhiṣaḥ |
5.023.03c hotāraṃ sadmasu priyaṃ vyanti vāryā puru ||
5.023.04a sa hi śmā viśvacarṣaṇīr abhimāti saho dadhe |
5.023.04b agna eṣu kṣayeṣv ā revan naḥ śukra dīdihy dyumat pāvaka dīdihy ||

5.024.01a agne tvam no antama uta trātā śivo bhavā varūthyaḥ |
5.024.02a vasur agnir vasuśravā achā nakṣi dyumattamaṃ rayim dāḥ |
5.024.03a sa no bodhi śrudhī havam uruṣyā ṇo aghāyataḥ samasmāt |
5.024.04a tam tvā śociṣṭha dīdivaḥ sumnāya nūnam īmahe sakhibhyaḥ |

5.025.01a achā vo agnim avase devaṃ gāsi sa no vasuḥ |
5.025.01c rāsāt putra ṛṣūṇām ṛtāvā parṣati dviṣaḥ ||
5.025.02a sa hi satyo yam pūrve cid devāsaś cid yam idhire |
5.025.02c hotāraṃ mandrajihvam it sudītibhir vibhāvasum ||
5.025.03a sa no dhīti variṣṭhayā śreṣṭhayā ca sumatyā |
5.025.03c agne rāyo dīdihy naḥ suvṛktibhir vareṇya ||
5.025.04a agnir deveṣu rājaty agnir marteṣv āviśan |
5.025.04c agnir no havyavāhano 'gnim dhībhiḥ saparyata ||

5.025.05a agnis tuviśravastamaṃ tuvibrahmāṇam uttamam |
 5.025.05c atūrtam śrāvayatpatim putram dadāti dāśuṣe ||
 5.025.06a agnir dadāti satpatim sāsāha yo yudhā nṛbhiḥ |
 5.025.06c agnir atyaṃ raghuṣyadaṃ jetāram aparājitam ||
 5.025.07a yad vāhiṣṭhaṃ tad agnaye bṛhad arca vibhāvaso |
 5.025.07c mahiṣīva tvad rayis tvad vājā ud irate ||
 5.025.08a tava dyumanto arcayo grāvevocyate bṛhat |
 5.025.08c uto te tanyatur yathā svāno arta tmanā divaḥ ||
 5.025.09a evāṃ agniṃ vasūyavaḥ sahasānaṃ vavandima |
 5.025.09c sa no viśvā ati dviṣaḥ paśan nāveva sukratuḥ ||

5.026.01a agne pāvaka rociṣā mandrayā deva jihvayā |
 5.026.01c ā devān vakṣi yakṣi ca ||
 5.026.02a taṃ tvā ghṛtasnav īmahe citrabhāno svardṛśam |
 5.026.02c devāṃ ā vītaye vaha ||
 5.026.03a vītihotraṃ tvā kave dyumantaṃ sam idhīmahi |
 5.026.03c agne bṛhantam adhvare ||
 5.026.04a agne viśvebhir ā gahi devebhir havypadātaye |
 5.026.04b hotāraṃ tvā vṛṇīmahe ||
 5.026.05a yajamānāya sunvata āgne suvīryaṃ vaha |
 5.026.05c devair ā satsi barhiṣi ||
 5.026.06a samidhānaḥ sahasrajid agne dharmāni puṣyasi |
 5.026.06c devānāṃ dūta ukthyaḥ ||
 5.026.07a ny agniṃ jātavedasaṃ hotravāhaṃ yaviṣṭhyam |
 5.026.07c dadhātā devam ṛtvijam ||
 5.026.08a pra yajña etv ānuṣag adyā devavyacastamaḥ |
 5.026.08c strṇīta barhir āsade ||
 5.026.09a edam maruto aśvinā mitraḥ sīdantu varuṇaḥ |
 5.026.09c devāsaḥ sarvayā viśā ||

5.027.01a anasvantā satpatir māmaha me gāvā cetiṣṭho asuro maghonaḥ |
 5.027.01c traivṛṣṇo agne daśabhiḥ sahasrair vaiśvānara tryaruṇaś ciketa ||
 5.027.02a yo me śatā ca viṃśatiṃ ca gonāṃ harī ca yukta sudhurā dadāti |
 5.027.02c vaiśvānara suṣṭuto vāvṛdhāno 'gne yacha tryaruṇāya śarma ||
 5.027.03a evā te agne sumatiṃ cakāno naviṣṭhāya navamaṃ trasadasyuḥ |
 5.027.03c yo me giras tuvijātasya pūrvīr yuktenābhi tryaruṇo gṛṇāti ||
 5.027.04a yo ma iti pravocaty aśvamedhāya sūraye |
 5.027.04b dadad ṛcā saniṃ yate dadan medhām ṛtāyate ||
 5.027.05a yasya mā paruṣāḥ śatam uddharṣayanty ukṣaṇaḥ |
 5.027.05c aśvamedhasya dānāḥ somā iva tryāśiraḥ ||
 5.027.06a indrāgni śatadāvny aśvamedhe suvīryam |
 5.027.06c kṣatraṃ dhārayatam bṛhad divi sūryam ivājaram ||

5.028.01a samiddho agnir divi śocir aśret pratyaññ uṣasam urviyā vi bhāti |
 5.028.01c eti prācī viśvavārā namobhir devāṃ iḍānā haviṣā ghṛtācī ||
 5.028.02a samidhyamāno amṛtasya rājasi haviṣ kṛṇvantaṃ sacase svastaye |

5.028.02c viśvaṃ sa dhatte draviṇaṃ yam invasy ātithyam agne ni ca dhatta it puraḥ ||
 5.028.03a agne śardha mahate saubhagāya tava dyumnāny uttamāni santu |
 5.028.03c saṃ jāspatyam suyamam ā kṛṇuṣva śatrūyatām abhi tiṣṭhā mahāṃsi ||
 5.028.04a samiddhasya pramaḥaso 'gne vande tava śriyam |
 5.028.04c vṛṣabho dyumnavāṃ asi sam adhvareshv idhyase ||
 5.028.05a samiddho agna āhuta devān yakṣi svadhvara |
 5.028.05c tvam hi havyvavāḍ asi ||
 5.028.06a ā juhota duvasyatāgnim prayaty adhvareshv |
 5.028.06c vṛṇidhvaṃ havyvavāhanam ||

5.029.01a try aryamā manuṣo devatātā trī rocanā divyā dhārayanta |
 5.029.01c arcanti tvā marutaḥ pūtakṣās tvam eṣāṃ ṛṣir indrāsi dhīraḥ ||
 5.029.02a anu yad im maruto mandasānam ārcann indram papivāṃsaṃ sutasya |
 5.029.02c ādatta vajram abhi yad ahim hann apo yahvīr asṛjat sartavā u ||
 5.029.03a uta brahmāno maruto me asyendraḥ somasya suṣutasya peyāḥ |
 5.029.03c tad dhi havyam manuṣe gā avindad ahann ahim papivāṃ indro asya ||
 5.029.04a ād rodasī vitaram vi śkabhāyat saṃvivyanāś cid bhiyase mṛgaṃ kaḥ |
 5.029.04c jigartim indro apajargurāṇaḥ prati śvasantam ava dānavam han ||
 5.029.05a adha kratvā maghavan tubhyam devā anu viśve adaduḥ somapeyam |
 5.029.05c yat sūryasya haritaḥ patantiḥ puraḥ satir uparā etaśe kaḥ ||
 5.029.06a nava yad asya navatiṃ ca bhogān sākam vajreṇa maghavā vivṛscat |
 5.029.06c arcantīndram marutaḥ sadhasthe traīṣṭubhena vacasā bādhatta dyām ||
 5.029.07a sakhā sakhye apacat tūyam agnir asya kratvā mahiṣā trī śatāni |
 5.029.07c trī sākam indro manuṣaḥ sarāṃsi sutam pibad vṛtrahatyāya somam ||
 5.029.08a trī yac chatā mahiṣāṇām agho māś trī sarāṃsi maghavā somyāpāḥ |
 5.029.08c kāram na viśve ahvanta devā bharam indrāya yad ahim jaghāna ||
 5.029.09a uśanā yat sahasyair ayātam gṛham indra jūjuvānebhīr aśvaiḥ |
 5.029.09c vanvāno atra saratham yayātha kutsena devair avanor ha śuṣṇam ||
 5.029.10a prānyac cakram avṛhaḥ sūryasya kutsāyānyad varivo yātave 'kaḥ |
 5.029.10c anāso dasyūmṛ amṛṇo vadhena ni duryoṇa āvṛṇaṃ mṛdhravācaḥ ||
 5.029.11a stomāśas tvā gaurivīter avardhann arandhayo vaidathināya piprum |
 5.029.11c ā tvām ṛjīsvā sakhyāya cakre pacan paktir apibaḥ somam asya ||
 5.029.12a navagvāsaḥ sutasomāśa indram daśagvāso abhy arcanty arkaiḥ |
 5.029.12c gavyam cid ūrvam apidhānavantaṃ taṃ cin naraḥ śaśamānā apa vran ||
 5.029.13a kathyo nu te pari carāni vidvān vīryā maghavan yā cakartha |
 5.029.13c yā co nu navyā kṛṇavaḥ śaviṣṭha pred u tā te vidatheṣu bravāma ||
 5.029.14a etā viśvā cakṛvāṃ indra bhūry aparito januṣā vīryeṇa |
 5.029.14c yā cin nu vajrin kṛṇavo dadhṛṣvān na te vartā taviṣyā asti tasyāḥ ||
 5.029.15a indra brahma kriyamānā juṣasva yā te śaviṣṭha navyā akarma |
 5.029.15c vastreva bhadrā sukṛtā vasūyū ratham na dhīraḥ svapā atakṣam ||

5.030.01a kva sya vīraḥ ko apaśyad indram sukharatham iyamānam haribhyām |
 5.030.01c yo rāyā vajrī sutasomam ichan tad oko gantā puruhūta ūti ||
 5.030.02a avācacakṣam padam asya sasvar ugram nidhātur anv āyam ichan |
 5.030.02c aprcham anyāṃ uta te ma āhur indram naro bubudhānā aśema ||
 5.030.03a pra nu vayam sute yā te kṛtānindra bravāma yāni no jujoṣaḥ |
 5.030.03b vedad avidvāñ chṛṇavac ca vidvān vahate 'yam maghavā sarvasenaḥ ||

5.030.04a sthiram manaś cakṛṣe jāta indra veṣid eko yudhaye bhūyasaś cit |
 5.030.04b aśmānaṃ cic chavasā didyuto vi vido gavām ūrvam usriyāṇām ||
 5.030.05a paro yat tvam parama ājaniṣṭhāḥ parāvati śrutyam nāma bibhrat |
 5.030.05c ataś cid indrād abhayanta devā viśvā apo ajayad dāsapatniḥ ||
 5.030.06a tubhyed ete marutaḥ suśevā arcanty arkam sunvanty andhaḥ |
 5.030.06c ahim ohānam apa āśayānam pra māyābhir māyinaṃ sakṣad indraḥ ||
 5.030.07a vi ṣū mṛdho januṣā dānam invann ahan gavā maghavan saṃcakānaḥ |
 5.030.07c atrā dāsasya namuceḥ śiro yad avartayo manave gātum ichan ||
 5.030.08a yujaṃ hi mām akṛthā ād id indra śiro dāsasya namucer mathāyan |
 5.030.08c aśmānaṃ cit svaryam vartamānam pra cakriyeva rodasī marudbhyaḥ ||
 5.030.09a striyo hi dāsa āyudhāni cakre kim mā karann abalā asya senāḥ |
 5.030.09c antar hy akhyad ubhe asya dhene athopa praid yudhaye dasyum indraḥ ||
 5.030.10a sam atra gāvo 'bhito 'navanteheha vatsair viyutā yad āsan |
 5.030.10c saṃ tā indro aśṛjad asya śākair yad im somasaḥ suṣutā amandan ||
 5.030.11a yad im somā babhrudhūtā amandann aroravid vṛṣabhaḥ sādaneṣu |
 5.030.11c puraṃdaraḥ papivāṃ indro asya punar gavām adadād usriyāṇām ||
 5.030.12a bhadram idaṃ ruśamā agne akran gavāṃ catvāri dadataḥ sahasrā |
 5.030.12c ṛṇaṃcayasya prayatā maghāni praty agrabhīṣma nṛtamasya nṛṇām ||
 5.030.13a supeśasam māva sṛjanty astaṃ gavāṃ sahasrai ruśamāso agne |
 5.030.13c tivrā indram amamanduḥ sutāso 'ktor vyuṣṭau paritakmyāyāḥ ||
 5.030.14a auchat sā rātrī paritakmyā yāṃ ṛṇaṃcaye rājani ruśamānām |
 5.030.14c atyo na vāji raghur ajyamāno babhrus catvāry asanat sahasrā ||
 5.030.15a catuḥsahasraṃ gavyasya paśvaḥ praty agrabhīṣma ruśameṣv agne |
 5.030.15c gharmaś cit taptaḥ pravṛje ya āsīd ayasmayas taṃ v ādāma viprāḥ ||

5.031.01a indro rathāya pravataṃ kṛṇoti yam adhyasthān maghavā vājayantam |
 5.031.01c yūtheva paśvo vy unoti gopā aṛiṣṭo yāti prathamāḥ siṣāsan ||
 5.031.02a ā pra drava harivo mā vi venāḥ piśaṅgarāte abhi naḥ sacasva |
 5.031.02c nahi tvad indra vasyo anyad asty amenāṃś cij janivataś cakartha ||
 5.031.03a ud yat sahaḥ sahasa ājaniṣṭa dediṣṭa indra indriyāṇi viśvā |
 5.031.03c prācodayat sudughā vavre antar vi jyotiṣā saṃvavṛtvat tamo 'vaḥ ||
 5.031.04a anavas te ratham aśvāya takṣan tvaṣṭā vajram puruhūta dyumantam |
 5.031.04c brahmāṇa indram mahayanto arkair avardayann ahaye hantavā u ||
 5.031.05a vṛṣṇe yat te vṛṣaṇo arkam arcān indra grāvāṇo aditiḥ sajoṣāḥ |
 5.031.05c anaśvāso ye pavayo 'rathā indreṣitā abhy avartanta dasyūn ||
 5.031.06a pra te pūrvāni karaṇāni vocam pra nūtanā maghavan yā cakartha |
 5.031.06c śaktivo yad vibharā rodasī ubhe jayann apo manave dānucitrāḥ ||
 5.031.07a tad in nu te karaṇam dasma viprāhiṃ yad ghnann ojo atrāmimithāḥ |
 5.031.07c śuṣṇasya cit pari māyā agrbhñāḥ prapitvaṃ yann apa dasyūṃr asedhaḥ ||
 5.031.08a tvam apo yadave turvaśāyāramayaḥ sudughāḥ pāra indra |
 5.031.08c ugram ayātam avaho ha kutsaṃ saṃ ha yad vām uśanāranta devāḥ ||
 5.031.09a indrākutsā vahamānā rathenā vām atyā api karṇe vahantu |
 5.031.09c niḥ ṣim adbhyo dhamatho niḥ ṣadhasthān maghono hṛdo varathas tamāṃsi ||
 5.031.10a vātasya yuktān suyujaś cid aśvān kaviś cid eṣo ajagann avasyuḥ |
 5.031.10c viśve te atra marutaḥ sakhāya indra brahmāṇi taviṣim avaradhan ||
 5.031.11a sūraś cid ratham paritakmyāyām pūrvam karad uparam jūjuvāṃsam |
 5.031.11c bharaḥ cakram etaśaḥ saṃ riṇāti puro dadhat saniṣyati kratum naḥ ||
 5.031.12a āyam janā abhicakṣe jagāmendraḥ sakhāyam sutasomam ichan |

5.031.12c vadan grāvāva vedim bhriyāte yasya jīram adhvaryavaś caranti ||
5.031.13a ye cākananta cākananta nū te martā amṛta mo te aṃha āran |
5.031.13c vāvandhi jajyūmr uta teṣu dhehy ojo janeṣu yeṣu te syāma ||

5.032.01a adardar utsam aṣṛjo vi khāni tvam arṇavān badbadhānām aramṇāḥ |
5.032.01c mahāntam indra parvataṃ vi yad vaḥ sṛjo vi dhārā ava dānavam han ||
5.032.02a tvam utsām ṛtubhir badbadhānām aramḥa ūdhaḥ parvatasya vajrin |
5.032.02c ahiṃ cid ugra prayutaṃ śayānam jaghanvām indra taviṣim adhatthāḥ ||
5.032.03a tyasya cin mahato nir mṛgasya vadhar jaghāna taviṣibhir indraḥ |
5.032.03c ya eka id apratir manyamāna ād asmād anyo ajaniṣṭa tavyān ||
5.032.04a tyam cid eṣam svadhayā madantam miho napātam suvṛdham tamogām |
5.032.04c vṛṣaprabharmā dānavasya bhāmam vajreṇa vajrī ni jaghāna śuṣṇam ||
5.032.05a tyam cid asya kratubhir niṣattam amarmaṇo vidad id asya marma |
5.032.05c yad im suksatra prabhṛtā madasya yuyutsantaṃ tamasi harmye dhāḥ ||
5.032.06a tyam cid itthā katpayam śayānam asūrye tamasi vāvṛdhānam |
5.032.06c tam cin mandāno vṛṣabhaḥ sutasyocair indro apagūryā jaghāna ||
5.032.07a ud yad indro mahate dānavāya vadhar yamiṣṭa saho apratitam |
5.032.07c yad im vajrasya prabhṛtau dadābha viśvasya jantor adhamam cakāra ||
5.032.08a tyam cid arṇam madhupaṃ śayānam asinvaṃ vavram mahy ādad ugraḥ |
5.032.08c apādam atram mahatā vadhena ni duryoṇa āvṛṇaṃ mṛdhavācam ||
5.032.09a ko asya śuṣmam taviṣim varāta eko dhanā bharate apratitaḥ |
5.032.09c ime cid asya jrayaso nu devī indrasya ujaso bhiasā jihāte ||
5.032.10a ny asmai devī svadhitiṛ jihīta indrāya gātur uśatīva yeme |
5.032.10c sam yad ojo yuvate viśvam ābhir anu svadhāvne kṣitayo namanta ||
5.032.11a ekaṃ nu tvā satpatim pāñcajanyaṃ jātam śṛṇomi yaśasam janeṣu |
5.032.11c tam me jagṛbhra āśaso naviṣṭham doṣā vastor havamānāsa indram ||
5.032.12a evā hi tvām ṛtuthā yātayantam maghā viprebhyo dadatam śṛṇomi |
5.032.12c kiṃ te brahmāṇo gṛhate sakhāyo ye tvāyā nidadhuḥ kāmam indra ||

5.033.01a mahi mahe tavase didhye nṛn indrayetthā tavase atavyān |
5.033.01c yo asmai sumatiṃ vājasātau stuto jane samaryaś ciketa ||
5.033.02a sa tvam na indra dhyasāno arkair harīnām vṛṣan yoktram aśreḥ |
5.033.02c yā itthā maghavann anu joṣam vakṣo abhi prāryaḥ sakṣi janān ||
5.033.03a na te ta indrābhy asmad ṛṣvāyuktāso abrahmatā yad asan |
5.033.03c tiṣṭhā ratham adhi tam vajrahastā raśmiṃ deva yamase svaśvaḥ ||
5.033.04a purū yat ta indra santy ukthā gave cakarhorvarāsu yudhyan |
5.033.04c tatakṣe sūryāya cid okasi sve vṛṣā samatsu dāsasya nāma cit ||
5.033.05a vyaṃ te ta indra ye ca naraḥ śardho jajñānā yātās ca rathāḥ |
5.033.05c āsmāñ jagamyād ahiśuṣma satvā bhago na havyaḥ prabhṛtheṣu cāruḥ ||
5.033.06a papṛkṣeṇyam indra tve hy ojo nṛmṇāni ca nṛtamāno amartaḥ |
5.033.06c sa na eniṃ vasavāno rayiṃ dāḥ prārya stuṣe tuvimaghasya dānam ||
5.033.07a evā na indrotibhir ava pāhi gṛṇataḥ śūra kārūn |
5.033.07c uta tvacaṃ dadato vājasātau piprihi madhvaḥ suṣutasya cāroḥ ||
5.033.08a uta tye mā paurukutsyasya sūres trasadasyor hiraṇino rarāṇāḥ |
5.033.08c vahantu mā daśa śyetāso asya gairikṣitasya kratubhir nu saśce ||
5.033.09a uta tye mā mārutāśvasya śoṇāḥ kratvāmaghāso vidathasya rātau |
5.033.09c sahasrā me cyavatāno dadāna ānūkam aryo vapuṣe nārcat ||

5.033.10a uta tye mā dhvanyasya juṣṭā lakṣmaṇyasya suruco yatānāḥ |
5.033.10c mahnā rāyaḥ saṃvarāṇasya ṛṣer vrajaṃ na gāvaḥ prayatā api gman ||

5.034.01a ajātaśatrum ajarā svarvaty anu svadhāmitā dasmam iyate |
5.034.01c sunotana pacata brahmavāhase puruṣtutāya prataraṃ dadhātana ||
5.034.02a ā yaḥ somena jaṭharam apipratāmandata maghavā madhvo andhasaḥ |
5.034.02c yad im mṛgāya hantave mahāvadhāḥ sahasrabhr̥ṣṭim uśanā vadhaṃ yamat ||
5.034.03a yo asmai ghraṃsa uta vā ya ūdhani somaṃ sunoti bhavati dyumāṃ aha |
5.034.03c apāpa śakras tatanuṣṭim ūhati tanūśubhram maghavā yaḥ kavāsakhaḥ ||
5.034.04a yasyāvadhīt pitaraṃ yasya mātaraṃ yasya śakro bhr̥taraṃ nāta ṛṣate |
5.034.04c vetīd v asya prayatā yataṃkaro na kilbiṣād ṛṣate vasva ākaraḥ ||
5.034.05a na pañcabhir daśabhir vaṣṭy ārabhaṃ nāsunvatā sacate puṣyatā cana |
5.034.05c jināti ved amuyā hanti vā dhunir ā devayum bhajati gomati vraje ||
5.034.06a vitvakṣaṇaḥ samṛtau cakramāsajo 'sunvato viṣuṇaḥ sunvato vṛdhaḥ |
5.034.06c indro viśvasya damitā vibhīṣaṇo yathāvaśaṃ nayati dāsam āryaḥ ||
5.034.07a sam im paṇer ajati bhojanam muṣe vi dāsūṣe bhajati sūnaraṃ vasu |
5.034.07c durge cana dhriyate viśva ā puru jano yo asya taviṣim acukrudhat ||
5.034.08a saṃ yaj janau sudhanau viśvaśardhasāv aved indro maghavā goṣu śubhriṣu |
5.034.08c yujaṃ hy anyam akṛta pravepany ud im gavyaṃ sṛjate satvabhir dhuniḥ ||
5.034.09a sahasrasām āgniveṣim gṛṇīṣe śatrim agna upamām ketum aryaḥ |
5.034.09c tasmā āpaḥ saṃyataḥ pīpayanta tasmin kṣatram amavat tveṣam astu ||

5.035.01a yas te sādhiṣṭho 'vasa indra kratuṣ ṭam ā bhara |
5.035.01c asmabhyaṃ carṣaṇīsaḥ sasniṃ vājeṣu duṣṭaram ||
5.035.02a yad indra te catasro yac chūra santi tisraḥ |
5.035.02c yad vā pañca kṣitīnām avas tat su na ā bhara ||
5.035.03a ā te 'vo vareṇyaṃ vṛṣantamasya hūmahe |
5.035.03c vṛṣajūtir hi jajñīṣa ābhūbhir indra turvaṇiḥ ||
5.035.04a vṛṣā hy asi rādhase jajñīṣe vṛṣṇi te śavaḥ |
5.035.04c svakṣatram te dhṛṣan manaḥ satrāham indra paumṣyam ||
5.035.05a tvam tam indra martyam amitrayantam adrivaḥ |
5.035.05c sarvarathā śatakrato ni yāhi śavasas pate ||
5.035.06a tvām id vṛtrahantama janāso vṛktabarhiṣaḥ |
5.035.06c ugram pūrvīṣu pūrvyaṃ havante vājasātaye ||
5.035.07a asmākam indra duṣṭaram puroyāvānam ājiṣu |
5.035.07c sayāvānaṃ dhane-dhane vājayantam avā ratham ||
5.035.08a asmākam indrehi no ratham avā puramḍhyā |
5.035.08c vayaṃ śaviṣṭha vāryaṃ divi śravo dadhīmahi divi stomam manāmahe ||

5.036.01a sa ā gamad indro yo vasūnām ciketad dātum dāmano rayiṇām |
5.036.01c dhanvacaro na vamsagas tr̥ṣāṇaś cakamānaḥ pibatu dugdham amśum ||
5.036.02a ā te hanū harivaḥ sūra śipre ruhat somo na parvatasya pṛṣṭhe |
5.036.02c anu tvā rājann arvato na hinvan gīrbhir madema puruhūta viśve ||
5.036.03a cakram na vṛttam puruhūta vepate mano bhiyā me amater id adrivaḥ |
5.036.03c rathād adhi tvā jaritā sadāvṛdha kuvin nu stoṣan maghavan purūvasuḥ ||
5.036.04a eṣa grāveva jaritā ta indreyarti vācam bṛhad āśuṣāṇaḥ |

5.036.04c pra savyena maghavan yamsi rāyaḥ pra dakṣiṇid dharivo mā vi venah |
 5.036.05a vṛṣā tvā vṛṣaṇam vardhatu dyaur vṛṣā vṛṣabhyām vahase haribhyām |
 5.036.05c sa no vṛṣā vṛṣarathaḥ suśipra vṛṣakrato vṛṣā vajrin bhare dhāḥ ||
 5.036.06a yo rohitau vājinau vājinivān tribhiḥ śataiḥ sacamānāv adīṣṭa |
 5.036.06c yūne sam asmai kṣitayo namantām śrutarathāya maruto duvoyā ||

5.037.01a sam bhānunā yatate sūryasyājuhvāno ghṛtapṛṣṭhaḥ svañcāḥ |
 5.037.01c tasmā amṛdhrā uṣaso vy uchān ya indrāya sunavāmety āha ||
 5.037.02a samiddhāgnir vanavat stīrṇabarhir yuktagrāvā sutasomo jarāte |
 5.037.02c grāvāṇo yasyeṣiram vadanty ayad adhvaryur haviṣāva sindhum ||
 5.037.03a vadhūr iyam patim ichanty eti ya im vahāte mahiṣim iṣirām |
 5.037.03c āsya śravasyād ratha ā ca ghoṣāt purū sahasrā pari vartayāte ||
 5.037.04a na sa rājā vyathate yasminn indras tīvram somam pibati gosakhāyam |
 5.037.04c ā satvanair ajati hanti vṛtram kṣeti kṣitīḥ subhago nāma puṣyan ||
 5.037.05a puṣyāt kṣeme abhi yoge bhavāty ubhe vṛtau samyatī sam jayāti |
 5.037.05c priyaḥ sūrye priyo agnā bhavāti ya indrāya sutasomo dadāsat ||

5.038.01a uroṣ ṭa indra rādhaso vibhvī rātiḥ śatakrato |
 5.038.01c adhā no viśvacarṣaṇe dyumnā sukṣatra maṃhaya ||
 5.038.02a yad im indra śravāyyam iṣam śaviṣṭha dadhiṣe |
 5.038.02c paprathe dīrghaśruttamaṃ hiraṇyavarṇa duṣṭaram ||
 5.038.03a śuṣmāso ye te adrivo mehanā ketasāpaḥ |
 5.038.03c ubhā devāv abhiṣṭaye divas ca gmaś ca rājathaḥ ||
 5.038.04a uto no asya kasya cid dakṣasya tava vṛtrahan |
 5.038.04c asmabhyam nṛmṇam ā bharāsmabhyam nṛmaṇasyase ||
 5.038.05a nū ta ābhir abhiṣṭibhis tava śarmañ chatakrato |
 5.038.05c indra syāma sugopāḥ sūra syāma sugopāḥ ||

5.039.01a yad indra citra mehanāsti tvādātam adrivaḥ |
 5.039.01c rādhas tan no vidadvasa ubhayāhasty ā bhara ||
 5.039.02a yan manyase vareṇyam indra dyukṣam tad ā bhara |
 5.039.02c vidyāma tasya te vayam akūpārasya dāvane ||
 5.039.03a yat te ditsu prarādhyam mano asti śrutam bṛhat |
 5.039.03c tena dṛdhā cid adriva ā vājam darṣi sātaye ||
 5.039.04a maṃhiṣṭham vo maghonām rājānam carṣaṇinām |
 5.039.04c indram upa praśastaye pūrvibhir jujūṣe giraḥ ||
 5.039.05a asmā it kāvyam vaca uktham indrāya śaṃsyam |
 5.039.05c tasmā u brahmavāhase giro vardhanty atrayo giraḥ śumbhanty atrayaḥ ||

5.040.01a ā yāhy adribhiḥ sutam somam somapate piba |
 5.040.01c vṛṣann indra vṛṣabhir vṛtrahantama ||
 5.040.02a vṛṣā grāvā vṛṣā mado vṛṣā somo ayam sutaḥ |
 5.040.02c vṛṣann indra vṛṣabhir vṛtrahantama ||
 5.040.03a vṛṣā tvā vṛṣaṇam huve vajriṇ citrābhir ūtibhiḥ |
 5.040.03c vṛṣann indra vṛṣabhir vṛtrahantama ||

5.040.04a ṛjīṣi vajrī vṛṣabhas turāṣāt chuṣmī rājā vṛtrahā somapāvā |
 5.040.04c yuktvā haribhyām upa yāsad arvāñ mādhyam̐dine savane matsad indrah ||
 5.040.05a yat tvā sūrya svarbhānus tamasāvidhyad āsuraḥ |
 5.040.05c akṣetravid yathā mugdho bhuvanāny adīdhayuḥ ||
 5.040.06a svarbhānor adha yad indra māyā avo divo vartamānā avāhan |
 5.040.06c gūḍham sūryam̐ tamasāpavratena turīyeṇa brahmaṇāvindad atriḥ ||
 5.040.07a mā mām imaṃ tava santam atra irasyā drugdho bhiyasā ni gārīt |
 5.040.07c tvam mitro asi satyarādhās tau mehāvataṃ varuṇas ca rājā ||
 5.040.08a grāvṇo brahmā yuyujānaḥ saparyan kīriṇā devān namasopaśikṣan |
 5.040.08c atriḥ sūryasya divi cakṣur ādhāt svarbhānor apa māyā aghukṣat ||
 5.040.09a yaṃ vai sūryam̐ svarbhānus tamasāvidhyad āsuraḥ |
 5.040.09c atrayas tam anv avindan nahy anye aśaknuvan ||

5.041.01a ko nu vām mitrāvaruṇāv ṛtāyan divo vā mahaḥ pārthivasya vā de |
 5.041.01c ṛtasya vā sadasi trāsithām̐ no yajñāyate vā paśuṣo na vājān ||
 5.041.02a te no mitro varuṇo aryamāyur indra ṛbhukṣā maruto juṣanta |
 5.041.02c namobhir vā ye dadhate suvṛktiṃ stomaṃ rudrāya miḍhuṣe sajoṣāḥ ||
 5.041.03a ā vām yeṣṭhāsvinā huvadhyai vātasya patman rathyasya puṣṭau |
 5.041.03c uta vā divo asurāya manma prāndhāmsīva yajyave bharadhvam ||
 5.041.04a pra sakṣaṇo divyaḥ kaṇvahotā trito divaḥ sajoṣā vāto agniḥ |
 5.041.04c pūṣā bhagaḥ prabhṛthe viśvabhojā ājiṃ na jagmur āśvaśvatamāḥ ||
 5.041.05a pra vo rayiṃ yuktāśvam bharadhvam̐ rāya eṣe 'vase dadhīta dhīḥ |
 5.041.05c suśeva evair auśijasya hotā ye va evā marutas turāṇām ||
 5.041.06a pra vo vāyumuṃ rathayujam̐ kṛṇudhvam̐ pra devaṃ vipram panitāram arkaiḥ |
 5.041.06c iṣudhyava ṛtasāpaḥ puram̐dhīr vasvīr no atra patnīr ā dhiye dhuḥ ||
 5.041.07a upa va eṣe vandyebhiḥ sūṣaiḥ pra yahvī divas citayadbhir arkaiḥ |
 5.041.07c uśāsānaktā viduṣīva viśvam̐ ā hā vahato martyāya yajñam ||
 5.041.08a abhi vo arce poṣyāvato nīṇ vāstoṣ patim̐ tvaṣṭāram̐ rarāṇaḥ |
 5.041.08c dhanyā sajoṣā dhiṣaṇā namobhir vanaspatim̐r ośadhī rāya eṣe ||
 5.041.09a tuje nas tane parvatāḥ santu svaitavo ye vasavo na vīrāḥ |
 5.041.09c panita āptyo yajataḥ sadā no vardhān naḥ śamsam̐ naryo abhiṣṭau ||
 5.041.10a vṛṣṇo astoṣi bhūmyasya garbham̐ trito napātam̐ apām̐ suvṛkti |
 5.041.10c gṛṇīte agnir etarī na sūṣaiḥ śociṣkeśo ni riṇāti vanā ||
 5.041.11a kathā mahe rudriyāya bravāma kad rāye cikituṣe bhagāya |
 5.041.11c āpa ośadhīr uta no 'vantu dyaur vanā girayo vṛkṣakeśāḥ ||
 5.041.12a śṛṇotu na ūrjām̐ patir girāḥ sa nabhas tarīyāṃ iṣiraḥ pariḥmā |
 5.041.12c śṛṇvantv āpaḥ puro na śubhrāḥ pari sruco babṛhāṇasyādreḥ ||
 5.041.13a vidā cin nu mahānto ye va evā bravāma dasmā vāryam̐ dadhānāḥ |
 5.041.13c vayasā cana subhva āva yanti kṣubhā martam̐ anuyataṃ vadhasnaiḥ ||
 5.041.14a ā daivyāni pārthivāni janmāpaś cāchā sumakhāya vocam |
 5.041.14c vardhantām̐ dyāvo girasā candrāgrā udā vardhantām̐ abhiṣātā arṇāḥ ||
 5.041.15a pade-pade me jarimā ni dhāyi varūtrī vā śakrā yā pāyubhiś ca |
 5.041.15c siṣaktu mātā mahī rasā naḥ smat sūribhir ṛjuhasta ṛjuvaniḥ ||
 5.041.16a kathā dāsēma namasā sudānūn evayā maruto achoktau praśravaso maruto
 achoktau |
 5.041.16c mā no 'hir budhnyo riṣe dhād asmākam̐ bhūd upamātivaniḥ ||
 5.041.17a iti cin nu prajāyai paśumatyai devāso vanate martyo va ā devāso vanate martyo
 vaḥ |

- 5.041.17c atrā śivāṃ tanvo dhāsim asyā jarāṃ cin me nirṛtir jagrasīta ||
5.041.18a tāṃ vo devāḥ sumatim ūrjayantim iṣam aśyāma vasavaḥ śasā goḥ |
5.041.18c sā naḥ sudānur mṛḍayanti devī prati dravantī suvitāya gamyāḥ ||
5.041.19a abhi na iḍā yūthasya mātā sman nadībhir urvaśī vā gṛṇātu |
5.041.19c urvaśī vā bṛhaddivā gṛṇānābhyūrṇvānā prabhṛthasyāyoḥ ||
5.041.20a siṣaktu na ūrjavyasya puṣṭeḥ |
- 5.042.01a pra śamtamā varuṇaṃ dīdhitī gīr mitram bhagam aditiṃ nūnam aśyāḥ |
5.042.01c pṛṣadyoniḥ pañcahotā śṛṇotv atūrtapanthā asuro mayobhuḥ ||
5.042.02a prati me stomam aditir jagṛbhyāt sūnum na mātā hr̥dyam suśevam |
5.042.02c brahma priyaṃ devahitaṃ yad asty aham mitre varuṇe yan mayobhu ||
5.042.03a ud iraya kavitaṃ kavīnām unattainam abhi madhvā gṛṭena |
5.042.03c sa no vasūni prayatā hitāni candrāṇi devaḥ savitā suvāti ||
5.042.04a sam indra ṇo manasā neṣi gobhiḥ saṃ sūribhir harivaḥ saṃ svasti |
5.042.04c sam brahmaṇā devahitaṃ yad asti saṃ devānām sumatyā yajñiyānām ||
5.042.05a devo bhagaḥ savitā rāyo amśa indro vṛtrasya saṃjito dhanānām |
5.042.05c ṛbhukṣā vāja uta vā puraṃdhir avantu no amṛtāsas turāsaḥ ||
5.042.06a marutvato apratītasya jiṣṇor ajūryataḥ pra bravāmā kṛtāni |
5.042.06c na te pūrve maghavan nāparāso na vīryam nūtanāḥ kaś canāpa ||
5.042.07a upa stuhi prathamam ratnadheyam bṛhaspatiṃ sanitāram dhanānām |
5.042.07c yaḥ śamsate stuvate śambhaviṣṭhaḥ purūvasur āgamaj johuvānam ||
5.042.08a tavotibhiḥ sacamānā ariṣṭā bṛhaspate maghavānaḥ suvīrāḥ |
5.042.08c ye aśvadā uta vā santi godā ye vastradāḥ subhagās teṣu rāyaḥ ||
5.042.09a visarmāṇam kṛṇuhi vittam eṣāṃ ye bhuñjate aprṇanto na ukthaiḥ |
5.042.09c apavratān prasave vāvṛdhānān brahmadviṣaḥ sūryād yāvayasva ||
5.042.10a ya ohate rakṣaso devavitāv acakrebhis tam maruto ni yāta |
5.042.10c yo vaḥ śamiṃ śaśamānasya nindāt tuchyān kāmān karate siṣvidānaḥ ||
5.042.11a tam u ṣṭuhi yaḥ sviṣuḥ sudhanvā yo viśvasya kṣayati bheṣajasya |
5.042.11c yakṣvā mahe saumanasāya rudraṃ namobhir devam asuraṃ duvasya ||
5.042.12a damūnaso apaso ye suhastā vṛṣṇaḥ patnīr nadyo vibhvataṣṭāḥ |
5.042.12c sarasvatī bṛhaddivota rākā daśasyantīr varivasyantu śubhrāḥ ||
5.042.13a pra sū mahe suśaraṇāya medhām giram bhare navyasiṃ jāyamānām |
5.042.13c ya āhanā duhitur vakṣaṇāsu rūpā mināno akṛṇod idam naḥ ||
5.042.14a pra suṣṭuti stanayantaṃ ruvantam iḍas patiṃ jaritar nūnam aśyāḥ |
5.042.14c yo abdimāṃ udanimāṃ iyarti pra vidyutā rodasī ukṣamāṇaḥ ||
5.042.15a eṣa stomo mārutaṃ śardho achā rudrasya sūnūṃr yuvanyūṃr ud aśyāḥ |
5.042.15c kāmo rāye havate mā svasty upa stuhi pṛsadaśvām̐ ayāsaḥ ||
5.042.16a praiṣa stomaḥ pṛthivīm antarikṣam vanaspatiṃ oṣadhī rāye aśyāḥ |
5.042.16c devo-devaḥ suhavo bhūtu mahyam mā no mātā pṛthivī durmatau dhāt ||
5.042.17a urau devā anibādhe syāma |
5.042.18a sam aśvinor avasā nūtanena mayobhuvā supraṇitī gamema |
5.042.18c ā no rayiṃ vahatam ota vīrān ā viśvāny amṛtā saubhagāni ||
- 5.043.01a ā dhenavaḥ payasā tūrṇyarthā amardhantīr upa no yantu madhvā |
5.043.01c maho rāye bṛhatīḥ sapta vipro mayobhuvo jaritā johavīti ||
5.043.02a ā suṣṭutī namasā vartayadhyai dyāvā vājāya pṛthivī amṛdhre |
5.043.02c pitā mātā madhuvacāḥ suhastā bhare-bhare no yaśasāv aviṣṭām ||

5.043.03a adhvaryavaś cakṛvāṃso madhūni pra vāyave bharata cāru śukram |
 5.043.03c hoteva naḥ prathamah pāhy asya deva madhvo rarimā te madāya ||
 5.043.04a daśa kṣipo yuñjate bāhū adriṃ somasya yā śamitārā suhastā |
 5.043.04c madhvo rasam sugabhastir giriṣṭhām canīscadad duduhe śukram amśuḥ ||
 5.043.05a asāvi te jujuṣānāya somaḥ kratve dakṣāya bṛhate madāya |
 5.043.05c harī rathe sudhurā yoge arvāg indra priyā kṛṇuhi hūyamānaḥ ||
 5.043.06a ā no mahim aramatim sajoṣā gnām devim namasā rātahavyām |
 5.043.06c madhor madāya bṛhatim ṛtajñām āgne vaha pathibhir devayānaiḥ ||
 5.043.07a añjanti yam prathayanto na viprā vapāvantaṃ nāgninā tapantaḥ |
 5.043.07c pitur na putra upasi preṣṭha ā gharmo agnim ṛtayann asādi ||
 5.043.08a achā mahī bṛhatī śamtamā gīr dūto na gantv asvinā huvadhya |
 5.043.08c mayobhuvā sarathā yātam arvāg gantaṃ nidhim dhuram āṇir na nābhim ||
 5.043.09a pra tavyaso namaūktim turasyāham pūṣṇa uta vāyor adikṣi |
 5.043.09c yā rādhasā coditārā matinām yā vājasya draviṇodā uta tman ||
 5.043.10a ā nāmabhir maruto vakṣi viśvān ā rūpebhir jātavedo huvānaḥ |
 5.043.10c yajñam giro jarituḥ suṣṭutim ca viśve ganta maruto viśva ūti ||
 5.043.11a ā no divo bṛhataḥ parvatād ā sarasvatī yajatā gantu yajñam |
 5.043.11c havam devī jujuṣānā ghṛtācī śagmām no vācam uṣatī śṛṇotu ||
 5.043.12a ā vedhasam nilapṛṣṭham bṛhantam bṛhaspatim sadane sādadayadhvam |
 5.043.12c sādadyonim dama ā dīdivāmsam hiraṇyavarṇam aruṣam sapema ||
 5.043.13a ā dharnasir bṛhaddivo rarāṇo viśvebhir gantv omabhir huvānaḥ |
 5.043.13c gnā vasāna oṣadhīr amṛdhras tridhātuśṛṅgo vṛṣabho vayodhāḥ ||
 5.043.14a mātuṣ pade parame śukra āyor vipanyavo rāspirāso agman |
 5.043.14c suśevyam namasā rātahavyāḥ śiśum mṛjanty āyavo na vāse ||
 5.043.15a bṛhad vayo bṛhate tubhyam agne dhiyājuro mithunāsaḥ sacanta |
 5.043.15c devo-devaḥ suhavo bhūtu mahyam mā no mātā pṛthivī durmatau dhāt ||
 5.043.16a urau devā anibādhe syāma |
 5.043.17a sam asvinor avasā nūtanena mayobhuvā supraṇīti gamema |
 5.043.17c ā no rayim vahatam ota virān ā viśvāny amṛtā saubhagāni ||

5.044.01a tam pratnathā pūrvathā viśvathemathā jyeṣṭhatātīm barhiṣadam svarvidam |
 5.044.01c pratīcinam vṛjanaṃ dohase girāśum jayantam anu yāsu vardhase ||
 5.044.02a śriye sudṛśir uparasya yāḥ svar virocāmānaḥ kakubhām acodate |
 5.044.02c sugopā asi na dabhāya suktrato paro māyābhir ṛta āsa nāma te ||
 5.044.03a atyam haviḥ sacate sac ca dhātu cāriṣṭagātuḥ sa hotā saho bhariḥ |
 5.044.03c prasarsrāṇo anu barhir vṛṣā śiśur madhye yuvājaro visruhā hitaḥ ||
 5.044.04a pra va ete suyujo yāmann iṣṭaye nīcīr amuṣmai yanya ṛtāvṛdhaḥ |
 5.044.04c suyantubhiḥ sarvaśāsair abhīsubhiḥ krivir nāmāni pravāṇe muṣāyati ||
 5.044.05a saṃjarbhurāṇas tarubhiḥ sutegrbham vayākinam cittagarbhāsu susvaruḥ |
 5.044.05c dhāravākeṣv ṛjugātha śobhase vardhasva patnīr abhi jīvo adhvaṇe ||
 5.044.06a yādṛg eva dadṛṣe tādṛg ucyate saṃ chāyayā dadhire sidhrayāpsv ā |
 5.044.06c mahim asmabhyam uruṣām uru jrayo bṛhat suviram anapacyutaṃ sahaḥ ||
 5.044.07a vety agrur janivān vā ati spṛdhaḥ samaryatā manasā sūryaḥ kaviḥ |
 5.044.07c ghraṃsam rakṣantam pari viśvato gayam asmākaṃ śarma vanavat svāvasuḥ ||
 5.044.08a jyāyāmsam asya yatunasya ketuna iṣisvaram carati yāsu nāma te |
 5.044.08c yādṛśmin dhāyi tam apasyayā vidad ya u svayam vahate so aram karat ||
 5.044.09a samudram āsām ava tasthe agrimā na riṣyati savanam yasminn āyatā |
 5.044.09c atrā na hārdi kravaṇasya rejate yatrā matir vidyate pūtabandhanī ||

5.044.10a sa hi kṣatrasya manasasya cittibhir evāvadasya yajatasya sadhreḥ |
 5.044.10c avatsārasya sprṇavāma raṇvabhiḥ śaviṣṭhaṃ vājaṃ viduṣā cid ardhyaṃ ||
 5.044.11a śyena āsām aditiḥ kakṣyo mado viśvavārasya yajatasya māyinaḥ |
 5.044.11c sam anyam-anyam arthayanty etave vidur viṣānam paripānam anti te ||
 5.044.12a sadāpṛṇo yajato vi dviṣo vadhīd bāhuvṛktaḥ śrutavit taryo vaḥ sacā |
 5.044.12c ubhā sa varā praty eti bhāti ca yad im gaṇam bhajate suprayāvabhiḥ ||
 5.044.13a sutambharo yajamānasya satpatir viśvāsām ūdhaḥ sa dhiyām udañcanaḥ |
 5.044.13c bharad dhenū rasavac chiśriye payo 'nubruvāṇo adhy eti na svapan ||
 5.044.14a yo jāgāra tam ṛcaḥ kāmayinge yo jāgāra tam u sāmāni yanti |
 5.044.14c yo jāgāra tam ayaṃ soma āha tavāham asmi sakhye nyokāḥ ||
 5.044.15a agnir jāgāra tam ṛcaḥ kāmayinge 'gnir jāgāra tam u sāmāni yanti |
 5.044.15c agnir jāgāra tam ayaṃ soma āha tavāham asmi sakhye nyokāḥ ||

5.045.01a vidā divo viṣyann adrim ukthair āyatyā uṣaso arcino guḥ |
 5.045.01c apāvṛta vrajinīr ut svar gād vi duro mānuṣīr deva āvaḥ ||
 5.045.02a vi sūryo amatim na śriyaṃ sād orvād gavām mātā jānatī gāt |
 5.045.02c dhanvarṇaso nadyaḥ khādoarṇā sthūṇeva sumitā dṛṃhata dyauḥ ||
 5.045.03a asmā ukthāya parvatasya garbho mahinām januṣe pūrvyāya |
 5.045.03c vi parvato jihīta sādḥata dyaur āvivāsanto dasayanta bhūma ||
 5.045.04a sūktebhir vo vacobhir devajuṣṭair indrā nv agnī avase huvadhyaī |
 5.045.04c ukthebhir hi śmā kavayaḥ suyajñā āvivāsanto maruto yajanti ||
 5.045.05a eto nv adya sudhyo bhavāma pra duchunā minavāmā variyaḥ |
 5.045.05c āre dveṣāmsi sanutar dadhāmāyāma prāñco yajamānam acha ||
 5.045.06a etā dhiyaṃ kṛṇavāmā sakhāyo 'pa yā mātām ṛṇuta vrajaṃ goḥ |
 5.045.06c yayā manur viśīsipraṃ jigāya yayā vaṇig vaṅkur āpā purīṣam ||
 5.045.07a anūnod atra hastayato adrir ārcan yena daśa māso navagvāḥ |
 5.045.07c ṛtaṃ yatī saramā gā avindad viśvāni satyāṅgirās cakāra ||
 5.045.08a viśve asyā vyuṣi māhināyāḥ saṃ yad gobhir aṅgirasō navanta |
 5.045.08c utsa āsām parame sadhastha ṛtasya pathā saramā vidad gāḥ ||
 5.045.09a ā sūryo yātu saptāśvaḥ kṣetraṃ yad asyorviyā dīrghayāthe |
 5.045.09c raghuḥ śyenaḥ patayad andho achā yuvā kavir dīdayad goṣu gachan ||
 5.045.10a ā sūryo aruhac chukram arṇo 'yukta yad dharito vītapṛṣṭhāḥ |
 5.045.10c udnā na nāvam anayanta dhīrā āśṛṇvatīr āpo arvāg atiṣṭhan ||
 5.045.11a dhiyaṃ vo apsu dadhiṣe svarṣam yayātaran daśa māso navagvāḥ |
 5.045.11c ayā dhiyā syāma devagopā ayā dhiyā tuturyāmāty aṃhaḥ ||

5.046.01a hayo na vidvām̐ ayuji svayaṃ dhuri tām̐ vahāmi prataranīm̐ avasyuvam |
 5.046.01c nāsya vāsmi vimucaṃ nāvṛtam punar vidvān pathaḥ puraeta ṛju neṣati ||
 5.046.02a agna indra varuṇa mitra devāḥ śardhaḥ pra yanta mārutota viṣṇo |
 5.046.02c ubhā nāsatyā rudro adha gnāḥ pūṣā bhagaḥ sarasvatī juṣanta ||
 5.046.03a indrāgni mitrāvaruṇāditiṃ svaḥ pṛthiviṃ dyām marutaḥ parvatām̐ apaḥ |
 5.046.03c huve viṣṇum pūṣaṇam brahmaṇas patim bhagaṃ nu śamsaṃ savitāram ūtaye ||
 5.046.04a uta no viṣṇur uta vāto asridho draviṇodā uta somo mayas karat |
 5.046.04c uta ṛbhava uta rāye no āsvinota tvaṣṭota vibhvānu maṃsate ||
 5.046.05a uta tyan no mārutaṃ śardha ā gamad divikṣayaṃ yajataṃ barhir āsade |
 5.046.05c bṛhaspatiḥ śarma pūṣota no yamad varūthyaṃ varuṇo mitro aryamā ||
 5.046.06a uta tye naḥ parvatāsaḥ suśastayaḥ suditayo nadyas trāmaṇe bhuvan |

5.046.06c bhago vibhaktā śavasāvasā gamad uruvyacā aditiḥ śrotu me havam ||
5.046.07a devānām patnīr uśatīr avantu naḥ prāvantu nas tujaye vājasātaye |
5.046.07c yāḥ pārthivāso yā apām api vrata tā no devīḥ suhavāḥ śarma yachata ||
5.046.08a uta gnā vyantu devapatnīr indrāṇy agnāy asvinī rāt |
5.046.08c ā rodasī varuṇānī śṛṇotu vyantu devīr ya ṛtur janīnām ||

5.047.01a prayuñjati diva eti bruvāṇā mahī mātā duhitur bodhayanti |
5.047.01c āvivāsanti yuvatir manīṣā pitṛbhya ā sadane johuvānā ||
5.047.02a ajirāsas tadapa iyamānā ātasthivāṃso amṛtasya nābhim |
5.047.02c anantāsa uravo viśvataḥ sīm pari dyāvāpṛthivī yanti panthāḥ ||
5.047.03a ukṣā samudro aruṣaḥ suparṇaḥ pūrvasya yonim pitur ā viveśa |
5.047.03c madhye divo nihitaḥ pṛśnir aśmā vi cakrame rajasaras pāty antau ||
5.047.04a catvāra im bibhrati kṣemayanto daśa garbhaṃ carase dhāpayante |
5.047.04c tridhātavaḥ paramā asya gāvo divas caranti pari sadyo antān ||
5.047.05a idam vapur nivacanam janāsaś caranti yan nadyas tasthur āpaḥ |
5.047.05c dve yad im bibhrto mātur anye iheha jāte yamyā sabandhū ||
5.047.06a vi tanvate dhiyo asmā apāmsi vastrā putrāya mātaro vayanti |
5.047.06c upaprakṣe vṛṣaṇo modamānā divas pathā vadhvo yanty acha ||
5.047.07a tad astu mitrāvaruṇā tad agne śam yor asmabhyam idam astu śastam |
5.047.07c aśimahi gādham uta pratiṣṭhām namo dive bhṛhate sādānāya ||

5.048.01a kad u priyāya dhāmne manāmahe svakṣatrāya svayaśase mahe vayam |
5.048.01c āmenyasya rajaso yad abhra āṃ apo vṛṇānā vitanoti māyini ||
5.048.02a tā atnata vayunam vīravakṣaṇam samānyā vṛtayā viśvam ā rajaḥ |
5.048.02c apo apācīr aparā apejate pra pūrvābhis tirate devayur janaḥ ||
5.048.03a ā grāvabhir ahanyebhir aktubhir variṣṭham vajram ā jigharti māyini |
5.048.03c śatam vā yasya pracaran sve dame samvartayanto vi ca vartayann ahā ||
5.048.04a tām asya rītim paraśor iva praty anīkam akhyam bhuje asya varpaṣaḥ |
5.048.04c sacā yadi pitumantam iva kṣayam ratnam dadhāti bharahūtaye viśe ||
5.048.05a sa jihvayā caturānika ṛñjate cāru vasāno varuṇo yatann arim |
5.048.05c na tasya vidma puruṣatvatā vayam yato bhagaḥ savitā dāti vāryam ||

5.049.01a devam vo adya savitāram eṣe bhagam ca ratnam vibhajantam āyoḥ |
5.049.01c ā vām narā purubhujā vavṛtyām dive-dive cid asvinā sakhīyan ||
5.049.02a prati prayāṇam asurasya vidvān sūktair devam savitāram duvasya |
5.049.02c upa bruvita namasā vijānañ jyeṣṭham ca ratnam vibhajantam āyoḥ ||
5.049.03a adatrayā dayate vāryāṇi pūṣā bhago aditir vasta usraḥ |
5.049.03c indro viṣṇur varuṇo mitro agnir ahāni bhadrā janayanta dasmāḥ ||
5.049.04a tan no anarvā savitā varūtham tat sindhava iṣayanto anu gman |
5.049.04c upa yad voce adhvarasya hotā rāyaḥ syāma patayo vājaratnāḥ ||
5.049.05a pra ye vasubhya ivad ā namo dur ye mitre varuṇe sūktavācaḥ |
5.049.05c avaitv abhvaṃ kṛṇutā variyo divasprṛthivyor avasā madema ||

5.050.01a viśvo devasya netur marto vurīta sakhyam |
5.050.01c viśvo rāya iṣudhyati dyumnam vṛṇīta puṣyase ||

5.050.02a te te deva netar ye cemām̐ anuśase |
 5.050.02c te rāyā te hy āpṛce sacemahi sacathyaiḥ ||
 5.050.03a ato na ā nṛn atithin ataḥ patnīr daśasyata |
 5.050.03c āre viśvam patheṣṭhām̐ dviṣo yuyotu yūyuyiḥ ||
 5.050.04a yatra vahnir abhitho dudravad droṇyaḥ paśuḥ |
 5.050.04c nṛmaṇā vīrapastyo 'rṇā dhīreva sanitā ||
 5.050.05a eṣa te deva netā rathaspatiḥ śaṃ rayiḥ |
 5.050.05c śaṃ rāye śaṃ svastaya iṣastuto manāmahe devastuto manāmahe ||

5.051.01a agne sutasya pītaye viśvair ūmebhir ā gahi |
 5.051.01c devebhir havypadātaye ||
 5.051.02a ṛtadhītaya ā gata satyadharmāṇo adhvaram |
 5.051.02c agneḥ pibata jihvayā ||
 5.051.03a viprebhir vipra santya prātaryāvabhir ā gahi |
 5.051.03c devebhiḥ somapītaye ||
 5.051.04a ayaṃ somaś camū suto 'matre pari śicyate |
 5.051.04c priya indrāya vāyave ||
 5.051.05a vāyav ā yāhi vītaye juṣāṇo havypadātaye |
 5.051.05c pibā sutasyāndhaso abhi prayaḥ ||
 5.051.06a indraś ca vāyav eṣāṃ sutānām̐ pītim arhathaḥ |
 5.051.06c tāñ juṣethām̐ arepasāv abhi prayaḥ ||
 5.051.07a sutā indrāya vāyave somāso dadhyāśiraḥ |
 5.051.07c nimnaṃ na yanti sindhavo 'bhi prayaḥ ||
 5.051.08a sajūr viśvebhir devebhir aśvibhyām̐ uṣasā sajūḥ |
 5.051.08c ā yāhy agne atrivat sute raṇa ||
 5.051.09a sajūr mitrāvaruṇābhyām̐ sajūḥ somena viṣṇunā |
 5.051.09c ā yāhy agne atrivat sute raṇa ||
 5.051.10a sajūr ādityair vasubhiḥ sajūr indreṇa vāyunā |
 5.051.10c ā yāhy agne atrivat sute raṇa ||
 5.051.11a svasti no mimitām̐ aśvinā bhagaḥ svasti devy aditir anarvaṇaḥ |
 5.051.11c svasti pūṣā asuro dadhātu naḥ svasti dyāvāpṛthivī sucetunā ||
 5.051.12a svastaye vāyum upa bravāmahai somaṃ svasti bhuvanasya yas patiḥ |
 5.051.12c bṛhaspatiṃ sarvagaṇaṃ svastaye svastaya ādityāso bhavantu naḥ ||
 5.051.13a viśve devā no adyā svastaye vaiśvānaro vasur agniḥ svastaye |
 5.051.13c devā avantv ṛbhavaḥ svastaye svasti no rudraḥ pātv aṃhasaḥ ||
 5.051.14a svasti mitrāvaruṇā svasti pathye revati |
 5.051.14c svasti na indraś cāgniś ca svasti no adite kṛdhi ||
 5.051.15a svasti panthām̐ anu carema sūryācandramasāv iva |
 5.051.15c punar dadatāghnatā jānatā saṃ gamemahi ||

5.052.01a pra śyāvāśva dhṛṣṇuyārcā marudbhir ṛkvabhiḥ |
 5.052.01c ye adrogham anuṣvadam̐ śravo madanti yajñiyāḥ ||
 5.052.02a te hi sthirasya śavasah sakhāyaḥ santi dhṛṣṇuyā |
 5.052.02c te yāmann ā dhṛṣadvinas tmanā pānti śaśvataḥ ||
 5.052.03a te syandrāso nokṣaṇo 'ti śkandanti śarvariḥ |
 5.052.03c marutām̐ adhā maho divi kṣamā ca manmahe ||
 5.052.04a marutsu vo dadhīmahi stomaṃ yajñam̐ ca dhṛṣṇuyā |

5.052.04c viśve ye mānuṣā yugā pānti martyaṃ riṣaḥ ||
 5.052.05a arhanto ye sudānavo naro asāmiśavaṣaḥ |
 5.052.05c pra yajñam yajñiyebhyo divo arcā marudbhyaḥ ||
 5.052.06a ā rukmair ā yudhā nara ṛṣvā ṛṣṭir asṛkṣata |
 5.052.06c anv enāṃ aha vidyuto maruto jajjhatir iva bhānur arta tmanā divaḥ ||
 5.052.07a ye vāvṛdhanta pārthivā ya urāv antarikṣa ā |
 5.052.07c vṛjane vā nadināṃ sadhasthe vā maho divaḥ ||
 5.052.08a śardho mārutam uc chaṃsa satyaśavasam ṛbhvasam |
 5.052.08c uta sma te śubhe naraḥ pra syandrā yujata tmanā ||
 5.052.09a uta sma te paruṣṇyām ūṛṇā vasata śundhyavaḥ |
 5.052.09c uta pavyā rathānām adrim bhindanty ojasā ||
 5.052.10a āpathayo vipathayo 'ntaspathā anupathāḥ |
 5.052.10c etebhir mahyaṃ nāmabhir yajñam viṣṭāra ohate ||
 5.052.11a adhā naro ny ohate 'dhā niyuta ohate |
 5.052.11c adhā pārāvatā iti citrā rūpāṇi darśyā ||
 5.052.12a chandastubhaḥ kubhanyava utsam ā kīriṇo nṛtuḥ |
 5.052.12c te me ke cin na tāyava ūmā āsan dṛṣi tviṣe ||
 5.052.13a ya ṛṣvā ṛṣṭividyaḥ kavayaḥ santi vedhasaḥ |
 5.052.13c tam ṛṣe mārutam gaṇam namasyā ramayā girā ||
 5.052.14a acha ṛṣe mārutam gaṇam dānā mitram na yoṣaṇā |
 5.052.14c divo vā dhṛṣṇava ojasā stutā dhībhir iṣaṇyata ||
 5.052.15a nū manvāna eṣāṃ devāṃ achā na vakṣaṇā |
 5.052.15c dānā saceta sūribhir yāmaśrutebhir añjibhiḥ ||
 5.052.16a pra ye me bandhveṣe gāṃ vocanta sūrayaḥ pṛṣṇim vocanta mātaram |
 5.052.16c adhā pitaram iṣmiṇam rudram vocanta śikvasaḥ ||
 5.052.17a sapta me sapta śākina ekam-ekā śatā daduḥ |
 5.052.17c yamunāyām adhi śrutam ud rādho gavyam mṛje ni rādho aśvyam mṛje ||

5.053.01a ko veda jānam eṣāṃ ko vā purā sumneṣv āsa marutām |
 5.053.01c yad yuyujre kilāsyāḥ ||
 5.053.02a aitān ratheṣu tasthuṣaḥ kaḥ śuśrāva kathā yayuḥ |
 5.053.02c kasmai sasruḥ sudāse anv āpaya idābhir vṛṣṭayaḥ saha ||
 5.053.03a te ma āhur ya āyayur upa dyubhir vibhir made |
 5.053.03c naro maryā arepasa imān paśyann iti ṣṭuhi ||
 5.053.04a ye añjiṣu ye vāśiṣu svabhānavaḥ sraḥṣu rukmeṣu khādiṣu |
 5.053.04c śrāyā ratheṣu dhanvasu ||
 5.053.05a yuṣmākaṃ smā rathāṃ anu mude dadhe maruto jiradānavaḥ |
 5.053.05c vṛṣṭi dyāvo yatir iva ||
 5.053.06a ā yaṃ naraḥ sudānavo dadāśuṣe divaḥ kośam acucyavuḥ |
 5.053.06c vi parjanyaṃ sṛjanti rodasī anu dhanvanā yanti vṛṣṭayaḥ ||
 5.053.07a tatṛdānāḥ sindhavaḥ kṣodasā rajaḥ pra sasrur dhenavo yathā |
 5.053.07c syannā aśvā ivādhvano vimocane vi yad vartanta enyaḥ ||
 5.053.08a ā yāta maruto diva āntarikṣād amād uta |
 5.053.08c māva sthāta parāvataḥ ||
 5.053.09a mā vo rasānitabhā kubhā krumur mā vaḥ sindhur ni rīramat |
 5.053.09c mā vaḥ pari ṣṭhāt sarayuḥ puriṣiṇy asme it sumnam astu vaḥ ||
 5.053.10a taṃ vaḥ śardham rathānāṃ tveṣāṃ gaṇam mārutam navyasinām |
 5.053.10c anu pra yanti vṛṣṭayaḥ ||

5.053.11a śardhaṃ-śardhaṃ va eṣāṃ vrātaṃ-vrātaṃ gaṇaṃ-gaṇaṃ suśastibhiḥ |
 5.053.11c anu krāmema dhītibhiḥ ||
 5.053.12a kasmā adya sujātāya rātahavyāya pra yayuḥ |
 5.053.12c enā yāmena marutaḥ ||
 5.053.13a yena tokāya tanayāya dhānyam bījaṃ vahadhve akṣitam |
 5.053.13c asmabhyaṃ tad dhattana yad va īmahe rādho viśvāyu saubhagam ||
 5.053.14a atiyāma nidas tiraḥ svastibhir hitvāvadyam arātīḥ |
 5.053.14c vṛṣṭvī śaṃ yor āpa usri bheṣajaṃ syāma marutaḥ saha ||
 5.053.15a sudevaḥ samahāsati suvīro naro marutaḥ sa martyaḥ |
 5.053.15c yaṃ trāyadhve syāma te ||
 5.053.16a stuhi bhojān stuvato asya yāmani raṇan gāvo na yavase |
 5.053.16c yataḥ pūrvāṃ iva sakhīṃr anu hvaya girā gṛṇīhi kāmīnaḥ ||

5.054.01a pra śardhāya mārutāya svabhānava imāṃ vācam anajā parvatacyute |
 5.054.01c gharmastubhe diva ā pṛṣṭhayajvane dyumnaśravase mahi ṇṇṇam arcata ||
 5.054.02a pra vo marutas taviṣā udanyavo vayovṛdho aśvayujaḥ parijrayaḥ |
 5.054.02c saṃ vidyutā dadhati vāśati tritaḥ svaranty āpo 'vanā parijrayaḥ ||
 5.054.03a vidyunmahaso naro aśmadidyavo vātaviṣo marutaḥ parvatacyutaḥ |
 5.054.03c abdayā cin muhur ā hrādunīvrta stanayadamā rabhasā udojasaḥ ||
 5.054.04a vy aktūn rudrā vy ahāni śikvaso vy antarikṣaṃ vi rajāmsi dhūtayaḥ |
 5.054.04c vi yad ajrāṃ ajatha nāva im yathā vi durgāni maruto nāha riṣyatha ||
 5.054.05a tad vīryaṃ vo maruto mahitvanam dīrghaṃ tatāna sūryo na yojanam |
 5.054.05c etā na yāme agrbhītaśociṣo 'naśvadāṃ yan ny ayātanā girim ||
 5.054.06a abhrāji śardho maruto yad arṇasam moṣathā vṛkṣaṃ kapaneva vedhasaḥ |
 5.054.06c adha smā no aramatim sajośasaś cakṣur iva yantam anu neṣathā sugam ||
 5.054.07a na sa jiyate maruto na hanyate na sredhati na vyathate na riṣyati |
 5.054.07c nāsyā rāya upa dasyanti notaya ṛṣim vā yaṃ rājānaṃ vā suśūdatha ||
 5.054.08a niyutvanto grāmajito yathā naro 'ryamaṇo na marutaḥ kabandhinaḥ |
 5.054.08c pinvanty utsaṃ yad ināso asvaran vy undanti pṛthivīm madhvo andhasā ||
 5.054.09a pravatvatīyam pṛthivī marudbhyaḥ pravatvatī dyaur bhavati prayadbhyaḥ |
 5.054.09c pravatvatīḥ pathyā antarikṣyāḥ pravatvantaḥ parvatā jīradānavaḥ ||
 5.054.10a yan marutaḥ sabharasaḥ svarṇaraḥ sūrya udite madathā divo naraḥ |
 5.054.10c na vo 'śvāḥ śrathayantāha sisrataḥ sadyo asyādhvanaḥ pāram aśnutha ||
 5.054.11a aṃseṣu va iṣṭayaḥ patsu khādayo vakṣassu rukmā maruto rathe śubhaḥ |
 5.054.11c agnibhrājaso vidyuto gabhastyoḥ śiprāḥ śīrṣasu vitatā hiraṇyayīḥ ||
 5.054.12a taṃ nākam aryo agrbhītaśociṣaṃ ruśat pippalam maruto vi dhūnutha |
 5.054.12c sam acyanta vṛjanātiviṣanta yat svaranti ghoṣaṃ vitatam ṛtāyavaḥ ||
 5.054.13a yuṣmādattasya maruto vicetaso rāyaḥ syāma rathyo vayasvataḥ |
 5.054.13c na yo yuchati tiṣyo yathā divo 'sme rāranta marutaḥ sahasriṇam ||
 5.054.14a yūyaṃ rayim maruta spārhavīraṃ yūyam ṛṣim avatha sāmaviṇam |
 5.054.14c yūyam arvantam bhāratāya vājaṃ yūyaṃ dhattha rājānaṃ śruṣṭimantam ||
 5.054.15a tad vo yāmi draviṇaṃ sadyaūtayo yenā svar ṇa tatanāma nīṃr abhi |
 5.054.15c idaṃ su me maruto haryatā vaco yasya tarema tarasā śataṃ himāḥ ||

5.055.01a prayajyavo maruto bhrājadrṣṭayo bṛhad vayo dadhire rukmavakṣasaḥ |
 5.055.01c iyante aśvaiḥ suyamebhir āśubhiḥ śubhaṃ yātām anu rathā avṛtsata ||
 5.055.02a svayaṃ dadhidhve taviṣim yathā vida bṛhan mahānta urviyā vi rājatha |

5.055.02c utāntarikṣam mamire vy ojasā śubhaṃ yātām anu rathā avṛtsata ||
 5.055.03a sākam jātāḥ subhvaḥ sākam ukṣitāḥ śriye cid ā prataram vāvṛdhur naraḥ |
 5.055.03c virokiṇaḥ sūryasyeva raśmayaḥ śubhaṃ yātām anu rathā avṛtsata ||
 5.055.04a ābhūṣeṇyaṃ vo maruto mahitvanam didṛkṣeṇyaṃ sūryasyeva cakṣaṇam |
 5.055.04c uto asmāṃ amṛtatve dadhātana śubhaṃ yātām anu rathā avṛtsata ||
 5.055.05a ud irayathā marutaḥ samudrato yūyaṃ vṛṣṭim varṣayathā puriṣiṇaḥ |
 5.055.05c na vo dasrā upa dasyanti dhenavaḥ śubhaṃ yātām anu rathā avṛtsata ||
 5.055.06a yad aśvān dhūrṣu pṛṣatir ayugdhvam hiraṇyayān praty atkāṃ amugdhvam |
 5.055.06c viśvā it sprdho maruto vy asyatha śubhaṃ yātām anu rathā avṛtsata ||
 5.055.07a na parvatā na nadyo varanta vo yatrācidhvam maruto gachathed u tat |
 5.055.07c uta dyāvāpṛthivī yāthanā pari śubhaṃ yātām anu rathā avṛtsata ||
 5.055.08a yat pūrvyam maruto yac ca nūtanam yad udyate vasavo yac ca śasyate |
 5.055.08c viśvasya tasya bhavathā navedasaḥ śubhaṃ yātām anu rathā avṛtsata ||
 5.055.09a mṛdata no maruto mā vadhiṣṭanāsmabhyaṃ śarma bahulaṃ vi yantana |
 5.055.09c adhi stotrasya sakhyasya gātana śubhaṃ yātām anu rathā avṛtsata ||
 5.055.10a yūyam asmān nayata vasyo achā nir aṃhatibhyo maruto gṛṇānāḥ |
 5.055.10c juṣadhvam no havyadātiṃ yajatrā vayaṃ syāma patayo rayiṇām ||

5.056.01a agne śardhantam ā gaṇam piṣṭam rukmebhir añjibhiḥ |
 5.056.01c viśo adya marutām ava hvaye divaś cid rocanād adhi ||
 5.056.02a yathā cin manyase hṛdā tad in me jagmur āśasaḥ |
 5.056.02c ye te nediṣṭham havanāny āgaman tān vardha bhīmasaṃdṛśaḥ ||
 5.056.03a mīdhuṣmatīva pṛthivī parāhatā madanty ety asmā ā |
 5.056.03c ṛkṣo na vo marutaḥ śimivāṃ amo dudhro gaur iva bhīmayuḥ ||
 5.056.04a ni ye riṇanty ojasā vṛthā gāvo na durdhuraḥ |
 5.056.04c aśmānam cit svaryam parvataṃ girim pra cyāvayanti yāmabhiḥ ||
 5.056.05a ut tiṣṭha nūnam eṣāṃ stomaiḥ samukṣitānām |
 5.056.05c marutām purutamam apūrvyam gavām sargam iva hvaye ||
 5.056.06a yuṅgdhvaṃ hy aruṣī rathe yuṅgdhvaṃ ratheṣu rohitaḥ |
 5.056.06c yuṅgdhvaṃ harī ajirā dhuri voḍhave vahiṣṭhā dhuri voḍhave ||
 5.056.07a uta sya vājy aruṣas tuviṣvaṇir iha sma dhāyi darṣataḥ |
 5.056.07c mā vo yāmeṣu marutaś ciraṃ karat pra taṃ ratheṣu codata ||
 5.056.08a ratham nu mārutam vayaṃ śravasyum ā huvāmahe |
 5.056.08c ā yasmin tasthau suraṇāni bibhratī sacā marutsu rodasī ||
 5.056.09a taṃ vaḥ śardham ratheśubham tveṣam panasyum ā huve |
 5.056.09c yasmin sujātā subhagā mahiyate sacā marutsu mīdhuṣī ||

5.057.01a ā rudrāsa indravantaḥ sajoṣaso hiraṇyarathāḥ suvitāya gantana |
 5.057.01c iyaṃ vo asmat prati haryate matis tṛṣṇaje na diva utsā udanyave ||
 5.057.02a vāśimanta ṛṣṭimanto maṇiṣiṇaḥ sudhanvāna iṣumanto niṣaṅgiṇaḥ |
 5.057.02c svaśvā stha surathāḥ pṛṣnimātarāḥ svāyudhā maruto yāthanā śubham ||
 5.057.03a dhūnutha dyām parvatān dāśuṣe vasu ni vo vanā jihate yāmano bhiyā |
 5.057.03c kopayatha pṛthivīm pṛṣnimātarāḥ śubhe yad ugrāḥ pṛṣatir ayugdhvam ||
 5.057.04a vātatiṣo maruto varṣanirṇijo yamā iva susadṛśaḥ supeśasaḥ |
 5.057.04c piśaṅgāśvā aruṇāśvā arepasāḥ pratvākṣaso mahinā dyaur ivoravaḥ ||
 5.057.05a purudrapsā añjimantaḥ sudānavas tveṣasaṃdṛśo anavabhrarādhasaḥ |
 5.057.05c sujātāso januṣā rukmavākṣaso divo arkā amṛtaṃ nāma bhejire ||

5.057.06a ṛṣṭayo vo maruto amsayor adhi saha ojo bāhvor vo balaṃ hitam |
 5.057.06c nṛmṇā śīrśasv āyudhā ratheṣu vo viśvā vaḥ śīr adhi tanūṣu pipiṣe ||
 5.057.07a gomad aśvāvad rathavat suvīraṃ candradvad rādho maruto dadā naḥ |
 5.057.07c praśastim naḥ kṛṇuta rudriyāso bhakṣīya vo 'vaso daivyasya ||
 5.057.08a haye naro maruto mṛḍatā nas tuvīmaghāso amṛtā ṛtajñāḥ |
 5.057.08c satyaśrutaḥ kavayo yuvāno bṛhadgirayo bṛhad ukṣamāṇāḥ ||

5.058.01a tam u nūnaṃ taviṣimantam eṣāṃ stuṣe gaṇam mārutam navyasīnām |
 5.058.01c ya āśvaśvā amavad vahanta uteṣire amṛtasya svarājaḥ ||
 5.058.02a tveṣaṃ gaṇaṃ tavasaṃ khādihastam dhunivratam māyinaṃ dātivāram |
 5.058.02c mayobhuvo ye amitā mahitvā vandasva vipra tuvīrādhaso nṛn ||
 5.058.03a ā vo yantūdavāhāso adya vṛṣṭim ye viśve maruto junanti |
 5.058.03c ayaṃ yo agnir marutaḥ samiddha etaṃ juṣadhvaṃ kavayo yuvānaḥ ||
 5.058.04a yūyaṃ rājānam iryaṃ janāya vibhvataṣṭam janayathā yajatrāḥ |
 5.058.04c yuṣmad eti muṣṭihā bāhujūto yuṣmad sadaśvo marutaḥ suvīraḥ ||
 5.058.05a arā ived acaramā aheva pra-pra jāyante akavā mahobhiḥ |
 5.058.05c pṛśneḥ putrā upamāso rabhiṣṭhāḥ svayā matyā marutaḥ sam mimikṣuḥ ||
 5.058.06a yat prāyāsiṣṭa pṛṣatībhir aśvair vīdupavibhir maruto rathebhīḥ |
 5.058.06c kṣodanta āpo riṇate vanāny avosriyo vṛṣabhaḥ krاندatu dyauḥ ||
 5.058.07a prathiṣṭa yāman pṛthivī cid eṣāṃ bharteva garbham svam ic chavo dhuḥ |
 5.058.07c vātān hy aśvān dhury āyuyujre varṣaṃ svedaṃ cakrire rudriyāsaḥ ||
 5.058.08a haye naro maruto mṛḍatā nas tuvīmaghāso amṛtā ṛtajñāḥ |
 5.058.08c satyaśrutaḥ kavayo yuvāno bṛhadgirayo bṛhad ukṣamāṇāḥ ||

5.059.01a pra va spaḍ akran suvitāya dāvane 'rcā dive pra pṛthivyā ṛtam bhare |
 5.059.01c ukṣante aśvān taruṣanta ā rajo 'nu svam bhānum śrathayante arṇavaiḥ ||
 5.059.02a amād eṣāṃ bhiyasā bhūmir ejati naur na pūrṇā kṣarati vyathir yatī |
 5.059.02c dūredṛṣo ye citayanta emabhir antar mahe vidathe yetire naraḥ ||
 5.059.03a gavām iva śriyase śṛṅgam uttamaṃ sūryo na cakṣū rajaso visarjane |
 5.059.03c atyā iva subhvaś cārava sthana maryā iva śriyase cetathā naraḥ ||
 5.059.04a ko vo mahānti mahatām ud aśnavat kas kāvyā marutaḥ ko ha paumṣyā |
 5.059.04c yūyaṃ ha bhūmiṃ kīraṇam na rejatha pra yad bharadhve suvitāya dāvane ||
 5.059.05a aśvā ived aruṣāsaḥ sabandhavaḥ sūrā iva prayudhaḥ prota yuyudhuḥ |
 5.059.05c maryā iva suvṛdho vāvṛdhur naraḥ sūryasya cakṣuḥ pra minanti vṛṣṭibhiḥ ||
 5.059.06a te ajyeṣṭhā akaniṣṭhāsa udbhido 'madhyamāso mahasā vi vāvṛdhuḥ |
 5.059.06c sujātāso januṣā pṛśnimātaro divo maryā ā no achā jigātana ||
 5.059.07a vayo na ye śreṇiḥ paptur ojasāntān divo bṛhataḥ sānunas pari |
 5.059.07c aśvāsa eṣāṃ ubhaye yathā viduḥ pra parvatasya nabhanūmr acucyavuḥ ||
 5.059.08a mimātu dyaur aditir vītaye naḥ saṃ dānucitrā uṣaso yatantām |
 5.059.08c ācucyavur divyaṃ kośam eta ṛṣe rudrasya maruto gṛṇānāḥ ||

5.060.01a īde agniṃ svavasam namobhir iha prasatto vi cayat kṛtam naḥ |
 5.060.01c rathair iva pra bhare vājayadbhiḥ pradakṣiṇin marutām stomam ṛdhyām ||
 5.060.02a ā ye tasthuḥ pṛṣatiṣu śrutāsu sukheṣu rudrā maruto ratheṣu |
 5.060.02c vanā cid ugrā jihate ni vo bhīyā pṛthivī cid rejate parvataś cit ||
 5.060.03a parvataś cin mahi vṛddho bibhāya divaś cit sānu rejata svane vaḥ |

5.060.03c yat kriḍatha maruta ṛṣṭimanta āpa iva sadhryañco dhavadhve ||
 5.060.04a varā ived raivatāso hiraṇyair abhi svadhābhis tanvaḥ pipiṣre |
 5.060.04c śriye śreyāṃsas tavaso ratheṣu satrā mahāṃsi cakrire tanūṣu ||
 5.060.05a ajyeṣṭhāso akaniṣṭhāsa ete sam bhrātaro vāvṛdhuḥ saubhagāya |
 5.060.05c yuvā pitā svapā rudra eṣāṃ sudughā pṛśniḥ sudinā marudbhyaḥ ||
 5.060.06a yad uttame maruto madhyame vā yad vāvame subhagāso divi ṣṭha |
 5.060.06c ato no rudrā uta vā nv asyāgne vittād dhaviṣo yad yajāma ||
 5.060.07a agniś ca yan maruto viśvavedaso divo vahadhva uttarād adhi ṣṇubhiḥ |
 5.060.07c te mandasānā dhunayo riśādaso vāmaṃ dhatta yajamānāya sunvate ||
 5.060.08a agne marudbhiḥ śubhayadbhir ṛkvabhiḥ somam piba mandasāno gaṇasribhiḥ |
 5.060.08c pāvakebhir viśvaminvebhir āyubhir vaiśvānara pradivā ketunā sajūḥ ||

5.061.01a ke ṣṭhā naraḥ śreṣṭhatamā ya eka-eka āyaya |
 5.061.01c paramasyāḥ parāvataḥ ||
 5.061.02a kva vo 'śvāḥ kvābhīśavaḥ katham śeka kathā yaya |
 5.061.02c pṛṣṭhe sado nasor yamaḥ ||
 5.061.03a jaghane coda eṣāṃ vi sakthāni naro yamuḥ |
 5.061.03c putrakṛthe na janayaḥ ||
 5.061.04a parā vīrāsa etana maryāso bhadrajānayaḥ |
 5.061.04c agnitapo yathāsatha ||
 5.061.05a sanat sāśvyam paśum uta gavyaṃ śatāvayam |
 5.061.05c śyāvāśvastutāya yā dor vīrāyopabarbhṛhat ||
 5.061.06a uta tvā strī śaśīyasī puṃso bhavati vasyasī |
 5.061.06c adevatrād arādhasaḥ ||
 5.061.07a vi yā jānāti jasurim vi tṛṣyantam vi kāminam |
 5.061.07c devatrā kṛṇute manaḥ ||
 5.061.08a uta ghā nemo astutaḥ pumām̐ iti bruve paṇiḥ |
 5.061.08c sa vairadeya it samaḥ ||
 5.061.09a uta me 'rapad yuvatir mamanduṣī prati śyāvāya vartanim |
 5.061.09c vi rohitā purumīdhāya yematur viprāya dīrghayaśase ||
 5.061.10a yo me dhenūnām śatam vaidadaśvir yathā dadat |
 5.061.10c taranta iva maṃhanā ||
 5.061.11a ya im vahanta āśubhiḥ pibanto madiram madhu |
 5.061.11c atra śravāṃsi dadhire ||
 5.061.12a yeṣāṃ śriyādhi rodasī vibhrājante ratheṣv ā |
 5.061.12c divi rukma ivopari ||
 5.061.13a yuvā sa māruto gaṇas tveṣaratho anedyaḥ |
 5.061.13c śubhāmyāvāpratiṣkutaḥ ||
 5.061.14a ko veda nūnam eṣāṃ yatrā madanti dhūtayaḥ |
 5.061.14c ṛtajātā arepasaḥ ||
 5.061.15a yūyam martam vipanyavaḥ praṇetāra itthā dhiyā |
 5.061.15c śrotāro yāmahūtiṣu ||
 5.061.16a te no vasūni kāmyā puruścandrā riśādasaḥ |
 5.061.16c ā yajñiyāso vavṛttana ||
 5.061.17a etam me stomam ūrmye dārbhyāya parā vaha |
 5.061.17c giro devi rathir iva ||
 5.061.18a uta me vocatād iti sutasome rathavītau |
 5.061.18c na kāmo apa veti me ||

5.061.19a eṣa kṣeti rathavītir maghavā gomatīr anu |
5.061.19c parvateṣv apaśritaḥ ||

5.062.01a ṛtena ṛtam apihitaṃ dhruvaṃ vāṃ sūryasya yatra vimucanty aśvān |
5.062.01c daśa śatā saha tasthus tad ekaṃ devānāṃ śreṣṭhaṃ vapuṣāṃ apaśyam ||
5.062.02a tat su vāṃ mitrāvaruṇā mahitvam īrmā tasthuṣīr ahabhir duduhre |
5.062.02c viśvāḥ pinvathaḥ svasarasya dhenā anu vāṃ ekaḥ pavir ā vavarta ||
5.062.03a adhārayatam pṛthivīm uta dyām mitrarājānā varuṇā mahobhiḥ |
5.062.03c vardhayatam ośadhīḥ pinvataṃ gā ava vṛṣṭim sṛjataṃ jīradānū ||
5.062.04a ā vāṃ aśvāsaḥ suyujō vahantu yataraśmaya upa yantv arvāk |
5.062.04c ghṛtasya nirṇig anu vartate vāṃ upa sindhavaḥ pradivi kṣaranti ||
5.062.05a anu śrutām amatim vardhad urvīm barhir iva yajuṣā rakṣamānā |
5.062.05c namasvantā dhṛtadakṣādhi garte mitrāsāthe varuṇeḍāsv antaḥ ||
5.062.06a akravihastā sukṛte paraspā yaṃ trāsāthe varuṇeḍāsv antaḥ |
5.062.06c rājānā kṣatram ahṛṇīyamānā sahasrasthūṇam bibhṛthaḥ saha dvau ||
5.062.07a hiraṇyanirṇig ayo asya sthūṇā vi bhrājate divy aśvājanīva |
5.062.07c bhadre kṣetre nimitā tilvile vā sanema madhvo adhigartyasya ||
5.062.08a hiraṇyarūpam uṣaso vyuṣṭāv ayasthūṇam uditā sūryasya |
5.062.08c ā rohatho varuṇa mitra gartam ataś cakṣāthe aditim ditim ca ||
5.062.09a yad baṃhiṣṭhaṃ nātividhe sudānū achidraṃ śarma bhuvanasya gopā |
5.062.09c tena no mitrāvaruṇāv aviṣṭaṃ siṣāsanto jigivāṃsaḥ syāma ||

5.063.01a ṛtasya gopāv adhi tiṣṭhatho rathaṃ satyadharmānā parame vyomani |
5.063.01c yam atra mitrāvaruṇāvatho yuvaṃ tasmai vṛṣṭir madhumat pinvate divaḥ ||
5.063.02a samrājāv asya bhuvanasya rājatho mitrāvaruṇā vidathe svardṛśā |
5.063.02c vṛṣṭim vāṃ rādho amṛtatvam imahe dyāvāpṛthivī vi caranti tanyavaḥ ||
5.063.03a samrājā ugrā vṛṣabhā divas patī pṛthivyā mitrāvaruṇā vicarṣaṇī |
5.063.03c citrebhir abhrair upa tiṣṭhatho ravaṃ dyām varṣayatho asurasya māyayā ||
5.063.04a māyā vāṃ mitrāvaruṇā divi śritā sūryo jyotiś carati citram āyudham |
5.063.04c tam abhreṇa vṛṣṭyā gūhatho divi parjanya drapsā madhumanta irate ||
5.063.05a rathaṃ yuñjate marutaḥ śubhe sukhaṃ śūro na mitrāvaruṇā gaviṣṭiṣu |
5.063.05c rajāṃsi citrā vi caranti tanyavo divaḥ samrājā payasā na ukṣatam ||
5.063.06a vācam su mitrāvaruṇāv irāvatim parjanyaś citrām vadati tviṣīmatim |
5.063.06c abhrā vasata marutaḥ su māyayā dyām varṣayatam aruṇām arepasam ||
5.063.07a dharmānā mitrāvaruṇā vipāscitā vratā rakṣethe asurasya māyayā |
5.063.07c ṛtena viśvam bhuvanaṃ vi rājathaḥ sūryam ā dhattho divi citryaṃ ratham ||

5.064.01a varuṇaṃ vo riśādasam ṛcā mitraṃ havāmahe |
5.064.01c pari vrajeva bāhvor jaganvāṃsā svarṇaram ||
5.064.02a tā bāhavā sucetunā pra yantam asmā arcate |
5.064.02c śevaṃ hi jāryaṃ vāṃ viśvāsu kṣāsu joguve ||
5.064.03a yan nūnam aśyām gatim mitrasya yāyām pathā |
5.064.03c asya priyasya śarmaṇy ahimsānasya saścire ||
5.064.04a yuvābhyām mitrāvaruṇopamaṃ dheyām ṛcā |
5.064.04c yad dha kṣaye maghonām stotṛṇām ca spūrdhase ||
5.064.05a ā no mitra sudītibhir varuṇaś ca sadhastha ā |

5.064.05c sve kṣaye maghonām sakhinām ca vṛdhase ||
5.064.06a yuvaṃ no yeṣu varuṇa kṣatram bṛhac ca bibhrthaḥ |
5.064.06c uru ṇo vājasātaye kṛtaṃ rāye svastaye ||
5.064.07a uchantyām me yajatā devakṣatre ruśadgavi |
5.064.07c sutam somaṃ na hastibhir ā paḍbhir dhāvataṃ narā bibhratāv arcanānasam ||

5.065.01a yaś ciketa sa sukratur devatrā sa bravītu naḥ |
5.065.01c varuṇo yasya darśato mitro vā vanate giraḥ ||
5.065.02a tā hi śreṣṭhavarcaṣā rājānā dirghaśruttamā |
5.065.02c tā satpatī ṛtāvṛdha ṛtāvānā jane-jane ||
5.065.03a tā vām iyāno 'vase pūrvā upa bruve sacā |
5.065.03c svaśvāsaḥ su cetunā vājāṃ abhi pra dāvane ||
5.065.04a mitro aṃhoś cid ād uru kṣayāya gātum vanate |
5.065.04c mitrasya hi pratūrvataḥ sumatir asti vidhataḥ ||
5.065.05a vayam mitrasyāvāsi syāma saprathastame |
5.065.05c anehasas tvotayaḥ satrā varuṇaśeṣasaḥ ||
5.065.06a yuvam mitremaṃ janaṃ yatathaḥ sam ca nayathaḥ |
5.065.06c mā maghonaḥ pari khyatam mo asmākam ṛṣiṇām gopīthe na uruṣyatam ||

5.066.01a ā cikitāna sukratū devau marta risādasā |
5.066.01c varuṇāya ṛtapeśase dadhīta prayase mahe ||
5.066.02a tā hi kṣatram avihrutam samyag asuryam āśāte |
5.066.02c adha vrateva mānuṣam svar ṇa dhāyi darśatam ||
5.066.03a tā vām eṣe rathānām urvīm gavyūtim eṣām |
5.066.03c rātahavyasya suṣṭutim dadhṛk stomair manāmahe ||
5.066.04a adhā hi kāvyā yuvaṃ dakṣasya pūrbhir adbhutā |
5.066.04c ni ketunā janānām cikethe pūtheadakṣasā ||
5.066.05a tad ṛtam pṛthivi bṛhac chravaeṣa ṛṣiṇām |
5.066.05c jrayasānāv aram pṛthv ati kṣaranti yāmabhiḥ ||
5.066.06a ā yad vām iyacakṣasā mitra vayam ca sūrayaḥ |
5.066.06c vyaciṣṭhe bahupāyve yatemahi svarājye ||

5.067.01a baḍ itthā deva niṣkṛtam ādityā yajatam bṛhat |
5.067.01c varuṇa mitrāryaman varṣiṣṭham kṣatram āśāthe ||
5.067.02a ā yad yonim hiraṇyayaṃ varuṇa mitra sadathaḥ |
5.067.02c dhartārā carṣaṇinām yantaṃ sumnaṃ risādasā ||
5.067.03a viśve hi viśvavedaso varuṇo mitro aryamā |
5.067.03c vratā padeva saścire pānti martyaṃ riṣaḥ ||
5.067.04a te hi satyā ṛtasprśa ṛtāvāno jane-jane |
5.067.04c sunīthāsaḥ sudānavo 'mhoś cid urucakrayaḥ ||
5.067.05a ko nu vām mitrāstuto varuṇo vā tanūnām |
5.067.05c tat su vām eṣate matir atribhya eṣate matiḥ ||

5.068.01a pra vo mitrāya gāyata varuṇāya vipā girā |
5.068.01c mahikṣatrāv ṛtam bṛhat ||

5.068.02a samrājā yā ghṛtayonī mitraś cobhā varuṇāś ca |
5.068.02c devā deveṣu praśastā ||
5.068.03a tā naḥ śaktam pārthivasya maho rāyo divyasya |
5.068.03c mahi vām kṣatram deveṣu ||
5.068.04a ṛtam ṛtena sapanteṣiram dakṣam āśāte |
5.068.04c adruhā devau vardhete ||
5.068.05a vṛṣṭidyāvā rītyāpeṣas patī dānumatyāḥ |
5.068.05c bṛhantaṃ gartam āśāte ||

5.069.01a trī rocanā varuṇa trīmṛ uta dyūn trīṇi mitra dhārayatho rajāṃsi |
5.069.01c vāvṛdhānāv amatim kṣatriyasyānu vratam rakṣamāṇāv ajuryam ||
5.069.02a irāvatiṛ varuṇa dhenavo vām madhumad vām sindhavo mitra duhre |
5.069.02c trayas tasthur vṛṣabhāśas tiṣṇām dhiṣaṇānām retodhā vi dyumantaḥ ||
5.069.03a prātar devīm aditim johavīmi madhyam̐dina uditā sūryasya |
5.069.03c rāye mitrāvaruṇā sarvatāteḍe tokāya tanayāya śam yoḥ ||
5.069.04a yā dhartārā rajaso rocanasyotādityā divyā pārthivasya |
5.069.04c na vām devā amṛtā ā minanti vratāni mitrāvaruṇā dhruvāṇi ||

5.070.01a purūruṇā cid dhy asty avo nūnam vām varuṇa |
5.070.01c mitra vaṃsi vām sumatim ||
5.070.02a tā vām samyag adruhvāṇeṣam aśyāma dhāyase |
5.070.02c vayam te rudrā syāma ||
5.070.03a pātam no rudrā pāyubhir uta trāyethām sutrātrā |
5.070.03c turyāma dasyūn tanūbhiḥ ||
5.070.04a mā kasyādbhutakratū yakṣam bhujemā tanūbhiḥ |
5.070.04c mā śeṣasā mā tanasā ||

5.071.01a ā no gantaṃ riśādasā varuṇa mitra barhaṇā |
5.071.01c upemaṃ cārum adhvaram ||
5.071.02a viśvasya hi pracetasā varuṇa mitra rājathaḥ |
5.071.02c iśānā pipyataṃ dhiyaḥ ||
5.071.03a upa naḥ sutam ā gataṃ varuṇa mitra dāśuṣaḥ |
5.071.03c asya somasya pītaye ||

5.072.01a ā mitre varuṇe vayam gīrbhir juhumo atrivat |
5.072.01c ni barhiṣi sadatam somapītaye ||
5.072.02a vratena stho dhruvakṣemā dharmaṇā yātayajjanā |
5.072.02c ni barhiṣi sadatam somapītaye ||
5.072.03a mitraś ca no varuṇāś ca juṣetam yajñam iṣṭaye |
5.072.03c ni barhiṣi sadatam somapītaye ||

5.073.01a yad adya sthaḥ parāvati yad arvāvaty aśvinā |
5.073.01c yad vā purū purubhujā yad antarikṣa ā gataṃ ||
5.073.02a iha tyā purubhūtamā purū daṃsāṃsi bibhratā |

5.073.02c varasyā yāmy adhrigū huve tuviṣṭamā bhujē ||
 5.073.03a īrmānyad vapuṣe vapuś cakraṃ rathasya yemathuḥ |
 5.073.03c pary anyā nāhuṣā yugā mahnā rajāṃsi diyathaḥ ||
 5.073.04a tad ū ṣu vām enā kṛtaṃ viśvā yad vām anu ṣṭave |
 5.073.04c nānā jātāv arepasā sam asme bandhum eyathuḥ ||
 5.073.05a ā yad vām sūryā rathaṃ tiṣṭhad raghuṣyadaṃ sadā |
 5.073.05c pari vām aruṣā vayo ghr̥ṇā varanta ātapaḥ ||
 5.073.06a yuvor atris̄ ciketati narā sumnena cetasā |
 5.073.06c gharmaṃ yad vām arepasam̄ nāsatyāsnā bhuraṇyati ||
 5.073.07a ugro vām kakuho yayiḥ śṛṇve yāmeṣu saṃtaniḥ |
 5.073.07c yad vām daṃsobhir aśvinātrir narāvavartati ||
 5.073.08a madhva ū ṣu madhūyuvā rudrā siṣakti pipyuṣi |
 5.073.08c yat samudrāti paṛsathaḥ pakvāḥ pṛkṣo bharanta vām ||
 5.073.09a satyam id vā u aśvinā yuvām āhur mayobhuvā |
 5.073.09c tā yāman yāmahūtamā yāmann ā mṛḍayattamā ||
 5.073.10a imā brahmāṇi vardhanāśvibhyāṃ santu śaṃtamā |
 5.073.10c yā takṣāma rathāṃ ivāvocāma bṛhan namaḥ ||

5.074.01a kūṣṭho devāv aśvinādyā divo manāvasū |
 5.074.01c tac chravatho vṛṣaṇvasū atrir vām ā vivāsati ||
 5.074.02a kuha tyā kuha nu śrutā divi devā nāsatyā |
 5.074.02c kasminn ā yatatho jane ko vām nadināṃ sacā ||
 5.074.03a kaṃ yāthaḥ kaṃ ha gachathaḥ kam achā yuñjāthe ratham |
 5.074.03c kasya brahmāṇi raṇyatho vayaṃ vām uśmasiṣṭaye ||
 5.074.04a pauraṃ cid dhy udaprutam paura paura jinvathaḥ |
 5.074.04c yad im̄ gṛbhītatātaye siṃham iva druhas pade ||
 5.074.05a pra cyavānāj jujuruṣo vavrim atkaṃ na muñcathaḥ |
 5.074.05c yuvā yadi kṛthaḥ punar ā kāmam ṛṇve vadhvaḥ ||
 5.074.06a asti hi vām iha stotā smasi vām saṃdṛṣi śriye |
 5.074.06c nū śrutam ma ā gatam avobhir vājinīvasū ||
 5.074.07a ko vām adya purūṇām ā vavne martyānām |
 5.074.07c ko vipro vipravāhasā ko yajñair vājinīvasū ||
 5.074.08a ā vām ratho rathānām yeṣṭho yātv aśvinā |
 5.074.08c purū cid asmayus tira āṅgūṣo martyeṣv ā ||
 5.074.09a śam ū ṣu vām madhūyuvāsmākam astu carḥṛtiḥ |
 5.074.09c arvācīnā vicetasā vibhiḥ śyeneva diyatam ||
 5.074.10a aśvinā yad dha karhi cic chuśrūyātam imaṃ havam |
 5.074.10c vasvīr ū ṣu vām bhujah̄ pṛñcanti su vām pṛcaḥ ||

5.075.01a prati priyatamaṃ rathaṃ vṛṣaṇam̄ vasuvāhanam |
 5.075.01c stotā vām aśvināv ṛṣi stomena prati bhūṣati mādhvī mama śrutam̄ havam ||
 5.075.02a atyāyātam aśvinā tiro viśvā aham sanā |
 5.075.02c dasrā hiraṇyavartanī suṣumnā sindhuvāhasā mādhvī mama śrutam̄ havam ||
 5.075.03a ā no ratnāni bibhratāv aśvinā gachataṃ yuvam |
 5.075.03c rudrā hiraṇyavartanī juṣāṇā vājinīvasū mādhvī mama śrutam̄ havam ||
 5.075.04a suṣṭubho vām vṛṣaṇvasū rathe vāṇicy āhitā |
 5.075.04c uta vām kakuho mṛgaḥ pṛkṣah̄ kṛṇoti vāpuṣo mādhvī mama śrutam̄ havam ||

5.075.05a bodhinmanasā rathyeṣirā havanaśrutā |
 5.075.05c vibhiś cyavānam aśvinā ni yātho advayāvinam mādhvī mama śrutam havam ||
 5.075.06a ā vām narā manoyujo 'śvāsaḥ pruṣitapsavaḥ |
 5.075.06c vayo vahantu pītaye saha sumnebhīr aśvinā mādhvī mama śrutam havam ||
 5.075.07a aśvināv eha gachataṃ nāsatyā mā vi venatam |
 5.075.07c tiraś cid aryayā pari vartir yātam adābhyā mādhvī mama śrutam havam ||
 5.075.08a asmin yajñe adābhyā jaritāraṃ śubhas patī |
 5.075.08c avasyum aśvinā yuvaṃ gṛṇantam upa bhūṣatho mādhvī mama śrutam havam ||
 5.075.09a abhūd uṣā ruśatpaśur āgnir adhāyy ṛtviyaḥ |
 5.075.09c ayoji vām vṛṣaṇvasū ratho dasrāv amartyo mādhvī mama śrutam havam ||

5.076.01a ā bhāty agnir uṣasām anikam ud viprāṇaṃ devayā vāco asthuḥ |
 5.076.01c arvāñcā nūnam rathyeha yātam pīpivāṃsam aśvinā gharmam acha ||
 5.076.02a na saṃskṛtam pra mimīto gamiṣṭhānti nūnam aśvinopastuteha |
 5.076.02c divābhipitve 'vasāgamiṣṭhā praty avartim dāsūṣe śambhaviṣṭhā ||
 5.076.03a utā yātam saṃgave prātar ahno madhyamāndina uditā sūryasya |
 5.076.03c divā naktam avasā śaṃtamena nedānīm pītir aśvinā tatāna ||
 5.076.04a idaṃ hi vām pradivi sthānam oka ime gṛhā aśvinedaṃ duroṇam |
 5.076.04c ā no divo bṛhataḥ parvatād ādbhyo yātam iṣam ūrjaṃ vahantā ||
 5.076.05a sam aśvinor avasā nūtanena mayobhuvā supraṇīti gamema |
 5.076.05c ā no rayiṃ vahatam ota vīrān ā viśvāny amṛtā saubhagāni ||

5.077.01a prātaryāvāṇā prathamā yajadhvam purā gṛdhrād araruṣaḥ pibātaḥ |
 5.077.01c prātar hi yajñam aśvinā dadhāte pra śamsanti kavayaḥ pūrvabhājaḥ ||
 5.077.02a prātar yajadhvam aśvinā hinota na sāyam asti devayā ajuṣtam |
 5.077.02c utānyo asmad yajate vi cāvaḥ pūrvaḥ-pūvo yajamāno vaniyan ||
 5.077.03a hiraṇyatvaṃ madhuvarṇo ghṛtasnuḥ pṛkṣo vahann ā ratho vartate vām |
 5.077.03c manojavā aśvinā vātaramhā yenātiyātho duritāni viśvā ||
 5.077.04a yo bhūyiṣṭhaṃ nāsatyābhyām viveṣa caniṣṭham pitvo rarate vibhāge |
 5.077.04c sa tokam asya pīparac chamībhīr anūrdhvabhāsaḥ sadam it tuturyāt ||
 5.077.05a sam aśvinor avasā nūtanena mayobhuvā supraṇīti gamema |
 5.077.05c ā no rayiṃ vahatam ota vīrān ā viśvāny amṛtā saubhagāni ||

5.078.01a aśvināv eha gachataṃ nāsatyā mā vi venatam |
 5.078.01c haṃsāv iva patatam ā sutāṃ upa ||
 5.078.02a aśvinā hariṇāv iva gaurāv ivānu yavasam |
 5.078.02c haṃsāv iva patatam ā sutāṃ upa ||
 5.078.03a aśvinā vājinīvasū juṣethāṃ yajñam iṣṭaye |
 5.078.03c haṃsāv iva patatam ā sutāṃ upa ||
 5.078.04a atrir yad vām avarohann ṛbīsam ajohavīn nādhamāneva yoṣā |
 5.078.04c śyenasya cij javasā nūtanenāgachataṃ aśvinā śaṃtamena ||
 5.078.05a vi jihīṣva vanaspate yoniḥ sūṣyantyā iva |
 5.078.05c śrutam me aśvinā havam saptavadhrim ca muñcatam ||
 5.078.06a bhītāya nādhamānāya ṛṣaye saptavadhraye |
 5.078.06c māyābhīr aśvinā yuvaṃ vṛkṣaṃ saṃ ca vi cācathaḥ ||
 5.078.07a yathā vātaḥ puṣkariṇīm samiṅgayati sarvataḥ |

- 5.078.07c evā te garbha ejatu niraitu daśamāsyah ||
5.078.08a yathā vāto yathā vanam yathā samudra ejati |
5.078.08c evā tvam daśamāsyā sahāvehi jarāyuṇā ||
5.078.09a daśa māsāñ chaśayānaḥ kumāro adhi mātari |
5.078.09c niraitu jīvo akṣato jīvo jīvantyā adhi ||
- 5.079.01a mahe no adya bodhayoṣo rāye divitmatī |
5.079.01c yathā cin no abodhayaḥ satyaśravasi vāyye sujāte aśvasūnṛte ||
5.079.02a yā sunithe śaucadrathe vy aucho duhitar divaḥ |
5.079.02c sā vy ucha sahiyasi satyaśravasi vāyye sujāte aśvasūnṛte ||
5.079.03a sā no adyābharadvasur vy uchā duhitar divaḥ |
5.079.03c yo vy auchaḥ sahiyasi satyaśravasi vāyye sujāte aśvasūnṛte ||
5.079.04a abhi ye tvā vibhāvāri stomair gṛṇanti vahnayaḥ |
5.079.04c maghair maghoni suśriyo dāmanvantaḥ surātayaḥ sujāte aśvasūnṛte ||
5.079.05a yac cid dhi te gaṇā ime chadayanti maghattaye |
5.079.05c pari cid vaṣṭayo dadhur dadato rādho ahrayam sujāte aśvasūnṛte ||
5.079.06a aiṣu dhā vīravād yaśa uṣo maghoni sūriṣu |
5.079.06c ye no rādhāmsy ahrayā maghavāno arāsata sujāte aśvasūnṛte ||
5.079.07a tebhyo dyumnam bṛhad yaśa uṣo maghony ā vaha |
5.079.07c ye no rādhāmsy aśvyā gavyā bhajanta sūrayaḥ sujāte aśvasūnṛte ||
5.079.08a uta no gomatīr iṣa ā vahā duhitar divaḥ |
5.079.08c sākam sūryasya raśmibhiḥ śukraiḥ śocadbhir arcibhiḥ sujāte aśvasūnṛte ||
5.079.09a vy uchā duhitar divo mā ciraṃ tanuthā apaḥ |
5.079.09c net tvā stenaṃ yathā ripuṃ tapāti sūro arcīṣā sujāte aśvasūnṛte ||
5.079.10a etāvad ved uṣas tvam bhūyo vā dātum arhasi |
5.079.10c yā stotṛbhyo vibhāvāry uchantī na pramīyase sujāte aśvasūnṛte ||
- 5.080.01a dyutadyāmānam bṛhatīm ṛtena ṛtāvarīm aruṇapsum vibhātīm |
5.080.01c devīm uṣasaṃ svar āvahantīm prati viprāso matibhir jarante ||
5.080.02a eṣā janam darśatā bodhayanti sugān pathaḥ kṛṇvatī yāty agre |
5.080.02c bṛhadrathā bṛhatī viśvaminvoṣā jyotir yachaty agre ahnām ||
5.080.03a eṣā gobhir aruṇebhir yujānāsredhantī rayim aprāyu cakre |
5.080.03c patho radantī suvitāya devī puruṣtutā viśvavārā vi bhāti ||
5.080.04a eṣā vyenī bhavati dvibarhā āviṣkṛṇvānā tanvam purastāt |
5.080.04c ṛtasya panthām anv eti sādhu prajānatīva na diśo mināti ||
5.080.05a eṣā śubhrā na tanvo vidānordhveva snātī dṛśaye no asthāt |
5.080.05c apa dveṣo bādhamānā tamāmsy uṣā divo duhitā jyotiṣāgāt ||
5.080.06a eṣā praticī duhitā divo nṛn yoṣeva bhadrā ni riṇite apsaḥ |
5.080.06c vyūrṇvatī dāśuṣe vāryāṇi punar jyotir yuvatīḥ pūrvathākaḥ ||
- 5.081.01a yuñjate mana uta yuñjate dhiyo viprā viprasya bṛhato vipaścitaḥ |
5.081.01c vi hotrā dadhe vayunāvid eka in mahī devasya savituḥ pariṣṭutiḥ ||
5.081.02a viśvā rūpāṇi prati muñcate kaviḥ prāsāvid bhadrām dvipade catuṣpade |
5.081.02c vi nākam akhyat savitā vareṇyo 'nu prayāṇam uṣaso vi rājati ||
5.081.03a yasya prayāṇam anv anya id yayur devā devasya mahimānam ojasā |
5.081.03c yaḥ pārthivāni vimame sa etaśo rajāmsi devaḥ savitā mahitvanā ||

5.081.04a uta yāsi savitas trīṇi rocanota sūryasya raśmibhiḥ sam ucyasi |
5.081.04c uta rātrīm ubhayataḥ pariṃyasa uta mitro bhavasi deva dharmabhiḥ ||
5.081.04a uteśiṣe prasavasya tvam eka id uta pūṣā bhavasi deva yāmabhiḥ |
5.081.04c utedaṃ viśvam bhuvanam vi rājasi śyāvāśvas te savita stomam ānaśe ||

5.082.01a tat savitur vṛṇīmahe vyaṃ devasya bhojanam |
5.082.01c śreṣṭham sarvadhātamaṃ turam bhagasya dhīmahi ||
5.082.02a asya hi svayaśastaram savituḥ kac cana priyam |
5.082.02c na minanti svarājyam ||
5.082.03a sa hi ratnāni dāśuṣe suvāti savitā bhagaḥ |
5.082.03c tam bhāgaṃ citram īmahe ||
5.082.04a adyā no deva savitaḥ prajāvat sāvīḥ saubhagam |
5.082.04c parā duṣvapnyam suva ||
5.082.05a viśvāni deva savitar duritāni parā suva |
5.082.05c yad bhadram tan na ā suva ||
5.082.06a anāgaso aditaye devasya savituḥ save |
5.082.06c viśvā vāmāni dhīmahi ||
5.082.07a ā viśvadevam satpatim sūktair adyā vṛṇīmahe |
5.082.07c satyasavam savitāram ||
5.082.08a ya ime ubhe ahanī pura ety aprayuchan |
5.082.08c svādhīr devaḥ savitā ||
5.082.09a ya imā viśvā jātāny āśrāvayati ślokena |
5.082.09c pra ca suvāti savitā ||

5.083.01a achā vada tavasaṃ gīrbhir ābhi stuhi parjanyaṃ namasā vivāsa |
5.083.01c kanikradad vṛṣabho jīradānū reto dadhāty ośadhīṣu garbham ||
5.083.02a vi vṛkṣān hanti uta hanti rakṣaso viśvam bibhāya bhuvanam mahāvadhāt |
5.083.02c utānāgā iṣate vṛṣṇyāvato yat parjanya stanayan hanti duṣkṛtaḥ ||
5.083.03a rathīva kaśayāśvāṃ abhikṣipann āvir dūtān kṛṇute varṣyāṃ aha |
5.083.03c dūrāt siṃhasya stanathā ud irate yat parjanyaḥ kṛṇute varṣyam nabhaḥ ||
5.083.04a pra vātā vānti patayanti vidyuta ud ośadhīr jihate pivate svaḥ |
5.083.04c irā viśvasmai bhuvanāya jāyate yat parjanyaḥ pṛthivīm retasāvati ||
5.083.05a yasya vrata pṛthivī nannamīti yasya vrata śaphavaj jarbhurīti |
5.083.05c yasya vrata ośadhīr viśvarūpāḥ sa naḥ parjanya mahi śarma yacha ||
5.083.06a divo no vṛṣṭim maruto rarīdhvam pra pivate vṛṣṇo aśvasya dhārāḥ |
5.083.06c arvān etena stanayitnunehy apo niṣīncann asuraḥ pitā naḥ ||
5.083.07a abhi kranda stanaya garbham ā dhā udanvatā pari dīyā rathena |
5.083.07c ḍṛtiṃ su karṣa viṣitaṃ nyañcam samā bhavantūdvato nipādāḥ ||
5.083.08a mahāntaṃ kośam ud acā ni ṣīncā syandantāṃ kulyā viṣitāḥ purastāt |
5.083.08c ghr̥tena dyāvāpṛthivī vy undhi suprapāṇam bhavtv aghnyābhyaḥ ||
5.083.09a yat parjanya kanikradat stanayan haṃsi duṣkṛtaḥ |
5.083.09c pratīdam viśvam modate yat kiṃ ca pṛthivyām adhi ||
5.083.10a avarṣīr varṣam ud u ṣū gṛbhāyākar dhanvāny atyetavā u |
5.083.10c ajiṃjana ośadhīr bhojanāya kam uta prajābhyo 'vido mañṣām ||

5.084.01a baḍ itthā parvatānām khidram bibharṣi pṛthivī |

5.084.01c pra yā bhūmim pravatvati mahnā jinoṣi mahini ||
 5.084.02a stomāsas tvā vicāriṇi prati ṣṭobhanty aktubhiḥ |
 5.084.02c pra yā vājam na heṣantam perum asyasy arjuni ||
 5.084.03a dṛḍhā cid yā vanaspatīn kṣmayā dardharṣy ojasā |
 5.084.03c yat te abhrasya vidyuto divo varṣanti vṛṣṭayaḥ ||

5.085.01a pra samrāje bṛhad arcā gabhīram brahma priyaṃ varuṇāya śrutāya |
 5.085.01c vi yo jaghāna śamiteva carmopastire pṛthivīm sūryāya ||
 5.085.02a vaneṣu vy antarikṣaṃ tatāna vājam arvatsu paya usriyāsu |
 5.085.02c hṛtsu kratuṃ varuṇo apsv agniṃ divi sūryam adadhāt somam adrau ||
 5.085.03a nīcīnabāraṃ varuṇaḥ kavandham pra sasarja rodasī antarikṣam |
 5.085.03c tena viśvasya bhuvanasya rājā yavaṃ na vṛṣṭir vy unatti bhūma ||
 5.085.04a unatti bhūmim pṛthivīm uta dyām yadā dugdham varuṇo vaṣṭy ād it |
 5.085.04c sam abhreṇa vasata parvatāsas taviṣiyantaḥ śrathayanta vīrāḥ ||
 5.085.05a imām ū ṣv āsurasya śrutasya mahim māyāṃ varuṇasya pra vocam |
 5.085.05c māneneva tasthivāṃ antarikṣe vi yo mame pṛthivīm sūryeṇa ||
 5.085.06a imām ū nu kavitamasya māyāṃ mahim devasya nakir ā dadharṣa |
 5.085.06c ekaṃ yad udnā na pṛṇanty enīr āsiñcantīr avanayaḥ samudram ||
 5.085.07a aryamyāṃ varuṇa mitryāṃ vā sakhāyāṃ vā sadam id bhrātaraṃ vā |
 5.085.07c veśaṃ vā nityāṃ varuṇāraṇaṃ vā yat sīm āgaś cakṛmā śīśrathas tat ||
 5.085.08a kitavāso yad riripur na divi yad vā ghā satyam uta yan na vidma |
 5.085.08c sarvā tā vi ṣya śīthireva devādhā te syāma varuṇa priyāsaḥ ||

5.086.01a indrāgnī yam avatha ubhā vājeṣu martyam |
 5.086.01c dṛḍhā cit sa pra bhedati dyumnā vāṇir iva tritaḥ ||
 5.086.02a yā pṛtanāsu duṣṭarā yā vājeṣu śravāyyā |
 5.086.02c yā pañca carṣaṇīr abhīndrāgnī tā havāmahe ||
 5.086.03a tayor id amavac chavas tigmā didyun maghonoḥ |
 5.086.03c prati druṇā gabhastyor gavāṃ vṛtraghna eṣate ||
 5.086.04a tā vām eṣe rathānām indrāgnī havāmahe |
 5.086.04c patī turasya rādhaso vidvāṃsā girvaṇastamā ||
 5.086.05a tā vṛdhantāv anu dyūn martāya devāv adabhā |
 5.086.05c arhantā cit puro dadhe 'mśeva devāv arvate ||
 5.086.06a evendrāgnibhyām ahāvi havyaṃ sūṣyaṃ ghṛtaṃ na pūtam adribhiḥ |
 5.086.06c tā sūriṣu śravo bṛhad rayiṃ gṛṇatsu didhṛtam iṣaṃ gṛṇatsu didhṛtam ||

5.087.01a pra vo mahe matayo yantu viṣṇave marutvate girijā evayāmarut |
 5.087.01c pra śardhāya prayajyave sukhādaye tavase bhandadiṣṭaye dhunivratāya śavase ||
 5.087.02a pra ye jātā mahinā ye ca nu svayam pra vidmanā bruvata evayāmarut |
 5.087.02c kratvā tad vo maruto nādhrṣe śavo dānā mahnā tad eṣām adhrṣṭāso nādrayaḥ ||
 5.087.03a pra ye divo bṛhataḥ śṛṇvire girā suśukvānaḥ subhva evayāmarut |
 5.087.03c na yeṣām irī sadhastha iṣṭa āṃ agnayo na svavidyutaḥ pra syandrāso dhuninām ||
 5.087.04a sa cakrame mahato nir urukramaḥ samānasmāt sadasa evayāmarut |
 5.087.04c yadāyukta tmanā svād adhi ṣṇubhir viṣpardhaso vimahaso jigāti śevṛdho nṛbhiḥ ||
 5.087.05a svano na vo 'mavān rejayaḍ vṛṣā tveṣo yayis taviṣa evayāmarut |
 5.087.05c yenā sahanta rñjata svarociṣa sthāraśmāno hiraṇyayāḥ svāyudhāsa iṣmiṇaḥ ||

- 5.087.06a apāro vo mahimā vṛddhaśavasas tveṣaṃ śavo 'vatv evayāmarut |
5.087.06c sthātāro hi prasitau saṃdṛśi sthana te na uruṣyatā nidaḥ śuśukvāṃso nāgnayaḥ ||
5.087.07a te rudrāsaḥ sumakhā agnayo yathā tuvidyumnā avantv evayāmarut |
5.087.07c dīrgham pṛthu paprathe sadma pārhivaṃ yeṣāṃ ajmeṣv ā mahaḥ śardhāṃsy
adbhutainasām ||
5.087.08a adveṣo no maruto gātum etana śrotā havam jaritur evayāmarut |
5.087.08c viṣṇor mahaḥ samanyavo yuyotana smad rathyo na daṃsanāpa dveṣāṃsi sanutaḥ
||
5.087.09a gantā no yajñam yajñiyāḥ suśami śrotā havam arakṣa evayāmarut |
5.087.09c jyeṣṭhāso na parvatāso vyomani yūyam tasya pracetasāḥ syāta durdhartavo nidaḥ
||

6. Mandala

- 6.001.01a tvam hy agne prathamo manotāsyā dhiyo abhavo dasma hotā |
6.001.01c tvam sīm vṛṣann akr̥ṇor duṣṭarītu saho viśvasmai sahase sahadhyai ||
6.001.02a adhā hotā ny asīdo yajiyān iḍas pada iṣayann iḍyaḥ san |
6.001.02c taṃ tvā naraḥ prathamam devayanto maho rāye citayanto anu gman ||
6.001.03a vṛteva yantam bahubhir vasavyais tve rayim jāgrvāṃso anu gman |
6.001.03c ruśantam agniṃ darśatam bṛhantaṃ vapāvantaṃ viśvahā dīdivāṃsam ||
6.001.04a padaṃ devasya namasā vyantaḥ śravasyavaḥ śrava āpann amṛktam |
6.001.04c nāmāni cid dadhire yajniyāni bhadrāyāṃ te raṇayanta samdr̥ṣṭau ||
6.001.05a tvāṃ vardhanti kṣitayaḥ pṛthivyāṃ tvāṃ rāya ubhayāso janānām |
6.001.05c tvam trātā tarāṇe cetyo bhūḥ pitā mātā sadam in mānuṣāṇām ||
6.001.06a saparyeṇyaḥ sa priyo vikṣv agnir hotā mandro ni śasādā yajiyān |
6.001.06c taṃ tvā vyaṃ dama ā dīdivāṃsam upa jñubādho namasā sadema ||
6.001.07a taṃ tvā vyaṃ sudhyo navyam agne sumnāyava imahe devayantaḥ |
6.001.07c tvam viśo anayo dīdyāno divo agne bṛhatā rocanena ||
6.001.08a viśam kavim viśpatim śasvatinām nitośanam vṛṣabham carṣaṇinām |
6.001.08c pretiṣaṇim iṣyantam pāvakaṃ rājantam agniṃ yajataṃ rayinām ||
6.001.09a so agna ije śasame ca marto yas ta ānaṭ samidhā havyadātim |
6.001.09c ya āhutim pari vedā namobhir viśvet sa vāmā dadhate tvotaḥ ||
6.001.10a asmā u te mahi mahe vidhema namobhir agne samidhota havyaiḥ |
6.001.10c vedī sūno sahaso gīrbhir ukthair ā te bhadrāyāṃ sumatau yatema ||
6.001.11a ā yas tatantha rodasī vi bhāsā śravobhiś ca śravasyas tarutraḥ |
6.001.11c bṛhadbhir vājai sthavirebhir asme revadbhir agne vitaraṃ vi bhāhi ||
6.001.12a nṛvad vaso sadam id dhehy asme bhūri tokāya tanayāya paśvaḥ |
6.001.12c pūrvir iṣo bṛhatir āre-aghā asme bhadrā sauśravasāni santu ||
6.001.13a purūṇy agne purudhā tvāyā vasūni rājan vasutā te aśyām |
6.001.13c purūṇi hi tve puruvāra santy agne vasu vidhate rājani tve ||

- 6.002.01a tvam hi kṣaitavad yaśo 'gne mitro na patyase |
6.002.01c tvam vicarṣaṇe śravo vaso puṣṭim na puṣyasi ||
6.002.02a tvāṃ hi śmā carṣaṇayo yajñebhir gīrbhir iḍate |
6.002.02c tvāṃ vājī yāty avṛko rajastūr viśvacarṣaṇiḥ ||
6.002.03a sajoṣas tvā divo naro yajñasya ketum indhate |
6.002.03c yad dha sya mānuṣo janaḥ sumnāyur juhve adhvare ||
6.002.04a ṛdhad yas te sudānave dhiyā marthaḥ śasamate |
6.002.04c ūtī ṣa bṛhato divo dviṣo amho na tarati ||
6.002.05a samidhā yas ta āhutim niśitim martyo naśat |
6.002.05c vayāvantaṃ sa puṣyati kṣayam agne śatāyuṣam ||
6.002.06a tveṣas te dhūma ṛṇvati divi ṣaṅ chakra ātataḥ |
6.002.06c sūro na hi dyutā tvam kṛpā pāvaka rocase ||
6.002.07a adhā hi vikṣv iḍyo 'si priyo no atithiḥ |
6.002.07c raṇvaḥ purīva jūryaḥ sūnur na trayayāyyaḥ ||
6.002.08a kratvā hi droṇe ajyase 'gne vājī na kṛtvyaḥ |
6.002.08c pariṇmeva svadhā gayo 'tyo na hvāryaḥ śiśuḥ ||
6.002.09a tvam tyā cid acyutāgne paśur na yavase |

6.002.09c dhāmā ha yat te ajara vanā vṛścanti śikvasaḥ ||
 6.002.10a veṣi hy adhvarīyatām agne hotā dame viśām |
 6.002.10c samṛdho viśpate kṛṇu juṣasva havyam aṅgiraḥ ||
 6.002.11a achā no mitramaho deva devān agne vocaḥ sumatiṃ rodasyoḥ |
 6.002.11c vīhi svastiṃ suksitiṃ divo nṛn dviṣo aṃhāmsi duritā tarema tā tarema tavāvasā
 tarema ||

6.003.01a agne sa kṣeṣad ṛtapā ṛtejā uru jyotir naśate devayuṣ te |
 6.003.01c yaṃ tvam mitreṇa varuṇaḥ sajoṣā deva pāsi tyajasā martam aṃhaḥ ||
 6.003.02a ije yajñebhiḥ śāsame śamibhir ṛdhadvārāyāgnaye dadāśa |
 6.003.02c evā cana taṃ yaśasām ajuṣṭir nāmho martam naśate na pradṛptiḥ ||
 6.003.03a sūro na yasya dṛśatir arepā bhīmā yad eti śucatas ta ā dhiḥ |
 6.003.03c heṣasvataḥ śurudho nāyam aktoḥ kutrā cid raṇvo vasatir vanejāḥ ||
 6.003.04a tigmaṃ cid ema mahi varpo asya bhasad aśvo na yamasāna āsā |
 6.003.04c vijehamānaḥ paraśur na jihvām dravir na drāvayati dāru dhakṣat ||
 6.003.05a sa id asteva prati dhād asiṣyañ chiśīta tejo 'yaso na dhārām |
 6.003.05c citradhrajatir aratir yo aktor ver na druśadvā raghupatmajamhāḥ ||
 6.003.06a sa im rebho na prati vasta usrāḥ śociṣā rārapīti mitramahāḥ |
 6.003.06c naktam ya im aruṣo yo divā nṛn amartyo aruṣo yo divā nṛn ||
 6.003.07a divo na yasya vidhato navinod vṛṣā rukṣa ośadhīṣu nūnot |
 6.003.07c ghṛṇā na yo dhrajasā patmanā yann ā rodasī vasunā daṃ supatnī ||
 6.003.08a dhāyobhir vā yo yujyebhir arkair vidyun na davidyot svebhiḥ śuṣmaiḥ |
 6.003.08c śardho vā yo marutām tatakṣa ṛbhur na tveṣo rabhasāno adyaut ||

6.004.01a yathā hotar manuṣo devatātā yajñebhiḥ sūno sahaso yajāsi |
 6.004.01c evā no adya samanā samānān uśann agna uśato yakṣi devān ||
 6.004.02a sa no vibhāvā cakṣaṇir na vastor agnir vandāru vedyaś cano dhāt |
 6.004.02c viśvāyur yo amṛto martyeṣūṣarbhud bhūd atithir jātavedāḥ ||
 6.004.03a dyāvo na yasya panayanty abhvam bhāsāmsi vaste sūryo na śukraḥ |
 6.004.03c vi ya inoty ajaraḥ pāvako 'śnasya cic chiśnathat pūrvyāṇi ||
 6.004.04a vadmā hi sūno asy admasadvā cakre agnir januṣājmānam |
 6.004.04c sa tvam na ūrjasana ūrjam dhā rājeva jer avṛke kṣeṣy antaḥ ||
 6.004.05a nitikti yo vāraṇam annam atti vāyur na rāṣṭry aty ety aktūn |
 6.004.05c turyāma yas ta ādiśām arātīr atyo na hrutaḥ patataḥ parihrut ||
 6.004.06a ā sūryo na bhānumadbhir arkair agne tatantha rodasī vi bhāsā |
 6.004.06c citro nayat pari tamāmsy aktaḥ śociṣā patmann auśijo na dīyan ||
 6.004.07a tvām hi mandratamam arkaśokair vavṛmahe mahi naḥ śroṣy agne |
 6.004.07c indram na tvā śavasā devatā vāyum pṛṇanti rādhasā nṛtamāḥ ||
 6.004.08a nū no agne 'vṛkebhiḥ svasti veṣi rāyaḥ pathibhiḥ parṣy aṃhaḥ |
 6.004.08c tā sūribhyo gṛṇate rāsi sumnam madema śatahimāḥ suvirāḥ ||

6.005.01a huve vaḥ sūnum sahaso yuvānam adrogavācam matibhir yaviṣṭham |
 6.005.01c ya invati draviṇāni pracetā viśvavārāṇi puruvāro adhruk ||
 6.005.02a tve vasūni purvaṇika hotar doṣā vastor erire yajñiyāsaḥ |
 6.005.02c kṣāmeva viśvā bhuvanāni yasmin saṃ saubhagāni dadhire pāvake ||
 6.005.03a tvam vikṣu pradivaḥ sīda āsu kratvā rathīr abhavo vāryāṇām |

6.005.03c ata inoṣi vidhate cikitvo vy ānuṣag jātavedo vasūni ||
 6.005.04a yo naḥ sanutyo abhidāsad agne yo antaro mitramaho vanuṣyāt |
 6.005.04c tam ajarebhir vṛṣabhis tava svais tapā tapiṣṭha tapasā tapasvān ||
 6.005.05a yas te yajñena samidhā ya ukthair arkebhiḥ sūno sahaso dadāsat |
 6.005.05c sa martyeṣv amṛta pracetā rāyā dyumnena śravasā vi bhāti ||
 6.005.06a sa tat kṛdhīṣitas tūyam agne spṛdho bādhasva sahasā sahasvān |
 6.005.06c yac chasyase dyubhir akto vacobhis taj juṣasva jaritur ghoṣi manma ||
 6.005.07a aśyāma taṃ kāmam agne tavotī aśyāma rayiṃ rayivaḥ suvīram |
 6.005.07c aśyāma vājam abhi vājayanto 'śyāma dyumnam ajarājaram te ||

6.006.01a pra navyasā sahasaḥ sūnum achā yajñena gātum ava ichamānaḥ |
 6.006.01c vṛścadvanam kṛṣṇayāmaṃ ruśantaṃ vītī hotāraṃ divyaṃ jigāti ||
 6.006.02a sa śvitānas tanyatū rocanasthā ajarebhir nānadadbhir yaviṣṭhaḥ |
 6.006.02c yaḥ pāvakaḥ purutamaḥ purūṇi pṛthūny agnir anuyāti bharvan ||
 6.006.03a vi te viṣvag vātajūtāso agne bhāmāsaḥ śuce śucayaś caranti |
 6.006.03c tuvimirakṣāso divyā navagvā vanā vananti dhṛṣatā rujantaḥ ||
 6.006.04a ye te śukrāsaḥ śucayaḥ śuciṣmaḥ kṣām vapanti viṣitāso aśvāḥ |
 6.006.04c adha bhramas ta urviyā vi bhāti yātayamāno adhi sānu pṛṣneḥ ||
 6.006.05a adha jihvā pāpatīti pra vṛṣṇo goṣuyudho nāsaniḥ sṛjānā |
 6.006.05c sūrasyeva prasitiḥ kṣātir agner durvartur bhīmo dayate vanāni ||
 6.006.06a ā bhānunā pārhivāni jrayāṃsi mahas todasya dhṛṣatā tatantha |
 6.006.06c sa bādhasvāpa bhayā sahoḥbhi spṛdho vanuṣyan vanuṣo ni jūrva ||
 6.006.07a sa citra citraṃ citayantam asme citrakṣatra citratamaṃ vayodhām |
 6.006.07c candraṃ rayim puruvīram bṛhantaṃ candra candrābhir gṛṇate yuvasva ||

6.007.01a mūrdhānaṃ divo aratim pṛthivyā vaiśvānaram ṛta ā jātam agnim |
 6.007.01c kavim samrājam atithim janānām āsann ā pātraṃ janayanta devāḥ ||
 6.007.02a nābhim yajñānām sadanaṃ rayiṇām mahām āhāvam abhi saṃ navanta |
 6.007.02c vaiśvānaram rathyam adhvarāṇām yajñasya ketuṃ janayanta devāḥ ||
 6.007.03a tvad vipro jāyate vājy agne tvad vīrāso abhimātiṣāhaḥ |
 6.007.03c vaiśvānara tvam asmāsu dhehi vasūni rājan spṛhayāyyāni ||
 6.007.04a tvām viśve amṛta jāyamānaṃ śiśuṃ na devā abhi saṃ navante |
 6.007.04c tava kratubhir amṛtatvam āyan vaiśvānara yat pitror adīdeḥ ||
 6.007.05a vaiśvānara tava tāni vratāni mahāny agne nakir ā dadharṣa |
 6.007.05c yaj jāyamānaḥ pitror upasthe 'vindaḥ ketuṃ vayuneṣv ahnām ||
 6.007.06a vaiśvānarasya vimitāni cakṣasā sānūni divo amṛtasya ketunā |
 6.007.06c tasyed u viśvā bhuvanādhi mūrdhani vayā iva ruruhuḥ sapta visruhaḥ ||
 6.007.07a vi yo rajāṃsy amimīta sukratur vaiśvānaro vi divo rocanā kaviḥ |
 6.007.07c pari yo viśvā bhuvanāni paprathe 'dabdho gopā amṛtasya rakṣitā ||

6.008.01a pṛkṣasya vṛṣṇo aruṣasya nū sahaḥ pra nu vocaṃ vidathā jātavedasaḥ |
 6.008.01c vaiśvānarāya matir navyasī śuciḥ soma iva pavate cārur agnaye ||
 6.008.02a sa jāyamānaḥ parame vyomani vratāny agnir vratapā arakṣata |
 6.008.02c vy antarikṣam amimīta sukratur vaiśvānaro mahinā nākam asprṣat ||
 6.008.03a vy astabhñād rodasī mitro adbhuto 'ntarvāvad akṛṇoj jyotiṣā tamaḥ |
 6.008.03c vi carmaṇīva dhiṣaṇe avartayad vaiśvānaro viśvam adhatta vṛṣṇyam ||

6.008.04a apām upasthe mahiṣā agr̥bh̥ṇata viśo rājānam upa tasthur ṛgmiyam |
 6.008.04c ā dūto agnim abharad vivasvato vaiśvānaram mātariśvā parāvataḥ ||
 6.008.05a yuge-yuge vidathyam gr̥ṇadbhyo 'gne rayim yaśasaṃ dhehi navyasim |
 6.008.05c pavyeva rājann aghaśamsam ajara nīcā ni vṛsca vaninaṃ na tejasā ||
 6.008.06a asmākam agne maghavatsu dhārayānāmi kṣatram ajaraṃ suvīryam |
 6.008.06c vayaṃ jayema śatinaṃ sahasriṇaṃ vaiśvānara vājam agne tavotibhiḥ ||
 6.008.07a adabdhebhīḥ tava gopābhir iṣṭe 'smākam pāhi triṣadhasṭha sūrīn |
 6.008.07c rakṣā ca no daduṣāṃ śardho agne vaiśvānara pra ca tāri stavānaḥ ||

6.009.01a ahaś ca kṛṣṇam ahar arjunaṃ ca vi vartete rajasī vedyābhiḥ |
 6.009.01c vaiśvānaro jāyamāno na rājāvātiraj jyotiṣāgnis tamāṃsi ||
 6.009.02a nāhaṃ tantuṃ na vi jānāmy otuṃ na yaṃ vayanti samare 'tamānāḥ |
 6.009.02c kasya svit putra iha vaktvāni paro vadāty avareṇa pitrā ||
 6.009.03a sa it tantuṃ sa vi jānāty otuṃ sa vaktvāny ṛtuthā vadāti |
 6.009.03c ya im̄ ciketad amṛtasya gopā avaś caran paro anyena paśyan ||
 6.009.04a ayaṃ hotā prathamāḥ paśyatemam idaṃ jyotir amṛtam martyeṣu |
 6.009.04c ayaṃ sa jajñe dhruva ā niṣatto 'martyas tanvā vardhamānaḥ ||
 6.009.05a dhruvaṃ jyotir nihitaṃ dṛśaye kam mano javiṣṭham patayatsv antaḥ |
 6.009.05c viśve devāḥ samanasaḥ saketā ekaṃ kratum abhi vi yanti sādhu ||
 6.009.06a vi me karṇā patayato vi cakṣur vīdaṃ jyotir hṛdaya āhitaṃ yat |
 6.009.06c vi me manaś carati dūraādhiḥ kim svid vakṣyāmi kim u nū maniṣye ||
 6.009.07a viśve devā anamasyan bhiyānās tvām agne tamasi tasthivāmsam |
 6.009.07c vaiśvānaro 'vatūtaye no 'martyo 'vatūtaye naḥ ||

6.010.01a puro vo mandraṃ divyaṃ suvṛktim prayati yajñe agnim adhvare dadhidhvam |
 6.010.01c pura ukthebhiḥ sa hi no vibhāvā svadhvarā karati jātavedāḥ ||
 6.010.02a tam u dyumaḥ purvaṇika hotar agne agnibhir manuṣa idhānaḥ |
 6.010.02c stomam yam asmaḥ mamateva śūṣaṃ ghṛtaṃ na śuci matayaḥ pavante ||
 6.010.03a pīpāya sa śravasā martyeṣu yo agnaye dadāśa vipra ukthaiḥ |
 6.010.03c citrābhiḥ tam ūtibhiś citraśocir vrajasya sātā gomato dadhāti ||
 6.010.04a ā yaḥ paprau jāyamāna urvī dūredṛśā bhāsā kṛṣṇādhvā |
 6.010.04c adha bahu cit tama ūrmyāyās tiraḥ śociṣā dadṛṣe pāvakaḥ ||
 6.010.05a nū naś citram puruvājābhir ūti agne rayim maghavadbhyaś ca dhehi |
 6.010.05c ye rādhasā śravasā cāty anyān suvīryebhiś cābhi santi janān ||
 6.010.06a imaṃ yajñaṃ cano dhā agna uśan yaṃ ta āsāno juhute haviṣmān |
 6.010.06c bharadvājeṣu dadhiṣe suvṛktim avīr vājasya gadhyasya sātāu ||
 6.010.07a vi dveṣāmsīnuhi vardhayedām madema śatahimāḥ suvīrāḥ ||

6.011.01a yajasva hotar iṣito yajīyān agne bādho marutām na prayukti |
 6.011.01c ā no mitrāvaruṇā nāsatyā dyāvā hotrāya pṛthivī vavṛtyāḥ ||
 6.011.02a tvaṃ hotā mandratamo no adhrug antar devo vidathā martyeṣu |
 6.011.02c pāvakayā juhvā vahnir āsāgne yajasva tanvaṃ tava svām ||
 6.011.03a dhanyā cid dhi tve dhiṣaṇā vaṣṭi pra devāñ janma gr̥ṇate yajadhyai |
 6.011.03c vepiṣṭho āngirasāṃ yad dha vipro madhu chando bhanati rebha iṣṭau ||
 6.011.04a adidyutat sv apāko vibhāvāgne yajasva rodasī urūcī |
 6.011.04c āyumuṃ na yaṃ namasā rātahavyā añjanti suprayasam pañca janāḥ ||

6.011.05a vṛñje ha yan namasā barhir agnāv ayāmi srug ghṛtavatī suvṛktiḥ |
6.011.05c amyakṣi sadma sadane pṛthivyā aśrāyi yajñāḥ sūrye na cakṣuḥ ||
6.011.06a daśasyā naḥ purvaṇīka hotar devebhir agne agnibhir idhānaḥ |
6.011.06c rāyaḥ sūno sahaso vāvasānā ati srasema vṛjanam nāmhaḥ ||

6.012.01a madhye hotā duroṇe barhiṣo rāḍ agnis todasya rodasī yajadhyai |
6.012.01c ayam sa sūnuḥ sahasa ṛtāvā dūrāt sūryo na śociṣā tatāna ||
6.012.02a ā yasmin tve sv apāke yajatra yakṣad rājan sarvatāteva nu dyauḥ |
6.012.02c triṣadhasthas tataruṣo na jaṃho havvā maghāni mānuṣā yajadhyai ||
6.012.03a tejiṣṭhā yasyāratir vanerāt todo adhvan na vṛdhasāno adyaut |
6.012.03c adrogho na dravitā cetati tmann amartyo 'vartra oṣadhīṣu ||
6.012.04a sāsmākebhir etarī na śūṣair agni ṣṭave dama ā jātavedāḥ |
6.012.04c drvanno vanvan kratvā nārvosraḥ piteva jārayāyi yajñaiḥ ||
6.012.05a adha smāsya panayanti bhāso vṛthā yat takṣad anuyāti pṛthvīm |
6.012.05c sadyo yaḥ syandro viṣito dhaviyān ṛṇo na tāyur ati dhanvā rāt ||
6.012.06a sa tvam no arvan nidāyā viśvebhir agne agnibhir idhānaḥ |
6.012.06c veṣi rāyo vi yāsi duchunā madema śatahimāḥ suvīrāḥ ||

6.013.01a tvad viśvā subhaga saubhagāny agne vi yanti vanino na vayāḥ |
6.013.01c śruṣṭi rayir vājo vṛtratūrye divo vṛṣṭir iḍyo rītir apām ||
6.013.02a tvam bhago na ā hi ratnam iṣe pariṣmeva kṣayasi dasmavarcāḥ |
6.013.02c agne mitro na bṛhata ṛtasyāsi kṣattā vāmasya deva bhūreḥ ||
6.013.03a sa satpatiḥ śavasā hanti vṛtram agne vipro vi paṇer bharti vājam |
6.013.03c yaṃ tvam praceta ṛtajāta rāyā sajoṣā naptrāpām hinoṣi ||
6.013.04a yas te sūno sahaso gīrbhir ukthair yajñair marto niṣitim vedyānaḥ |
6.013.04c viśvam sa deva prati vāram agne dhatte dhānyam patyate vasavyaiḥ ||
6.013.05a tā nṛbhya ā sauśravasā suvīrāgne sūno sahasaḥ puṣyase dhāḥ |
6.013.05c kṛṇoṣi yac chavasā bhūri paśvo vayo vṛkāyāraye jasuraye ||
6.013.06a vadmā sūno sahaso no vihāyā agne tokaṃ tanayam vāji no dāḥ |
6.013.06c viśvābhir gīrbhir abhi pūrtim aśyām madema śatahimāḥ suvīrāḥ ||

6.014.01a agnā yo martyo duvo dhiyam jujoṣa dhītibhiḥ |
6.014.01c bhasan nu ṣa pra pūrvya iṣam vūrītāvase ||
6.014.02a agnir id dhi pracetā agnir vedhastama ṛṣiḥ |
6.014.02c agniṃ hotāram iḍate yajñeṣu manuṣo viśaḥ ||
6.014.03a nānā hy agne 'vase spardhante rāyo aryaḥ |
6.014.03c tūrvanto dasyum āyavo vrataiḥ sīkṣanto avratam ||
6.014.04a agnir apsām ṛtiṣaḥam vīram dadāti satpatim |
6.014.04c yasya trasanti śavasāḥ saṃcakṣi śatravo bhīyā ||
6.014.05a agnir hi vidmanā nido devo martam uruṣyati |
6.014.05c sahāvā yasyāvṛto rayir vājeṣv avṛtaḥ ||
6.014.06a achā no mitramaho deva devān agne vocaḥ sumatiṃ rodasyoḥ |
6.014.06c vīhi svastiṃ sukṣitiṃ divo nṛn dviṣo aṃhāmsi duritā tarema tā tarema tavāvasā
tarema ||

- 6.015.01a imam ū ṣu vo atithim uṣarbudham viśvāsām viśām patim ṛñjase girā |
6.015.01c vetīd divo januṣā kac cid ā śucir jyok cid atti garbho yad acyutam ||
6.015.02a mitram na yaṃ sudhitam bhṛgavo dadhur vanaspatāv iḍyam ūrdhvaśociṣam |
6.015.02c sa tvam supṛito vītahavye adbhuta praśastibhir mahayase dive-dive ||
6.015.03a sa tvam dakṣasyāvṛko vṛdho bhūr ayaḥ parasyāntarasya taruṣaḥ |
6.015.03c rāyaḥ sūno sahaso martyeṣv ā chardir yacha vītahavyāya sapratho bharadvājāya
saprathaḥ ||
6.015.04a dyutānaṃ vo atithim svarṇaram agniṃ hotāram manuṣaḥ svadhvaram |
6.015.04c vipraṃ na dyukṣavacasaṃ suvṛktibhir havyvāham aratiṃ devam ṛñjase ||
6.015.05a pāvakayā yaś citayantyā kṛpā kṣāman ruruca uṣaso na bhānunā |
6.015.05c tūrvan na yāmann etaśasya nū raṇa ā yo ghr̥ṇe na tatṛṣāṇo ajaraḥ ||
6.015.06a agniṃ-agniṃ vaḥ samidhā duvasyata priyam-priyaṃ vo atithiṃ gṛñīṣaṇi |
6.015.06c upa vo gīrbhir amṛtaṃ vivāsata
6.015.06d devo deveṣu vanate hi vāryaṃ devo deveṣu vanate hi no duvaḥ ||
6.015.07a samiddham agniṃ samidhā girā gṛṇe śucim pāvakam puro adhvare dhruvam |
6.015.07c vipraṃ hotāram puruvāram adruhaṃ kavim̐ sumnair̐ īmahe jātavedasam ||
6.015.08a tvāṃ dūtā agne amṛtaṃ yuge-yuge havyvāham dadhire pāyum iḍyam |
6.015.08c devāś ca martāś ca jāgṛviṃ vibhuṃ viśpatiṃ namasā ni śedire ||
6.015.09a vibhūṣann agna ubhayāṃ anu vratā dūto devānām rajasī sam īyase |
6.015.09c yat te dhītiṃ sumatiṃ āvṛñīmahe 'dha smā nas trivarūthaḥ śivo bhava ||
6.015.10a taṃ supratikaṃ sudṛśaṃ svañcam avidvāṃso viduṣtaraṃ sapema |
6.015.10c sa yakṣad viśvā vayunāni vidvān pra havyam agnir amṛteṣu vocat ||
6.015.11a tam agne pāsy uta tam piparṣi yas ta ānaḥ kavaye sūra dhītim |
6.015.11c yajñasya vā niśītiṃ voditiṃ vā tam it pṛṇakṣi śavasota rāyā ||
6.015.12a tvam agne vanuṣyato ni pāhi tvam u naḥ sahasāvann avadyāt |
6.015.12c saṃ tvā dhvasmanvad abhy etu pāthaḥ saṃ rayi spṛhayāyyaḥ sahasrī ||
6.015.13a agnir hotā gṛhapatiḥ sa rājā viśvā veda janimā jātavedaḥ |
6.015.13c devānām uta yo martyānām yajīṣthaḥ sa pra yajatām ṛtāvā ||
6.015.14a agne yad adya viśo adhvarasya hotaḥ pāvakaśoce veṣ tvam hi yajvā |
6.015.14c ṛtā yajāsi mahinā vi yad bhūr havya vaha yaviṣtha yā te adya ||
6.015.15a abhi prayāṃsi sudhitāni hi khyo ni tvā dadhīta rodasī yajadhyai |
6.015.15c avā no maghavan vājasātāv agne viśvāni dūrītā tarema tā tarema tavāvasā
tarema ||
6.015.16a agne viśvebhiḥ svanika devair̐ ūrṇāvantam prathamāḥ sīda yonim |
6.015.16c kulāyinaṃ ghr̥tavantaṃ savitre yajñam̐ naya yajamānāya sādhu ||
6.015.17a imam u tyam atharvavad agniṃ manthanti vedhasaḥ |
6.015.17c yam ankūyantaṃ ānayann amūram̐ śyāvyaḥbhyaḥ ||
6.015.18a janiṣvā devavitaye sarvatātā svastaye |
6.015.18c ā devān vakṣy amṛtāṃ ṛtāvṛdho yajñam̐ deveṣu pispr̥ṣaḥ ||
6.015.19a vayam u tvā gṛhapate janānām agne akarma samidhā bṛhantaṃ |
6.015.19c asthūri no gārhapatyāni santu tigmena nas tejasā saṃ śīśādhi ||
- 6.016.01a tvam agne yajñānām hotā viśveṣām hitaḥ |
6.016.01c devebhir mānuṣe jane ||
6.016.02a sa no mandrābhir adhvare jihvābhir yajā mahaḥ |
6.016.02c ā devān vakṣi yakṣi ca ||
6.016.03a vetthā hi vedho adhvanaḥ pathaś ca devāñjasā |
6.016.03c agne yajñeṣu suktrato ||

- 6.016.04a tvām iḍe adha dvitā bharato vājibhiḥ śunam |
6.016.04c ije yajñeṣu yajñiyam ||
- 6.016.05a tvam imā vāryā puru divodāsāya sunvate |
6.016.05c bharadvājāya dāsūṣe ||
- 6.016.06a tvam dūto amartya ā vahā daivyaṃ janam |
6.016.06c śṛṇvan viprasya suṣṭutim ||
- 6.016.07a tvām agne svādhyo martāso devavītaye |
6.016.07c yajñeṣu devam iḍate ||
- 6.016.08a tava pra yakṣi samdṛśam uta kratuṃ sudānavaḥ |
6.016.08c viśve juṣanta kāmīnaḥ ||
- 6.016.09a tvam hotā manurhito vahnir āsā viduṣṭaraḥ |
6.016.09c agne yakṣi divo viśaḥ ||
- 6.016.10a agna ā yāhi vītaye gṛṇāno havypadātaye |
6.016.10c ni hotā satsi barhiṣi ||
- 6.016.11a taṃ tvā samidbhir aṅgiro ghr̥tena vardhayāmasi |
6.016.11c bṛhad chocā yaviṣṭhya ||
- 6.016.12a sa naḥ pṛthu śravāyyam achā deva vivāsasi |
6.016.12c bṛhad agne suvīryam ||
- 6.016.13a tvām agne puṣkarād adhy atharvā nir amanthata |
6.016.13c mūrdhno viśvasya vāghataḥ ||
- 6.016.14a tam u tvā dadhyaṅṅ ṛṣiḥ putra idhe atharvaṇaḥ |
6.016.14c vṛtrahaṇam puram̐daram ||
- 6.016.15a tam u tvā pāthyo vṛṣā sam idhe dasyuhantamam |
6.016.15c dhanam̐jayaṃ raṇe-raṇe ||
- 6.016.16a ehy ū ṣu bravāṇi te 'gna itthetarā giraḥ |
6.016.16c ebhir vardhāsa indubhiḥ ||
- 6.016.17a yatra kva ca te mano dakṣam̐ dadhasa uttaram |
6.016.17c tatrā sadaḥ kṛṇavase ||
- 6.016.18a nahi te pūrtam akṣipad bhuvan nemānām vaso |
6.016.18c athā duvo vanavase ||
- 6.016.19a āgnir agāmi bhārato vṛtrahā purucetanaḥ |
6.016.19c divodāsasya satpatih̐ ||
- 6.016.20a sa hi viśvāti pārthivā rayiṃ dāśan mahitvanā |
6.016.20c vanvann avāto astr̥taḥ ||
- 6.016.21a sa pratnavan naviyasagne dyumnena sam̐yatā |
6.016.21c bṛhat tatantha bhānunā ||
- 6.016.22a pra vaḥ sakhāyo agnaye stomam̐ yajñam̐ ca dhṛṣṇuyā |
6.016.22c arca gāya ca vedhase ||
- 6.016.23a sa hi yo mānuṣā yugā sīdad dhotā kavikratuḥ |
6.016.23c dūtaś ca havyvāhanaḥ ||
- 6.016.24a tā rājānā śucivratādityān mārutaṃ gaṇam |
6.016.24c vaso yakṣiha rodasī ||
- 6.016.25a vasvī te agne samdṛṣṭir iṣayate martyāya |
6.016.25c ūrjo napād amṛtasya ||
- 6.016.26a kratvā dā astu śreṣṭho 'dya tvā vanvan surekṇāḥ |
6.016.26c marta ānāśa suvṛktim ||
- 6.016.27a te te agne tvotā iṣayanto viśvam̐ āyuḥ |
6.016.27c taranto aryo arātir vanvanto aryo arātih̐ ||
- 6.016.28a agnis tigmēna śociśā yāsad viśvam̐ ny atrīṇam |

- 6.016.28c agnir no vanate rayim ||
6.016.29a suvīraṃ rayim ā bhara jātavedo vicarṣaṇe |
6.016.29c jahi rakṣāṃsi sukrato ||
6.016.30a tvam naḥ pāhy aṃhaso jātavedo aghāyataḥ |
6.016.30c rakṣā ṇo brahmaṇas kave ||
6.016.31a yo no agne dureva ā marto vadhāya dāśati |
6.016.31c tasmān naḥ pāhy aṃhasaḥ ||
6.016.32a tvam taṃ deva jihvayā pari bādhasva duṣkṛtam |
6.016.32c marto yo no jighāṃsati ||
6.016.33a bharadvājāya saprathaḥ śarma yacha sahantya |
6.016.33c agne vareṇyam vasu ||
6.016.34a agnir vṛtrāṇi jaṅghanad draviṇasyur vipanyayā |
6.016.34c samiddhaḥ śukra āhutaḥ ||
6.016.35a garbhe mātuḥ pituṣ pitā vididyutāno akṣare |
6.016.35c sīdann ṛtasya yonim ā ||
6.016.36a brahma prajāvad ā bhara jātavedo vicarṣaṇe |
6.016.36c agne yad didayad divi ||
6.016.37a upa tvā raṇvasaṃdṛśam prayasvantaḥ sahaskrta |
6.016.37c agne sasṛjmahe giraḥ ||
6.016.38a upa chāyām iva ghr̥ṇer aganma śarma te vayam |
6.016.38c agne hiraṇyasamḍṛśaḥ ||
6.016.39a ya ugra iva śaryahā tigmaśṛngo na vaṃsagaḥ |
6.016.39c agne puro ruojitha ||
6.016.40a ā yaṃ haste na khādinam śisūṃ jātam na bibhrati |
6.016.40c viśām agniṃ svadhvaram ||
6.016.41a pra devam devavītaye bharatā vasuvittamam |
6.016.41c ā sve yonau ni ṣīdatu ||
6.016.42a ā jātam jātavedasi priyam śīśītātithim |
6.016.42c syona ā gṛhapatim ||
6.016.43a agne yukṣvā hi ye tavāśvāso deva sādhaveḥ |
6.016.43c araṃ vahanti manyave ||
6.016.44a achā no yāhy ā vahābhi prayāṃsi vītaye |
6.016.44c ā devān somapītaye ||
6.016.45a ud agne bhārata dyumad ajasreṇa davidyutat |
6.016.45c śocā vi bhāhy ajara ||
6.016.46a vīti yo devam marto duvasyed agnim īditādhvare haviṣmān |
6.016.46c hotāraṃ satyayajaṃ rodasyor uttānahasto namasā vivāset ||
6.016.47a ā te agna ṛcā havir hṛdā taṣṭam bharāmasi |
6.016.47c te te bhavantūkṣaṇa ṛṣabhāso vaśā uta ||
6.016.48a agniṃ devāso agriyam indhate vṛtrahantamam |
6.016.48c yenā vasūny ābhṛtā ṛḍhā rakṣāṃsi vājina ||
- 6.017.01a pibā somam abhi yam ugra tarda ūrvaṃ gavyam mahi gṛṇāna indra |
6.017.01c vi yo dhṛṣṇo vadhiṣo vajrahasta viśvā vṛtram amitriyā śavobhiḥ ||
6.017.02a sa im pāhi ya ṛjīṣi tarutro yaḥ śipravān vṛṣabho yo matinām |
6.017.02c yo gotrabhid vajrabhṛd yo hariṣṭhāḥ sa indra citrām̐ abhi ṛndhi vājān ||
6.017.03a evā pāhi pratnathā mandatu tvā śrudhi brahma vāvṛdhasvota gīrbhiḥ |
6.017.03c āviḥ sūryam kṛṇuhi pīpihiṣo jahi śatrūṃr abhi gā indra ṛndhi ||

6.017.04a te tvā madā bṛhad indra svadhāva ime pītā ukṣayanta dyumantam |
 6.017.04c mahām anūnaṃ tavasaṃ vibhūtim matsarāso jarhṣanta prasāham ||
 6.017.05a yebhiḥ sūryam uṣasam mandasāno 'vāsayo 'pa dṛḍhāni dardrat |
 6.017.05c mahām adrim pari gā indra santam nutthā acyutaṃ sadasas pari svāt ||
 6.017.06a tava kratvā tava tad daṃsanābhir āmāsu pakvaṃ śacyā ni dīdhaḥ |
 6.017.06c aurnor dura usriyābhyo vi dṛḍhod ūrvād gā asṛjo aṅgirasvān ||
 6.017.07a paprātha kṣām mahi daṃso vy urvīm upa dyām iṣvo bṛhad indra stabhāyah |
 6.017.07c adhārayo rodasī devaputre pratne mātārā yahvī ṛtasya ||
 6.017.08a adha tvā viśve pura indra devā ekaṃ tavasaṃ dadhire bharāya |
 6.017.08c adevo yad abhy auhiṣṭa devān svarṣātā vṛṇata indram atra ||
 6.017.09a adha dyauś cit te apa sā nu vajrād dvitānamad bhīyasā svasya manyoḥ |
 6.017.09c ahiṃ yad indro abhy ohasānaṃ ni cid viśvāyuh śayathe jaghāna ||
 6.017.10a adha tvaṣṭā te maha ugra vajraṃ sahasrabhṛṣṭiṃ vavṛtac chatāśrim |
 6.017.10c nikāmam aramaṇasaṃ yena navantam ahiṃ sam piṇag ṛjīṣin ||
 6.017.11a vardhān yaṃ viśve marutaḥ sajoṣāḥ pacac chatam mahiṣāṃ indra tubhyam |
 6.017.11c pūṣā viṣṇus trīṇi sarāṃsi dhāvan vṛtrahaṇam madiram aṃsum asmai ||
 6.017.12a ā kṣodo mahi vṛtaṃ nadīnām pariṣṭhitam asṛja ūrmim apām |
 6.017.12c tāsām anu pravata indra panthām prārdayo nīcīr apasaḥ samudram ||
 6.017.13a evā tā viśvā cakṛvāṃsam indram mahām ugram ajuryaṃ sahodām |
 6.017.13c suvīraṃ tvā svāyudhaṃ suvajram ā brahma navyam avase vavṛtyāt ||
 6.017.14a sa no vājāya śravasa iṣe ca rāye dhehi dyumata indra viprān |
 6.017.14c bharadvāje nṛvata indra sūrīn divi ca smaidhi pārye na indra ||
 6.017.15a ayā vājaṃ devahitaṃ sanema madema śatahimāḥ suvirāḥ ||

6.018.01a tam u ṣṭuhi yo abhibhūtyojā vanvann avātaḥ puruhūta indraḥ |
 6.018.01c aṣāḍham ugram sahamānam ābhir gīrbhir vardha vṛṣabhaṃ carṣaṇinām ||
 6.018.02a sa yudhmaḥ satvā khajakṛt samadvā tuvimrakṣo nadanumāṃ ṛjīṣi |
 6.018.02c bṛhadreṇuś cyavano mānuṣiṇām ekaḥ kṛṣṭinām abhavat sahāvā ||
 6.018.03a tvaṃ ha nu tyad adamāyo dasyūṃr ekaḥ kṛṣṭīr avanor āryāya |
 6.018.03c asti svin nu vīryaṃ tat ta indra na svid asti tad ṛtuthā vi vocaḥ ||
 6.018.04a sad id dhi te tuvijātasya manye sahaḥ sahiṣṭha turatas turasya |
 6.018.04c ugram ugrasya tavasas taviyo 'radhrasya radhraturo babhūva ||
 6.018.05a tan naḥ pratnaṃ sakhyam astu yuṣme itthā vadadbhir valam aṅgirobhiḥ |
 6.018.05c hann acyutacyud dasmeṣayantam ṛnoḥ puro vi duro asya viśvāḥ ||
 6.018.06a sa hi dhībhir havyo asty ugra iśānakṛn mahati vṛtratūrye |
 6.018.06c sa tokasātā tanaye sa vajrī vitantasāyō abhavat samatsu ||
 6.018.07a sa majmanā janima mānuṣāṇām amartyena nāmnāti pra sarsre |
 6.018.07c sa dyumnena sa śavasota rāyā sa vīryeṇa nṛtamaḥ samokāḥ ||
 6.018.08a sa yo na muhe na mithū jano bhūt sumantunāmā cumuriṃ dhuniṃ ca |
 6.018.08c vṛṇak pipruṃ śambaraṃ śuṣṇam indraḥ purāṃ cyautnāya śayathāya nū cit ||
 6.018.09a udāvātā tvakṣasā panyasā ca vṛtrahatyāya ratham indra tiṣṭha |
 6.018.09c dhiṣva vajraṃ hasta ā dakṣiṇatrābhi pra manda purudatra māyāḥ ||
 6.018.10a agnir na śuṣkaṃ vanam indra hetī rakṣo ni dhakṣy aśanir na bhīmā |
 6.018.10c gambhīraya iṣvayā yo ruojādhvānayad duritā dambhayac ca ||
 6.018.11a ā sahasram pathibhir indra rāyā tuvidyumna tuvivājebhir arvāk |
 6.018.11c yāhi sūno sahaso yasya nū cid adeva iṣe puruhūta yotoḥ ||
 6.018.12a pra tuvidyumnasya sthavirasya ghṛṣver divo rarapśe mahimā pṛthivyāḥ |
 6.018.12c nāsya śatrur na pratimānam asti na pratiṣṭhiḥ purumāyasya sahyoḥ ||

6.018.13a pra tat te adyā karaṇam kṛtam bhūt kutsam yad āyum atithigvam asmai |
 6.018.13c purū sahasrā ni śīsā abhi kṣām ut tūrvayāṇam dhṛṣatā ninetha ||
 6.018.14a anu tvāhighne adha deva devā madan viśve kavitamam kavīnām |
 6.018.14c karo yatra varivo bādhitāya dive janāya tanve gṛṇānaḥ ||
 6.018.15a anu dyāvāpṛthivī tat ta ojo 'martyā jihata indra devāḥ |
 6.018.15c kṛṣvā kṛtno akṛtam yat te asty uktham navīyo janayasva yajñaiḥ ||

6.019.01a mahāṃ indro nṛvad ā carṣaṇiprā uta dvibarhā aminaḥ sahoḃhiḥ |
 6.019.01c asmadryag vāvṛdhe vīryāyoruḥ pṛthuḥ sukṛtaḥ kartṛbhir bhūt ||
 6.019.02a indram eva dhiṣaṇā sātaye dhād bṛhantam ṛṣvam ajaram yuvānam |
 6.019.02c aṣādḥena śavasā śūsuvāṃsam sadyas cid yo vāvṛdhe asāmi ||
 6.019.03a pṛthū karasnā bahulā gabhastī asmadryak sam mimihi śravāṃsi |
 6.019.03c yūtheva paśvaḥ paśupā damūnā asmāṃ indrābhy ā vavṛtsvājau ||
 6.019.04a tam va indram catinam asya śākair iha nūnam vājayanto huvema |
 6.019.04c yathā cit pūrve jaritāra āsur anedyā anavadyā ariṣṭāḥ ||
 6.019.05a dhṛtavrato dhanadāḥ somavṛddhaḥ sa hi vāmasya vasunaḥ purukṣuḥ |
 6.019.05c sam jagmire pathyā rāyo asmin samudre na sindhavo yādamānāḥ ||
 6.019.06a śaviṣṭham na ā bhara śūra śava ojiṣṭham ojo abhibhūta ugram |
 6.019.06c viśvā dyumnā vṛṣṇyā mānuṣāṇām asmabhyaṃ dā harivo mādayadhyai ||
 6.019.07a yas te madaḥ pṛtanāśād amṛdhra indra tam na ā bhara śūsuvāṃsam |
 6.019.07c yena tokasya tanayasya sātatau maṃsīmahi jigīvāṃsas tvotāḥ ||
 6.019.08a ā no bhara vṛṣaṇam śuṣmam indra dhanasṛtam śūsuvāṃsam sudakṣam |
 6.019.08c yena vaṃsāma pṛtanāsu śatrūn tavotibhir uta jāmiṃr ajāmīn ||
 6.019.09a ā te śuṣmo vṛṣabha etu paścād ottarād adharād ā purastāt |
 6.019.09c ā viśvato abhi sam etv arvān indra dyumnam svarvad dhehy asme ||
 6.019.10a nṛvat ta indra nṛtamābhir ūtī vaṃsīmahi vāmam śromatebhiḥ |
 6.019.10c īkṣe hi vasva ubhayasya rājan dhā ratnam mahi sthūram bṛhantam ||
 6.019.11a marutvantam vṛṣabham vāvṛdhānam akavāriṃ divyam śāsam indram |
 6.019.11c viśvāsāham avase nūtanāyogam sahodām iha tam huvema ||
 6.019.12a janam vajrin mahi cin manyamānam ebhyo nṛbhyo randhayā yeṣv asmi |
 6.019.12c adhā hi tvā pṛthivyām śūrasātatau havāmahe tanaye goṣv apsu ||
 6.019.13a vayam ta ebhiḥ puruhūta sakhyaiḥ śatroḥ-śatoroḥ uttara it syāma |
 6.019.13c ghnanto vṛtrāny ubhayāni śūra rāyā madema bṛhatā tvotāḥ ||

6.020.01a dyaur na ya indrābhi bhūmāryas tasthau rayiḥ śavasā pṛtsu janān |
 6.020.01c tam naḥ sahasrabharam urvarāsām daddhi sūno sahaso vṛtraturam ||
 6.020.02a divo na tubhyam anv indra satrāsuryam devebhir dhāyi viśvam |
 6.020.02c ahim yad vṛtram apo vavrivāṃsam hann ṛjīṣin viṣṇunā sacānaḥ ||
 6.020.03a tūrvann ojīyān tavasas taviyān kṛtabrahmendro vṛddhamahāḥ |
 6.020.03c rājābhavan madhunaḥ somyasya viśvāsām yat purām dartnum āvat ||
 6.020.04a śatair apadran paṇaya indrātra daśoṇaye kavaye 'rkasātatau |
 6.020.04c vadhaiḥ śuṣṇasyāśuṣasya māyāḥ pitvo nārireḥ kim cana pra ||
 6.020.05a maho druho apa viśvāyu dhāyi vajrasya yat patane pādi śuṣṇaḥ |
 6.020.05c uru ṣa saratham sārathaye kar indraḥ kutsāya sūryasya sātatau ||
 6.020.06a pra śyeno na madiram aṃsum asmai śiro dāsasya namucer mathāyan |
 6.020.06c prāvan namīm sāpyam sasantam pṛṇag rāyā sam iṣā sam svasti ||
 6.020.07a vi pipror ahimāyasya dṛdhāḥ puro vajriṃ chavasā na dardaḥ |

6.020.07c sudāman tad rekṇo apramṛṣyam ṛjīsvane dātram dāsuṣe dāḥ ||
 6.020.08a sa vetasum daśamāyam daṣoṇim tūtujim indraḥ svabhiṣṭisumnaḥ |
 6.020.08c ā tugraṃ śaśvad ibhaṃ dyotanāya mātur na sīm upa srjā iyadhyai ||
 6.020.09a sa im sprdho vanate apratīto bibhrad vajraṃ vṛtrahaṇaṃ gabhastau |
 6.020.09c tiṣṭhad dharī adhy asteva garte vacoyujā vahata indram ṛṣvam ||
 6.020.10a sanema te 'vasā navya indra pra pūrava stavanta enā yajñaiḥ |
 6.020.10c sapta yat puraḥ śarma śāradīr dard dhan dāsīḥ purukutsāya śikṣan ||
 6.020.11a tvaṃ vṛdha indra pūrvyo bhūr varivasyann uśane kāvyāya |
 6.020.11c parā navavāstvam anudeyam mahe pitre dadātha svam napātam ||
 6.020.12a tvaṃ dhunir indra dhunimatīr ṛṇor apaḥ sīrā na sravantīḥ |
 6.020.12c pra yat samudram ati śūra parṣi pārāyā turvaśam yadum svasti ||
 6.020.13a tava ha tyad indra viśvam ājau sasto dhunīcumurī yā ha siṣvap |
 6.020.13c dīdayad it tubhyaṃ somebhiḥ sunvan dabhītir idhmabhṛtiḥ pakthy arkaiḥ ||

6.021.01a imā u tvā purutamasya kāror havyaṃ vīra havyā havante |
 6.021.01c dhiyo ratheṣṭhām ajaraṃ naviyo rayir vibhūtīr iyate vacasyā ||
 6.021.02a tam u stuṣa indraṃ yo vidāno girvāhasaṃ gīrbhir yajñavṛddham |
 6.021.02c yasya divam ati mahnā pṛthivyāḥ purumāyasya ririce mahitvam ||
 6.021.03a sa it tamo 'vayunaṃ tatanvat sūryeṇa vayunavac cakāra |
 6.021.03c kadā te martā amṛtasya dhāmeyakṣanto na minanti svadhāvaḥ ||
 6.021.04a yas tā cakāra sa kuha svid indraḥ kam ā janaṃ carati kāsū vikṣu |
 6.021.04c kas te yajño manase śaṃ varāya ko arka indra katamaḥ sa hotā ||
 6.021.05a idā hi te veṣataḥ purājāḥ pratnāsa āsuḥ purukṛt sakhāyaḥ |
 6.021.05c ye madhyamāsa uta nūtanāsa utāvamasya puruhūta bodhi ||
 6.021.06a tam pṛchanto 'varāsaḥ parāṇi pratnā ta indra śrutyānu yemuḥ |
 6.021.06c arcāmasi vīra brahmavāho yād eva vidma tāt tvā mahāntam ||
 6.021.07a abhi tvā pājo rakṣaso vi tasthe mahi jajñānam abhi tat su tiṣṭha |
 6.021.07c tava pratnena yujyena sakhyā vajreṇa dhṛṣṇo apa tā nudasva ||
 6.021.08a sa tu śrudhīndra nūtanasya brahmaṇyato vīra kārudhāyaḥ |
 6.021.08c tvaṃ hy āpiḥ pradivi pitṛṇām śaśvad babhūtha suhava eṣṭau ||
 6.021.09a protaye varuṇam mitram indram marutaḥ kṛṣvāvase no adya |
 6.021.09c pra pūṣaṇaṃ viṣṇum agnim puraṃdhim savitāram oṣadhīḥ parvatāmś ca ||
 6.021.10a ima u tvā puruśāka prayajyo jaritāro abhy arcanty arkaiḥ |
 6.021.10c śrudhī havam ā huvato huvāno na tvāvāṃ anyo amṛta tvad asti ||
 6.021.11a nū ma ā vācam upa yāhi vidvān viśvebhiḥ sūno sahaso yajatraiḥ |
 6.021.11c ye agnijihvā ṛtasāpa āsur ye manum cakrur uparaṃ dasāya ||
 6.021.12a sa no bodhi puraetā sugeṣūta durgeṣu pathikṛd vidānaḥ |
 6.021.12c ye aśramāsa uravo vahiṣṭhās tebhir na indrābhi vakṣi vājam ||

6.022.01a ya eka id dhavyaś carṣaṇinām indraṃ taṃ gīrbhir abhy arca ābhiḥ |
 6.022.01c yaḥ patyate vṛṣabho vṛṣṇyāvān satyaḥ satvā purumāyaḥ sahasvān ||
 6.022.02a tam u naḥ pūrve pitaro navagvāḥ sapta viprāso abhi vājayantaḥ |
 6.022.02c nakṣaddābhaṃ taturim parvateṣṭhām adroghavācam matibhiḥ śaviṣṭham ||
 6.022.03a tam imaha indram asya rāyaḥ puruvīrasya nṛvataḥ purukṣoḥ |
 6.022.03c yo askṛdhoyur ajaraḥ svarvān tam ā bhara harivo mādayadhyai ||
 6.022.04a tan no vi voco yadi te purā cij jaritāra ānaśuḥ sumnam indra |
 6.022.04c kas te bhāgaḥ kiṃ vayo dudhra khidvaḥ puruhūta purūvaso 'suraghnaḥ ||

6.022.05a tam pṛchantī vajrahastam ratheṣṭhām indram vepī vakvarī yasya nū gīḥ |
 6.022.05c tuvigrābham tuvikūrmim rabhodām gātum iṣe nakṣate tumram acha ||
 6.022.06a ayā ha tyam māyayā vāvṛdhānam manojuvā svatavaḥ parvatena |
 6.022.06c acyutā cid vīditā svojo rujo vi dṛḍhā dhṛṣatā virapśin ||
 6.022.07a tam vo dhiyā navyasyā śaviṣṭham pratnam pratnavat paritamśayadhyai |
 6.022.07c sa no vakṣad animānaḥ suvahmendro viśvāny ati durgahāṇi ||
 6.022.08a ā janāya druhvaṇe pāṛthivāni divyāni dīpayo 'ntarikṣā |
 6.022.08c tapā vṛṣan viśvataḥ śociṣā tām brahmadviṣe śocaya kṣām apaś ca ||
 6.022.09a bhuvo janasya divyasya rājā pāṛthivasya jagatas tveṣasamḍṛk |
 6.022.09c dhiṣva vajram dakṣiṇa indra haste viśvā ajurya dayase vi māyāḥ ||
 6.022.10a ā samyatam indra naḥ svastiṃ śatrutūryāya bṛhatim amṛdhrām |
 6.022.10c yayā dāsāny āryāṇi vṛtrā karo vajrin sutukā nāhuṣāṇi ||
 6.022.11a sa no niyudbhiḥ puruhūta vedho viśvavārābhir ā gahi prayajyo |
 6.022.11c na yā adevo varate na deva ābhir yāhi tūyam ā madryadrik ||

6.023.01a suta it tvaṃ nimiśla indra some stome brahmaṇi śasyamāna ukthe |
 6.023.01c yad vā yuktābhyām maghavan haribhyām bibhrad vajram bāhvor indra yāsi ||
 6.023.02a yad vā divi pārye suṣvim indra vṛtrahatye 'vasi śūrasātau |
 6.023.02c yad vā dakṣasya bibhyuṣo abibhyad arandhayaḥ śardhata indra dasyūn ||
 6.023.03a pātā sutam indro astu somam praṇenir ugro jaritāram ūti |
 6.023.03c kartā vīrāya suṣvaya ulokaṃ dātā vasu stuvate kiraye cit ||
 6.023.04a ganteyānti savanā haribhyām babhrir vajram papiḥ somam dadir gāḥ |
 6.023.04c kartā vīram naryam sarvavīram śrotā havam gṛṇata stomavāhāḥ ||
 6.023.05a asmai vayam yad vāvāna tad viviṣma indrāya yo naḥ pradivo apas kaḥ |
 6.023.05c sute some stumasi śaṃsad ukthendrāya brahma vardhanam yathāsat ||
 6.023.06a brahmāṇi hi cakṛṣe vardhanāni tāvat ta indra matibhir viviṣmaḥ |
 6.023.06c sute some sutapāḥ śaṃtamāni rāṇḍyā kriyāsma vakṣaṇāni yajñaiḥ ||
 6.023.07a sa no bodhi puroḍāśam rarānaḥ pibā tu somam goṛjikam indra |
 6.023.07c edam barhir yajamānasya sīdorum kṛdhi tvāyata ulokam ||
 6.023.08a sa mandasvā hy anu joṣam ugra pra tvā yajñāsa ime aśnuvantu |
 6.023.08c preme havāsaḥ puruhūtam asme ā tveyam dhīr avasa indra yamyāḥ ||
 6.023.09a tam vaḥ sakhāyaḥ sam yathā suteṣu somebhir im pṛṇatā bhojam indram |
 6.023.09c kuvit tasmā asati no bharāya na suṣvim indro 'vase mṛdhāti ||
 6.023.10a eved indraḥ sute astāvi some bharadvājeṣu kṣayad in maghonaḥ |
 6.023.10c asad yathā jaritra uta sūrī indro rāyo viśvavārasya dātā ||

6.024.01a vṛṣā mada indre śloka ukthā sacā someṣu sutapā ṛjīṣi |
 6.024.01c arcatro maghavā nṛbhya ukthair dyukṣo rājā girām akṣitotiḥ ||
 6.024.02a taturir vīro naryo vicetāḥ śrotā havam gṛṇata urvyūtiḥ |
 6.024.02c vasuḥ śaṃso narām kārudhāyā vājī stuto vidathe dāti vājam ||
 6.024.03a akṣo na cakryoḥ śūra bṛhan pra te mahnā ririce rodasyoḥ |
 6.024.03c vṛkṣasya nu te puruhūta vayā vy ūtayo ruruhur indra pūrvīḥ ||
 6.024.04a śacīvatas te puruśāka śākā gavām iva srutayaḥ saṃcaraṇiḥ |
 6.024.04c vatsānām na tantayas ta indra dāmanvanto adāmānaḥ sudāman ||
 6.024.05a anyad adya karvaram anyad u śvo 'sac ca san muhur ācakrir indraḥ |
 6.024.05c mitro no atra varuṇas ca pūṣāryo vaśasya paryetāsti ||
 6.024.06a vi tvad āpo na parvatasya pṛṣṭhād ukthebhir indrānāyanta yajñaiḥ |

6.024.06c tam tvābhiḥ suṣṭutibhir vājayanta ājīm na jagmur girvāho aśvāḥ ||
 6.024.07a na yaṃ jaranti śarado na māsā na dyāva indram avakarśayanti |
 6.024.07c vṛddhasya cid vardhatām asya tanū stomebhir ukthaiś ca śasyamānā ||
 6.024.08a na viḍave namate na sthirāya na śardhate dasyujūtāya stavān |
 6.024.08c ajrā indrasya girayaś cid ṛṣvā gambhīre cid bhavati gādham asmai ||
 6.024.09a gambhīreṇa na uruṇāmatrin preṣo yandhi sutapāvan vājān |
 6.024.09c sthā ū ṣu ūrdhva ūti ariṣaṇyann aktor vyuṣṭau paritakmyāyām ||
 6.024.10a sacasva nāyam avase abhika ito vā tam indra pāhi riṣaḥ |
 6.024.10c amā cainam araṇye pāhi riṣo madema śatahimāḥ suvirāḥ ||

6.025.01a yā ta ūtir avamā yā paramā yā madhyamendra śuṣminn asti |
 6.025.01c tābhir ū ṣu vṛtrahatye 'vir na ebhiś ca vājair mahān na ugra ||
 6.025.02a ābhi spr̥dho mithatir ariṣaṇyann amitrasya vyathayā manyum indra |
 6.025.02c ābhir viśvā abhiyujō viṣūcir āryāya viśo 'va tārīr dāsīḥ ||
 6.025.03a indra jāmaya uta ye 'jāmāyo 'rvācīnāso vanuṣo yuyujre |
 6.025.03c tvam eṣām vithurā śavāmsi jahi vṛṣṇyāni kṛṇuhī parācaḥ ||
 6.025.04a śūro vā sūraṃ vanate śarīrais tanūrucā taruṣi yat kṛṇvaite |
 6.025.04c toke vā goṣu tanaye yad apsu vi krandasī urvarāsu bravaite ||
 6.025.05a nahi tvā śūro na turo na dhṛṣṇur na tvā yodho manyamāno yuyodha |
 6.025.05c indra nakiṣ ṭvā praty asty eṣām viśvā jātāny abhy asi tāni ||
 6.025.06a sa patyata ubhayor nṛmṇam ayor yadī vedhasaḥ samithe havante |
 6.025.06c vṛtre vā maho nṛvati kṣaye vā vyacasvantā yadi vitantasaite ||
 6.025.07a adha smā te carṣaṇayo yad ejān indra trātota bhavā varūtā |
 6.025.07c asmākāso ye nṛtamāso arya indra sūrayo dadhire puro naḥ ||
 6.025.08a anu te dāyi maha indriyāya satrā te viśvam anu vṛtrahatye |
 6.025.08c anu kṣatram anu saho yajatrendra devebhir anu te nṛsahye ||
 6.025.09a evā na spr̥dhaḥ sam ajā samatsv indra rārandhi mithatir adeviḥ |
 6.025.09c vidyāma vastor avasā gṛṇanto bharadvājā uta ta indra nūnam ||

6.026.01a śrudhī na indra hvayāmasi tvā maho vājasya sātau vāvṛṣāṇāḥ |
 6.026.01c saṃ yad viśo 'yanta śūrasātā ugraṃ no 'vaḥ pārye ahan dāḥ ||
 6.026.02a tvām vāji havate vājineyo maho vājasya gadhyasya sātau |
 6.026.02c tvām vṛtreṣv indra satpatim tarutraṃ tvām caṣṭe muṣṭihā goṣu yudhyan ||
 6.026.03a tvām kavim codayo 'rkasātau tvam kutsāya śuṣṇam dāsūṣe vark |
 6.026.03c tvam śiro amarmaṇaḥ parāhann atithigvāya śamsyam kariṣyan ||
 6.026.04a tvam ratham pra bhāro yodham ṛṣvam āvo yudhyantaṃ vṛṣabhaṃ daśadyum |
 6.026.04c tvam tugraṃ vetasave sacāhan tvam tujim gṛṇantam indra tūtoḥ ||
 6.026.05a tvam tad uktham indra barhaṇā kaḥ pra yac chatā sahasrā sūra darṣi |
 6.026.05c ava girer dāsaṃ śambaram han prāvo divodāsaṃ citrābhir ūti ||
 6.026.06a tvam śraddhābhir mandasānaḥ somair dabhītaye cumurim indra siṣvap |
 6.026.06c tvam rajim piṭhinase daśasyan ṣaṣṭim sahasrā śacyā sacāhan ||
 6.026.07a ahaṃ cana tat sūribhir ānaśyām tava jyāya indra sumnam ojaḥ |
 6.026.07c tvayā yat stavante sadhavīra virās trivarūthēna nahuṣā śaviṣṭha ||
 6.026.08a vayaṃ te asyām indra dyumnaḥūtau sakhāyaḥ syāma mahina preṣṭhāḥ |
 6.026.08c prātardaniḥ kṣatraśrīr astu śreṣṭho ghane vṛtrāṇām sanaye dhanānām ||

6.027.01a kim asya made kim v asya pītāv indraḥ kim asya sakhye cakāra |
 6.027.01c raṇā vā ye niṣadi kiṃ te asya purā vividre kim u nūtanāsaḥ ||
 6.027.02a sad asya made sad v asya pītāv indraḥ sad asya sakhye cakāra |
 6.027.02c raṇā vā ye niṣadi sat te asya purā vividre sad u nūtanāsaḥ ||
 6.027.03a nahi nu te mahimanaḥ samasya na maghavan maghavattvasya vidma |
 6.027.03c na rādhaso-rādhaso nūtanasyendra nakir dadṛśa indriyaṃ te ||
 6.027.04a etat tyat ta indriyam aceti yenāvadhīr varaśikhasya śeṣaḥ |
 6.027.04c vajrasya yat te nihatasya śuṣmāt svanāc cid indra paramo dadāra ||
 6.027.05a vadhīd indro varaśikhasya śeṣo 'bhyāvartine cāyamānāya śikṣan |
 6.027.05c vṛcīvato yad dhariyūpiyāyāṃ han pūrve ardhe bhiyasāparo dart ||
 6.027.06a trimśacchatam varmaṇa indra sākam yavyāvatyām puruhūta śravasyā |
 6.027.06c vṛcivantaḥ śarave patyamānāḥ pātrā bhindānā nyarthāny āyan ||
 6.027.07a yasya gāvāv aruṣā sūyavasyū antar ū ṣu carato rerihānā |
 6.027.07c sa sṛñjayāya turvaśam parādād vṛcīvato daivavātāya śikṣan ||
 6.027.08a dvayāṃ agne rathino viṃsatim gā vadhūmato maghavā mahyaṃ samrāt |
 6.027.08c abhyāvartī cāyamāno dadāti dūṇāśeyam dakṣiṇā pārhavānām ||

6.028.01a ā gāvo agmann uta bhadrām akran sīdantu goṣṭhe raṇayantv asme |
 6.028.01c prajāvatīḥ pururūpā iha syur indrāya pūrvīr uṣaso duhānāḥ ||
 6.028.02a indro yajvane pṛṇate ca śikṣaty uped dadāti na svam muṣāyati |
 6.028.02c bhūyo-bhūyo rayim id asya vardhayann abhinne khilye ni dadhāti devayum ||
 6.028.03a na tā naśanti na dabhāti taskaro nāsām āmitro vyathir ā dadharṣati |
 6.028.03c devāṃś ca yābhir yajate dadāti ca jyog it tābhiḥ sacate gopatiḥ saha ||
 6.028.04a na tā arvā reṇukakāṭo aśnute na saṃskṛtatram upa yanti tā abhi |
 6.028.04c urugāyam abhayaṃ tasya tā anu gāvo martasya vi caranti yajvanaḥ ||
 6.028.05a gāvo bhago gāva indro me achān gāvaḥ somasya prathamasya bhakṣaḥ |
 6.028.05c imā yā gāvaḥ sa janāsa indra ichāmīd dhṛdā manasā cid indram ||
 6.028.06a yūyam gāvo medayathā kṛśam cid aśrīram cit kṛṇuthā supratīkam |
 6.028.06c bhadrām gṛham kṛṇutha bhadravāco bṛhad vo vaya ucyate sabhāsu ||
 6.028.07a prajāvatīḥ sūyavasam riśantiḥ śuddhā apaḥ suprapāṇe pibantiḥ |
 6.028.07c mā va stena īsata māghaśamsaḥ pari vo hetī rudrasya vṛjyāḥ ||
 6.028.08a upedam upaparcanam āsu goṣūpa pṛcyatām |
 6.028.08c upa ṛṣabhasya retasy upendra tava vīrye ||

6.029.01a indram vo naraḥ sakhyāya sepur maho yantaḥ sumataye cakānāḥ |
 6.029.01c maho hi dātā vajrahasto asti mahām u raṇvam avase yajadvam ||
 6.029.02a ā yasmin haste naryā mimikṣur ā rathe hiraṇyaye ratheṣṭhāḥ |
 6.029.02c ā raśmayo gabhastyo sthūrayor ādhvann aśvāso vṛṣaṇo yujānāḥ ||
 6.029.03a śriye te pādā duva ā mimikṣur dhṛṣṇur vajrī śavasā dakṣiṇāvān |
 6.029.03c vasāno atkam surabhiṃ dṛśe kam svar ṇa nṛtav iṣiro babhūtha ||
 6.029.04a sa soma āmiślatamaḥ suto bhūd yasmin paktiḥ pacyate santi dhānāḥ |
 6.029.04c indram nara stuvanto brahmakārā ukthā śamsanto devavātataṃ ||
 6.029.05a na te antaḥ śavaso dhāy asya vi tu bābadhe rodasī mahitvā |
 6.029.05c ā tā sūriḥ pṛṇati tūtujāno yūthevāpsu samījamāna ūti ||
 6.029.06a eved indraḥ suhava ṛṣvo astūtī anūtī hiriśipraḥ satvā |
 6.029.06c evā hi jāto asamātyojāḥ purū ca vṛtrā hanati ni dasyūn ||

6.030.01a bhūya id vāvṛdhe vīryāyaṃ eko ajuryo dayate vasūni |
 6.030.01c pra ririce diva indraḥ pṛthivyā ardham id asya prati rodasī ubhe ||
 6.030.02a adhā manye bṛhad asuryam asya yāni dādharma nakir ā mināti |
 6.030.02c dive-dive sūryo darśato bhūd vi sadmāny urviyā sukratur dhāt ||
 6.030.03a adyā cin nū cit tad apo nadinām yad ābhyo arado gātum indra |
 6.030.03c ni parvatā admasado na sedus tvayā dṛḍhāni sukrato rajāmsi ||
 6.030.04a satyam it tan na tvāvāṃ anyo astīndra devo na martyo jyāyān |
 6.030.04c ahann ahim pariśayānam arṇo 'vāsṛjo apo achā samudram ||
 6.030.05a tvam apo vi duro viśūcīr indra dṛḍham arujaḥ parvatasya |
 6.030.05c rājābhavo jagataś carṣaṇinām sākam sūryam janayan dyām uśāsam ||

6.031.01a abhūr eko rayipate rayinām ā hastayor adhithā indra kṛṣṭiḥ |
 6.031.01c vi toke apsu tanaye ca sūre 'vocanta carṣaṇayo vivācaḥ ||
 6.031.02a tvad bhiyendra pāṛthivāni viśvācyutā cic cyāvayante rajāmsi |
 6.031.02c dyāvākṣāmā parvatāso vanāni viśvaṃ dṛḍham bhayate ajmann ā te ||
 6.031.03a tvam kutsenābhi śuśṇam indrāśuśam yudhya kuyavaṃ gaviṣṭau |
 6.031.03c daśa prapitve adha sūryasya muṣāyaś cakram avive rapāmsi ||
 6.031.04a tvam śatāny ava śambarasya puro jaghanthāpratīni dasyoḥ |
 6.031.04c aśikṣo yatra śacyā śacīvo divodāsāya sunvate sutakre bharadvājāya gṛṇate vasūni
 ||
 6.031.05a sa satyasatvan mahate raṇāya ratham ā tiṣṭha tuvinṛmṇa bhīmam |
 6.031.05c yāhi prapathinn avasopa madrik pra ca śruta śrāvaya carṣaṇibhyaḥ ||

6.032.01a apūrvyā purutamāny asmai mahe vīrāya tavase turāya |
 6.032.01c virapśine vajriṇe śaṃtamāni vacāmsy āsā sthvirāya takṣam ||
 6.032.02a sa mātārā sūryeṇā kavīnām avāsayad rujad adriṃ gṛṇānaḥ |
 6.032.02c svādhibhir ṛkvabhir vāvasāna ud usriyāṇām asṛjan nidānam ||
 6.032.03a sa vahnibhir ṛkvabhir goṣu śaśvan mitajñubhiḥ purukṛtvā jigāya |
 6.032.03c puraḥ purohā sakhibhiḥ sakhīyan dṛḍhā ruroja kavibhiḥ kaviḥ san ||
 6.032.04a sa nīvyābhir jaritāram achā maho vājebhir mahadbhiś ca śuśmaih |
 6.032.04c puruvīrābhir vṛṣabha kṣitīnām ā girvaṇaḥ suvitāya pra yāhi ||
 6.032.05a sa sargeṇa śavasā takto atyair apa indro dakṣiṇatas turāṣaṭ |
 6.032.05c itthā sṛjānā anapāvṛd artham dive-dive viviṣur apramṛṣyam ||

6.033.01a ya ojiṣṭha indra taṃ su no dā mado vṛṣan svabhiṣṭir dāsvān |
 6.033.01c sauvaśvyam yo vanavat svaśvo vṛtrā samatsu sāsahad amitrān ||
 6.033.02a tvām hīndrāvase vivāco havante carṣaṇayaḥ sūrasātau |
 6.033.02c tvam viprebhir vi pañīmr asāyas tvota it sanitā vājam arvā ||
 6.033.03a tvam tāṃ indrobhayāṃ amitrān dāsā vṛtrāṇy āryā ca sūra |
 6.033.03c vadhīr vaneva sudhitebhir atkair ā pṛtsu darṣi nṛṇām nṛtama ||
 6.033.04a sa tvam na indrākavābhir ūtī sakhā viśvāyur avitā vṛdhe bhūḥ |
 6.033.04c svarṣatā yad dhvayāmasi tvā yudhyanto nemadhitā pṛtsu sūra ||
 6.033.05a nūnam na indrāparāya ca syā bhavā mṛḍīka uta no abhiṣṭau |
 6.033.05c itthā gṛṇanto mahinasya śarman divi ṣyāma pārye goṣatamāḥ ||

6.034.01a saṃ ca tve jagmur gira indra pūrvīr vi ca tvad yanti vibhvo maṇīṣāḥ |
 6.034.01c purā nūnaṃ ca stutaya ṛṣiṇām paspṛdhra indre adhy ukthārkā ||
 6.034.02a puruhūto yaḥ purugūrta ṛbhvāṃ ekaḥ purupraśasto asti yajñaiḥ |
 6.034.02c ratho na mahe śavase yujāno 'smābhir indro anumādyo bhūt ||
 6.034.03a na yaṃ hiṃsanti dhītayo na vāṇīr indraṃ nakṣantīd abhi vardhayantiḥ |
 6.034.03c yadi stotāraḥ śataṃ yat sahasraṃ gṛṇanti girvaṇasaṃ śaṃ tad asmai ||
 6.034.04a asmā etad divy arceva māsā mimikṣa indre ny ayāmi somaḥ |
 6.034.04c janam na dhanvann abhi saṃ yad āpaḥ satrā vāvṛdhur havanāni yajñaiḥ ||
 6.034.05a asmā etan mahy āṅgūṣam asmā indrāya stotram matibhir avāci |
 6.034.05c asad yathā mahati vṛtratūrya indro viśvāyur avitā vṛdhaś ca ||

6.035.01a kadā bhuvan rathakṣayāṇi brahma kadā stotre sahasrapoṣyaṃ dāḥ |
 6.035.01c kadā stomaṃ vāsayo 'sya rāyā kadā dhiyaḥ karasi vājaratnāḥ ||
 6.035.02a karhi svit tad indra yan nṛbhir nṛṇ vīrair vīrān nīdayāse jayājīn |
 6.035.02c tridhātu gā adhi jayāsi goṣv indra dyumnaṃ svarvad dhehy asme ||
 6.035.03a karhi svit tad indra yaj jaritre viśvapsu brahma kṛṇavaḥ śaviṣṭha |
 6.035.03c kadā dhiyo na niyuto yuvāse kadā gomaghā havanāni gachāḥ ||
 6.035.04a sa gomaghā jaritre aśvaścandrā vājaśravaso adhi dhehi pṛkṣaḥ |
 6.035.04c pīpihīṣaḥ sudughām indra dhenum bharadvājeṣu suruco rurucyāḥ ||
 6.035.05a tam ā nūnaṃ vṛjanam anyathā cic chūro yac chakra vi duro gṛṇīṣe |
 6.035.05c mā nir araṃ śukradughasya dhenor āṅgirasān brahmaṇā vipra jinva ||

6.036.01a satrā madāsas tava viśvajanyāḥ satrā rāyo 'dha ye pārthivāsaḥ |
 6.036.01c satrā vājānām abhavo vibhaktā yad deveṣu dhārayathā asuryam ||
 6.036.02a anu pra yeje jana ojo asya satrā dadhire anu vīryāya |
 6.036.02c syūmagṛbhe dudhaye 'rvate ca kratuṃ vṛṇjanty api vṛtrahatye ||
 6.036.03a taṃ sadhrīcīr ūtayo vṛṣṇyāni paumṣyāni niyutaḥ saścur indram |
 6.036.03c samudraṃ na sindhava ukthaśuṣmā uruvyacasam gira ā viśanti ||
 6.036.04a sa rāyas khām upa sṛjā gṛṇānaḥ puruścandrasya tvam indra vasvaḥ |
 6.036.04c patir babhūthāsamo janānām eko viśvasya bhuvanasya rājā ||
 6.036.05a sa tu śrudhi śrutya yo duvoyur dyaur na bhūmābhi rāyo aryaḥ |
 6.036.05c aso yathā naḥ śavasā cakāno yuge-yuge vayasā cekitānaḥ ||

6.037.01a arvāg rathaṃ viśvavāraṃ ta ugrendra yuktāso harayo vahantu |
 6.037.01c kīrīś cid dhi tvā havate svarvān ṛdhīmahi sadhamādas te adya ||
 6.037.02a pro droṇe harayaḥ karmāgman punānāsa ṛjyanto abhūvan |
 6.037.02c indro no asya pūrvyaḥ papīyād dyukṣo madasya somyasya rājā ||
 6.037.03a āsārāṇāsaḥ śavasānam achendraṃ sucakre rathyāso aśvāḥ |
 6.037.03c abhi śrava ṛjyanto vaheyur nū cin nu vāyor amṛtaṃ vi dasyet ||
 6.037.04a variṣṭho asya dakṣiṇām iyartīndro maghonām tuvikūrmitamaḥ |
 6.037.04c yayā vajrivaḥ pariyāsy amho maghā ca dhṛṣṇo dayase vi sūrīn ||
 6.037.05a indro vājasya sthavirasya dātendro gīrbhir vardhatām vṛddhamahāḥ |
 6.037.05c indro vṛtraṃ haniṣṭho astu satvā tā sūrīḥ pṛṇati tūtujānaḥ ||

6.038.01a apād ita ud u naś citratamo mahim bharṣad dyumatim indrahūtim |
 6.038.01c panyasiṃ dhītiṃ daivyasya yāmañ janasya rātiṃ vanate sudānuḥ ||
 6.038.02a dūrāc cid ā vasato asya karṇā ghoṣād indrasya tanyati bruvāṇaḥ |
 6.038.02c eyam enaṃ devahūtir vavṛtyān madryag indram iyam ṛcyamānā ||
 6.038.03a taṃ vo dhiyā paramayā purājām ajaram indram abhy anūṣy arkaiḥ |
 6.038.03c brahmā ca giro dadhire sam asmin mahāmś ca stomo adhi vardhad indre ||
 6.038.04a vardhād yaṃ yajña uta soma indraṃ vardhād brahma gira ukthā ca manma |
 6.038.04c vardhāhainam uśaso yāmann aktor vardhān māsāḥ śarado dyāva indram ||
 6.038.05a evā jajñānaṃ sahase asāmi vāvṛdhānaṃ rādhase ca śrutāya |
 6.038.05c mahām ugram avase vipra nūnam ā vivāsema vṛtratūryeṣu ||

6.039.01a mandrasya kaver divyasya vahner vipramanmano vacanasya madhvaḥ |
 6.039.01c apā nas tasya sacanasya deveṣo yuvasva gṛṇate goagrāḥ ||
 6.039.02a ayam usānaḥ pary adrim usrā ṛtadhītibhir ṛtayug yujānaḥ |
 6.039.02c rujad aruṅṇaṃ vi valasya sānum pañimr vacobhir abhi yodhad indraḥ ||
 6.039.03a ayam dyotayad adyuto vy aktūn doṣā vastoh śarada indur indra |
 6.039.03c imaṃ ketum adadhur nū cid ahnām śucijanmana uśasaś cakāra ||
 6.039.04a ayam rocayad aruco rucāno 'yaṃ vāsayaḥ vy ṛtena pūrvīḥ |
 6.039.04c ayam iyata ṛtayugbhir aśvaiḥ svarvidā nābhinā carṣaṇiprāḥ ||
 6.039.05a nū gṛṇāno gṛṇate pratna rājann iṣaḥ pinva vasudeyāya pūrvīḥ |
 6.039.05c apa oṣadhīr aviṣā vanāni gā arvato nṛn ṛcase rirīhi ||

6.040.01a indra piba tubhyaṃ suto madāyāva sya harī vi mucā sakhāyā |
 6.040.01c uta pra gāya gaṇa ā niṣadyāthā yajñāya gṛṇate vayo dhāḥ ||
 6.040.02a asya piba yasya jajñāna indra madāya kratve apibo virapśin |
 6.040.02c tam u te gāvo nara āpo adrir indum sam ahyan pītaye sam asmai ||
 6.040.03a samiddhe agnau suta indra soma ā tvā vahantu harayo vahiṣṭhāḥ |
 6.040.03c tvāyatā manasā johavīmīndrā yāhi suvitāya mahe naḥ ||
 6.040.04a ā yāhi śaśvad uśatā yayāthendra mahā manasā somapeyam |
 6.040.04c upa brahmāṇi śṛṇava imā no 'thā te yajñas tanve vayo dhāt ||
 6.040.05a yad indra divi pārye yad ṛdhag yad vā sve sadane yatra vāsi |
 6.040.05c ato no yajñam avase niyutvān sajoṣāḥ pāhi girvaṇo marudbhiḥ ||

6.041.01a aheḍamāna upa yāhi yajñam tubhyam pavanta indavaḥ sutāsaḥ |
 6.041.01c gāvo na vajrin svam oko achendrā gahi prathamo yajñiyānām ||
 6.041.02a yā te kākut sukṛtā yā variṣṭhā yayā śaśvat pibasi madhva ūrmim |
 6.041.02c tayā pāhi pra te adhvaryur asthāt saṃ te vajro vartatām indra gavyuḥ ||
 6.041.03a eṣa drapso vṛṣabho viśvarūpa indrāya vṛṣṇe sam akāri somaḥ |
 6.041.03c etam piba hariva sthātar ugra yasyeśiṣe pradivi yas te annam ||
 6.041.04a sutaḥ somo asutād indra vasyān ayam śreyāñ cikituse raṇāya |
 6.041.04c etam titirva upa yāhi yajñam tena viśvās taviṣīr ā pṛṇasva ||
 6.041.05a hvayāmasi tvendra yāhy arvāñ araṃ te somas tanve bhavāti |
 6.041.05c śatakrato mādayasvā suteṣu prāsmām āva pṛtanāsu pra vikṣu ||

6.042.01a praty asmai pipīṣate viśvāni viduṣe bhara |

6.042.01c aramgamāya jagmaye 'paścāddaghvane nare ||
 6.042.02a em enam pratyetana somebhiḥ somapātamam |
 6.042.02c amatrebhir ṛjīṣiṇam indram sutebhir indubhiḥ ||
 6.042.03a yadī sutebhir indubhiḥ somebhiḥ pratibhūṣatha |
 6.042.03c vedā viśvasya medhiro dhṛṣat taṃ-tam id eṣate ||
 6.042.04a asmā-asmā id andhaso 'dhvāryo pra bhārā sutam |
 6.042.04c kuvit samasya jenyasya śardhato 'bhiśaster avasparat ||

6.043.01a yasya tyac chambaram made divodāsāya randhayaḥ |
 6.043.01c ayaṃ sa soma indra te sutaḥ piba ||
 6.043.02a yasya tīvrasutam madam madhyam antaṃ ca rakṣase |
 6.043.02c ayaṃ sa soma indra te sutaḥ piba ||
 6.043.03a yasya gā antar aśmano made dṛdhā avāsṛjaḥ |
 6.043.03c ayaṃ sa soma indra te sutaḥ piba ||
 6.043.04a yasya mandāno andhaso māghonaṃ dadhiṣe śavaḥ |
 6.043.04c ayaṃ sa soma indra te sutaḥ piba ||

6.044.01a yo rayivo rayiṃtamo yo dyumnair dyumnavattamaḥ |
 6.044.01c somaḥ sutaḥ sa indra te 'sti svadhāpate madaḥ ||
 6.044.02a yaḥ śagmas tuviśagma te rāyo dāmā matinām |
 6.044.02c somaḥ sutaḥ sa indra te 'sti svadhāpate madaḥ ||
 6.044.03a yena vṛddho na śavasā turo na svābhir ūtibhiḥ |
 6.044.03c somaḥ sutaḥ sa indra te 'sti svadhāpate madaḥ ||
 6.044.04a tyam u vo aprahaṇaṃ gṛṇiṣe śavasas patim |
 6.044.04c indram viśvāsāhaṃ naram maṃhiṣṭhaṃ viśvacarṣaṇim ||
 6.044.05a yaṃ vardhayantid giraḥ patim turasya rādhasaḥ |
 6.044.05c tam in nv asya rodasī devī śuṣmaṃ saparyataḥ ||
 6.044.06a tad va ukthasya barhaṇendrāyopastrṇiṣaṇi |
 6.044.06c vipo na yasyotayo vi yad rohanti sakṣitaḥ ||
 6.044.07a avidad dakṣam mitro navīyān papāno devebhyo vasyo acait |
 6.044.07c sasavān staulābhir dhautarībhir uruṣyā pāyur abhavat sakhibhyaḥ ||
 6.044.08a ṛtasya pathi vedhā apāyi śriye manāṃsi devāso akran |
 6.044.08c dadhāno nāma maho vacobhir vapur dṛśaye venyo vy āvaḥ ||
 6.044.09a dyumattamaṃ dakṣaṃ dhehy asme sedhā janānām pūrvīr arātīḥ |
 6.044.09c varṣīyo vayaḥ kṛṇuhi śacībhir dhanasya sātāv asmāṃ avidḍhi ||
 6.044.10a indra tubhyam in maghavann abhūma vayaṃ dātre harivo mā vi venaḥ |
 6.044.10c nakir āpir dadṛṣe martyatrā kim aṅga radhracodanaṃ tvāhuḥ ||
 6.044.11a mā jsvane vṛṣabha no rarīthā mā te revataḥ sakhye riṣāma |
 6.044.11c pūrvīṣ ṭa indra niṣṣidho janeṣu jahy asuṣvīn pra vṛhāpṛṇataḥ ||
 6.044.12a ud abhrāṇiva stanayann iyartindro rādhamṣy asvyāni gavyā |
 6.044.12c tvam asi pradivaḥ kārudhāyā mā tvādāmāna ā dabhan maghonaḥ ||
 6.044.13a adhvaryo vīra pra mahe sutānām indrāya bhara sa hy asya rājā |
 6.044.13c yaḥ pūrvyābhir uta nūtanābhir gīrbhir vāvṛdhe gṛṇatām ṛṣiṇām ||
 6.044.14a asya made puru varpāṃsi vidvān indro vṛtrāṇy apratī jaghāna |
 6.044.14c tam u pra hoṣi madhumantam asmaī somaṃ vīrāya śipriṇe pibadhyai ||
 6.044.15a pātā sutam indro astu somaṃ hantā vṛtraṃ vajreṇa mandasānaḥ |
 6.044.15c gantā yajñam parāvataś cid achā vasur dhīnām avitā kārudhāyāḥ ||

6.044.16a idam tyat pātram indrapānam indrasya priyam amṛtam apāyi |
 6.044.16c matsad yathā saumanasāya devam vy asmad dveṣo yuyavad vy aṃhaḥ ||
 6.044.17a enā mandāno jahi sūra śatrūñ jāmim ajāmim maghavann amitrān |
 6.044.17c abhiṣeṇāñ abhy ādedisānān parāca indra pra mṛṇā jahī ca ||
 6.044.18a āsu śmā ṇo maghavann indra pṛtsv asmabhyam mahi varivaḥ sugaṃ kaḥ |
 6.044.18c apāṃ tokasya tanayasya jeṣa indra sūrīn kṛṇuhi smā no ardham ||
 6.044.19a ā tvā harayo vṛṣaṇo yujānā vṛṣarathāso vṛṣaraśmayo 'tyāḥ |
 6.044.19c asmatrāñco vṛṣaṇo vajravāho vṛṣṇe madāya suyujō vahantu ||
 6.044.20a ā te vṛṣan vṛṣaṇo droṇam asthur ghṛtapruṣo normayo madantaḥ |
 6.044.20c indra pra tubhyam vṛṣabhiḥ sutānāṃ vṛṣṇe bharanti vṛṣabhāya somam ||
 6.044.21a vṛṣāsi divo vṛṣabhaḥ pṛthivyā vṛṣā sindhūnāṃ vṛṣabha stiyānām |
 6.044.21c vṛṣṇe ta indur vṛṣabha pīpāya svādū raso madhupeyo varāya ||
 6.044.22a ayam devaḥ sahasā jāyamāna indreṇa yujā paṇim astabhāyat |
 6.044.22c ayam svasya pitur āyudhānīndur amuṣṇād aśivasya māyāḥ ||
 6.044.23a ayam akṛṇod uśasaḥ supatnīr ayam sūrye adadhāj jyotir antaḥ |
 6.044.23c ayam tridhātu divi rocaneṣu triteṣu vindad amṛtam nigūḍham ||
 6.044.24a ayam dyāvāpṛthivī vi śkabhāyad ayam ratham ayunak saptaraśmim |
 6.044.24c ayam goṣu śacyā pakvam antaḥ somo dādḥāra daśayantram utsam ||

6.045.01a ya ānayat parāvataḥ sunitī turvaśam yadum |
 6.045.01c indraḥ sa no yuvā sakhā ||
 6.045.02a avipre cid vayo dadhad anāśunā cid arvatā |
 6.045.02c indro jetā hitam dhanam ||
 6.045.03a mahīr asya praṇītayaḥ pūrvīr uta praśastayaḥ |
 6.045.03c nāsyā kṣiyanta ūtayaḥ ||
 6.045.04a sakhāyo brahmavāhase 'rcata pra ca gāyata |
 6.045.04c sa hi naḥ pramatir mahī ||
 6.045.05a tvam ekasya vṛtrahann avitā dvayor asi |
 6.045.05c utedṛśe yathā vayam ||
 6.045.06a nayasīd v ati dviṣaḥ kṛṇoṣy ukthaśamsinaḥ |
 6.045.06c nṛbhiḥ suvīra ucyase ||
 6.045.07a brahmāṇam brahmavāhasam gīrbhiḥ sakhāyam ṛgmīyam |
 6.045.07c gāṃ na dohase huve ||
 6.045.08a yasya viśvāni hastayor ūcur vasūni ni dvitā |
 6.045.08c vīrasya pṛtanāśahaḥ ||
 6.045.09a vi dṛḍhāni cid adrivo janānāṃ śacīpate |
 6.045.09c vṛha māyā anānata ||
 6.045.10a tam u tvā satya somapā indra vājānām pate |
 6.045.10c ahūmahī śravasyavaḥ ||
 6.045.11a tam u tvā yaḥ purāsitha yo vā nūnam hite dhane |
 6.045.11c havaḥ sa śrudhī havam ||
 6.045.12a dhibhir arvadbhir arvato vājāñ indra śravāyyān |
 6.045.12c tvayā jeṣma hitam dhanam ||
 6.045.13a abhūr u vīra girvaṇo mahāñ indra dhane hite |
 6.045.13c bhare vitantasāyyaḥ ||
 6.045.14a yā ta ūtir amitrahan makṣūjavastamāsati |
 6.045.14c tayā no hinuhī ratham ||
 6.045.15a sa rathena rathītamō 'smākenābhiyugvanā |

- 6.045.15c jeṣi jiṣṇo hitaṃ dhanam ||
6.045.16a ya eka it tam u ṣṭuhi kṛṣṭinām vicarṣaṇiḥ |
6.045.16c patir jajñe vṛṣakratuḥ ||
6.045.17a yo gṛṇatām id āsithāpir ūtī śivaḥ sakhā |
6.045.17c sa tvaṃ na indra mṛḍaya ||
6.045.18a dhiṣva vajraṃ gabhastyo rakṣohatyāya vajrivaḥ |
6.045.18c sāsahīṣṭhā abhi sprḍhaḥ ||
6.045.19a pratnaṃ rayiṇām yujaṃ sakhāyaṃ kīricodanam |
6.045.19c brahmavāhastamaṃ huve ||
6.045.20a sa hi viśvāni pārthivāṃ eko vasūni patyate |
6.045.20c girvaṇastamo adhriguḥ ||
6.045.21a sa no niyudbhir ā pṛṇa kāmāṃ vājebhir aśvibhiḥ |
6.045.21c gomadbhir gopate dhṛṣat ||
6.045.22a tad vo gāya sute sacā puruhūtāya satvane |
6.045.22c śaṃ yad gave na śākinē ||
6.045.23a na ghā vasur ni yamate dānaṃ vājasya gomataḥ |
6.045.23c yat sīm upa śravad giraḥ ||
6.045.24a kuvitsasya pra hi vrajaṃ gomantaṃ dasyuhā gamat |
6.045.24c śacībhir apa no varat ||
6.045.25a imā u tvā śatakṛato 'bhi pra ṇonuvur giraḥ |
6.045.25c indra vatsaṃ na mātaraḥ ||
6.045.26a dūṇāsaṃ sakhyaṃ tava gaur asi vīra gavyate |
6.045.26c aśvo aśvāyate bhava ||
6.045.27a sa mandasvā hy andhaso rādhase tanvā mahe |
6.045.27c na stotāraṃ nide karaḥ ||
6.045.28a imā u tvā sute-sute nakṣante girvaṇo giraḥ |
6.045.28c vatsaṃ gāvo na dhenavaḥ ||
6.045.29a purūtamaṃ purūṇāṃ stotṛṇāṃ vivāci |
6.045.29c vājebhir vājayatām ||
6.045.30a asmākam indra bhūtu te stomo vāhiṣṭho antamaḥ |
6.045.30c asmān rāye mahe hinu ||
6.045.31a adhi bṛbuḥ paṇinām varṣiṣṭhe mūrdhann asthāt |
6.045.31c uruḥ kakṣo na gāṅgyaḥ ||
6.045.32a yasya vāyor iva dravad bhadrā rātiḥ sahasriṇī |
6.045.32c sadyo dānāya maṃhate ||
6.045.33a tat su no viśve arya ā sadā gṛṇanti kāravaḥ |
6.045.33c bṛbum sahasradātamaṃ sūriṃ sahasrasātamaṃ ||
- 6.046.01a tvām id dhi havāmahe sātā vājasya kāravaḥ |
6.046.01c tvām vṛtreṣv indra satpatiṃ naras tvām kāṣṭhāsv arvataḥ ||
6.046.02a sa tvaṃ naś citra vajrahasta dhṛṣṇuyā maha stavāno adrivaḥ |
6.046.02c gām aśvaṃ rathyam indra saṃ kira satrā vājaṃ na jigyuṣe ||
6.046.03a yaḥ satrāhā vicarṣaṇir indraṃ taṃ hūmahe vayam |
6.046.03c sahasramuṣka tuvinṛmṇa satpate bhavā samatsu no vṛdhe ||
6.046.04a bādhasē janān vṛṣabheva manyunā ghṛṣau mīḍha ṛciśama |
6.046.04c asmākam bodhy avitā mahādhanē tanūṣv apsu sūrye ||
6.046.05a indra jyeṣṭhaṃ na ā bharaṃ ojiṣṭham papuri śravaḥ |
6.046.05c yeneme citra vajrahasta rodasī obhe suśipra prāḥ ||

6.046.06a tvām ugram avase carṣaṇīsaḥaṃ rājan deveṣu hūmahe |
 6.046.06c viśvā su no vithurā pibdanā vaso 'mitrān suśahān kṛdhi ||
 6.046.07a yad indra nāhuṣiṣv āṃ ojo nṛmṇaṃ ca kṛṣṭiṣu |
 6.046.07c yad vā pañca kṣitīnāṃ dyumnā ā bhara satrā viśvāni paumṣyā ||
 6.046.08a yad vā tṛkṣau maghavan druhyāv ā jane yat pūrau kac ca vṛṣṇyam |
 6.046.08c asmabhyaṃ tad rirīhi saṃ nṛśāhye 'mitrān pṛtsu turvaṇe ||
 6.046.09a indra tridhātu śaraṇaṃ trivarūthaṃ svastimat |
 6.046.09c chardir yacha maghavadbhyaś ca mahyaṃ ca yāvayā didyum ebhyaḥ ||
 6.046.10a ye gavayatā manasā śatrum ādabhur abhipraghnanti dhṛṣṇuyā |
 6.046.10c adha smā no maghavann indra girvaṇas tanūpā antamo bhava ||
 6.046.11a adha smā no vṛdhe bhavendra nāyam avā yudhi |
 6.046.11c yad antarikṣe patayanti parṇino didyavas tigamamūrdhānaḥ ||
 6.046.12a yatra sūrāsas tanvo vitanvate priyā śarma pitṛṇām |
 6.046.12c adha smā yacha tanve tane ca chardir acittam yāvaya dveṣaḥ ||
 6.046.13a yad indra sarge arvataś codayāse mahādthane |
 6.046.13c asamane adhvani vṛjine pathi śyenāṃ iva śravasyataḥ ||
 6.046.14a sindhūṃr iva pravaṇa āśuyā yato yadi klośam anu ṣvaṇi |
 6.046.14c ā ye vayo na varvṛtaty āmiṣi gṛbhītā bāhvor gavi ||

6.047.01a svāduṣ kilāyam madhumāṃ utāyam tīvraḥ kilāyam rasavāṃ utāyam |
 6.047.01c uto nv asya papivāṃsam indraṃ na kaś cana sahata āhaveṣu ||
 6.047.02a ayam svādur iha madiṣṭha āsa yasyendro vṛtrahatye mamāda |
 6.047.02c purūṇi yaś cyautnā śambarasya vi navatiṃ nava ca dehyo han ||
 6.047.03a ayam me pīta ud iyarti vācam ayam maṇiṣām uśatīm ajigaḥ |
 6.047.03c ayam ṣaḍ urvīr amimīta dhīro na yābhyo bhuvanaṃ kac canāre ||
 6.047.04a ayam sa yo varimāṇam pṛthivyā varṣmāṇam divo akrṇod ayam saḥ |
 6.047.04c ayam pīyūṣam tisṛṣu pravatsu somo dādharorv antarikṣam ||
 6.047.05a ayam vidac citradṛśīkam arṇaḥ śukrasadmanām uṣasām anīke |
 6.047.05c ayam mahān mahatā skambhanenod dyām astabhnād vṛṣabho marutvān ||
 6.047.06a dhṛṣat piba kalaśe somam indra vṛtrahā śūra samare vasūnām |
 6.047.06c mādhyamḍine savana ā vṛṣasva rayisthāno rayim asmāsu dhehi ||
 6.047.07a indra pra ṇaḥ puraeteva paśya pra no naya prataraṃ vasyo acha |
 6.047.07c bhavā supāro atipārayo no bhavā sunītir uta vāmanītiḥ ||
 6.047.08a uruṃ no lokam anu neṣi vidvān svarvaj jyotir abhayaṃ svasti |
 6.047.08c iṣvā ta indra sthavirasya bāhū upa stheyāma śaraṇā bṛhantā ||
 6.047.09a variṣṭhe na indra vandhure dhā vahiṣṭhayoḥ śatāvann aśvayor ā |
 6.047.09c iṣam ā vākṣiṣāṃ varṣiṣṭhām mā nas tārīn maghavan rāyo aryaḥ ||
 6.047.10a indra mṛḍa mahyaṃ jīvātum icha codaya dhiyam ayaso na dhārām |
 6.047.10c yat kiṃ cāhaṃ tvāyur idaṃ vadāmi taj juṣasva kṛdhi mā devavantam ||
 6.047.11a trātāram indram avitāram indraṃ have-have suhavaṃ sūram indram |
 6.047.11c hvayāmi śakram puruhūtam indraṃ svasti no maghavā dhātṽ indraḥ ||
 6.047.12a indraḥ sutrāmā svavāṃ avobhiḥ sumṛḍīko bhavatu viśvavedāḥ |
 6.047.12c bādhatām dveṣo abhayaṃ kṛṇotu suvīryasya patayaḥ syāma ||
 6.047.13a tasya vayaṃ sumatau jajñiyasyāpi bhadre saumanase syāma |
 6.047.13c sa sutrāmā svavāṃ indro asme ārāc cid dveṣaḥ sanutar yuyotu ||
 6.047.14a ava tve indra pravato normir giro brahmāṇi niyuto dhavante |
 6.047.14c urū na rādhaḥ savanā purūṇy apo gā vajrin yuvase sam indūn ||
 6.047.15a ka iṃ stavat kaḥ pṛṇāt ko yajāte yad ugram in maghavā viśvahāvet |

- 6.047.15c pādāv iva praharann anyam-anyam kṛṇoti pūrvam aparaṃ śacībhiḥ ||
6.047.16a śṛṇve vīra ugram-ugraṃ damāyann anyam-anyam atinenīyamānaḥ |
6.047.16c edhamānadviḍ ubhayasya rājā coṣkūyate viśa indro manuṣyān ||
6.047.17a parā pūrveṣāṃ sakhyā vṛṇakti vitarturāṇo aparebhir eti |
6.047.17c anānubhūtir avadhūnvānaḥ pūrvir indraḥ śaradas tartarīti ||
6.047.18a rūpaṃ-rūpaṃ pratirūpo babhūva tad asya rūpaṃ praticakṣaṇāya |
6.047.18c indro māyābhiḥ pururūpa iyate yuktā hy asya harayaḥ śatā daśa ||
6.047.19a yujāno haritā rathe bhūri tvaṣṭeha rājati |
6.047.19c ko viśvāhā dviṣataḥ pakṣa āsata utāsīneṣu sūriṣu ||
6.047.20a agavyūti kṣetram āganma devā urvī satī bhūmir aṃhūraṇābhūt |
6.047.20c bṛhaspate pra cikitsā gaviṣṭāv itthā sate jaritra indra panthām ||
6.047.21a dive-dive sadṛśir anyam ardhaṃ kṛṣṇā asedhad apa sadmano jāḥ |
6.047.21c ahan dāsā vṛṣabho vasnayantodavraje varcinam śambaram ca ||
6.047.22a prastoka in nu rādhasas ta indra daśa kośayīr daśa vājino 'dāt |
6.047.22c divodāsād atithigvasya rādhaḥ sāmbaram vasu praty agrabhīṣma ||
6.047.23a daśāśvān daśa kośān daśa vastrādhibhojanā |
6.047.23c daśo hiraṇyapiṇḍān divodāsād asāniṣam ||
6.047.24a daśa rathān praṣṭimataḥ śatam gā atharvabhyaḥ |
6.047.24c aśvathaḥ pāyave 'dāt ||
6.047.25a mahi rādho viśvajanyaṃ dadhānān bharadvājān sārñjayo abhy ayaṣṭa ||
6.047.26a vanaspate viḍvaṅgo hi bhūyā asmatsakhā prataraṇaḥ suvīraḥ |
6.047.26c gobhiḥ saṃnaddho asi viḍayasvāsthātā te jayatu jetvāni ||
6.047.27a divas pṛthivyāḥ pary oja udbhṛtam vanaspatibhyaḥ pary ābhṛtam sahaḥ |
6.047.27c apām ojmānam pari gobhir āvṛtam indrasya vajram haviṣā ratham yaja ||
6.047.28a indrasya vajro marutām anīkam mitrasya garbho varuṇasya nābhiḥ |
6.047.28c semām no havya dātīm juṣāṇo deva ratha prati havyaḥ gr̥bhāya ||
6.047.29a upa śvāsaya pṛthivīm uta dyām purutrā te manutām viṣṭhitam jagat |
6.047.29c sa dundubhe sajūr indreṇa devair dūrād daviyo apa sedha śatrūn ||
6.047.30a ā krandaya balam ojo na ā dhā ni ṣṭanihi duritā bādhamānaḥ |
6.047.30c apa protha dundubhe duchunā ita indrasya muṣṭir asi viḍayasva ||
6.047.31a āmūr aja pratyāvartayemāḥ ketumad dundubhir vāvadīti |
6.047.31c sam aśvaparnāś caranti no naro 'smākam indra rathino jayantu ||
- 6.048.01a yajñā-yajñā vo agnaye girā-girā ca dakṣase |
6.048.01c pra-pra vayam amṛtam jātavedasam priyam mitram na śaṃsiṣam ||
6.048.02a ūrjo napātam sa hināyam asmayur dāśema havya dātaye |
6.048.02c bhuvad vājeṣv avitā bhuvad vṛdha uta trātā tanūnām ||
6.048.03a vṛṣā hy agne ajaro mahān vibhāsy arcīṣā |
6.048.03c ajasreṇa śociṣā śośucac chuce sudītibhiḥ su dīdihi ||
6.048.04a maho devān yajasi yakṣy ānuṣak tava kratvota daṃsanā |
6.048.04c arvācaḥ sīm kṛṇuhy agne 'vase rāsva vājota vaṃsva ||
6.048.05a yam āpo adrayo vanā garbham ṛtasya piprati |
6.048.05c sahasā yo mathito jāyate nṛbhiḥ pṛthivyā adhi sānavi ||
6.048.06a ā yaḥ paprau bhānunā rodasī ubhe dhūmena dhāvate divi |
6.048.06c tiras tamo dadṛśa ūrmyāsv ā śyāvāsv aruṣo vṛṣā śyāvā aruṣo vṛṣā ||
6.048.07a bṛhadbhir agne arcibhiḥ śukreṇa deva śociṣā |
6.048.07c bharadvāje samidhāno yaviṣṭhya revan naḥ śukra dīdihi dyumat pāvaka dīdihi ||
6.048.08a viśvāsām gr̥hapatir viśām asi tvam agne mānuṣiṇām |

- 6.048.08c śatam pūrbhir yaviṣṭha pāhy aṃhasaḥ sameddhāraṃ śatam himā stotr̥bhyo ye ca dadati ||
- 6.048.09a tvam naś citra ūtyā vaso rādhāṃsi codaya |
- 6.048.09c asya rāyas tvam agne rathīr asi vidā gādham tuce tu naḥ ||
- 6.048.10a parṣi tokam tanayam part̥r̥bhiṣ ṭvam adabdhair aprayutvabhiḥ |
- 6.048.10c agne heḍāṃsi daivyā yuyodhi no 'devāni hvarāṃsi ca ||
- 6.048.11a ā sakhāyaḥ sabardughāṃ dhenum ajadhvam upa navyasā vacaḥ |
- 6.048.11c sṛjadhvam anapasphurām ||
- 6.048.12a yā śardhāya mārutāya svabhānave śravo 'mṛtyu dhukṣata |
- 6.048.12c yā mṛḍike marutām turāṇām yā sumnair evayāvarī ||
- 6.048.13a bharadvājāyāva dhukṣata dvitā |
- 6.048.13b dhenum ca viśvadohasam iṣam ca viśvabhōjasam ||
- 6.048.14a tam va indram na sukratum varuṇam iva māyinam |
- 6.048.14c aryamaṇam na mandram sṛprabhōjasam viṣṇum na stuṣa ādiśe ||
- 6.048.15a tveṣam śardho na mārutam tuviṣvaṇy anarvāṇam pūṣaṇam sam yathā śatā |
- 6.048.15c sam sahasrā kāriṣac carṣaṇibhya āṃ āvir gūdhā vasū karat suvedā no vasū karat ||
- 6.048.16a ā mā pūṣann upa drava śaṃsiṣam nu te apikarṇa āghṛṇe |
- 6.048.16c aghā aryo arātayaḥ ||
- 6.048.17a mā kākambīram ud vṛho vanaspatim aśastīr vi hi nīnaśaḥ |
- 6.048.17c mota sūro aha evā cana grīvā ādadhate veḥ ||
- 6.048.18a dṛter iva te 'vṛkam astu sakhyam |
- 6.048.18b achidrasya dadhanvataḥ supūrṇasya dadhanvataḥ ||
- 6.048.19a paro hi martyair asi samo devair uta śriyā |
- 6.048.19c abhi khyaḥ pūṣan pṛtanāsu nas tvam avā nūnam yathā purā ||
- 6.048.20a vāmī vāmasya dhūtayaḥ praṇītir astu sūnṛtā |
- 6.048.20c devasya vā maruto martyasya vejānasya prayajyavaḥ ||
- 6.048.21a sadyaś cid yasya carḥṛtiḥ pari dyām devo naiti sūryaḥ |
- 6.048.21c tveṣam śavo dadhire nāma yajñiyam maruto vṛtraham śavo jyeṣṭham vṛtraham śavaḥ ||
- 6.048.22a sakṛd dha dyaur ajāyata sakṛd bhūmir ajāyata |
- 6.048.22c pṛśnyā dugdham sakṛt payas tad anyo nānu jāyate ||
-
- 6.049.01a stuṣe janam suvratam navyasībhir gīrbhir mitrāvaruṇā sumnayantā |
- 6.049.01c ta ā gamantu ta iha śruvantu sukṣatrāso varuṇo mitro agniḥ ||
- 6.049.02a viśo-viśa īdyam adhvareshv adṛptakratum aratiṃ yuvatyoh |
- 6.049.02c divaḥ śiśum sahasaḥ sūnum agniṃ yajñasya ketum aruṣam yajadhyai ||
- 6.049.03a aruṣasya duhitarā virūpe st̥rbhir anyā pipiśe sūro anyā |
- 6.049.03c mithasturā vicarantī pāvake manma śrutam nakṣata ṛcyamāne ||
- 6.049.04a pra vāyum achā bṛhatī manīṣā bṛhadrayiṃ viśvavāram rathaprām |
- 6.049.04c dyutadyāmā niyutaḥ patyamānaḥ kaviḥ kavim iyakṣasi prayajyo ||
- 6.049.05a sa me vapus chadayad aśvinor yo ratho virukmān manasā yujānaḥ |
- 6.049.05c yena narā nāsatyeshayadhyai vartir yāthas tanayāya tmane ca ||
- 6.049.06a parjanyaavatā vṛṣabhā pṛthivyāḥ puriṣāṇi jinvatam apyāni |
- 6.049.06c satyaśrutaḥ kavayo yasya gīrbhir jagata sthātar jagad ā kṛṇudhvam ||
- 6.049.07a pāvīravī kanyā citrāyuh sarasvatī vīrapatnī dhiyam dhāt |
- 6.049.07c gnābhir achidram śaraṇam sajoṣā durādharṣam gṛṇate śarma yaṃsat ||
- 6.049.08a pathas-pathaḥ paripatiṃ vacasyā kāmēna kṛto abhy ānaḍ arkam |
- 6.049.08c sa no rāsac churudhaś candrāgrā dhiyam-dhiyam siśadhāti pra pūṣā ||

6.049.09a prathamabhājam yaśasaṃ vayodhāṃ supāṇiṃ devaṃ sugabhastim ṛbhvam |
 6.049.09c hotā yakṣad yajatam pastyānām agnis tvaṣṭāraṃ suhavaṃ vibhāvā ||
 6.049.10a bhuvanasya pitaraṃ gīrbhir ābhī rudraṃ divā vardhayā rudraṃ aktau |
 6.049.10c bṛhantam ṛṣvam ajaraṃ suṣumnam ṛdhag ghuvema kavineṣitāsaḥ ||
 6.049.11a ā yuvānaḥ kavayo yajñiyāso maruto ganta gṛṇato varasyām |
 6.049.11c acitraṃ cid dhi jinvathā vṛdhanta itthā nakṣanto naro aṅgirasvat ||
 6.049.12a pra vīrāya pra tavase turāyājā yūtheva paśurakṣir astam |
 6.049.12c sa pisṛṣāti tanvi śrutasya sṛbhir na nākaṃ vacanasya vipaḥ ||
 6.049.13a yo rajāṃsi vimame pārthivāni trīs cid viṣṇur manave bādhitāya |
 6.049.13c tasya te śarmann upadadyamāne rāyā madema tanvā tanā ca ||
 6.049.14a tan no 'hir budhnyo adbhir arkais tat parvatas tat savitā cano dhāt |
 6.049.14c tad oṣadhībhir abhi rātiṣāco bhagaḥ puraṃdhir jinvatu pra rāye ||
 6.049.15a nu no rayiṃ rathyam carṣaṇiprām puruvīram maha ṛtasya gopām |
 6.049.15c kṣayam dātājaraṃ yena janān spr̥dho adevīr abhi ca kramāma viśa ādevīr abhy
 aśnavāma ||

6.050.01a huve vo devīm aditiṃ namobhir mṛdikāya varuṇam mitram agnim |
 6.050.01c abhikṣadām aryamaṇaṃ suśevaṃ trātṛṇ devān savitāram bhagaṃ ca ||
 6.050.02a sujyotiṣaḥ sūrya dakṣapitṛṇ anāgāstve sumaho vīhi devān |
 6.050.02c dvijanmāno ya ṛtasāpaḥ satyāḥ svarvanto yajatā agnijihvāḥ ||
 6.050.03a uta dyāvāpṛthivī kṣatram uru bṛhad rodasī śaraṇaṃ suṣumne |
 6.050.03c mahas karatho varivo yathā no 'sme kṣayāya dhiṣaṇe aneḥaḥ ||
 6.050.04a ā no rudrasya sūnavo namantām adyā hūtāso vasavo 'dhṛṣṭāḥ |
 6.050.04c yad īm arbhe mahati vā hitāso bādhe maruto ahvāma devān ||
 6.050.05a mimyakṣa yeṣu rodasī nu devī siṣakti pūṣā abhyardhayajvā |
 6.050.05c śrutvā havam maruto yad dha yātha bhūmā rejante adhvani pravikte ||
 6.050.06a abhi tyam vīram girvaṇasam arcendram brahmaṇā jaritar navena |
 6.050.06c śravad id dhavam upa ca stavāno rāsad vājāṃ upa maho gṛṇānaḥ ||
 6.050.07a omānam āpo mānuṣīr amṛktaṃ dhāta tokāya tanayāya śaṃ yoḥ |
 6.050.07c yūyaṃ hi ṣṭhā bhiṣajo māṛṭtamā viśvasya sthātur jagato janitriḥ ||
 6.050.08a ā no devaḥ savitā trāyamāṇo hiranyapāṇir yajato jagamyāt |
 6.050.08c yo datravāṃ uṣaso na pratikaṃ vyūrṇute dāsūṣe vāryāni ||
 6.050.09a uta tvam sūno sahaso no adyā devāṃ asminn adhvare vavr̥tyāḥ |
 6.050.09c syām ahaṃ te sadam id rātau tava syām agne 'vasā suvīraḥ ||
 6.050.10a uta tyā me havam ā jagmyātaṃ nāsatyā dhībhir yuvam aṅga viprā |
 6.050.10c atriṃ na mahas tamaso 'mumuktaṃ tūrvataṃ narā duritād abhīke ||
 6.050.11a te no rāyo dyumato vājavato dātāro bhūta nṛvataḥ purukṣoḥ |
 6.050.11c daśasyanto divyāḥ pārthivāso gojātā apyā mṛdatā ca devāḥ ||
 6.050.12a te no rudraḥ sarasvatī sajoṣā mīdhuṣmanto viṣṇur mṛdantu vāyuḥ |
 6.050.12c ṛbhukṣā vājo daivyo vidhātā parjanyaṅvātā pipyatām iṣaṃ naḥ ||
 6.050.13a uta sya devaḥ savitā bhago no 'pām napād avatu dānu papriḥ |
 6.050.13c tvaṣṭā devebhir janibhiḥ sajoṣā dyaur devebhiḥ pṛthivī samudraiḥ ||
 6.050.14a uta no 'hir budhnyaḥ śṛṇotv aja ekapāt pṛthivī samudraḥ |
 6.050.14c viśve devā ṛtāvṛdho huvānā stutā mantrāḥ kavīśastā avantu ||
 6.050.15a evā napāto mama tasya dhībhir bharadvājā abhy arcanty arkaiḥ |
 6.050.15c gnā hutāso vasavo 'dhṛṣṭā viśve stutāso bhūtā yajatrāḥ ||

6.051.01a ud u tyac cakṣur mahi mitrayor āṁ eti priyaṃ varuṇayor adabdhām |
 6.051.01c ṛtasya śuci darśatam anīkaṃ rukmo na diva uditā vy adyaut ||
 6.051.02a veda yas trīṇi vidathāny eṣāṃ devānām janma sanutar ā ca vipraḥ |
 6.051.02c ṛju marteṣu vṛjinā ca paśyann abhi caṣṭe sūro arya evān ||
 6.051.03a stuṣa u vo maha ṛtasya gopān aditim mitraṃ varuṇaṃ sujātān |
 6.051.03c aryamaṇam bhagam adabdhadhītīn achā voce sadhanyaḥ pāvakān ||
 6.051.04a risādasah satpatīṃr adabdhān maho rājñah suvasanasya dātṛn |
 6.051.04c yūnaḥ sukṣatrān kṣayato divo nṛṇ ādityān yāmy aditiṃ duvoyu ||
 6.051.05a dyauṣ pitaḥ pṛthivi mātār adhruḡ agne bhrātār vasavo mṛdatā naḥ |
 6.051.05c viśva ādityā adite sajoṣā asmabhyaṃ śarma bahulaṃ vi yanta ||
 6.051.06a mā no vṛkāya vṛkye samasmā aghāyate rīradhatā yajatrāḥ |
 6.051.06c yūyaṃ hi ṣṭhā rathyo nas tanūnām yūyaṃ dakṣasya vacaso babhūva ||
 6.051.07a mā va eno anyakṛtam bhujema mā tat karma vasavo yac cayadhve |
 6.051.07c viśvasya hi kṣayatha viśvadevāḥ svayaṃ ripus tanvaṃ rīriṣiṣṭa ||
 6.051.08a nama id ugraṃ nama ā vivāse namo dādḥāra pṛthivīm uta dyām |
 6.051.08c namo devebhyo nama īśa eṣāṃ kṛtam cid eno namasā vivāse ||
 6.051.09a ṛtasya vo rathyaḥ pūtadakṣān ṛtasya pastyasado adabdhān |
 6.051.09c tāṃ ā namobhir urucakṣaso nṛṇ viśvān va ā name maho yajatrāḥ ||
 6.051.10a te hi śreṣṭhavaracasas ta u nas tiro viśvāni duritā nayanti |
 6.051.10c sukṣatrāso varuṇo mitro agnir ṛtadhītayo vakmarājasatyāḥ ||
 6.051.11a te na indraḥ pṛthivi kṣāma vardhan pūṣā bhago aditiḥ pañca janāḥ |
 6.051.11c suśarmānaḥ svavasah sunīthā bhavantu naḥ sutrātrāsaḥ sugopāḥ ||
 6.051.12a nū sadmānaṃ divyaṃ namśi devā bhāradvājaḥ sumatiṃ yāti hotā |
 6.051.12c āsānebhīr yajamāno miyedhair devānām janma vasūyur vavanda ||
 6.051.13a apa tyam vṛjinam ripuṃ stenam agne durādhyam |
 6.051.13c daviṣṭham asya satpate kṛdhī sugam ||
 6.051.14a grāvānaḥ soma no hi kaṃ sakhitvanāya vāvaśuḥ |
 6.051.14c jahī ny atrīnam paṇim vṛko hi ṣaḥ ||
 6.051.15a yūyaṃ hi ṣṭhā sudānava indrajyeṣṭhā abhidyavaḥ |
 6.051.15c kartā no adhvann ā sugam gopā amā ||
 6.051.16a api panthām aganmahī svastiḡām anehasam |
 6.051.16c yena viśvāḥ pari dviṣo vṛṇakti vindate vasu ||

6.052.01a na tad divā na pṛthivyānu manye na yajñena nota śamībhīr ābhīḥ |
 6.052.01c ubjantu taṃ subhvaḥ parvatāso ni hīyatām atiyājasya yaṣṭā ||
 6.052.02a ati vā yo maruto manyate no brahma vā yaḥ kriyamāṇam ninitṣāt |
 6.052.02c tapūṃṣi tasmai vṛjināni santu brahmadviṣam abhi taṃ śocatu dyauḥ ||
 6.052.03a kim aṅga tvā brahmaṇaḥ soma gopām kim aṅga tvāhur abhiśastipām naḥ |
 6.052.03c kim aṅga naḥ paśyasi nidyamānān brahmadviṣe tapuṣiṃ hetim asya ||
 6.052.04a avantu mām uśaso jāyamānā avantu mā sindhavaḥ pinvamānāḥ |
 6.052.04c avantu mā parvatāso dhruvāso 'vantu mā pitaro devahūtau ||
 6.052.05a viśvadāniṃ sumanasah syāma paśyema nu sūryam uccarantam |
 6.052.05c tathā karad vasupatir vasūnām devāṃ ohāno 'vasāgamiṣṭhaḥ ||
 6.052.06a indro nediṣṭham avasāgamiṣṭhaḥ sarasvatī sindhubhīḥ pinvamānā |
 6.052.06c parjanya na oṣadhībhīr mayobhur agniḥ suśamsah suhavaḥ piteva ||
 6.052.07a viśve devāsa ā gata śṛṇutā ma imaṃ havam |
 6.052.07c edam barhir ni ṣidata ||
 6.052.08a yo vo devā ghṛtasnunā havyena pratibhūṣati |

6.052.08c taṃ viśva upa gachatha ||
 6.052.09a upa naḥ sūnavo girah śṛṅvantv amṛtasya ye |
 6.052.09c sumṛḍikā bhavantu naḥ ||
 6.052.10a viśve devā ṛtāvṛdha ṛtubhir havanaśrutaḥ |
 6.052.10c juṣantāṃ yujyam payaḥ ||
 6.052.11a stotram indro marudgaṇas tvaṣṭṛmān mitro aryamā |
 6.052.11c imā havyā juṣanta naḥ ||
 6.052.12a imaṃ no agne adhvaraṃ hotar vayunaśo yaja |
 6.052.12c cikitvān daivyaṃ janam ||
 6.052.13a viśve devāḥ śṛṅnutemaṃ havam me ye antarikṣe ya upa dyavi ṣṭha |
 6.052.13c ye agnijihvā uta vā yajatrā āsadyāsmin barhiṣi mādayadhvam ||
 6.052.14a viśve devā mama śṛṅvantu yajñiyā ubhe rodasī apāṃ napāc ca manma |
 6.052.14c mā vo vacāṃsi paricakṣyāṇi vocaṃ sumneṣv id vo antamā madema ||
 6.052.15a ye ke ca jmā mahino ahimāyā divo jajñire apāṃ sadhasthe |
 6.052.15c te asmabhyam iṣaye viśvam āyuh kṣapa usrā varivasyantu devāḥ ||
 6.052.16a agnīparjanyaṅ avataṃ dhiyam me 'smin have suhavā suṣṭutiṃ naḥ |
 6.052.16c iḍām anyo janayad garbham anyāḥ prajāvatīr iṣa ā dhattam asme ||
 6.052.17a stīrṇe barhiṣi samidhāne agnau sūktena mahā namasā vivāse |
 6.052.17c asmin no adya vidathe yajatrā viśve devā haviṣi mādayadhvam ||

6.053.01a vayam u tvā pathas pate rathaṃ na vājasātaye |
 6.053.01c dhiye pūṣann ayujmahi ||
 6.053.02a abhi no naryaṃ vasu vīram prayatadakṣiṇam |
 6.053.02c vāmaṃ gṛhapatim naya ||
 6.053.03a aditsantaṃ cid āghṛṇe pūṣan dānāya codaya |
 6.053.03c paṇeś cid vi mradā manaḥ ||
 6.053.04a vi patho vājasātaye cinuhi vi mṛdho jahi |
 6.053.04c sādhanāṃ ugra no dhiyaḥ ||
 6.053.05a pari tṛndhi pañinām ārayā hṛdayā kave |
 6.053.05c athem asmabhyaṃ randhaya ||
 6.053.06a vi pūṣann ārayā tuda paṇer icha hṛdi priyam |
 6.053.06c athem asmabhyaṃ randhaya ||
 6.053.07a ā rikha kikirā kṛṇu pañinām hṛdayā kave |
 6.053.07c athem asmabhyaṃ randhaya ||
 6.053.08a yām pūṣan brahmacodanīm āram bibharṣy āghṛṇe |
 6.053.08c tayā samasya hṛdayam ā rikha kikirā kṛṇu ||
 6.053.09a yā te aṣṭrā goपाśāghṛṇe paśusādhanī |
 6.053.09c tasyās te sumnam imahe ||
 6.053.10a uta no goṣaṇim dhiyam aśvasām vājasām uta |
 6.053.10c nṛvat kṛṇuhi vītaye ||

6.054.01a sam pūṣan viduṣā naya yo añjasānuśāsati |
 6.054.01c ya evedam iti bravat ||
 6.054.02a sam u pūṣnā gamemahi yo gṛhāṃ abhiśāsati |
 6.054.02c ima eveti ca bravat ||
 6.054.03a pūṣnaś cakram na riṣyati na kośo 'va padyate |
 6.054.03c no asya vyathate pavih ||

6.054.04a yo asmai haviṣāvidhan na tam pūṣāpi mṛṣyate |
 6.054.04c prathamō vindate vasu ||
 6.054.05a pūṣā gā anv etu naḥ pūṣā rakṣatv arvataḥ |
 6.054.05c pūṣā vājaṃ sanotu naḥ ||
 6.054.06a pūṣann anu pra gā ihi yajamānasya sunvataḥ |
 6.054.06c asmākaṃ stuvatām uta ||
 6.054.07a mākīr neśan mākīm riṣan mākīm saṃ śāri kevaṭe |
 6.054.07c athāriṣṭābhīr ā gahi ||
 6.054.08a śṛṇvantam pūṣaṇaṃ vayam iryam anaṣṭavedasam |
 6.054.08c īśānaṃ rāya īmahe ||
 6.054.09a pūṣan tava vrate vayam na riṣyema kadā cana |
 6.054.09c stotāras ta iha smasi ||
 6.054.10a pari pūṣā parastād dhastam dadhātu dakṣiṇam |
 6.054.10c punar no naṣṭam ājatu ||

6.055.01a ehi vāṃ vimuco napād āghṛṇe saṃ sacāvahai |
 6.055.01c rathīr ṛtasya no bhava ||
 6.055.02a rathītamam kapardinam īśānaṃ rādhaso mahaḥ |
 6.055.02c rāyaḥ sakhāyam īmahe ||
 6.055.03a rāyo dhārāsya āghṛṇe vaso rāsīr ajāśva |
 6.055.03c dhīvato-dhīvataḥ sakhā ||
 6.055.04a pūṣaṇam nv ajāśvam upa stoṣāma vājinam |
 6.055.04c svasur yo jāra ucyate ||
 6.055.05a mātūr didhiṣum abravam svasur jāraḥ śṛṇotu naḥ |
 6.055.05c bhrātendrasya sakhā mama ||
 6.055.06a ājāsaḥ pūṣaṇam rathe niśṛmbhās te janaśriyam |
 6.055.06c devam vahantu bibhrataḥ ||

6.056.01a ya enam ādideśati karambhād iti pūṣaṇam |
 6.056.01c na tena deva ādiśe ||
 6.056.02a uta ghā sa rathītamaḥ sakhyā satpatir yujā |
 6.056.02c indro vṛtrāṇi jighnate ||
 6.056.03a utādaḥ paruṣe gavi sūraś cakram hiraṇyayam |
 6.056.03c ny airayad rathītamaḥ ||
 6.056.04a yad adya tvā puruṣṭuta bravāma dasra mantumaḥ |
 6.056.04c tat su no manma sādhyā ||
 6.056.05a imaṃ ca no gaveṣaṇam sātaye siṣadho gaṇam |
 6.056.05c ārāt pūṣann asi śrutaḥ ||
 6.056.06a ā te svastim īmaha āreaghām upāvasum |
 6.056.06c adyā ca sarvatātaye śvaś ca sarvatātaye ||

6.057.01a indrā nu pūṣaṇā vayam sakhyāya svastaye |
 6.057.01c huvema vājasātaye ||
 6.057.02a somam anya upāsadat pātave camvoḥ sutam |
 6.057.02c karambham anya ichati ||
 6.057.03a ajā anyasya vahnayo harī anyasya sambhṛtā |

- 6.057.03c tābhyāṃ vṛtrāṇi jighnate ||
6.057.04a yad indro anayad rito mahīr apo vṛṣantamaḥ |
6.057.04c tatra pūṣābhavat sacā ||
6.057.05a tām pūṣṇaḥ sumatiṃ vayam vṛkṣasya pra vayām iva |
6.057.05c indrasya cā rabhāmahe ||
6.057.06a ut pūṣaṇam yuvāmahe 'bhīśūmr iva sārathiḥ |
6.057.06c mahyā indram svastaye ||
- 6.058.01a śukram te anyad yajataṃ te anyad viṣurūpe ahanī dyaur ivāsi |
6.058.01c viśvā hi mājā avasi svadhāvo bhadrā te pūṣann iha rātir astu ||
6.058.02a ajāsvaḥ paśupā vājapastyo dhiyaṃjinvo bhuvane viśve arpitaḥ |
6.058.02c aṣṭrām pūṣā śīthirām udvarivṛjat samcakṣāṇo bhuvanā deva iyate ||
6.058.03a yās te pūṣan nāvo antaḥ samudre hiraṇyayīr antarikṣe caranti |
6.058.03c tābhir yāsi dūtyāṃ sūryasya kāmena kṛta śrava ichamānaḥ ||
6.058.04a pūṣā subandhur diva ā pṛthivyā iḍas patir maghavā dasmavarcāḥ |
6.058.04c yaṃ devāso adaduḥ sūryāyai kāmena kṛtaṃ tavasaṃ svañcam ||
- 6.059.01a pra nu vocā suteṣu vām vīryā yāni cakrathuḥ |
6.059.01c hatāso vām pitaro devaśatrava indrāgnī jīvatho yuvam ||
6.059.02a baḍ itthā mahimā vām indrāgnī paniṣṭha ā |
6.059.02c samāno vām janitā bhrātarā yuvam yamāv ihehamātarā ||
6.059.03a okivāmsā sute sacāṃ aśvā saptī ivādane |
6.059.03c indrā nv agnī avaseha vajriṇā vayam devā havāmahe ||
6.059.04a ya indrāgnī suteṣu vām stavat teṣv ṛtāvṛdhā |
6.059.04c joṣavākaṃ vadataḥ pajrahoṣiṇā na devā bhasathaś cana ||
6.059.05a indrāgnī ko asya vām devau martaś ciketati |
6.059.05c viśūco aśvān yuyujāna iyata ekaḥ samāna ā rathe ||
6.059.06a indrāgnī apād iyam pūrvāgāt padvatībhyaḥ |
6.059.06c hitvī śiro jihvayā vāvadac carat trimṣat padā ny akramīt ||
6.059.07a indrāgnī ā hi tanvate naro dhanvāni bāhvoḥ |
6.059.07c mā no asmin mahādhane parā varktaṃ gaviṣṭiṣu ||
6.059.08a indrāgnī tapanti māghā aryo arātayaḥ |
6.059.08c apa dveṣāmsy ā kṛtaṃ yuyutaṃ sūryād adhi ||
6.059.09a indrāgnī yuvor api vasu divyāni pāṛthivā |
6.059.09c ā na iha pra yachataṃ rayiṃ viśvāyupoṣasam ||
6.059.10a indrāgnī ukthavāhasā stomebhir havanaśrutā |
6.059.10c viśvābhir gīrbhir ā gatam asya somasya pītaye ||
- 6.060.01a śnathad vṛtram uta sanoti vājam indrā yo agnī sahurī saparyāt |
6.060.01c irajyantā vasavyasya bhūreḥ sahasamā sahasā vājayantā ||
6.060.02a tā yodhiṣṭam abhi gā indra nūnam apaḥ svar uṣaso agna ūḍhāḥ |
6.060.02c diśaḥ svar uṣasa indra citrā apo gā agne yuvase niyutvān ||
6.060.03a ā vṛtrahaṇā vṛtrahabhiḥ śuṣmair indra yātaṃ namobhir agne arvāk |
6.060.03c yuvam rādhobhir akavebhir indrāgne asme bhavatam uttamebhiḥ ||
6.060.04a tā huve yavor idam papne viśvam purā kṛtam |
6.060.04c indrāgnī na mardhataḥ ||

- 6.060.05a ugrā vighaninā mṛdha indrāgnī havāmahe |
6.060.05c tā no mṛḍāta idṛṣe ||
6.060.06a hato vṛtrāṇy āryā hato dāsāni satpatī |
6.060.06c hato viśvā apa dviṣaḥ ||
6.060.07a indrāgnī yuvām ime 'bhi stomā anūṣata |
6.060.07c pibatam śambhuvā sutam ||
6.060.08a yā vām santi purusṛho niyuto dāsūṣe narā |
6.060.08c indrāgnī tābhir ā gatam ||
6.060.09a tābhir ā gachatam naropedam savanam sutam |
6.060.09c indrāgnī somapītaye ||
6.060.10a tam iḍiṣva yo arciṣā vanā viśvā pariṣvajat |
6.060.10c kṛṣṇā kṛṇoti jihvayā ||
6.060.11a ya iddha āvivāsati sumnam indrasya martyaḥ |
6.060.11c dyumnāya sutarā apaḥ ||
6.060.12a tā no vājavatīr iṣa āsūn pipṛtam arvataḥ |
6.060.12c indram agniṃ ca voḍhave ||
6.060.13a ubhā vām indrāgnī āhuvadhyā ubhā rādhasaḥ saha mādayadhyai |
6.060.13c ubhā dātārāv iṣam rayiṇām ubhā vājasya sātaye huve vām ||
6.060.14a ā no gavyebhir aśvyair vasavyair upa gachatam |
6.060.14c sakhāyau devau sakhyāya śambhuvendrāgnī tā havāmahe ||
6.060.15a indrāgnī śṛṇutam havam yajamānasya sunvataḥ |
6.060.15c vītam havyaṇy ā gatam pibatam somyam madhu ||
- 6.061.01a iyam adadād rabhasam ṛṇacyutam divodāsam vadhryaśvāya dāsūṣe |
6.061.01c yā śāsvantam ācakhādāvasam paṇim tā te dātrāṇi taviṣā sarasvati ||
6.061.02a iyam śuṣmehhir bisakhā ivārujat sānu girīṇām taviṣebhir ūrmibhiḥ |
6.061.02c pārāvataḥnīm avase suvṛktibhiḥ sarasvatim ā vivāsema dhītibhiḥ ||
6.061.03a sarasvati devanido ni barhaya prajāṃ viśvasya bṛsayasya māyinaḥ |
6.061.03c uta kṣitibhyo 'vanīr avindo viṣam ebhyo asravo vājinīvatī ||
6.061.04a pra ṇo devī sarasvatī vājebhir vājinīvatī |
6.061.04c dhinām avitry avatu ||
6.061.05a yas tvā devi sarasvaty upabrūte dhane hite |
6.061.05c indram na vṛtratūrye ||
6.061.06a tvam devi sarasvaty avā vājeṣu vājini |
6.061.06c radā pūṣeva naḥ sanim ||
6.061.07a uta syā naḥ sarasvatī ghorā hiraṇyavartaniḥ |
6.061.07c vṛtraghnī vaṣṭi suṣṭutim ||
6.061.08a yasyā ananto ahrutas tveṣaś cariṣṇur arṇavaḥ |
6.061.08c amaś carati roruvat ||
6.061.09a sā no viśvā ati dviṣaḥ svasṛr anyā ṛtāvarī |
6.061.09c atann aheva sūryaḥ ||
6.061.10a uta naḥ priyā priyāsu saptasvasā sujuṣṭā |
6.061.10c sarasvatī stomyā bhūt ||
6.061.11a āpaprūṣī pārthivāny uru rajo antarikṣam |
6.061.11c sarasvatī nidas pātu ||
6.061.12a triṣadhasthā saptadhātuḥ pañca jātā vardhayanti |
6.061.12c vāje-vāje havyaḥ bhūt ||
6.061.13a pra yā mahimnā mahināsu cekite dyumnebhīr anyā apasām apastamā |

- 6.061.13c ratha iva bṛhatī vibhvane kṛtopastutyā cikituṣā sarasvatī ||
6.061.14a sarasvaty abhi no neṣi vasyo māpa sphariḥ payasā mā na ā dhak |
6.061.14c juṣasva naḥ sakhyā veśyā ca mā tvat kṣetrāṇy araṇāni ganma ||
- 6.062.01a stuṣe narā divo asya prasantāśvinā huve jaramāṇo arkaiḥ |
6.062.01c yā sadya usrā vyuṣi jmo antān yuyūṣataḥ pary urū varāṃsi ||
6.062.02a tā yajñam ā śucibhiś cakramāṇā rathasya bhānum rurucū rajobhiḥ |
6.062.02c purū varāṃsy amitā mimānāpo dhanvāny ati yātho ajrān ||
6.062.03a tā ha tyad vartir yad aradhram ugretthā dhiya ūhathuḥ śaśvad aśvaiḥ |
6.062.03c manojavebhir iṣiraiḥ śayadhyai pari vyathir dāśuṣo martyasya ||
6.062.04a tā navyaso jaramāṇasya manmopa bhūṣato yuyujānasaptī |
6.062.04c śubham pṛkṣam iṣam ūrjaṃ vahantā hotā yakṣat pratno adhrug yuvānā ||
6.062.05a tā valgū dasrā puruśākatamā pratnā navyasā vacasā vivāse |
6.062.05c yā śamsate stuvate śambhaviṣṭhā babhūvatur gṛṇate citrarātī ||
6.062.06a tā bhujyūṃ vibhir adbhyaḥ samudrāt tugrasya sūnum ūhathū rajobhiḥ |
6.062.06c areṇubhir yojanebhir bhujantā patatribhir arṇaso nir upasthāt ||
6.062.07a vi jayuṣā rathyā yātam adriṃ śrutam havam vṛṣaṇā vadhrimatyāḥ |
6.062.07c daśasyantā śayave pipyathur gām iti cyavānā sumatim bhuraṇyū ||
6.062.08a yad rodasi pradivo asti bhūmā heḍo devānām uta martyatrā |
6.062.08c tad ādityā vasavo rudriyāso rakṣoyuje tapur agham dadhāta ||
6.062.09a ya im rājānāv ṛtuthā vidadhad rajaso mitro varuṇas ciketat |
6.062.09c gambhīrāya rakṣase hetim asya droghāya cid vacasa ānavāya ||
6.062.10a antarais cakrais tanayāya vartir dyumatā yātam nṛvatā rathena |
6.062.10c sanutyena tyajasā martyasya vanuṣyatām api śīrṣā vavṛktam ||
6.062.11a ā paramābhir uta madhyamābhir niyudbhir yātam avamābhir arvāk |
6.062.11c dṛḍhasya cid gomato vi vrajasya duro vartam gṛṇate citrarātī ||
- 6.063.01a kva tyā valgū puruhūtādyā dūto na stomo 'vidan namasvān |
6.063.01c ā yo arvān nāsatyā vavarta preṣṭhā hy asatho asya manman ||
6.063.02a aram me gantam havanāyāsmāi gṛṇānā yathā pibātho andhaḥ |
6.063.02c pari ha tyad vartir yātho riṣo na yat paro nāntaras tuturyāt ||
6.063.03a akāri vām andhaso varimann astāri barhiḥ suprāyaṇatamam |
6.063.03c uttānahasto yuvayur vavandā vām nakṣanto adraya āñjan ||
6.063.04a ūrdhvo vām agnir adhvaṛṣv asthāt pra rātir eti jūrṇinī ghṛtācī |
6.063.04c pra hotā gūrtamanā urāṇo 'yukta yo nāsatyā havīman ||
6.063.05a adhi śriye duhitā sūryasya ratham tasthau purubhujā śatotim |
6.063.05c pra māyābhir māyinā bhūtam atra narā nṛtū janiman yajñiyānām ||
6.063.06a yuvaṃ śrībhir darśatābhir ābhiḥ śubhe puṣṭim ūhathuḥ sūryāyāḥ |
6.063.06c pra vām vayo vapuṣe 'nu paptan nakṣad vānī suṣṭutā dhiṣṇyā vām ||
6.063.07a ā vām vayo 'śvāso vahiṣṭhā abhi prayo nāsatyā vahantu |
6.063.07c pra vām ratho manojavā asarjīṣaḥ pṛkṣa iṣidho anu pūrvīḥ ||
6.063.08a puru hi vām purubhujā deṣṇam dhenum na iṣam pinvatam asakrām |
6.063.08c stutaś ca vām mādhvī suṣṭutiś ca rasās ca ye vām anu rātīm agman ||
6.063.09a uta ma ṛjre purayasya raghvī sumiḍhe śatam peruke ca pakvā |
6.063.09c śāṇḍo dād dhiraṇinaḥ smaddiṣṭin daśa vaśāso abhiṣāca ṛṣvān ||
6.063.10a sam vām śatā nāsatyā sahasrāśvānām purupanthā gire dāt |
6.063.10c bharadvājāya vira nū gire dād dhatā rakṣāṃsi purudaṃsasā syuḥ ||

6.063.11a ā vāṃ sumne variman sūribhiḥ śyām ||

6.064.01a ud u śriya uṣaso rocamānā asthur apāṃ normayo ruśantaḥ |
6.064.01c kṛṇoti viśvā supathā sugāny abhūd u vasvī dakṣiṇā maghonī ||
6.064.02a bhadrā dadṛkṣa urviyā vi bhāsy ut te śocir bhānavo dyām apaptan |
6.064.02c āvir vakṣaḥ kṛṇuṣe śumbhamānoṣo devi rocamānā mahobhiḥ ||
6.064.03a vahanti sīm aruṇāso ruśanto gāvaḥ subhagām urviyā prathānām |
6.064.03c apejate sūro asteva śatrūn bādḥate tamo ajiro na voḍhā ||
6.064.04a sugota te supathā parvateṣv avāte apas tarasi svabhāno |
6.064.04c sā na ā vaha pṛthuyāmann ṛṣve rayiṃ divo duhitar iṣayadhyai ||
6.064.05a sā vaha yokṣabhir avātoṣo varam vahasi joṣam anu |
6.064.05c tvam divo duhitar yā ha devī pūrvahūtau maṃhanā darśatā bhūḥ ||
6.064.06a ut te vayas cid vasater apaptan naraś ca ye pitubhājo vyuṣṭau |
6.064.06c amā sate vahasi bhūri vāmam uṣo devi dāśuṣe martyāya ||

6.065.01a eṣā syā no duhitā divojāḥ kṣitir uchantī mānuṣir ajīgaḥ |
6.065.01c yā bhānunā ruśatā rāmyāsv ajñāyi tiras tamasaś cid aktūn ||
6.065.02a vi tad yayur aruṇayugbhir aśvaiś citram bhānty uṣasaś candrarathāḥ |
6.065.02c agraṃ yajñasya bṛhato nayantīr vi tā bādḥante tama ūrmyāyāḥ ||
6.065.03a śravo vājam iṣam ūrjam vahantīr ni dāśuṣa uṣaso martyāya |
6.065.03c maghonīr vīravat patyamānā avo dhāta vidhate ratnam adya ||
6.065.04a idā hi vo vidhate ratnam astidā vīrāya dāśuṣa uṣāsaḥ |
6.065.04c idā viprāya jarate yad ukthā ni śma māvate vahathā purā cit ||
6.065.05a idā hi ta uṣo adrisāno gotrā gavām aṅgirasō gṛṇanti |
6.065.05c vy arkeṇa bibhidur brahmaṇā ca satyā nṛṇām abhavad devahūtiḥ ||
6.065.06a uchā divo duhitaḥ pratnavan no bharadvājavat vidhate maghoni |
6.065.06c suvīram rayiṃ gṛṇate ririhy urugāyam adhi dhehi śravo naḥ ||

6.066.01a vapur nu tac cikitūṣe cid astu samānam nāma dhenu patyamānam |
6.066.01c marteṣv anyad dohase pīpāya sakṛc chakraṃ duduhe pṛśnir ūdhaḥ ||
6.066.02a ye agnayo na śośucann idhānā dvir yat trir maruto vāvṛdhanta |
6.066.02c areṇavo hiraṇyayāsa eṣāṃ sākaṃ nṛmṇaiḥ paum̐syebhiś ca bhūvan ||
6.066.03a rudrasya ye mīḍhuṣaḥ santi putrā yāms co nu dādḥvir bharadhyai |
6.066.03c vide hi mātā maho mahī śā set pṛśniḥ subhve garbham ādhāt ||
6.066.04a na ya iṣante januṣo 'yā nv antaḥ santo 'vadyāni punānāḥ |
6.066.04c nir yad duhre śucayo 'nu joṣam anu śriyā tanvam ukṣamānāḥ ||
6.066.05a makṣū na yeṣu dohase cid ayā ā nāma dhṛṣṇu mārutaṃ dadhānāḥ |
6.066.05c na ye staunā ayāso mahnā nū cit sudānur ava yāsad ugrān ||
6.066.06a ta id ugrāḥ śavasā dhṛṣṇuṣeṇā ubhe yujanta rodasī sumeke |
6.066.06c adha smaiṣu rodasī svaśocir āmavatsu tasthau na rokaḥ ||
6.066.07a aneno vo maruto yāmo astv anaśvaś cid yam ajaty arathīḥ |
6.066.07c anavaso anabhīśū rajastūr vi rodasī pathyā yāti sādhan ||
6.066.08a nāsyā vartā na tarutā nv asti maruto yam avatha vājasātau |
6.066.08c toke vā goṣu tanaye yam apsu sa vrajam dartā pārye adha dyoḥ ||
6.066.09a pra citram arkaṃ gṛṇate turāya mārutāya svatavase bharadhvam |
6.066.09c ye sahāmsi sahasā sahante rejate agne pṛthivī makhebhyaḥ ||

6.066.10a tviṣīmanto adhvarasyeva didyut tṛṣucyavaso juhvo nāgneḥ |
 6.066.10c arcatrayo dhunayo na vīrā bhrājajjanmāno maruto adhrṣṭāḥ ||
 6.066.11a taṃ vṛdhantam mārutam bhrājadṛṣṭim rudrasya sūnum havasā vivāse |
 6.066.11c divaḥ śardhāya śucayo maṇiṣā girayo nāpa ugrā asṛdhran ||

6.067.01a viśveṣāṃ vaḥ satāṃ jyeṣṭhatamā gīrbhir mitrāvaruṇā vāvṛdhadhyai |
 6.067.01c saṃ yā raśmeva yamatur yamiṣṭhā dvā janāṃ asamā bāhubhiḥ svaiḥ ||
 6.067.02a iyam mad vām pra stṛṇite maṇiṣopa priyā namasā barhir acha |
 6.067.02c yantaṃ no mitrāvaruṇāv adhrṣṭaṃ chardir yad vām varūthyam sudānū |
 6.067.03a ā yātam mitrāvaruṇā suśasty upa priyā namasā hūyamānā |
 6.067.03c saṃ yāv apna stho apaseva janāṃ chrudhīyataś cid yatatho mahitvā ||
 6.067.04a aśvā na yā vājinā pūtabandhū ṛtā yad garbham aditir bharadhyai |
 6.067.04c pra yā mahi mahāntā jāyamānā ghorā martāya ripave ni dīdhaḥ ||
 6.067.05a viśve yad vām maṃhanā mandamānāḥ kṣatram devāso adadhuḥ sajoṣāḥ |
 6.067.05c pari yad bhūtho rodasī cid urvī santi spaśo adabdhāso amūrāḥ ||
 6.067.06a tā hi kṣatram dhārayethe anu dyūn dṛṃhethe sānum upamād iva dyoḥ |
 6.067.06c dṛdho nakṣatra uta viśvadevo bhūmim ātān dyāṃ dhāsināyoḥ ||
 6.067.07a tā vigrāṃ dhaithe jaṭharam pṛṇadhyā ā yat sadma sabhrṭayaḥ pṛṇanti |
 6.067.07c na mṛṣyante yuvatayo 'vātā vi yat payo viśvajinvā bharante ||
 6.067.08a tā jihvayā sadam edaṃ sumedhā ā yad vām satyo aratir ṛte bhūt |
 6.067.08c tad vām mahitvaṃ ghṛtānāv astu yuvaṃ dāsūṣe vi cayiṣṭam aṃhaḥ ||
 6.067.09a pra yad vām mitrāvaruṇā spūrdhan priyā dhāma yuvadhitā minanti |
 6.067.09c na ye devāsa ohasā na martā ayajñasāco apyo na putrāḥ ||
 6.067.10a vi yad vācaṃ kīstāso bharante śaṃsanti ke cin nivido manānāḥ |
 6.067.10c ād vām bravāma satyāny ukthā nakir devebhir yatatho mahitvā ||
 6.067.11a avor itthā vām chardiṣo abhiṣṭau yuvor mitrāvaruṇāv askṛdhoyu |
 6.067.11c anu yad gāva sphurān ṛjipyam dhṛṣṇum yad raṇe vṛṣaṇam yunajan ||

6.068.01a śruṣṭi vām yajña udyataḥ sajoṣā manuṣvad vṛktabarhiṣo yajadhyai |
 6.068.01c ā ya indrāvaruṇāv iṣe adya mahe sumnāya maha āvavartat ||
 6.068.02a tā hi śreṣṭhā devatātā tujā sūrānām śaviṣṭhā tā hi bhūtam |
 6.068.02c maghonām maṃhiṣṭhā tuviśuṣma ṛtena vṛtraturā sarvasenā ||
 6.068.03a tā gṛṇihi namasyebhiḥ sūṣaiḥ sumnebhir indrāvaruṇā cakānā |
 6.068.03c vajreṇānyaḥ śavasā hanti vṛtram siṣakty anyo vṛjaneṣu vipraḥ ||
 6.068.04a gnās ca yan naraś ca vāvṛdhanta viśve devāso narām svagūrtāḥ |
 6.068.04c praibhya indrāvaruṇā mahitvā dyauś ca pṛthivi bhūtam urvī ||
 6.068.05a sa it sudānuḥ svavāṃ ṛtāvendrā yo vām varuṇa dāsati tman |
 6.068.05c iṣā sa dviṣas tared dāsvān vaṃsad rayiṃ rayivataś ca janān ||
 6.068.06a yaṃ yuvaṃ dāsvadhvarāya devā rayiṃ dhattho vasumantam purukṣum |
 6.068.06c asme sa indrāvaruṇāv api ṣyāt pra yo bhanakti vanuṣām aśastih ||
 6.068.07a uta naḥ sutrātro devagopāḥ sūribhya indrāvaruṇā rayiḥ ṣyāt |
 6.068.07c yeṣāṃ śuṣmaḥ pṛtanāsu sāhvān pra sadyo dyumnā tirate taturih ||
 6.068.08a nū na indrāvaruṇā gṛṇānā pṛṅktaṃ rayiṃ sauśravasāya devā |
 6.068.08c itthā gṛṇanto mahinasya śardho 'po na nāvā durtā tarema ||
 6.068.09a pra samrāje bṛhate manma nu priyam arca devāya varuṇāya saprathaḥ |
 6.068.09c ayaṃ ya urvī mahinā mahivrataḥ kratvā vibhāty ajaro na śociṣā ||
 6.068.10a indrāvaruṇā sutapāv imaṃ sutam somam pibatam madyam dhṛtavratā |

6.068.10c yuvo ratho adhvaram devavitaye prati svasaram upa yati pitaye ||
6.068.11a indraravanā madhumattamasya vr̥ṣṇaḥ somasya vr̥ṣṇā vr̥ṣethām |
6.068.11c idam vām andhaḥ pariṣiktam asme āsadyāsmin barhiṣi mādayethām ||

6.069.01a sam vām karmanā sam iṣā hinomindraviṣṇū apasas pāre asya |
6.069.01c juṣethām yajñam draviṇam ca dhattam ariṣṭair naḥ pathibhiḥ pārayantā ||
6.069.02a yā viśvāsām janitārā matinām indraviṣṇū kalaśā somadhānā |
6.069.02c pra vām giraḥ śasyamānā avantu pra stomāso gīyamānāso arkaiḥ ||
6.069.03a indraviṣṇū madapatī madānām ā somam yātam draviṇo dadhānā |
6.069.03c sam vām añjantv aktubhir matinām sam stomāsaḥ śasyamānāsa ukthaiḥ ||
6.069.04a ā vām aśvāso abhimātiśaha indraviṣṇū sadhamādo vahantu |
6.069.04c juṣethām viśvā havanā matinām upa brahmāṇi śṛṇutam giro me ||
6.069.05a indraviṣṇū tat panayāyām vām somasya mada uru cakramāthe |
6.069.05c akṛṇutam antarikṣam variyo 'prathatam jīvase no rajāmsi ||
6.069.06a indraviṣṇū haviṣā vāvṛdhānāgrādvānā namasā rātahavyā |
6.069.06c ghṛtāsutī draviṇam dhattam asme samudra sthaḥ kalaśaḥ somadhānaḥ ||
6.069.07a indraviṣṇū pibatam madhvo asya somasya dasrā jaṭharam pṛṇethām |
6.069.07c ā vām andhāmsi madirāny agmann upa brahmāṇi śṛṇutam havam me ||
6.069.08a ubhā jigyathur na parā jayethe na parā jigye kataras canainoḥ |
6.069.08c indras ca viṣṇo yad apaspr̥dhethām tredhā sahasram vi tad airayethām ||

6.070.01a ghṛtavatī bhuvanānām abhiśriyovī pṛthvī madhudughe supeśasā |
6.070.01c dyāvāpṛthivī varuṇasya dharmanā viṣkabhite ajare bhūrietasā ||
6.070.02a asaścanti bhūridhāre payasvatī ghṛtam duhāte sukr̥te śucivrate |
6.070.02c rājanti asya bhuvanasya rodasī asme retaḥ siñcatam yan manurhitam ||
6.070.03a yo vām ṛjave kramaṇāya rodasī marto dadāśa dhiṣaṇe sa sādhati |
6.070.03c pra prajābhir jāyate dharmanas pari yuvoḥ siktā viṣurūpāni savratā ||
6.070.04a ghṛtena dyāvāpṛthivī abhivṛte ghṛtasriyā ghṛtapṛcā ghṛtāvṛdhā |
6.070.04c urvī pṛthvī hotṛvūrye purohite te id viprā īdate sumnam iṣṭaye ||
6.070.05a madhu no dyāvāpṛthivī mimikṣatām madhuścutā madhudughe madhuvrate |
6.070.05c dadhāne yajñam draviṇam ca devatā mahi śravo vājam asme suvīryam ||
6.070.06a ūrjam no dyauś ca pṛthivī ca pinvatām pitā mātā viśvavidā sudamsasā |
6.070.06c samrarāṇe rodasī viśvaśambhuvā sanim vājam rayim asme sam invatām ||

6.071.01a ud u śya devaḥ savitā hiraṇyayā bāhū ayamsta savanāya sukratuḥ |
6.071.01c ghṛtena pāṇi abhi pruṣṇute makho yuvā sudakṣo rajaso vidharmaṇi ||
6.071.02a devasya vayam savituḥ savīmani śreṣṭhe syāma vasunaś ca dāvane |
6.071.02c yo viśvasya dvipado yaś catuṣpado niveśane prasave cāsi bhūmanaḥ ||
6.071.03a adabdhebhīḥ savitaḥ pāyubhiṣ ṭvam śivebhir adya pari pāhi no gayam |
6.071.03c hiraṇyajihvaḥ suvitāya navyase rakṣā mākīr no aghaśamsa īsata ||
6.071.04a ud u śya devaḥ savitā damūnā hiraṇyapāṇiḥ pratidoṣam asthāt |
6.071.04c ayohanur yajato mandrajihva ā dāśuṣe suvati bhūri vāmam ||
6.071.05a ud ū ayāṁ upavakteva bāhū hiraṇyayā savitā supratikā |
6.071.05c divo rohāmsy aruhāt pṛthivyā arīramat patayat kac cid abhvam ||
6.071.06a vāmam adya savitar vāmam u śvo dive-dive vāmam asmabhyam sāvīḥ |
6.071.06c vāmasya hi kṣayasya deva bhūrer ayā dhiyā vāmabhājaḥ syāma ||

6.072.01a indrāsomā mahi tad vām mahitvaṃ yuvam mahāni prathamāni cakrathuḥ |
 6.072.01c yuvaṃ sūryaṃ vividathur yuvaṃ svar viśvā tamāṃsy ahaṭaṃ nidaś ca ||
 6.072.02a indrāsomā vāsayatha uśāsam ut sūryaṃ nayatho jyotiṣā saha |
 6.072.02c upa dyāṃ skambhathu skambhanenāprathatam pṛthivīm mātaraṃ vi ||
 6.072.03a indrāsomāv ahim apaḥ pariṣṭhāṃ hatho vṛtram anu vām dyaur amanyata |
 6.072.03c prāṇāṃsy airayataṃ nadīnām ā samudrāṇi paprathuḥ purūṇi ||
 6.072.04a indrāsomā pakvam āmāsv antar ni gavām id dadhathur vakṣaṇāsu |
 6.072.04c jagṛbhathur anapinaddham āsu ruśac citrāsu jagatīṣv antaḥ ||
 6.072.05a indrāsomā yuvam aṅga tarutram apatyasācaṃ śrutyaṃ rarāthe |
 6.072.05c yuvaṃ śuśmaṃ naryaṃ carṣaṇibhyaḥ saṃ vivyathuḥ pṛtanāśāham ugrā ||

6.073.01a yo adribhit prathamajā ṛtāvā bṛhaspatir āṅgirasō haviṣmān |
 6.073.01c dvibarhajmā prāgharmasat pitā na ā rodasī vṛṣabho roravīti ||
 6.073.02a janāya cid ya ivata ulokam bṛhaspatir devahūtau cakāra |
 6.073.02c ghnān vṛtrāṇi vi puro dardarīti jayañ chatrūṃr amitrān pṛtsu sāhan ||
 6.073.03a bṛhaspatiḥ sam ajayad vasūni maho vrajān gomato deva eṣaḥ |
 6.073.03c apaḥ siṣāsan svar apratīto bṛhaspatir hantya amitrām arkaiḥ ||

6.074.01a somārudrā dhārayethām asuryam pra vām iṣṭayo 'ram aśnuvantu |
 6.074.01c dame-dame sapta ratnā dadhānā śaṃ no bhūtaṃ dvipade śaṃ catuṣpade ||
 6.074.02a somārudrā vi vṛhataṃ viśūcīm amivā yā no gayam āviveśa |
 6.074.02c āre bādhetḥāṃ nirṛtim parācair asme bhadrā sauśravasāni santu ||
 6.074.03a somārudrā yuvam etāny asme viśvā tanūṣu bheṣajāni dhattam |
 6.074.03c ava syatam muñcataṃ yan no asti tanūṣu baddham kṛtam eno asmat ||
 6.074.04a tigmāyudhau tigmahetī suśevau somārudrāv iha su mṛdataṃ naḥ |
 6.074.04c pra no muñcataṃ varuṇasya pāsād gopāyataṃ naḥ sumanasyamānā ||

6.075.01a jīmūtasyeva bhavati pratīkaṃ yad varmī yāti samadām upasthe |
 6.075.01c anāviddhayā tanvā jaya tvam sa tvā varmaṇo mahimā pipartu ||
 6.075.02a dhanvanā gā dhanvanājīm jayema dhanvanā tivrāḥ samado jayema |
 6.075.02c dhanuḥ śator apakāmaṃ kṛṇoti dhanvanā sarvāḥ pradiśo jayema ||
 6.075.03a vakṣyantīved ā ganīganti karṇam priyaṃ sakhāyam pariśasvajānā |
 6.075.03c yoṣeva śīṅkte vitatādhi dhanvañ jyā iyaṃ samane pārayanti ||
 6.075.04a te ācaranti samaneva yoṣā māteva putram bibhrtām upasthe |
 6.075.04c apa śatrūn vidhyatām saṃvidāne ārtñi ime viṣphuranti amitrān ||
 6.075.05a bahvīnām pitā bahur asya putraś ciścā kṛṇoti samanāvagatya |
 6.075.05c iṣudhiḥ saṅkāḥ pṛtanāś ca sarvāḥ pṛṣṭhe ninaddho jayati prasūtaḥ ||
 6.075.06a rathe tiṣṭhan nayati vājinaḥ puro yatra-yatra kāmāyate suśārathiḥ |
 6.075.06c abhīśūnām mahimānam panāyata manaḥ paścād anu yachanti raśmayāḥ ||
 6.075.07a tivrān ghoṣān kṛṇvate vṛṣapāṇayo 'śvā rathebhīḥ saha vājayantaḥ |
 6.075.07c avakrāmantaḥ prapadair amitrān kṣiṇanti śatrūṃr anapavyayantaḥ ||
 6.075.08a rathavāhanaṃ havir asya nāma yatrāyudham nihitam asya varma |
 6.075.08c tatrā ratham upa śagmaṃ sadema viśvāhā vayaṃ sumanasyamānāḥ ||
 6.075.09a svāduṣaṃsadaḥ pitaro vayodhāḥ kṛchreśritaḥ śaktivanto gabhirāḥ |

- 6.075.09c citrasenā iṣubalā amṛdhrāḥ satovīrā uravo vrātasāhāḥ ||
6.075.10a brāhmaṇāsaḥ pitarāḥ somyāsaḥ śive no dyāvāpṛthivī aneasā |
6.075.10c pūṣā naḥ pātu duriṭād ṛtāvṛdho rakṣā mākir no aghaśaṃsa īsata ||
6.075.11a suparṇaṃ vaste mṛgo asyā danto gobhiḥ saṃnaddhā patati prasūtā |
6.075.11c yatrā naraḥ saṃ ca vi ca dravanti tatrāsmabhyam iṣavaḥ śarma yaṃsan ||
6.075.12a ṛjīte pari vṛndhi no 'śmā bhavatu nas tanūḥ |
6.075.12c somo adhi bravītu no 'ditiḥ śarma yachatu ||
6.075.13a ā jaṅghanti sānv eṣāṃ jaghanāṃ upa jighnate |
6.075.13c aśvājani pracetaso 'śvān samatsu codaya ||
6.075.14a ahir iva bhogaiḥ pary eti bāhuṃ jyāyā hetim paribādhamānaḥ |
6.075.14c hastaghno viśvā vayunāni vidvān pumān pumāṃsam pari pātu viśvataḥ ||
6.075.15a ālāktā yā ruruśīrṣṇy atho yasyā ayo mukham |
6.075.15c idam parjanya retasa iṣvai devyai bṛhan namaḥ ||
6.075.16a avasīṣṭā parā pata śaravye brahmasaṃśite |
6.075.16c gachāmitrān pra padyasva māmīṣāṃ kaṃ canoc chiṣaḥ ||
6.075.17a yatra bāṇāḥ sampatanti kumārā viśikhā iva |
6.075.17c tatrā no brahmaṇas patir aditiḥ śarma yachatu viśvāhā śarma yachatu ||
6.075.18a marmāṇi te varmaṇā chādayāmi somas tvā rājāmṛtenānu vastām |
6.075.18c uror variyo varuṇas te kṛṇotu jayantam tvānu devā madantu ||
6.075.19a yo naḥ svo araṇo yaś ca niṣṭyo jighāṃsati |
6.075.19c devās taṃ sarve dhūrvantu brahma varma mamāntaram ||

7. Mandala

- 7.001.01a agniṃ naro dīdhitibhir arañyor hastacyutī janayanta praśastam |
7.001.01c dūredrśaṃ gṛhapatim atharyum ||
7.001.02a tam agniṃ aste vasavo ny ṛṇvan supratīcākṣam avase kutaś cit |
7.001.02c dakṣāyyo yo dama āsa nityaḥ ||
7.001.03a preddho agne dīdhi puro no 'jasrayā sūrmyā yaviṣṭha |
7.001.03c tvāṃ śaśvanta upa yanti vājāḥ ||
7.001.04a pra te agnayo 'gnibhyo varam niḥ suvīrāsaḥ śośucanta dyumantaḥ |
7.001.04c yatrā naraḥ samāsate sujātāḥ ||
7.001.05a dā no agne dhiyā rayiṃ suvīraṃ svapatyaṃ sahasya praśastam |
7.001.05c na yaṃ yāvā tarati yātumāvān ||
7.001.06a upa yaṃ eti yuvatiḥ sudakṣaṃ doṣā vastor haviṣmatī ghṛtācī |
7.001.06c upa svainam aramatir vasūyuḥ ||
7.001.07a viśvā agne 'pa dahārātīr yebhis tapobhir adaho jarūtham |
7.001.07c pra nisvaram cātayasvāmivām ||
7.001.08a ā yas te agna idhate anīkaṃ vasiṣṭha śukra dīdivaḥ pāvaka |
7.001.08c uto na ebhi stavathair iha syāḥ ||
7.001.09a vi ye te agne bhejire anīkam martā naraḥ pitryāsaḥ purutrā |
7.001.09c uto na ebhiḥ sumanā iha syāḥ ||
7.001.10a ime naro vṛtrahatyēṣu sūrā viśvā adevīr abhi santu māvāḥ |
7.001.10c ye me dhiyam panayanta praśastām ||
7.001.11a mā sūne agne ni śadāma nṛṇām māśeṣaso 'vīratā pari tvā |
7.001.11c prajāvatīṣu duryāsu durya ||
7.001.12a yaṃ aśvī nityam upayāti yajñam prajāvantam svapatyaṃ kṣayaṃ naḥ |
7.001.12c svajanmanā śeṣasā vāvṛdhānam ||
7.001.13a pāhi no agne rakṣaso ajuṣṭāt pāhi dhūrter araruṣo aghāyoḥ |
7.001.13c tvā yujā pṛtanāyūṃr abhi ṣyām ||
7.001.14a sed agnir agniṃr aty astv anyān yatra vājī tanayo viḍupāṇiḥ |
7.001.14c sahasrapāthā akṣarā sameti ||
7.001.15a sed agnir yo vanuṣyato nipāti sameddhāram aṃhasa uruṣyāt |
7.001.15c sujātāsaḥ pari caranti vīrāḥ ||
7.001.16a ayaṃ so agnir āhutaḥ purutrā yaṃ isānaḥ sam id indhe haviṣmān |
7.001.16c pari yaṃ ety adhvaraṣu hotā ||
7.001.17a tve agna āhavanāni bhūrīśānāsa ā juhuyāma nityā |
7.001.17c ubhā kṛṇvanto vahatū miyedhe ||
7.001.18a imo agne vītatamāni havayājasro vakṣi devatātīm aha |
7.001.18c prati na īṃ surabhīṇi vyantu ||
7.001.19a mā no agne 'vīrate parā dā durvāsase 'mataye mā no asyai |
7.001.19c mā naḥ kṣudhe mā rakṣasa ṛtāvo mā no dame mā vana ā juhūrthāḥ ||
7.001.20a nū me brahmāṇy agna uc chaśādhi tvam deva maghavadbhyaḥ suśūdaḥ |
7.001.20c rātau syāmobhayāsa ā te yūyam pāta svastibhiḥ sadā naḥ ||
7.001.21a tvam agne suhavo raṇvasaṃdṛk suditī sūno sahaso didīhi |
7.001.21c mā tve sacā tanaye nitya ā dhañ mā vīro asman naryo vi dāsīt ||
7.001.22a mā no agne durbhṛtaye sacaiṣu deveddheṣv agniṣu pra vocaḥ |
7.001.22c mā te asmān durmatayo bhṛmāc cid devasya sūno sahaso naśanta ||
7.001.23a sa marto agne svanīka revān amartye ya ājuhote havyam |

7.001.23c sa devatā vasuvaniṃ dadhāti yaṃ sūrir arthī pṛchamāna eti ||
 7.001.24a maho no agne suvitasya vidvān rayiṃ sūribhya ā vahā bṛhantam |
 7.001.24c yena vayaṃ sahasāvan mademāvikiṣitāsa āyuṣā suvirāḥ ||
 7.001.25a nū me brahmāṇy agna uc chaśādhi tvam deva maghavadbhyaḥ suṣūdah |
 7.001.25c rātau syāmobhayāsa ā te yūyam pāta svastibhiḥ sadā naḥ ||

7.002.01a juṣasva naḥ samidham agne adya śocā bṛhad yajataṃ dhūmam ṛṇvan |
 7.002.01c upa spr̥śa divyaṃ sānu stūpaiḥ saṃ raśmibhis tatanah sūryasya ||
 7.002.02a narāśamsasya mahimānam eṣāṃ upa stoṣāma yajatasya yajñaiḥ |
 7.002.02c ye sukratavaḥ śucayo dhiyaṃdhāḥ svadanti devā ubhayāni havyā ||
 7.002.03a iḍenyaṃ vo asuraṃ sudakṣam antar dūtaṃ rodasī satyavācam |
 7.002.03c manuṣvad agnim manunā samiddham sam adhvarāya sadam in mahema ||
 7.002.04a saparyavo bharamānā abhijñu pra vṛñjate namasā barhir agnau |
 7.002.04c ājuhvanā ghṛtapṛṣṭham pṛśadvad adhvaryavo haviṣā marjayadhvam ||
 7.002.05a svādhyo vi duro devayanto 'śísrayū rathayur devatātā |
 7.002.05c pūrvī śísuṃ na mātārā rihāṇe sam agruvo na samaneṣv añjan ||
 7.002.06a uta yoṣaṇe divye mahī na uṣāsānaktā sudugheva dhenuḥ |
 7.002.06c barhiṣadā puruhūte maghonī ā yajñiye suvitāya śrayetām ||
 7.002.07a viprā yajñeṣu mānuṣeṣu kārū manye vāṃ jātavedasā yajadhyai |
 7.002.07c ūrdhvaṃ no adhvaraṃ kṛtaṃ haveṣu tā deveṣu vanatho vāryāni ||
 7.002.08a ā bhāratī bhāratibhiḥ sajoṣā iḍā devair manuṣyebhir agniḥ |
 7.002.08c sarasvatī sārsvatebhir arvāk tisro devīr barhir edaṃ sadantu ||
 7.002.09a tan nas turīpam adha poṣayitnu deva tvaṣṭar vi rarāṇaḥ syasva |
 7.002.09c yato vīraḥ karmaṇyaḥ sudakṣo yuktagrāvā jāyate devakāmaḥ ||
 7.002.10a vanaspate 'va sṛjopa devān agnir haviḥ śamitā sūdayāti |
 7.002.10c sed u hotā satyataro yajāti yathā devānāṃ janimāni veda ||
 7.002.11a ā yāhy agne samidhāno arvān indreṇa devaiḥ sarathaṃ turebhiḥ |
 7.002.11c barhir na āstām aditiḥ suputrā svāhā devā amṛtā mādayantām ||

7.003.01a agniṃ vo devam agnibhiḥ sajoṣā yajīṣṭham dūtam adhware kṛnudhvam |
 7.003.01c yo martyeṣu nidhruvir ṛtāvā tapurmūrdhā ghṛtānaḥ pāvakaḥ ||
 7.003.02a prothad aśvo na yavase 'viṣyan yadā mahaḥ saṃvaranād vy asthāt |
 7.003.02c ād asya vāto anu vāti śocir adha sma te vrajanaṃ kṛṣṇam asti ||
 7.003.03a ud yasya te navajātasya vṛṣṇo 'gne caranty ajarā idhānāḥ |
 7.003.03c achā dyām aruṣo dhūma eti saṃ dūto agna iyase hi devān ||
 7.003.04a vi yasya te pṛthivyām pājo aśret tṛṣu yad annā samavṛkta jambhaiḥ |
 7.003.04c seneva sṛṣṭā prasitiṣ ṭa eti yavaṃ na dasma juhvā vivekṣi ||
 7.003.05a tam id doṣā tam uṣasi yaviṣṭham agnim atyaṃ na marjayanta naraḥ |
 7.003.05c niśisānā atithim asya yonau didāya śocir āhutasya vṛṣṇaḥ ||
 7.003.06a susaṃdr̥k te svanīka pratikaṃ vi yad rukmo na rocasa upāke |
 7.003.06c divo na te tanyatur eti śuṣmaś citro na sūraḥ prati cakṣi bhānum ||
 7.003.07a yathā vaḥ svāhāgnaye dāśema pariḍābhir ghṛtavadbhiś ca havyaiḥ |
 7.003.07c tebhir no agne amitair mahobhiḥ śatam pūrbhir āyasībhir ni pāhi ||
 7.003.08a yā vā te santi dāśuṣe adhṛṣṭā giro vā yābhir nṛvatir uruṣyāḥ |
 7.003.08c tābhir naḥ sūno sahaso ni pāhi smat sūriṇ jaritṛñ jātavedaḥ ||
 7.003.09a nir yat pūteva svadhitiḥ śucir gāt svayā kṛpā tanvā rocamānaḥ |
 7.003.09c ā yo mātṛor uṣenyo janiṣṭa devayajyāya sukratuḥ pāvakaḥ ||

7.003.10a etā no agne saubhagā didīhy api kratuṃ sucetasam vatema |
7.003.10c viśvā stotṛbhyo gṛṇate ca santu yūyam pāta svastibhiḥ sadā naḥ ||

7.004.01a pra vaḥ śukrāya bhānave bharadhvaṃ havyam matiṃ cāgnaye supūtam |
7.004.01c yo daivyāni mānuṣā janūṃṣy antar viśvāni vidmanā jigāti ||
7.004.02a sa gṛtso agnis taruṇaś cid astu yato yaviṣṭho ajaniṣṭa mātuḥ |
7.004.02c sam yo vanā yuvate śucidan bhūri cid annā sam id atti sadyaḥ ||
7.004.03a asya devasya saṃsady anike yam martāsaḥ śyetaṃ jagṛbhre |
7.004.03c ni yo gṛbham pauruṣeyīm uvoca durokam agnir āyave śuśoca ||
7.004.04a ayaṃ kavir akaviṣu pracetā marteṣv agnir amṛto ni dhāyi |
7.004.04c sa mā no atra juhuraḥ sahasvaḥ sadā tve sumanasah syāma ||
7.004.05a ā yo yoniṃ devakṛtaṃ sasāda kratvā hy agnir amṛtāṃ atārīt |
7.004.05c tam oṣadhīś ca vaninaś ca garbham bhūmiś ca viśvadhāyasam bibharti ||
7.004.06a īse hy agnir amṛtasya bhūrer īse rāyaḥ suvīryasya dātoḥ |
7.004.06c mā tvā vayaṃ sahasāvann avirā māpsavaḥ pari śadāma māduvaḥ ||
7.004.07a pariśadyaṃ hy araṇasya rekṇo nityasya rāyaḥ patayaḥ syāma |
7.004.07c na śeṣo agne anyajātam asty acetānasya mā patho vi dukṣaḥ ||
7.004.08a nahi grabhāyāraṇaḥ suśevo 'nyodaryo manasā mantavā u |
7.004.08c adhā cid okaḥ punar it sa ety ā no vājy abhīśaḍ etu navyaḥ ||
7.004.09a tvam agne vanuṣyato ni pāhi tvam u naḥ sahasāvann avadyāt |
7.004.09c sam tvā dhvasmanvad abhy etu pāthaḥ sam rayi sprhayāyyaḥ sahasrī ||
7.004.10a etā no agne saubhagā didīhy api kratuṃ sucetasam vatema |
7.004.10c viśvā stotṛbhyo gṛṇate ca santu yūyam pāta svastibhiḥ sadā naḥ ||

7.005.01a prāgnaye tavase bharadhvaṃ giraṃ divo arataye pṛthivyāḥ |
7.005.01c yo viśveṣāṃ amṛtānām upasthe vaiśvānaro vāvṛdhe jāgṛvadbhiḥ ||
7.005.02a pṛṣṭo divi dhāyy agniḥ pṛthivyāṃ netā sindhūnām vṛṣabha stiyānām |
7.005.02c sa mānuṣīr abhi viśo vi bhāti vaiśvānaro vāvṛdhāno vareṇa ||
7.005.03a tvad bhīyā viśa āyann asiknīr asamanā jahatīr bhojanāni |
7.005.03c vaiśvānara pūrave śośucānaḥ puro yad agne darayann adīdeḥ ||
7.005.04a tava tridhātu pṛthivī uta dyaus vaiśvānara vratam agne sacanta |
7.005.04c tvam bhāsā rodasī ā tatanthājasreṇa śociṣā śośucānaḥ ||
7.005.05a tvām agne harito vāvaśānā giraḥ sacante dhunayo ghṛtācīḥ |
7.005.05c patiṃ kṛṣṭīnām rathyaṃ rayīnām vaiśvānaram uṣasāṃ ketum ahnām ||
7.005.06a tve asuryaṃ vasavo ny ṛṇvan kratuṃ hi te mitramaho juṣanta |
7.005.06c tvam dasyūṃr okaso agna āja uru jyotir janayann āryāya ||
7.005.07a sa jāyamānaḥ parame vyoman vāyur na pāthaḥ pari pāsi sadyaḥ |
7.005.07c tvam bhuvanā janayann abhi krann apatyāya jātavedo daśasyan ||
7.005.08a tām agne asme iṣam erayasva vaiśvānara dyumatīṃ jātavedaḥ |
7.005.08c yayā rādhaḥ pinvasi viśvavāra pṛthu śravo dāśuṣe martyāya ||
7.005.09a taṃ no agne maghavadbhyaḥ purukṣuṃ rayiṃ ni vājaṃ śrutyam yuvasva |
7.005.09c vaiśvānara mahi naḥ śarma yacha rudrebhir agne vasubhiḥ sajoṣāḥ ||

7.006.01a pra samrājo asurasya praśastim puṃsaḥ kṛṣṭīnām anumādyasya |
7.006.01c indrasyeva pra tavasas kṛtāni vande dāruṃ vandamāno vivakmi ||
7.006.02a kaviṃ ketuṃ dhāsīm bhānum adrer hinvanti śaṃ rājyaṃ rodasyoḥ |

7.006.02c puramdarasya gīrbhir ā vivāse 'gner vratāni pūrvyā mahāni ||
 7.006.03a ny akratūn grathino mṛdhavācaḥ pañīm̐r aśraddhāṃ avṛdhāṃ ayajñān |
 7.006.03c pra-pra tān dasyūm̐r agnir vivāya pūrvas cakārāparāṃ ayajyūn ||
 7.006.04a yo apācīne tamasi madantīḥ prācīś cakāra nṛtamaḥ śacībhiḥ |
 7.006.04c tam īśānaṃ vasvo agniṃ gr̥ṇiṣe 'nānataṃ damayantam pṛtanyūn ||
 7.006.05a yo dehyo anamayad vadhasnair yo aryapatnīr uśasaś cakāra |
 7.006.05c sa nirudhyā nahuṣo yahvo agnir viśas cakre balihṛtaḥ saḥobhiḥ ||
 7.006.06a yasya śarmann upa viśve janāsa evais tasthuḥ sumatim bhikṣamāṇāḥ |
 7.006.06c vaiśvānaro varam ā rodasyor āgniḥ sasāda pitror upastham ||
 7.006.07a ā devo dade budhnyā vasūni vaiśvānara uditā sūryasya |
 7.006.07c ā samudrād avarād ā parasmād āgnir dade diva ā pṛthivyāḥ ||

7.007.01a pra vo devaṃ cit sahasānam agniṃ aśvaṃ na vājinaṃ hiṣe namobhiḥ |
 7.007.01c bhavā no dūto adhvarasya vidvān tmanā deveṣu vivide mitadruḥ ||
 7.007.02a ā yāhy agne pathyā anu svā mandro devānām sakhyam̐ juṣāṇaḥ |
 7.007.02c ā sānu śuṣmair nadayan pṛthivyā jambhebhīr viśvam uśadhag vanāni ||
 7.007.03a prācīno yajñāḥ sudhitam̐ hi barhiḥ pr̥ṇiṭe agnir iḍito na hotā |
 7.007.03c ā mātārā viśvavāre huvāno yato yaviṣṭha jajñiṣe suśevaḥ ||
 7.007.04a sadyo advhare rathiram̐ jananta mānuṣāso vicetaso ya eṣām |
 7.007.04c viśām adhāyi viśpatir duroṇe 'gnir mandro madhuvacā ṛtāvā ||
 7.007.05a asādi vṛto vahnir ājaganvān agnir brahmā nṛṣadane vidhartā |
 7.007.05c dyauś ca yam pṛthivī vāvṛdhāte ā yaṃ hotā yajati viśvavāram ||
 7.007.06a ete dyumnebhīr viśvam ātiranta mantram̐ ye vāram naryā atakṣan |
 7.007.06c pra ye viśas tiranta śroṣamāṇā ā ye me asya dīdhayann ṛtasya ||
 7.007.07a nū tvām agna īmahe vasiṣṭhā īśānaṃ sūno sahaso vasūnām |
 7.007.07c iṣaṃ stotṛbhyo maghavadbhya ānaḍ yūyam pāta svastibhiḥ sadā naḥ ||

7.008.01a indhe rājā sam aryo namobhir yasya pratīkam̐ āhutaṃ ghṛtena |
 7.008.01c naro havyebhīr iḍate sabādha āgnir agra uśasām aśoci ||
 7.008.02a ayam u śya sumahāṃ avedi hotā mandro manuṣo yahvo agniḥ |
 7.008.02c vi bhā akaḥ sasṛjānaḥ pṛthivyām̐ kṛṣṇapavir ośadhībhīr vavakṣe ||
 7.008.03a kayā no agne vi vasaḥ suvṛkṭim̐ kām̐ u svadhām̐ ṛṇavaḥ śasyamānaḥ |
 7.008.03c kadā bhavema patayaḥ sudatra rāyo vantāro duṣṭarasya sādhoḥ ||
 7.008.04a pra-prāyam̐ agnir bhāratasya śṛṇve vi yat sūryo na rocate bṛhad bhāḥ |
 7.008.04c abhi yaḥ pūrum pṛtanāsu tasthau dyutāno daivyo atithiḥ śuśoca ||
 7.008.05a asann it tve āhavanāni bhūri bhuvo viśvebhiḥ sumanā anīkaiḥ |
 7.008.05c stutaś cid agne śṛṇviṣe gr̥ṇānaḥ svayam̐ vardhasva tanvam̐ sujāta ||
 7.008.06a idaṃ vacaḥ śatasāḥ saṃsahasram̐ ud agnaye janiṣiṣṭa dvibarhāḥ |
 7.008.06c śaṃ yat stotṛbhyo āpaye bhavāti dyumad amīvacātanam̐ rakṣohā ||
 7.008.07a nū tvām agna īmahe vasiṣṭhā īśānaṃ sūno sahaso vasūnām |
 7.008.07c iṣaṃ stotṛbhyo maghavadbhya ānaḍ yūyam pāta svastibhiḥ sadā naḥ ||

7.009.01a abodhi jāra uśasām upasthād dhotā mandraḥ kavitaṃ pāvakaḥ |
 7.009.01c dadhāti ketum ubhayasya jantor havyaḥ deveṣu draviṇam̐ sukṛtsu ||
 7.009.02a sa sukatur yo vi duraḥ pañinām̐ punāno arkam purubhojasaṃ naḥ |
 7.009.02c hotā mandro viśām̐ damūnās tiras tamo dadṛṣe rāmyāṇām̐ ||

7.009.03a amūraḥ kavir aditir vivasvān susaṃsan mitro atithiḥ śivo naḥ |
 7.009.03c citrabhānur uṣasām bhāty agre 'pāṃ garbhaḥ prasva ā viveśa ||
 7.009.04a iḍenyo vo manuṣo yugeṣu samanagā asucaj jātavedāḥ |
 7.009.04c susaṃdrśā bhānunā yo vibhāti prati gāvah samidhānam budhanta ||
 7.009.05a agne yāhi dūtyam mā riṣaṇyo devāṃ achā brahmakṛtā gaṇena |
 7.009.05c sarasvatīm maruto aśvināpo yakṣi devān ratnadheyāya viśvān ||
 7.009.06a tvām agne samidhāno vasiṣṭho jarūthaṃ han yakṣi rāye puraṃdhim |
 7.009.06c puruṇithā jātavedo jarasva yūyam pāta svastibhiḥ sadā naḥ ||

7.010.01a uṣo na jāraḥ pṛthu pājo aśred davidyutad dīdyac chośucānaḥ |
 7.010.01c vṛṣā hariḥ śucir ā bhāti bhāsā dhiyo hinvāna uśatīr ajigaḥ ||
 7.010.02a svar ṇa vastor uṣasām aroci yajñam tanvānā uśijo na manma |
 7.010.02c agnir janmāni deva ā vi vidvān dravad dūto devayāvā vaniṣṭhaḥ ||
 7.010.03a achā giro matayo devayantīr agniṃ yanti draviṇam bhikṣamāṇāḥ |
 7.010.03c susaṃdrśam supratikaṃ svañcam havyvāham aratim mānuṣāṇām ||
 7.010.04a indram no agne vasubhiḥ sajoṣā rudram rudrebhir ā vahā bṛhantam |
 7.010.04c ādityebhir aditiṃ viśvajanyām bṛhaspatim ṛkvabhir viśvavāram ||
 7.010.05a mandram hotāram uśijo yaviṣṭham agniṃ viśa iḍate adhvarēṣu |
 7.010.05c sa hi kṣapāvāṃ abhavad rayiṇām atandro dūto yajathāya devān ||

7.011.01a mahāṃ asy adhvarasya praketo na ṛte tvad amṛtā mādayante |
 7.011.01c ā viśvebhiḥ sarathaṃ yāhi devair ny agne hotā prathamah sadeha ||
 7.011.02a tvām iḍate ajiram dūtyāya haviṣmantaḥ sadam in mānuṣāsaḥ |
 7.011.02c yasya devair āsado barhir agne 'hāny asmai sudinā bhavanti ||
 7.011.03a triś cid aktoḥ pra cikitur vasūni tve antar dāsūṣe martyāya |
 7.011.03c manuṣvad agna iha yakṣi devān bhavā no dūto abhiśastipāvā ||
 7.011.04a agnir iśe bṛhato adhvarasyāgnir viśvasya haviṣaḥ kṛtasya |
 7.011.04c kratuṃ hy asya vasavo juṣantāthā devā dadhire havyvāham ||
 7.011.05a āgne vaha haviradyāya devān indrajyeṣṭhāsa iha mādayantām |
 7.011.05c imam yajñam divi deveṣu dhehi yūyam pāta svastibhiḥ sadā naḥ ||

7.012.01a aganma mahā namasā yaviṣṭham yo didāya samiddhaḥ sve duroṇe |
 7.012.01c citrabhānuṃ rodasī antar urvī svāhutaṃ viśvataḥ pratyañcam ||
 7.012.02a sa mahnā viśvā duritāni sāhvān agni ṣṭave dama ā jātavedāḥ |
 7.012.02c sa no rakṣiṣad duritād avadyād asmān gṛṇata uta no maghonaḥ ||
 7.012.03a tvam varuṇa uta mitro agne tvām vardhanti matibhir vasiṣṭhāḥ |
 7.012.03c tve vasu suṣaṇanāni santu yūyam pāta svastibhiḥ sadā naḥ ||

7.013.01a prāgnaye viśvaśuce dhiyaṃdhe 'suraghne manma dhītim bharadhvam |
 7.013.01c bhare havir na barhiṣi pṛiṇāno vaiśvānarāya yataye matinām ||
 7.013.02a tvam agne śociṣā śośucāna ā rodasī aprṇā jāyamānaḥ |
 7.013.02c tvam devāṃ abhiśaster amuñco vaiśvānara jātavedo mahitvā ||
 7.013.03a jāto yad agne bhuvanā vy akhyaḥ paśūn na gopā iryaḥ pariḥmā |
 7.013.03c vaiśvānara brahmaṇe vinda gātuṃ yūyam pāta svastibhiḥ sadā naḥ ||

7.014.01a samidhā jātavedase devāya devahūtibhiḥ |
 7.014.01c havirbhiḥ śukraśociṣe namasvino vyaṃ dāsemāgnaye ||
 7.014.02a vyaṃ te agne samidhā vidhema vyaṃ dāsema suṣṭutī yajatra |
 7.014.02c vyaṃ gṛthenādhrvarasya hotar vyaṃ deva haviṣā bhadrāśoce ||
 7.014.03a ā no devebhir upa devahūtim agne yāhi vaṣaṭkṛtim juṣānaḥ |
 7.014.03c tubhyaṃ devāya dāsataḥ syāma yūyam pāta svastibhiḥ sadā naḥ ||

7.015.01a upasadyāya mīdhuṣa āsye juhutā haviḥ |
 7.015.01c yo no nediṣṭham āpyam ||
 7.015.02a yaḥ pañca carṣaṇīr abhi niṣasāda dame-dame |
 7.015.02c kavir gṛhapatir yuvā ||
 7.015.03a sa no vedo amātyam agnī rakṣatu viśvataḥ |
 7.015.03c utāsmān pātv aṃhasaḥ ||
 7.015.04a navaṃ nu stomam agnaye divaḥ śyenāya jījanam |
 7.015.04c vasvaḥ kuvid vanāti naḥ ||
 7.015.05a spārḥā yasya śriyo dṛṣe rayir vīravato yathā |
 7.015.05c agre yajñasya śocataḥ ||
 7.015.06a semām vetu vaṣaṭkṛtim agnir juṣata no giraḥ |
 7.015.06c yajiṣṭho havyavāhanaḥ ||
 7.015.07a ni tvā nakṣya viśpate dyumantaṃ deva dhīmahi |
 7.015.07c suvīram agna āhuta ||
 7.015.08a kṣapa usraś ca dīdhi svagnayas tvayā vyaṃ |
 7.015.08c suvīras tvam asmayuḥ ||
 7.015.09a upa tvā sātaye naro viprāso yanti dhītibhiḥ |
 7.015.09c upākṣarā sahasriṇī ||
 7.015.10a agnī rakṣāmsi sedhati śukraśocir amartyaḥ |
 7.015.10c śuciḥ pāvaka īdyaḥ ||
 7.015.11a sa no rādhāmsy ā bhareśānaḥ sahaso yaho |
 7.015.11c bhagaś ca dātu vāryam ||
 7.015.12a tvam agne vīravat yaśo devaś ca savitā bhagaḥ |
 7.015.12c ditiś ca dāti vāryam ||
 7.015.13a agne rakṣā ṇo aṃhasaḥ prati śma deva riṣataḥ |
 7.015.13c tapiṣṭhair ajaro daha ||
 7.015.14a adhā mahī na āyasy anādhṛṣṭo nṛpītaye |
 7.015.14c pūr bhavā śatabhujīḥ ||
 7.015.15a tvam naḥ pāhy aṃhaso doṣāvastar aghāyataḥ |
 7.015.15c divā naktam adābhya ||

7.016.01a enā vo agniṃ namasorjo napātam ā huve |
 7.016.01c priyaṃ cetiṣṭham aratiṃ svadhvaraṃ viśvasya dūtam amṛtam ||
 7.016.02a sa yojate aruṣā viśvabhōjasā sa dudravat svāhutaḥ |
 7.016.02c subrahmā yajñāḥ suśamī vasūnām devaṃ rādho janānām ||
 7.016.03a ud asya śocir asthād ājuhvānasya mīdhuṣaḥ |
 7.016.03c ud dhūmāso aruṣāso divisṛṣaḥ sam agnim indhate naraḥ ||
 7.016.04a taṃ tvā dūtam kṛṇmahe yaśastamaṃ devām ā vītaye vaha |

7.016.04c viśvā sūno sahaso martabhojanā rāsva tad yat tvemahe ||
 7.016.05a tvam agne gṛhapatis tvam hotā no adhvare |
 7.016.05c tvam potā viśvavāra pracetā yakṣi veṣi ca vāryam ||
 7.016.06a kṛdhi ratnaṃ yajamānāya sukrato tvam hi ratnadhā asi |
 7.016.06c ā na ṛte śiśihi viśvam ṛtviyaṃ suśaṃso yaś ca dakṣate ||
 7.016.07a tve agne svāhuta priyāsaḥ santu sūrayaḥ |
 7.016.07c yantāro ye maghavāno janānām ūrvān dayanta gonām ||
 7.016.08a yeṣām idā ghṛtahastā duroṇa āṃ api prātā niṣidati |
 7.016.08c tāṃs trāyasva sahasya druho nido yachā naḥ śarma dīrghaśrut ||
 7.016.09a sa mandrayā ca jihvayā vahnir āsā viduṣṭaraḥ |
 7.016.09c agne rayim maghavadbhyo na ā vaha havyaadātiṃ ca sūdaya ||
 7.016.10a ye rādhamṣi dadaty aśvyā maghā kāmēna śravaso mahaḥ |
 7.016.10c tāṃ amhasaḥ pipṛhi partṛbhiḥ ṭvam śatam pūrbhir yaviṣṭhya ||
 7.016.11a devo vo draviṇodāḥ pūrṇaṃ vivaṣṭy āsicam |
 7.016.11c ud vā siñcadhvam upa vā pṛṇadvam ād id vo deva ohate ||
 7.016.12a taṃ hotāram adhvarasya pracetasam vahnim devā akṛṇvata |
 7.016.12c dadhāti ratnaṃ vidhate suvīryam agnir janāya dāśuṣe ||

7.017.01 agne bhava suśamidhā samiddha uta barhir urviyā vi strṇitām ||
 7.017.02 uta dvāra uśatir vi śrayantām uta devāṃ uśata ā vaheha ||
 7.017.03 agne vihi haviṣā yakṣi devān svadhvarā kṛṇuhi jātavedaḥ ||
 7.017.04 svadhvarā karati jātavedā yakṣad devāṃ amṛtān piprayac ca ||
 7.017.05 vaṃsva viśvā vāryāṇi pracetaḥ satyā bhavantv āśiṣo no adya ||
 7.017.06 tvām u te dadhire havyaavāham devāso agna ūrja ā napātam ||
 7.017.07 te te devāya dāśataḥ syāma maho no ratnā vi dadha iyānaḥ ||

7.018.01a tve ha yat pitaraś cin na indra viśvā vāmā jaritāro asanvan |
 7.018.01c tve gāvaḥ sudughās tve hy aśvās tvam vasu devayate vaniṣṭhaḥ ||
 7.018.02a rājeva hi janibhiḥ kṣeṣy evāva dyubhir abhi viduṣ kaviḥ san |
 7.018.02c piśā giro maghavan gobhir aśvais tvāyataḥ śiśihi rāye asmān ||
 7.018.03a imā u tvā paspṛdhānāso atra mandrā giro devayantir upa sthuḥ |
 7.018.03c arvācī te pathyā rāya etu syāma te sumatāv indra śarman ||
 7.018.04a dhenum na tvā sūyavase duduḥṣann upa brahmāṇi sasṛje vasiṣṭhaḥ |
 7.018.04c tvām in me gopatiṃ viśva āhā na indraḥ sumatiṃ gantv acha ||
 7.018.05a arṇāṃsi cit paprathānā sudāsa indro gādhāny akṛṇot supārā |
 7.018.05c śardhantaṃ śimyum ucathasya navyaḥ śāpaṃ sindhūnām akṛṇod aśastīḥ ||
 7.018.06a puroḍā it turvaśo yakṣur āsīd rāye matsyāso niśitā apīva |
 7.018.06c śruṣṭim cakrur bhṛgavo druhyavaś ca sakhā sakhāyam atarad viṣūcoḥ ||
 7.018.07a ā pakthāso bhalānaso bhanantālināso viṣāṇinaḥ śivāsaḥ |
 7.018.07c ā yo 'nayat sadhamā āryasya gavyā tṛtsubhyo ajagan yudhā nṛn ||
 7.018.08a durādhyo aditiṃ srevaunto 'cetaso vi jagṛbhre paruṣṇim |
 7.018.08c mahnāvivyak pṛthivim patyamānaḥ paśuṣ kavir aśayac cāyamānaḥ ||
 7.018.09a iyur arthaṃ na nyartham paruṣṇim āśuś caned abhipitvam jagāma |
 7.018.09c sudāsa indraḥ sutukāṃ amitrān arandhayan mānuṣe vadhrivācaḥ ||
 7.018.10a iyur gāvo na yavasād agopā yathākṛtam abhi mitram citāsaḥ |
 7.018.10c pṛśnigāvaḥ pṛśninipreṣitāsaḥ śruṣṭim cakrur niyuto rantayaś ca ||
 7.018.11a ekaṃ ca yo viṃśatiṃ ca śravasyā vaikarṇayor janān rājā ny astaḥ |

7.018.11c dasmo na sadman ni śiśāti barhiḥ śūraḥ sargam akṛṇod indra eṣām ||
 7.018.12a adha śrutam kavaṣam vṛddham apsv anu druhyum ni vṛṇag vajrabāhuḥ |
 7.018.12c vṛṇānā atra sakhyāya sakhyam tvāyanto ye amadann anu tvā ||
 7.018.13a vi sadyo viśvā dṛmhitāny eṣām indraḥ puraḥ sahasā sapta dardaḥ |
 7.018.13c vy ānavasya tṛtsave gayam bhāg jeṣma pūrum vidathe mṛdhavācam ||
 7.018.14a ni gavyavo 'navo druhyavaś ca ṣaṣṭiḥ śatā suṣupuh ṣaṭ sahasrā |
 7.018.14c ṣaṣṭir vīrāso adhi ṣaḍ duvoyu viśved indrasya vīryā kṛtāni ||
 7.018.15a indreṇaite tṛtsavo veviṣāṇā āpo na sṛṣṭā adhavanta nīciḥ |
 7.018.15c durmitrāsaḥ prakalavin mimānā jahur viśvāni bhojanā sudāse ||
 7.018.16a ardham vīrasya śṛtapām anindram parā śardhantam nunude abhi kṣām |
 7.018.16c indro manyum manyumyo mimāya bheje patho vartanim patyamānaḥ ||
 7.018.17a ādhreṇa cit tad v ekaḥ cakāra simhyam cit petvenā jaghāna |
 7.018.17c ava sraktir veśyāvṛṣcad indraḥ prāyachad viśvā bhojanā sudāse ||
 7.018.18a śāśvanto hi śatravo rāradhuṣ ṭe bhedasya cic chardhato vinda randhim |
 7.018.18c martāṃ ena stuvato yaḥ kṛṇoti tigmaḥ tasmin ni jahi vajram indra ||
 7.018.19a āvad indram yamunā tṛtsavaś ca prātra bhedaḥ sarvatātā muṣāyat |
 7.018.19c ajāsaś ca śigravo yakṣavaś ca baliḥ śīrṣāṇi jabhrur aśvyāni ||
 7.018.20a na ta indra sumatayo na rāyaḥ samcakṣe pūrvā uṣaso na nūtnāḥ |
 7.018.20c devakaḥ cin mānyamānaḥ jaghanthāva tmanā bṛhataḥ śambaram bhet ||
 7.018.21a pra ye gṛhād amamadus tvāyā parāśaraḥ śatayātur vasiṣṭhaḥ |
 7.018.21c na te bhojasya sakhyam mṛṣantādhā sūribhyaḥ sudinā vy uchān ||
 7.018.22a dve naptur devavataḥ śate gor dvā rathā vadhūmantā sudāsaḥ |
 7.018.22c arhann agne pajjavanasya dānam hoteva sadma pary emi rebhan ||
 7.018.23a catvāro mā pajjavanasya dānāḥ smaddiṣṭayaḥ kṛśanino nireke |
 7.018.23c ṛjṛāso mā pṛthiviṣṭhāḥ sudāsas tokam tokāya śravase vahanti ||
 7.018.24a yasya śravo rodasī antar urvī śīrṣṇe-śīrṣṇe vibabhājā vibhaktā |
 7.018.24c sapted indram na sravato gṛṇanti ni yudhyāmadhim aśiśād abhīke ||
 7.018.25a imaḥ naro marutaḥ saścatānu divodāsam na pitaram sudāsaḥ |
 7.018.25c aviṣṭanā pajjavanasya ketam dūṇāsam kṣatram ajaram duvoyu ||

7.019.01a yas tigmaśṛṅgo vṛṣabho na bhīma ekaḥ kṛṣṭiś cyāvayati pra viśvāḥ |
 7.019.01c yaḥ śāśvato adāśuṣo gayasya prayantāsi suṣvitarāya vedaḥ ||
 7.019.02a tvam ha tyad indra kutsam āvaḥ śuśrūṣamāṇas tanvā samarye |
 7.019.02c dāsam yac chuṣṇam kuyavam ny asmā arandhaya ārjuneyāya śikṣan ||
 7.019.03a tvam dhṛṣṇo dhṛṣṭatā vitahavyam prāvo viśvābhir ūtibhiḥ sudāsam |
 7.019.03c pra paurukutsim trasadasyum āvaḥ kṣetrasātā vṛtrahatyēṣu pūrum ||
 7.019.04a tvam nṛbhir nṛmaṇo devavītau bhūrīṇi vṛtrā haryaśva haṃsi |
 7.019.04c tvam ni dasyum cumurim dhunim cāsvāpayo dabhītaye suhantu ||
 7.019.05a tava cyautnāni vajrahasta tāni nava yat puro navatiḥ ca sadyaḥ |
 7.019.05c niveśane śatataṃviveṣir ahañ ca vṛtram namucim utāhan ||
 7.019.06a sanā tā ta indra bhojanāni rātahavyāya dāśuṣe sudāse |
 7.019.06c vṛṣṇe te harī vṛṣaṇā yunajmi vyantu brahmāṇi puruśāka vājam ||
 7.019.07a mā te asyām sahasāvan pariṣṭāv aghāya bhūma harivaḥ parādai |
 7.019.07c trāyasva no 'vṛkebhīr varūthais tava priyāsaḥ sūriṣu syāma ||
 7.019.08a priyāsa it te maghavann abhiṣṭau naro madema śaraṇe sakhāyaḥ |
 7.019.08c ni turvaśam ni yādvam śiśihy atithigvāya śamsyam kariṣyan ||
 7.019.09a sadyaś cin nu te maghavann abhiṣṭau naraḥ śamsanty ukthaśāsa ukthā |
 7.019.09c ye te havebhir vi pañimr adāśann asmān vṛṇiṣva yujyāya tasmai ||

7.019.10a ete stomā narāṃ nṛtama tubhyam asmadryañco dadato maghāni |
 7.019.10c teṣāṃ indra vṛtrahatye śivo bhūḥ sakhā ca śūro 'vitā ca nṛṇāṃ ||
 7.019.11a nū indra śūra stavamāna ūti brahmajūtas tanvā vāvṛdhasva |
 7.019.11c upa no vājān mimihy upa stin yūyam pāta svastibhiḥ sadā naḥ ||

7.020.01a ugro jajñe vīryāya svadhāvāñ cakrir apo naryo yat kariṣyan |
 7.020.01c jagmir yuvā nṛṣadanam avobhis trātā na indra enaso mahas cit ||
 7.020.02a hantā vṛtram indraḥ sūśuvānaḥ prāvīn nu viro jaritāram ūti |
 7.020.02c kartā sudāse aha vā ulokaṃ dātā vasu muhur ā dāśuṣe bhūt ||
 7.020.03a yudhmo anarvā khajakṛt samadvā śūraḥ satrāśād januṣem aśādhaḥ |
 7.020.03c vy āsa indraḥ pṛtanāḥ svojā adhā viśvaṃ śatrūyantam jaghāna ||
 7.020.04a ubhe cid indra rodasī mahitvā paprātha taviṣibhis tuviṣmaḥ |
 7.020.04c ni vajram indro harivān mimikṣan sam andhasā madeṣu vā uvoca ||
 7.020.05a vṛṣā jajāna vṛṣaṇam raṇāya tam u cin nārī naryam sasūva |
 7.020.05c pra yaḥ senānir adha nṛbhyo astīnaḥ satvā gaveṣaṇaḥ sa dhṛṣṇuḥ ||
 7.020.06a nū cit sa bhreṣate jano na reṣan mano yo asya ghoram āvivāsāt |
 7.020.06c yajñair ya indre dadhate duvāṃsi kṣayat sa rāya ṛtapā ṛtejāḥ ||
 7.020.07a yad indra pūrvo aparāya śikṣann ayaj jyāyān kanīyaso deṣnam |
 7.020.07c amṛta it pary āsīta dūram ā citra citryam bharā rayim naḥ ||
 7.020.08a yas ta indra priyo jano dadāśad asan nireke adrivaḥ sakhā te |
 7.020.08c vayam te asyāṃ sumatau canīṣṭhāḥ syāma varūthe aghnato nṛpītau ||
 7.020.09a eṣa stomo acikradad vṛṣā ta uta stāmur maghavann akrapīṣṭa |
 7.020.09c rāyas kāmo jaritāram ta āgan tvam aṅga śakra vasva ā śako naḥ ||
 7.020.10a sa na indra tvayatāyā iṣe dhās tmanā ca ye maghavāno junanti |
 7.020.10c vasvī ṣu te jaritre astu śaktir yūyam pāta svastibhiḥ sadā naḥ ||

7.021.01a asāvi devaṃ goṛjikam andho ny asminn indro januṣem uvoca |
 7.021.01c bodhāmasi tvā haryaśva yajñair bodhā na stomam andhaso madeṣu ||
 7.021.02a pra yanti yajñam vipayanti barhiḥ somamādo vidathe dudhravācaḥ |
 7.021.02c ny u bhriyante yaśaso gṛbhād ā dūraūpabdo vṛṣaṇo nṛṣacaḥ ||
 7.021.03a tvam indra sravitavā apas kaḥ pariṣṭhitā ahinā śūra pūrvīḥ |
 7.021.03c tvad vāvakre rathyo na dhenā rejante viśvā kṛtrimāni bhīṣā ||
 7.021.04a bhīmo viveṣāyudhebhīr eṣāṃ apāṃsi viśvā naryāni vidvān |
 7.021.04c indraḥ puro jarhṛṣāṇo vi dūdhod vi vajrahasto mahinā jaghāna ||
 7.021.05a na yātava indra jūjuvur no na vandanā śaviṣṭha vedyābhiḥ |
 7.021.05c sa śardhad aryo viṣuṇasya jantor mā śīśnadevā api gur ṛtam naḥ ||
 7.021.06a abhi kratvendra bhūr adha jman na te vivyañ mahimānam rajāṃsi |
 7.021.06c svenā hi vṛtram śavasā jaghantha na śatrur antam vividat yudhā te ||
 7.021.07a devās cit te asuryāya pūrve 'nu kṣatrāya mamire sahāṃsi |
 7.021.07c indro maghāni dayate viṣahyendraṃ vājasya johuvanta satau ||
 7.021.08a kīriś cid dhi tvām avase juhāveśānam indra saubhagasya bhūreḥ |
 7.021.08c avo babhūtha śatamūte asme abhikṣattus tvāvato varūtā ||
 7.021.09a sakhāyas ta indra viśvaha syāma namovṛdhāso mahinā tarutra |
 7.021.09c vanvantu smā te 'vasā samīke 'bhītim aryo vanuṣam śavāṃsi ||
 7.021.10a sa na indra tvayatāyā iṣe dhās tmanā ca ye maghavāno junanti |
 7.021.10c vasvī ṣu te jaritre astu śaktir yūyam pāta svastibhiḥ sadā naḥ ||

7.022.01a pibā somam indra mandatu tvā yaṃ te suṣāva haryaśvādriḥ |
 7.022.01c sotur bāhubhyāṃ suyato nārvā ||
 7.022.02a yas te mado yujyaś cārur asti yena vṛtrāṇi haryaśva haṃsi |
 7.022.02c sa tvām indra prabhūvaso mamattu ||
 7.022.03a bodhā su me maghavan vācam emāṃ yāṃ te vasiṣṭho arcati praśastim |
 7.022.03c imā brahma sadhamāde juṣasva ||
 7.022.04a śrudhī havam vipipānasyādrer bodhā viprasyārcato manīṣām |
 7.022.04c kṛṣvā duvāṃsy antamā sacemā ||
 7.022.05a na te giro api mṛṣye turasya na suṣṭutim asuryasya vidvān |
 7.022.05c sadā te nāma svayaśo vivakmi ||
 7.022.06a bhūri hi te savanā mānuṣeṣu bhūri manīṣi havate tvām it |
 7.022.06c māre asman maghavañ jyok kaḥ ||
 7.022.07a tubhyed imā savanā sūra viśvā tubhyam brahmāṇi vardhanā kṛṇomi |
 7.022.07c tvam nṛbhir havyo viśvadhāsi ||
 7.022.08a nū cin nu te manyamānasya dasmod aśnuvanti mahimānam ugra |
 7.022.08c na vīryam indra te na rādhaḥ ||
 7.022.09a ye ca pūrva ṛṣayo ye ca nūtnā indra brahmāṇi janayanta viprāḥ |
 7.022.09c asme te santu sakhyā śivāni yūyam pāta svastibhiḥ sadā naḥ ||

7.023.01a ud u brahmāṇy airata śravasyendram samarye mahayā vasiṣṭha |
 7.023.01c ā yo viśvāni śavasā tatānopaśrotā ma ivato vacāṃsi ||
 7.023.02a ayāmi ghoṣa indra devajāmir irajyanta yac churudho vivāci |
 7.023.02c nahi svam āyuś cikite janeṣu tānīd aṃhāṃsy ati paṛsy asmān ||
 7.023.03a yuje ratham gaveṣaṇam haribhyām upa brahmāṇi jujuṣāṇam asthuḥ |
 7.023.03c vi bādhiṣṭa sya rodasī mahitvendro vṛtrāṇy aprati jaghanvān ||
 7.023.04a āpaś cit pipyu staryo na gāvo nakṣann ṛtam jaritāras ta indra |
 7.023.04c yāhi vāyur na niyuto no achā tvam hi dhībhir dayase vi vājān ||
 7.023.05a te tvā madā indra mādayantu śuṣmiṇam tuvīrādhasam jaritre |
 7.023.05c eko devatrā dayase hi martān asmiñ chūra savane mādayasva ||
 7.023.06a eved indram vṛṣaṇam vajrabāhum vasiṣṭhāso abhy arcanty arkaiḥ |
 7.023.06c sa na stuto vīravat dhātu gomad yūyam pāta svastibhiḥ sadā naḥ ||

7.024.01a yoniṣ ṭa indra sadane akāri tam ā nṛbhiḥ puruhūta pra yāhi |
 7.024.01c aso yathā no 'vitā vṛdhe ca dado vasūni mamadaś ca somaiḥ ||
 7.024.02a gṛbhītam te mana indra dvibarhāḥ sutaḥ somaḥ pariṣiktā madhūni |
 7.024.02c viṣṛṣṭadhenā bharate suvṛktir iyam indram johuvatī manīṣā ||
 7.024.03a ā no diva ā pṛthivyā ṛjīṣinn idam barhiḥ somapeyāya yāhi |
 7.024.03c vahantu tvā harayo madryaṅcam āṅgūṣam achā tavaṣam madāya ||
 7.024.04a ā no viśvābhir ūtibhiḥ sajoṣā brahma juṣāṇo haryaśva yāhi |
 7.024.04c varīvṛjat sthavirebhiḥ suśiprāsme dadhad vṛṣaṇam śuṣmam indra ||
 7.024.05a eṣa stomo maha ugrāya vāhe dhurīvātyo na vājayann adhāyi |
 7.024.05c indra tvāyam arka iṭṭe vasūnām divīva dyām adhi naḥ śromatam dhāḥ ||
 7.024.06a evā na indra vāryasya pūrdhi pra te mahim sumatiṃ vevidāma |
 7.024.06c iṣam pinva maghavadbhyaḥ suvīrām yūyam pāta svastibhiḥ sadā naḥ ||

7.025.01a ā te maha indroty ugra samanyavo yat samaranta senāḥ |
 7.025.01c patāti didyun naryasya bāhvor mā te mano viṣvadyag vi cārīt ||
 7.025.02a ni durga indra śnathihy amitrāṃ abhi ye no martāso amanti |
 7.025.02c āre taṃ śamsaṃ kṛṇuhi ninitsoṛ ā no bhara sambharaṇaṃ vasūnām ||
 7.025.03a śataṃ te śiprinn ūtayaḥ sudāse sahasraṃ śamsā uta rātir astu |
 7.025.03c jahi vadhar vanuṣo martyasyāsme dyumnam adhi ratnaṃ ca dhehi ||
 7.025.04a tvāvato hīndra kratve asmi tvāvato 'vituḥ sūra rātau |
 7.025.04c viśved ahāni taviṣīva ugraṃ okaḥ kṛṇuṣva harivo na mardhīḥ ||
 7.025.05a kutsā ete haryaśvāya sūṣam indre saho devajūtam iyānāḥ |
 7.025.05c satrā kṛdhi suhanā sūra vṛtrā vayaṃ tarutrāḥ sanuyāma vājam ||
 7.025.06a evā na indra vāryasya pūrdhi pra te mahīm sumatiṃ vevidāma |
 7.025.06c iṣam pinva maghavadbhyaḥ suvirāṃ yūyam pāta svastibhiḥ sadā naḥ ||

7.026.01a na soma indram asuto mamāda nābrahmāṇo maghavānaṃ sutāsaḥ |
 7.026.01c tasmā ukthaṃ janaye yaj jujoṣan nṛvan navīyaḥ śṛṇavad yathā naḥ ||
 7.026.02a uktha-ukthe soma indram mamāda nīthe-nīthe maghavānaṃ sutāsaḥ |
 7.026.02c yad im sabādhaḥ pitaraṃ na putrāḥ samānadakṣā avase havante ||
 7.026.03a cakāra tā kṛṇavan nūnam anyā yāni bruvanti vedhasaḥ suteṣu |
 7.026.03c janīr iva patir ekaḥ samāno ni māmṛje pura indraḥ su sarvāḥ ||
 7.026.04a evā tam āhur uta śṛṇva indra eko vibhaktā taranir maghānām |
 7.026.04c mithastura ūtayo yasya pūrvīr asme bhadrāṇi saścata priyāṇi ||
 7.026.05a evā vasiṣṭha indram ūtaye nīn kṛṣṭinām vṛṣabhaṃ sute gṛṇāti |
 7.026.05c sahasriṇa upa no māhi vājān yūyam pāta svastibhiḥ sadā naḥ ||

7.027.01a indraṃ naro nemadhitā havante yat pāryā yunajate dhiyas tāḥ |
 7.027.01c sūro nṛṣātā śavasaś cakāna ā gomati vraje bhajā tvaṃ naḥ ||
 7.027.02a ya indra śuṣmo maghavan te asti śikṣā sakhibhyaḥ puruhūta nṛbhyaḥ |
 7.027.02c tvaṃ hi dṛḍhā maghavan vicetā apā vṛdhi parivṛtaṃ na rādhaḥ ||
 7.027.03a indro rājā jagataś carṣaṇinām adhi kṣami viṣurūpaṃ yad asti |
 7.027.03c tato dadāti dāsuse vasūni codad rādha upastutaś cid arvāk ||
 7.027.04a nū cin na indro maghavā sahūti dāno vājam ni yamate na ūti |
 7.027.04c anūnā yasya dakṣiṇā pīpāya vāmaṃ nṛbhyo abhivītā sakhibhyaḥ ||
 7.027.05a nū indra rāye varivas kṛdhī na ā te mano vavṛtyāma maghāya |
 7.027.05c gomad aśvāvad rathavad vyanto yūyam pāta svastibhiḥ sadā naḥ ||

7.028.01a brahmā ṇa indropa yāhi vidvān arvāñcas te harayaḥ santu yuktāḥ |
 7.028.01c viśve cid dhi tvā vihavanta martā asmākam ic chṛṇuhi viśvaminva ||
 7.028.02a havaṃ ta indra mahimā vy ānaḍ brahma yat pāsi śavasinn ṛṣiṇām |
 7.028.02c ā yad vajraṃ dadhiṣe hasta ugra ghoraḥ san kratvā janiṣṭhā aśāḍhaḥ ||
 7.028.03a tava praṇītindra johuvānān saṃ yan nīn na rodasī ninetha |
 7.028.03c mahe kṣatrāya śavase hi jajñe 'tūtujim cit tūtujir aśiśnat ||
 7.028.04a ebhir na indrābhir daśasya durmitrāso hi kṣitayaḥ pavante |
 7.028.04c prati yac caṣṭe anṛtam anenā ava dvitā varuṇo māyī naḥ sāt ||
 7.028.05a vocemed indram maghavānam enam maho rāyo rādhaso yad dadan naḥ |
 7.028.05c yo arcato brahmakṛtim aviṣṭho yūyam pāta svastibhiḥ sadā naḥ ||

7.029.01a ayaṃ soma indra tubhyaṃ sunva ā tu pra yāhi harivas tadokāḥ |
 7.029.01c pibā tv asya suṣutasya cārora dado maghāni maghavann iyānaḥ ||
 7.029.02a brahman vīra brahmakṛtiṃ juṣāṇo 'rvācīno haribhir yāhi tūyam |
 7.029.02c asminn ū ṣu savane mādayasvopa brahmāṇi śṛṇava imā naḥ ||
 7.029.03a kā te asty aramkṛtiḥ sūktaiḥ kadā nūnaṃ te maghavan dāsēma |
 7.029.03c viśvā matir ā tatane tvāyādihā ma indra śṛṇavo havemā ||
 7.029.04a uto ghā te puruṣyā id āsan yeṣāṃ pūrveṣāṃ aśṛṇor ṛṣiṇām |
 7.029.04c adhāmaṃ tvā maghavañ johavīmi tvaṃ na indrāsi pramatih piteva ||
 7.029.05a vocemed indram maghavānam enam maho rāyo rādhaso yad dadan naḥ |
 7.029.05c yo arcato brahmakṛtim aviṣṭho yūyam pāta svastibhiḥ sadā naḥ ||

7.030.01a ā no deva śavasā yāhi śuṣmin bhavā vṛdha indra rāyo asya |
 7.030.01c mahe nṛmṇāya nṛpate suvajra mahi kṣatrāya paṃsyāya śūra ||
 7.030.02a havanta u tvā havyaṃ vivāci tanūṣu śūrāḥ sūryasya sātāu |
 7.030.02c tvaṃ viśveṣu senyo janeṣu tvaṃ vṛtrāṇi randhayā suhantu ||
 7.030.03a ahā yad indra sudinā vyuchān dadho yat ketum upamaṃ samatsu |
 7.030.03c ny agnih sīdad asuro na hotā huvāno atra subhagāya devān ||
 7.030.04a vyaṃ te ta indra ye ca deva stavanta śūra dadato maghāni |
 7.030.04c yachā sūribhya upamaṃ varūthaṃ svābhavo jaraṇām aśnavanta ||
 7.030.05a vocemed indram maghavānam enam maho rāyo rādhaso yad dadan naḥ |
 7.030.05c yo arcato brahmakṛtim aviṣṭho yūyam pāta svastibhiḥ sadā naḥ ||

7.031.01a pra va indrāya mādanaṃ haryaśvāya gāyata |
 7.031.01c sakhāyaḥ somapāvne ||
 7.031.02a śamsed ukthaṃ sudānava uta dyukṣaṃ yathā naraḥ |
 7.031.02c cakṛmā satyarādhasē ||
 7.031.03a tvaṃ na indra vājayus tvaṃ gavyuḥ śatakṛato |
 7.031.03c tvaṃ hiraṇyayur vaso ||
 7.031.04a vyaṃ indra tvāyavo 'bhi pra ṇonumo vṛṣan |
 7.031.04c viddhī tv asya no vaso ||
 7.031.05a mā no nide ca vaktave 'ryo randhir arāvne |
 7.031.05c tve api kratur mama ||
 7.031.06a tvaṃ varmāsi saprathaḥ puroyodhas ca vṛtrahan |
 7.031.06c tvayā prati bruve yujā ||
 7.031.07a mahāñ utāsi yasya te 'nu svadhāvarī sahaḥ |
 7.031.07c mamnāte indra rodasī ||
 7.031.08a taṃ tvā marutvatī pari bhuvad vāṇī sayāvarī |
 7.031.08c nakṣamāṇā saha dyubhiḥ ||
 7.031.09a ūrdhvāsas tvānv indavo bhuvan dasmam upa dyavi |
 7.031.09c saṃ te namanta kṛṣṭayaḥ ||
 7.031.10a pra vo mahe mahivṛdhe bharadhvam pracetase pra sumatiṃ kṛṇudhvam |
 7.031.10c viśaḥ pūrvih pra carā carṣaṇiprāḥ ||
 7.031.11a uruvyacase mahine suvṛktim indrāya brahma janayanta viprāḥ |
 7.031.11c tasya vratāni na minanti dhīrāḥ ||
 7.031.12a indraṃ vāṇir anuttamanyum eva satrā rājānaṃ dadhire sahadhyai |
 7.031.12c haryaśvāya barhayā sam āpin ||

- 7.032.01a mo ṣu tvā vāghataś canāre asman ni rīraman |
7.032.01c ārāttāc cit sadhamādaṃ na ā gahiha vā sann upa śrudhi ||
7.032.02a ime hi te brahmakṛtaḥ sute sacā madhau na makṣa āsate |
7.032.02c indre kāmam jaritāro vasūyavo rathe na pādama ā dadhuḥ ||
7.032.03 rāyaskāmo vajrahastaṃ sudakṣiṇam putro na pitaram huve ||
7.032.04a ima indrāya sunvire somāso dadhyāśiraḥ |
7.032.04c tāṃ ā madāya vajrahasta pītaye haribhyāṃ yāhy oka ā ||
7.032.05a śravac chrutkarṇa iyate vasūnām nū cin no mardhiṣad giraḥ |
7.032.05c sadyaś cid yaḥ sahasrāṇi śatā dadan nakir ditsantam ā minat ||
7.032.06a sa vīro apratiṣkuta indreṇa sūśuve nṛbhiḥ |
7.032.06c yas te gabhīrā savanāni vṛtrahan sunoty ā ca dhāvati ||
7.032.07a bhavā varūtham maghavan maghonām yat samajāsi śardhataḥ |
7.032.07c vi tvāhatasya vedanam bhajemahy ā dūṇāśo bharā gayam ||
7.032.08a sunotā somapāvne somam indrāya vajriṇe |
7.032.08c pacatā paktir avase kṛṇudhvam it pṛṇann it pṛṇate mayaḥ ||
7.032.09a mā sredhata somino dakṣatā mahe kṛṇudhvam rāya ātuje |
7.032.09c taraṇir ij jayati kṣeti puṣyati na devāsaḥ kavatnave ||
7.032.10a nakiḥ sudāso ratham pary āsa na rīramat |
7.032.10c indro yasyāvītā yasya maruto gamat sa gomati vraje ||
7.032.11a gamad vājam vājayann indra martyo yasya tvam avitā bhuvaḥ |
7.032.11c asmākam bodhy avitā rathānām asmākam sūra nṛṇām ||
7.032.12a ud in nv asya ricyate 'mśo dhanam na jigyuṣaḥ |
7.032.12c ya indro harivān na dabhanti taṃ ripo dakṣam dadhāti somini ||
7.032.13a mantram akharvam sudhitam supeśasaṃ dadhāta yajñiyeṣv ā |
7.032.13c pūrvīś cana prasitayas taranti taṃ ya indre karmaṇā bhuvat ||
7.032.14a kas tam indra tvāvasum ā martyo dadharṣati |
7.032.14c śraddhā it te maghavan pārye divi vājī vājam siṣāsati ||
7.032.15a maghonaḥ sma vṛtrahatyēṣu codaya ye dadati priyā vasu |
7.032.15c tava praṇītī haryaśva sūribhir viśvā tarema dūrītā ||
7.032.16a taved indrāvamam vasu tvam puṣyasi madhyamam |
7.032.16c satrā viśvasya paramasya rājasi nakiṣ tvā goṣu vṛṇvate ||
7.032.17a tvam viśvasya dhanadā asi śruto ya im bhavanty ājayaḥ |
7.032.17c tavāyam viśvaḥ puruhūta pārthivo 'vasyur nāma bhikṣate ||
7.032.18a yad indra yāvatas tvam etāvad aham īśiya |
7.032.18c stotāram id didhiṣeya radāvaso na pāpatvāya rāsīya ||
7.032.19a śikṣeyam in mahayate dive-dive rāya ā kuhacidvide |
7.032.19c nahi tvad anyan maghavan na āpyam vasyo asti pitā cana ||
7.032.20a taraṇir it siṣāsati vājam puramḍhyā yujā |
7.032.20c ā va indram puruhūtam name girā nemim taṣṭeva sudrvam ||
7.032.21a na duṣṭutī martyo vindate vasu na sredhantam rayir naśat |
7.032.21c suśaktir in maghavan tubhyam māvate deṣṇam yat pārye divi ||
7.032.22a abhi tvā sūra nonumo 'dugdā iva dhenavaḥ |
7.032.22c īśānam asya jagataḥ swardṛśam īśānam indra tasthuṣaḥ ||
7.032.23a na tvāvāṃ anyo divyo na pārthivo na jāto na janiṣyate |
7.032.23c aśvāyanto maghavann indra vājino gavyantas tvā havāmahe ||
7.032.24a abhi ṣatas tad ā bharendra jyāyaḥ kaniyasaḥ |
7.032.24c purūvasur hi maghavan sanād asi bhare-bhare ca havyaḥ ||

- 7.032.25a parā ṇudasva maghavann amitrān suvedā no vasū kṛdhi |
7.032.25c asmākam bodhy avitā mahādhane bhavā vṛdhaḥ sakhinām ||
7.032.26a indra kratuṃ na ā bhara pitā putrebhyo yathā |
7.032.26c śikṣā ṇo asmin puruhūta yāmani jīvā jyotir aśimahi ||
7.032.27a mā no ajñātā vṛjanā durādhyo māśivāso ava kramuḥ |
7.032.27c tvayā vayam pravataḥ śāsvatīr apo 'ti śūra tarāmasi ||
- 7.033.01a śvityaṅco mā dakṣiṇataskapardā dhiyaṃjinvāso abhi hi pramanduḥ |
7.033.01c uttiṣṭhan voce pari barhiṣo nīn na me dūrād avitave vasiṣṭhāḥ ||
7.033.02a dūrād indram anayann ā sutena tiro vaiśantam ati pāntam ugram |
7.033.02c pāśadyumnasya vāyatasya somāt sutād indro 'vṛṇītā vasiṣṭhān ||
7.033.03a even nu kaṃ sindhum ebhis tatāreven nu kam bhedam ebhir jaghāna |
7.033.03c even nu kaṃ dāśarājñe sudāsam prāvad indro brahmaṇā vo vasiṣṭhāḥ ||
7.033.04a juṣṭī naro brahmaṇā vaḥ pitṛṇām akṣam avyayaṃ na kilā riṣātha |
7.033.04c yac chakvariṣu bṛhatā ravenḍre śuṣmam adadhātā vasiṣṭhāḥ ||
7.033.05a ud dyām ivet tṛṣṇajo nāthitāso 'dīdhayur dāśarājñe vṛtāsaḥ |
7.033.05c vasiṣṭhasya stuvata indro aśrod uruṃ tṛtsubhyo akrṇod ulokam ||
7.033.06a daṇḍā ived gojanāsa āsan parichinnā bharaṭā arbhakāsaḥ |
7.033.06c abhvac ca puraetā vasiṣṭha ād it tṛtsūnām viśo aprathanta ||
7.033.07a trayāḥ kṛṇvanti bhuvaneṣu retas tisraḥ prajā āryā jyotiragrāḥ |
7.033.07c trayo gharmāsa uṣasaṃ sacante sarvāṃ it tāṃ anu vidur vasiṣṭhāḥ ||
7.033.08a sūryasyeva vakṣatho jyotir eṣāṃ samudrasyeva mahimā gabhīraḥ |
7.033.08c vātasyeva prajavo nānyena stomo vasiṣṭhā anvetave vaḥ ||
7.033.09a ta in niṇyaṃ hṛdayasya praketaiḥ sahasravalśam abhi saṃ caranti |
7.033.09c yamena tatam paridhiṃ vayanto 'psarasa upa sedur vasiṣṭhāḥ ||
7.033.10a vidyuto jyotiḥ pari saṃjihānam mitrāvaruṇā yad apaśyatām tvā |
7.033.10c tat te janmotaikaṃ vasiṣṭhāgastyo yat tvā viśa ājabhāra ||
7.033.11a utāsi maitrāvaruṇo vasiṣṭhorvaśyā brahman manaso 'dhi jātaḥ |
7.033.11c drapsaṃ skannam brahmaṇā daivyena viśve devāḥ puṣkare tvādadanta ||
7.033.12a sa praketa ubhayasya pravidvān sahasradāna uta vā sadānaḥ |
7.033.12c yamena tatam paridhiṃ vayiṣyann apsarasaḥ pari jajñe vasiṣṭhaḥ ||
7.033.13a satre ha jātāv iṣitā namobhiḥ kumbhe retaḥ siṣicatuḥ samānam |
7.033.13c tato ha māna ud iyāya madhyāt tato jātām ṛṣim āhur vasiṣṭham ||
7.033.14a ukthabhṛtam sāmabhṛtam bibharti grāvāṇam bibhrat pra vadāty agre |
7.033.14c upainam ādhvam sumanasyamānā ā vo gachāti pratṛdo vasiṣṭhaḥ ||
- 7.034.01 pra śukraitu devī maṇiṣā asmat sutaṣṭo ratho na vājī ||
7.034.02 viduḥ pṛthivyā divo janitraṃ śṛṇvanty āpo adha kṣarantīḥ ||
7.034.03 āpaś cid asmai pinvanta pṛthvīr vṛtreṣu śūrā maṃsanta ugrāḥ ||
7.034.04 ā dhūrṣv asmai dadhātāśvān indro na vajrī hiraṇyabāhuḥ ||
7.034.05 abhi pra sthātāheva yajñam yāteva patman tmanā hinota ||
7.034.06 tmanā samatsu hinota yajñam dadhāta ketuṃ janāya vīram ||
7.034.07 ud asya śuṣmād bhānur nārta bibharti bhāram pṛthivī na bhūma ||
7.034.08 hvayāmi devāṃ ayātur agne sādhan ṛtena dhiyaṃ dadhāmi ||
7.034.09 abhi vo devīṃ dhiyaṃ dadhidhvam pra vo devatrā vācam kṛṇudhvam ||
7.034.10 ā caṣṭa āsām pātho nadīnām varuṇa ugraḥ sahasracakṣāḥ ||
7.034.11 rājā rāṣṭrānām peśo nadīnām anuttam asmai kṣatraṃ viśvāyu ||

7.034.12 aviṣṭo asmān viśvāsu vikṣv adyumuṃ kṛṇota śamsaṃ ninitsoḥ ||
 7.034.13 vy etu didyud dviṣām aśevā yuyota viṣvag rapas tanūnām ||
 7.034.14 avīn no agnir havyān namobhiḥ preṣṭho asmā adhāyi stomaḥ ||
 7.034.15 sajūr devebhir apāṃ napātāṃ sakhāyaṃ kṛdhvaṃ śivo no astu ||
 7.034.16 abjām ukthair ahiṃ grṇīṣe budhne nadinām rajassu śīdan ||
 7.034.17 mā no 'hir budhnyo riṣe dhān mā yajño asya sridhad ṛtāyoḥ ||
 7.034.18 uta na eṣu nṛṣu śravo dhuḥ pra rāye yantu śardhanto ayaḥ ||
 7.034.19 tapanti śatruṃ svar ṇa bhūmā mahāsenāso amebhir eṣām ||
 7.034.20 ā yan naḥ patnīr gamanty achā tvaṣṭā supānīr dadhātu vīrān ||
 7.034.21 prati na stomaṃ tvaṣṭā juṣeta syād asme aramatir vasūyuḥ ||
 7.034.22a tā no rāsan rātiṣāco vasūny ā rodasī varuṇānī śṛṇotu |
 7.034.22c varūtrībhiḥ suśaraṇo no astu tvaṣṭā sudatro vi dadhātu rāyaḥ ||
 7.034.23a tan no rāyaḥ parvatās tan na āpas tad rātiṣāca oṣadhīr uta dyauḥ |
 7.034.23c vanaspatibhiḥ pṛthivī sajoṣā ubhe rodasī pari pāsato naḥ ||
 7.034.24a anu tad urvī rodasī jihātām anu dyukṣo varuṇa indrasakhā |
 7.034.24c anu viśve maruto ye sahāso rāyaḥ syāma dharuṇaṃ dhiyadhyai ||
 7.034.25a tan na indro varuṇo mitro agnir āpa oṣadhīr vanino juṣanta |
 7.034.25c śarman syāma marutām upasthe yūyam pāta svastibhiḥ sadā naḥ ||

7.035.01a śaṃ na indrāgnī bhavatām avobhiḥ śaṃ na indrāvaruṇā rātahavyā |
 7.035.01c śaṃ indrāsomā suvitāya śaṃ yoḥ śaṃ na indrāpūṣaṇā vājasātau ||
 7.035.02a śaṃ no bhagaḥ śaṃ u naḥ śaṃso astu śaṃ naḥ puramdhiḥ śaṃ u santu rāyaḥ |
 7.035.02c śaṃ naḥ satyasya suyamasya śamsaḥ śaṃ no aryamā purujāto astu ||
 7.035.03a śaṃ no dhātā śaṃ u dhartā no astu śaṃ na urūcī bhavatu svadhābhiḥ |
 7.035.03c śaṃ rodasī bṛhatī śaṃ no adriḥ śaṃ no devānām suhavanī santu ||
 7.035.04a śaṃ no agnir jyotiranīko astu śaṃ no mitrāvaruṇāv aśvinā śam |
 7.035.04c śaṃ naḥ sukṛtām sukṛtānī santu śaṃ na iṣiro abhi vātu vātaḥ ||
 7.035.05a śaṃ no dyāvāpṛthivī pūrvahūtau śaṃ antarikṣaṃ dṛśaye no astu |
 7.035.05c śaṃ na oṣadhīr vanino bhavantu śaṃ no rajasas patir astu jiṣṇuḥ ||
 7.035.06a śaṃ na indro vasubhir devo astu śaṃ ādityebhir varuṇaḥ suśamsaḥ |
 7.035.06c śaṃ no rudro rudrebhir jalāṣaḥ śaṃ nas tvaṣṭā gnābhir iha śṛṇotu ||
 7.035.07a śaṃ naḥ somo bhavatu brahma śaṃ naḥ śaṃ no grāvāṇaḥ śaṃ u santu yajñāḥ |
 7.035.07c śaṃ naḥ svarūṇām mitayo bhavantu śaṃ naḥ prasvaḥ śaṃ v astu vediḥ ||
 7.035.08a śaṃ naḥ sūrya urucakṣā ud etu śaṃ naś catasraḥ pradiśo bhavantu |
 7.035.08c śaṃ naḥ parvatā dhruvayo bhavantu śaṃ naḥ sindhavaḥ śaṃ u santv āpaḥ ||
 7.035.09a śaṃ no aditir bhavatu vratabhiḥ śaṃ no bhavantu marutaḥ svarkāḥ |
 7.035.09c śaṃ no viṣṇuḥ śaṃ u pūṣā no astu śaṃ no bhavitraṃ śaṃ v astu vāyuḥ ||
 7.035.10a śaṃ no devaḥ savitā trāyamāṇaḥ śaṃ no bhavantūṣaso vibhātīḥ |
 7.035.10c śaṃ naḥ parjanya bhavatu prajābhyaḥ śaṃ naḥ kṣetrasya patir astu śambhuḥ ||
 7.035.11a śaṃ no devā viśvadevā bhavantu śaṃ sarasvatī saha dhibhir astu |
 7.035.11c śaṃ abhiṣācaḥ śaṃ u rātiṣācaḥ śaṃ no divyāḥ pāṛthivāḥ śaṃ no apyāḥ ||
 7.035.12a śaṃ naḥ satyasya patayo bhavantu śaṃ no arvantaḥ śaṃ u santu gāvaḥ |
 7.035.12c śaṃ na ṛbhavaḥ sukṛtaḥ suhastāḥ śaṃ no bhavantu pitaro haveṣu ||
 7.035.13a śaṃ no aja ekapād devo astu śaṃ no 'hir budhnyaḥ śaṃ samudraḥ |
 7.035.13c śaṃ no apāṃ napāt perur astu śaṃ naḥ pṛśnīr bhavatu devagopā ||
 7.035.14a ādityā rudrā vasavo juṣantedam brahma kriyamāṇaṃ navīyaḥ |
 7.035.14c śṛṇvantu no divyāḥ pāṛthivāso gojātā uta ye yajñiyāsaḥ ||
 7.035.15a ye devānām yajñiyā yajñiyānām manor yajatrā amṛtā ṛtajñāḥ |

7.035.15c te no rāsantām urugāyam adya yūyam pāta svastibhiḥ sadā naḥ ||

7.036.01a pra brahmaitu sadanād ṛtasya vi raśmibhiḥ sasṛje sūryo gāḥ |
7.036.01c vi sānunā pṛthivī sasra urvī pṛthu pratīkam adhy edhe agniḥ ||
7.036.02a imāṃ vām mitrāvaruṇā suvr̥ktim iṣaṃ na kṛṇve asurā navīyaḥ |
7.036.02c ino vām anyaḥ padavīr adabdho janaṃ ca mitro yatati bruvāṇaḥ ||
7.036.03a ā vātasya dhrajato ranta ityā apīpayanta dhenavo na sūdāḥ |
7.036.03c maho divaḥ sadane jāyamāno 'cikradad vṛṣabhaḥ sasminn ūdhan ||
7.036.04a girā ya etā yunajad dharī ta indra priyā surathā sūra dhāyū |
7.036.04c pra yo manyuṃ ririkṣato mināty ā sukratum aryamaṇaṃ vavṛtyām ||
7.036.05a yajante asya sakhyaṃ vayasā ca namasvinaḥ sva ṛtasya dhāman |
7.036.05c vi pṛkṣo bābadhe nṛbhi stavāna idam namo rudrāya preṣṭham ||
7.036.06a ā yat sākam yaśaso vāvasānāḥ sarasvatī saptathī sindhumātā |
7.036.06c yāḥ suṣvayanta sudughāḥ sudhārā abhi svena payasā pīpyānāḥ ||
7.036.07a uta tye no maruto mandasānā dhiyaṃ tokam ca vājino 'vantu |
7.036.07c mā naḥ pari khyad akṣarā caranty avivṛdhan yujyam te rayiṃ naḥ ||
7.036.08a pra vo mahim aramatim kṛṇudhvam pra pūṣaṇaṃ vidathyam na vīram |
7.036.08c bhagam dhiyo 'vitāram no asyāḥ satau vājam rātiṣācam puramdhim ||
7.036.09a achāyam vo marutaḥ śloka etv achā viṣṇuṃ niṣikṭapām avobhiḥ |
7.036.09c uta prajāyai gṛṇate vayo dhur yūyam pāta svastibhiḥ sadā naḥ ||

7.037.01a ā vo vāhiṣṭho vahatu stavadhyai ratho vājā ṛbhukṣaṇo amṛktaḥ |
7.037.01c abhi tripṛṣṭhaiḥ savaneṣu somair made suśiprā mahabhiḥ pṛṇadhvam ||
7.037.02a yūyam ha ratnam maghavatsu dhattha swardṛśa ṛbhukṣaṇo amṛktaḥ |
7.037.02c sam yajñeṣu svadhāvantaḥ pibadhvam vi no rādhamṣi matibhir dayadhvam ||
7.037.03a uvocitha hi maghavan deṣṇam maho arbhasya vasuno vibhāge |
7.037.03c ubhā te pūrṇā vasunā gabhastī na sūnṛtā ni yamate vasavyā ||
7.037.04a tvam indra svayaśā ṛbhukṣā vājo na sādhu astam eṣy ṛkvā |
7.037.04c vayam nu te dāśvāṃsaḥ syāma brahma kṛṇvanto harivo vasiṣṭhāḥ ||
7.037.05a sanitāsi pravato dāśuṣe cid yābhir viveṣo haryaśva dhibhiḥ |
7.037.05c vavanmā nu te yujyābhir ūti kadā na indra rāya ā daśasyeḥ ||
7.037.06a vāsayasīva vedhasas tvam naḥ kadā na indra vacaso bubodhaḥ |
7.037.06c astam tātyā dhiyā rayiṃ suvīram pṛkṣo no arvā ny uḥita vāji ||
7.037.07a abhi yaṃ devī nirṛtiś cid iṣe nakṣanta indram śaradaḥ supṛkṣaḥ |
7.037.07c upa tribandhur jaradaṣṭim ety asvaveśam yaṃ kṛṇavanta martāḥ ||
7.037.08a ā no rādhamṣi savita stavadhyā ā rāyo yantu parvatasya rātau |
7.037.08c sadā no divyaḥ pāyuh siṣaktu yūyam pāta svastibhiḥ sadā naḥ ||

7.038.01a ud u ṣya devaḥ savitā yayāma hiraṇyayim amatim yam asisret |
7.038.01c nūnam bhago havyo mānuṣebhir vi yo ratnā purūvasur dadhāti ||
7.038.02a ud u tiṣṭha savitaḥ śrudhy asya hiraṇyapāṇe prabhṛtāv ṛtasya |
7.038.02c vy urvīm pṛthvīm amatim sṛjāna ā nṛbhyo martabhojanaṃ suvānaḥ ||
7.038.03a api ṣṭutaḥ savitā devo astu yam ā cid viśve vasavo gṛṇanti |
7.038.03c sa na stomān namasyasā cano dhād viśvebhiḥ pātu pāyubhir ni sūrīn ||
7.038.04a abhi yaṃ devy aditir gṛṇāti savam devasya savitur juṣānā |
7.038.04c abhi samrājo varuṇo gṛṇanty abhi mitrāso aryamā sajośaḥ ||

7.038.05a abhi ye mitho vanuṣaḥ sapante rātiṃ divo rātiṣācaḥ pṛthivyāḥ |
 7.038.05c ahir budhnya uta naḥ śṛṇotu varūtry ekadhenuhir ni pātu ||
 7.038.06a anu tan no jāspatir maṃsīṣṭa ratnaṃ devasya savitur iyānaḥ |
 7.038.06c bhagam ugro 'vase johavīti bhagam anugro adha yāti ratnaṃ ||
 7.038.07a śaṃ no bhavantu vājino haveṣu devatātā mitadravaḥ svarkāḥ |
 7.038.07c jambhayanto 'hiṃ vṛkaṃ rakṣāṃsi sanemy asmad yuyavann amīvāḥ ||
 7.038.08a vāje-vāje 'vata vājino no dhaneṣu viprā amṛtā ṛtajñāḥ |
 7.038.08c asya madhvaḥ pibata mādayadhvam tṛptā yāta pathibhir devayānaiḥ ||

7.039.01a ūrdhvo agniḥ sumatiṃ vasvo aśret praticī jūrṇir devatātim eti |
 7.039.01c bhejāte adrī rathyeva panthām ṛtaṃ hotā na iṣito yajāti ||
 7.039.02a pra vāvṛje suprayā barhir eṣām ā viśpatīva bīriṭa iyāte |
 7.039.02c viśām aktor uṣasaḥ pūrvahūtau vāyuh pūṣā svastaye niyutvān ||
 7.039.03a jmayā atra vasavo ranta devā urāv antarikṣe marjayanta śubhrāḥ |
 7.039.03c arvāk patha urujrayaḥ kṛṇudhvaṃ śrotā dūtasya jagmuṣo no asya ||
 7.039.04a te hi yajñeṣu yajñiyāsa ūmāḥ sadhasthaṃ viśve abhi santi devāḥ |
 7.039.04c tāñ adhvara uśato yakṣy agne śruṣṭi bhagaṃ nāsatyā puramdhim ||
 7.039.05a āgne giro diva ā pṛthivyā mitraṃ vaha varuṇam indram agnim |
 7.039.05c āryamaṇam aditiṃ viṣṇum eṣām sarasvatī maruto mādayantām ||
 7.039.06a rare havyam matibhir yajñiyānām nakṣat kāmam martyānām asinvan |
 7.039.06c dhātā rayim avidasyaṃ sadāsām sakṣīmahī yujyebhir nu devaiḥ ||
 7.039.07a nū rodasī abhiṣṭute vasiṣṭhair ṛtāvāno varuṇo mitro agniḥ |
 7.039.07c yachantu candrā upamaṃ no arkaṃ yūyam pāta svastibhiḥ sadā naḥ ||

7.040.01a o śruṣṭir vidathyā sam etu prati stomaṃ dadhīmahī turāṇām |
 7.040.01c yad adya devaḥ savitā suvāti syāmāsya ratnino vibhāge ||
 7.040.02a mitras tan no varuṇo rodasī ca dyubhaktam indro aryamā dadātu |
 7.040.02c dideṣṭu devy aditī rekṇo vāyuś ca yan niyuvaite bhagaś ca ||
 7.040.03a sed ugro astu marutaḥ sa śuṣmī yam martyam pṛsadaśvā avātha |
 7.040.03c utem agniḥ sarasvatī junanti na tasya rāyaḥ paryetāsti ||
 7.040.04a ayaṃ hi netā varuṇa ṛtasya mitro rājāno aryamāpo dhuḥ |
 7.040.04c suhavā devy aditir anarvā te no aṃho ati parṣann ariṣṭān ||
 7.040.05a asya devasya mīdhuṣo vayā viṣṇor eṣasya prabhṛthe havirbhiḥ |
 7.040.05c vide hi rudro rudriyam mahitvaṃ yāsiṣṭaṃ vartir aśvināv irāvat ||
 7.040.06a mātra pūṣann āghṛṇa irasyo varūtrī yad rātiṣācaś ca rāsan |
 7.040.06c mayobhuvo no arvanto ni pāntu vṛṣṭim pariḥmā vāto dadātu ||
 7.040.07a nū rodasī abhiṣṭute vasiṣṭhair ṛtāvāno varuṇo mitro agniḥ |
 7.040.07c yachantu candrā upamaṃ no arkaṃ yūyam pāta svastibhiḥ sadā naḥ ||

7.041.01a prātar agnim prātar indraṃ havāmahe prātar mitrāvaruṇā prātar aśvinā |
 7.041.01c prātar bhagam pūṣaṇam brahmaṇas patim prātaḥ somam uta rudraṃ huvema ||
 7.041.02a prātarjitam bhagam ugraṃ huvema vayam putram aditer yo vidhartā |
 7.041.02c ādhraś cid yam manyamānas turaś cid rājā cid yam bhagam bhakṣīty āha ||
 7.041.03a bhaga praṇetar bhaga satyarādho bhagemām dhiyam ud avā dadan naḥ |
 7.041.03c bhaga pra ṇo janaya gobhir aśvair bhaga pra nṛbhir nṛvantaḥ syāma ||

7.041.04a utedānim bhagavantaḥ syāmota prapitva uta madhye ahnām |
 7.041.04c utoditā maghavan sūryasya vyaṃ devānāṃ sumatau syāma ||
 7.041.05a bhaga eva bhagavāṃ astu devās tena vyaṃ bhagavantaḥ syāma |
 7.041.05c taṃ tvā bhaga sarva iḥ jōhavīti sa no bhaga puraetā bhavaha ||
 7.041.06a sam adhvarāyoṣaso namanta dadhikrāveva śucaye padāya |
 7.041.06c arvācīnaṃ vasuvidam bhagaṃ no ratham ivāśvā vājina ā vahantu ||
 7.041.07a aśvāvatiḥ gomatiḥ na uśāso vīravatiḥ sadam uchantu bhadraḥ |
 7.041.07c ghr̥taṃ duhānā viśvataḥ prapitā yūyam pāta svastibhiḥ sadā naḥ ||

7.042.01a pra brahmāṇo aṅgirasō nakṣanta pra krandanur nabhanyasya vetu |
 7.042.01c pra dhenava udapruto navanta yujyātām adri adhvarasya peśaḥ ||
 7.042.02a sugas te agne sanavitto adhvā yukṣvā sute harito rohitaś ca |
 7.042.02c ye vā sadmann aruśā vīravāho huve devānāṃ janimāni sattaḥ ||
 7.042.03a sam u vo yajñam mahayan namobhiḥ pra hotā mandro ririca upāke |
 7.042.03c yajasva su purvaṇika devān ā yajñiyām aramatim vavr̥tyāḥ ||
 7.042.04a yadā vīryasya revato duroṇe syonaśir atithir āciketat |
 7.042.04c supriṭo agniḥ sudhito dama ā sa viśe dāti vāryam iyatyai ||
 7.042.05a imaṃ no agne adhvaram juśasva marutsv indre yaśasam krdhī naḥ |
 7.042.05c ā naktā barhiḥ sadatām uśāsośantā mitrāvaruṇā yajeha ||
 7.042.06a evāgniṃ sahasyaṃ vasiṣṭho rāyaskāmo viśvapsnyasya staut |
 7.042.06c iṣam rayim paprathad vājam asme yūyam pāta svastibhiḥ sadā naḥ ||

7.043.01a pra vo yajñeṣu devayanto arcan dyāvā namobhiḥ pṛthivī iśadhyai |
 7.043.01c yeśām brahmāṇy asamāni viprā viśvag viyanti vanino na śākhāḥ ||
 7.043.02a pra yajña etu hetvo na saptir ud yachadhvam samanaso ghr̥tācīḥ |
 7.043.02c str̥ṇita barhir adhvarāya sādhr̥dhvā śocim̄ṣi devayūny asthuḥ ||
 7.043.03a ā putrāso na mātaram vibhr̥trāḥ sānau devāso barhiṣaḥ sadantu |
 7.043.03c ā viśvācī vidathyām anaktv agne mā no devatātā mrdhas kaḥ ||
 7.043.04a te siśapanta joṣam ā yajatrā ṛtasya dhārāḥ sudughā duhānāḥ |
 7.043.04c jyeṣṭham vo adya maha ā vasūnām ā gantana samanaso yati ṣṭha ||
 7.043.05a evā no agne vikṣv ā daśasya tvayā vyaṃ sahasāvann āskrāḥ |
 7.043.05c rāyā yujā sadhamādo ariṣṭā yūyam pāta svastibhiḥ sadā naḥ ||

7.044.01a dadhikrām vaḥ prathamam aśvinoṣasam agniṃ samiddham bhagam ūtaye huve |
 7.044.01c indram viśnum pūṣaṇam brahmaṇas patim ādityān dyāvāpṛthivī apaḥ svaḥ ||
 7.044.02a dadhikrām u namasā bodhayanta udīrāṇā yajñam upaprayantaḥ |
 7.044.02c idām devīm barhiṣi sādāyanto 'śvinā viprā suhavā huvema ||
 7.044.03a dadhikrāvāṇam bubudhāno agniṃ upa bruva uśasam sūryam gām |
 7.044.03c bradhnām māścator varuṇasya babhrum te viśvāsmad duritā yāvayantu ||
 7.044.04a dadhikrāvā prathamō vājy arvāgre rathānām bhavati prajānan |
 7.044.04c samvidāna uśasā sūryeṇādityebhir vasubhir aṅgirobhiḥ ||
 7.044.05a ā no dadhikrāḥ pathyām anaktv ṛtasya panthām anvetavā u |
 7.044.05c śṛṇotu no daivyam śardho agniḥ śṛṇvantu viśve mahiṣā amūrāḥ ||

7.045.01a ā devo yātu savitā suratno 'ntarikṣaprā vahamāno aśvaiḥ |

7.045.01c haste dadhāno naryā purūṇi niveśayañ ca prasuvañ ca bhūma ||
 7.045.02a ud asya bāhū śithirā bṛhantā hiraṇyayā divo antāṃ anaṣṭām |
 7.045.02c nūnaṃ so asya mahimā paniṣṭa sūras cid asmā anu dād apasyām ||
 7.045.03a sa ghā no devaḥ savitā sahāvā sāviṣad vasupatir vasūni |
 7.045.03c viśrayamāṇo amatim urūcim martabhojanam adha rāsate naḥ ||
 7.045.04a imā girah savitāraṃ sujihvam pūrṇagabhastim idate supāṇim |
 7.045.04c citraṃ vayo bṛhad asme dadhātu yūyam pāta svastibhiḥ sadā naḥ ||

7.046.01a imā rudrāya sthiradhanvane girah kṣipreṣave devāya svadhāvne |
 7.046.01c aṣādhāya sahamānāya vedhase tigmāyudhāya bharatā śṛnotu naḥ ||
 7.046.02a sa hi kṣayeṇa kṣamyasya janmanaḥ sāmrajyena divyasya cetati |
 7.046.02c avann avantīr upa no duraś carānamīvo rudra jāsu no bhava ||
 7.046.03a yā te didyud avasṛṣṭā divas pari kṣmayā carati pari sā vṛṇaktu naḥ |
 7.046.03c sahasraṃ te svapivāta bheṣajā mā nas tokeṣu tanayeṣu rīriṣaḥ ||
 7.046.04a mā no vadhī rudra mā parā dā mā te bhūma prasitau hīditasya |
 7.046.04c ā no bhaja barhiṣi jīvaśaṃse yūyam pāta svastibhiḥ sadā naḥ ||

7.047.01a āpo yaṃ vaḥ prathamam devayanta indrapānam ūrmim akṛṇvateḍaḥ |
 7.047.01c taṃ vo vyaṃ śucim aripram adya ghṛtapruṣam madhumantaṃ vanema ||
 7.047.02a tam ūrmim āpo madhumattamaṃ vo 'pāṃ napād avatv āśuhemā |
 7.047.02c yasminn indro vasubhir mādayāte tam aśyāma devayanto vo adya ||
 7.047.03a śatapavitrāḥ svadhayā madantīr devīr devānām api yanti pāthaḥ |
 7.047.03c tā indrasya na minanti vratāni sindhubhyo havyaṃ ghṛtavaj juhota ||
 7.047.04a yāḥ sūryo raśmibhir ātatāna yābhya indro aradad gātum ūrmim |
 7.047.04c te sindhavo varivo dhātānā no yūyam pāta svastibhiḥ sadā naḥ ||

7.048.01a ṛbhukṣaṇo vājā mādayadhvam asme naro maghavānaḥ sutasya |
 7.048.01c ā vo 'rvācaḥ kratavo na yātām vibhvo rathaṃ naryaṃ vartayantu ||
 7.048.02a ṛbhur ṛbhuhvir abhi vaḥ syāma vibhvo vibhubhiḥ śavasā śavāṃsi |
 7.048.02c vājo asmāṃ avatu vājasātāv indreṇa yujā taruṣema vṛtram ||
 7.048.03a te cid dhi pūrvīr abhi santi śāsā viśvāṃ arya uparatāti vanvan |
 7.048.03c indro vibhvāṃ ṛbhukṣā vājo ayaḥ śatror mithatyā kṛṇavan vi nṛmṇam ||
 7.048.04a nū devāso varivaḥ kartanā no bhūta no viśve 'vase sajoṣāḥ |
 7.048.04c sam asme iṣaṃ vasavo dadīran yūyam pāta svastibhiḥ sadā naḥ ||

7.049.01a samudrajeṣṭhāḥ salilasya madhyāt punānā yanty anivīsamānāḥ |
 7.049.01c indro yā vajrī vṛṣabho rarāda tā āpo devīr iha mām avantu ||
 7.049.02a yā āpo divyā uta vā sravanti khanitrimā uta vā yāḥ svayaṃjāḥ |
 7.049.02c samudrārthā yāḥ śucayaḥ pāvakās tā āpo devīr iha mām avantu ||
 7.049.03a yāsāṃ rājā varuṇo yāti madhye satyānṛte avapaśyañ janānām |
 7.049.03c madhuścutaḥ śucayo yāḥ pāvakās tā āpo devīr iha mām avantu ||
 7.049.04a yāsu rājā varuṇo yāsu somo viśve devā yāsūrjam madanti |
 7.049.04c vaiśvānaro yāsv agniḥ praviṣṭas tā āpo devīr iha mām avantu ||

7.050.01a ā mām mitrāvaruṇeha rakṣataṃ kulāyayad viśvayan mā na ā gan |
 7.050.01c ajakāvaṃ durdṛśikaṃ tiro dadhe mā mām padyena rapasā vidat tsaruḥ ||
 7.050.02a yad vijāman paruṣi vandanam bhuvad aṣṭhīvantau pari kulphau ca dehat |
 7.050.02c agniṣ ṭac chocann apa bādhatām ito mā mām padyena rapasā vidat tsaruḥ ||
 7.050.03a yac chalmalau bhavati yan nadiṣu yad oṣadhībhyaḥ pari jāyate viṣam |
 7.050.03c viśve devā nir itas tat suvantu mā mām padyena rapasā vidat tsaruḥ ||
 7.050.04a yāḥ pravato nivata udvata udanvatir anudakāś ca yāḥ |
 7.050.04c tā asmabhyam payasā pinvamānāḥ śivā devīr aśipadā bhavantu sarvā nadyo
 aśimidā bhavantu ||

7.051.01a ādityānām avasā nūtanena sakṣīmahi śarmaṇā śaṃtamena |
 7.051.01c anāgāstve adititve turāsa imaṃ yajñam dadhatu śroṣamānāḥ ||
 7.051.02a ādityāso aditir mādayantām mitro aryamā varuṇo rajiṣṭhāḥ |
 7.051.02c asmākaṃ santu bhuvanasya gopāḥ pibantu somam avase no adya ||
 7.051.03a ādityā viśve marutaś ca viśve devāś ca viśva ṛbhavaś ca viśve |
 7.051.03c indro agnir aśvinā tuṣṭuvānā yūyam pāta svastibhiḥ sadā naḥ ||

7.052.01a ādityāso aditayaḥ syāma pūr devatrā vasavo martyatrā |
 7.052.01c sanema mitrāvaruṇā sananto bhavema dyāvāpṛthivī bhavantaḥ ||
 7.052.02a mitras tan no varuṇo māmahanta śarma tokāya tanayāya gopāḥ |
 7.052.02c mā vo bhujemānyajātam eno mā tat karma vasavo yac cayadhve ||
 7.052.03a turanyavo 'ngiraso nakṣanta ratnaṃ devasya savitur iyānāḥ |
 7.052.03c pitā ca tan no mahān yajatro viśve devāḥ samanaso juṣanta ||

7.053.01a pra dyāvā yajñaiḥ pṛthivī namobhiḥ sabādha īde bṛhatī yajatre |
 7.053.01c te cid dhi pūrve kavayo gṛṇantaḥ puro mahī dadhire devaputre ||
 7.053.02a pra pūrvaje pitarā navyasībhir girbhiḥ kṛṇudhvaṃ sadane ṛtasya |
 7.053.02c ā no dyāvāpṛthivī daivyena janena yātam mahi vām varūtham ||
 7.053.03a uto hi vām ratnadheyāni santi purūṇi dyāvāpṛthivī sudāse |
 7.053.03c asme dhattam yad asad askṛdhoyu yūyam pāta svastibhiḥ sadā naḥ ||

7.054.01a vāstoṣ pate prati jānihy asmān svāveśo anamīvo bhavā naḥ |
 7.054.01c yat tvemahe prati tan no juṣasva śaṃ no bhava dvipade śaṃ catuṣpade ||
 7.054.02a vāstoṣ pate prataraṇo na edhi gayasphāno gobhir aśvebhir indo |
 7.054.02c ajarāsas te sakhye syāma piteva putrān prati no juṣasva ||
 7.054.03a vāstoṣ pate śagmayā saṃsadā te sakṣīmahi raṇvayā gātumatyā |
 7.054.03c pāhi kṣema uta yoge varam no yūyam pāta svastibhiḥ sadā naḥ ||

7.055.01a amīvahā vāstoṣ pate viśvā rūpāṇy āviśan |
 7.055.01c sakhā suśeva edhi naḥ ||
 7.055.02a yad arjuna sārameya dataḥ piśaṅga yachase |
 7.055.02c vīva bhrājanta iṣṭaya upa srakveṣu bapsato ni ṣu svapa ||
 7.055.03a stenaṃ rāya sārameya taskaram vā punaḥsara |
 7.055.03c stotṛṇ indrasya rāyasi kim asmān duchunāyase ni ṣu svapa ||

7.055.04a tvam sūkarasya dardṛhi tava dardartu sūkaraḥ |
 7.055.04c stotṛṇ indrasya rāyasi kim asmān duchunāyase ni ṣu svapa ||
 7.055.05a sastu mātā sastu pitā sastu śvā sastu viśpatiḥ |
 7.055.05c sasantu sarve jñātayaḥ sastv ayam abhito janaḥ ||
 7.055.06a ya āste yaś ca carati yaś ca paśyati no janaḥ |
 7.055.06c teṣāṃ saṃ hanmo akṣāṇi yathedaṃ harmyaṃ tathā ||
 7.055.07a sahasraśṛṅgo vṛṣabho yaḥ samudrād udācarat |
 7.055.07c tenā sahasyenā vayaṃ ni janān svāpayāmasi ||
 7.055.08a proṣṭheśayā vahyeśayā nārīr yās talpaśīvariḥ |
 7.055.08c striyo yāḥ puṇyagandhās tāḥ sarvāḥ svāpayāmasi ||

7.056.01a ka iṃ vyaktā naraḥ sanīdā rudrasya maryā adha svasvāḥ |
 7.056.02a nakir hy eṣāṃ janūṃṣi veda te aṅga vidre mitho janitram |
 7.056.03a abhi svapūbhir mitho vapanta vātasvanasaḥ śyenā asprḍhran |
 7.056.04a etāni dhīro ninyā ciketa pṛṣṇir yad ūdho mahī jabhāra |
 7.056.05a sā viṭ suvirā marudbhir astu sanāt sahantī puṣyantī nṛmṇam |
 7.056.06a yāmaṃ yeṣṭhāḥ śubhā śobhiṣṭhāḥ śriyā sammiślā ojobhir ugrāḥ |
 7.056.07a ugraṃ va oja sthirā śavāṃsy adhā marudbhir gaṇas tuviṣmān |
 7.056.08a śubhro vaḥ śuṣmaḥ krudhmī manāṃsi dhunir munir iva śardhasya dhrṣṇoḥ |
 7.056.09a sanemy asmaḍ yuyota didyum mā vo durmatir iha praṇaṇ naḥ |
 7.056.10a priyā vo nāma huve turāṇām ā yat tṛpan maruto vāvaśānāḥ |
 7.056.11a svāyudhāsa iṣmiṇaḥ suniṣkā uta svayaṃ tanvaḥ śumbhamānāḥ |
 7.056.12a śucī vo havyaḥ marutaḥ śucināṃ śuciṃ hinomy adhvaraṃ śucibhyaḥ |
 7.056.12c ṛtena satyam ṛtasāpa āyañ chucijanmānaḥ śucayaḥ pāvakāḥ ||
 7.056.13a aṃseṣv ā marutaḥ khādayo vo vakṣassu rukmā upaśīśriyāṇāḥ |
 7.056.13c vi vidyuto na vṛṣṭibhī rucānā anu svadhām āyudhair yachamānāḥ ||
 7.056.14a pra budhnyā va irate mahāṃsi pra nāmāni prayajyavas tiradhvam |
 7.056.14c sahasriyaṃ damyam bhāgam etaṃ gṛhamedhiyam maruto juṣadhvam ||
 7.056.15a yadi stutasya maruto adhithetthā viprasya vājino havīman |
 7.056.15c makṣū rāyaḥ suvirasya dāta nū cid yam anya ādabhad arāvā ||
 7.056.16a atyāso na ye marutaḥ svañco yakṣadṛśo na śubhayanta maryāḥ |
 7.056.16c te harmyeṣṭhāḥ śiśavo na śubhrā vatsāso na prakṛīdinaḥ payodhāḥ ||
 7.056.17a daśasyanto no maruto mṛdantu varivasyanto rodasi sumeke |
 7.056.17c āre gohā nṛhā vadho vo astu sumnebhir asme vasavo namadhvam ||
 7.056.18a ā vo hotā johavīti sattaḥ satrācīṃ rātim maruto gṛṇānaḥ |
 7.056.18c ya ivato vṛṣaṇo asti gopāḥ so advayāvī havate va ukthaiḥ ||
 7.056.19a ime turam maruto rāmayantīme sahaḥ sahasa ā namanti |
 7.056.19c ime śamsaṃ vanuṣyato ni pānti guru dveṣo araruṣe dadhanti ||
 7.056.20a ime radhraṃ cin maruto junanti bhṛmiṃ cid yathā vasavo juṣanta |
 7.056.20c apa bādhadhvaṃ vṛṣaṇas tamāṃsi dhatta viśvaṃ tanayaṃ tokam asme ||
 7.056.21a mā vo dātrān maruto nir arāma mā paścād daghma rathyo vibhāge |
 7.056.21c ā na spārhe bhajatanā vasavye yad iṃ sujātaṃ vṛṣaṇo vo asti ||
 7.056.22a saṃ yad dhananta manyubhir janāsaḥ sūrā yahviṣv oṣadhīṣu vikṣu |
 7.056.22c adha smā no maruto rudriyāsas trātāro bhūta pṛtanāsv ariyaḥ ||
 7.056.23a bhūri cakra marutaḥ pitryāṇy ukthāni yā vaḥ śasyante purā cit |
 7.056.23c marudbhir ugraḥ pṛtanāsu sādḥā marudbhir it sanitā vājam arvā ||
 7.056.24a asme vīro marutaḥ śuṣmy astu janānāṃ yo asuro vidhartā |
 7.056.24c apo yena sukṣītaye taremādha svam oko abhi vaḥ syāma ||

7.056.25a tan na indro varuṇo mitro agnir āpa oṣadhīr vanino juṣanta |
7.056.25c śarman syāma marutām upasthe yūyam pāta svastibhiḥ sadā naḥ ||

7.057.01a madhvo vo nāma mārutaṃ yajatrāḥ pra yajñeṣu śavasā madanti |
7.057.01c ye rejayanti rodasī cid urvī pinvanty utsaṃ yad ayāsur ugrāḥ ||
7.057.02a nicetāro hi maruto gṛṇantam praṇetāro yajamānasya manma |
7.057.02c asmākam adya vidatheṣu barhir ā vītaye sadata pipriyāṇāḥ ||
7.057.03a naitāvad anye maruto yatheme bhrājante rukmair āyudhais tanūbhiḥ |
7.057.03c ā rodasī viśvapiśaḥ piśānāḥ samānam añjy añjate śubhe kam ||
7.057.04a ṛdhak sā vo maruto didyud astu yad va āgaḥ puruṣatā karāma |
7.057.04c mā vas tasyām api bhūmā yajatrā asme vo astu sumatīś caniṣṭhā ||
7.057.05a kṛte cid atra maruto raṇantānavadyāsaḥ śucayaḥ pāvakāḥ |
7.057.05c pra ṇo 'vata sumatibhir yajatrāḥ pra vājebhis tirata puṣyase naḥ ||
7.057.06a uta stutāso maruto vyantu viśvebhir nāmabhir naro havīmṣi |
7.057.06c dadāta no amṛtasya prajāyai jigṛta rāyaḥ sūnṛtā maghāni ||
7.057.07a ā stutāso maruto viśva ūti achā sūrīn sarvatātā jigāta |
7.057.07c ye nas tmanā śatino vardhayanti yūyam pāta svastibhiḥ sadā naḥ ||

7.058.01a pra sākamukṣe arcatā gaṇāya yo daivyasya dhāmnas tuviṣmān |
7.058.01c uta kṣodanti rodasī mahitvā nakṣante nākaṃ nirṛter avamśāt ||
7.058.02a janūs cid vo marutas tveṣyeṇa bhīmāsas tuvimanyavo 'yāsaḥ |
7.058.02c pra ye mahobhir ojasota santi viśvo vo yāman bhayate svardṛk ||
7.058.03a bṛhad vayo maghavadbhyo dadhāta jujoṣann in marutaḥ suṣṭutiṃ naḥ |
7.058.03c gato nādhvā vi tirāti jantum pra ṇa spārhābhir ūtibhis tireta ||
7.058.04a yuṣmoto vipro marutaḥ śatasvī yuṣmoto arvā sahuriḥ sahasrī |
7.058.04c yuṣmotaḥ samrāḍ uta hanti vṛtram pra tad vo astu dhūtayo deṣṇam ||
7.058.05a tāṃ ā rudrasya miḍhuṣo vivāse kuvin naṃsante marutaḥ punar naḥ |
7.058.05c yat sasvartā jihīḍire yad āvir ava tad ena imahe turāṇām ||
7.058.06a pra sā vāci suṣṭutir maghonām idam sūktam maruto juṣanta |
7.058.06c ārāc cid dveṣo vṛṣaṇo yuyota yūyam pāta svastibhiḥ sadā naḥ ||

7.059.01a yaṃ trāyadhva idam-idam devāso yaṃ ca nayatha |
7.059.01c tasmā agne varuṇa mitrāryaman marutaḥ śarma yachata ||
7.059.02a yuṣmākam devā avasāhani priya ijānas tarati dviṣaḥ |
7.059.02c pra sa kṣayaṃ tirate vi mahīr iṣo yo vo varāya dāśati ||
7.059.03a nahi vaś caramaṃ cana vasiṣṭhaḥ parimamṣate |
7.059.03c asmākam adya marutaḥ sute sacā viśve pibata kāmināḥ ||
7.059.04a nahi va ūtiḥ pṛtanāsu mardhati yasmā arādhvaṃ naraḥ |
7.059.04c abhi va āvart sumatir navīyasī tūyaṃ yāta pipīṣavaḥ ||
7.059.05a o ṣu ghrīṣvirādhaso yātanāndhāṃsi pītaye |
7.059.05c imā vo havyā maruto rare hi kam mo ṣv anyatra gantana ||
7.059.06a ā ca no barhiḥ sadatāvitā ca na spārhāni dātave vasu |
7.059.06c asredhanto marutaḥ somye madhau svāheha mādayādhvai ||
7.059.07a sasvas cid dhi tanvaḥ śumbhamānā ā haṃsāso nilapṛṣṭhā apaptan |
7.059.07c viśvaṃ śardho abhito mā ni ṣeda naro na raṇvāḥ savane madantaḥ ||
7.059.08a yo no maruto abhi durhrṇāyus tiraś cittāni vasavo jighāṃsati |

7.059.08c druhaḥ pāsān prati sa mucīṣṭa tapiṣṭhena hanmanā hantanā tam ||
 7.059.09a sāmṭapanā idaṃ havir marutas taj jujuṣṭana |
 7.059.09c yuṣmākotī riśādasaḥ ||
 7.059.10a gṛhamedhāsa ā gata maruto māpa bhūtana |
 7.059.10c yuṣmākotī sudānavaḥ ||
 7.059.11a iheha vaḥ svatavasaḥ kavayaḥ sūryatvacāḥ |
 7.059.11c yajñam maruta ā vṛṇe ||
 7.059.12a tryambakaṃ yajāmahe sugandhim puṣṭivardhanam |
 7.059.12c urvārukam iva bandhanān mṛtyor mukṣīya māmṛtāt ||

7.060.01a yad adya sūrya bravo 'nāgā udyan mitrāya varuṇāya satyam |
 7.060.01c vayaṃ devatrādite syāma tava priyāso aryaman gṛṇantaḥ ||
 7.060.02a eṣa sya mitrāvaruṇā nṛcakṣā ubhe ud eti sūryo abhi jman |
 7.060.02c viśvasya sthātur jagataś ca gopā ṛju marteṣu vṛjinā ca paśyan ||
 7.060.03a ayukta sapta haritaḥ sadhasthād yā im̐ vahanti sūryaṃ ghṛtācīḥ |
 7.060.03c dhāmāni mitrāvaruṇā yuvākuḥ saṃ yo yūtheva janimāni caṣṭe ||
 7.060.04a ud vām pṛkṣāso madhumanto asthur ā sūryo aruhac chukram arṇaḥ |
 7.060.04c yasmā ādityā adhvano radanti mitro aryamā varuṇaḥ sajoṣāḥ ||
 7.060.05a ime cetāro anṛtasya bhūrer mitro aryamā varuṇo hi santi |
 7.060.05c ima ṛtasya vāvṛdhur duroṇe śagmāsaḥ putrā aditer adabdhāḥ ||
 7.060.06a ime mitro varuṇo dūḍabhāso 'cetasam̐ cic citayanti dakṣaiḥ |
 7.060.06c api kratuṃ sucetasam̐ vatantas tiraś cid aṃhaḥ supathā nayanti ||
 7.060.07a ime divo animiṣā pṛthivyāś cikitvāṃso acetasaṃ nayanti |
 7.060.07c pravṛaje cin nadyo gādham asti pāram no asya viṣpitasya paśan ||
 7.060.08a yad gopāvad aditiḥ śarma bhadram mitro yachanti varuṇaḥ sudāse |
 7.060.08c tasminn ā tokam̐ tanayam̐ dadhānā mā karma devaheḍanam̐ turāsaḥ ||
 7.060.09a ava vedim̐ hotrābhir yajeta ripaḥ kāś cid varuṇadhrutaḥ saḥ |
 7.060.09c pari dveṣobhir aryamā vṛṇaktūruṃ sudāse vṛṣaṇā ulokam ||
 7.060.10a sasvaś cid dhi samṛtis tveṣy eṣām̐ apīcyena sahasā sahante |
 7.060.10c yuṣmad bhiyā vṛṣaṇo rejamānā dakṣasya cin mahinā mṛdatā naḥ ||
 7.060.11a yo brahmaṇe sumatim̐ āyajāte vājasya sātāu paramasya rāyaḥ |
 7.060.11c sīkṣanta manyum maghavāno arya uru kṣayāya cakrire sudhātu ||
 7.060.12a iyaṃ deva purohitir yuvabhyāṃ yajñeṣu mitrāvaruṇāv akāri |
 7.060.12c viśvāni durgā pipṛtaṃ tiro no yūyam̐ pāta svastibhiḥ sadā naḥ ||

7.061.01a ud vām̐ cakṣur varuṇa supratikaṃ devayor eti sūryas tatanvān |
 7.061.01c abhi yo viśvā bhuvanāni caṣṭe sa manyum martyeṣv ā ciketa ||
 7.061.02a pra vām̐ sa mitrāvaruṇāv ṛtāvā vipro manmāni dīrghaśrud iyarti |
 7.061.02c yasya brahmāni sukratū avātha ā yat kratvā na śaradaḥ pṛṇaithe ||
 7.061.03a proror mitrāvaruṇā pṛthivyāḥ pra diva ṛṣvād bṛhataḥ sudānū |
 7.061.03c spaśo dadhāthe ośadhīṣu vikṣv ṛdhag yato animiṣam̐ rakṣamānā ||
 7.061.04a śamsā mitrasya varuṇasya dhāma śuṣmo rodasī badbadhe mahitvā |
 7.061.04c ayan māsā ayajvanām̐ avīrāḥ pra yajñamanmā vṛjanaṃ tirāte ||
 7.061.05a amūrā viśvā vṛṣaṇāv imā vām̐ na yāsu citraṃ dadṛṣe na yakṣam |
 7.061.05c druhaḥ sacante anṛtā janānām̐ na vām̐ niṇyāny acite abhūvan ||
 7.061.06a sam u vām̐ yajñam̐ mahayam̐ namobhir huve vām̐ mitrāvaruṇā sabādhaḥ |
 7.061.06c pra vām̐ manmāny ṛcase navāni kṛtāni brahma jujuṣann imāni ||

7.061.07a iyam̐ deva purohitir yuvabhyāṃ yajñeṣu mitrāvaruṇāv akāri |
7.061.07c viśvāni durgā pipṛtaṃ tiro no yūyam pāta svastibhiḥ sadā naḥ ||

7.062.01a ut sūryo bṛhad arcīṃṣy aśret puru viśvā janima mānuṣāṇām |
7.062.01c samo divā dadṛṣe rocamānaḥ kratvā kṛtaḥ sukṛtaḥ kartṛbhir bhūt ||
7.062.02a sa sūrya prati puro na ud gā ebhi stomebhir etaśebhir evaiḥ |
7.062.02c pra no mitrāya varuṇāya voco 'nāgaso aryamṇe agnaye ca ||
7.062.03a vi naḥ sahasraṃ śurudho radantv ṛtāvāno varuṇo mitro agniḥ |
7.062.03c yachantu candrā upamaṃ no arkam ā naḥ kāmam pūpurantu stavānāḥ ||
7.062.04a dyāvābhūmī adite trāsīthām no ye vām̐ jajñuḥ sujanimāna ṛṣve |
7.062.04c mā heḍe bhūma varuṇasya vāyor mā mitrasya priyatamasya nṛṇām ||
7.062.05a pra bāhavā sisṛtaṃ jīvase na ā no gavyūtīm ukṣataṃ ghṛtena |
7.062.05c ā no jane śravayataṃ yuvānā śrutam me mitrāvaruṇā havemā ||
7.062.06a nū mitro varuṇo aryamā nas tmane tokāya varivo dadhantu |
7.062.06c sugā no viśvā supathāni santu yūyam pāta svastibhiḥ sadā naḥ ||

7.063.01a ud v eti subhago viśvacakṣāḥ sādharmaṇaḥ sūryo mānuṣāṇām |
7.063.01c cakṣur mitrasya varuṇasya devaś carmeva yaḥ samavivyak tamāṃsi ||
7.063.02a ud v eti prasavitā janānām mahān ketur arṇavaḥ sūryasya |
7.063.02c samānaṃ cakram paryāvivr̥tsan yad etaśo vahati dhūrṣu yuktaḥ ||
7.063.03a vibhrājamāna uṣasām upasthād rebhair ud ety anumadyamānaḥ |
7.063.03c eṣa me devaḥ savitā cachanda yaḥ samānaṃ na pramināti dhāma ||
7.063.04a divo rukma urucakṣā ud eti dūrearthas taraṇir bhrājamānaḥ |
7.063.04c nūnaṃ janāḥ sūryeṇa prasūtā ayann arthāni kṛṇavann apāṃsi ||
7.063.05a yatrā cakrur amṛtā gātum asmai śyeno na diyann anv eti pāthaḥ |
7.063.05c prati vām̐ sūra udite vidhema namobhir mitrāvaruṇota havyaiḥ ||
7.063.06a nū mitro varuṇo aryamā nas tmane tokāya varivo dadhantu |
7.063.06c sugā no viśvā supathāni santu yūyam pāta svastibhiḥ sadā naḥ ||

7.064.01a divi kṣayantā rajasah pṛthivyām̐ pra vām̐ ghṛtasya nirṇijo dadīran |
7.064.01c havyaṃ no mitro aryamā sujāto rājā sukṣatro varuṇo juṣanta ||
7.064.02a ā rājānā maha ṛtasya gopā sindhupati kṣatriyā yātam arvāk |
7.064.02c iḍām̐ no mitrāvaruṇota vṛṣṭim̐ ava diva invataṃ jīradānū ||
7.064.03a mitras tan no varuṇo devo aryaḥ pra sādhiṣṭhebhīḥ pathibhir nayantu |
7.064.03c bravād yathā na ād ariḥ sudāsa iṣā madema saha devagopāḥ ||
7.064.04a yo vām̐ gartam manasā takṣad etam ūrdhvām̐ dhītiṃ kṛṇavad dhārayac ca |
7.064.04c ukṣethām̐ mitrāvaruṇā ghṛtena tā rājānā sukṣītīs tarpayethām̐ ||
7.064.05a eṣa stomo varuṇa mitra tubhyaṃ somaḥ śukro na vāyave 'yāmi |
7.064.05c aviṣṭaṃ dhiyo jigṛtaṃ puraṃdhīr yūyam pāta svastibhiḥ sadā naḥ ||

7.065.01a prati vām̐ sūra udite sūktair mitraṃ huve varuṇam pūதாக্ষam̐ |
7.065.01c yayor asuryam̐ akṣitam̐ jyeṣṭham̐ viśvasya yāmann ācitā jigatnu ||
7.065.02a tā hi devānām̐ asurā tāv aryā tā naḥ kṣitīḥ karatam ūrjayantiḥ |
7.065.02c aśyāma mitrāvaruṇā vayaṃ vām̐ dyāvā ca yatra pīpayann ahā ca ||
7.065.03a tā bhūripāśāv anṛtasya setū duratyētū ripave martyāya |

7.065.03c ṛtasya mitrāvaruṇā pathā vām apo na nāvā duritā tarema ||
 7.065.04a ā no mitrāvaruṇā havyajusṭim ghṛtair gavyūtim ukṣatam iḍābhiḥ |
 7.065.04c prati vām atra varam ā janāya pṛṇitam udno divyasya cāroḥ ||
 7.065.05a eṣa stomo varuṇa mitra tubhyaṃ somaḥ śukro na vāyave 'yāmi |
 7.065.05c aviṣṭaṃ dhiyo jigṛtam puraṃdhīr yūyam pāta svastibhiḥ sadā naḥ ||

7.066.01a pra mitrayor varuṇayo stomo na etu śūṣyaḥ |
 7.066.01c namasvān tuvijātayoḥ ||
 7.066.02a yā dhārayanta devāḥ sudakṣā dakṣapitarā |
 7.066.02c asuryāya pramaḥasā ||
 7.066.03a tā na stipā tanūpā varuṇa jaritṛṇām |
 7.066.03c mitra sādhayataṃ dhiyaḥ ||
 7.066.04a yad adya sūra udite 'nāgā mitro aryamā |
 7.066.04c suvāti savitā bhagaḥ ||
 7.066.05a suprāvīr astu sa kṣayaḥ pra nu yāman sudānavaḥ |
 7.066.05c ye no aṃho 'tipiprati ||
 7.066.06a uta svarājo aditir adabdhasya vratasya ye |
 7.066.06c maho rājāna īsate ||
 7.066.07a prati vām sūra udite mitraṃ gṛṇīṣe varuṇam |
 7.066.07c aryamaṇaṃ riśādasam ||
 7.066.08a rāyā hiraṇyayā matir iyam avṛkāya śavase |
 7.066.08c iyam viprā medhasātaye ||
 7.066.09a te syāma deva varuṇa te mitra sūribhiḥ saha |
 7.066.09c iṣaṃ svaś ca dhīmahi ||
 7.066.10a bahavaḥ sūracakṣaso 'gnijihvā ṛtāvṛdhaḥ |
 7.066.10c trīṇi ye yemur vidathāni dhītibhir viśvāni paribhūtibhiḥ ||
 7.066.11a vi ye dadhuḥ śaradam māsam ād ahar yajñam aktuṃ cād ṛcam |
 7.066.11c anāpyaṃ varuṇo mitro aryamā kṣatraṃ rājāna āsata ||
 7.066.12a tad vo adya manāmahe sūktaiḥ sūra udite |
 7.066.12c yad ohate varuṇo mitro aryamā yūyam ṛtasya rathyaḥ ||
 7.066.13a ṛtāvāna ṛtajātā ṛtāvṛdho ghorāso anṛtadviṣaḥ |
 7.066.13c teṣāṃ vaḥ sumne suchardiṣtame naraḥ syāma ye ca sūrayaḥ ||
 7.066.14a ud u tyad darśataṃ vapur diva eti pratihvare |
 7.066.14c yad im āśur vahati deva etaśo viśvasmai cakṣase aram ||
 7.066.15a śīrṣṇaḥ-śīrṣṇo jagatas tasthuṣas patim samayā viśvam ā rajaḥ |
 7.066.15c sapta svasāraḥ suvitāya sūryaṃ vahanti harito rathe ||
 7.066.16a tac cakṣur devahitaṃ śukram uccarat |
 7.066.16b paśyema śaradaḥ śataṃ jīvema śaradaḥ śataṃ ||
 7.066.17a kāvyebhir adābhyā yātaṃ varuṇa dyumat |
 7.066.17c mitraś ca somaṇitaye ||
 7.066.18a divo dhāmabhir varuṇa mitraś cā yātam adruhā |
 7.066.18c pibataṃ somam ātuḥji ||
 7.066.19a ā yātam mitrāvaruṇā juṣāṇāv āhutiṃ narā |
 7.066.19c pātaṃ somam ṛtāvṛdhā ||

7.067.01a prati vām rathaṃ nṛpati jaradhyai haviṣmatā manasā yajñiyena |
 7.067.01c yo vām dūto na dhiṣṇyāv aḥgar achā sūnur na pitarā vivakmi ||

7.067.02a aśocy agniḥ samidhāno asme upo adṛśran tamasaś cid antāḥ |
 7.067.02c aceti ketur uśasaḥ purastāc chriye divo duhitur jāyamānaḥ ||
 7.067.03a abhi vām nūnam aśvinā suhotā stomaiḥ siṣakti nāsatyā vivakvān |
 7.067.03c pūrvibhir yātam pathyābhir arvāk svarvidā vasumatā rathena ||
 7.067.04a avor vām nūnam aśvinā yuvākur huve yad vām sute mādhvī vasūyuḥ |
 7.067.04c ā vām vahantu sthvirāso aśvāḥ pibātho asme suṣutā madhūni ||
 7.067.05a prācīm u devāśvinā dhiyam me 'mṛdhrām sātaye kṛtam vasūyum |
 7.067.05c viśvā aviṣtam vāja ā puramdhis tā naḥ śaktam śacīpati śacībhiḥ ||
 7.067.06a aviṣtam dhīṣv aśvinā na āsu prajāvad reto ahrayam no astu |
 7.067.06c ā vām toke tanaye tūtujānāḥ suratnāso devavītiḥ gamema ||
 7.067.07a eṣa sya vām pūrvagatveva sakhye nidhir hito mādhvī rāto asme |
 7.067.07c aheḍatā manasā yātam arvāg aśnantā havyam mānuṣīṣu vikṣu ||
 7.067.08a ekasmin yoge bhuraṇā samāne pari vām sapta sravato ratho gāt |
 7.067.08c na vāyanti subhvo devayuktā ye vām dhūrṣu taraṇayo vahanti ||
 7.067.09a asaścatā maghavadbhyo hi bhūtam ye rāyā maghadeyam junanti |
 7.067.09c pra ye bandhum sūnṛtābhis tirante gavyā pṛñcanto aśvyā maghāni ||
 7.067.10a nū me havam ā śṛṇutam yuvānā yāsiṣtam vartir aśvināv irāvat |
 7.067.10c dhattam ratnāni jaratam ca sūrīn yūyam pāta svastibhiḥ sadā naḥ ||

7.068.01a ā śubhrā yātam aśvinā svaśvā giro dasrā jujuṣāṇā yuvākoḥ |
 7.068.01c havyāni ca pratibhṛtā vītam naḥ ||
 7.068.02a pra vām andhāṃsi madyāny asthur aram gantam haviṣo vītaye me |
 7.068.02c tiro aryo havanāni śrutam naḥ ||
 7.068.03a pra vām ratho manojavā iyarti tiro rajāṃsy aśvinā śatotiḥ |
 7.068.03c asmabhyam sūryāvasū iyānaḥ ||
 7.068.04a ayam ha yad vām devayā u adrir ūrdhvo vivakti somasud yuvabhyām |
 7.068.04c ā valgū vipro vavṛtīta havyaiḥ ||
 7.068.05a citram ha yad vām bhojanam nv asti ny atraye mahiṣvantam yuyotam |
 7.068.05c yo vām omānam dadhate priyaḥ san ||
 7.068.06a uta tyad vām jurate aśvinā bhūc cyavānāya pratītyam havirde |
 7.068.06c adhi yad varpa itaūti dhatthaḥ ||
 7.068.07a uta tyam bhujyum aśvinā sakhāyo madhye jahur durevāsaḥ samudre |
 7.068.07c nir īm parṣad arāvā yo yuvākuḥ ||
 7.068.08a vṛkāya cij jasmānāya śaktam uta śrutam śayave hūyamānā |
 7.068.08c yāv aghnyām apinvatam apo na staryam cic chakty aśvinā śacībhiḥ ||
 7.068.09a eṣa sya kārur jarate sūktair agre budhāna uśasām sumanmā |
 7.068.09c iṣā tam vardhad aghnyā payobhir yūyam pāta svastibhiḥ sadā naḥ ||

7.069.01a ā vām ratho rodasī badbadhāno hiraṇyayo vṛṣabhir yātv aśvaiḥ |
 7.069.01c ghṛtavartaniḥ pavibhī rucāna iṣām voḍhā nṛpatir vājinivān ||
 7.069.02a sa paprathāno abhi pañca bhūmā trivandhuro manasā yātu yuktaḥ |
 7.069.02c viśo yena gachatho devayantiḥ kutrā cid yāmam aśvinā dadhānā ||
 7.069.03a svaśvā yaśasā yātam arvāg dasrā nidhim madhumantam pibāthaḥ |
 7.069.03c vi vām ratho vadhvā yādamāno 'ntān divo bādhatte vartanibhyām ||
 7.069.04a yuvoḥ śriyam pari yoṣāvṛṇīta sūro duhitā paritakmyāyām |
 7.069.04c yad devayantam avathaḥ śacībhiḥ pari ghraṃsam omanā vām vayo gāt ||
 7.069.05a yo ha sya vām rathirā vasta usrā ratho yujānaḥ pariyāti vartiḥ |

7.069.05c tena naḥ śaṃ yor uṣaso vyuṣṭau ny aśvinā vahataṃ yajñe asmin ||
 7.069.06a narā gaureva vidyutaṃ tṛṣṇāsmākam adya savanopa yātam |
 7.069.06c purutrā hi vām matibhir havante mā vām anye ni yaman devayantaḥ ||
 7.069.07a yuvam bhujyum avavidhāṃ samudra ud ūhathur arṇaso asridhānaiḥ |
 7.069.07c patatribhir aśramair avyathibhir daṃsanābhir aśvinā pārayantā ||
 7.069.08a nū me havam ā śṛṇutaṃ yuvānā yāsiṣṭaṃ vartir aśvināv irāvat |
 7.069.08c dhattaṃ ratnāni jarataṃ ca sūrīn yūyam pāta svastibhiḥ sadā naḥ ||

7.070.01a ā viśvavārāśvinā gataṃ naḥ pra tat sthānam avāci vām pṛthivyām |
 7.070.01c aśvo na vājī śunapṛṣṭho asthād ā yat sedathur dhruvase na yonim ||
 7.070.02a siṣakti sā vām sumatis canisṭhātāpi gharmo manuṣo durone |
 7.070.02c yo vām samudrān saritaḥ piparty etagvā cin na suyujā yujānaḥ ||
 7.070.03a yāni sthānāny aśvinā dadhāthe divo yahviṣv oṣadhīṣu vikṣu |
 7.070.03c ni parvatasya mūrdhani sadanteṣaṃ janāya dāsūṣe vahantā ||
 7.070.04a canisṭaṃ devā oṣadhīṣv apsu yad yogyā aśnavaithe ṛṣiṇām |
 7.070.04c purūṇi ratnā dadhatau ny asme anu pūrvāṇi cakhyathur yugāni ||
 7.070.05a śuśruvāṃsā cid aśvinā purūṇy abhi brahmāṇi cakṣāthe ṛṣiṇām |
 7.070.05c prati pra yātaṃ varam ā janāyāsme vām astu sumatis canisṭhā ||
 7.070.06a yo vām yajño nāsatyā haviṣmān kṛtabrahmā samaryo bhavāti |
 7.070.06c upa pra yātaṃ varam ā vasiṣṭham imā brahmāṇy ṛcyante yuvabhyām ||
 7.070.07a iyam manīṣā iyam aśvinā gīr imāṃ suvṛktiṃ vṛṣaṇā juṣethām |
 7.070.07c imā brahmāṇi yuvayūny agman yūyam pāta svastibhiḥ sadā naḥ ||

7.071.01a apa svasur uṣaso nag jihite riṇakti kṛṣṇīr aruṣāya panthām |
 7.071.01c aśvāmaghā gomaghā vām huvema divā naktam śarum asmad yuyotam ||
 7.071.02a upāyātaṃ dāsūṣe martyāya rathena vāmam aśvinā vahantā |
 7.071.02c yuyutam asmad anirām amivām divā naktam mādhvī trāsīthām naḥ ||
 7.071.03a ā vām ratham avamasyām vyuṣṭau sumnāyavo vṛṣaṇo vartayantu |
 7.071.03c syūmagabhastim ṛtayugbhir aśvair āśvinā vasumantaṃ vahethām ||
 7.071.04a yo vām ratho nṛpatī asti voḍhā trivandhuro vasumāṃ usrayāmā |
 7.071.04c ā na enā nāsatyopa yātam abhi yad vām viśvapsnyo jigāti ||
 7.071.05a yuvaṃ cyavānaṃ jaraso 'mumuktaṃ ni pedava ūhathur āsum aśvam |
 7.071.05c nir aṃhasas tamasa spartam atrim ni jāhuṣaṃ śithire dhātam antaḥ ||
 7.071.06a iyam manīṣā iyam aśvinā gīr imāṃ suvṛktiṃ vṛṣaṇā juṣethām |
 7.071.06c imā brahmāṇi yuvayūny agman yūyam pāta svastibhiḥ sadā naḥ ||

7.072.01a ā gomatā nāsatyā rathenāśvāvatā puruścandreṇa yātam |
 7.072.01c abhi vām viśvā niyutaḥ sacante spārhayā śriyā tanvā śubhānā ||
 7.072.02a ā no devebhir upa yātam arvāk sajoṣasā nāsatyā rathena |
 7.072.02c yuvor hi naḥ sakhyā pitryāṇi samāno bandhur uta tasya vittam ||
 7.072.03a ud u stomāso aśvinor abudhrañ jāmi brahmāṇy uṣasaś ca devīḥ |
 7.072.03c āvivāsan rodasī dhiṣṇyeme achā vipro nāsatyā vivakti ||
 7.072.04a vi ced uchanty aśvinā uṣāsaḥ pra vām brahmāṇi kāravo bharante |
 7.072.04c ūrdhvam bhānum savitā devo aśred bṛhad agnayaḥ samidhā jarante ||
 7.072.05a ā paścātān nāsatyā purastād āśvinā yātam adharād udaktāt |
 7.072.05c ā viśvataḥ pāñcajanyaena rāyā yūyam pāta svastibhiḥ sadā naḥ ||

7.073.01a atāriṣma tamasas pāram asya prati stomam devayanto dadhānāḥ |
 7.073.01c purudamsā purutamā purājāmartyā havate aśvinā gīḥ ||
 7.073.02a ny u priyo manuṣaḥ sādi hotā nāsatyā yo yajate vandate ca |
 7.073.02c aśnītam madhvo aśvinā upāka ā vām voce vidatheṣu prayasvān ||
 7.073.03a ahema yajñam pathām urānā imām suvṛkṭim vṛṣaṇā juṣethām |
 7.073.03c śruṣṭīveva preṣito vām abodhi prati stomair jaramāṇo vasiṣṭhaḥ ||
 7.073.04a upa tyā vahnī gamato viśam no rakṣohaṇā sambhṛtā vīdupāṇī |
 7.073.04c sam andhāṃsy agmata matsarāṇi mā no mardhiṣṭam ā gatam śivena ||
 7.073.05a ā paścātān nāsatyā purastād āśvinā yātam adharād udaktāt |
 7.073.05c ā viśvataḥ pāñcajanyaena rāyā yūyam pāta svastibhiḥ sadā naḥ ||

7.074.01a imā u vām diviṣṭaya usrā havante aśvinā |
 7.074.01c ayaṃ vām ahve 'vase śacīvasū viśam-viśam hi gachathaḥ ||
 7.074.02a yuvaṃ citraṃ dadathur bhojanaṃ narā codethām sūnṛtāvate |
 7.074.02c arvāg ratham samanāsā ni yachatam pibatam somyam madhu ||
 7.074.03a ā yātam upa bhūṣatam madhvaḥ pibatam aśvinā |
 7.074.03c dugdham payo vṛṣaṇā jenyāvasū mā no mardhiṣṭam ā gatam ||
 7.074.04a aśvāso ye vām upa dāsuṣo gṛham yuvām dīyanti bibhrataḥ |
 7.074.04c makṣūyubhir narā hayebhir aśvinā devā yātam asmayū ||
 7.074.05a adhā ha yanto aśvinā pṛkṣaḥ sacanta sūrayaḥ |
 7.074.05c tā yaṃsato maghavadbhyo dhruvaṃ yaśas chardir asmabhyam nāsatyā ||
 7.074.06a pra ye yayur avṛkāso rathā iva nṛpātāro janānām |
 7.074.06c uta svena śavasā śūsuvur nara uta kṣiyanti sukṣitim ||

7.075.01a vy uṣā āvo divijā ṛtenāviṣkṛṇvānā mahimānam āgāt |
 7.075.01c apa druhas tama āvar ajuṣṭam aṅgirastamā pathyā ajīgaḥ ||
 7.075.02a mahe no adya suvitāya bodhy uṣo mahe saubhagāya pra yandhi |
 7.075.02c citraṃ rayim yaśasaṃ dhehy asme devi marteṣu mānuṣi śravasyum ||
 7.075.03a ete tye bhānavo darśatāyās citrā uṣaso amṛtāsa āguḥ |
 7.075.03c janayanto daivyāni vratāny āpṛṇanto antarikṣā vy asthuḥ ||
 7.075.04a eṣā syā yujānā parākāt pañca kṣitiḥ pari sadyo jigāti |
 7.075.04c abhipāśyantī vayunā janānām divo duhitā bhuvanasya patnī ||
 7.075.05a vājīnivatī sūryasya yoṣā citrāmaghā rāya īse vasūnām |
 7.075.05c ṛṣiṣṭutā jarayantī maghony uṣā uchatī vahnibhir gṛṇānā ||
 7.075.06a prati dyutānām aruṣāso aśvās citrā adṛśrann uṣasaṃ vahantaḥ |
 7.075.06c yāti śubhrā viśvapiśā rathena dadhāti ratnam vidhate janāya ||
 7.075.07a satyā satyebhir mahatī mahadbhir devī devebhir yajatā yajatraiḥ |
 7.075.07c rujad dṛdhāni dadad usriyānām prati gāva uṣasaṃ vāvaśanta ||
 7.075.08a nū no gomad vīravad dhehi ratnam uṣo aśvāvad purubhojo asme |
 7.075.08c mā no barhiḥ puruṣatā nide kar yūyam pāta svastibhiḥ sadā naḥ ||

7.076.01a ud u jyotir amṛtam viśvajanyaṃ viśvānaraḥ savitā devo aśret |
 7.076.01c kratvā devānām ajaniṣṭa cakṣur āvir akar bhuvanaṃ viśvam uṣāḥ ||
 7.076.02a pra me panthā devayānā adṛśrann amardhanto vasubhir iṣkṛtāsaḥ |

7.076.02c abhūd u ketur uṣasaḥ purastāt prāṭicy āgād adhi harmyebhyaḥ ||
 7.076.03a tānīd ahāni bahulāny āsan yā prācīnam uditā sūryasya |
 7.076.03c yataḥ pari jāra ivācaranty uṣo dadṛkṣe na punar yatīva ||
 7.076.04a ta id devānām sadhamāda āsann ṛtāvānaḥ kavayaḥ pūrvyāsaḥ |
 7.076.04c gūḍham jyotiḥ pitaro anv avindan satyamantrā ajanayann uṣāsam ||
 7.076.05a samāna ūrve adhi saṃgatāsaḥ saṃ jānate na yatante mithas te |
 7.076.05c te devānām na minanti vratāny amardhanto vasubhir yādamānāḥ ||
 7.076.06a prati tvā stomair īdate vasiṣṭhā uṣarbudhaḥ subhage tuṣṭuvāmsaḥ |
 7.076.06c gavām netrī vājapatnī na uchoṣaḥ sujāte prathamā jarasva ||
 7.076.07a eṣā netrī rādhasaḥ sūnṛtānām uṣā uchantī ribhyate vasiṣṭhaiḥ |
 7.076.07c dīrghaśrutam rayim asme dadhānā yūyam pāta svastibhiḥ sadā naḥ ||

7.077.01a upo ruruce yuvatir na yoṣā viśvam jīvam prasuvantī carāyai |
 7.077.01c abhūd agniḥ samidhe mānuṣāṇām akar jyotir bādhamānā tamāmsi ||
 7.077.02a viśvam prācī saprathā ud asthād ruśad vāso bibhratī śukram aśvait |
 7.077.02c hiraṇyavarnā sudṛśīkasaṃdṛg gavām mātā netry ahnām aroci ||
 7.077.03a devānām cakṣuḥ subhagā vahantī śvetam nayantī sudṛśīkam aśvam |
 7.077.03c uṣā adarśī raśmibhir vyaktā citrāmaghā viśvam anu prabhūtā ||
 7.077.04a antivāmā dūre amitram uchorvīm gavyūtim abhayaṃ kṛdhī naḥ |
 7.077.04c yāvaya dveṣa ā bhārā vasūni codaya rādho gṛṇate maghoni ||
 7.077.05a asme śreṣṭhebhīr bhānubhir vi bhāhy uṣo devi pratirantī na āyuḥ |
 7.077.05c iṣam ca no dadhatī viśvavāre gomad aśvāvad rathavac ca rādhaḥ ||
 7.077.06a yām tvā divo duhitar vardhayanty uṣaḥ sujāte matibhir vasiṣṭhāḥ |
 7.077.06c sāsmaṣu dhā rayim ṛṣvam bṛhantaṃ yūyam pāta svastibhiḥ sadā naḥ ||

7.078.01a prati ketavaḥ prathamā adṛśrann ūrdhvā asyā añjayo vi śrayante |
 7.078.01c uṣo arvācā bṛhatā rathena jyotiṣmatā vāmam asmabhyam vakṣi ||
 7.078.02a prati śīm agnir jarate samiddhaḥ prati viprāso matibhir gṛṇantaḥ |
 7.078.02c uṣā yāti jyotiṣā bādhamānā viśvā tamāmsi dūrītāpa devī ||
 7.078.03a etā u tyāḥ praty adṛśran purastāj jyotir yachantīr uṣaso vibhātīḥ |
 7.078.03c ajījanan sūryam yajñam agnim apācīnam tamo agād ajuṣtam ||
 7.078.04a aceti divo duhitā maghoni viśve paśyanty uṣasam vibhātīm |
 7.078.04c āsthād ratham svadhayā yujyamānam ā yam aśvāsaḥ suyujō vahanti ||
 7.078.05a prati tvādya sumanaso budhantāsmākāso maghavāno vayam ca |
 7.078.05c tilvilāyadhvam uṣaso vibhātīr yūyam pāta svastibhiḥ sadā naḥ ||

7.079.01a vy uṣā āvaḥ pathyā janānām pañca kṣitīr mānuṣīr bodhayantī |
 7.079.01c susaṃdṛgbhir ukṣabhir bhānum aśred vi sūryo rodasī cakṣasāvaḥ ||
 7.079.02a vy añjate divo anteṣv aktūn viśo na yuktā uṣaso yatante |
 7.079.02c saṃ te gāvas tama ā vartayanti jyotir yachanti saviteva bāhū ||
 7.079.03a abhūd uṣā indratamā maghony ajījanat suvitāya śravāmsi |
 7.079.03c vi divo devī duhitā dadhāty āngirastamā sukṛte vasūni ||
 7.079.04a tāvad uṣo rādho asmabhyam rāsva yāvat stotṛbhyo arado gṛṇānā |
 7.079.04c yām tvā jajñur vṛṣabhasyā raveṇa vi dṛḍhasya duro adrer auroḥ ||
 7.079.05a devam-devam rādhasē codayanty asmadryak sūnṛtā irayantī |
 7.079.05c vyuchantī naḥ sanaye dhiyo dhā yūyam pāta svastibhiḥ sadā naḥ ||

7.080.01a prati stomebhir uṣasaṃ vasiṣṭhā gīrbhir viprāsaḥ prathamā abudhran |
 7.080.01c vivartayantīm rajasī samante āviṣkṛṇvatīm bhuvanāni viśvā ||
 7.080.02a eṣā syā navyam āyur dadhānā gūḍhvī tamo jyotiṣoṣā abodhi |
 7.080.02c agra eti yuvatir ahrayānā prācikitat sūryaṃ yajñam agnim ||
 7.080.03a aśvāvatir gomatir na uṣāso vīravatiḥ sadam uchantu bhadraḥ |
 7.080.03c ghṛtaṃ duhānā viśvataḥ prapītā yūyam pāta svastibhiḥ sadā naḥ ||

7.081.01a praty u adarśy āyaty uchantī duhitā divaḥ |
 7.081.01c apo mahi vyayati cakṣase tamo jyotiṣ kṛṇoti sūnarī ||
 7.081.02a ud usriyāḥ sṛjate sūryaḥ sacāṃ udyan nakṣatram arcivat |
 7.081.02c taved uṣo vyuṣi sūryasya ca sam bhaktena gamemahi ||
 7.081.03a prati tvā duhitar diva uṣo jirā abhutsmahi |
 7.081.03c yā vahasi puru spārhaṃ vananvati ratnaṃ na dāśuṣe mayaḥ ||
 7.081.04a uchantī yā kṛṇoṣi maṃhanā mahi prakhyai devi svar dṛṣe |
 7.081.04c tasyās te ratnabhāja īmahe vyaṃ syāma mātur na sūnavaḥ ||
 7.081.05a tac citraṃ rādha ā bharoṣo yad dīrghaśruttamam |
 7.081.05c yat te divo duhitar martabhōjanam tad rāsva bhunajāmahai ||
 7.081.06a śravaḥ sūribhyo amṛtaṃ vasutvanam vājāṃ asmabhyam gomataḥ |
 7.081.06c codayitrī maghonaḥ sūnṛtāvaty uṣā uchad apa sridhaḥ ||

7.082.01a indrāvaruṇā yuvam adhvarāya no viśe janāya mahi śarma yachatam |
 7.082.01c dīrghaprayajyum ati yo vanuṣyati vyaṃ jayema pṛtanāsu dūḍhyaḥ ||
 7.082.02a samrāḍ anyaḥ svarāḍ anya ucyate vām mahāntāv indrāvaruṇā mahāvasū |
 7.082.02c viśve devāsaḥ parame vyomani saṃ vām ojo vṛṣaṇā sam balaṃ dadhuḥ ||
 7.082.03a anv apāṃ khāny atṛntam ojasā sūryam airayataṃ divi prabhum |
 7.082.03c indrāvaruṇā made asya māyino 'pinvatam apitaḥ pinvataṃ dhiyaḥ ||
 7.082.04a yuvām id yutsu pṛtanāsu vahnayo yuvāṃ kṣemasya prasave mitajñavaḥ |
 7.082.04c īsānā vasva ubhayasya kārava indrāvaruṇā suhavā havāmahe ||
 7.082.05a indrāvaruṇā yad imāni cakrathur viśvā jātāni bhuvanasya majmanā |
 7.082.05c kṣemeṇa mitro varuṇam duvasyati marudbhir ugraḥ śubham anya iyate ||
 7.082.06a mahe śulkāya varuṇasya nu tviṣa ojo mimāte dhruvam asya yat svam |
 7.082.06c ajāmim anyaḥ śnathayantam ātirad dabhrebhir anyaḥ pra vṛṇoti bhūyasaḥ ||
 7.082.07a na tam aṃho na duritāni martyam indrāvaruṇā na tapaḥ kutaś cana |
 7.082.07c yasya devā gachatho vitho adhvaraṃ na tam martasya naśate parihvṛtiḥ ||
 7.082.08a arvān narā daivyenāvasā gataṃ śṛṇutam havam yadi me jujoṣathaḥ |
 7.082.08c yuvor hi sakhyam uta vā yad āpyam mārḍīkam indrāvaruṇā ni yachatam ||
 7.082.09a asmākam indrāvaruṇā bhare-bhare puroyodhā bhavataṃ kṛṣṭyojasā |
 7.082.09c yad vām havanta ubhaye adha spṛdhi naras tokasya tanayasya sātīṣu ||
 7.082.10a asme indro varuṇo mitro aryamā dyumnam ychantu mahi śarma saprathaḥ |
 7.082.10c avadhram jyotir aditer ṛtāvṛdho devasya ślokaṃ savitur manāmahe ||

7.083.01a yuvāṃ narā paśyamānāsa āpyam prācā gavyantaḥ pṛthuparśavo yayuḥ |
 7.083.01c dāsā ca vṛtrā hatam āryāni ca sudāsam indrāvaruṇāvasāvataṃ ||
 7.083.02a yatrā naraḥ samayante kṛtadhvajo yasminn ājā bhavati kiṃ cana priyam |

7.083.02c yatrā bhayante bhuvanā swardṛśas tatrā na indrāvaruṇādhi vocatam ||
 7.083.03a sam bhūmyā antā dhvasirā adṛkṣatendrāvaruṇā divi ghoṣa āruhat |
 7.083.03c asthur janānām upa mām arātayo 'rvāg avasā havanaśrutā gatam ||
 7.083.04a indrāvaruṇā vadhanābhir aprati bhedaṃ vanvantā pra sudāsam āvatam |
 7.083.04c brahmāny eṣāṃ śṛṇutam havīmani satyā tṛtsūnām abhavat purohitiḥ ||
 7.083.05a indrāvaruṇāv abhy ā tapanti māghāny aryo vanuṣām arātayaḥ |
 7.083.05c yuvaṃ hi vasva ubhayasya rājatho 'dha smā no 'vatam pārye divi ||
 7.083.06a yuvāṃ havanta ubhayāsa ājiṣv indraṃ ca vasvo varuṇaṃ ca sātaye |
 7.083.06c yatra rājābhir daśābhir nibādhitam pra sudāsam āvatam tṛtsubhiḥ saha ||
 7.083.07a daśa rājānaḥ samitā ayajyavaḥ sudāsam indrāvaruṇā na yuyudhuḥ |
 7.083.07c satyā nṛṇām admasadām upastutir devā eṣāṃ abhavan devahūtiṣu ||
 7.083.08a dāśarājñe pariyattāya viśvataḥ sudāsa indrāvaruṇāv aśikṣatam |
 7.083.08c śvityaṅco yatra namasā kapardino dhiyā dhivanto asapanta tṛtsavaḥ ||
 7.083.09a vṛtrāny anyāḥ samitheṣu jighnate vratāny anyo abhi rakṣate sadā |
 7.083.09c havāmahe vāṃ vṛṣaṇā suvṛktibhir asme indrāvaruṇā śarma yachatam ||
 7.083.10a asme indro varuṇo mitro aryamā dyumnaṃ yachantu mahi śarma saprathaḥ |
 7.083.10c avadhraṃ jyotir aditer ṛtāvṛdho devasya ślokaṃ savitur manāmahe ||

7.084.01a ā vāṃ rājānāv adhvare vavṛtyāṃ havyebhir indrāvaruṇā namobhiḥ |
 7.084.01c pra vāṃ ghṛtāci bāhvor dadhānā pari tmanā viṣurūpā jigāti ||
 7.084.02a yuvo rāṣṭram bṛhad invati dyaur yau setṛbhir arajjubhiḥ sinīthaḥ |
 7.084.02c pari no heḍo varuṇasya vṛjyā uruṃ na indraḥ kṛṇavad ulokam ||
 7.084.03a kṛtam no yajñam vidatheṣu cāruṃ kṛtam brahmāṇi sūriṣu praśastā |
 7.084.03c upo rayir devajūto na etu pra ṇa spārhābhir ūtibhis tiretam ||
 7.084.04a asme indrāvaruṇā viśvavāram rayiṃ dhattam vasumantam purukṣum |
 7.084.04c pra ya ādityo anṛtā mināty amitā śūro dayate vasūni ||
 7.084.05a iyam indraṃ varuṇam aṣṭa me gīḥ prāvat toke tanaye tūtujānā |
 7.084.05c suratnāso devavītiṃ gamema yūyam pāta svastibhiḥ sadā naḥ ||

7.085.01a puniṣe vāṃ arakṣasam manīṣāṃ somam indrāya varuṇāya juhvat |
 7.085.01c ghṛtapratikām uśasaṃ na devīm tā no yāmann uruṣyatām abhīke ||
 7.085.02a spardhante vā u devahūye atra yeṣu dhvajeṣu didyavaḥ patanti |
 7.085.02c yuvaṃ tāṃ indrāvaruṇāv amitṛān hatam parācaḥ śarvā viṣūcaḥ ||
 7.085.03a āpās cid dhi svayaśasaḥ sadassu devīr indraṃ varuṇam devatā dhuḥ |
 7.085.03c kṛṣṭīr anyo dhārayati praviktā vṛtrāny anyo apratini hanti ||
 7.085.04a sa sukratur ṛtacid astu hotā ya āditya śavasā vāṃ namasvān |
 7.085.04c āvavartad avase vāṃ haviṣmān asad it sa suvitāya prayasvān ||
 7.085.05a iyam indraṃ varuṇam aṣṭa me gīḥ prāvat toke tanaye tūtujānā |
 7.085.05c suratnāso devavītiṃ gamema yūyam pāta svastibhiḥ sadā naḥ ||

7.086.01a dhīrā tv asya mahinā janūṃṣi vi yas tastambha rodasī cid urvī |
 7.086.01c pra nākam ṛṣvaṃ nunude bṛhantaṃ dvitā nakṣatram paprathac ca bhūma ||
 7.086.02a uta svayā tanvā saṃ vade tat kadā nv antar varuṇe bhuvāni |
 7.086.02c kim me havyam ahr̥ṇāno juṣeta kadā mṛḍīkaṃ sumanā abhi khyam ||
 7.086.03a pṛche tad eno varuṇa didṛkṣūpo emi cikitūṣo vipṛcham |
 7.086.03c samānam in me kavayaś cid āhur ayaṃ ha tubhyaṃ varuṇo hr̥ṇīte ||

7.086.04a kim āga āsa varuṇa jyeṣṭham yat stotāraṃ jighāmsasi sakhāyam |
 7.086.04c pra tan me voco dūḍabha svadhāvo 'va tvānenā namasā tura iyām ||
 7.086.05a ava drugdhāni pitryā srjā no 'va yā vyaṃ cakrām tanūbhiḥ |
 7.086.05c ava rājan paśutrpam na tāyūṃ srjā vatsam na dāmno vasiṣṭham ||
 7.086.06a na sa svo dakṣo varuṇa dhruṭiḥ sā surā manyur vibhīdako acittiḥ |
 7.086.06c asti jyāyān kaniyasa upāre svapnaś caned anṛtasya prayotā ||
 7.086.07a araṃ dāso na mīdhuṣe karāṇy ahaṃ devāya bhūrṇaye 'nāgāḥ |
 7.086.07c acetayad acito devo aryo gr̥tsam rāye kavitaro junāti ||
 7.086.08a ayaṃ su tubhyaṃ varuṇa svadhāvo hr̥di stoma upaśritaś cid astu |
 7.086.08c śam naḥ kṣeme śam u yoge no astu yūyam pāta svastibhiḥ sadā naḥ ||

7.087.01a radat patho varuṇaḥ sūryāya prārṇāṃsi samudriyā nadinām |
 7.087.01c sargo na sr̥ṣṭo arvatīr ṛtāyañ cakāra mahīr avanīr ahabhyaḥ ||
 7.087.02a ātmā te vāto raja ā navīnot paśur na bhūrṇir yavase sasavān |
 7.087.02c antar mahī bṛhatī rodasīme viśvā te dhāma varuṇa priyāni ||
 7.087.03a pari spaśo varuṇasya smadiṣṭā ubhe paśyanti rodasī sumeke |
 7.087.03c ṛtāvānaḥ kavayo yajñadhīrāḥ pracetaso ya iṣayanta manma ||
 7.087.04a uvāca me varuṇo medhirāya triḥ sapta nāmāghnyā bibharti |
 7.087.04c vidvān padasya guhyā na vocad yugāya vipra uparāya śikṣan ||
 7.087.05a tisro dyāvo nihitā antar asmin tisro bhūmīr uparāḥ ṣaḍvidhānāḥ |
 7.087.05c gr̥tsō rājā varuṇaś cakra etaṃ divi preṅkham hiraṇyayaṃ śubhe kam ||
 7.087.06a ava sindhuṃ varuṇo dyaur iva sthād drapso na śveto mṛgas tuviṣmān |
 7.087.06c gambhīraśamso rajaso vimānaḥ supārakṣatraḥ sato asya rājā ||
 7.087.07a yo mṛḍayāti cakruṣe cid āgo vyaṃ syāma varuṇe anāgāḥ |
 7.087.07c anu vratāny aditer ṛdhanto yūyam pāta svastibhiḥ sadā naḥ ||

7.088.01a pra śundhyuvaṃ varuṇāya preṣṭhām matim vasiṣṭha mīdhuṣe bharasva |
 7.088.01c ya īm arvāñcaṃ karate yajatraṃ sahasrāmagham vṛṣaṇam bṛhantam ||
 7.088.02a adhā nv asya samdṛśam jaganvān agner anīkam varuṇasya maṃsi |
 7.088.02c svar yad aśmann adhipā u andho 'bhi mā vapur dṛśaye ninīyāt ||
 7.088.03a ā yad ruhāva varuṇaś ca nāvam pra yat samudram irayāva madhyam |
 7.088.03c adhi yad apām snubhiś carāva pra preṅkha īnkhayāvahai śubhe kam ||
 7.088.04a vasiṣṭham ha varuṇo nāvy ādhād ṛṣim cakāra svapā mahobhiḥ |
 7.088.04c stotāraṃ vipraḥ sudinatve ahnām yān nu dyāvas tatanan yād uśāsaḥ ||
 7.088.05a kva tyāni nau sakhyā babhūvuḥ sacāvahe yad avṛkam purā cit |
 7.088.05c bṛhantam mānam varuṇa svadhāvaḥ sahasradvāraṃ jagamā gr̥ham te ||
 7.088.06a ya āpir nityo varuṇa priyaḥ san tvām āgāṃsi kṛṇavat sakhā te |
 7.088.06c mā ta enasvanto yakṣin bhujema yandhi śmā vipra stuvate varūtham ||
 7.088.07a dhruvāsu tvāsu kṣitiṣu kṣiyanto vy asmat pāsam varuṇo mumocat |
 7.088.07c avo vanvānā aditer upasthād yūyam pāta svastibhiḥ sadā naḥ ||

7.089.01a mo ṣu varuṇa mṛnmayaṃ gr̥ham rājann ahaṃ gamam |
 7.089.01c mṛḍā sukṣatra mṛḍaya ||
 7.089.02a yad emi prasphurann iva dṛtir na dhātō adrivaḥ |
 7.089.02c mṛḍā sukṣatra mṛḍaya ||
 7.089.03a kratvaḥ samaha dīnatā pratīpaṃ jagamā śuce |

7.089.03c mṛḍā sukṣatra mṛḍaya ||
 7.089.04a apām madhye tasthivāmsam tṛṣṇāvidaj jaritāram |
 7.089.04c mṛḍā sukṣatra mṛḍaya ||
 7.089.05a yat kiṃ cedam varuṇa daivye jane 'bhidroham manuṣyās carāmasi |
 7.089.05c acitti yat tava dharmā yuyopima mā nas tasmād enaso deva rīriṣaḥ ||

7.090.01a pra vīrayā śucayo dadrire vām adhvaryubhir madhumantaḥ sutāsaḥ |
 7.090.01c vaha vāyo niyuto yāhy achā pibā sutasyāndhaso madāya ||
 7.090.02a īśānāya prahutiṃ yas ta ānaḥ chuciṃ somam śucipās tubhyaṃ vāyo |
 7.090.02c kṛṇoṣi tam martyeṣu praśastam jāto-jāto jāyate vāy asya ||
 7.090.03a rāye nu yaṃ jajñatū rodasīme rāye devī dhiṣaṇā dhāti devam |
 7.090.03c adha vāyuṃ niyutaḥ saścata svā uta śvetaṃ vasudhitiṃ nireke ||
 7.090.04a uchann uṣasaḥ sudinā aripṛā uru jyotir vividur dīdhyānāḥ |
 7.090.04c gavyaṃ cid ūrvam uśijo vi vavrus teṣām anu pradivaḥ sasrur āpaḥ ||
 7.090.05a te satyena manasā dīdhyānāḥ svena yuktāsaḥ kratunā vahanti |
 7.090.05c indravāyū vīravāhaṃ rathaṃ vām īśānāyor abhi pṛkṣaḥ sacante ||
 7.090.06a īśānāso ye dadhate svar ṇo gobhir aśvebhir vasubhir hiraṇyaiḥ |
 7.090.06c indravāyū sūrayo viśvam āyur arvadbhir vīraiḥ pṛtanāsu sahyuḥ ||
 7.090.07a arvanto na śravaso bhikṣamāṇā indravāyū suṣṭutibhir vasiṣṭhāḥ |
 7.090.07c vājayantaḥ sv avase huvema yūyam pāta svastibhiḥ sadā naḥ ||

7.091.01a kuvid aṅga namasā ye vṛdhāsaḥ purā devā anavadyāsa āsan |
 7.091.01c te vāyave manave bādhitāyāvāsayann uṣasaṃ sūryeṇa ||
 7.091.02a uśantā dūtā na dabhāya gopā māsaś ca pāthaḥ śaradaś ca pūrvīḥ |
 7.091.02c indravāyū suṣṭutir vām iyānā mārḍikam iṭṭe suvitam ca navyam ||
 7.091.03a pīvoannāṃ rayivṛdhaḥ sumedhāḥ śvetaḥ siṣakti niyutām abhiśrīḥ |
 7.091.03c te vāyave samanaso vi tasthur viśven naraḥ svapatyāni cakruḥ ||
 7.091.04a yāvat taras tanvo yāvad ojo yāvan naraś cakṣasā dīdhyānāḥ |
 7.091.04c śuciṃ somam śucipā pātam asme indravāyū sadatam barhir edam ||
 7.091.05a niyuvānā niyuta spārhavirā indravāyū saratham yātam arvāk |
 7.091.05c idam hi vām prabhṛtam madhvo agram adha pṛiṇānā vi mumuktam asme ||
 7.091.06a yā vām śatam niyuto yāḥ sahasram indravāyū viśvavārāḥ sacante |
 7.091.06c ābhir yātam suvidatrābhir arvāk pātam narā pratibhṛtasya madhvaḥ ||
 7.091.07a arvanto na śravaso bhikṣamāṇā indravāyū suṣṭutibhir vasiṣṭhāḥ |
 7.091.07c vājayantaḥ sv avase huvema yūyam pāta svastibhiḥ sadā naḥ ||

7.092.01a ā vāyo bhūṣa śucipā upa naḥ sahasram te niyuto viśvavāra |
 7.092.01c upo te andho madyam ayāmi yasya deva dadhiṣe pūrvapeyam ||
 7.092.02a pra sotā jīro adhvareshv asthāt somam indrāya vāyave pibadhyai |
 7.092.02c pra yad vām madhvo agriyam bharanty adhvaryavo devayantaḥ śacibhiḥ ||
 7.092.03a pra yābhir yāsi dāśvāmsam achā niyudbhir vāyav iṣṭaye duroṇe |
 7.092.03c ni no rayiṃ subhojasam yuvasva ni vīram gavyam aśvyam ca rādhaḥ ||
 7.092.04a ye vāyava indramādanāsa ādevāso nitośanāso aryaḥ |
 7.092.04c ghnanto vṛtrāni sūribhiḥ ṣyāma sāsahvāmsa yudhā nṛbhir amitrān ||
 7.092.05a ā no niyudbhiḥ śatinibhir adhvaraṃ sahasriṇibhir upa yāhi yajñam |
 7.092.05c vāyo asmin savane mādayasva yūyam pāta svastibhiḥ sadā naḥ ||

7.093.01a śucim nu stomam navajātam adyendrāgnī vṛtrahaṇā juṣethām |
 7.093.01c ubhā hi vām suhavā johavīmi tā vājam sadya usate dheṣṭhā ||
 7.093.02a tā sānasī śavasānā hi bhūtam sākaṃvṛdhā śavasā śūsuvāmsā |
 7.093.02c kṣayantau rāyo yavasasya bhūreḥ pṛṅktaṃ vājasya sthavirusya ghr̥ṣveḥ ||
 7.093.03a upo ha yad vidathaṃ vājino gur dhībhir viprāḥ pramatim ichamānāḥ |
 7.093.03c arvanto na kāṣṭhām nakṣamāṇā indrāgnī johuvato naras te ||
 7.093.04a gīrbhir vipraḥ pramatim ichamāna itte rayim yaśasam pūrvabhājam |
 7.093.04c indrāgnī vṛtrahaṇā suvajrā pra no navyebhis tirataṃ deṣṇaiḥ ||
 7.093.05a sam yan mahī mithatī spardhamāne tanūrucā śūrasātā yataite |
 7.093.05c adevayum vidathe devayubhiḥ satrā hataṃ somasutā janena ||
 7.093.06a imām u ṣu somasutim upa na endrāgnī saumanasāya yātam |
 7.093.06c nū cid dhi parimamnāthe asmān ā vām śasvadbhir vavṛtiya vājaiḥ ||
 7.093.07a so agna enā namasā samiddho 'chā mitraṃ varuṇam indraṃ voceḥ |
 7.093.07c yat sīm āgās cakrāmā tat su mṛḍa tad aryamāditiḥ śīsrathantu ||
 7.093.08a etā agna āśuṣāṇāsa iṣṭir yuvoḥ sacābhy aśyāma vājān |
 7.093.08c mendro no viṣṇur marutaḥ pari khyan yūyam pāta svastibhiḥ sadā naḥ ||

7.094.01a iyam vām asya manmana indrāgnī pūrvyastutiḥ |
 7.094.01c abhrād vṛṣṭir ivājani ||
 7.094.02a śṛṅgutaṃ jaritur havam indrāgnī vanataṃ giraḥ |
 7.094.02c īśānā pipyataṃ dhiyaḥ ||
 7.094.03a mā pāpatvāya no narendrāgnī mābhiśastaye |
 7.094.03c mā no rīradhataṃ nide ||
 7.094.04a indre agnā namo bṛhat suvṛktim erayāmahe |
 7.094.04c dhiyā dhenā avasyavaḥ ||
 7.094.05a tā hi śasvanta īdata itthā viprāsa ūtaye |
 7.094.05c sabādho vājasātaye ||
 7.094.06a tā vām gīrbhir vipanyavaḥ prayasvanto havāmahe |
 7.094.06c medhasātā saniṣyavaḥ ||
 7.094.07a indrāgnī avasā gatam asmabhyam carṣaṇīśahā |
 7.094.07c mā no duḥśamsa īśata ||
 7.094.08a mā kasya no araruṣo dhūrṭiḥ praṇaṇ martyasya |
 7.094.08c indrāgnī śarma yachatam ||
 7.094.09a gomad dhiranyavad vasu yad vām aśvāvad imahe |
 7.094.09c indrāgnī tad vanemahi ||
 7.094.10a yat soma ā sute nara indrāgnī ajohavuḥ |
 7.094.10c saptivantā saparyavaḥ ||
 7.094.11a ukthebhir vṛtrahantamā yā mandānā cid ā girā |
 7.094.11c āngūṣair āvivāsataḥ ||
 7.094.12a tāv id duḥśamsam martyam durvidvāmsam rakṣasvinam |
 7.094.12c ābhogaṃ hanmanā hatam udadhiṃ hanmanā hatam ||

7.095.01a pra kṣodasā dhāyasā sakra eṣā sarasvatī dharuṇam āyasī pūḥ |
 7.095.01c prabābadhānā rathyeva yāti viśvā apo mahinā sindhur anyāḥ ||
 7.095.02a ekācetat sarasvatī nadinām śucir yatī giribhya ā samudrāt |

7.095.02c rāyaś cetantī bhuvanasya bhūrer ghṛtam payo duduhe nāhuṣāya ||
 7.095.03a sa vāvṛdhe naryo yoṣaṇāsu vṛṣā śīśur vṛṣabho yajñiyāsu |
 7.095.03c sa vājinam maghavadbhyo dadhāti vi sātaye tanvam māmṛjita ||
 7.095.04a uta syā naḥ sarasvatī juṣānopa śravat subhagā yajñe asmin |
 7.095.04c mitajñubhir namasyair iyānā rāyā yujā cid uttarā sakhibhyaḥ ||
 7.095.05a imā juhvānā yuṣmad ā namobhiḥ prati stomam sarasvati juṣasva |
 7.095.05c tava śarman priyatame dadhānā upa stheyāma śaraṇam na vṛkṣam ||
 7.095.06a ayam u te sarasvati vasiṣṭho dvārāv ṛtasya subhage vy āvaḥ |
 7.095.06c vardha śubhre stuvate rāsi vājān yūyam pāta svastibhiḥ sadā naḥ ||

7.096.01a bṛhad u gāyīṣe vaco 'suryā nadinām |
 7.096.01c sarasvatīm in mahayā suvṛktibhi stomair vasiṣṭha rodasī ||
 7.096.02a ubhe yat te mahinā śubhre andhasī adhikṣiyanti pūravaḥ |
 7.096.02c sā no bodhy avitrī marutsakhā coda rādho maghonām ||
 7.096.03a bhadrām id bhadrā kṛṇavat sarasvaty akavārī cetati vājinivati |
 7.096.03c gṛṇānā jamadagnivat stuvānā ca vasiṣṭhavat ||
 7.096.04a janīyanto nv agravaḥ putriyantaḥ sudānavaḥ |
 7.096.04c sarasvantaḥ havāmahe ||
 7.096.05a ye te sarasva ūrmayo madhumanto ghṛtaścutaḥ |
 7.096.05c tebhir no 'vitā bhava ||
 7.096.06a pīpivāmsam sarasvata stanaḥ yo viśvadarśataḥ |
 7.096.06c bhakṣīmahi prajāḥ iṣam ||

7.097.01a yajñe divo nṛṣadane pṛthivyā naro yatra devayavo madanti |
 7.097.01c indrāya yatra savanāni sunve gaman madāya prathamam vayas ca ||
 7.097.02a ā daivyā vṛṇīmahe 'vāmsi bṛhaspatir no maha ā sakhāyaḥ |
 7.097.02c yathā bhavema mīdhuṣe anāgā yo no dātā parāvataḥ piteva ||
 7.097.03a tam u jyeṣṭham namasā havirbhiḥ suśevam brahmaṇas patim gṛṇīṣe |
 7.097.03c indram śloko mahi daivyaḥ siṣaktu yo brahmaṇo devakṛtasya rājā ||
 7.097.04a sa ā no yoniḥ sadatu preṣṭho bṛhaspatir viśvavāro yo asti |
 7.097.04c kāmō rāyaḥ suvīryasya tam dāt parṣan no ati saścato ariṣṭān ||
 7.097.05a tam ā no arkam amṛtāya juṣtam ime dhāsura amṛtāsaḥ purājāḥ |
 7.097.05c śucikrandam yajatam pastyānām bṛhaspatim anarvāṇam huvema ||
 7.097.06a tam śagmāso aruṣāso aśvā bṛhaspatim sahvāho vahanti |
 7.097.06c sahaś cid yasya nīlavat sadhastham nabho na rūpam aruṣam vasānāḥ ||
 7.097.07a sa hi śuciḥ śatapatraḥ sa śundhyur hiraṇyavāśir iṣiraḥ svarṣāḥ |
 7.097.07c bṛhaspatiḥ sa svāveśa ṛṣvaḥ purū sakhibhya āsutim kariṣṭhaḥ ||
 7.097.08a devī devasya rodasī janitrī bṛhaspatim vāvṛdhatur mahitvā |
 7.097.08c dakṣāyyāya dakṣatā sakhāyaḥ karad brahmaṇe sutarā sugādhā ||
 7.097.09a iyam vām brahmaṇas pate suvṛktir brahmendrāya vajriṇe akāri |
 7.097.09c aviṣṭam dhiyo jigṛtam puraṇdhīr jajastam aryo vanuṣam arātīḥ ||
 7.097.10a bṛhaspate yuvam indraś ca vasvo divyasyeśāthe uta pārthivasya |
 7.097.10c dhattam rayim stuvate kiraye cid yūyam pāta svastibhiḥ sadā naḥ ||

7.098.01a adhvaryavo 'ruṇam dugdham amṣum juhotaṇa vṛṣabhāya kṣitīnām |
 7.098.01c gaurād vediyāṃ avapānam indro viśvāhed yāti sutasomam ichan ||

7.098.02a yad dadhiṣe pradivi cārv annaṃ dive-dive pītim id asya vakṣi |
 7.098.02c uta hṛdota manasā juṣāṇa usann indra prasthitān pāhi somān ||
 7.098.03a jajñānaḥ somam sahase papātha pra te mātā mahimānam uvāca |
 7.098.03c endra paprāthorv antarikṣam yudhā devebhyo varivaś cakartha ||
 7.098.04a yad yodhayā mahato manyamānān sāksāma tān bāhubhiḥ śāsādānān |
 7.098.04c yad vā nṛbhir vṛta indrābhiyudhyās taṃ tvayājim sauśravasaṃ jayema ||
 7.098.05a prendrasya vocam prathamā kṛtāni pra nūtanā maghavā yā cakāra |
 7.098.05c yaded adevīr asahiṣṭa mājā athābhavat kevalaḥ somo asya ||
 7.098.06a tavedaṃ viśvam abhitaḥ paśavyaṃ yat paśyasi cakṣasā sūryasya |
 7.098.06c gavām asi gopatir eka indra bhakṣimahi te prayatasya vasvaḥ ||
 7.098.07a bṛhaspate yuvam indraś ca vasvo divyasyeśāthe uta pārthivasya |
 7.098.07c dhattaṃ rayim stuvate kiraye cid yūyam pāta svastibhiḥ sadā naḥ ||

7.099.01a paro mātrayā tanvā vṛdhāna na te mahitvam anv aśnuvanti |
 7.099.01c ubhe te vidma rajasī pṛthivyā viṣṇo deva tvam paramasya vitse ||
 7.099.02a na te viṣṇo jāyamāno na jāto deva mahimnaḥ param antam āpa |
 7.099.02c ud astabhnā nākam ṛṣvam bṛhantaṃ dādhartha prācīm kakubham pṛthivyāḥ ||
 7.099.03a irāvati dhenumatī hi bhūtaṃ sūyavasiniṃ manuse daśasyā |
 7.099.03c vy astabhnā rodasi viṣṇav ete dādhartha pṛthivīm abhito mayūkhaiḥ ||
 7.099.04a uruṃ yajñāya cakrathur ulokaṃ janayantā sūryam uśāsam agnim |
 7.099.04c dāsasya cid vṛṣaśiprasya mājā jaghnathur narā pṛtanājyeṣu ||
 7.099.05a indrāviṣṇū dṛmhitāḥ śambarasya nava puro navatiṃ ca śnathiṣṭam |
 7.099.05c śataṃ varcinaḥ sahasraṃ ca sākam hatho apraty asurasya vīrān ||
 7.099.06a iyam manīṣā bṛhatī bṛhantorukramā tavasā vardhayanti |
 7.099.06c rare vām stomaṃ vidatheṣu viṣṇo pinvatam iṣo vṛjaneṣv indra ||
 7.099.07a vaṣaṭ te viṣṇav āsa ā kṛṇomi tan me juṣasva śipiviṣṭa havyam |
 7.099.07c vardhantu tvā suṣṭutayo giro me yūyam pāta svastibhiḥ sadā naḥ ||

7.100.01a nū marto dayate saniṣyan yo viṣṇava urugāyāya dāsat |
 7.100.01c pra yaḥ satrācā manasā yajāta etāvantaṃ naryam āvivāsāt ||
 7.100.02a tvam viṣṇo sumatiṃ viśvajanyām aprayutām evayāvo matim dāḥ |
 7.100.02c parco yathā naḥ suvitasya bhūrer aśvāvataḥ puruścandrasya rāyaḥ ||
 7.100.03a trir devaḥ pṛthivīm eṣa etāṃ vi cakrame śatarcasam mahitvā |
 7.100.03c pra viṣṇur astu tavasas taviyān tveṣam hy asya sthavirusya nāma ||
 7.100.04a vi cakrame pṛthivīm eṣa etāṃ kṣetrāya viṣṇur manuse daśasyan |
 7.100.04c dhruvāso asya kirayo janāsa urukṣitiṃ sujanimā cakāra ||
 7.100.05a pra tat te adya śipiviṣṭa nāmāryaḥ śamsāmi vayunāni vidvān |
 7.100.05c taṃ tvā gṛṇāmi tavasam atavyān kṣayantam asya rajasaḥ parāke ||
 7.100.06a kim it te viṣṇo paricakṣyam bhūt pra yad vavakṣe śipiviṣṭo asmi |
 7.100.06c mā varpo asmad apa gūha etad yad anyarūpaḥ samithe babhūtha ||
 7.100.07a vaṣaṭ te viṣṇav āsa ā kṛṇomi tan me juṣasva śipiviṣṭa havyam |
 7.100.07c vardhantu tvā suṣṭutayo giro me yūyam pāta svastibhiḥ sadā naḥ ||

7.101.01a tisro vācaḥ pra vada jyotiragrā yā etad duhre madhudogham ūdhaḥ |
 7.101.01c sa vatsam kṛṇvan garbham ośadhīnām sadyo jāto vṛṣabho roravīti ||
 7.101.02a yo vardhana ośadhīnām yo apām yo viśvasya jagato deva īse |

7.101.02c sa tridhātu śaraṇaṃ śarma yaṃsat trivartu jyotiḥ svabhiṣṭy asme ||
 7.101.03a starīr u tvad bhavati sūta u tvad yathāvaśaṃ tanvaṃ cakra eṣaḥ |
 7.101.03c pituḥ payaḥ prati gṛbhṇāti mātā tena pitā vardhate tena putraḥ ||
 7.101.04a yasmin viśvāni bhuvanāni tasthus tisro dyāvas tredhā sasrur āpaḥ |
 7.101.04c trayāḥ kośāsa upasecanāso madhva ścotanty abhito virapśam ||
 7.101.05a idaṃ vacaḥ parjanyaāya svarāje hṛdo astv antaraṃ taj juṣat |
 7.101.05c mayobhuvo vṛṣṭayaḥ santv asme supippalā ośadhīr devagopāḥ ||
 7.101.06a sa retodhā vṛṣabhaḥ śaśvatīnāṃ tasmīn ātmā jagatas tasthuśaś ca |
 7.101.06c tan ma ṛtam pātu śataśāradāya yūyam pāta svastibhiḥ sadā naḥ ||

7.102.01a parjanyaāya pra gāyata divas putrāya mīdhuṣe |
 7.102.01c sa no yavasam ichatu ||
 7.102.02a yo garbham ośadhīnāṃ gavāṃ kṛṇoty arvatām |
 7.102.02c parjanyaḥ puruṣīnām ||
 7.102.03a tasmā id āsye havir juhotā madhumattamam |
 7.102.03c iḍāṃ naḥ saṃyatam karat ||

7.103.01a saṃvatsaram śaśayānā brāhmaṇā vratacāriṇaḥ |
 7.103.01c vācam parjanyaajinvitām pra maṇḍūkā avādiṣuḥ ||
 7.103.02a divyā āpo abhi yad enam āyan dṛtiṃ na śuśkaṃ sarasī śayānam |
 7.103.02c gavām aha na māyur vatsinīnām maṇḍūkānām vagnur atrā sam eti ||
 7.103.03a yad īm enāṃś uśato abhy avarṣit tṛṣyāvataḥ prāvṛṣy āgatāyām |
 7.103.03c akhkhaliḥkṛtyā pitaram na putro anyo anyam upa vadantam eti ||
 7.103.04a anyo anyam anu gṛbhṇāty enor apām prasarge yad amandiṣātām |
 7.103.04c maṇḍūko yad abhivṛṣṭaḥ kaniṣkan pṛśniḥ samprīkte haritena vācam ||
 7.103.05a yad eṣām anyo anyasya vācam śāktasyeva vadati śikṣamāṇaḥ |
 7.103.05c sarvaṃ tad eṣām samṛdheva parva yat suvāco vadathanādhy apsu ||
 7.103.06a gomāyur eko ajamāyur ekaḥ pṛśnir eko harita eka eṣām |
 7.103.06c samānam nāma bibhrato virūpāḥ purutrā vācam pipiśur vadantaḥ ||
 7.103.07a brāhmaṇāso atirātre na some saro na pūrṇam abhito vadantaḥ |
 7.103.07c saṃvatsarasya tad ahaḥ pari ṣṭha yan maṇḍūkāḥ prāvṛṣiṇam babhūva ||
 7.103.08a brāhmaṇāsaḥ somino vācam akrata brahma kṛṇvantaḥ parivatsariṇam |
 7.103.08c adhvaryavo gharīṇaḥ siṣvidānā āvir bhavanti guhyā na ke cit ||
 7.103.09a devahitiṃ jugupur dvādaśasya ṛtuṃ naro na pra minanty ete |
 7.103.09c saṃvatsare prāvṛṣy āgatāyām taptā gharmā aśnuvate visargam ||
 7.103.10a gomāyur adād ajamāyur adāt pṛśnir adād dharito no vasūni |
 7.103.10c gavām maṇḍūkā dadataḥ śatāni sahasrasāve pra tiranta āyuh ||

7.104.01a indrāsomā tapatam rakṣa ubjatam ny arpayatam vṛṣaṇā tamovṛdhaḥ |
 7.104.01c parā śṛṇitam acito ny ośatam hataṃ nudethām ni śiśitam atrīṇaḥ ||
 7.104.02a indrāsomā sam aghaśamsam abhy agham tapur yayastu carur agnivāṃś iva |
 7.104.02c brahmadviṣe kravyāde ghoracakṣase dveṣo dhattam anavāyam kimīdine ||
 7.104.03a indrāsomā duṣkṛto vavre antar anārambhāṇe tamasi pra vidhyatam |
 7.104.03c yathā nātaḥ punar ekaś canodayat tad vām astu sahase manyumac chavaḥ ||
 7.104.04a indrāsomā vartayatam divo vadham sam pṛthivyā aghaśamsāya tarhaṇam |
 7.104.04c ut takṣatam svaryam parvatebhyo yena rakṣo vāvṛdhānam nijūrvathaḥ ||

- 7.104.05a indrāsomā vartayataṃ divas pary agnitaptebhir yuvam aśmahanmabhiḥ |
7.104.05c tapurvadhebhīr ajarebhīr atrīṇo ni parśāne vidhyataṃ yantu nisvaram ||
7.104.06a indrāsomā pari vām bhūtu viśvata iyam matiḥ kakṣyāśveva vājinā |
7.104.06c yāṃ vāṃ hotrām parihinomi medhayemā brahmāṇi nṛpativa jinvatam ||
7.104.07a prati smarethām tujayadbhir evair hataṃ druho rakṣaso bhaṅgurāvataḥ |
7.104.07c indrāsomā duṣkrte mā sugam bhūd yo naḥ kadā cid abhidāsati druhā ||
7.104.08a yo mā pākena manasā carantam abhicaṣṭe anṛtebhīr vacobhiḥ |
7.104.08c āpa iva kāśinā samgr̥bhītā asann astv āsata indra vaktā ||
7.104.09a ye pākaśamsaṃ viharanta evair ye vā bhadraṃ dūṣayanti svadhābhiḥ |
7.104.09c ahaye vā tān pradadātu soma ā vā dadhātu nirṛter upasthe ||
7.104.10a yo no rasam dipsati pitvo agne yo aśvānām yo gavām yas tanūnām |
7.104.10c ripu stena steyakṛd dabhram etu ni ṣa hīyatām tanvā tanā ca ||
7.104.11a paraḥ so astu tanvā tanā ca tisraḥ pṛthivīr adho astu viśvāḥ |
7.104.11c prati śuśyatu yaśo asya devā yo no divā dipsati yaś ca naktam ||
7.104.12a suvijñānaṃ cikitūṣe janāya sac cāsac ca vacasī paspṛdhāte |
7.104.12c tayor yat satyaṃ yatarad ṛjīyas tad it somo 'vati hanty āsat ||
7.104.13a na vā u somo vṛjinam hinoti na kṣatriyam mithuyā dhārayantam |
7.104.13c hanti rakṣo hanty āsad vadantam ubhāv indrasya prasitau śayāte ||
7.104.14a yadi vāham anṛtadeva āsa mogham vā devāṃ apyūhe agne |
7.104.14c kim asmabhyam jātavedo hr̥ṇiṣe droghavācas te nirṛtham sacantām ||
7.104.15a adyā muriya yadi yātudhāno asmi yadi vāyus tatapa pūruṣasya |
7.104.15c adhā sa vīrair daśabhir vi yūyā yo mā mogham yātudhānety āha ||
7.104.16a yo māyātum yātudhānety āha yo vā rakṣāḥ śucir asmīty āha |
7.104.16c indras taṃ hantu mahatā vadhena viśvasya jantor adhamas padīṣṭa ||
7.104.17a pra yā jigāti khargaleva naktam apa druhā tanvam gūhamānā |
7.104.17c vavrāṃ anantāṃ ava sā padīṣṭa grāvāṇo ghnantu rakṣasa upabdaiḥ ||
7.104.18a vi tiṣṭhadhvam maruto vikṣv ichata gr̥bhāyata rakṣasaḥ sam pinaṣṭana |
7.104.18c vayo ye bhūtvī patayanti naktabhir ye vā ripo dadhire deve adhvare ||
7.104.19a pra vartaya divo aśmānam indra somaśitam maghavan sam śiśādhi |
7.104.19c prāktād apāktād adharād udaktād abhi jahi rakṣasaḥ parvatena ||
7.104.20a eta u tye patayanti śvayātava indraṃ dipsanti dipsavo 'dābhyam |
7.104.20c śiśīte śakraḥ piśunebhyo vadham nūnam sṛjad aśaniṃ yātumadbhyaḥ ||
7.104.21a indro yātūnām abhavat parāśaro havirmathīnām abhy āvivāsatām |
7.104.21c abhīd u śakraḥ paraśur yathā vanam pātreva bhindan sata eti rakṣasaḥ ||
7.104.22a ulūkayātum śuśulūkayātum jahi śvayātum uta kokayātum |
7.104.22c suparṇayātum uta gr̥dhrayātum dṛṣadeva pra mṛṇa rakṣa indra ||
7.104.23a mā no rakṣo abhi naḥ yātumāvatām apochatu mithunā yā kimīdinā |
7.104.23c pṛthivī naḥ pāṛthivāt pātv aṃhaso 'ntarikṣam divyāt pātv asmān ||
7.104.24a indra jahi pumāmsam yātudhānam uta striyam māyayā śāśadānām |
7.104.24c vigrīvāso mūrādevā ṛdantu mā te dṛśan sūryam uccarantam ||
7.104.25a prati cakṣva vi cakṣvendras ca soma jāgṛtam |
7.104.25c rakṣobhyo vadham asyatam aśaniṃ yātumadbhyaḥ ||

8. Mandala

- 8.001.01a mā cid anyad vi śaṃsata sakhāyo mā riṣaṇyata |
8.001.01c indram it stotā vṛṣaṇaṃ sacā sute muhur ukthā ca śaṃsata ||
8.001.02a avakrakṣiṇaṃ vṛṣabhaṃ yathājuraṃ gāṃ na carṣaṇīsaḥam |
8.001.02c vidveṣaṇaṃ saṃvnananobhayaṃkaram maṃhiṣṭham ubhayāvinam ||
8.001.03a yac cid dhi tvā janā ime nānā havanta ūtaye |
8.001.03c asmākam brahma idam indra bhūtu te 'hā viśvā ca vardhanam ||
8.001.04a vi tartūryante maghavan vipaścito aryo vipo janānām |
8.001.04c upa kramasva pururūpam ā bhara vājaṃ nediṣṭham ūtaye ||
8.001.05a mahe cana tvām adrivaḥ parā śulkāya deyaṃ |
8.001.05c na sahasrāya nāyutāya vajrivo na śatāya śatāmagha ||
8.001.06a vasyāṃ indrāsi me pitur uta bhrātur abhuñjataḥ |
8.001.06c mātā ca me chadayathaḥ samā vaso vasutvanāya rādhasē ||
8.001.07a kveyatha kved asi purutrā cid dhi te manaḥ |
8.001.07c alarṣi yudhma khajakṛt puraṃdara pra gāyatrā agāsiṣuḥ ||
8.001.08a prāsmāi gāyatrām arcata vāvātur yaḥ puraṃdaraḥ |
8.001.08c yābhiḥ kāṇvasyopa barhir āsadaṃ yāsad vajrī bhinat puraḥ ||
8.001.09a ye te santi daśagvinaḥ śatino ye sahasriṇaḥ |
8.001.09c aśvāso ye te vṛṣaṇo raghudruvas tebhīr nas tūyam ā gahi ||
8.001.10a ā tv adya sabardughāṃ huve gāyatravepasam |
8.001.10c indraṃ dhenuṃ sudughāṃ anyām iṣam urudhārām araṃkṛtam ||
8.001.11a yat tudat sūra etaśaṃ vaṅkū vātasya parṇinā |
8.001.11c vahat kutsam ārjuneyaṃ śatakraṭuḥ tsarad gandharvam aśṛtam ||
8.001.12a ya ṛte cid abhiśriṣaḥ purā jatrubhya āṛdaḥ |
8.001.12c saṃdhātā saṃdhim maghavā purūvasur iṣkartā vihṛutam punaḥ ||
8.001.13a mā bhūma niṣṭyā ivendra tvad araṇā iva |
8.001.13c vanāni na prajahitāny adrivo duroṣāso amanmahi ||
8.001.14a amanmahīd anāśavo 'nuḡrāsaś ca vṛtrahan |
8.001.14c sakṛt su te mahatā sūra rādhasā anu stomam mudimahi ||
8.001.15a yadi stomam mama śraṇad asmākam indram indavaḥ |
8.001.15c tiraḥ pavitraṃ sasṛvāṃsa āśavo mandantu tugryāvṛdhaḥ ||
8.001.16a ā tv adya sadhastutiṃ vāvātuḥ sakhyur ā gahi |
8.001.16c upastutir maghonām pra tvāvātva adhā te vaśmi suṣṭutim ||
8.001.17a sotā hi somam adribhir em enam apsu dhāvata |
8.001.17c gavyā vastreva vāsayaṇta in naro nir dhuḡṣan vakṣaṇābhyaḥ ||
8.001.18a adha jmo adha vā divo bṛhato rocanād adhi |
8.001.18c ayā vardhasva tanvā girā mamā jātā sukrato pṛṇa ||
8.001.19a indrāya su madintamaṃ somam sotā vareṇyam |
8.001.19c śakra eṇam pīpayad viśvayā dhiyā hinvānaṃ na vājayum ||
8.001.20a mā tvā somasya galdayā sadā yācann ahaṃ girā |
8.001.20c bhūrṇim mṛgaṃ na savaneṣu cukrudhaṃ ka īśānaṃ na yāciṣat ||
8.001.21a madeneṣitam madam ugram ugreṇa śavasā |
8.001.21c viśveṣāṃ tarūtāram madacyutam made hi śmā dadāti naḥ ||
8.001.22a śevāre vāryā puru devo martāya dāsuṣe |
8.001.22c sa sunvate ca stuvate ca rāsate viśvagūrto ariṣṭutaḥ ||
8.001.23a endra yāhi matsva citreṇa deva rādhasā |

8.001.23c sarō na prāsy udaram sapītibhir ā somebhir uru sphiram ||
 8.001.24a ā tvā sahasram ā śatam yuktā rathe hiraṇyaye |
 8.001.24c brahmayujo haraya indra keśino vahantu somapītaye ||
 8.001.25a ā tvā rathe hiraṇyaye harī mayūraśeṣyā |
 8.001.25c śitiprṣṭhā vahatām madhvo andhaso vivakṣaṇasya pītaye ||
 8.001.26a pibā tv asya girvaṇaḥ sutasya pūrvapā iva |
 8.001.26c pariṣkṛtasya rasina iyam āsutiś cārur madāya patyate ||
 8.001.27a ya eko asti daṁsanā mahāṁ ugro abhi vrataiḥ |
 8.001.27c gamat sa śiprī na sa yoṣad ā gamad dhavam na pari varjati ||
 8.001.28a tvam puram cariṣṇvam vadhaiḥ śuṣṇasya sam piṇak |
 8.001.28c tvam bhā anu caro adha dvitā yad indra havyo bhuvaḥ ||
 8.001.29a mama tvā sūra udite mama madhyaṁdine divaḥ |
 8.001.29c mama prapitve apiśarvare vasav ā stomāso avṛtsata ||
 8.001.30a stuhi stuhid ete ghā te maṁhiṣṭhāso maghonām |
 8.001.30c ninditāśvaḥ prapathī paramajyā maghasya medhyātithe ||
 8.001.31a ā yad aśvān vananvataḥ śraddhayāham rathe ruham |
 8.001.31c uta vāmasya vasunaś ciketati yo asti yādvaḥ paśuḥ ||
 8.001.32a ya ṛjṛā mahyam māmāhe saha tvacā hiraṇyayā |
 8.001.32c eṣa viśvāny abhy astu saubhagāsaṅgasya svanadrathaḥ ||
 8.001.33a adha plāyogir ati dāsad anyān āsaṅgo agne daśabhiḥ sahasraiḥ |
 8.001.33c adhokṣaṇo daśa mahyam ruśanto naḍā iva saraso nir atiṣṭhan ||
 8.001.34a anv asya sthūram dadṛṣe purastād anastha ūrur avarambamāṇaḥ |
 8.001.34c śaśvatī nāry abhicakṣyāha subhadram arya bhojanam bibharṣi ||

8.002.01a idam vaso sutam andhaḥ pibā supūrṇam udaram |
 8.002.01c anābhayin rarimā te ||
 8.002.02a nṛbhir dhūtaḥ suto aśnair avyo vāraiḥ paripūtaḥ |
 8.002.02c aśvo na nikto nadīṣu ||
 8.002.03a tam te yavam yathā gobhiḥ svādum akarma śrīṇantaḥ |
 8.002.03c indra tvāsmin sadhamāde ||
 8.002.04a indra it somapā eka indraḥ sutapā viśvāyuḥ |
 8.002.04c antar devān martyāṁś ca ||
 8.002.05a na yaṁ śukro na durāśir na tṛprā uruvyacasam |
 8.002.05c apasprṇvate suhārdam ||
 8.002.06a gobhir yad im anye asman mṛgam na vrā mṛgayante |
 8.002.06c abhitaranti dhenubhiḥ ||
 8.002.07a traya indrasya somāḥ sutāsaḥ santu devasya |
 8.002.07c sve kṣaye sutapāvnaḥ ||
 8.002.08a trayāḥ kośāsa ścotanti tisraś camvaḥ supūrṇaḥ |
 8.002.08c samāne adhi bhārman ||
 8.002.09a śucir asi puruniṣṭhāḥ kṣirair madhyata āśirtaḥ |
 8.002.09c dadhnā mandīṣṭhaḥ sūrasya ||
 8.002.10a ime ta indra somās tivrā asme sutāsaḥ |
 8.002.10c śukrā āśiram yācante ||
 8.002.11a tāṁ āśiram puroḍāśam indremaṁ somam śrīṇihi |
 8.002.11c revantaṁ hi tvā śṛṇomi ||
 8.002.12a hṛtsu pītāso yudhyante durmadāso na surāyām |
 8.002.12c ūdhar na nagnā jarante ||

- 8.002.13a revāṃ id revata stotā syāt tvāvato maghonaḥ |
8.002.13c pred u harivaḥ śrutasya ||
- 8.002.14a ukthaṃ cana śasyamānam agor arir ā ciketa |
8.002.14c na gāyatram gīyamānam ||
- 8.002.15a mā na indra pīyatnave mā śardhate parā dāḥ |
8.002.15c śikṣā śacīvaḥ śacībhiḥ ||
- 8.002.16a vayam u tvā tadidarthā indra tvāyantaḥ sakhāyaḥ |
8.002.16c kaṇvā ukthebhir jarante ||
- 8.002.17a na ghem anyad ā papana vajrinn apaso naviṣṭau |
8.002.17c taved u stomaṃ ciketa ||
- 8.002.18a ichanti devāḥ sunvantaṃ na svapnāya sprḥayanti |
8.002.18c yanti pramādam atandrāḥ ||
- 8.002.19a o ṣu pra yāhi vājebhir mā hṛṇīthā abhy asmān |
8.002.19c mahāṃ iva yuvajāniḥ ||
- 8.002.20a mo ṣv adya durhaṇāvān sāyaṃ karad āre asmat |
8.002.20c aśrīra iva jāmātā ||
- 8.002.21a vidmā hy asya vīrasya bhūridāvarīṃ sumatim |
8.002.21c triṣu jātasya manāṃsi ||
- 8.002.22a ā tū ṣiñca kaṇvamantaṃ na ghā vidma śavasānāt |
8.002.22c yaśastaram śatamūteḥ ||
- 8.002.23a jyeṣṭhena sotar indrāya somaṃ vīrāya śakrāya |
8.002.23c bharā piban naryāya ||
- 8.002.24a yo vediṣṭho avyathiṣv aśvāvantaṃ jaritṛbhyaḥ |
8.002.24c vājaṃ stotṛbhyo gomantaṃ ||
- 8.002.25a panyam-panyam it sotāra ā dhāvata madyāya |
8.002.25c somaṃ vīrāya sūrāya ||
- 8.002.26a pātā vṛtrahā sutam ā ghā gaman nāre asmat |
8.002.26c ni yamate śatamūtiḥ ||
- 8.002.27a eha harī brahmayujā śagmā vakṣataḥ sakhāyam |
8.002.27c gīrbhiḥ śrutaṃ girvaṇasam ||
- 8.002.28a svādavaḥ somā ā yāhi śrītāḥ somā ā yāhi |
8.002.28c śiprinn ṛṣivaḥ śacīvo nāyam achā sadhamādam ||
- 8.002.29a stutaś ca yās tvā vardhanti mahe rādhase nṛmṇāya |
8.002.29c indra kāriṇaṃ vṛdhantaḥ ||
- 8.002.30a giraś ca yās te girvāha ukthā ca tubhyaṃ tāni |
8.002.30c satrā dadhire śavāṃsi ||
- 8.002.31a eved eṣa tuvikūrmir vājāṃ eko vajrahastaḥ |
8.002.31c sanād amṛkto dayate ||
- 8.002.32a hantā vṛtram dakṣiṇenendraḥ purū puruhūtaḥ |
8.002.32c mahān mahībhiḥ śacībhiḥ ||
- 8.002.33a yasmin viśvās carṣaṇaya uta cyautnā jrayāṃsi ca |
8.002.33c anu ghen mandī maghonaḥ ||
- 8.002.34a eṣa etāni cakārendro viśvā yo 'ti ṣṛṇve |
8.002.34c vājadāvā maghonām ||
- 8.002.35a prabhartā rathaṃ gavyantam apākāc cid yam avati |
8.002.35c ino vasu sa hi voḍhā ||
- 8.002.36a sanitā vipro arvadbhir hantā vṛtram nṛbhiḥ sūraḥ |
8.002.36c satyo 'vitā vidhantam ||
- 8.002.37a yajadhvainam priyamedhā indram satrācā manasā |

- 8.002.37c yo bhūt somaiḥ satyamadvā ||
8.002.38a gāthaśravasaṃ satpatim śravaskāmam purutmānam |
8.002.38c kaṇvāso gāta vājinam ||
8.002.39a ya ṛte cid gās padebhyo dāt sakhā nṛbhyaḥ śacivān |
8.002.39c ye asmin kāmam aśriyan ||
8.002.40a itthā dhīvantam adrivaḥ kāṇvam medhyātithim |
8.002.40c meṣo bhūto 'bhi yann ayaḥ ||
8.002.41a śikṣā vibhindo asmaī catvāry ayutā dadat |
8.002.41c aṣṭā paraḥ sahasrā ||
8.002.42a uta su tye payovṛdhā mākī raṇasya napyā |
8.002.42c janitvanāya māmaha ||
- 8.003.01a pibā sutasya rasino matsvā na indra gomataḥ |
8.003.01c āpir no bodhi sadhamādyo vṛdhe 'smāñ avantu te dhiyaḥ ||
8.003.02a bhūyāma te sumatau vājino vayam mā na star abhimātaye |
8.003.02c asmāñ citrābhir avatād abhiṣṭibhir ā naḥ sumneṣu yāmaya ||
8.003.03a imā u tvā purūvaso giro vardhantu yā mama |
8.003.03c pāvakavarṇāḥ śucayo vipāścito 'bhi stomair anūṣata ||
8.003.04a ayaṃ sahasram ṛṣibhiḥ sahaskrtaḥ samudra iva paprathe |
8.003.04c satyaḥ so asya mahimā gṛṇe śavo yajñeṣu viprarājye ||
8.003.05a indram id devatātaya indram prayaty adhvare |
8.003.05c indram samīke vanino havāmaha indram dhanasya sātaye ||
8.003.06a indro mahnā rodasī paprathac chava indraḥ sūryam arocayat |
8.003.06c indre ha viśvā bhuvanāni yemira indre suvānāsa indavaḥ ||
8.003.07a abhi tvā pūrvapītaya indra stomebhir āyavaḥ |
8.003.07c samīcināsa ṛbhavaḥ sam asvaran rudrā gṛṇanta pūrvyam ||
8.003.08a asyed indro vāvṛdhe vṛṣṇyaṃ śavo made sutasya viṣṇavi |
8.003.08c adyā tam asya mahimānam āyavo 'nu ṣṭuvanti pūrvathā ||
8.003.09a tat tvā yāmi suvīryaṃ tad brahma pūrvacittaye |
8.003.09c yenā yatibhyo bhṛgave dhane hite yena praskaṇvam āvitha ||
8.003.10a yenā samudram asṛjo mahīr apas tad indra vṛṣṇi te śavaḥ |
8.003.10c sadyaḥ so asya mahimā na samnaṣe yaṃ kṣoṇīr anucakrade ||
8.003.11a śagdhi na indra yat tvā rayim yāmi suvīryam |
8.003.11c śagdhi vājāya prathamam siṣāsate śagdhi stomāya pūrvya ||
8.003.12a śagdhi no asya yad dha pauram āvitha dhiya indra siṣāsataḥ |
8.003.12c śagdhi yathā ruśamam śyāvakaṃ kṛpam indra prāvaḥ svarṇaram ||
8.003.13a kan navyo atasinām turo gṛṇīta martyaḥ |
8.003.13c nahī nv asya mahimānam indriyaṃ svar gṛṇanta ānaśuḥ ||
8.003.14a kad u stuvanta ṛtayanta devata ṛṣiḥ ko vipra ohate |
8.003.14c kadā havam maghavann indra sunvataḥ kad u stuvata ā gamaḥ ||
8.003.15a ud u tye madhumattamā gira stomāsa irate |
8.003.15c satrājito dhanasā akṣitotayo vājayanto rathā iva ||
8.003.16a kaṇvā iva bhṛgavaḥ sūryā iva viśvam id dhītam ānaśuḥ |
8.003.16c indram stomebhir mahayanta āyavaḥ priyamedhāso asvaran ||
8.003.17a yukṣvā hi vṛtrahantama harī indra parāvataḥ |
8.003.17c arvācīno maghavan somapītaya ugra ṛṣvebhir ā gahi ||
8.003.18a ime hi te kāravo vāvaśur dhiyā viprāso medhasātaye |
8.003.18c sa tvam no maghavann indra girvaṇo veno na śṛṇudhī havam ||

8.003.19a nir indra bṛhatībhyo vṛtram dhanubhyo asphuraḥ |
 8.003.19c nir arbudasya mṛgayasya māyino niḥ parvatasya gā ājaḥ ||
 8.003.20a nir agnayo rurucur nir u sūryo niḥ soma indriyo rasaḥ |
 8.003.20c nir antarikṣād adhamo mahām ahiṃ kṛṣe tad indra paumṣyam ||
 8.003.21a yam me dur indro marutaḥ pākasthāmā kaurayāṇaḥ |
 8.003.21c viśveṣām tmanā śobhiṣṭham upeva divi dhāvamānam ||
 8.003.22a rohitam me pākasthāmā sudhuraṃ kakṣyaprām |
 8.003.22c adād rāyo vibodhanam ||
 8.003.23a yasmā anye daśa prati dhuraṃ vahanti vahnayaḥ |
 8.003.23c astaṃ vayo na tugryam ||
 8.003.24a ātmā pitus tanūr vāsa ojadā abhyañjanam |
 8.003.24c turīyam id rohitasya pākasthāmānam bhojaṃ dātāram abravam ||

8.004.01a yad indra prāg apāg udañ nyag vā hūyase nṛbhiḥ |
 8.004.01c simā purū nṛṣūto asy ānave 'si praśardha turvaśe ||
 8.004.02a yad vā rume ruśame śyāvake kṛpa indra mādayase sacā |
 8.004.02c kaṇvāsas tvā brahmabhi stomavāhasa indrā yachanty ā gahi ||
 8.004.03a yathā gauro apā kṛtam tṛṣyann ety averiṇam |
 8.004.03c āpitve naḥ prapitve tūyam ā gahi kaṇveṣu su sacā piba ||
 8.004.04a mandantu tvā maghavann indrendavo rādhodeyāya sunvate |
 8.004.04c āmuṣyā somam apibaś camū sutam jyeṣṭham tad dadhiṣe sahaḥ ||
 8.004.05a pra cakre sahasā saho babhañja manyum ojasā |
 8.004.05c viśve ta indra aprtanāyavo yaho ni vṛkṣā iva yemire ||
 8.004.06a sahasreṇeva sacate yavīyudhā yas ta ānaḍ upastutim |
 8.004.06c putram prāvargam kṛṇute suvīrye dāśnoti namaūktibhiḥ ||
 8.004.07a mā bhema mā śramiṣma ugrasya sakhye tava |
 8.004.07c mahat te vṛṣṇo abhicakṣyam kṛtam paśyema turvaśam yadum ||
 8.004.08a savyām anu sphigyam vāvase vṛṣā na dāno asya roṣati |
 8.004.08c madhvā samprkṛtāḥ sārageṇa dhenavas tūyam ehi dravā piba ||
 8.004.09a aśvī rathī surūpa id gomāñ id indra te sakhā |
 8.004.09c śvātrabhājā vayasā sacate sadā candro yāti sabhām upa ||
 8.004.10a ṛsyo na tṛṣyann avapānam ā gahi pibā somam vaśāñ anu |
 8.004.10c nimeghamāno maghavan dive-diva ojiṣṭham dadhiṣe sahaḥ ||
 8.004.11a adhvaryo drāvayā tvaṃ somam indraḥ pipāsati |
 8.004.11c upa nūnam yuyuje vṛṣaṇā harī ā ca jagāma vṛtrahā ||
 8.004.12a svayam cit sa manyate dāśurir jano yatrā somasya tṛmpasi |
 8.004.12c idaṃ te annam yuyam samukṣitam tasyehi pra dravā piba ||
 8.004.13a ratheṣṭhāyādhvaryavaḥ somam indrāya sotana |
 8.004.13c adhi bradhnyādrayo vi cakṣate sunvanto dāśvadhvaram ||
 8.004.14a upa bradhnam vāvātā vṛṣaṇā harī indram apasu vakṣataḥ |
 8.004.14c arvāñcam tvā saptayo 'dhvaraśriyo vahantu savaned upa ||
 8.004.15a pra pūṣaṇam vṛṇīmahe yuyāya purūvasum |
 8.004.15c sa śakra śikṣa puruhūta no dhiyā tuje rāye vimocana ||
 8.004.16a sam naḥ śiśihi bhurijor iva kṣuram rāsva rāyo vimocana |
 8.004.16c tve tan naḥ suvedam usriyam vasu yaṃ tvaṃ hinoṣi martyam ||
 8.004.17a vemi tvā pūṣann ṛñjase vemi stotava āghṛṇe |
 8.004.17c na tasya vemy araṇam hi tad vaso stuṣe pajrāya sāmne ||
 8.004.18a parā gāvo yavasam kac cid āghṛṇe nityam rekṇo amartya |

8.004.18c asmākam pūṣann avitā śivo bhava mam̐hiṣṭho vājasātaye ||
 8.004.19a sthūraṃ rādhaḥ śatāśvam̐ kuruṅgasya diviṣṭiṣu |
 8.004.19c rājñas tveṣasya subhagasya rātiṣu turvaśeṣv amanmahi ||
 8.004.20a dhibhiḥ sātāni kāṅvasya vājinaḥ priyamedhair abhidubhiḥ |
 8.004.20c ṣaṣṭiṃ sahasrānu nirmajām aje nir yūthāni gavām ṛṣiḥ ||
 8.004.21a vṛkṣās cin me abhipitve arāraṇuḥ |
 8.004.21c gām bhajanta mehanāśvam bhajanta mehanā ||

8.005.01a dūrād iheva yat saty aruṇapsur aśiśvitat |
 8.005.01c vi bhānuṃ viśvadhātanat ||
 8.005.02a nṛvad dasrā manoyujā rathena pṛthupājasā |
 8.005.02c sacethe aśvinoṣasam ||
 8.005.03a yuvābhyām vājiniṅvasū prati stomā adṛkṣata |
 8.005.03c vācam̐ dūto yathohiṣe ||
 8.005.04a purupriyā ṇa ūtaye purumandrā purūvasū |
 8.005.04c stuṣe kaṅvāso aśvinā ||
 8.005.05a mam̐hiṣṭhā vājasātameṣayantā śubhas patī |
 8.005.05c gantārā dāśuṣo gṛham ||
 8.005.06a tā sudevāya dāśuṣe sumedhām avitāriṇīm |
 8.005.06c ghṛtair gavyūtim ukṣatam ||
 8.005.07a ā na stomam upa dravat tūyam̐ śyenebhir āsubhiḥ |
 8.005.07c yātam aśvebhir aśvinā ||
 8.005.08a yebhis tisraḥ parāvato divo viśvāni rocanā |
 8.005.08c trīṃr aktūn paridīyathaḥ ||
 8.005.09a uta no gomatīr iṣa uta sātīr aharvidā |
 8.005.09c vi pathaḥ sātaye sitam ||
 8.005.10a ā no gomantam aśvinā suvīraṃ suratham̐ rayim |
 8.005.10c voḍham aśvāvatīr iṣaḥ ||
 8.005.11a vāvṛdhānā śubhas patī dasrā hiraṇyavartanī |
 8.005.11c pibatam̐ somyam madhu ||
 8.005.12a asmabhyam̐ vājiniṅvasū maghavadbhyaś ca saprathaḥ |
 8.005.12c chardir yantam adābhyam ||
 8.005.13a ni ṣu brahma janānām̐ yāviṣṭam̐ tūyam̐ ā gatam |
 8.005.13c mo ṣv anyāṃ upāratam ||
 8.005.14a asya pibatam aśvinā yuvam madasya cāruṇaḥ |
 8.005.14c madhvo rātasya dhiṣṇyā ||
 8.005.15a asme ā vahatam̐ rayim̐ śatavantam̐ sahasriṇam |
 8.005.15c purukṣum̐ viśvadhāyasam ||
 8.005.16a purutrā cid dhi vām̐ narā vihvayante manīṣiṇaḥ |
 8.005.16c vāghadbhir aśvinā gatam ||
 8.005.17a janāso vṛkṭabarhiṣo haviṣmanto aram̐kṛtaḥ |
 8.005.17c yuvām̐ havante aśvinā ||
 8.005.18a asmākam adya vām̐ ayam̐ stomo vāhiṣṭho antamaḥ |
 8.005.18c yuvābhyām bhūtv aśvinā ||
 8.005.19a yo ha vām madhuno dṛtīr āhito rathacarṣaṇe |
 8.005.19c tataḥ pibatam aśvinā ||
 8.005.20a tena no vājiniṅvasū paśve tokāya śam̐ gave |
 8.005.20c vahatam pīvarīr iṣaḥ ||

8.005.21a uta no divyā iṣa uta sindhūṁr aharvidā |
 8.005.21c apa dvāreva varṣathaḥ ||
 8.005.22a kadā vāṁ taugryō vidhat samudre jahito narā |
 8.005.22c yad vāṁ ratho vibhiṣ patāt ||
 8.005.23a yuvaṁ kaṇvāya nāsatyā ṛpiriptāya harmye |
 8.005.23c śāsavad ūtīr daśasyathaḥ ||
 8.005.24a tābhir ā yātam ūtibhir navyasībhiḥ suśastibhiḥ |
 8.005.24c yad vāṁ vṛṣaṇvasū huve ||
 8.005.25a yathā cit kaṇvam āvatam priyamedham upastutam |
 8.005.25c atriṁ śiñjāram aśvinā ||
 8.005.26a yathota kṛtvye dhane 'ṁsum goṣv agastyam |
 8.005.26c yathā vājeṣu sobharim ||
 8.005.27a etāvad vāṁ vṛṣaṇvasū ato vā bhūyo aśvinā |
 8.005.27c gṛṇantaḥ sumnam īmahe ||
 8.005.28a rathaṁ hiraṇyavandhuraṁ hiraṇyābhīsum aśvinā |
 8.005.28c ā hi sthātho diviṣṛśam ||
 8.005.29a hiraṇyayī vāṁ rabhir iṣā akṣo hiraṇyayaḥ |
 8.005.29c ubhā cakrā hiraṇyayā ||
 8.005.30a tena no vājinīvasū parāvataś cid ā gatam |
 8.005.30c upemāṁ suṣṭutim mama ||
 8.005.31a ā vahethe parākāt pūrvīr aśnantāv aśvinā |
 8.005.31c iṣo dāsīr amartyā ||
 8.005.32a ā no dyumnair ā śravobhir ā rāyā yātam aśvinā |
 8.005.32c puruścandrā nāsatyā ||
 8.005.33a eha vāṁ pruṣitapsavo vayo vahantu parṇinaḥ |
 8.005.33c achā svadhvaraṁ janam ||
 8.005.34a rathaṁ vāṁ anugāyasaṁ ya iṣā vartate saha |
 8.005.34c na cakram abhi bād hate ||
 8.005.35a hiraṇyayena rathena dravatpāṇibhir aśvaiḥ |
 8.005.35c dhījavanā nāsatyā ||
 8.005.36a yuvam mṛgaṁ jāgṛvāṁsam svadatho vā vṛṣaṇvasū |
 8.005.36c tā naḥ pṛṅktam iṣā rayim ||
 8.005.37a tā me aśvinā sanīnāṁ vidyātaṁ navānām |
 8.005.37c yathā cic caidyāḥ kaśuḥ śatam uṣṭrānāṁ dadat sahasrā daśa gonām ||
 8.005.38a yo me hiraṇyasaṁdṛśo daśa rājño amaṇhata |
 8.005.38c adhaspadā ic caidyasya kṛṣṭayaś carmanā abhito janāḥ ||
 8.005.39a mākīr enā pathā gād yeneme yanti cedayaḥ |
 8.005.39c anyo net sūrīr ohate bhūridāvattaro janaḥ ||

8.006.01a mahāṁ indro ya ojasā parjanya vṛṣṭimāṁ iva |
 8.006.01c stomair vatsasya vāvṛdhe ||
 8.006.02a prajāṁ ṛtasya pīprataḥ pra yad bharanta vahnayaḥ |
 8.006.02c viprā ṛtasya vāhasā ||
 8.006.03a kaṇvā indraṁ yad akrata stomair yajñasya sādhanam |
 8.006.03c jāmi bruvata āyudham ||
 8.006.04a sam asya manyave viśo viśvā namanta kṛṣṭayaḥ |
 8.006.04c samudrāyeva sindhavaḥ ||
 8.006.05a ojas tad asya titviṣa ubhe yad samavartayat |

- 8.006.05c indraś carmeva rodasī ||
- 8.006.06a vi cid vṛtrasya dodhato vajreṇa śataparvaṇā |
- 8.006.06c śiro bibheda vṛṣṇinā ||
- 8.006.07a imā abhi pra ṇonumo vipām agreṣu dhītayaḥ |
- 8.006.07c agneḥ śocir na didyutaḥ ||
- 8.006.08a guhā satir upa tmanā pra yac chocanta dhītayaḥ |
- 8.006.08c kaṇvā ṛtasya dhārayā ||
- 8.006.09a pra tam indra naśīmahi rayiṃ gomantam aśvinam |
- 8.006.09c pra brahma pūrvacittaye ||
- 8.006.10a aham id dhi pituṣ pari medhām ṛtasya jagrabha |
- 8.006.10c ahaṃ sūrya ivājani ||
- 8.006.11a aham pratnena manmanā giraḥ śumbhāmi kaṇvavat |
- 8.006.11c yenendraḥ śuśmam id dadhe ||
- 8.006.12a ye tvām indra na tuṣṭuvur ṛṣayo ye ca tuṣṭuvuḥ |
- 8.006.12c mamed vardhasva suṣṭutaḥ ||
- 8.006.13a yad asya manyur adhvanīd vi vṛtram parvaśo rujan |
- 8.006.13c apaḥ samudram airayat ||
- 8.006.14a ni śuśṇa indra dharmasiṃ vajraṃ jaghantha dasyavi |
- 8.006.14c vṛṣā hy ugra śṛṇviṣe ||
- 8.006.15a na dyāva indram ojasā nāntariksāṇi vajriṇam |
- 8.006.15c na vivyacanta bhūmayaḥ ||
- 8.006.16a yas ta indra mahīr apa stabhūyamāna āśayat |
- 8.006.16c ni tam padyāsu śiśnathaḥ ||
- 8.006.17a ya ime rodasī mahī samīcī samajagrabhīt |
- 8.006.17c tamobhir indra taṃ guhaḥ ||
- 8.006.18a ya indra yatayas tvā bhṛgavo ye ca tuṣṭuvuḥ |
- 8.006.18c mamed ugra śrudhī havam ||
- 8.006.19a imās ta indra pṛṣṇayo ghr̥taṃ duhata āśiram |
- 8.006.19c enām ṛtasya pipyuṣiḥ ||
- 8.006.20a yā indra prasvas tvāsā garbham acakrīran |
- 8.006.20c pari dharme va sūryam ||
- 8.006.21a tvām ic chavasas pate kaṇvā ukthena vāvṛdhuḥ |
- 8.006.21c tvām sutāsa indavaḥ ||
- 8.006.22a taved indra praṇītiṣūta praśastir adri vaḥ |
- 8.006.22c yajño vitantasāyyaḥ ||
- 8.006.23a ā na indra mahīm iṣam puraṃ na darṣi gomatiṃ |
- 8.006.23c uta prajāṃ suvīryam ||
- 8.006.24a uta tyad āśvaśvyam yad indra nāhuṣiṣv ā |
- 8.006.24c agre vikṣu pradīdayat ||
- 8.006.25a abhi vrajaṃ na tatniṣe sūra upākacakṣasam |
- 8.006.25c yad indra mṛḍayāsi naḥ ||
- 8.006.26a yad aṅga taviṣīyasa indra prarājasi kṣitīḥ |
- 8.006.26c mahāṃ apāra ojasā ||
- 8.006.27a taṃ tvā haviṣmatīr viśa upa bruvata ūtaye |
- 8.006.27c urujrayasam indubhiḥ ||
- 8.006.28a upahvare giriṇām saṃgathe ca nadinām |
- 8.006.28c dhiyā vipro ajāyata ||
- 8.006.29a ataḥ samudram udvataś cikivāṃ ava paśyati |
- 8.006.29c yato vipāna ejati ||

8.006.30a ād it pratnasya retaso jyotiṣ paśyanti vāsaram |
 8.006.30c paro yad idhyate divā ||
 8.006.31a kaṇvāsa indra te matim viśve vardhanti paum̐syam |
 8.006.31c uto śaviṣṭha vṛṣṇyam ||
 8.006.32a imām ma indra suṣṭuṭim juṣasva pra su mām ava |
 8.006.32c uta pra vardhayā matim ||
 8.006.33a uta brahmaṇyā vyaṃ tubhyam pravṛddha vajrivaḥ |
 8.006.33c viprā atakṣma jīvase ||
 8.006.34a abhi kaṇvā anūṣatāpo na pravatā yatīḥ |
 8.006.34c indraṃ vananvatī matiḥ ||
 8.006.35a indraṃ ukthāni vāvṛdhuḥ samudram iva sindhavaḥ |
 8.006.35c anuttamanyum ajaram ||
 8.006.36a ā no yāhi parāvato haribhyāṃ haryatābhyāṃ |
 8.006.36c imam indra sutam piba ||
 8.006.37a tvām id vṛtrahantama janāso vṛktabarhiṣaḥ |
 8.006.37c havante vājasātaye ||
 8.006.38a anu tvā rodasī ubhe cakraṃ na varty etaśam |
 8.006.38c anu suvānāsa indavaḥ ||
 8.006.39a mandasvā su svarṇara utendra śaryaṇāvati |
 8.006.39c matsvā vivasvato matī ||
 8.006.40a vāvṛdhāna upa dyavi vṛṣā vajry aroravit |
 8.006.40c vṛtrahā somapātamaḥ ||
 8.006.41a ṛṣir hi pūrvajā asy eka īśāna ojasā |
 8.006.41c indra coṣkūyase vasu ||
 8.006.42a asmākaṃ tvā sutāṃ upa vītapṛṣṭhā abhi prayāḥ |
 8.006.42c śataṃ vahantu harayaḥ ||
 8.006.43a imāṃ su pūrvyāṃ dhiyam madhor ghṛtasya pipyuṣīm |
 8.006.43c kaṇvā ukthena vāvṛdhuḥ ||
 8.006.44a indraṃ id vimahinām medhe vṛṇīta martyaḥ |
 8.006.44c indraṃ saniṣyur ūtaye ||
 8.006.45a arvāñcaṃ tvā puruṣṭuta priyamedhastutā harī |
 8.006.45c somapeyāya vakṣataḥ ||
 8.006.46a śatam ahaṃ tirindire sahasram parśāv ā dade |
 8.006.46c rādhāṃsi yādvānām ||
 8.006.47a trīṇi śatāny arvatāṃ sahasrā daśa gonām |
 8.006.47c daduṣ pajrāya sāmne ||
 8.006.48a ud ānaṭ kakuhō divam uṣṭrāñ caturyujo dadat |
 8.006.48c śravasā yādvaṃ janam ||

8.007.01a pra yad vas triṣṭubham iṣam maruto vipro akṣarat |
 8.007.01c vi parvateṣu rājatha ||
 8.007.02a yad aṅga taviṣiyavo yāmaṃ śubhrā acidhvam |
 8.007.02c ni parvatā ahāsata ||
 8.007.03a ud īrayanta vāyubhir vāsrāsaḥ pṛṣnimātaraḥ |
 8.007.03c dhukṣanta pipyuṣīm iṣam ||
 8.007.04a vapanti maruto miham pra vepayanti parvatān |
 8.007.04c yad yāmaṃ yānti vāyubhiḥ ||
 8.007.05a ni yad yāmāya vo girir ni sindhavo vidharmaṇe |

- 8.007.05c mahe śuṣmāya yemire ||
8.007.06a yuṣmāṁ u naktam ūtaye yuṣmān divā havāmahe |
8.007.06c yuṣmān prayaty adhvare ||
8.007.07a ud u tye aruṇapsavaś citrā yāmebhir irate |
8.007.07c vāśrā adhi ṣṇunā divaḥ ||
8.007.08a sṛjanti raśmim ojasā panthāṁ sūryāya yātave |
8.007.08c te bhānubhir vi tasthire ||
8.007.09a imām me maruto giram imaṁ stomam ṛbhukṣaṇaḥ |
8.007.09c imam me vanatā havam ||
8.007.10a trīṇi sarāṁsi pṛṣṇayo duduhre vajriṇe madhu |
8.007.10c utsaṁ kavandham udriṇam ||
8.007.11a maruto yad dha vo divaḥ sumnāyanto havāmahe |
8.007.11c ā tū na upa gantana ||
8.007.12a yūyaṁ hi ṣṭhā sudānavo rudrā ṛbhukṣaṇo dame |
8.007.12c uta pracetaso made ||
8.007.13a ā no rayim madacyutam purukṣuṁ viśvadhāyasam |
8.007.13c iyartā maruto divaḥ ||
8.007.14a adhīva yad giriṇāṁ yāmaṁ śubhrā acidhvam |
8.007.14c suvānair mandadhva indubhiḥ ||
8.007.15a etāvataś cid eṣāṁ sumnam bhikṣeta martyaḥ |
8.007.15c adābhyasya manmabhiḥ ||
8.007.16a ye drapsā iva rodasī dhamanty anu vṛṣṭibhiḥ |
8.007.16c utsaṁ duhanto akṣitam ||
8.007.17a ud u svānebhir irata ud rathair ud u vāyubhiḥ |
8.007.17c ut stomaiḥ pṛṣṇimātaraḥ ||
8.007.18a yenāva turvaśaṁ yaduṁ yena kaṇvaṁ dhanasṛtam |
8.007.18c rāye su tasya dhīmahi ||
8.007.19a imā u vaḥ sudānavo ghṛtaṁ na pipyuṣir iṣaḥ |
8.007.19c vardhān kāṇvasya manmabhiḥ ||
8.007.20a kva nūnaṁ sudānavo madathā vṛktabarhiṣaḥ |
8.007.20c brahmā ko vaḥ saparyati ||
8.007.21a nahi śma yad dha vaḥ purā stomebhir vṛktabarhiṣaḥ |
8.007.21c śardhāṁ ṛtasya jinvatha ||
8.007.22a sam u tye mahatir apaḥ saṁ kṣoṇī sam u sūryam |
8.007.22c saṁ vajram parvaśo dadhuḥ ||
8.007.23a vi vṛtram parvaśo yayur vi parvatāṁ arājinaḥ |
8.007.23c cakrāṇā vṛṣṇi paṁsyam ||
8.007.24a anu tritasya yudhyataḥ śuṣmam āvann uta kratum |
8.007.24c anv indraṁ vṛtratūrye ||
8.007.25a vidyuddhastā abhidyavaḥ śiprāḥ śirṣan hiraṇyayīḥ |
8.007.25c śubhrā vy añjata śriye ||
8.007.26a uśanā yat parāvata ukṣṇo randhram ayātana |
8.007.26c dyaur na cakradad bhiyā ||
8.007.27a ā no makhasya dāvane 'śvair hiraṇyapāṇibhiḥ |
8.007.27c devāsa upa gantana ||
8.007.28a yad eṣāṁ pṛṣatī rathe praṣṭir vahati rohitaḥ |
8.007.28c yānti śubhrā riṇann apaḥ ||
8.007.29a suṣome śaryañāvaty ārjike pastyāvati |
8.007.29c yayur nicakrayā naraḥ ||

8.007.30a kadā gachātha maruta itthā vipraṃ havamānam |
 8.007.30c mārḍikebhir nādhamānam ||
 8.007.31a kad dha nūnaṃ kadhapriyo yad indram ajahātana |
 8.007.31c ko vaḥ sakhitva ohate ||
 8.007.32a saho ṣu ṇo vajrahastaiḥ kaṇvāso agnim marudbhiḥ |
 8.007.32c stuṣe hiraṇyavāśībhiḥ ||
 8.007.33a o ṣu vṛṣṇaḥ prayajyūn ā navyase suvitāya |
 8.007.33c vavṛtyāṃ citravājān ||
 8.007.34a girayaś cin ni jihate parśānāso manyamānāḥ |
 8.007.34c parvatāś cin ni yemire ||
 8.007.35a ākṣṇayāvāno vahanty antarikṣeṇa patataḥ |
 8.007.35c dhātāra stuvate vayaḥ ||
 8.007.36a agnir hi jāni pūrvyaś chando na sūro arciṣā |
 8.007.36c te bhānubhir vi tasthire ||

8.008.01a ā no viśvābhir ūtibhir aśvinā gachataṃ yuvam |
 8.008.01c dasrā hiraṇyavartanī pibataṃ somyam madhu ||
 8.008.02a ā nūnaṃ yātam aśvinā rathena sūryatvacā |
 8.008.02c bhuji hiraṇyapeśasā kavī gambhīracetasā ||
 8.008.03a ā yātaṃ nahuṣas pary āntarikṣāt suvṛktibhiḥ |
 8.008.03c pibātho aśvinā madhu kaṇvānāṃ savane sutam ||
 8.008.04a ā no yātaṃ divas pary āntarikṣād adhapiyā |
 8.008.04c putraḥ kaṇvasya vām iha suṣāva somyam madhu ||
 8.008.05a ā no yātam upaśruty aśvinā somapītaye |
 8.008.05c svāhā stomasya vardhanā pra kavī dhītibhir narā ||
 8.008.06a yac cid dhi vām pura ṛṣayo juhūre 'vase narā |
 8.008.06c ā yātam aśvinā gatam upemāṃ suṣṭutim mama ||
 8.008.07a divaś cid rocanād adhy ā no gantaṃ svarvidā |
 8.008.07c dhībhir vatsapracetasā stomebhir havanaśrutā ||
 8.008.08a kim anye pary āsate 'smat stomebhir aśvinā |
 8.008.08c putraḥ kaṇvasya vām ṛṣir gīrbhir vatso avivṛdhat ||
 8.008.09a ā vām vipra ihāvase 'hvat stomebhir aśvinā |
 8.008.09c ariprā vṛtrahantamā tā no bhūtam mayobhuvā ||
 8.008.10a ā yad vām yoṣaṇā ratham atiṣṭhad vājinīvasū |
 8.008.10c viśvāny aśvinā yuvam pra dhītāny agachataṃ ||
 8.008.11a ataḥ sahasranirṇijā rathenā yātam aśvinā |
 8.008.11c vatso vām madhumad vaco 'śamsīt kāvyaḥ kaviḥ ||
 8.008.12a purumandrā purūvasū manotarā rayiṇām |
 8.008.12c stomam me aśvināv imam abhi vahnī anūṣātām ||
 8.008.13a ā no viśvāny aśvinā dhattaṃ rādhāṃsy ahrayā |
 8.008.13c kṛtaṃ na ṛtviyāvato mā no rīradhataṃ nide ||
 8.008.14a yan nāsatyā parāvati yad vā stho adhy ambare |
 8.008.14c ataḥ sahasranirṇijā rathenā yātam aśvinā ||
 8.008.15a yo vām nāsatyāv ṛṣir gīrbhir vatso avivṛdhat |
 8.008.15c tasmai sahasranirṇijam iṣaṃ dhattaṃ ghṛtaścutam ||
 8.008.16a prāsmā ūrjaṃ ghṛtaścutam aśvinā yachataṃ yuvam |
 8.008.16c yo vām sumnāya tuṣṭavad vasūyād dānunas patī ||
 8.008.17a ā no gantaṃ riśādasemaṃ stomam purubhujā |

- 8.008.17c kṛtaṃ naḥ suśriyo nareṃā dātā abhiṣṭaye ||
8.008.18a ā vāṃ viśvābhir ūtibhiḥ priyamedhā ahūṣata |
8.008.18c rājantāv adhvarāṇām aśvinā yāmahūtiṣu ||
8.008.19a ā no gantam mayobhuvā ṛśvinā śambhuvā yuvam |
8.008.19c yo vāṃ vipanyū dhītibhir gīrbhir vatso avīṛdhat ||
8.008.20a yābhiḥ kaṇvam medhātithiṃ yābhir vaśam daśavrajam |
8.008.20c yābhir gośaryam āvataṃ tābhir no 'vataṃ narā ||
8.008.21a yābhir narā trasadasyum āvataṃ kṛtvye dhane |
8.008.21c tābhiḥ śv asmāṃ aśvinā prāvataṃ vājasātaye ||
8.008.22a pra vāṃ stomāḥ suvṛktayo giro vardhantv aśvinā |
8.008.22c purutrā vṛtrahantamā tā no bhūtam purusprhā ||
8.008.23a trīṇi padāny aśvinor āviḥ sānti guhā paraḥ |
8.008.23c kavī ṛtasya patmabhir arvāg jīvebhyas pari ||
- 8.009.01a ā nūnam aśvinā yuvaṃ vatsasya gantam avase |
8.009.01c prāsmāi yachatam avṛkam pṛthu chardir yuyutaṃ yā arātayaḥ ||
8.009.02a yad antarikṣe yad divi yat pañca mānuṣāṃ anu |
8.009.02c nṛmṇaṃ tad dhattam aśvinā ||
8.009.03a ye vāṃ daṃsāṃsy aśvinā viprāsaḥ parimāmṛsuḥ |
8.009.03c evet kāṇvasya bodhatam ||
8.009.04a ayaṃ vāṃ gharmo aśvinā stomena pari śicyate |
8.009.04c ayaṃ somo madhumān vājīnivasū yena vṛtram ciketathaḥ ||
8.009.05a yad apsu yad vanaspatau yad ośadhīṣu purudaṃsasā kṛtam |
8.009.05c tena māviṣṭam aśvinā ||
8.009.06a yan nāsatyā bhuraṇyatho yad vā deva bhiṣajyathaḥ |
8.009.06c ayaṃ vāṃ vatso matibhir na vindhate haviṣmantam hi gachathaḥ ||
8.009.07a ā nūnam aśvinor ṛṣi stomaṃ ciketa vāmayā |
8.009.07c ā somam madhumattamaṃ gharmam siñcād atharvaṇi ||
8.009.08a ā nūnam raghuvartaniṃ ratham tiṣṭhātho aśvinā |
8.009.08c ā vāṃ stomā ime mama nabho na cucyavīrata ||
8.009.09a yad adya vāṃ nāsatyokthair ācucyuvīmahi |
8.009.09c yad vā vāṇibhir aśvinevet kāṇvasya bodhatam ||
8.009.10a yad vāṃ kakṣivāṃ uta yad vyaśva ṛṣir yad vāṃ dīrghatamā juhāva |
8.009.10c pṛthī yad vāṃ vainyaḥ sādaneṣv eved ato aśvinā cetayethām ||
8.009.11a yātam chardiṣpā uta naḥ paraspā bhūtam jagatpā uta nas tanūpā |
8.009.11c vartis tokāya tanayāya yātam ||
8.009.12a yad indreṇa saratham yātho aśvinā yad vā vāyunā bhavathaḥ samokasā |
8.009.12c yad ādityebhir ṛbhubhiḥ sajoṣasā yad vā viṣnor vikramaṇeṣu tiṣṭhathaḥ ||
8.009.13a yad adyāśvināv aham huveya vājasātaye |
8.009.13c yat pṛtsu turvaṇe sahas tac chreṣṭham aśvinor avaḥ ||
8.009.14a ā nūnam yātam aśvinemā havyāni vāṃ hitā |
8.009.14c ime somāso adhi turvaṣe yadāv ime kaṇveṣu vāṃ atha ||
8.009.15a yan nāsatyā parāke arvāke asti bheṣajam |
8.009.15c tena nūnam vimadāya pracetasā chardir vatsāya yachatam ||
8.009.16a abhutsy u pra devyā sākam vācāham aśvinoḥ |
8.009.16c vy āvar devy ā matiṃ vi rātim martyebhyaḥ ||
8.009.17a pra bodhayoṣo aśvinā pra devi sūnrte mahi |
8.009.17c pra yajñahotar ānuṣak pra madāya śravo bṛhat ||

8.009.18a yad uṣo yāsi bhānunā saṃ sūryeṇa rocase |
 8.009.18c ā hāyam aśvino ratho vartir yāti nṛpāyāyam ||
 8.009.19a yad āpītāso aṃśavo gāvo na duhra ūdhabhiḥ |
 8.009.19c yad vā vāṇir anūṣata pra devayanto aśvinā ||
 8.009.20a pra dyumnāya pra śavase pra nṛṣāhyāya śarmaṇe |
 8.009.20c pra dakṣāya pracetasā ||
 8.009.21a yan nūnaṃ dhībhir aśvinā pitur yonā niṣidathaḥ |
 8.009.21c yad vā sumnebhir ukthyā ||

8.010.01a yat stho dīrghaprasadmani yad vādo rocane divaḥ |
 8.010.01c yad vā samudre adhy ākṛte gṛhe 'ta ā yātam aśvinā ||
 8.010.02a yad vā yajñam manave sammimikṣathur evet kāṇvasya bodhatam |
 8.010.02c bṛhaspatiṃ viśvān devāṃ ahaṃ huva indrāviṣṇū aśvināv āśuheṣasā ||
 8.010.03a tyā nv aśvinā huve sudamsasā gṛbhe kṛtā |
 8.010.03c yayor asti pra ṇaḥ sakhyam deveṣv adhy āpyam ||
 8.010.04a yayor adhi pra yajñā asūre santi sūrayaḥ |
 8.010.04c tā yajñasyādhvarasya pracetasā svadhābhir yā pibataḥ somyam madhu ||
 8.010.05a yad adyāśvināv apāg yat prāk stho vājinīvasū |
 8.010.05c yad druhavy anavi turvaśe yadau huve vām atha mā gatam ||
 8.010.06a yad antarikṣe patathaḥ purubhujā yad veme rodasī anu |
 8.010.06c yad vā svadhābhir adhitiṣṭhatho ratham ata ā yātam aśvinā ||

8.011.01a tvam agne vratapā asi deva ā martyeṣv ā |
 8.011.01c tvam yajñeṣv īdyaḥ ||
 8.011.02a tvam asi praśasyo vidatheṣu sahintya |
 8.011.02c agne rathir adhvarāṇām ||
 8.011.03a sa tvam asmad apa dviṣo yuyodhi jātavedaḥ |
 8.011.03c adevīr agne arātīḥ ||
 8.011.04a anti cit santam aha yajñam martasya ripoḥ |
 8.011.04c nopa veṣi jātavedaḥ ||
 8.011.05a martā amartyasya te bhūri nāma manāmahe |
 8.011.05c viprāso jātavedasaḥ ||
 8.011.06a vipraṃ viprāso 'vase devam martāsa ūtaye |
 8.011.06c agniṃ gīrbhir havāmahe ||
 8.011.07a ā te vatso mano yamat paramāc cit sadhasthāt |
 8.011.07c agne tvāṃkāmāyā girā ||
 8.011.08a purutrā hi sadṛṇṇ asi viśo viśvā anu prabhuḥ |
 8.011.08c samatsu tvā havāmahe ||
 8.011.09a samatsv agnim avase vājyanto havāmahe |
 8.011.09c vājeṣu citrarādhasam ||
 8.011.10a pratno hi kam īdyo adhvaṛeṣu sanāc ca hotā navyaś ca satsi |
 8.011.10c svāṃ cāgne tanvam piprayasvāsmabhyam ca saubhagam ā yajasva ||

8.012.01a ya indra somapātamo madaḥ śaviṣṭha cetati |
 8.012.01c yenā haṃsi ny atriṇam tam īmahe ||
 8.012.02a yenā daśagvam adhriguṃ vepayantaṃ svarṇaram |

- 8.012.02c yenā samudram āvithā tam īmahe ||
- 8.012.03a yena sindhum mahīr apo rathāṃ iva pracodayaḥ |
- 8.012.03c panthām ṛtasya yātave tam īmahe ||
- 8.012.04a imaṃ stomam abhiṣṭaye ghṛtaṃ na pūtam adrivaḥ |
- 8.012.04c yenā nu sadya ojasā vavakṣitha ||
- 8.012.05a imaṃ juṣasva girvaṇaḥ samudra iva pinvate |
- 8.012.05c indra viśvābhir ūtibhir vavakṣitha ||
- 8.012.06a yo no devaḥ parāvataḥ sakhitvanāya māmahe |
- 8.012.06c divo na vṛṣṭim prathayan vavakṣitha ||
- 8.012.07a vavakṣur asya ketavo uta vajro gabhastyoḥ |
- 8.012.07c yat sūryo na rodasī avardhayat ||
- 8.012.08a yadi pravṛddha satpate sahasram mahiṣāṃ aghaḥ |
- 8.012.08c ād it ta indriyam mahi pra vāvṛdhe ||
- 8.012.09a indraḥ sūryasya raśmibhir ny arśasānam oṣati |
- 8.012.09c agnir vaneva sāsahiḥ pra vāvṛdhe ||
- 8.012.10a iyaṃ ta ṛtviyāvati dhītir eti navīyasī |
- 8.012.10c saparyanti purupriyā mimīta it ||
- 8.012.11a garbho yajñasya devayuh kratum punīta ānuṣak |
- 8.012.11c stomair indrasya vāvṛdhe mimīta it ||
- 8.012.12a sanir mitrasya papratha indraḥ somasya pītaye |
- 8.012.12c prācī vāśīva sunvate mimīta it ||
- 8.012.13a yaṃ viprā ukthavāhaso 'bhipramandur āyavaḥ |
- 8.012.13c ghṛtaṃ na pipya āsany ṛtasya yat ||
- 8.012.14a uta svarāje aditi stomam indrāya jījanat |
- 8.012.14c purupraśastam ūtaya ṛtasya yat ||
- 8.012.15a abhi vahnaya ūtaye 'nūṣata praśastaye |
- 8.012.15c na deva vivratā harī ṛtasya yat ||
- 8.012.16a yat somam indra viṣṇavi yad vā gha trita āptye |
- 8.012.16c yad vā marutsu mandase sam indubhiḥ ||
- 8.012.17a yad vā śakra parāvati samudre adhi mandase |
- 8.012.17c asmākam it sute raṇā sam indubhiḥ ||
- 8.012.18a yad vāsi sunvato vṛdho yajamānasya satpate |
- 8.012.18c ukthe vā yasya raṇyasi sam indubhiḥ ||
- 8.012.19a devaṃ-devaṃ vo 'vasa indram-indraṃ gṛṇiṣaṇi |
- 8.012.19c adhā yajñāya turvaṇe vy ānaśuḥ ||
- 8.012.20a yajñebhir yajñavāhasaṃ somebhiḥ somapātamam |
- 8.012.20c hotrābhir indraṃ vāvṛdhur vy ānaśuḥ ||
- 8.012.21a mahīr asya praṇītayaḥ pūrvīr uta praśastayaḥ |
- 8.012.21c viśvā vasūni dāsuṣe vy ānaśuḥ ||
- 8.012.22a indraṃ vṛtrāya hantave devāso dadhire puraḥ |
- 8.012.22c indraṃ vāṇīr anūṣatā sam ojase ||
- 8.012.23a mahāntam mahinā vayaṃ stomebhir havanaśrutam |
- 8.012.23c arkair abhi pra ṇonumaḥ sam ojase ||
- 8.012.24a na yaṃ vivikto rodasī nāntarikṣāṇi vajriṇam |
- 8.012.24c amād id asya titviṣe sam ojaṣaḥ ||
- 8.012.25a yad indra pṛtanājye devās tvā dadhire puraḥ |
- 8.012.25c ād it te haryatā harī vavakṣatuḥ ||
- 8.012.26a yadā vṛtraṃ nadivṛtaṃ śavasā vajrinn avadhīḥ |
- 8.012.26c ād it te haryatā harī vavakṣatuḥ ||

8.012.27a yadā te viṣṇur ojasā trīṇi padā vicakrame |
 8.012.27c ād it te haryatā harī vavakṣatuḥ ||
 8.012.28a yadā te haryatā harī vāvṛdhāte dive-dive |
 8.012.28c ād it te viśvā bhuvanāni yemire ||
 8.012.29a yadā te mārutīr viśas tubhyam indra niyemire |
 8.012.29c ād it te viśvā bhuvanāni yemire ||
 8.012.30a yadā sūryam amuṃ divi śukraṃ jyotir adhārayaḥ |
 8.012.30c ād it te viśvā bhuvanāni yemire ||
 8.012.31a imāṃ ta indra suṣṭutiṃ vipra iyarti dhītibhiḥ |
 8.012.31c jāmim padeva pipratim prādhvare ||
 8.012.32a yad asya dhāmani priye samīcināso asvaran |
 8.012.32c nābhā yajñasya dohanā prādhvare ||
 8.012.33a suvīryaṃ svaśvyam sugavyam indra daddhi naḥ |
 8.012.33c hoteva pūrvacittaye prādhvare ||

8.013.01a indraḥ suteṣu someṣu kratum punīta ukthyam |
 8.013.01c vide vṛdhasya dakṣaso mahān hi ṣaḥ ||
 8.013.02a sa prathame vyomani devānāṃ sadane vṛdhaḥ |
 8.013.02c supāraḥ suśravastamaḥ sam apsujit ||
 8.013.03a tam ahve vājasātaya indram bharāya śuṣṃiṇam |
 8.013.03c bhavā naḥ sumne antamaḥ sakhā vṛdhe ||
 8.013.04a iyaṃ ta indra girvaṇo rātiḥ kṣarati sunvataḥ |
 8.013.04c mandāno asya barhiṣo vi rājasi ||
 8.013.05a nūnaṃ tad indra daddhi no yat tvā sunvanta īmahe |
 8.013.05c rayim naś citram ā bharā svarvidam ||
 8.013.06a stotā yat te vicarṣanir atipraśardhayad giraḥ |
 8.013.06c vayā ivānu rohate juṣanta yat ||
 8.013.07a pratnavaj janayā giraḥ śṛṇudhī jaritur havam |
 8.013.07c made-made vavakṣithā sukṛtvane ||
 8.013.08a krīḍanty asya sūnṛtā āpo na pravatā yatīḥ |
 8.013.08c ayā dhiyā ya ucyate patir divaḥ ||
 8.013.09a uto patir ya ucyate kṛṣṭinām eka id vaśī |
 8.013.09c namovṛdhair avasyubhiḥ sute raṇa ||
 8.013.10a stuhi śrutam vipaścitam harī yasya prasakṣiṇā |
 8.013.10c gantārā dāśuṣo gṛhaṃ namasvinaḥ ||
 8.013.11a tūtujāno mahemate 'śvebhiḥ pruṣitapsubhiḥ |
 8.013.11c ā yāhi yajñam āsubhiḥ śam id dhi te ||
 8.013.12a indra śaviṣṭha satpate rayim gṛṇatsu dhāraya |
 8.013.12c śravaḥ sūribhyo amṛtam vasutvanam ||
 8.013.13a have tvā sūra udite have madhyamdine divaḥ |
 8.013.13c juṣāṇa indra saptibhir na ā gahi ||
 8.013.14a ā tū gahi pra tu drava matsvā sutasya gomataḥ |
 8.013.14c tantum tanuṣva pūrvyam yathā vide ||
 8.013.15a yac chakrāsi parāvati yad arvāvati vṛtrahan |
 8.013.15c yad vā samudre andhaso 'vited asi ||
 8.013.16a indram vardhantu no gira indram sutāsa indavaḥ |
 8.013.16c indre haviṣmatir viśo arāṇiṣuḥ ||
 8.013.17a tam id viprā avasyavaḥ pravatvatībhir ūtibhiḥ |

8.013.17c indraṃ kṣoṇīr avardhayan vayā iva ||
 8.013.18a trikadrakeṣu cetanaṃ devāso yajñam atnata |
 8.013.18c tam id vardhantu no giraḥ sadāvṛdham ||
 8.013.19a stotā yat te anuvrata ukthāny ṛtuthā dadhe |
 8.013.19c śuciḥ pāvaka ucyate so adbhutaḥ ||
 8.013.20a tad id rudrasya cetati yahvam pratneṣu dhāmasu |
 8.013.20c mano yatrā vi tad dadhur vicetasah ||
 8.013.21a yadi me sakhyam āvara imasya pāhy andhasah |
 8.013.21c yena viśvā ati dviṣo atārima ||
 8.013.22a kadā ta indra girvaṇa stotā bhavāti śaṃtamaḥ |
 8.013.22c kadā no gavye aśvye vasau dadhaḥ ||
 8.013.23a uta te suṣṭutā harī vṛṣaṇā vahato ratham |
 8.013.23c ajuryasya madintamaṃ yam īmahe ||
 8.013.24a tam īmahe puruṣṭutaṃ yahvam pratnābhir ūtibhiḥ |
 8.013.24c ni barhiṣi priye sadad adha dvitā ||
 8.013.25a vardhasvā su puruṣṭuta ṛṣiṣṭutābhir ūtibhiḥ |
 8.013.25c dhukṣasva pipyuṣim iṣam avā ca naḥ ||
 8.013.26a indra tvam avited asitthā stuvato adrivaḥ |
 8.013.26c ṛtād iyarmi te dhiyam manoyujam ||
 8.013.27a iha tyā sadhamādyā yujānaḥ somapītaye |
 8.013.27c harī indra pratadvasū abhi svara ||
 8.013.28a abhi svarantu ye tava rudrāsaḥ sakṣata śriyam |
 8.013.28c uto marutvatīr viśo abhi prayaḥ ||
 8.013.29a imā asya pratūrtayaḥ padaṃ juṣanta yad divi |
 8.013.29c nābhā yajñasya saṃ dadhur yathā vide ||
 8.013.30a ayaṃ dīrghāya cakṣase prāci prayaty adhvare |
 8.013.30c mimīte yajñam ānuṣag vicakṣya ||
 8.013.31a vṛṣāyam indra te ratha uto te vṛṣaṇā harī |
 8.013.31c vṛṣā tvam śatakrato vṛṣā havaḥ ||
 8.013.32a vṛṣā grāvā vṛṣā mado vṛṣā somo ayaṃ sutaḥ |
 8.013.32c vṛṣā yajño yam invasi vṛṣā havaḥ ||
 8.013.33a vṛṣā tvā vṛṣaṇam huve vajriṅ citrābhir ūtibhiḥ |
 8.013.33c vāvantha hi pratiṣṭutiṃ vṛṣā havaḥ ||

8.014.01a yad indrāhaṃ yathā tvam īśīya vasva eka it |
 8.014.01c stotā me goṣakhā syāt ||
 8.014.02a śikṣeyam asmai ditseyaṃ śacīpate manīṣiṇe |
 8.014.02c yad ahaṃ gopatiḥ syām ||
 8.014.03a dhenuṣ ṭa indra sūnṛtā yajamānāya sunvate |
 8.014.03c gām aśvam pipyuṣi duhe ||
 8.014.04a na te vartāsti rādhasa indra devo na martyaḥ |
 8.014.04c yad ditsasi stuto magham ||
 8.014.05a yajña indram avardhayad yad bhūmiṃ vy avartayat |
 8.014.05c cakrāṇa opaśam divi ||
 8.014.06a vāvṛdhānasya te vayaṃ viśvā dhanāni jigyuṣaḥ |
 8.014.06c ūtim indrā vṛṇīmahe ||
 8.014.07a vy antarikṣam atiran made somasya rocanā |
 8.014.07c indro yad abhinad valam ||

8.014.08a ud gā ājad āngirobhya āviṣ kṛṇvan guhā satīḥ |
 8.014.08c arvāñcam nunude valam ||
 8.014.09a indreṇa rocanā divo dṛḍhāni dṛṃhitāni ca |
 8.014.09c sthirāṇi na parānude ||
 8.014.10a apām ūrmir madann iva stoma indrājirāyate |
 8.014.10c vi te madā arājīṣuḥ ||
 8.014.11a tvam hi stomavardhana indrāsy ukthavardhanaḥ |
 8.014.11c stotṛṇām uta bhadrakṛt ||
 8.014.12a indram it keśinā harī somapeyāya vakṣataḥ |
 8.014.12c upa yajñam surādhasam ||
 8.014.13a apām phenena namuceḥ śira indrod avartayaḥ |
 8.014.13c viśvā yad ajaya sprdhah ||
 8.014.14a mājābhīr utsisṛpsata indra dyām āruruḥṣataḥ |
 8.014.14c ava dasyūṃr adhūnuthāḥ ||
 8.014.15a asunvām indra saṃsadam viṣūcīm vy anāśayaḥ |
 8.014.15c somapā uttaro bhavan ||

8.015.01a tam v abhi pra gāyata puruhūtam puruṣtutam |
 8.015.01c indram gīrbhis taviṣam ā vivāsata ||
 8.015.02a yasya dvibarhaso bṛhat saho dādḥāra rodasī |
 8.015.02c girīmṛ ajrām āpaḥ svar vṛṣatvanā ||
 8.015.03a sa rājasi puruṣtutaṃ eko vṛtrāṇi jighnase |
 8.015.03c indra jaitrā śravasyā ca yantave ||
 8.015.04a tam te madam gṛṇīmasi vṛṣaṇam pṛtsu sāsahim |
 8.015.04c ulokakṛtnum adrivo hariśriyam ||
 8.015.05a yena jyotiṃṣy āyave manave ca viveditha |
 8.015.05c mandāno asya barhiṣo vi rājasi ||
 8.015.06a tad adyā cit ta ukthino 'nu ṣṭuvanti pūrvathā |
 8.015.06c vṛṣapatnīr apo jayā dive-dive ||
 8.015.07a tava tyad indriyam bṛhat tava śuṣmam uta kratum |
 8.015.07c vajram śīsāti dhiṣaṇā vareṇyam ||
 8.015.08a tava dyaur indra paum̐syam pṛthivī vardhati śravaḥ |
 8.015.08c tvām āpaḥ parvatāśas ca hinvire ||
 8.015.09a tvām viṣṇur bṛhan kṣayo mitro gṛṇāti varuṇah |
 8.015.09c tvām śardho madaty anu mārutam ||
 8.015.10a tvam vṛṣā janānām maṃhiṣṭha indra jajñiṣe |
 8.015.10c satrā viśvā svapatyāni dadhiṣe ||
 8.015.11a satrā tvam puruṣtutaṃ eko vṛtrāṇi tośase |
 8.015.11c nānya indrāt karaṇam bhūya invati ||
 8.015.12a yad indra manmaśas tvā nānā havanta ūtaye |
 8.015.12c asmākebhīr nṛbhīr atrā svar jaya ||
 8.015.13a aram̐ kṣayāya no mahe viśvā rūpāṇy āviśan |
 8.015.13c indram jaitrāya harṣayā śacīpatim ||

8.016.01a pra samrājam carṣaṇinām indram stotā navyam gīrbhiḥ |
 8.016.01c naram̐ nṛṣāham maṃhiṣṭham ||
 8.016.02a yasminn ukthāni raṇyanti viśvāni ca śravasyā |

8.016.02c apām avo na samudre ||
 8.016.03a taṃ suṣṭutyā vivāse jyeṣṭharājam bhare kṛtnum |
 8.016.03c maho vājinaṃ sanibhyaḥ ||
 8.016.04a yasyānūnā gabhīrā madā uravas tarutrāḥ |
 8.016.04c harṣumantaḥ śūrasātau ||
 8.016.05a tam id dhaneṣu hiteṣv adhivākāya havante |
 8.016.05c yeṣām indras te jayanti ||
 8.016.06a tam ic cyautnair āryanti taṃ kṛtebhiś carṣaṇayaḥ |
 8.016.06c eṣa indro varivaskṛt ||
 8.016.07a indro brahmendra ṛṣir indraḥ purū puruhūtaḥ |
 8.016.07c mahān mahībhiḥ śacībhiḥ ||
 8.016.08a sa stomyaḥ sa havyaḥ satyaḥ satvā tuvikūrmīḥ |
 8.016.08c ekaś cit sann abhibhūtiḥ ||
 8.016.09a tam arkebhis taṃ sāmabhis taṃ gāyatrais carṣaṇayaḥ |
 8.016.09c indraṃ vardhanti kṣitayaḥ ||
 8.016.10a praṇetāraṃ vasyo achā kartāraṃ jyotiḥ samatsu |
 8.016.10c sāsahvāṃsaṃ yudhāmitrān ||
 8.016.11a sa naḥ papriḥ pārayāti svasti nāvā puruhūtaḥ |
 8.016.11c indro viśvā ati dviṣaḥ ||
 8.016.12a sa tvam na indra vājebhir daśasyā ca gātuyā ca |
 8.016.12c achā ca naḥ sumnaṃ neṣi ||

8.017.01a ā yāhi suṣumā hi ta indra somam pibā imam |
 8.017.01c edam barhiḥ sado mama ||
 8.017.02a ā tvā brahmayujā harī vahatām indra keśinā |
 8.017.02c upa brahmāṇi naḥ śṛṇu ||
 8.017.03a brahmāṇas tvā vayaṃ yujā somapām indra sominaḥ |
 8.017.03c sutāvanto havāmahe ||
 8.017.04a ā no yāhi sutāvato 'smākaṃ suṣṭutir upa |
 8.017.04c pibā su śiprinn andhasaḥ ||
 8.017.05a ā te siñcāmi kukṣyor anu gātrā vi dhāvatu |
 8.017.05c gṛbhāya jihvayā madhu ||
 8.017.06a svāduṣ te astu saṃsude madhumān tanve tava |
 8.017.06c somaḥ śam astu te hṛde ||
 8.017.07a ayam u tvā vicarṣaṇe janīr ivābhi saṃvṛtaḥ |
 8.017.07c pra soma indra sarpatu ||
 8.017.08a tuvigrīvo vapodaraḥ subāhur andhaso made |
 8.017.08c indro vṛtrāṇi jighnate ||
 8.017.09a indra prehi puras tvam viśvasyeśāna ojasā |
 8.017.09c vṛtrāṇi vṛtrahañ jahi ||
 8.017.10a dīrghas te astv aṅkuśo yenā vasu prayachasi |
 8.017.10c yajamānāya sunvate ||
 8.017.11a ayam ta indra somo nipūto adhi barhiṣi |
 8.017.11c ehīm asya dravā piba ||
 8.017.12a śácigo śácipūjanāyaṃ raṇāya te sutaḥ |
 8.017.12c ākhaṇḍala pra hūyase ||
 8.017.13a yas te śṛṅgavṛṣo napāt praṇapāt kuṇḍapāyyaḥ |
 8.017.13c ny asmin dadhra ā manaḥ ||

8.017.14a vāstoṣ pate dhruvā sthūṇāṃsatraṃ somyānām |
 8.017.14c drapso bhettā purāṃ śāsvatīnām indro munīnām sakhā ||
 8.017.15a pṛdākusānur yajato gaveṣaṇa ekaḥ sann abhi bhūyasaḥ |
 8.017.15c bhūrṇim aśvaṃ nayat tujā puro gṛbhendraṃ somasya pītaye ||

8.018.01a idaṃ ha nūnam eṣāṃ sumnam bhikṣeta martyaḥ |
 8.018.01c ādityānām apūrvyaṃ savīmāni ||
 8.018.02a anarvāṇo hy eṣāṃ panthā ādityānām |
 8.018.02c adabdhāḥ santi pāyavaḥ sugevṛdhaḥ ||
 8.018.03a tat su naḥ savitā bhago varuṇo mitro aryamā |
 8.018.03c śarma yachantu sapratho yad īmahe ||
 8.018.04a devebhir devy adite 'riṣṭabharmān ā gahi |
 8.018.04c smat sūribhiḥ purupriye suśarmabhiḥ ||
 8.018.05a te hi putrāso aditer vidur dveṣāṃsi yotave |
 8.018.05c aṃhoś cid urucakrayo 'nehasaḥ ||
 8.018.06a aditir no divā paśum aditir naktam advayāḥ |
 8.018.06c aditiḥ pātv aṃhasaḥ sadāvṛdhā ||
 8.018.07a uta syā no divā matir aditir ūtyā gamat |
 8.018.07c sā śamtāti mayas karad apa sridhaḥ ||
 8.018.08a uta tyā daivyā bhiṣajā śaṃ naḥ karato aśvinā |
 8.018.08c yuyuyātām ito rapo apa sridhaḥ ||
 8.018.09a śam agnir agnibhiḥ karac chaṃ nas tapatu sūryaḥ |
 8.018.09c śaṃ vāto vātv arapā apa sridhaḥ ||
 8.018.10a apāmivām apa sridham apa sedhata durmatim |
 8.018.10c ādityāso yuyotanā no aṃhasaḥ ||
 8.018.11a yuyotā śarum asmā ā ādityāsa utāmatim |
 8.018.11c ṛdhag dveṣaḥ kṛṇuta viśvavedasaḥ ||
 8.018.12a tat su naḥ śarma yachatādityā yan mumocati |
 8.018.12c enasvantaṃ cid enasaḥ sudānavaḥ ||
 8.018.13a yo naḥ kaś cid ririkṣati rakṣastvena martyaḥ |
 8.018.13c svaiḥ ṣa evai ririṣiṣṭa yur janaḥ ||
 8.018.14a sam it tam agham aśnavad duḥśaṃsam martyaṃ ripum |
 8.018.14c yo asmatrā durhaṇāvāṃ upa dvayuh ||
 8.018.15a pākatrā sthana devā hr̥tsu jānītha martyam |
 8.018.15c upa dvayum cādvayum ca vasavaḥ ||
 8.018.16a ā śarma parvatānām otāpāṃ vṛṇīmahe |
 8.018.16c dyāvākṣāmāre asmā rapas kṛtam ||
 8.018.17a te no bhadreṇa śarmaṇā yuṣmākaṃ nāvā vasavaḥ |
 8.018.17c ati viśvāni duriṭā pipartana ||
 8.018.18a tuce tanāya tat su no drāghīya āyur jīvase |
 8.018.18c ādityāsaḥ sumahasāḥ kṛṇotana ||
 8.018.19a yajño hīdo vo antara ādityā asti mṛdata |
 8.018.19c yuṣme id vo api ṣmasi sajātye ||
 8.018.20a bṛhad varūtham marutāṃ devaṃ trātāram aśvinā |
 8.018.20c mitram īmahe varuṇaṃ svastaye ||
 8.018.21a aneho mitrāryaman nṛvad varuṇa śaṃsyam |
 8.018.21c trivarūtham maruto yanta naś chardiḥ ||
 8.018.22a ye cid dhi mṛtyubandhava ādityā manavaḥ smasi |

8.018.22c pra sū na āyur jīvase tīretana ||

- 8.019.01a taṃ gūrdhayā svarṇaraṃ devāso devam aratiṃ dadhanvire |
8.019.01c devatrā havyam ohire ||
8.019.02a vibhūtarātiṃ vipra citraśociṣam agniṃ iḍiṣva yanturam |
8.019.02c asya medhasya somyasya sobhare prem adhvarāya pūrvyam ||
8.019.03a yajīṣṭhaṃ tvā vavṛmahe devam devatrā hotāram amartyam |
8.019.03c asya yajñasya sukratum ||
8.019.04a ūrjo napātaṃ subhagaṃ sudīditim agniṃ śreṣṭhaśociṣam |
8.019.04c sa no mitrasya varuṇasya so apām ā sumnaṃ yakṣate divi ||
8.019.05a yaḥ samidhā ya āhutī yo vedena dadāśa marto agnaye |
8.019.05c yo namasā svadhvaraḥ ||
8.019.06a tasyed arvanto raṃhayanta āśavas tasya dyumnitamaṃ yaśaḥ |
8.019.06c na tam aṃho devakṛtaṃ kutaś cana na martyakṛtaṃ naśat ||
8.019.07a svagnayo vo agnibhiḥ syāma sūno sahasa ūrjām pate |
8.019.07c suvīras tvam asmayuḥ ||
8.019.08a praśaṃsamāno atithir na mitriyo 'gnī ratho na vedyaḥ |
8.019.08c tve kṣemāso api santi sādhasvas tvam rājā rayīṇām ||
8.019.09a so addhā dāśvadhvaro 'gne martaḥ subhaga sa praśaṃsyaḥ |
8.019.09c sa dhībhir astu sanitā ||
8.019.10a yasya tvam ūrdhvo adhvarāya tiṣṭhasi kṣayadvīraḥ sa sādhasate |
8.019.10c so arvadbhiḥ sanitā sa vipanyubhiḥ sa sūraiḥ sanitā kṛtam ||
8.019.11a yasyāgnir vapur gṛhe stomaṃ cano dadhīta viśvavāryaḥ |
8.019.11c havyā vā veviṣad viṣaḥ ||
8.019.12a viprasya vā stuvataḥ sahaso yaho makṣūtamasya rātiṣu |
8.019.12c avodevam uparimartyaṃ kṛdhi vaso vividuṣo vacaḥ ||
8.019.13a yo agniṃ havya dātibhir namobhir vā sudakṣam āvivāsati |
8.019.13c girā vājiraśociṣam ||
8.019.14a samidhā yo nisīti dāśad aditiṃ dhāmabhir asya martyaḥ |
8.019.14c viśvet sa dhībhiḥ subhago janāṃ ati dyumnair udna iva tāriṣat ||
8.019.15a tad agne dyumnam ā bhara yat sāsahat sadane kaṃ cid atriṇam |
8.019.15c manyuṃ janasya dūḍhyaḥ ||
8.019.16a yena caṣṭe varuṇo mitro aryamā yena nāsatyā bhagaḥ |
8.019.16c vayaṃ tat te śavasā gātuvittamā indratvotā vidhemahi ||
8.019.17a te ghed agne svādhyo ye tvā vipra nidadhire nṛcakṣasam |
8.019.17c viprāso deva sukratum ||
8.019.18a ta id vedim subhaga ta āhutiṃ te sotuṃ cakrire divi |
8.019.18c ta id vājebhir jigyor mahad dhanam ye tve kāmam nyerire ||
8.019.19a bhadro no agnir āhuto bhadrā rātiḥ subhaga bhadro adhvaraḥ |
8.019.19c bhadrā uta praśastayaḥ ||
8.019.20a bhadrām manaḥ kṛṇuṣva vṛtratūrye yenā samatsu sāsahaḥ |
8.019.20c ava sthirā tanuhi bhūri śardhatam vanemā te abhiṣṭibhiḥ ||
8.019.21a iḍe girā manurhitam yaṃ devā dūtām aratiṃ nyerire |
8.019.21c yajīṣṭhaṃ havya vāhanam ||
8.019.22a tigmajambhāya taruṇāya rājate prayo gāyasy agnaye |
8.019.22c yaḥ piṃsate sūnṛtābhiḥ suvīryam agnir ghr̥tebhir āhutaḥ ||
8.019.23a yadī ghr̥tebhir āhuto vāśim agnir bharata uc cāva ca |
8.019.23c asura iva nirṇijam ||

8.019.24a yo havyaṅy airayatā manurhito deva āsā sugandhinā |
 8.019.24c vivāsate vāryāṅi svadhvaro hotā devo amartyaḥ ||
 8.019.25a yad agne martyas tvam syām aham mitramaho amartyaḥ |
 8.019.25c sahasaḥ sūnav āhuta ||
 8.019.26a na tvā rāsiyābhiśastaye vaso na pāpatvāya santya |
 8.019.26c na me stotāmativā na durhitaḥ syād agne na pāpayā ||
 8.019.27a pitur na putraḥ subhr̥to duroṇa ā devāṃ etu pra ṇo haviḥ ||
 8.019.28a tavāham agna ūtibhir nediṣṭhābhiḥ saceya joṣam ā vaso |
 8.019.28c sadā devasya martyaḥ ||
 8.019.29a tava kratvā saneyam tava rātibhir agne tava praśastibhiḥ |
 8.019.29c tvām id āhuḥ pramatim vaso mamāgne harṣasva dātave ||
 8.019.30a pra so agne tavotibhiḥ suvirābhis tirate vājabharmabhiḥ |
 8.019.30c yasya tvam sakhyam āvaraḥ ||
 8.019.31a tava drapso nīlavān vāśa ṛtviya indhānaḥ siṣṇav ā dade |
 8.019.31c tvam mahīnām uṣasām asi priyaḥ kṣapo vastuṣu rājasi ||
 8.019.32a tam āganma sobharayaḥ sahasramuṣkaṁ svabhiṣṭim avase |
 8.019.32c samrājam trāsadasyavam ||
 8.019.33a yasya te agne anye agnaya upakṣito vayā iva |
 8.019.33c vipo na dyumnā ni yuve janānām tava kṣatrāṅi vardhayan ||
 8.019.34a yam ādityāso adruhaḥ pāram nayatha martyam |
 8.019.34c maghonām viśveṣām sudānavaḥ ||
 8.019.35a yūyam rājānaḥ kaṁ cic carṣaṅisahaḥ kṣayantam mānuṣāṁ anu |
 8.019.35c vayam te vo varuṇa mitrāryaman syāmed ṛtasya rathyaḥ ||
 8.019.36a adān me paurukutsyaḥ pañcāśataṁ trasadasyur vadhūnām |
 8.019.36c mamhiṣṭho ayaḥ satpatiḥ ||
 8.019.37a uta me praiyor vayiyoḥ suvāstvē adhi tugvani |
 8.019.37c tiṣṇām saptatīnām śyāvāḥ praṇetā bhuvad vasur diyānām patiḥ ||

8.020.01a ā gantā mā riṣaṅyata prasthāvāno māpa sthātā samanyavaḥ |
 8.020.01c sthirā cin namayiṣṇavaḥ ||
 8.020.02a vīdupavibhir maruta ṛbhukṣaṇa ā rudrāsaḥ sudītibhiḥ |
 8.020.02c iṣā no adyā gatā puruṣṛho yajñam ā sobhariyavaḥ ||
 8.020.03a vidmā hi rudriyānām śuṣmam ugram marutām śimīvatām |
 8.020.03c viṣṇor eṣasya mīdhuṣām ||
 8.020.04a vi dvīpāni pāpatan tiṣṭhad duchunobhe yujanta rodasī |
 8.020.04c pra dhanvāny airata śubhrakhādayo yad ejatha svabhānavaḥ ||
 8.020.05a acyutā cid vo ajmann ā nānadati parvatāso vanaspatiḥ |
 8.020.05c bhūmir yāmeṣu rejate ||
 8.020.06a amāya vo maruto yātave dyaur jihīta uttarā bṛhat |
 8.020.06c yatrā naro dediśate tanūṣv ā tvakṣāmsi bāhvojasaḥ ||
 8.020.07a svadhām anu śriyam naro mahi tveṣā amavanto vṛṣapsavaḥ |
 8.020.07c vahante ahrutapsavaḥ ||
 8.020.08a gobhir vāṇo ajyate sobhariṇām rathe kośe hiraṅyaye |
 8.020.08c gobandhavaḥ sujātāsa iṣe bhuje mahānto na sparase nu ||
 8.020.09a prati vo vṛṣadañjayo vṛṣṇe śardhāya mārutāya bharadhvam |
 8.020.09c havya vṛṣaprayāvṇe ||
 8.020.10a vṛṣaṇaśvena maruto vṛṣapsunā rathena vṛṣanābhinā |
 8.020.10c ā śyenāso na pakṣiṇo vṛthā naro havya no vitaye gata ||

8.020.11a samānam añjy eṣāṃ vi bhrājante rukmāso adhi bāhuṣu |
 8.020.11c davidyutaty iṣṭayaḥ ||
 8.020.12a ta ugrāso vṛṣaṇa ugrabāhavo nakiṣ ṭanūṣu yetire |
 8.020.12c sthirā dhanvāny āyudhā ratheṣu vo 'nīkeṣv adhi śriyaḥ ||
 8.020.13a yeṣām arṇo na sapratho nāma tveṣaṃ śaśvatām ekam id bhuje |
 8.020.13c vayo na pitryaṃ sahaḥ ||
 8.020.14a tāt vandasva marutas tāṃ upa stuhi teṣāṃ hi dhunīnām |
 8.020.14c arāṇām na caramas tad eṣāṃ dānā mahnā tad eṣāṃ ||
 8.020.15a subhagaḥ sa va ūtiṣv āsa pūrvāsu maruto vyaṣṭiṣu |
 8.020.15c yo vā nūnam utāsati ||
 8.020.16a yasya vā yūyam prati vājino nara ā havyā vītaye gatha |
 8.020.16c abhi ṣa dyumnair uta vājasātibhiḥ sumnā vo dhūtayo naśat ||
 8.020.17a yathā rudrasya sūnavo divo vaśanty asurasya vedhasaḥ |
 8.020.17c yuvānas tathed asat ||
 8.020.18a ye cārḥanti marutaḥ sudānavaḥ sman mīdhuṣaś caranti ye |
 8.020.18c ataś cid ā na upa vasyasā hṛdā yuvāna ā vavṛdhvam ||
 8.020.19a yūna ū ṣu naviṣṭhayā vṛṣṇaḥ pāvakaṃ abhi sobhare girā |
 8.020.19c gāya gā iva carakṛṣat ||
 8.020.20a sāhā ye santi muṣṭiḥeva havyo viśvāsu pṛtsu hotṛṣu |
 8.020.20c vṛṣṇaś candrān na suśravastamān girā vandasva maruto aha ||
 8.020.21a gāvaś cid ghā samanyavaḥ sajātyena marutaḥ sabandhavaḥ |
 8.020.21c rihate kakubho mithaḥ ||
 8.020.22a martaś cid vo nṛtavo rukmavakṣasa upa bhrātṛtvam āyati |
 8.020.22c adhi no gāta marutaḥ sadā hi va āpitvam asti nidhruvi ||
 8.020.23a maruto mārutasya na ā bheṣajasya vahatā sudānavaḥ |
 8.020.23c yūyaṃ sakhāyaḥ saptayaḥ ||
 8.020.24a yābhiḥ sindhum avatha yābhis tūrvatha yābhir daśasyathā krivim |
 8.020.24c mayo no bhūtotibhir mayobhuvaḥ śivābhir asacadviṣaḥ ||
 8.020.25a yat sindhau yad asiknyām yat samudreṣu marutaḥ subarhiṣaḥ |
 8.020.25c yat parvateṣu bheṣajam ||
 8.020.26a viśvam paśyanto bibhṛthā tanūṣv ā tenā no adhi vocata |
 8.020.26c kṣamā rapo maruta āturasya na iṣkartā vihutam punaḥ ||

8.021.01a vayam u tvām apūrvya sthūraṃ na kac cid bharanto 'vasyavaḥ |
 8.021.01c vāje citraṃ havāmahe ||
 8.021.02a upa tvā karmann ūtaye sa no yuvograś cakrāma yo dhṛṣat |
 8.021.02c tvām id dhy avitāraṃ vavṛmahe sakhāya indra sānasim ||
 8.021.03a ā yāhīma indavo 'śvapate gopata urvarāpate |
 8.021.03c somaṃ somapate piba ||
 8.021.04a vayaṃ hi tvā bandhumantam abandhavo viprāsa indra yemima |
 8.021.04c yā te dhāmāni vṛṣabha tebhīr ā gahi viśvebhiḥ somapītaye ||
 8.021.05a sīdantas te vayo yathā gośrite madhau madire vivakṣaṇe |
 8.021.05c abhi tvām indra nonumaḥ ||
 8.021.06a achā ca tvainā namasā vadāmasi kim muhú cid vi dīdhayaḥ |
 8.021.06c santi kāmāso harivo dadiṣ ṭvaṃ smo vayaṃ santi no dhiyaḥ ||
 8.021.07a nūtnā id indra te vayaṃ ūtī abhūma nahi nū te adrivaḥ |
 8.021.07c vidmā purā pariṇasaḥ ||
 8.021.08a vidmā sakhitvam uta śūra bhojyam ā te tā vajrinn īmahe |

- 8.021.08c uto samasminn ā śiśīhi no vaso vāje suśipra gomati ||
8.021.09a yo na idam-idam purā pra vasya ānināya tam u va stuṣe |
8.021.09c sakhāya indram ūtaye ||
8.021.10a haryaśvaṃ satpatiṃ carṣaṇīsaḥ sa hi śmā yo amandata |
8.021.10c ā tu naḥ sa vayati gavyam aśvyam stotṛbhyo maghavā śatam ||
8.021.11a tvayā ha svid yujā vayam prati śvasantaṃ vṛṣabha bruvīmahi |
8.021.11c samsthe janasya gomataḥ ||
8.021.12a jayema kāre puruhūta kāriṇo 'bhi tiṣṭhema dūḍhyaḥ |
8.021.12c nṛbhir vṛtraṃ hanyāma śūsuyāma cāver indra pra ṇo dhiyaḥ ||
8.021.13a abhrātṛvyo anā tvam anāpir indra januṣā sanād asi |
8.021.13c yudhed āpitvam ichase ||
8.021.14a nakī revantaṃ sakhyāya vindase pīyanti te surāśvaḥ |
8.021.14c yadā kṛṇoṣi nadanuṃ sam ūhasy ād it piteva hūyase ||
8.021.15a mā te amājuro yathā mūrāsa indra sakhye tvāvataḥ |
8.021.15c ni ṣadāma sacā sute ||
8.021.16a mā te godatra nir arāma rādhasa indra mā te gṛhāmahi |
8.021.16c dṛḍhā cid ayaḥ pra mṛśābhy ā bhara na te dāmāna ādabhe ||
8.021.17a indro vā gheda iyan maghaṃ sarasvatī vā subhagā dadir vasu |
8.021.17c tvaṃ vā citra dāśuṣe ||
8.021.18a citra id rājā rājakā id anyake yake sarasvatīm anu |
8.021.18c parjanya iva tatanad dhi vṛṣṭyā sahasram ayutā dadat ||
- 8.022.01a o tyam ahva ā ratham adyā daṃsiṣṭham ūtaye |
8.022.01c yam aśvinā suhavaḥ rudravartanī ā sūryāyai tastathuḥ ||
8.022.02a pūrvāyuṣaṃ suhavam puruṣṛham bhujyuṃ vājeṣu pūrvyam |
8.022.02c sacanāvantaṃ sumatibhiḥ sobhare vidveṣasam anehasam ||
8.022.03a iha tyā purubhūtamā devā namobhir aśvinā |
8.022.03c arvācīnā sv avase karāmahe gantārā dāśuṣo gṛham ||
8.022.04a yuvo rathasya pari cakram īyata īrmānyad vām iṣaṇyati |
8.022.04c asmāñ achā sumatir vām śubhas patī ā dhenur iva dhāvatu ||
8.022.05a ratho yo vām trivandhuro hiraṇyābhīsur aśvinā |
8.022.05c pari dyāvāpṛthivī bhūṣati śrutas tena nāsatyā gatam ||
8.022.06a daśasyantā manave pūrvyam divi yavam vṛkeṇa karṣathaḥ |
8.022.06c tā vām adya sumatibhiḥ śubhas patī aśvinā pra stuvīmahi ||
8.022.07a upa no vājinīvasū yātam ṛtasya pathibhiḥ |
8.022.07c yebhis tṛkṣim vṛṣaṇā trāsadasyavam mahe kṣatrāya jinvaṭhaḥ ||
8.022.08a ayaṃ vām adribhiḥ sutaḥ somo narā vṛṣaṇvasū |
8.022.08c ā yātam somapītaye pibataṃ dāśuṣo gṛhe ||
8.022.09a ā hi ruhatam aśvinā rathe koṣe hiraṇyaye vṛṣaṇvasū |
8.022.09c yuñjāthām pīvarīr iṣaḥ ||
8.022.10a yābhiḥ paktham avatho yābhir adhriguṃ yābhir babhruṃ vijoṣasam |
8.022.10c tābhir no makṣū tūyam aśvinā gatam bhiṣajyataṃ yad āturam ||
8.022.11a yad adhrigāvo adhrigū idā cid ahno aśvinā havāmahe |
8.022.11c vayaṃ gīrbhir vipanyavaḥ ||
8.022.12a tābhir ā yātam vṛṣaṇopa me havam viśvapsum viśvavāryam |
8.022.12c iṣā maṃhiṣṭhā purubhūtamā narā yābhiḥ krivim vāvṛdhus tābhir ā gatam ||
8.022.13a tāv idā cid ahānām tāv aśvinā vandamāna upa bruve |
8.022.13c tā u namobhir īmahe ||

8.022.14a tāv id doṣā tā uṣasi śubhas patī tā yāman rudravartanī |
 8.022.14c mā no martāya ripave vājinīvasū paro rudrāv ati khyatam ||
 8.022.15a ā sugmyāya sugmyam prātā rathenāśvinā vā sakṣaṇī |
 8.022.15c huve piteva sobharī ||
 8.022.16a manojavasā vṛṣaṇā madacyutā makṣuṃgamābhir ūtibhiḥ |
 8.022.16c ārāttāc cid bhūtam asme avase pūrvibhiḥ purubhojasā ||
 8.022.17a ā no aśvāvad aśvinā vartir yāsiṣṭam madhupātamaṃ narā |
 8.022.17c gomad dasrā hiraṇyavat ||
 8.022.18a suprāvargaṃ suvīryaṃ suṣṭhu vāryam anādhṛṣṭaṃ rakṣasvinā |
 8.022.18c asminn ā vām āyāne vājinīvasū viśvā vāmāni dhīmahi ||

8.023.01a iḍiṣvā hi pratīvyāṃ yajasva jātavedasam |
 8.023.01c cariṣṇudhūmam agr̥bhītaśociṣam ||
 8.023.02a dāmānaṃ viśvacarṣaṇe 'gniṃ viśvamaṇo girā |
 8.023.02c uta stuṣe viṣpardhaso rathānām ||
 8.023.03a yeṣām ābādha ṛgmiya iṣaḥ pṛkṣas ca nigrabhe |
 8.023.03c upavidā vahnir vindate vasu ||
 8.023.04a ud asya śocir asthād dīdiyuṣo vy ajaram |
 8.023.04c tapurjambhasya sudyuto gaṇaśriyaḥ ||
 8.023.05a ud u tiṣṭha svadhvara stavāno devyā kṛpā |
 8.023.05c abhikhyā bhāsā bṛhatā śusukvaniḥ ||
 8.023.06a agne yāhi suśastibhir havyā juhvāna ānuṣak |
 8.023.06c yathā dūto babhūtha havyavāhanaḥ ||
 8.023.07a agniṃ vaḥ pūrvyaṃ huve hotāraṃ carṣaṇinām |
 8.023.07c tam ayā vācā gṛṇe tam u va stuṣe ||
 8.023.08a yajñebhir adbhutakratuṃ yaṃ kṛpā sūdayanta it |
 8.023.08c mitraṃ na jane sudhitam ṛtāvani ||
 8.023.09a ṛtāvānam ṛtāvavo yajñasya sādhanam girā |
 8.023.09c upo enaṃ jujuṣur namasas pade ||
 8.023.10a achā no aṅgīrastamaṃ yajñāso yantu saṃyataḥ |
 8.023.10c hotā yo asti vikṣv ā yaśastamaḥ ||
 8.023.11a agne tava tye ajarendhānāso bṛhad bhāḥ |
 8.023.11c aśvā iva vṛṣaṇas taviṣiyavaḥ ||
 8.023.12a sa tvam na ūrjām pate rayiṃ rāsva suvīryam |
 8.023.12c prāva nas toke tanaye samatsv ā ||
 8.023.13a yad vā u viśpatiḥ śitaḥ supṛito maṇuṣo viśi |
 8.023.13c viśved agniḥ prati rakṣāmsi sedhati ||
 8.023.14a śruṣṭy agne navasya me stomasya vīra viśpate |
 8.023.14c ni māyinas tapuṣā rakṣaso daha ||
 8.023.15a na tasya māyayā cana ripur īśita martyaḥ |
 8.023.15c yo agnaye dadāsa havyadātibhiḥ ||
 8.023.16a vyaśvas tvā vasuvidam ukṣaṇyur aprīṇād ṛṣiḥ |
 8.023.16c maho rāye tam u tvā sam idhīmahi ||
 8.023.17a uśanā kāvyas tvā ni hotāram asādayat |
 8.023.17c āyajiṃ tvā manave jātavedasam ||
 8.023.18a viśve hi tvā sajoṣaso devāso dūtam akrata |
 8.023.18c śruṣṭī deva prathamo yajñīyo bhuvaḥ ||
 8.023.19a imaṃ ghā vīro amṛtaṃ dūtaṃ kṛṇvīta martyaḥ |

8.023.19c pāvakaṃ kṛṣṇavartaniṃ vihāyasam ||
 8.023.20a taṃ huvema yatasrucaḥ subhāsaṃ śukraśociṣam |
 8.023.20c viśāṃ agnim ajaram pratnam iḍyam ||
 8.023.21a yo asmai havyadātibhir āhutim marto 'vidhat |
 8.023.21c bhūri poṣaṃ sa dhatte vīravat yaśaḥ ||
 8.023.22a prathamam jātavedasam agniṃ yajñeṣu pūrvyam |
 8.023.22c prati srug eti namasā haviṣmatī ||
 8.023.23a ābhir vidhemāgnaye jyeṣṭhābhir vyaśvavat |
 8.023.23c maṃhiṣṭhābhir matibhiḥ śukraśociṣe ||
 8.023.24a nūnam arca vihāyase stomebhi sthūrayūpavat |
 8.023.24c ṛṣe vaiyaśva damyāyāgnaye ||
 8.023.25a atithim mānuṣānām sūnuṃ vanaspatinām |
 8.023.25c viprā agnim avase pratnam iḍate ||
 8.023.26a maho viśvāṃ abhi ṣato 'bhi havyāni mānuṣā |
 8.023.26c agne ni ṣatsi namasādhi barhiṣi ||
 8.023.27a vaṃsvā no vāryā puru vaṃsva rāyaḥ puruspr̥haḥ |
 8.023.27c suvīryasya prajāvato yaśasvataḥ ||
 8.023.28a tvam varo suśāṃṇe 'gne janāya codaya |
 8.023.28c sadā vaso rātiṃ yaviṣṭha śaśvate ||
 8.023.29a tvam hi supratūr asi tvam no gomatīr iṣaḥ |
 8.023.29c maho rāyaḥ sātīm agne apā vṛdhi ||
 8.023.30a agne tvam yaśā asy ā mitrāvaruṇā vaha |
 8.023.30c ṛtāvānā samrājā pūtadakṣasā ||

8.024.01a sakhāya ā śiṣāmahi brahmendrāya vajriṇe |
 8.024.01c stuṣa ū ṣu vo nṛtamāya dhṛṣṇave ||
 8.024.02a śavasā hy asi śruto vṛtrahatyena vṛtrahā |
 8.024.02c maghair maghono ati sūra dāsasi ||
 8.024.03a sa na stavāna ā bhara rayiṃ citraśravastamam |
 8.024.03c nireke cid yo harivo vasur dadiḥ ||
 8.024.04a ā nirekam uta priyam indra darṣi janānām |
 8.024.04c dhṛṣatā dhṛṣṇo stavamāna ā bhara ||
 8.024.05a na te savyaṃ na dakṣiṇaṃ hastam varanta āmuraḥ |
 8.024.05c na paribādho harivo gaviṣṭiṣu ||
 8.024.06a ā tvā gobhir iva vrajam gīrbhir ṛṇomy adrivaḥ |
 8.024.06c ā smā kāmam jaritur ā manaḥ pṛṇa ||
 8.024.07a viśvāni viśvamanaso dhiyā no vṛtrahantama |
 8.024.07c ugra pranetar adhi ṣū vaso gahi ||
 8.024.08a vyaṃ te asya vṛtrahan vidyāma sūra navyasaḥ |
 8.024.08c vaso spārhasya puruhūta rādhasaḥ ||
 8.024.09a indra yathā hy asti te 'paritam nṛto śavaḥ |
 8.024.09c amṛktā rātiḥ puruhūta dāsūṣe ||
 8.024.10a ā vṛṣasva mahāmaha mahe nṛtama rādhasē |
 8.024.10c dṛḍhaś cid dṛhya maghavan maghattaye ||
 8.024.11a nū anyatrā cid adrivas tvan no jagmur āśasaḥ |
 8.024.11c maghavañ chagdhi tava tan na ūtibhiḥ ||
 8.024.12a nahy aṅga nṛto tvad anyam vindāmi rādhasē |
 8.024.12c rāye dyumnāya śavase ca girvaṇaḥ ||

8.024.13a endum indrāya siñcata pibāti somyam madhu |
 8.024.13c pra rādhasā codayāte mahitvanā ||
 8.024.14a upo harīṇām patim dakṣam pṛñcantam abravam |
 8.024.14c nūnaṃ śrudhi stuvato aśvyasya ||
 8.024.15a nahy aṅga purā cana jajñe vīrataras tvat |
 8.024.15c nakī rāyā naivathā na bhandanā ||
 8.024.16a ed u madhvo madintaraṃ siñca vādhvaryo andhasaḥ |
 8.024.16c evā hi vīra stavate sadāvṛdhaḥ ||
 8.024.17a indra sthātar harīṇām nakiṣ ṭe pūrvyastutim |
 8.024.17c ud ānaṃśa śavasā na bhandanā ||
 8.024.18a taṃ vo vājānām patim ahūmahī śravasyavaḥ |
 8.024.18c aprāyubhir yajñebhir vāvṛdhenyam ||
 8.024.19a eto nv indraṃ stavāma sakhāya stomyaṃ naram |
 8.024.19c kṛṣṭīr yo viśvā abhy asty eka it ||
 8.024.20a agorudhāya gaviṣe dyukṣāya dasmyaṃ vacaḥ |
 8.024.20c ghṛtāt svādiyo madhunaś ca vocata ||
 8.024.21a yasyāmitāni vīryā na rādhaḥ paryetave |
 8.024.21c jyotir na viśvam abhy asti dakṣiṇā ||
 8.024.22a stuhīndraṃ vyaśvavad anūrmim vājinam yamam |
 8.024.22c aryo gayam maṃhamānaṃ vi dāśuṣe ||
 8.024.23a evā nūnam upa stuhi vaiyaśva daśamaṃ navam |
 8.024.23c suvidvāṃsaṃ carakṛtyaṃ caraṇinām ||
 8.024.24a vetthā hi nirṛtinām vajrahasta parivṛjam |
 8.024.24c ahar-ahaḥ śundhyuḥ paripadām iva ||
 8.024.25a tad indrāva ā bhara yenā daṃsiṣṭha kṛtvane |
 8.024.25c dvitā kutsāya śiśnatho ni codaya ||
 8.024.26a tam u tvā nūnam imahe navyaṃ daṃsiṣṭha sanyase |
 8.024.26c sa tvam no viśvā abhimātīḥ sakṣaṇiḥ ||
 8.024.27a ya ṛkṣād aṃhaso mucad yo vāryāt sapta sindhuṣu |
 8.024.27c vadhar dāsasya tuvinṛmṇa nīnamaḥ ||
 8.024.28a yathā varo suśāmṇe sanibhya āvaho rayim |
 8.024.28c vyaśvebhyaḥ subhage vājinivati ||
 8.024.29a ā nāryasya dakṣiṇā vyaśvāṃ etu sominaḥ |
 8.024.29c sthūraṃ ca rādhaḥ śatavat sahasravat ||
 8.024.30a yat tvā pṛchād ijānaḥ kuhayā kuhayākṛte |
 8.024.30c eṣo apaśrito valo gomatim ava tiṣṭhati ||

8.025.01a tā vām viśvasya gopā devā deveṣu yajñiyā |
 8.025.01c ṛtāvānā yajase pūtadakṣasā ||
 8.025.02a mitrā tanā na rathyā varuṇo yaś ca sukratuḥ |
 8.025.02c sanāt sujātā tanayā dhṛtavratā ||
 8.025.03a tā mātā viśvavedasāsuryāya pramahasā |
 8.025.03c mahī jajānāditir ṛtāvarī ||
 8.025.04a mahāntā mitrāvaruṇā samrājā devāv asurā |
 8.025.04c ṛtāvānāv ṛtam ā ghoṣato bṛhat ||
 8.025.05a napātā śavaso mahaḥ sūnū dakṣasya sukratū |
 8.025.05c sṛpradānū iṣo vāstv adhi kṣitaḥ ||
 8.025.06a saṃ yā dānūni yemathur divyāḥ pārvivīr iṣaḥ |

8.025.06c nabhasvatir ā vāṃ carantu vṛṣṭayaḥ ||
 8.025.07a adhi yā bṛhato divo 'bhi yūtheva paśyataḥ |
 8.025.07c ṛtāvānā samrājā namase hitā ||
 8.025.08a ṛtāvānā ni śedatuḥ sāmrajyāya sukratū |
 8.025.08c dhṛtavratā kṣatriyā kṣatram āsatuḥ ||
 8.025.09a akṣṇas cid gātuvittarānulbaṇena cakṣasā |
 8.025.09c ni cin miṣantā nicirā ni cikyatuh ||
 8.025.10a uta no devy aditir uruṣyatām nāsatyā |
 8.025.10c uruṣyantu maruto vṛddhaśvasaḥ ||
 8.025.11a te no nāvam uruṣyata divā naktam sudānavaḥ |
 8.025.11c ariṣyanto ni pāyubhiḥ sacemahi ||
 8.025.12a aghnate viṣṇave vayam ariṣyantaḥ sudānave |
 8.025.12c śrudhi svayāvan sindho pūrvacittaye ||
 8.025.13a tad vāryam vṛṇīmahe variṣṭham gopayatyam |
 8.025.13c mitro yat pānti varuṇo yad aryamā ||
 8.025.14a uta naḥ sindhur apām tan marutas tad aśvinā |
 8.025.14c indro viṣṇur mīdhvāmsaḥ sajośasaḥ ||
 8.025.15a te hi śmā vanuṣo naro 'bhimātiṃ kayasya cit |
 8.025.15c tigmaṃ na kṣodaḥ pratighnanti bhūrṇayaḥ ||
 8.025.16a ayam eka itthā purūru caṣṭe vi viśpatiḥ |
 8.025.16c tasya vratāny anu vaś carāmasi ||
 8.025.17a anu pūrvāny okyā sāmrajyasya saścima |
 8.025.17c mitrasya vratā varuṇasya dīrghaśrut ||
 8.025.18a pari yo raśminā divo 'ntān mame pṛthivyāḥ |
 8.025.18c ubhe ā paprau rodasī mahitvā ||
 8.025.19a ud u śya śaraṇe divo jyotir ayamsta sūryaḥ |
 8.025.19c agnir na śukraḥ samidhāna āhutaḥ ||
 8.025.20a vaco dīrghaprasadmanīṣe vājasya gomataḥ |
 8.025.20c īṣe hi pitvo 'viśasya dāvane ||
 8.025.21a tat sūryam rodasī ubhe doṣā vastor upa bruve |
 8.025.21c bhojeṣv asmāṃ abhy uc carā sadā ||
 8.025.22a ṛjram ukṣaṇyāyane rajataṃ harayāṇe |
 8.025.22c ratham yuktam asanāma suśāmaṇi ||
 8.025.23a tā me aśvyānām harīṇām nitośanā |
 8.025.23c uto nu kṛtvyanām nṛvāhasā ||
 8.025.24a smadabhīśū kaśāvantā viprā naviṣṭhayā matī |
 8.025.24c maho vājināv arvantā sacāsanam ||

8.026.01a yuvor u śū ratham huve sadhastutyāya sūriṣu |
 8.026.01c atūrtadakṣā vṛṣaṇā vṛṣaṇvasū ||
 8.026.02a yuvaṃ varo suśāmṇe mahe tane nāsatyā |
 8.026.02c avobhir yātho vṛṣaṇā vṛṣaṇvasū ||
 8.026.03a tā vāṃ adya havāmahe havyebhir vājinīvasū |
 8.026.03c pūrvīr iṣa iṣayantāv ati kṣapaḥ ||
 8.026.04a ā vāṃ vāhiṣṭho aśvinā ratho yātu śruto narā |
 8.026.04c upa stomān turasya darsathaḥ śriye ||
 8.026.05a juhuraṇā cid aśvinā manyethām vṛṣaṇvasū |
 8.026.05c yuvaṃ hi rudrā parṣatho ati dviṣaḥ ||

- 8.026.06a dasrā hi viśvam ānuṣaṅ makṣūbhiḥ paridīyathaḥ |
8.026.06c dhiyaṃjinvā madhuvarṇā śubhas patī ||
8.026.07a upa no yātam aśvinā rāyā viśvapūṣā saha |
8.026.07c maghavānā suvīrāv anapacyutā ||
8.026.08a ā me asya pratīvyam indranāsatyā gatam |
8.026.08c devā devebhir adya sacanastamā ||
8.026.09a vyaṃ hi vāṃ havāmaha ukṣaṅyanto vyaśvavat |
8.026.09c sumatibhir upa viprāv ihā gatam ||
8.026.10a aśvinā sv ṛṣe stuhi kuvit te śravato havam |
8.026.10c nediyasaḥ kūḍayātaḥ pañimr uta ||
8.026.11a vaiyaśvasya śrutam naroto me asya vedathaḥ |
8.026.11c sajoṣasā varuṇo mitro aryamā ||
8.026.12a yuvādattasya dhiṣṇyā yuvānītasya sūribhiḥ |
8.026.12c ahar-ahar vṛṣaṇa mahyaṃ śikṣatam ||
8.026.13a yo vāṃ yajñebhir āvṛto 'dhivāstrā vadhūr iva |
8.026.13c saparyantā śubhe cakrāte aśvinā ||
8.026.14a yo vāṃ uruvyacastamaṃ ciketati nṛpāyyam |
8.026.14c vartir aśvinā pari yātam asmayū ||
8.026.15a asmabhyaṃ su vṛṣaṇvasū yātam vartir nṛpāyyam |
8.026.15c viṣudruheva yajñam ūhathur girā ||
8.026.16a vāhiṣṭho vāṃ havānām stomo dūto huvan narā |
8.026.16c yuvābhyām bhūtv aśvinā ||
8.026.17a yad ado divo arṇava iṣo vā madatho gṛhe |
8.026.17c śrutam in me amartyā ||
8.026.18a uta syā śvetayāvarī vāhiṣṭhā vāṃ nadīnām |
8.026.18c sindhur hiraṇyavartaniḥ ||
8.026.19a smad etayā sukīrtyāśvinā śvetayā dhiyā |
8.026.19c vahethe śubhrayāvānā ||
8.026.20a yukṣvā hi tvam rathāsahā yuvasva poṣyā vaso |
8.026.20c ān no vāyo madhu pibāsmākaṃ savanā gahi ||
8.026.21a tava vāyav ṛtaspace tvaṣṭur jāmātar adbhuta |
8.026.21c avāṃsy ā vṛṇīmahe ||
8.026.22a tvaṣṭur jāmātaram vyaṃ iśānam rāya īmahe |
8.026.22c sutāvanto vāyum dyumnā janāsaḥ ||
8.026.23a vāyo yāhi śivā divo vahasvā su svaśvyam |
8.026.23c vahasva mahaḥ pṛthupakṣasā rathe ||
8.026.24a tvāṃ hi supsarastamaṃ nṛśadaneṣu hūmahe |
8.026.24c grāvāṇam nāsvapṛṣṭham maṃhanā ||
8.026.25a sa tvam no deva manasā vāyo mandāno agriyaḥ |
8.026.25c kṛdhi vājāṃ apo dhiyaḥ ||
- 8.027.01a agnir ukthe purohito grāvāṇo barhir adhvare |
8.027.01c ṛcā yāmi maruto brahmaṇas patim devāṃ avo vareṇyam ||
8.027.02a ā paśum gāsi pṛthivīm vanaspatin uśāsā naktam oṣadhīḥ |
8.027.02c viśve ca no vasavo viśvavedaso dhīnām bhūta prāvītāraḥ ||
8.027.03a pra sū na etv adhvaro 'gnā deveṣu pūrvyaḥ |
8.027.03c ādityeṣu pra varuṇe dhṛtavrate marutsu viśvabhānuṣu ||
8.027.04a viśve hi śmā manave viśvavedaso bhuvan vṛdhe riśādasaḥ |

8.027.04c ariṣṭebhiḥ pāyubhir viśvavedaso yantā no 'vṛkaṃ chardiḥ ||
 8.027.05a ā no adya samanaso gantā viśve sajoṣasaḥ |
 8.027.05c ṛcā girā maruto devy adite sadane pastye mahi ||
 8.027.06a abhi priyā maruto yā vo aśvyā havyā mitra prayāthana |
 8.027.06c ā barhir indro varuṇas turā nara ādityāsaḥ sadantu naḥ ||
 8.027.07a vayaṃ vo vṛktabarhiṣo hitaprayasa ānuṣak |
 8.027.07c sutasomāso varuṇa havāmahe manuṣvad iddhāgnayaḥ ||
 8.027.08a ā pra yāta maruto viṣṇo aśvinā pūṣan mākinayā dhiyā |
 8.027.08c indra ā yātu prathamāḥ saniṣyubhir vṛṣā yo vṛtrahā gṛṇe ||
 8.027.09a vi no devāso adruho 'chidraṃ śarma yachata |
 8.027.09c na yad dūrād vasavo nū cid antito varūtham ādadharṣati ||
 8.027.10a asti hi vaḥ sajātyaṃ riśādaso devāso asty āpyam |
 8.027.10c pra ṇaḥ pūrvasmai suvitāya vocata makṣū sumnāya navyase ||
 8.027.11a idā hi va upastutim idā vāmasya bhaktaye |
 8.027.11c upa vo viśvavedaso namasyur āṃ aṣṛkṣy anyām iva ||
 8.027.12a ud u ṣya vaḥ savitā supraṇitayo 'sthād ūrdhvo vareṇyaḥ |
 8.027.12c ni dvipādaś catuṣpādo arthino 'viśran patayiṣṇavaḥ ||
 8.027.13a devaṃ-devaṃ vo 'vase devaṃ-devam abhiṣṭaye |
 8.027.13c devaṃ-devaṃ huvema vājasātaye gṛṇanto devyā dhiyā ||
 8.027.14a devāso hi śmā manave samanyavo viśve sākāṃ sarātayaḥ |
 8.027.14c te no adya te aparaṃ tuce tu no bhavantu varivovidaḥ ||
 8.027.15a pra vaḥ śamsāmy adruhaḥ samstha upastutinām |
 8.027.15c na taṃ dhūrtir varuṇa mitra martyaṃ yo vo dhāmabhyo 'vidhat ||
 8.027.16a pra sa kṣayaṃ tirate vi mahir iṣo yo vo varāya dāśati |
 8.027.16c pra prajābhir jāyate dharmaṇas pary ariṣṭaḥ sarva edhate ||
 8.027.17a ṛte sa vindate yudhaḥ sugebhir yāty adhvanaḥ |
 8.027.17c aryamā mitro varuṇaḥ sarātayo yaṃ trāyante sajoṣasaḥ ||
 8.027.18a ajre cid asmai kṛṇuthā nyañcanam durge cid ā susaraṇam |
 8.027.18c eṣā cid asmād aśaniḥ paro nu sāsredhanti vi naśyatu ||
 8.027.19a yad adya sūrya udyati priyakṣatrā ṛtaṃ dadha |
 8.027.19c yan nimruci prabudhi viśvavedaso yad vā madhyaṃdine divaḥ ||
 8.027.20a yad vābhipitve asurā ṛtaṃ yate chardir yema vi dāśuṣe |
 8.027.20c vayaṃ tad vo vasavo viśvavedasa upa stheyāma madhya ā ||
 8.027.21a yad adya sūra udite yan madhyaṃdina ātuci |
 8.027.21c vāmaṃ dhattha manave viśvavedaso juhvānāya pracetase ||
 8.027.22a vayaṃ tad vaḥ samrāja ā vṛṇīmahe putro na bahupāyyam |
 8.027.22c aśyāma tad ādityā juhvato havir yena vasyo 'naśāmahai ||

8.028.01a ye triṃśati trayas paro devāso barhir āsadan |
 8.028.01c vidann aha dvitāsanam ||
 8.028.02a varuṇo mitro aryamā smadrātiṣāco agnayaḥ |
 8.028.02c patnīvanto vaṣaṭkṛtāḥ ||
 8.028.03a te no gopā apācyās ta udak ta itthā nyak |
 8.028.03c purastāt sarvayā viśā ||
 8.028.04a yathā vaśanti devās tathed asat tad eṣāṃ nakir ā minat |
 8.028.04c arāvā cana martyaḥ ||
 8.028.05a saptānām sapta iṣṭayaḥ sapta dyumnāny eṣāṃ |
 8.028.05c sapto adhi śriyo dhire ||

8.029.01a babhrur eko viṣuṇaḥ sūnaro yuvāñjy aṅkte hiraṇyayam ||
 8.029.02a yonim eka ā sasāda dyotano 'ntar deveṣu medhiraḥ ||
 8.029.03a vāśim eko bibharti hasta āyasim antar deveṣu nidhruviḥ ||
 8.029.04a vajram eko bibharti hasta āhitam tena vṛtrāṇi jighnate ||
 8.029.05a tigmam eko bibharti hasta āyudham śucir ugro jalāṣabheṣajaḥ ||
 8.029.06a patha ekaḥ pipāya taskaro yathāṃ eṣa veda nidhīnām ||
 8.029.07a trīṇy eka urugāyo vi cakrame yatra devāso madanti ||
 8.029.08a vibhir dvā carata ekayā saha pra pravāseva vasataḥ ||
 8.029.09a sado dvā cakrāte upamā divi samrājā sarpirāsutī ||
 8.029.10a arcanta eke mahi sāma manvata tena sūryam arocayan ||

8.030.01a nahi vo asty arbhako devāso na kumārakaḥ |
 8.030.01c viśve satomahānta it ||
 8.030.02a iti stutāso asathā riśādaso ye stha trayaś ca triṃśac ca |
 8.030.02c manor devā yajñiyāsaḥ ||
 8.030.03a te nas trādhvam te 'vata ta u no adhi vocata |
 8.030.03c mā naḥ pathaḥ pitryān mānavād adhi dūram naiṣṭa parāvataḥ ||
 8.030.04a ye devāsa iha sthana viśve vaiśvānarā uta |
 8.030.04c asmabhyam śarma sapratho gave 'śvāya yachata ||

8.031.01a yo yajāti yajāta it sunavac ca pacāti ca |
 8.031.01c brahmed indrasya cākanat ||
 8.031.02a puroḍāsam yo asmai somaḥ rarata āśiram |
 8.031.02c pād it tam śakro aṃhasaḥ ||
 8.031.03a tasya dyumāṃś asad ratho devajūtaḥ sa sūśuvat |
 8.031.03c viśvā vanvann amitriyā ||
 8.031.04a asya prajāvatī gr̥he 'saścantī dive-dive |
 8.031.04c iḍā dhenumatī duhe ||
 8.031.05a yā dampatī samanāsā sunuta ā ca dhāvataḥ |
 8.031.05c devāso nityayāśirā ||
 8.031.06a prati prāśavyāṃ itaḥ samyañcā barhir āśāte |
 8.031.06c na tā vājeṣu vāyataḥ ||
 8.031.07a na devānām api hnutāḥ sumatiḥ na jugukṣataḥ |
 8.031.07c śravo bṛhad vivāsataḥ ||
 8.031.08a putriṇā tā kumāriṇā viśvam āyur vy aśnutaḥ |
 8.031.08c ubhā hiraṇyapeśasā ||
 8.031.09a vītihoṭrā kṛtadvasū daśasyantāmṛtāya kam |
 8.031.09c sam ūdho romaśam hato deveṣu kṛṇuto duvaḥ ||
 8.031.10a ā śarma parvatānām vṛṇīmahe nadīnām |
 8.031.10c ā viṣṇoḥ sacābhavaḥ ||
 8.031.11a aitu pūṣā rayir bhagaḥ svasti sarvadhātamaḥ |
 8.031.11c urur adhvā svastaye ||
 8.031.12a aramatir anarvaṇo viśvo devasya manasā |
 8.031.12c ādityānām aneḥ it ||
 8.031.13a yathā no mitro aryamā varuṇaḥ santi gopāḥ |

8.031.13c sugā ṛtasya panthāḥ ||
 8.031.14a agniṃ vaḥ pūrvyam girā devam iḍe vasūnām |
 8.031.14c saparyantaḥ purupriyam mitram na kṣetrasādhasam ||
 8.031.15a makṣū devavato rathaḥ sūro vā pṛtsu kāsu cit |
 8.031.15c devānām ya in mano yajamāna iyakṣaty abhīd ayajvano bhuvat ||
 8.031.16a na yajamāna riṣyasi na sunvāna na devayo |
 8.031.16c devānām ya in mano yajamāna iyakṣaty abhīd ayajvano bhuvat ||
 8.031.17a nakiṣ ṭam karmaṇā naśan na pra yoṣan na yoṣati |
 8.031.17c devānām ya in mano yajamāna iyakṣaty abhīd ayajvano bhuvat ||
 8.031.18a asad atra suvīryam uta tyad āśvaśvyam |
 8.031.18c devānām ya in mano yajamāna iyakṣaty abhīd ayajvano bhuvat ||

8.032.01a pra kṛtāny ṛjīṣiṇaḥ kaṇvā indrasya gāthayā |
 8.032.01c made somasya vocata ||
 8.032.02a yaḥ sṛbindam anarśanim piprum dāsam ahīśuvam |
 8.032.02c vadhīd ugro riṇann apaḥ ||
 8.032.03a ny arbudasya viṣṭapaṃ varṣmāṇam bṛhataś tira |
 8.032.03c kṛṣe tad indra paumśyam ||
 8.032.04a prati śrutāya vo dhṛṣat tūrṇāśam na girer adhi |
 8.032.04c huve suśīpram ūtaye ||
 8.032.05a sa gor aśvasya vi vrajam mandānaḥ somyebhyaḥ |
 8.032.05c puraṃ na sūra darśasi ||
 8.032.06a yadi me rāraṇaḥ suta ukthe vā dadhase canaḥ |
 8.032.06c ārād upa svadhā gahi ||
 8.032.07a vyaṃ ghā te api śmasi stotāra indra girvaṇaḥ |
 8.032.07c tvam no jinva somapāḥ ||
 8.032.08a uta naḥ pitum ā bhara samrarāṇo avikṣitam |
 8.032.08c maghavan bhūri te vasu ||
 8.032.09a uta no gomatas kṛdhi hiraṇyavato aśvinaḥ |
 8.032.09c iḍābhiḥ sam rabhemahi ||
 8.032.10a bṛbadukthaṃ havāmahe sṛprakarasnam ūtaye |
 8.032.10c sādhu kṛṇvantam avase ||
 8.032.11a yaḥ samsthe cic chatakratur ād im kṛṇoti vṛtrahā |
 8.032.11c jaritṛbhyaḥ purūvasuḥ ||
 8.032.12a sa naḥ śakraś cid ā śakad dānavām antarābharaḥ |
 8.032.12c indro viśvābhir ūtibhiḥ ||
 8.032.13a yo rāyo 'vanir mahān supāraḥ sunvataḥ sakhā |
 8.032.13c tam indram abhi gāyata ||
 8.032.14a āyantāram mahi sthiram pṛtanāsu śravojitam |
 8.032.14c bhūrer īśānam ojasā ||
 8.032.15a nakir asya śacinām niyantā sūnṛtānām |
 8.032.15c nakir vaktā na dād iti ||
 8.032.16a na nūnam brahmaṇām ṛṇam prāsūnām asti sunvatām |
 8.032.16c na somo apratā pape ||
 8.032.17a panya id upa gāyata panya ukthāni śamsata |
 8.032.17c brahmā kṛṇota panya it ||
 8.032.18a panya ā dardirac chatā sahasrā vājy avṛtaḥ |
 8.032.18c indro yo yajvano vṛdhaḥ ||

8.032.19a vi ṣū cara svadhā anu kṛṣṭinām anv āhuvah |
 8.032.19c indra piba sutānām ||
 8.032.20a piba svadhainavānām uta yas tugrye sacā |
 8.032.20c utāyam indra yas tava ||
 8.032.21a atīhi manyuṣāviṇaṃ suṣuvāṃsam upāraṇe |
 8.032.21c imaṃ rātaṃ sutam piba ||
 8.032.22a ihi tisraḥ parāvata ihi pañca janāṃ ati |
 8.032.22c dhenā indrāvacaśat ||
 8.032.23a sūryo raśmiṃ yathā sṛjā tvā yachantu me girah |
 8.032.23c nimnam āpo na sadhryak ||
 8.032.24a adhvaryav ā tu hi ṣiñca somaṃ vīrāya śipriṇe |
 8.032.24c bharā sutasya pītaye ||
 8.032.25a ya udnaḥ phaligam bhinan nyak sindhūṃr avāsṛjat |
 8.032.25c yo goṣu pakvaṃ dhārayat ||
 8.032.26a ahan vṛtram ṛciśama aurṇavābham ahīśuvam |
 8.032.26c himenāvidhyad arbudam ||
 8.032.27a pra va ugrāya niṣṭure 'śādhāya prasakṣiṇe |
 8.032.27c devattam brahma gāyata ||
 8.032.28a yo viśvāny abhi vratā somasya made andhasaḥ |
 8.032.28c indro deveṣu cetati ||
 8.032.29a iha tyā sadhamādyā harī hiraṇyakeśyā |
 8.032.29c voḍhām abhi prayo hitam ||
 8.032.30a arvāñcaṃ tvā puruṣtuta priyamedhastutā harī |
 8.032.30c somapeyāya vakṣataḥ ||

8.033.01a vyaṃ gha tvā sutāvanta āpo na vṛktabarhiṣaḥ |
 8.033.01c pavitrasya prasravaṇeṣu vṛtrahan pari stotāra āsate ||
 8.033.02a svaranti tvā sute naro vaso nireka ukthinaḥ |
 8.033.02c kadā sutam ṛṣāṇa oka ā gama indra svabdīva vaṃsagaḥ ||
 8.033.03a kaṇvebhir dhrṣṇav ā dhrṣad vājam darṣi sahasriṇam |
 8.033.03c piśaṅgarūpam maghavan vicarṣaṇe makṣū gomantam īmahe ||
 8.033.04a pāhi gāyāndhaso mada indrāya medhyātithe |
 8.033.04c yaḥ sammiślo haryor yaḥ sute sacā vajrī ratho hiraṇyayaḥ ||
 8.033.05a yaḥ suṣavyaḥ sudakṣiṇa ino yaḥ sukatur gṛṇe |
 8.033.05c ya ākaraḥ sahasrā yaḥ śatāmagha indro yaḥ pūrbhid āritaḥ ||
 8.033.06a yo dhrṣito yo 'vṛto yo asti śmaśruṣu śritaḥ |
 8.033.06c vibhūtadyumnaś cyavanaḥ puruṣtutaḥ kratvā gaur iva śākinaḥ ||
 8.033.07a ka iṃ veda sute sacā pibantaṃ kad vayo dadhe |
 8.033.07c ayaṃ yaḥ puro vibhinatty ojasā mandānaḥ śipry andhasaḥ ||
 8.033.08a dānā mṛgo na vāraṇaḥ purutrā carathaṃ dadhe |
 8.033.08c nakiṣ tvā ni yamad ā sute gamo mahāṃś carasy ojasā ||
 8.033.09a ya ugraḥ sann aniṣṭṛta sthiro raṇāya saṃskṛtaḥ |
 8.033.09c yadi stotur maghavā śṛṇavad dhavaṃ nendro yoṣaty ā gamat ||
 8.033.10a satyam itthā vṛṣed asi vṛṣajūtir no 'vṛtaḥ |
 8.033.10c vṛṣā hy ugra śṛṇviṣe parāvati vṛṣo arvāvati śrutaḥ ||
 8.033.11a vṛṣaṇas te abhīśavo vṛṣā kaśā hiraṇyayī |
 8.033.11c vṛṣā ratho maghavan vṛṣaṇā harī vṛṣā tvam śatakṛato ||
 8.033.12a vṛṣā sotā sunotu te vṛṣann ṛjipinn ā bhara |

8.033.12c vṛṣā dadhanve vṛṣaṇaṃ nadiṣv ā tubhyaṃ sthātar hariṇām ||
 8.033.13a endra yāhi pītaye madhu śaviṣṭha somyam |
 8.033.13c nāyam achā maghavā śṛṇavad giro brahmokthā ca sukratuḥ ||
 8.033.14a vahantu tvā ratheṣṭhām ā harayo rathayujaḥ |
 8.033.14c tiraś cid ayaṃ savanāni vṛtrahann anyeṣāṃ yā śatakrato ||
 8.033.15a asmākam adyāntamaṃ stomaṃ dhiṣva mahāmaha |
 8.033.15c asmākam te savanā santu śaṃtamā madāya dyukṣa somapāḥ ||
 8.033.16a nahi ṣas tava no mama śāstre anyasya raṇyati |
 8.033.16c yo asmān vīra ānayat ||
 8.033.17a indraś cid ghā tad abravīt striyā aśāsyam manaḥ |
 8.033.17c uto aha kratuṃ raghum ||
 8.033.18a saptī cid ghā madacyutā mithunā vahato ratham |
 8.033.18c eved dhūr vṛṣṇa uttarā ||
 8.033.19a adhaḥ paśyasva mopari saṃtarām pādakau hara |
 8.033.19c mā te kaśaplakau dṛṣan strī hi brahmā babhūvitha ||

8.034.01a endra yāhi haribhir upa kaṇvasya suṣṭutim |
 8.034.01c divo amuṣya śāsato divaṃ yaya divāvaso ||
 8.034.02a ā tvā grāvā vadann iha somī ghoṣeṇa yachatu |
 8.034.02c divo amuṣya śāsato divaṃ yaya divāvaso ||
 8.034.03a atrā vi nemir eṣām urām na dhūnute vṛkaḥ |
 8.034.03c divo amuṣya śāsato divaṃ yaya divāvaso ||
 8.034.04a ā tvā kaṇvā ihāvase havante vājasātaye |
 8.034.04c divo amuṣya śāsato divaṃ yaya divāvaso ||
 8.034.05a dadhāmi te sutānām vṛṣṇe na pūrvapāyyam |
 8.034.05c divo amuṣya śāsato divaṃ yaya divāvaso ||
 8.034.06a smatpuramdhir na ā gahi viśvatodhīr na ūtaye |
 8.034.06c divo amuṣya śāsato divaṃ yaya divāvaso ||
 8.034.07a ā no yāhi mahemate sahasrote śatāmagha |
 8.034.07c divo amuṣya śāsato divaṃ yaya divāvaso ||
 8.034.08a ā tvā hotā manurhito devatrā vakṣad idyaḥ |
 8.034.08c divo amuṣya śāsato divaṃ yaya divāvaso ||
 8.034.09a ā tvā madacyutā harī śyenam pakṣeva vakṣataḥ |
 8.034.09c divo amuṣya śāsato divaṃ yaya divāvaso ||
 8.034.10a ā yāhy aya ā pari svāhā somasya pītaye |
 8.034.10c divo amuṣya śāsato divaṃ yaya divāvaso ||
 8.034.11a ā no yāhy upaśruty uktheṣu raṇayā iha |
 8.034.11c divo amuṣya śāsato divaṃ yaya divāvaso ||
 8.034.12a sarūpair ā su no gahi sambhṛtaiḥ sambhṛtāśvaḥ |
 8.034.12c divo amuṣya śāsato divaṃ yaya divāvaso ||
 8.034.13a ā yāhi parvatebhyaḥ samudrasyādhi viṣṭapaḥ |
 8.034.13c divo amuṣya śāsato divaṃ yaya divāvaso ||
 8.034.14a ā no gavyāny aśvyā sahasrā śūra dardṛhi |
 8.034.14c divo amuṣya śāsato divaṃ yaya divāvaso ||
 8.034.15a ā naḥ sahasraśo bharāyutāni śatāni ca |
 8.034.15c divo amuṣya śāsato divaṃ yaya divāvaso ||
 8.034.16a ā yad indraś ca dadvahe sahasraṃ vasurociṣaḥ |
 8.034.16c ojiṣṭham aśvyam paśum ||

- 8.034.17a ya ṛjṛā vātaramhaso 'ruṣāso raghuṣyadaḥ |
8.034.17c bhrājante sūryā iva ||
8.034.18a pārāvatasya rātiṣu dravaccakreṣv āśuṣu |
8.034.18c tiṣṭhaṃ vanasya madhya ā ||
- 8.035.01a agninendreṇa varuṇena viṣṇunādityai rudrair vasubhiḥ sacābhuvā |
8.035.01c sajoṣasā uṣasā sūryeṇa ca somam pibatam aśvinā ||
8.035.02a viśvābhir dhībhir bhuvanena vājinā divā pṛthivyādribhiḥ sacābhuvā |
8.035.02c sajoṣasā uṣasā sūryeṇa ca somam pibatam aśvinā ||
8.035.03a viśvair devais tribhir ekādaśair ihādbhir marudbhir bhr̥gubhiḥ sacābhuvā |
8.035.03c sajoṣasā uṣasā sūryeṇa ca somam pibatam aśvinā ||
8.035.04a juṣethāṃ yajñam bodhatam havasya me viśveha devau savanāva gachatam |
8.035.04c sajoṣasā uṣasā sūryeṇa ceṣam no voḍham aśvinā ||
8.035.05a stomam juṣethāṃ yuvaśeva kanyanāṃ viśveha devau savanāva gachatam |
8.035.05c sajoṣasā uṣasā sūryeṇa ceṣam no voḍham aśvinā ||
8.035.06a giro juṣethāṃ adhvaram juṣethāṃ viśveha devau savanāva gachatam |
8.035.06c sajoṣasā uṣasā sūryeṇa ceṣam no voḍham aśvinā ||
8.035.07a hāridraveva patatho vaned upa somam sutam mahiṣevāva gachathaḥ |
8.035.07c sajoṣasā uṣasā sūryeṇa ca trir vartir yātam aśvinā ||
8.035.08a haṃsāv iva patatho adhvaḡvā iva somam sutam mahiṣevāva gachathaḥ |
8.035.08c sajoṣasā uṣasā sūryeṇa ca trir vartir yātam aśvinā ||
8.035.09a śyenāv iva patatho havyaḍātaye somam sutam mahiṣevāva gachathaḥ |
8.035.09c sajoṣasā uṣasā sūryeṇa ca trir vartir yātam aśvinā ||
8.035.10a pibatam ca tṛpṇutam cā ca gachatam prajāṃ ca dhattam draviṇam ca dhattam |
8.035.10c sajoṣasā uṣasā sūryeṇa corjam no dhattam aśvinā ||
8.035.11a jayatam ca pra stutam ca pra cāvatom prajāṃ ca dhattam draviṇam ca dhattam |
8.035.11c sajoṣasā uṣasā sūryeṇa corjam no dhattam aśvinā ||
8.035.12a hatam ca śatrūn yatatam ca mitriṇaḥ prajāṃ ca dhattam draviṇam ca dhattam |
8.035.12c sajoṣasā uṣasā sūryeṇa corjam no dhattam aśvinā ||
8.035.13a mitrāvaruṇavantā uta dharmavantā marutvantā jaritur gachatho havam |
8.035.13c sajoṣasā uṣasā sūryeṇa cādityair yātam aśvinā ||
8.035.14a aṅgirasvantā uta viṣṇuvantā marutvantā jaritur gachatho havam |
8.035.14c sajoṣasā uṣasā sūryeṇa cādityair yātam aśvinā ||
8.035.15a ṛbhumantā vṛṣaṇā vājavantā marutvantā jaritur gachatho havam |
8.035.15c sajoṣasā uṣasā sūryeṇa cādityair yātam aśvinā ||
8.035.16a brahma jinvatam uta jinvatam dhiyo hatam rakṣāṃsi sedhatam amīvāḥ |
8.035.16c sajoṣasā uṣasā sūryeṇa ca somam sunvato aśvinā ||
8.035.17a kṣatram jinvatam uta jinvatam nṛn hatam rakṣāṃsi sedhatam amīvāḥ |
8.035.17c sajoṣasā uṣasā sūryeṇa ca somam sunvato aśvinā ||
8.035.18a dhenūr jinvatam uta jinvatam viśo hatam rakṣāṃsi sedhatam amīvāḥ |
8.035.18c sajoṣasā uṣasā sūryeṇa ca somam sunvato aśvinā ||
8.035.19a atre iva śṛṇutam pūrvyastutiṃ śyāvāśvasya sunvato madacyutā |
8.035.19c sajoṣasā uṣasā sūryeṇa cāśvinā tiroahnyam ||
8.035.20a sargāṃ iva sṛjatam suṣṭutir upa śyāvāśvasya sunvato madacyutā |
8.035.20c sajoṣasā uṣasā sūryeṇa cāśvinā tiroahnyam ||
8.035.21a raśmīm̐r iva yachatam adhvarāṃ upa śyāvāśvasya sunvato madacyutā |
8.035.21c sajoṣasā uṣasā sūryeṇa cāśvinā tiroahnyam ||
8.035.22a arvāḡ ratham ni yachatam pibatam somyam madhu |

8.035.22c ā yātam aśvinā gatam avasyur vām ahaṃ huve dhattaṃ ratnāni dāsuṣe ||
 8.035.23a namovāke prasthite adhvare narā vivakṣaṇasya pītaye |
 8.035.23c ā yātam aśvinā gatam avasyur vām ahaṃ huve dhattaṃ ratnāni dāsuṣe ||
 8.035.24a svāhākṛtasya tṛmpataṃ sutasya devāv andhasaḥ |
 8.035.24c ā yātam aśvinā gatam avasyur vām ahaṃ huve dhattaṃ ratnāni dāsuṣe ||

8.036.01a avitāsi sunvato vṛktabarhiṣaḥ pibā somam madāya kaṃ śatakṛato |
 8.036.01c yaṃ te bhāgam adhārayan viśvāḥ sehānaḥ pṛtanā |
 8.036.01e uru jrayaḥ sam apsuḥjin marutvāṃ indra satpate ||
 8.036.02a prāva stotāram maghavann ava tvām pibā somam madāya kaṃ śatakṛato |
 8.036.02c yaṃ te bhāgam adhārayan viśvāḥ sehānaḥ pṛtanā |
 8.036.02e uru jrayaḥ sam apsuḥjin marutvāṃ indra satpate ||
 8.036.03a ūrjā devāṃ avasy ojasā tvām pibā somam madāya kaṃ śatakṛato |
 8.036.03c yaṃ te bhāgam adhārayan viśvāḥ sehānaḥ pṛtanā |
 8.036.03e uru jrayaḥ sam apsuḥjin marutvāṃ indra satpate ||
 8.036.04a janitā divo janitā pṛthivyāḥ pibā somam madāya kaṃ śatakṛato |
 8.036.04c yaṃ te bhāgam adhārayan viśvāḥ sehānaḥ pṛtanā |
 8.036.04e uru jrayaḥ sam apsuḥjin marutvāṃ indra satpate ||
 8.036.05a janitāśvānāṃ janitā gavām asi pibā somam madāya kaṃ śatakṛato |
 8.036.05c yaṃ te bhāgam adhārayan viśvāḥ sehānaḥ pṛtanā |
 8.036.05e uru jrayaḥ sam apsuḥjin marutvāṃ indra satpate ||
 8.036.06a atrīnāṃ stomam adrivo mahas kṛdhi pibā somam madāya kaṃ śatakṛato |
 8.036.06c yaṃ te bhāgam adhārayan viśvāḥ sehānaḥ pṛtanā |
 8.036.06e uru jrayaḥ sam apsuḥjin marutvāṃ indra satpate ||
 8.036.07a śyāvāśvasya sunvatas tathā śṛṇu yathāśṛṇor atreḥ karmāṇi kṛṇvataḥ |
 8.036.07c pra trasadasyum āvitha tvam eka in nṛṣāhya indra brahmāṇi vardhayan ||

8.037.01a predam brahma vṛtratūryeṣv āvitha pra sunvataḥ śacīpata
 8.037.01c indra viśvābhir ūtibhiḥ |
 8.037.01d mādhyamḍinasya savanasya vṛtrahann anedya pibā somasya vajrivaḥ ||
 8.037.02a sehāna ugra pṛtanā abhi druhaḥ śacīpata indra viśvābhir ūtibhiḥ |
 8.037.02d mādhyamḍinasya savanasya vṛtrahann anedya pibā somasya vajrivaḥ ||
 8.037.03a ekarāḍ asya bhuvanasya rājasi śacīpata indra viśvābhir ūtibhiḥ |
 8.037.03d mādhyamḍinasya savanasya vṛtrahann anedya pibā somasya vajrivaḥ ||
 8.037.04a sasthāvānā yavayasi tvam eka ic chacīpata indra viśvābhir ūtibhiḥ |
 8.037.04d mādhyamḍinasya savanasya vṛtrahann anedya pibā somasya vajrivaḥ ||
 8.037.05a kṣemasya ca prayujaś ca tvam īśiṣe śacīpata indra viśvābhir ūtibhiḥ |
 8.037.05d mādhyamḍinasya savanasya vṛtrahann anedya pibā somasya vajrivaḥ ||
 8.037.06a kṣatrāya tvam avasi na tvam āvitha śacīpata indra viśvābhir ūtibhiḥ |
 8.037.06d mādhyamḍinasya savanasya vṛtrahann anedya pibā somasya vajrivaḥ ||
 8.037.07a śyāvāśvasya rebhatas tathā śṛṇu yathāśṛṇor atreḥ karmāṇi kṛṇvataḥ |
 8.037.07c pra trasadasyum āvitha tvam eka in nṛṣāhya indra kṣatrāṇi vardhayan ||

8.038.01a yajñasya hi stha ṛtvijā sasnī vājeṣu karmasu |
 8.038.01c indrāgnī tasya bodhatam ||
 8.038.02a tośāsā rathayāvānā vṛtrahaṇāparājitā |

- 8.038.02c indrāgnī tasya bodhatam ||
8.038.03a idaṃ vām madiram madhv adhuḥṣann adribhir naraḥ |
8.038.03c indrāgnī tasya bodhatam ||
8.038.04a juṣethāṃ yajñam iṣṭaye sutam somam sadhastutī |
8.038.04c indrāgnī ā gataṃ narā ||
8.038.05a imā juṣethāṃ savanā yebhir havyāny ūhathuḥ |
8.038.05c indrāgnī ā gataṃ narā ||
8.038.06a imāṃ gāyatravartaniṃ juṣethāṃ suṣṭutim mama |
8.038.06c indrāgnī ā gataṃ narā ||
8.038.07a prātaryāvabhir ā gataṃ devebhir jenyāvasū |
8.038.07c indrāgnī somapītaye ||
8.038.08a śyāvāśvasya sunvato 'trīṇām śṛṇutam havam |
8.038.08c indrāgnī somapītaye ||
8.038.09a evā vām ahva ūtaye yathāhuvanta medhirāḥ |
8.038.09c indrāgnī somapītaye ||
8.038.10a āham sarasvatīvator indrāgnyor avo vṛṇe |
8.038.10c yābhyāṃ gāyatram ṛcyate ||
- 8.039.01a agnim astoṣy ṛgmiyam agnim iḍā yajadhyai |
8.039.01c agnir devāṃ anaktu na ubhe hi vidathe kavir
8.039.01e antaś carati dūtyaṃ nabhantām anyake same ||
8.039.02a ny agne navyasā vacas tanūṣu śamsam eṣām |
8.039.02c ny arātī rarāvṇām viśvā aryo arātīr
8.039.02e ito yuchantv āmuro nabhantām anyake same ||
8.039.03a agne manmāni tubhyaṃ kaṃ ghṛtaṃ na juhva āsani |
8.039.03c sa deveṣu pra cikiddhi tvam hy asi pūrvyah
8.039.03e śivo dūto vivasvato nabhantām anyake same ||
8.039.04a tat-tad agnir vayo dadhe yathā-yathā kṛpaṇyati |
8.039.04c ūrjāhutir vasūnām śaṃ ca yoś ca mayo dadhe
8.039.04e viśvasyai devahūtyai nabhantām anyake same ||
8.039.05a sa ciketa sahiyasāgniś citreṇa karmaṇā |
8.039.05c sa hotā śaśvatinām dakṣiṇābhir abhivṛta
8.039.05e inoti ca pratīvyam nabhantām anyake same ||
8.039.06a agnir jātā devānām agnir veda martānām apīcyam |
8.039.06c agniḥ sa draviṇodā agnir dvārā vy ūrṇute
8.039.06e svāhuto navīyasā nabhantām anyake same ||
8.039.07a agnir deveṣu saṃvasuḥ sa vikṣu yajñiyāsv ā |
8.039.07c sa mudā kāvyā puru viśvam bhūmeva puṣyati
8.039.07e devo deveṣu yajñiyo nabhantām anyake same ||
8.039.08a yo agniḥ saptamānuṣaḥ śrito viśveṣu sindhuṣu |
8.039.08c tam āganma tripastyam mandhātur dasyuhantamam
8.039.08e agniṃ yajñeṣu pūrvyam nabhantām anyake same ||
8.039.09a agnis trīṇi tridhātūny ā kṣeti vidathā kaviḥ |
8.039.09c sa trīm̐r ekādaśāṃ iha yakṣac ca piprayac ca no
8.039.09e vipro dūtaḥ pariṣkr̥to nabhantām anyake same ||
8.039.10a tvam no agna āyuṣu tvam deveṣu pūrvyā vasva eka irajyasi |
8.039.10d tvām āpaḥ parisrutaḥ pari yanti svasetavo nabhantām anyake same ||

- 8.040.01a indrāgnī yuvaṃ su naḥ sahanṭā dāsatho rayim |
8.040.01c yena dṛḍhā samatsv ā viḍu cit sāhiṣīmahy agnir vaneva vāta in nabhantām anyake same ||
- 8.040.02a nahi vāṃ vavrayāmahe 'thendram id yajāmahe śaviṣṭhaṃ nṛṇāṃ naram |
8.040.02d sa naḥ kadā cid arvatā gamad ā vājasātaye gamad ā medhasātaye nabhantām anyake same ||
- 8.040.03a tā hi madhyam bharāṇām indrāgnī adhikṣitaḥ |
8.040.03c tā u kavitanā kavī pṛchyamānā sakhīyate saṃ dhītam aśnutam narā nabhantām anyake same ||
- 8.040.04a abhy arca nabhākavad indrāgnī yajasā girā |
8.040.04c yayor viśvam idaṃ jagad iyaṃ dyauḥ pṛthivī mahy upasthe bibhṛto vasu nabhantām anyake same ||
- 8.040.05a pra brahmāṇi nabhākavad indrāgnibhyām irajyata |
8.040.05c yā saptabudhnam arṇavaṃ jihmabāram aporṇuta indra īsāna ojasā nabhantām anyake same ||
- 8.040.06a api vṛśca purāṇavad vratater iva guṣṭitam ojo dāsasya dambhaya |
8.040.06d vayaṃ tad asya sambhṛtaṃ vasv indreṇa vi bhajemahi nabhantām anyake same ||
- 8.040.07a yad indrāgnī janā ime vihvayante tanā girā |
8.040.07c asmākebhīr nṛbhīr vayaṃ sāsahyāma pṛtanyato vanuyāma vanuṣyato nabhantām anyake same ||
- 8.040.08a yā nu śvetāv avo diva uccarāta upa dyubhiḥ |
8.040.08c indrāgnyor anu vratam uhānā yanti sindhavo yān sim bandhād amuñcatām nabhantām anyake same ||
- 8.040.09a pūrvīṣ ṭa indropamātayaḥ pūrvīr uta praśastayaḥ sūno hinvasya harivaḥ |
8.040.09d vasvo vīrasyāpṛco yā nu sādhanā no dhiyo nabhantām anyake same ||
- 8.040.10a taṃ śīśītā suvṛktibhis tveṣaṃ satvānam ṛgmiyam |
8.040.10c uto nu cid ya ojasā śuṣṇasyāṇḍāni bhedati jeṣat svarvatīr apo nabhantām anyake same ||
- 8.040.11a taṃ śīśītā svadhvaraṃ satyaṃ satvānam ṛtviyam |
8.040.11c uto nu cid ya ohata āṇḍā śuṣṇasya bhedaty ajaiḥ svarvatīr apo nabhantām anyake same ||
- 8.040.12a evendrāgnibhyām pitṛvan navīyo mandhātṛvad aṅgirasvad avāci |
8.040.12c tridhātunā śarmaṇā pātam asmān vayaṃ syāma patayo rayiṇām ||
- 8.041.01a asmā ū ṣu prabhūtaye varuṇāya marudbhyo 'rcā viduṣṭarebhyaḥ |
8.041.01d yo dhītā mānuṣāṇām paśvo gā iva rakṣati nabhantām anyake same ||
- 8.041.02a tam ū ṣu samanā girā pitṛṇāṃ ca manmabhiḥ |
8.041.02c nābhākasya praśastibhir yaḥ sindhūnām upodaye saptasvasā sa madhyamo nabhantām anyake same ||
- 8.041.03a sa kṣapaḥ pari ṣasvaje ny usro māyayā dadhe sa viśvam pari darśataḥ |
8.041.03d tasya venīr anu vratam uṣas tisro avardhayan nabhantām anyake same ||
- 8.041.04a yaḥ kakubho nidhārayaḥ pṛthivyām adhi darśataḥ |
8.041.04c sa mātā pūrvyam padaṃ tad varuṇasya saptyaṃ sa hi gopā ivero nabhantām anyake same ||
- 8.041.05a yo dhartā bhuvanānām ya usrāṇām apīcyā veda nāmāni guhyā |
8.041.05d sa kavīḥ kāvyā puru rūpaṃ dyaur iva puṣyati nabhantām anyake same ||
- 8.041.06a yasmin viśvāni kāvyā cakre nābhīr iva śrītā |

8.041.06c tritaṃ jūti saparyata vraje gāvo na saṃyuje yuje aśvāṃ ayukṣata nabhantām anyake same ||
 8.041.07a ya āsv atka āśaye viśvā jātāny eṣām |
 8.041.07c pari dhāmāni marmṛśad varuṇasya puro gaye viśve devā anu vratam nabhantām anyake same ||
 8.041.08a sa samudro apīcyas turo dyām iva rohati ni yad āsu yajur dadhe |
 8.041.08d sa mājā arcinā padāstrṇān nākam āruhan nabhantām anyake same ||
 8.041.09a yasya śvetā vicakṣaṇā tisro bhūmīr adhikṣitaḥ |
 8.041.09c trir uttarāṇi papratur varuṇasya dhruvam sadaḥ sa saptānām irajyati nabhantām anyake same ||
 8.041.10a yaḥ śvetāṃ adhinirṇijaś cakre kṛṣṇāṃ anu vratā |
 8.041.10c sa dhāma pūrvyam mame ya skambhena vi rodasī ajo na dyām adhārayan nabhantām anyake same ||

8.042.01a astabhnād dyām asuro viśvavedā amimita varimāṇam pṛthivyāḥ |
 8.042.01c āsīdad viśvā bhuvanāni samrāḍ viśvet tāni varuṇasya vratāni ||
 8.042.02a evā vandasva varuṇam bṛhantaṃ namasyā dhīram amṛtasya gopām |
 8.042.02c sa naḥ śarma trivarūthaṃ vi yaṃsat pātam no dyāvāpṛthivī upasthe ||
 8.042.03a imāṃ dhiyaṃ śikṣamāṇasya deva kratuṃ dakṣam varuṇa saṃ śīśādhi |
 8.042.03c yayāti viśvā duritā tarema sutarmāṇam adhi nāvam ruhema ||
 8.042.04a ā vām grāvāṇo aśvinā dhībhir viprā acucyavuh |
 8.042.04c nāsatyā somapītaye nabhantām anyake same ||
 8.042.05a yathā vām atrir aśvinā gīrbhir vipro ajohavit |
 8.042.05c nāsatyā somapītaye nabhantām anyake same ||
 8.042.06a evā vām ahva ūtaye yathāhuvanta medhirāḥ |
 8.042.06c nāsatyā somapītaye nabhantām anyake same ||

8.043.01a ime viprasya vedhaso 'gner astṛtayajvanah |
 8.043.01c gira stomāsa irate ||
 8.043.02a asmaḥ te pratiharyate jātavedo vicarṣaṇe |
 8.043.02c agne janāmi suṣṭutim ||
 8.043.03a ārokā iva gheda aha tigmā agne tava tviṣaḥ |
 8.043.03c dadbhir vanāni bapsati ||
 8.043.04a harayo dhūmaketavo vātajūtā upa dyavi |
 8.043.04c yatante vṛthag agnayaḥ ||
 8.043.05a ete tye vṛthag agnaya iddhāsaḥ sam adṛkṣata |
 8.043.05c uṣasām iva ketavaḥ ||
 8.043.06a kṛṣṇā rajāṃsi patsutaḥ prayāṇe jātavedasaḥ |
 8.043.06c agnir yad rodhati kṣami ||
 8.043.07a dhāsim kṛṇvāna oṣadhīr bapsad agnir na vāyati |
 8.043.07c punar yan taruṇīr api ||
 8.043.08a jihvābhir aha nannamad arcīṣā jañjaṇābhavan |
 8.043.08c agnir vaneṣu rocate ||
 8.043.09a apsv agne sadhiṣ ṭava sauṣadhīr anu rudhyase |
 8.043.09c garbhe sañ jāyase punaḥ ||
 8.043.10a ud agne tava tad ghṛtād arcī rocata āhutam |
 8.043.10c niṃsānam juhvo mukhe ||

8.043.11a ukṣānnāya vaśānnāya somapṛṣṭhāya vedhase |
 8.043.11c stomair vidhemāgnaye ||
 8.043.12a uta tvā namasā vyaṃ hotar vareṇyakrato |
 8.043.12c agne samidbhir īmahe ||
 8.043.13a uta tvā bhṛguvac chuce manuṣvad agna āhuta |
 8.043.13c aṅgirasvad dhavāmahe ||
 8.043.14a tvam hy agne agninā vipro vipreṇa san satā |
 8.043.14c sakhā sakhyā samidhyase ||
 8.043.15a sa tvam viprāya dāsūṣe rayiṃ dehi sahasriṇam |
 8.043.15c agne vīravatīm iṣam ||
 8.043.16a agne bhrātaḥ sahaskr̥ta rohidaśva śucivrata |
 8.043.16c imaṃ stomaṃ juṣasva me ||
 8.043.17a uta tvāgne mama stuto vāśrāya pratiharyate |
 8.043.17c goṣṭhaṃ gāva ivāśata ||
 8.043.18a tubhyaṃ tā aṅgirstama viśvāḥ sukṣitayaḥ pṛthak |
 8.043.18c agne kāmāya yemire ||
 8.043.19a agniṃ dhībhir manīṣiṇo medhirāso vipaścītaḥ |
 8.043.19c admasadyāya hinvire ||
 8.043.20a taṃ tvām ajmeṣu vājinam tanvānā agne adhvaram |
 8.043.20c vahniṃ hotāram īdate ||
 8.043.21a purutrā hi sadṛññ asi viśo viśvā anu prabhuḥ |
 8.043.21c samatsu tvā havāmahe ||
 8.043.22a tam īdiṣva ya āhuto 'gnir vibhrājate ghṛtaiḥ |
 8.043.22c imaṃ naḥ śṛṇavad dhavam ||
 8.043.23a taṃ tvā vyaṃ havāmahe śṛṇvantam jātavedasam |
 8.043.23c agne ghnantam apa dviṣaḥ ||
 8.043.24a viśam rājānam adbhutam adhyakṣam dharmaṇām imam |
 8.043.24c agnim īde sa u śravat ||
 8.043.25a agniṃ viśvāyuvepasam maryam na vājinam hitam |
 8.043.25c saptiṃ na vājayāmasi ||
 8.043.26a ghnān mṛdhrāṇy apa dviṣo dahan rakṣāmsi viśvahā |
 8.043.26c agne tigmena dīdihi ||
 8.043.27a yaṃ tvā janāsa indhate manuṣvad aṅgirstama |
 8.043.27c agne sa bodhi me vacaḥ ||
 8.043.28a yad agne divijā asy apsuajā vā sahaskr̥ta |
 8.043.28c taṃ tvā gīrbhir havāmahe ||
 8.043.29a tubhyaṃ ghet te janā ime viśvāḥ sukṣitayaḥ pṛthak |
 8.043.29c dhāsiṃ hinvanty attave ||
 8.043.30a te ghed agne svādhyo 'hā viśvā nṛcakṣasaḥ |
 8.043.30c tarantaḥ syāma durgahā ||
 8.043.31a agnim mandram purupriyam śīram pāvakaśociṣam |
 8.043.31c hṛdbhir mandrebhir īmahe ||
 8.043.32a sa tvam agne vibhāvasuḥ sṛjan sūryo na raśmibhiḥ |
 8.043.32c śardhan tamāmsi jighnase ||
 8.043.33a tat te sahasva īmahe dātram yan nopadasyati |
 8.043.33c tvad agne vāryam vasu ||

8.044.01a samidhāgniṃ duvasyata ghṛtair bodhayatātithim |

- 8.044.01c āsmin havyā juhōtana ||
- 8.044.02a agne stomam̐ juṣasva me vardhasvānena manmanā |
- 8.044.02c prati sūktāni harya naḥ ||
- 8.044.03a agniṃ dūtam puro dadhe havyvāham upa bruve |
- 8.044.03c devāṃ ā sādāyād iha ||
- 8.044.04a ut te br̥hanto arcayaḥ samidhānasya dīdivaḥ |
- 8.044.04c agne śukrāsa īrate ||
- 8.044.05a upa tvā juhvo mama ghṛtācīr yantu haryata |
- 8.044.05c agne havyā juṣasva naḥ ||
- 8.044.06a mandram̐ hotāram̐ ṛtvijam̐ citrabhānum̐ vibhāvasum̐ |
- 8.044.06c agniṃ īde sa u śravat ||
- 8.044.07a pratnam̐ hotāram̐ īdyaṃ juṣtam̐ agniṃ kavikratum̐ |
- 8.044.07c adhvarāṇām̐ abhiśriyam̐ ||
- 8.044.08a juṣāṇo aṅgirastamemā havyāny ānuṣak |
- 8.044.08c agne yajñam̐ naya ṛtuthā ||
- 8.044.09a samidhāna u santya śukraśoca ihā vaha |
- 8.044.09c cikitvān daivyaṃ janam̐ ||
- 8.044.10a vipram̐ hotāram̐ adruham̐ dhūmaketum̐ vibhāvasum̐ |
- 8.044.10c yajñānām̐ ketum̐ īmahe ||
- 8.044.11a agne ni pāhi nas tvam̐ prati ṣma deva rīṣataḥ |
- 8.044.11c bhindhi dveṣaḥ sahaskr̥ta ||
- 8.044.12a agniḥ pratnena manmanā śumbhānas tanvam̐ svām̐ |
- 8.044.12c kavir vipreṇa vāvṛdhe ||
- 8.044.13a ūrjo napātam̐ ā huve 'gnim̐ pāvakaśociṣam̐ |
- 8.044.13c asmin yajñe svadhvare ||
- 8.044.14a sa no mitramahas tvam̐ agne śukreṇa śociṣā |
- 8.044.14c devair ā satsi barhiṣi ||
- 8.044.15a yo agniṃ tanvo dame devam̐ marataḥ saparyati |
- 8.044.15c tasmā id dīdayad vasu ||
- 8.044.16a agniṃ mūrdhā divaḥ kakut patiḥ pṛthivyā ayam̐ |
- 8.044.16c apām̐ retāṃsi jinvati ||
- 8.044.17a ud agne śucayas tava śukrā bhrājanta īrate |
- 8.044.17c tava jyotiṃṣy arcayaḥ ||
- 8.044.18a īśiṣe vāryasya hi dātrasyāgne svarpatiḥ |
- 8.044.18c stotā syām̐ tava śarmaṇi ||
- 8.044.19a tvām̐ agne manīṣiṇas tvām̐ hinvanti cittibhiḥ |
- 8.044.19c tvām̐ vardhantu no giraḥ ||
- 8.044.20a adabdhasya svadhāvato dūtasya rebhataḥ sadā |
- 8.044.20c agneḥ sakhyam̐ vṛṇīmahe ||
- 8.044.21a agniḥ śucivratatamaḥ śucir vipraḥ śuciḥ kaviḥ |
- 8.044.21c śucī rocata āhutaḥ ||
- 8.044.22a uta tvā dhītayo mama giro vardhantu viśvahā |
- 8.044.22c agne sakhyasya bodhi naḥ ||
- 8.044.23a yad agne syām̐ aham̐ tvam̐ tvam̐ vā ghā syā aham̐ |
- 8.044.23c syuṣ ṭe satyā ihāśiṣaḥ ||
- 8.044.24a vasur vasupatir hi kam̐ asy agne vibhāvasuḥ |
- 8.044.24c syāma te sumatāv api ||
- 8.044.25a agne dhṛtavratāya te samudrāyeva sindhavaḥ |
- 8.044.25c giro vāśrāsa īrate ||

8.044.26a yuvānaṃ viśpatiṃ kavim viśvādāṃ puruvepasam |
 8.044.26c agniṃ śumbhāmi manmabhiḥ ||
 8.044.27a yajñānāṃ rathye vyaṃ tigmajambhāya viḍave |
 8.044.27c stomair iṣemāgnaye ||
 8.044.28a ayam agne tve api jaritā bhūtu santya |
 8.044.28c tasmai pāvaka mṛdaya ||
 8.044.29a dhīro hy asy admasad vipro na jāgrviḥ sadā |
 8.044.29c agne dīdayasi dyavi ||
 8.044.30a purāgne duritebhyaḥ purā mṛdhrebhyaḥ kave |
 8.044.30c pra ṇa āyur vaso tira ||

8.045.01a ā ghā ye agnim indhate strṇanti barhir ānuṣak |
 8.045.01c yeṣāṃ indro yuvā sakhā ||
 8.045.02a bṛhann id idhma eṣāṃ bhūri śastam pṛthuḥ svaruḥ |
 8.045.02c yeṣāṃ indro yuvā sakhā ||
 8.045.03a ayuddha id yudhā vṛtaṃ sūra ājati satvabhiḥ |
 8.045.03c yeṣāṃ indro yuvā sakhā ||
 8.045.04a ā bundaṃ vṛtrahā dade jātaḥ pṛchad vi mātaram |
 8.045.04c ka ugrāḥ ke ha śṛṇvire ||
 8.045.05a prati tvā śavasī vadad girāv apso na yodhiṣat |
 8.045.05c yas te śatrutvam ācake ||
 8.045.06a uta tvam maghavañ chṛṇu yas te vaṣṭi vavakṣi tat |
 8.045.06c yad viḍayāsi viḍu tat ||
 8.045.07a yad ājim yāty ājikṛd indraḥ svasvayur upa |
 8.045.07c rathītaṃ rathīnāṃ ||
 8.045.08a vi ṣu viśvā abhiyujō vajrin viṣvag yathā vṛha |
 8.045.08c bhavā naḥ suśravastamaḥ ||
 8.045.09a asmākaṃ su ratham pura indraḥ kṛṇotu sātaye |
 8.045.09c na yaṃ dhūrvanti dhūrtayaḥ ||
 8.045.10a vṛjyāma te pari dviṣō 'raṃ te śakra dāvane |
 8.045.10c gamemed indra gomataḥ ||
 8.045.11a śanaiś cid yanto adrivo 'śvāvantaḥ śatagvinaḥ |
 8.045.11c vivakṣaṇā anehasaḥ ||
 8.045.12a ūrdhvā hi te dive-dive sahasrā sūnṛtā śatā |
 8.045.12c jaritṛbhyo vimaṃhate ||
 8.045.13a vidmā hi tvā dhanamjayam indra dṛḍhā cid ārujam |
 8.045.13c ādāriṇaṃ yathā gayam ||
 8.045.14a kakumaṃ cit tvā kave mandantu dhrṣṇav indavaḥ |
 8.045.14c ā tvā paṇim yad imahe ||
 8.045.15a yas te revāñ adāśuriḥ pramamaṣa maghattaye |
 8.045.15c tasya no veda ā bhara ||
 8.045.16a ima u tvā vi cakṣate sakhāya indra sominaḥ |
 8.045.16c puṣṭāvanto yathā paśum ||
 8.045.17a uta tvābadhiraṃ vyaṃ śrutkaraṃ santam ūtaye |
 8.045.17c dūrād iha havāmahe ||
 8.045.18a yac chuśrūyā imaṃ havaṃ durmarṣaṃ cakriyā uta |
 8.045.18c bhaver āpir no antamaḥ ||
 8.045.19a yac cid dhi te api vyathir jaganvāṃso amanmahi |

- 8.045.19c godā id indra bodhi naḥ ||
- 8.045.20a ā tvā rambhaṃ na jivrayo rarabhmā śavasas pate |
- 8.045.20c uśmasi tvā sadhastha ā ||
- 8.045.21a stotram indrāya gāyata puruṇṛmṇāya satvane |
- 8.045.21c nakir yaṃ vṛṇvate yudhi ||
- 8.045.22a abhi tvā vṛṣabhā sute sutam sṛjāmi pītaye |
- 8.045.22c tṛmpā vy aśnuhī madam ||
- 8.045.23a mā tvā mūrā aviṣyavo mopahasvāna ā dabhan |
- 8.045.23c mākīm brahmadviṣo vanaḥ ||
- 8.045.24a iha tvā gopariṇasā mahe mandantu rādhase |
- 8.045.24c saro gauro yathā piba ||
- 8.045.25a yā vṛtrahā parāvati sanā navā ca cucyuve |
- 8.045.25c tā saṃsatsu pra vocata ||
- 8.045.26a apibat kadruvaḥ sutam indraḥ sahasrabāhve |
- 8.045.26c atrādediṣṭa paumṣyam ||
- 8.045.27a satyam tat turvaśe yadau vidāno ahnavāyyam |
- 8.045.27c vy ānaṭ turvaṇe śami ||
- 8.045.28a taraṇim vo janānām tradaṃ vājasya gomataḥ |
- 8.045.28c samānam u pra śaṃsiṣam ||
- 8.045.29a ṛbhukṣaṇam na vartava uktheṣu tugryāvṛdham |
- 8.045.29c indraṃ some sacā sute ||
- 8.045.30a yaḥ kṛntad id vi yonyam triśokāya girim pṛthum |
- 8.045.30c gobhyo gātum niretave ||
- 8.045.31a yad dadhiṣe manasyasi mandānaḥ pred iyakṣasi |
- 8.045.31c mā tat kar indra mṛḍaya ||
- 8.045.32a dabhram cid dhi tvāvataḥ kṛtam śṛṇve adhi kṣami |
- 8.045.32c jigātv indra te manaḥ ||
- 8.045.33a taved u tāḥ sukīrtayo 'sann uta praśastayaḥ |
- 8.045.33c yad indra mṛḍayāsi naḥ ||
- 8.045.34a mā na ekasminn āgasi mā dvayor uta triṣu |
- 8.045.34c vadhīr mā sūra bhūriṣu ||
- 8.045.35a bibhayā hi tvāvata ugrād abhiprabhaṅgiṇaḥ |
- 8.045.35c dasmād aham ṛtiṣahaḥ ||
- 8.045.36a mā sakhyuḥ sūnam ā vide mā putrasya prabhūvaso |
- 8.045.36c āvṛtvad bhūtu te manaḥ ||
- 8.045.37a ko nu maryā amithitaḥ sakhā sakhāyam abravīt |
- 8.045.37c jahā ko asmad iṣate ||
- 8.045.38a evāre vṛṣabhā sute 'sinvan bhūry āvayaḥ |
- 8.045.38c śvaghnīva nivatā caran ||
- 8.045.39a ā ta etā vacoyujā harī gṛbhṇe sumadrathā |
- 8.045.39c yad im brahmabhya id dadaḥ ||
- 8.045.40a bhindhi viśvā apa dviṣaḥ pari bādho jahī mṛdhaḥ |
- 8.045.40c vasu spārham tad ā bhara ||
- 8.045.41a yad vidāv indra yat sthire yat parśāne parābhṛtam |
- 8.045.41c vasu spārham tad ā bhara ||
- 8.045.42a yasya te viśvamānuṣo bhūrer dattasya vedati |
- 8.045.42c vasu spārham tad ā bhara ||

- 8.046.01a tvāvataḥ purūvaso vayam indra praṇetaḥ |
8.046.01c smasi sthātar harīṇām ||
- 8.046.02a tvām hi satyam adrivo vidma dātāram iṣām |
8.046.02c vidma dātāram rayīṇām ||
- 8.046.03a ā yasya te mahimānaṃ śatamūte śatakrato |
8.046.03c gīrbhir gṛṇanti kāravaḥ ||
- 8.046.04a sunītho ghā sa martyo yam maruto yam aryamā |
8.046.04c mitraḥ pānty adruhaḥ ||
- 8.046.05a dadhāno gomad aśvavat suvīryam ādityajūta edhate |
8.046.05c sadā rāyā puruspr̥hā ||
- 8.046.06a tam indraṃ dānam īmahe śavasānam abhīrvam |
8.046.06c īsānaṃ rāya īmahe ||
- 8.046.07a tasmin hi santy ūtayo viśvā abhīravaḥ sacā |
8.046.07c tam ā vahantu saptayaḥ purūvasum madāya harayaḥ sutam ||
- 8.046.08a yas te mado vareṇyo ya indra vṛtrahantamaḥ |
8.046.08c ya ādadiḥ svar nṛbhir yaḥ pṛtanāsu duṣṭaraḥ ||
- 8.046.09a yo duṣṭaro viśvavāra śravāyvo vājeṣv asti tarutā |
8.046.09c sa naḥ śaviṣṭha savanā vaso gahi gamema gomati vraje ||
- 8.046.10a gavyo ṣu ṇo yathā purāśvayota rathayā |
8.046.10c varivasya mahāmaha ||
- 8.046.11a nahi te śūra rādhaso 'ntaṃ vindāmi satrā |
8.046.11c daśasyā no maghavan nū cid adrivo dhiyo vājebhir āvitha ||
- 8.046.12a ya ṛṣvaḥ śrāvayatsakhā viśvet sa veda janimā puruṣṭutaḥ |
8.046.12c taṃ viśve mānuṣā yugendraṃ havante taviṣaṃ yatasrucaḥ ||
- 8.046.13a sa no vājeṣv avitā purūvasuḥ purasthātā maghavā vṛtrahā bhuvat ||
- 8.046.14a abhi vo vīram andhaso madeṣu gāya girā mahā vicetasam |
8.046.14c indraṃ nāma śrutyaṃ śākinam vaco yathā ||
- 8.046.15a dadī rekṇas tanve dadir vasu dadir vājeṣu puruhūta vājinam |
8.046.15c nūnam atha ||
- 8.046.16a viśveṣām irajyantam vasūnām sāsahvāṃsam cid asya varpasaḥ |
8.046.16c kṛpayato nūnam aty atha ||
- 8.046.17a mahaḥ su vo aram iṣe stavāmahe mīdhuṣe araṃgamāya jagmaye |
8.046.17c yajñebhir gīrbhir viśvamanuṣām marutām iyakṣasi gāye tvā namasā girā ||
- 8.046.18a ye pātayante ajmabhir girīṇām snubhir eṣām |
8.046.18c ajñam mahiṣvaṇīnām sumnaṃ tuviṣvaṇīnām prādhvare ||
- 8.046.19a prabhaṅgaṃ durmatīnām indra śaviṣṭhā bhara |
8.046.19c rayim asmabhyaṃ yujyaṃ codayanmate jyeṣṭham codayanmate ||
- 8.046.20a sanitaḥ susanitar ugra citra cetiṣṭha sūnṛta |
8.046.20c prāsahā samrāṭ sahurim sahintam bhujyum vājeṣu pūrvyam ||
- 8.046.21a ā sa etu ya īvad āṃ adevaḥ pūrtam ādade |
8.046.21c yathā cid vaśo aśvyaḥ pṛthuśravasi kānīte 'syā vyuṣy ādade ||
- 8.046.22a ṣaṣṭim sahasrāśvyasyāyutāsanam uṣṭrānām viṃsatim śatā |
8.046.22c daśa śyāvīnām śatā daśa tryaruṣīnām daśa gavām sahasrā ||
- 8.046.23a daśa śyāvā ṛdhadrayo vitavārāsa āśavaḥ |
8.046.23c mathrā nemiṃ ni vāvṛtuḥ ||
- 8.046.24a dānāsaḥ pṛthuśravasaḥ kānītasya surādhasaḥ |
8.046.24c ratham hiraṇyayaṃ dadan maṃhiṣṭhaḥ sūrir abhūd |
8.046.24e varṣiṣṭham akṛta śravaḥ ||
- 8.046.25a ā no vāyo mahe tane yāhi makhāya pājase |

- 8.046.25c vyaṃ hi te cakṛmā bhūri dāvane sadyas̄ cin mahi dāvane ||
8.046.26a yo aśvebhīr vahate vasta usrās triḥ sapta saptatīnām |
8.046.26c ebhiḥ somebhiḥ somasudbhiḥ somapā dānāya śukrapūtapāḥ ||
8.046.27a yo ma imaṃ cid u tmanāmandac citraṃ dāvane |
8.046.27c araṭve akṣe nahuṣe sukṛtvani sukṛttarāya sukratuḥ ||
8.046.28a ucathye vapuṣi yaḥ svarāḍ uta vāyo ghṛtasnāḥ |
8.046.28c aśveṣitaṃ rajeṣitaṃ śuneṣitaṃ prājma tad idaṃ nu tat ||
8.046.29a adha priyam iṣirāya ṣaṣṭiṃ sahasrāsanam |
8.046.29c aśvānām in na vṛṣṇām ||
8.046.30a gāvo na yūtham upa yanti vadhraya upa mā yanti vadhrayaḥ ||
8.046.31a adha yac cārathe gaṇe śatam uṣṭrāṃ acikradat |
8.046.31c adha śvitneṣu viṃśatiṃ śatā ||
8.046.32a śatam dāse balbūthe vipras tarukṣa ā dade |
8.046.32c te te vāyav ime janā madantīndragopā madanti devagopāḥ ||
8.046.33a adha syā yoṣaṇā mahī praticī vaśam aśvyam |
8.046.33c adhirukmā vi nīyate ||
- 8.047.01a mahi vo mahatām avo varuṇa mitra dāsuṣe |
8.047.01c yam ādityā abhi druho rakṣathā nem aghaṃ naśad anehaso va ūtayaḥ suūtayo va ūtayaḥ ||
8.047.02a vidā devā aghānām ādityāso apākṛtim |
8.047.02c pakṣā vayo yathopari vy asme śarma yachatānehaso va ūtayaḥ suūtayo va ūtayaḥ ||
8.047.03a vy asme adhi śarma tat pakṣā vayo na yantana |
8.047.03c viśvāni viśvavedaso varūthyā manāmahe 'nehaso va ūtayaḥ suūtayo va ūtayaḥ ||
8.047.04a yasmā arāsata kṣayaṃ jīvātum ca pracetasah |
8.047.04c manor viśvasya ghed ima ādityā rāya īsate 'nehaso va ūtayaḥ suūtayo va ūtayaḥ ||
8.047.05a pari ṇo vṛṇajann aghā durgāṇi rathyo yathā |
8.047.05c syāmed indrasya śarmaṇy ādityānām utāvasy anehaso va ūtayaḥ suūtayo va ūtayaḥ ||
8.047.06a parihvṛted anā jano yuṣmādattasya vāyati |
8.047.06c devā adabhram āśa vo yam ādityā ahetanānehaso va ūtayaḥ suūtayo va ūtayaḥ ||
8.047.07a na taṃ tigraṃ cana tyajo na drāsad abhi taṃ guru |
8.047.07c yasmā u śarma sapratha ādityāso arādhvam anehaso va ūtayaḥ suūtayo va ūtayaḥ ||
8.047.08a yuṣme devā api ṣmasi yudhyanta iva varmasu |
8.047.08c yūyam maho na enaso yūyam arbhād uruṣyatānehaso va ūtayaḥ suūtayo va ūtayaḥ ||
8.047.09a aditir na uruṣyatv aditiḥ śarma yachatu |
8.047.09c mātā mitrasya revato 'ryamṇo varuṇasya cānehaso va ūtayaḥ suūtayo va ūtayaḥ ||
8.047.10a yad devāḥ śarma śaraṇaṃ yad bhadraṃ yad anāturam |
8.047.10c tridhātu yad varūthyam tad asmāsu vi yantanānehaso va ūtayaḥ suūtayo va ūtayaḥ ||
8.047.11a ādityā ava hi khyatādhi kṛlād iva spaśah |
8.047.11c sutīrtham arvato yathānu no neṣathā sugam anehaso va ūtayaḥ suūtayo va ūtayaḥ ||
8.047.12a neha bhadraṃ rakṣasvine nāvayai nopayā uta |

8.047.12c gave ca bhadraṃ dhenave vīrāya ca śravasyate 'nehaso va ūtayaḥ suūtayo va ūtayaḥ ||
 8.047.13a yad āvir yad apīcyaṃ devāso asti duṣkṛtam |
 8.047.13c trite tad viśvam āptya āre asmad dadhātanānehaso va ūtayaḥ suūtayo va ūtayaḥ ||
 8.047.14a yac ca goṣu duṣvapnyam yac cāsme duhitar divaḥ |
 8.047.14c tritāya tad vibhāvāry āptyāya parā vahānehaso va ūtayaḥ suūtayo va ūtayaḥ ||
 8.047.15a niṣkaṃ vā ghā kṛṇavate srajaṃ vā duhitar divaḥ |
 8.047.15c trite duṣvapnyam sarvam āptye pari dadmasy anehaso va ūtayaḥ suūtayo va ūtayaḥ ||
 8.047.16a tadannāya tadapase tam bhāgam upaseduṣe |
 8.047.16c tritāya ca dvitāya coṣo duṣvapnyam vahānehaso va ūtayaḥ suūtayo va ūtayaḥ ||
 8.047.17a yathā kalāṃ yathā śapham yatha ṛṇam samnayāmasi |
 8.047.17c evā duṣvapnyam sarvam āptye sam nayāmasy anehaso va ūtayaḥ suūtayo va ūtayaḥ ||
 8.047.18a ajaiṣmādyāsanāma cābhūmānāgaso vayam |
 8.047.18c uṣo yasmād duṣvapnyād abhaiṣmāpa tad uchatv anehaso va ūtayaḥ suūtayo va ūtayaḥ ||

8.048.01a svādor abhakṣi vayasah sumedhāḥ svādhyo varivovittarasya |
 8.048.01c viśve yaṃ devā uta martyāso madhu bruvanto abhi samcaranti ||
 8.048.02a antaś ca prāgā aditir bhavāsy avayātā haraso daivyasya |
 8.048.02c indav indrasya sakhyam juṣāṇaḥ śrauṣṭiva dhuram anu rāya ṛdhyāḥ ||
 8.048.03a apāma somam amṛtā abhūma ṛganma jyotir avidāma devān |
 8.048.03c kiṃ nūnam asmān kṛṇavad arātiḥ kim u dhūrtir amṛta martyasya ||
 8.048.04a śam no bhava hṛda ā pīta indo piteva soma sūnave suśevaḥ |
 8.048.04c sakheva sakhya uruśamsa dhīraḥ pra ṇa āyur jīvase soma tāriḥ ||
 8.048.05a ime mā pītā yaśasa uruṣyavo ratham na gāvaḥ sam anāha parvasu |
 8.048.05c te mā rakṣantu visrasaś caritrād uta mā srāmād yavayantv indavaḥ ||
 8.048.06a agniṃ na mā mathitam sam didīpaḥ pra cakṣaya kṛṇuhi vasyaso naḥ |
 8.048.06c athā hi te mada ā soma manye revāṃ iva pra carā puṣṭim acha ||
 8.048.07a iṣireṇa te manasā sutasya bhakṣimahi pitryasyeva rāyaḥ |
 8.048.07c soma rājan pra ṇa āyūṃṣi tāriḥ ahānīva sūryo vāsarāṇi ||
 8.048.08a soma rājan mṛdayā naḥ svasti tava smasi vratyās tasya viddhi |
 8.048.08c alarti dakṣa uta manyur indo mā no aryo anukāmam parā dāḥ ||
 8.048.09a tvam hi nas tanvaḥ soma gopā gātre-gātre niṣasatthā ṛcakṣāḥ |
 8.048.09c yat te vayam pramināma vratāni sa no mṛda suśakhā deva vasyaḥ ||
 8.048.10a ṛdūdareṇa sakhyā saceya yo mā na riṣyed dharyaśva pītaḥ |
 8.048.10c ayam yaḥ somo ny adhāyy asme tasmā indram pratiram emy āyuh ||
 8.048.11a apa tyā asthur anirā amivā nir atrasan tamiṣicir abhaiṣuḥ |
 8.048.11c ā somo asmāṃ aruhad vihāyā aganma yatra pratiranta āyuh ||
 8.048.12a yo na induḥ pitaro hṛtsu pīto 'martyo martyāṃ āviveśa |
 8.048.12c tasmai somāya haviṣā vidhema mṛḍike asya sumatau syāma ||
 8.048.13a tvam soma pitṛbhiḥ samvidāno 'nu dyāvāpṛthivī ā tatantha |
 8.048.13c tasmai ta indo haviṣā vidhema vayam syāma patayo rayiṇām ||
 8.048.14a trātāro devā adhi vocatā no mā no nidrā īsata mota jalpiḥ |
 8.048.14c vayam somasya viśvaha priyāsaḥ suvīrāso vidatham ā vadema ||
 8.048.15a tvam naḥ soma viśvato vayodhās tvam svarvid ā viśā ṛcakṣāḥ |
 8.048.15c tvam na inda ūtibhiḥ sajoṣāḥ pāhi paścātād uta vā purastāt ||

8.049.01a abhi pra vaḥ surādhasam indram arca yathā vide |
 8.049.01c yo jaritr̥bhyo maghavā purūvasuḥ sahasreṇeva śikṣati ||
 8.049.02a śatānīkeva pra jigāti dhṛṣṇuyā hanti vṛtrāṇi dāsūṣe |
 8.049.02c girer iva pra rasā asya pinvire datrāṇi purubhojasaḥ ||
 8.049.03a ā tvā sutāsa indavo madā ya indra girvaṇaḥ |
 8.049.03c āpo na vajrinn anv okyaṃ saraḥ pṛṇanti śūra rādhasē ||
 8.049.04a anehasam prataraṇaṃ vivakṣaṇaṃ madhvaḥ svādiṣṭham im piba |
 8.049.04c ā yathā mandasānaḥ kirāsi naḥ pra kṣudreva tmanā dhṛṣat ||
 8.049.05a ā na stomam upa dravad dhiyāno aśvo na sotṛbhiḥ |
 8.049.05c yaṃ te svadhāvan svadayanti dhenava indra kaṇveṣu rātayaḥ ||
 8.049.06a ugraṃ na vīraṃ namaśopa sedima vibhūtim akṣitāvasum |
 8.049.06c udrīva vajrinn avato na siñcate kṣarantīndra dhītayaḥ ||
 8.049.07a yad dha nūnaṃ yad vā yajñe yad vā pṛthivyām adhi |
 8.049.07c ato no yajñam āsubhir mahemata ugra ugrebhir ā gahi ||
 8.049.08a ajirāso harayo ye ta āśavo vātā iva prasakṣiṇaḥ |
 8.049.08c yebhir apatyam manuṣaḥ pariṃyase yebhir viśvaṃ svar dṛśe ||
 8.049.09a etāvatas ta imaha indra sumnasya gomataḥ |
 8.049.09c yathā prāvo maghavan medhyātithiṃ yathā nīpātithiṃ dhane ||
 8.049.10a yathā kaṇve maghavan trasadasyavi yathā pakthe daśavraje |
 8.049.10c yathā gośarye asanor ṛjīśvanīndra gomad dhiraṇyavat ||

8.050.01a pra su śrutaṃ surādhasam arcā śakram abhiṣṭaye |
 8.050.01c yaḥ sunvate stuvate kāmyaṃ vasu sahasreṇeva maṃhate ||
 8.050.02a śatānīkā hetayo asya duṣṭarā indrasya samīṣo mahiḥ |
 8.050.02c girir na bhujmā maghavatsu pinvate yad im sutā amandiṣuḥ ||
 8.050.03a yad im sutāsa indavo 'bhi priyam amandiṣuḥ |
 8.050.03c āpo na dhāyi savanam ma ā vaso dughā ivopa dāsūṣe ||
 8.050.04a anehasaṃ vo havamānam ūtaye madhvaḥ kṣaranti dhītayaḥ |
 8.050.04c ā tvā vaso havamānāsa indava upa stotreṣu dadhire ||
 8.050.05a ā naḥ some svadhvara iyāno atyo na tośate |
 8.050.05c yaṃ te svadhāvan svadanti gūrtayaḥ paure chandayase havam ||
 8.050.06a pra vīraṃ ugraṃ viviciṃ dhanasṛtaṃ vibhūtim rādhaso mahaḥ |
 8.050.06c udrīva vajrinn avato vasutvanā sadā pīpetha dāsūṣe ||
 8.050.07a yad dha nūnam parāvati yad vā pṛthivyām divi |
 8.050.07c yujāna indra haribhir mahemata ṛṣva ṛṣvebhir ā gahi ||
 8.050.08a rathirāso harayo ye te asridha ojo vātasya pīprati |
 8.050.08c yebhir ni dasyum manuṣo nighoṣayo yebhiḥ svaḥ pariṃyase ||
 8.050.09a etāvatas te vaso vidyāma śūra navyasaḥ |
 8.050.09c yathā prāva etaśaṃ kṛtvye dhane yathā vaśaṃ daśavraje ||
 8.050.10a yathā kaṇve maghavan medhe adhvare dīrghanithe damūnasi |
 8.050.10c yathā gośarye asiṣāso adrivo mayi gotraṃ hariśriyam ||

8.051.01a yathā manau sāmvaraṇau somam indrāpibaḥ sutam |
 8.051.01c nīpātithau maghavan medhyātithau puṣṭigau śruṣṭigau sacā ||
 8.051.02a pārśadvānaḥ praskaṇvaṃ sam asādayac chayānaṃ jivrim uddhitam |

8.051.02c sahasrāṇy asiṣāsad gavām ṛṣis tvoto dasyave vṛkaḥ ||
 8.051.03a ya ukthebhir na vindhate cikid ya ṛṣicodanaḥ |
 8.051.03c indraṃ tam achā vada navyasyā maty ariṣyantam na bhojase ||
 8.051.04a yasmā arkam saptaśiṛṣānam ānṛcus tridhātum uttame pade |
 8.051.04c sa tv imā viśvā bhuvanāni cikradad ād ij janiṣṭa paumṣyam ||
 8.051.05a yo no dātā vasūnām indraṃ tam hūmahe vayam |
 8.051.05c vidmā hy asya sumatiṃ navīyasim gamema gomati vraje ||
 8.051.06a yasmai tvam vaso dānāya śikṣasi sa rāyas poṣam aśnute |
 8.051.06c tam tvā vayam maghavann indra girvaṇaḥ sutāvanto havāmahe ||
 8.051.07a kadā cana starīr asi nendra saścasi dāśuṣe |
 8.051.07c upopen nu maghavan bhūya in nu te dānam devasya pṛcyate ||
 8.051.08a pra yo nanakṣe abhy ojasā kriviṃ vadhaiḥ śuṣṇam nighoṣayan |
 8.051.08c yaded astambhit prathayann amūṃ divam ād ij janiṣṭa pārthivaḥ ||
 8.051.09a yasyāyam viśva āryo dāsaḥ śevadhipā ariḥ |
 8.051.09c tiraś cid arye ruśame pariṛavi tubhyet so ajyate rayiḥ ||
 8.051.10a turanyavo madhumantam ghrtaścutam viprāso arkam ānṛcuḥ |
 8.051.10c asme rayiḥ paprathe vṛṣṇyam śavo 'sme suvānāsa indavaḥ ||

8.052.01a yathā manau vivasvati somaṃ śakrāpibaḥ sutam |
 8.052.01c yathā trite chanda indra jujoṣasy āyau mādayase sacā ||
 8.052.02a pṛṣadhre medhye mātariśvanindra suvāne amandathāḥ |
 8.052.02c yathā somaṃ daśaśipre daśoṇye syūmaraśmāv ṛjūnasi ||
 8.052.03a ya ukthā kevalā dadhe yaḥ somaṃ dhṛṣitāpibat |
 8.052.03c yasmai viṣṇus trīṇi padā vicakrama upa mitrasya dharmabhiḥ ||
 8.052.04a yasya tvam indra stomeṣu cākano vāje vājiṃ chatakrato |
 8.052.04c tam tvā vayam sudughām iva goduho juhūmasi śravasyavaḥ ||
 8.052.05a yo no dātā sa naḥ pitā mahāṃ ugra iśānakṛt |
 8.052.05c ayāmann ugro maghavā purūvasur gor aśvasya pra dātu naḥ ||
 8.052.06a yasmai tvam vaso dānāya maṃhase sa rāyas poṣam invati |
 8.052.06c vasūyavo vasupatiṃ śatakratuṃ stomair indraṃ havāmahe ||
 8.052.07a kadā cana pra yuchasy ubhe ni pāsi janmanī |
 8.052.07c turīyāditya havanam ta indriyam ā tasthāv amṛtam divi ||
 8.052.08a yasmai tvam maghavann indra girvaṇaḥ śikṣo śikṣasi dāśuṣe |
 8.052.08c asmākam gira uta suṣṭutiṃ vaso kaṇvavac chṛṇudhī havam ||
 8.052.09a astāvi manma pūrvyam brahmendrāya vocata |
 8.052.09c pūrvīr ṛtasya bṛhatīr anūṣata stotur medhā aśṛkṣata ||
 8.052.10a sam indro rāyo bṛhatīr adhūnuta sam kṣoṇī sam u sūryam |
 8.052.10c sam śukrāsaḥ śucayaḥ sam gavāśiraḥ somā indram amandiṣuḥ ||

8.053.01a upamaṃ tvā maghonām jyeṣṭham ca vṛṣabhānām |
 8.053.01c pūrbhittamam maghavann indra govidam iśānam rāya īmahe ||
 8.053.02a ya āyūṃ kutsam atithigvam ardayo vāvṛdhāno dive-dive |
 8.053.02c tam tvā vayam haryaśvam śatakratuṃ vājayanto havāmahe ||
 8.053.03a ā no viśveṣām rasam madhvaḥ siñcantv adrayaḥ |
 8.053.03c ye parāvati sunvire janeṣv ā ye arvāvatindavaḥ ||
 8.053.04a viśvā dveṣāmsi jahi cāva cā kṛdhi viśve sanvantv ā vasu |
 8.053.04c śiṣṭeṣu cit te madirāso amśavo yatrā somasya tṛmpasi ||

8.053.05a indra nedīya ed ihi mitamedhābhir ūtibhiḥ |
 8.053.05c ā śaṃtama śaṃtamābhir abhiṣṭibhir ā svāpe svāpibhiḥ ||
 8.053.06a ājituram satpatim viśvacarṣaṇim kṛdhi prajāsv ābhagam |
 8.053.06c pra sū tirā śacībhir ye ta ukthinaḥ kratum punata ānuṣak ||
 8.053.07a yas te sādhiṣṭho 'vase te syāma bhareṣu te |
 8.053.07c vyaṃ hotrābhir uta devahūtibhiḥ sasavāṃso manāmahe ||
 8.053.08a ahaṃ hi te harivo brahma vājayur ājim yāmi sadotibhiḥ |
 8.053.08c tvām id eva tam ame sam aśvayur gavyur agre mathinām ||

8.054.01a etat ta indra vīryam gīrbhir gṛṇanti kāravaḥ |
 8.054.01c te stobhanta ūrjam āvan ghṛtaścutam paurāso nakṣan dhītibhiḥ ||
 8.054.02a nakṣanta indram avase sukṛtyayā yeṣāṃ suteṣu mandase |
 8.054.02c yathā saṃvarte amado yathā kṛśa evāsme indra matsva ||
 8.054.03a ā no viśve sajoṣaso devāso gantanopa naḥ |
 8.054.03c vasavo rudrā avase na ā gamañ chṛṇvantu maruto havam ||
 8.054.04a pūṣā viṣṇur havanam me sarasvaty avantu sapta sindhavaḥ |
 8.054.04c āpo vātaḥ parvatāso vanaspatiḥ śṛṇotu pṛthivī havam ||
 8.054.05a yad indra rādho asti te māghonam maghavattama |
 8.054.05c tena no bodhi sadhamādyo vṛdhe bhago dānāya vṛtrahan ||
 8.054.06a ājipate nṛpate tvam id dhi no vāja ā vakṣi suktrato |
 8.054.06c vīti hotrābhir uta devavitibhiḥ sasavāṃso vi śṛṇvire ||
 8.054.07a santi hy arya āśiṣa indra āyur janānām |
 8.054.07c asmān nakṣasva maghavann upāvase dhukṣasva pipyuṣim iṣam ||
 8.054.08a vyaṃ ta indra stomebhir vidhema tvam asmākaṃ śatakrato |
 8.054.08c mahi sthūram śaśayam rādho ahrayam praskaṇvāya ni tośaya ||

8.055.01a bhūrīd indrasya vīryam vy akhyam abhy āyati |
 8.055.01c rādhas te dasyave vṛka ||
 8.055.02a śatam śvetāsa ukṣaṇo divi tāro na rocante |
 8.055.02c mahnā divam na tastabhuh ||
 8.055.03a śatam veṇūñ chatam śunaḥ śatam carmāṇi mlātāni |
 8.055.03c śatam me balbajastukā aruṣiṇām catuḥśatam ||
 8.055.04a sudevā stha kāṇvāyanā vayo-vayo vicarantaḥ |
 8.055.04c aśvāso na caṅkramata ||
 8.055.05a ād it sāptasya carkirann ānūnasya mahi śravaḥ |
 8.055.05c śyāvīr atidhvasan pathaś cakṣuṣā cana saṃnaśe ||

8.056.01a prati te dasyave vṛka rādho adarśy ahrayam |
 8.056.01c dyaur na prathinā śavaḥ ||
 8.056.02a daśa mahyam pautakrataḥ sahasrā dasyave vṛkaḥ |
 8.056.02c nityād rāyo amamhata ||
 8.056.03a śatam me gardabhānām śatam ūrṇāvatīnām |
 8.056.03c śatam dāsāñ ati srajaḥ ||
 8.056.04a tatro api prāṇiyata pūtakratāyai vyaktā |
 8.056.04c aśvānām in na yūthyām ||
 8.056.05a acety agniś cikitur havyaṃ sa sumadrathaḥ |

8.056.05c agnih śukreṇa śociṣā bṛhat sūro arocata divi sūryo arocata ||

8.057.01a yuvaṃ devā kratunā pūrvyeṇa yuktā rathena taviṣaṃ yajatrā |

8.057.01c āgachataṃ nāsatyā śacībhir idam ṛtīyaṃ savanam pibāthaḥ ||

8.057.02a yuvāṃ devās traya ekādaśāsaḥ satyāḥ satyasya dadṛṣe purastāt |

8.057.02c asmākaṃ yajñam savanam juṣāṇā pātaṃ somam aśvinā dīdyagnī ||

8.057.03a panāyyaṃ tad aśvinā kṛtaṃ vāṃ vṛṣabho divo rajasaḥ pṛthivyāḥ |

8.057.03c sahasraṃ śamsā uta ye gaviṣṭau sarvāṃ it tāṃ upa yātā pibadhyai ||

8.057.04a ayaṃ vāṃ bhāgo nihito yajatremā giro nāsatyopa yātam |

8.057.04c pibatam somam madhumantam asme pra dāśvāṃsam avataṃ śacībhiḥ ||

8.058.01a yam ṛtvijo bahudhā kalpayantaḥ sacetaso yajñam imaṃ vahanti |

8.058.01c yo anūcāno brāhmaṇo yukta āsīt kā svit tatra yajamānasya saṃvit ||

8.058.02a eka evāgnir bahudhā samiddha ekaḥ sūryo viśvam anu prabhūtaḥ |

8.058.02c ekaivoṣāḥ sarvam idam vi bhāty ekaṃ vā idam vi babhūva sarvam ||

8.058.03a jyotiṣmantam ketumantam tricakraṃ sukham ratham suśadam bhūrivāram |

8.058.03c citrāmaghā yasya yoge 'dhijajñe tam vāṃ huve ati riktam pibadhyai ||

8.059.01a imāni vāṃ bhāgadheyāni sisrata indrāvaruṇā pra mahe suteṣu vāṃ |

8.059.01c yajñe-yajñe ha savanā bhuraṇyatho yat sunvate yajamānāya śikṣathaḥ ||

8.059.02a niṣṣidhvarīr oṣadhīr āpa āstām indrāvaruṇā mahimānam āsata |

8.059.02c yā sisratū rajasaḥ pāre adhvano yayoḥ śatrur nakir ādeva ohate ||

8.059.03a satyaṃ tad indrāvaruṇā kṛśasya vāṃ madhva ūrmiṃ duhate sapta vāñiḥ |

8.059.03c tābhir dāśvāṃsam avataṃ śubhas patī yo vāṃ adabdho abhi pāti cittibhiḥ ||

8.059.04a ghṛtapruṣaḥ saumyā jīradānavaḥ sapta svasāraḥ sadana ṛtasya |

8.059.04c yā ha vāṃ indrāvaruṇā ghṛtaścutas tābhir dhattam yajamānāya śikṣatam ||

8.059.05a avocāma mahate saubhagāya satyaṃ tveṣābhyām mahimānam indriyam |

8.059.05c asmān sv indrāvaruṇā ghṛtaścutas tribhiḥ sāptebhir avataṃ śubhas patī ||

8.059.06a indrāvaruṇā yad ṛṣibhyo manīṣāṃ vāco matiṃ śrutam adattam agre |

8.059.06c yāni sthānāny asṛjanta dhīrā yajñam tanvānās tapasābhy apaśyam ||

8.059.07a indrāvaruṇā saumanasam adṛptaṃ rāyas poṣaṃ yajamāneṣu dhattam |

8.059.07c prajām puṣṭim bhūtim asmāsu dhattam dirghāyutvāya pra tirataṃ na āyuh ||

8.060.01a agna ā yāhy agnibhir hotāraṃ tvā vṛṇīmahe |

8.060.01c ā tvām anaktu prayatā haviṣmatī yajīṣṭham barhir āsade ||

8.060.02a achā hi tvā sahasaḥ sūno aṅgiraḥ srucaś caranty adhvare |

8.060.02c ūrjo napātaṃ ghṛtakeśam īmahe 'gñiṃ yajñeṣu pūrvyam ||

8.060.03a agne kavir vedhā asi hotā pāvaka yakṣyaḥ |

8.060.03c mandro yajīṣṭho adhvareṣv īdyo viprebhiḥ śukra manmabhiḥ ||

8.060.04a adrogham ā vahośato yaviṣṭhya devāṃ ajasra vītaye |

8.060.04c abhi prayāṃsi sudhitā vaso gahi mandasva dhītibhir hitaḥ ||

8.060.05a tvam it saprathā asy agne trātar ṛtas kaviḥ |

8.060.05c tvām viprāsaḥ samidhāna dīdiva ā vivāsanti vedhasaḥ ||

8.060.06a śocā śociṣṭha dīdhi viśe mayo rāsva stotre mahāṃ asi |

8.060.06c devānām śarman mama santu sūrayaḥ śatrūṣāhaḥ svagnayaḥ ||

8.060.07a yathā cid vṛddham atasam agne saṃjūrvasi kṣami |
 8.060.07c evā daha mitramaho yo asmadhrug durmanmā kaś ca venati ||
 8.060.08a mā no martāya ripave rakṣasvine māghasamsāya rīradhaḥ |
 8.060.08c asredhadbhis tarānibhir yaviṣṭhya śivebhiḥ pāhi pāyubhiḥ ||
 8.060.09a pāhi no agna ekayā pāhy uta dvitīyayā |
 8.060.09c pāhi gīrbhis tisṛbhir ūrjām pate pāhi catasṛbhir vaso ||
 8.060.10a pāhi viśvasmād rakṣaso arāvṇaḥ pra sma vājeṣu no 'va |
 8.060.10c tvām id dhi nediṣṭhaṃ devatātaya āpiṃ nakṣāmahe vṛdhe ||
 8.060.11a ā no agne vayovṛdhaṃ rayim pāvaka śamsyam |
 8.060.11c rāsvā ca na upamāte purusṛhaṃ sunīti svayaśastaram ||
 8.060.12a yena vaṃsāma pṛtanāsu śardhataś taranto aya ādiśaḥ |
 8.060.12c sa tvam no vardha prayasā śacīvaso jinvā dhiyo vasuvidaḥ ||
 8.060.13a śisāno vṛṣabho yathāgniḥ śṛṅge davidhvat |
 8.060.13c tigmā asya hanavo na pratidhrṣe sujambhaḥ sahaso yahuḥ ||
 8.060.14a nahi te agne vṛṣabha pratidhrṣe jambhāso yad vitiṣṭhase |
 8.060.14c sa tvam no hotaḥ suhutaṃ haviṣ kṛdhi vaṃsvā no vāryā puru ||
 8.060.15a śeṣe vaneṣu mātūroḥ saṃ tvā martāsa indhate |
 8.060.15c atandro havayā vahasi haviṣkṛta ād id deveṣu rājasi ||
 8.060.16a sapta hotāras tam id īdate tvāgne sutyajam ahrayam |
 8.060.16c bhinatsy adriṃ tapasā vi śociśā prāgne tiṣṭha janāṃ ati ||
 8.060.17a agnim-agniṃ vo adhriguṃ huvema vṛktabarhiṣaḥ |
 8.060.17c agniṃ hitaprayasaḥ śasvatīṣv ā hotāraṃ carṣaṇinām ||
 8.060.18a ketena śarman sacate suśamaṇy agne tubhyaṃ cikitvanā |
 8.060.18c iṣaṇyayā naḥ pururūpam ā bhara vājam nediṣṭham ūtaye ||
 8.060.19a agne jaritar viśpatīś tepāno deva rakṣasaḥ |
 8.060.19c aproṣivān gṛhapatir mahāṃ asi divas pāyur duroṇayuḥ ||
 8.060.20a mā no rakṣa ā veśid āghṛṇivaso mā yātur yātumāvatām |
 8.060.20c parogavyūty anirām apa kṣudham agne sedha rakṣasvinaḥ ||

8.061.01a ubhayaṃ śṛṇavac ca na indro arvāg idaṃ vacaḥ |
 8.061.01c satrācyā maghavā somapītaye dhiyā śaviṣṭha ā gamat ||
 8.061.02a taṃ hi svarājam vṛṣabhaṃ tam ojase dhiṣaṇe niṣṭatakṣatuḥ |
 8.061.02c utopamānām prathamo ni śīdasi somakāmaṃ hi te manaḥ ||
 8.061.03a ā vṛṣasva purūvaso sutasyendrāndhasaḥ |
 8.061.03c vidmā hi tvā harivaḥ pṛtsu sāsahim adhrṣṭaṃ cid dadhrṣvaṇim ||
 8.061.04a aprāmisatya maghavan tathed asad indra kratvā yathā vaśaḥ |
 8.061.04c sanema vājam tava śiprinn avasā makṣū cid yanto adrivaḥ ||
 8.061.05a śagdy ū ṣu śacīpata indra viśvābhir ūtibhiḥ |
 8.061.05c bhagaṃ na hi tvā yaśasaṃ vasuvidam anu śūra carāmasi ||
 8.061.06a pauro aśvasya purukṛd gavām asy utso deva hiraṇyayaḥ |
 8.061.06c nakir hi dānam parimardhiṣat tve yad-yad yāmi tad ā bhara ||
 8.061.07a tvam hy ehi cerave vidā bhagaṃ vasuttaye |
 8.061.07c ud vāvṛṣasva maghavan gaviṣṭaya ud indrāśvamiṣṭaye ||
 8.061.08a tvam purū sahasrāṇi śatāni ca yūthā dānāya maṃhase |
 8.061.08c ā puramḍaram cakṛma vipravacasa indraṃ gāyanto 'vase ||
 8.061.09a avipro vā yad avidhad vipro vendra te vacaḥ |
 8.061.09c sa pra mamandat tvāyā śatakrato prācāmanyō ahaṃsana ||
 8.061.10a ugrabāhur mrakṣakṛtvā puramḍaro yadi me śṛṇavad dhavam |

8.061.10c vasūyavo vasupatiṃ śatakraṭum stomair indraṃ havāmahe ||
 8.061.11a na pāpāso manāmahe nārāyāso na jaḍhavaḥ |
 8.061.11c yad in nv indraṃ vṛṣaṇaṃ sacā sute sakhāyaṃ kṛṇavāmahai ||
 8.061.12a ugraṃ yuyujma pṛtanāsu sāsahim ṛṇakātim adābhyam |
 8.061.12c vedā bhṛmaṃ cit sanitā rathītamo vājinaṃ yam id ū naśat ||
 8.061.13a yata indra bhayāmahe tato no abhayaṃ kṛdhi |
 8.061.13c maghavañ chagdhi tava tan na ūtibhir vi dviṣo vi mṛdho jahi ||
 8.061.14a tvam hi rādhaspate rādhaso mahaḥ kṣayasyāsi vidhataḥ |
 8.061.14c taṃ tvā vayam maghavann indra girvaṇaḥ sutāvanto havāmahe ||
 8.061.15a indra spaḍ uta vṛtrahā paraspā no vareṇyaḥ |
 8.061.15c sa no rakṣiṣac caramaṃ sa madhyamaṃ sa paścāt pātu naḥ puraḥ ||
 8.061.16a tvam naḥ paścād adharād uttarāt pura indra ni pāhi viśvataḥ |
 8.061.16c āre asmat kṛṇuhi daivyam bhayam āre hetir adeviḥ ||
 8.061.17a adyādya śvaḥ-śva indra trāsva pare ca naḥ |
 8.061.17c viśvā ca no jaritṛn satpate ahā divā naktam ca rakṣiṣaḥ ||
 8.061.18a prabhaṅgī śūro maghavā tuvīmaghaḥ sammiślo viryāya kam |
 8.061.18c ubhā te bāhū vṛṣaṇā śatakrato ni yā vajram mimikṣatuḥ ||

8.062.01a pro asmā upastutim bharatā yaj jujoṣati |
 8.062.01c ukthair indrasya māhinaṃ vayo vardhanti somino
 8.062.01e bhadrā indrasya rātayaḥ ||
 8.062.02a ayujo asamo nṛbhir ekaḥ kṛṣṭir ayāsyah |
 8.062.02c pūrvīr ati pra vāvṛdhe viśvā jātāny ojasā
 8.062.02e bhadrā indrasya rātayaḥ ||
 8.062.03a ahitena cid arvatā jīradānuḥ siṣāsati |
 8.062.03c pravācyam indra tat tava vīryāṇi kariṣyato
 8.062.03e bhadrā indrasya rātayaḥ ||
 8.062.04a ā yāhi kṛṇavāma ta indra brahmāṇi vardhanā |
 8.062.04c yebhiḥ śaviṣṭha cākano bhadram iha śravasyate
 8.062.04e bhadrā indrasya rātayaḥ ||
 8.062.05a dhṛṣataś cid dhṛṣan manaḥ kṛṇoṣindra yat tvam |
 8.062.05c tīvraiḥ somaiḥ saparyato namobhiḥ pratibhūṣato
 8.062.05e bhadrā indrasya rātayaḥ ||
 8.062.06a ava caṣṭa ṛciṣamo 'vatām iva mānuṣaḥ |
 8.062.06c juṣṭvī dakṣasya sominaḥ sakhāyaṃ kṛṇute yujam
 8.062.06e bhadrā indrasya rātayaḥ ||
 8.062.07a viśve ta indra vīryam devā anu kratum daduḥ |
 8.062.07c bhuvo viśvasya gopatiḥ puruṣtuta bhadrā indrasya rātayaḥ ||
 8.062.08a gṛṇe tad indra te śava upamaṃ devatātaye |
 8.062.08c yad dhaṃsi vṛtram ojasā śacīpate bhadrā indrasya rātayaḥ ||
 8.062.09a samaneva vapuṣyataḥ kṛṇavan mānuṣā yugā |
 8.062.09c vide tad indraś cetanam adha śruto bhadrā indrasya rātayaḥ ||
 8.062.10a uj jātam indra te śava ut tvām ut tava kratum |
 8.062.10c bhūriḥ bhūri vāvṛdhur maghavan tava śarmaṇi
 8.062.10e bhadrā indrasya rātayaḥ ||
 8.062.11a ahaṃ ca tvam ca vṛtrahan saṃ yujyāva sanibhya ā |
 8.062.11c arātivā cid adrivo 'nu nau śūra maṃsate
 8.062.11e bhadrā indrasya rātayaḥ ||

8.062.12a satyam id vā u taṃ vayam indraṃ stavāma nānṛtam |
8.062.12c mahāṃ asunvato vadho bhūri jyotiṃṣi sunvato
8.062.12e bhadraṃ indrasya rātayaḥ ||

8.063.01a sa pūrvyo mahānāṃ venāḥ kratubhir ānaje |
8.063.01c yasya dvārā manuṣ pitā deveṣu dhiya ānaje ||
8.063.02a divo mānaṃ not sadan somaprṣṭhāso adrayaḥ |
8.063.02c ukthā brahma ca śaṃsyā ||
8.063.03a sa vidvāṃ aṅgirobhya indro gā avṛṇod apa |
8.063.03c stuṣe tad asya paumsyam ||
8.063.04a sa pratnathā kavivṛdha indro vākasya vakṣaṇiḥ |
8.063.04c śivo arkasya homany asmatrā gantv avase ||
8.063.05a ād ū nu te anu kratuṃ svāhā varasya yajyavaḥ |
8.063.05c śvātram arkā anūṣatendra gotrasya dāvane ||
8.063.06a indre viśvāni vīryā kṛtāni kartvāni ca |
8.063.06c yam arkā adhvaraṃ viduḥ ||
8.063.07a yat pāñcajanya yā viśendre ghoṣā asṛkṣata |
8.063.07c astrṇād barhaṇā vipo 'ryo mānasya sa kṣayaḥ ||
8.063.08a iyam u te anuṣṭutiś cakṛṣe tāni paumsyā |
8.063.08c prāvaś cakrasya vartanim ||
8.063.09a asya vṛṣṇo vyodana uru kramiṣṭa jīvase |
8.063.09c yavaṃ na paśva ā dade ||
8.063.10a tad dadhānā avasyavo yuṣmābhir dakṣapitaraḥ |
8.063.10c syāma marutvato vṛdhe ||
8.063.11a baḍ ṛtviyāya dhāmna ṛkvabhiḥ sūra nonumaḥ |
8.063.11c jeṣāmendra tvayā yujā ||
8.063.12a asme rudrā mehanā parvatāso vṛtrahatye bharahūtau sajoṣāḥ |
8.063.12c yaḥ śaṃsate stuvate dhāyi pajra indrajyeṣṭhā asmāṃ avantu devāḥ ||

8.064.01a ut tvā mandantu stomāḥ kṛṇuṣva rādho adrivaḥ |
8.064.01c ava brahmadviṣo jahi ||
8.064.02a padā paṇimṛ arādhaso ni bādhasva mahāṃ asi |
8.064.02c nahi tvā kaś cana prati ||
8.064.03a tvam īṣiṣe sutānām indra tvam asutānām |
8.064.03c tvam rājā janānām ||
8.064.04a ehi prehi kṣayo divy āghoṣāñ carṣaṇinām |
8.064.04c obhe pṛṇāsi rodasī ||
8.064.05a tyam cit parvataṃ giriṃ śatavantam sahasriṇam |
8.064.05c vi stotṛbhyo rurojitha ||
8.064.06a vayam u tvā divā sute vayam naktam havāmahe |
8.064.06c asmākaṃ kāmam ā pṛṇa ||
8.064.07a kva sya vṛṣabho yuvā tuvigrīvo anānataḥ |
8.064.07c brahmā kas taṃ saparyati ||
8.064.08a kasya svit savanaṃ vṛṣā jujuṣvāṃ ava gachati |
8.064.08c indraṃ ka u svid ā cake ||
8.064.09a kaṃ te dānā asakṣata vṛtrahan kaṃ suvīryā |
8.064.09c ukthe ka u svid antamaḥ ||

8.064.10a ayaṃ te mānuṣe jane somaḥ pūruṣu sūyate |
 8.064.10c tasyehi pra dravā piba ||
 8.064.11a ayaṃ te śaryaṇāvati suṣomāyām adhi priyaḥ |
 8.064.11c ārjikiye madintamaḥ ||
 8.064.12a tam adya rādhase mahe cārum madāya ghr̥ṣvaye |
 8.064.12c ehīm indra dravā piba ||

8.065.01a yad indra prāg apāg udañ nyag vā hūyase nṛbhiḥ |
 8.065.01c ā yāhi tūyam āsubhiḥ ||
 8.065.02a yad vā prasravaṇe divo mādayāse svarṇare |
 8.065.02c yad vā samudre andhasaḥ ||
 8.065.03a ā tvā gīrbhir mahām uruṃ huve gām iva bhojase |
 8.065.03c indra somasya pītaye ||
 8.065.04a ā ta indra mahimānaṃ harayo deva te mahaḥ |
 8.065.04c rathe vahantu bibhrataḥ ||
 8.065.05a indra gr̥ṇiṣa u stuṣe mahāṃ ugra īśānakṛt |
 8.065.05c ehi naḥ sutam piba ||
 8.065.06a sutāvantas tvā vayam prayasvanto havāmahe |
 8.065.06c idaṃ no barhir āsade ||
 8.065.07a yac cid dhi śāśvatām asīndra sādharmaṇas tvam |
 8.065.07c taṃ tvā vyaṃ havāmahe ||
 8.065.08a idaṃ te somyam madhv adhuḥṣann adribhir naraḥ |
 8.065.08c juṣāṇa indra tat piba ||
 8.065.09a viśvāṃ aryo vipaścito 'ti khyas tūyam ā gahi |
 8.065.09c asme dhehi śravo bṛhat ||
 8.065.10a dātā me pṛṣatinām rājā hiraṇyavinām |
 8.065.10c mā devā maghavā riṣat ||
 8.065.11a sahasre pṛṣatinām adhi ścandram bṛhat pṛthu |
 8.065.11c śukraṃ hiraṇyam ā dade ||
 8.065.12a napāto durgahasya me sahasreṇa surādhasaḥ |
 8.065.12c śravo deveṣv akrata ||

8.066.01a tarobhir vo vidadvasum indraṃ sabādha ūtaye |
 8.066.01c bṛhad gāyantaḥ sutasome adhvare huve bharaṃ na kāriṇam ||
 8.066.02a na yaṃ dudhrā varante na sthirā muro made suśipram andhasaḥ |
 8.066.02c ya ādṛtyā śāśamānāya sunvate dātā jaritra ukthyam ||
 8.066.03a yaḥ śakro mṛkṣo aśvyo yo vā kijo hiraṇyayaḥ |
 8.066.03c sa ūrvasya rejayaty apāvṛtim indro gavyasya vṛtrahā ||
 8.066.04a nikhātaṃ cid yaḥ purusambhṛtaṃ vasūd id vapati dāśuṣe |
 8.066.04c vajrī suśipro haryaśva it karad indraḥ kratvā yathā vaśat ||
 8.066.05a yad vāvantha puruṣtuta purā cic chūra nṛṇām |
 8.066.05c vyaṃ tat ta indra sam bharāmasi yajñam ukthaṃ turaṃ vacaḥ ||
 8.066.06a sacā someṣu puruhūta vajrivo madāya dyukṣa somapāḥ |
 8.066.06c tvam id dhi brahmakṛte kāmyaṃ vasu deṣṭhaḥ sunvate bhuvaḥ ||
 8.066.07a vyaṃ enam idā hyo 'pīpemeha vajriṇam |
 8.066.07c tasmā u adya samanā sutam bharā nūnam bhūṣata śrute ||
 8.066.08a vṛkaś cid asya vāraṇa urāmathir ā vayuneṣu bhūṣati |

8.066.08c semam na stomam jujusaṅa ā gahi indra pra citrayā dhiyā ||
 8.066.09a kad ū nv asyākṛtam indrasyaṣṭi paumṣyam |
 8.066.09c keno nu kam śromatena na śuśruve janusaḥ pari vṛtrahā ||
 8.066.10a kad ū mahīr adhrṣṭā asya taviṣiḥ kad u vṛtraghno aśṛtam |
 8.066.10c indro viśvān bekaṅāṭāṃ ahardṛśa uta kratvā paṅimr abhi ||
 8.066.11a vyaṃ ghā te apūrvyendra brahmāṅi vṛtrahan |
 8.066.11c purūtamāsaḥ puruhūta vajrivo bhṛtiṃ na pra bharāmasi ||
 8.066.12a pūrvīś cid dhi tve tuvikūrminn āśaso havanta indrotayaḥ |
 8.066.12c tiraś cid ayaḥ savanā vaso gahi śaviṣṭha śrudhi me havam ||
 8.066.13a vyaṃ ghā te tve id v indra viprā api śmasi |
 8.066.13c nahi tvad anyāḥ puruhūta kaś cana maghavann asti marḍitā ||
 8.066.14a tvam no asyā amater uta kṣudho 'bhiśaster ava sṛdhi |
 8.066.14c tvam na ūti tava citrayā dhiyā śikṣā śaciṣṭha gātuvit ||
 8.066.15a soma id vaḥ suto astu kalayo mā bibhītana |
 8.066.15c aped eṣa dhvasmāyati svayaṃ ghaiṣo apāyati ||

8.067.01a tyān nu kṣatriyāṃ āva ādityān yāciśāmahe |
 8.067.01c sumṛḍikāṃ abhiṣṭaye ||
 8.067.02a mitro no aty aṃhatim varuṅaḥ paśad ayaṃā |
 8.067.02c ādityāso yathā viduḥ ||
 8.067.03a teṣam hi citram ukthyam varūtham asti dāśuṣe |
 8.067.03c ādityānām araṃkṛte ||
 8.067.04a mahi vo mahatām avo varuṅa mitrāryaman |
 8.067.04c avāṃsy ā vṛṇīmahe ||
 8.067.05a jīvān no abhi dhetanādityāsaḥ purā hathāt |
 8.067.05c kad dha stha havanaśrutāḥ ||
 8.067.06a yad vaḥ śrāntāya sunvate varūtham asti yac chardiḥ |
 8.067.06c tenā no adhi vocata ||
 8.067.07a asti devā aṃhor urv asti ratnam anāgasāḥ |
 8.067.07c ādityā adbhutainasaḥ ||
 8.067.08a mā naḥ setuḥ siṣed ayam mahe vṛṅaktu nas pari |
 8.067.08c indra id dhi śruto vaśi ||
 8.067.09a mā no mṛcā ripūṅam vṛjinānām aviṣyavaḥ |
 8.067.09c devā abhi pra mṛkṣata ||
 8.067.10a uta tvām adite mahy aham devy upa bruve |
 8.067.10c sumṛḍikām abhiṣṭaye ||
 8.067.11a paśi dīne gabhīra āṃ ugraputre jighāṃsataḥ |
 8.067.11c mākis tokasya no riṣat ||
 8.067.12a aneho na uruvraja urūci vi prasartave |
 8.067.12c kṛdhi tokāya jīvase ||
 8.067.13a ye mūrdhānaḥ kṣitīnām adabdhāsaḥ svayaśasaḥ |
 8.067.13c vratā rakṣante adruhaḥ ||
 8.067.14a te na āsno vṛkāṅam ādityāso mumocata |
 8.067.14c stenam baddham ivādite ||
 8.067.15a apo ṣu ṅa iyaṃ śarur ādityā apa durmatih |
 8.067.15c asmādetv ajaghnuṣi ||
 8.067.16a śaśvad dhi vaḥ sudānava ādityā ūtibhir vyaṃ |
 8.067.16c purā nūnam bubhujmahe ||

8.067.17a śaśvantam hi pracetasah pratiyantam cid enasah |
 8.067.17c devāḥ kṛṇutha jīvase ||
 8.067.18a tat su no navyam sanyasa ādityā yan mumocati |
 8.067.18c bandhād baddham ivādite ||
 8.067.19a nāsmākam asti tat tara ādityāso atiṣkade |
 8.067.19c yūyam asmabhyam mṛdata ||
 8.067.20a mā no hetir vivasvata ādityāḥ kṛtrimā śaruḥ |
 8.067.20c purā nu jaraso vadhīt ||
 8.067.21a vi ṣu dveṣo vy aṃhatim ādityāso vi saṃhitam |
 8.067.21c viṣvag vi vṛhatā rapaḥ ||

8.068.01a ā tvā ratham yathotaye sumnāya vartayāmasi |
 8.068.01c tuvikūrmim ṛtīṣaham indra śaviṣṭha satpate ||
 8.068.02a tuviśuṣma tuvikrato śacīvo viśvayā mate |
 8.068.02c ā paprātha mahitvanā ||
 8.068.03a yasya te mahinā mahaḥ pari jmāyantam iyatuḥ |
 8.068.03c hastā vajram hiraṇyayam ||
 8.068.04a viśvānarasya vas patim anānatasya śavasah |
 8.068.04c evaiś ca carṣaṇīnām ūtī huve rathānām ||
 8.068.05a abhiṣṭaye sadāvṛdham svarmīdheṣu yaṃ naraḥ |
 8.068.05c nānā havanta ūtaye ||
 8.068.06a paromātram ṛciṣamam indram ugram surādhasam |
 8.068.06c iśānam cid vasūnām ||
 8.068.07a tam-tam id rādhasa maha indram codāmi pītaye |
 8.068.07c yaḥ pūrvyām anuṣṭutim iśe kṛṣṭinām nṛtuḥ ||
 8.068.08a na yasya te śavasāna sakhyam ānaṃśa martyaḥ |
 8.068.08c nakiḥ śavāṃsi te naśat ||
 8.068.09a tvotāsas tvā yujāpsu sūrye mahad dhanam |
 8.068.09c jayema pṛtsu vajrivaḥ ||
 8.068.10a tam tvā yajñebhir īmahe tam gīrbhir girvaṇastama |
 8.068.10c indra yathā cid āvitha vājeṣu purumāyyam ||
 8.068.11a yasya te svādu sakhyam svādvī praṇītir adrivaḥ |
 8.068.11c yajño vitantasāyyaḥ ||
 8.068.12a uru ṇas tanve tana uru kṣayāya nas kṛdhi |
 8.068.12c uru ṇo yandhi jīvase ||
 8.068.13a urum nṛbhya urum gava urum rathāya panthām |
 8.068.13c devavitim manāmahe ||
 8.068.14a upa mā ṣaḍ dvā-dvā naraḥ somasya harṣyā |
 8.068.14c tiṣṭhanti svādurātayaḥ ||
 8.068.15a ṛjṛāv indrota ā dade harī ṛkṣasya sūnavi |
 8.068.15c āśvamedhasya rohitā ||
 8.068.16a surathām ātithigve svabhiśūmr ārkṣe |
 8.068.16c āśvamedhe supeśasaḥ ||
 8.068.17a ṣaḍ āśvām ātithigva indrote vadhūmataḥ |
 8.068.17c sacā pūtakratau sanam ||
 8.068.18a aiṣu cetad vṛṣaṇvaty antar ṛjreṣv aruṣī |
 8.068.18c svabhiśuḥ kaśāvati ||
 8.068.19a na yuṣme vājabandhavo ninitśuś cana martyaḥ |

8.068.19c avadyam adhi dīdharat ||

- 8.069.01a pra-pra vas triṣṭubham iṣam mandadvīrāyendave |
8.069.01c dhiyā vo medhasātaye puramḍhyā vivāsati ||
8.069.02a nadam va odatinām nadam yoyuvatīnām |
8.069.02c patim vo aghnyānām dhenūnām iṣudhyasi ||
8.069.03a tā asya sūdadohasaḥ somam śrīṇanti pṛśnayaḥ |
8.069.03c janman devānām viśas triṣv ā rocane divaḥ ||
8.069.04a abhi pra gopatiṃ girendram arca yathā vide |
8.069.04c sūnum satyasya satpatim ||
8.069.05a ā harayaḥ sasṛjrire 'ruṣīr adhi barhiṣi |
8.069.05c yatrābhi samnavāmahe ||
8.069.06a indrāya gāva āśiram duduhre vajriṇe madhu |
8.069.06c yat sim upahvare vidat ||
8.069.07a ud yad bradhnasya viṣṭapam gṛham indraś ca ganvahi |
8.069.07c madhvaḥ pītvā sacevahi triḥ sapta sakhyuḥ pade ||
8.069.08a arcata prārcata priyamedhāso arcata |
8.069.08c arcantu putrakā uta puram na dhṛṣṇv arcata ||
8.069.09a ava svarāti gargaro godhā pari saniṣvaṇat |
8.069.09c piṅgā pari caniṣkadad indrāya brahmodyatam ||
8.069.10a ā yat patanty enyaḥ sudughā anapasphuraḥ |
8.069.10c apasphuram gṛbhāyata somam indrāya pātave ||
8.069.11a apād indro apād agnir viśve devā amatsata |
8.069.11c varuṇa id iha kṣayat tam āpo abhy anūṣata vatsam samśiśvarīr iva ||
8.069.12a sudevo asi varuṇa yasya te sapta sindhavaḥ |
8.069.12c anukṣaranti kākudam sūrmyam suṣirām iva ||
8.069.13a yo vyatīṃr aphāṇayat suyuktāṃ upa dāsūṣe |
8.069.13c takvo netā tad id vapur upamā yo amucyata ||
8.069.14a atīd u śakra ohata indro viśvā ati dviṣaḥ |
8.069.14c bhinat kanīna odanam pacyamānam paro girā ||
8.069.15a arbhako na kumārako 'dhi tiṣṭhan navam ratham |
8.069.15c sa pakṣan mahiṣam mṛgam pitre māt্রে vibhukratum ||
8.069.16a ā tū suśipra dampate ratham tiṣṭhā hiraṇyayam |
8.069.16c adha dyukṣam sacevahi sahasrapādādam aruṣam svastigām anehasam ||
8.069.17a tam ghem itthā namasvina upa svarājam āsate |
8.069.17c artham cid asya sudhitam yad etava āvartayanti dāvane ||
8.069.18a anu pratnasyaukasaḥ priyamedhāsa eṣām |
8.069.18c pūrvām anu prayatiṃ vṛktabarhiṣo hitaprayasa āśata ||

- 8.070.01a yo rājā carṣaṇīnām yātā rathebhīr adhriguḥ |
8.070.01c viśvāsām tarutā pṛtanānām jyeṣṭho yo vṛtrahā gṛṇe ||
8.070.02a indram tam śumbha puruhanmann avase yasya dvitā vidhartari |
8.070.02c hastāya vajraḥ prati dhāyi darśato maho dive na sūryaḥ ||
8.070.03a nakiṣ tam karmaṇā naśad yaś cakāra sadāvṛdham |
8.070.03c indram na yajñair viśvagūrtam ṛbhvasam adhrṣṭam dhṛṣṇvojasam ||
8.070.04a aṣāḍham ugram pṛtanāsu sāsahim yasmin mahīr urujrayaḥ |
8.070.04c sam dhenavo jāyamāne anonavur dyāvaḥ kṣāmo anonavuḥ ||

8.070.05a yad dyāva indra te śataṃ śatam bhūmīr uta syuḥ |
 8.070.05c na tvā vajrin sahasraṃ sūryā anu na jātam aṣṭa rodasī ||
 8.070.06a ā paprātha mahinā vṛṣṇyā vṛṣan viśvā śaviṣṭha śavasā |
 8.070.06c asmāṃ ava maghavan gomati vraje vajriṅ citrābhir ūtibhiḥ ||
 8.070.07a na sīm adeva āpad iṣaṃ dīrghāyo martyaḥ |
 8.070.07c etagvā cid ya etaśā yuyojate harī indro yuyojate ||
 8.070.08a taṃ vo maho mahāyāyam indraṃ dānāya sakṣaṇim |
 8.070.08c yo gādheṣu ya āraṇeṣu havyo vājeṣv asti havyaḥ ||
 8.070.09a ud ū ṣu ṇo vaso mahe mṛśasva sūra rādhase |
 8.070.09c ud ū ṣu mahyai maghavan maghattaya ud indra śravase mahe ||
 8.070.10a tvam na indra ṛtayus tvānido ni tṛmpasi |
 8.070.10c madhye vasiṣva tuvinṛmṇorvor ni dāsaṃ śiśnatho hathaiḥ ||
 8.070.11a anyavratam amānuṣam ayajvānam adevayum |
 8.070.11c ava svaḥ sakhā dudhuvīta parvataḥ sughnāya dasyum parvataḥ ||
 8.070.12a tvam na indrāsāṃ haste śaviṣṭha dāvane |
 8.070.12c dhānānāṃ na saṃ gṛbhāyāsmayur dviḥ saṃ gṛbhāyāsmayuḥ ||
 8.070.13a sakhāyaḥ kratum ichata kathā rādhāma śarasya |
 8.070.13c upastutim bhojaḥ sūrīr yo ahrayaḥ ||
 8.070.14a bhūribhiḥ samaha ṛṣibhir barhiṣmadbhi staviṣyase |
 8.070.14c yad ittham ekam-ekam ic chara vatsān parādadaḥ ||
 8.070.15a karṇagrhyā maghavā śauradevyo vatsaṃ nas tribhya ānayat |
 8.070.15c ajāṃ sūrīr na dhātave ||

8.071.01a tvam no agne mahobhiḥ pāhi viśvasyā arāteḥ |
 8.071.01c uta dviṣo martyasya ||
 8.071.02a nahi manyuḥ pauruṣeya īse hi vaḥ priyajāta |
 8.071.02c tvam id asi kṣapāvān ||
 8.071.03a sa no viśvebhir devebhir ūrjo napād bhadrāsoce |
 8.071.03c rayiṃ dehi viśvavāram ||
 8.071.04a na tam agne arātayo martam yuvanta rāyaḥ |
 8.071.04c yaṃ trāyase dāśvāṃsam ||
 8.071.05a yaṃ tvam vipra medhasātāv agne hinoṣi dhanāya |
 8.071.05c sa tavotī goṣu gantā ||
 8.071.06a tvam rayim puruvīram agne dāśuṣe martāya |
 8.071.06c pra ṇo naya vasyo acha ||
 8.071.07a uruṣyā ṇo mā parā dā aghāyate jātavedaḥ |
 8.071.07c durādhye martāya ||
 8.071.08a agne mākiṣ te devasya rātim adeva yuyota |
 8.071.08c tvam īsiṣe vasūnām ||
 8.071.09a sa no vasva upa māsy ūrjo napān māhinasya |
 8.071.09c sakhe vaso jaritṛbhyaḥ ||
 8.071.10a achā naḥ śiraśociṣaṃ giro yantu darśatam |
 8.071.10c achā yajñāso namasā purūvasum purupraśastam ūtaye ||
 8.071.11a agniṃ sūnuṃ sahaso jātavedasaṃ dānāya vāryāṇām |
 8.071.11c dvitā yo bhūd amṛto martyeṣv ā hotā mandratamo viśi ||
 8.071.12a agniṃ vo devayajyagnim prayaty adhvare |
 8.071.12c agniṃ dhīṣu prathamam agnim arvaty agniṃ kṣaitrāya sādhasē ||
 8.071.13a agnir iṣāṃ sakhye dadātu na īse yo vāryāṇām |

8.071.13c agniṃ toke tanaye śaśvad īmahe vasuṃ santam tanūpām ||
 8.071.14a agniṃ iḍiṣvāvase gāthābhiḥ śiraśociṣam |
 8.071.14c agniṃ rāye purumīḍha śrutam naro 'gniṃ suditaye chardiḥ ||
 8.071.15a agniṃ dveṣo yotavai no gṛṇīmasy agniṃ śam yoś ca dātave |
 8.071.15c viśvāsu vikṣv aviteva havyo bhuvad vastur iṣūṇām ||

8.072.01a haviṣ kṛṇudhvam ā gamad adhvaryur vanate punaḥ |
 8.072.01c vidvāṃ asya praśāsanam ||
 8.072.02a ni tigmam abhy aṃśuṃ sīdad dhotā manāv adhi |
 8.072.02c juṣāṇo asya sakhyam ||
 8.072.03a antar ichanti tam jane rudram paro manīṣayā |
 8.072.03c gṛbhṇanti jihvayā sasam ||
 8.072.04a jāmy atītape dhanur vayodhā aruhad vanam |
 8.072.04c dṛṣadam jihvayāvadhī ||
 8.072.05a caran vatso ruśann iha nidātāram na vindate |
 8.072.05c veti stotava ambyam ||
 8.072.06a uto nv asya yan mahad aśvāvad yojanam bṛhad |
 8.072.06c dāmā rathasya dadṛṣe ||
 8.072.07a duhanti saptaikām upa dvā pañca sṛjataḥ |
 8.072.07c tīrthe sindhor adhi svare ||
 8.072.08a ā daśabhir vivasvata indraḥ kośam acucyavīt |
 8.072.08c khedayā trivṛtā divaḥ ||
 8.072.09a pari tridhātur adhvaram jūrṇir eti navīyasī |
 8.072.09c madhvā hotāro añjate ||
 8.072.10a siñcanti namasāvataṃ uccācakram pariṃmānam |
 8.072.10c nīcīnabāram akṣitam ||
 8.072.11a abhyāram id adrayo niṣiktam puṣkare madhu |
 8.072.11c avatasya visarjane ||
 8.072.12a gāva upāvatāvatam mahī yajñasya rapsudā |
 8.072.12c ubhā karṇā hiraṇyayā ||
 8.072.13a ā sute siñcata śriyam rodasyor abhiśriyam |
 8.072.13c rasā dadhīta vṛṣabham ||
 8.072.14a te jānata svam okyam sam vatsāso na mātṛbhiḥ |
 8.072.14c mitho nasanta jāmbhiḥ ||
 8.072.15a upa srakveṣu bapsataḥ kṛṇvate dharuṇam divi |
 8.072.15c indre agnā namaḥ svaḥ ||
 8.072.16a adhuṣat pipyuṣīm iṣam ūrjam saptapadīm ariḥ |
 8.072.16c sūryasya sapta raśmibhiḥ ||
 8.072.17a somasya mitrāvaruṇoditā sūra ā dade |
 8.072.17c tad āturyasya bheṣajam ||
 8.072.18a uto nv asya yat padam haryatasya nidhānyam |
 8.072.18c pari dyam jihvayātanat ||

8.073.01a ud irāthām ṛtāyate yuñjāthām aśvinā ratham |
 8.073.01c anti ṣad bhūtu vām avah ||
 8.073.02a nimīśā cij javīyasā rathenā yātam aśvinā |
 8.073.02c anti ṣad bhūtu vām avah ||

8.073.03a upa str̥ṇītam atraye himena gharmam aśvinā |
 8.073.03c anti ṣad bhūtu vām avaḥ ||
 8.073.04a kuha sthaḥ kuha jagmathuḥ kuha śyeneva petathuḥ |
 8.073.04c anti ṣad bhūtu vām avaḥ ||
 8.073.05a yad adya karhi karhi cic chuśrūyātam imaṃ havam |
 8.073.05c anti ṣad bhūtu vām avaḥ ||
 8.073.06a aśvinā yāmahūtāmā nediṣṭhaṃ yāmy āpyam |
 8.073.06c anti ṣad bhūtu vām avaḥ ||
 8.073.07a avantam atraye gṛhaṃ kṛṇutaṃ yuvam aśvinā |
 8.073.07c anti ṣad bhūtu vām avaḥ ||
 8.073.08a varethe agnim ātapo vadate valgv atraye |
 8.073.08c anti ṣad bhūtu vām avaḥ ||
 8.073.09a pra saptavadhrir āśasā dhārām agner aśāyata |
 8.073.09c anti ṣad bhūtu vām avaḥ ||
 8.073.10a ihā gataṃ vṛṣaṇvasū śṛṇutam ma imaṃ havam |
 8.073.10c anti ṣad bhūtu vām avaḥ ||
 8.073.11a kim idaṃ vām purāṇavaj jarator iva śasyate |
 8.073.11c anti ṣad bhūtu vām avaḥ ||
 8.073.12a samānaṃ vām saajātyaṃ samāno bandhur aśvinā |
 8.073.12c anti ṣad bhūtu vām avaḥ ||
 8.073.13a yo vām rajāmsy aśvinā ratho viyāti rodasī |
 8.073.13c anti ṣad bhūtu vām avaḥ ||
 8.073.14a ā no gavyebhir aśvyaiḥ sahasrair upa gachatam |
 8.073.14c anti ṣad bhūtu vām avaḥ ||
 8.073.15a mā no gavyebhir aśvyaiḥ sahasrebhir ati khyatam |
 8.073.15c anti ṣad bhūtu vām avaḥ ||
 8.073.16a aruṇapsur uṣā abhūd akar jyotir ṛtāvarī |
 8.073.16c anti ṣad bhūtu vām avaḥ ||
 8.073.17a aśvinā su vicākaśad vṛkṣam paraśumāṃ iva |
 8.073.17c anti ṣad bhūtu vām avaḥ ||
 8.073.18a puram na dhṛṣṇav ā ruja kṛṣṇayā bādhitō viśā |
 8.073.18c anti ṣad bhūtu vām avaḥ ||

8.074.01a viśo-viśo vo atithiṃ vājayantaḥ purupriyam |
 8.074.01c agniṃ vo duryaṃ vaca stuṣe sūṣasya manmabhiḥ ||
 8.074.02a yaṃ janāso haviṣmanto mitraṃ na sarpirāsutim |
 8.074.02c praśamsanti praśastibhiḥ ||
 8.074.03a panyāmsaṃ jātavedasaṃ yo devatāty udyatā |
 8.074.03c havyāny airayat divi ||
 8.074.04a āganma vṛtrahantamaṃ jyeṣṭham agnim ānavam |
 8.074.04c yasya śrutarvā bṛhann ārkṣo anīka edhate ||
 8.074.05a amṛtaṃ jātavedasaṃ tiras tamāṃsi darśatam |
 8.074.05c ghṛtāhavanam iḍyam ||
 8.074.06a sabādho yaṃ janā ime 'gniṃ havyebhir iḍate |
 8.074.06c juhvānāso yatasrucaḥ ||
 8.074.07a iyaṃ te navyasī matir agne adhāyy asmā ā |
 8.074.07c mandra sujāta suktrato 'mūra dasmātithe ||
 8.074.08a sā te agne śamtāmā caniṣṭhā bhavatu priyā |

8.074.08c tayā vardhasva suṣṭutaḥ ||
 8.074.09a sā dyumnair dyumninī bṛhad upopa śravasi śravaḥ |
 8.074.09c dadhīta vṛtratūrye ||
 8.074.10a aśvam id gāṃ rathaprāṃ tveṣam indraṃ na satpatim |
 8.074.10c yasya śravāṃsi tūrvatha panyam-panyam ca kṛṣṭayaḥ ||
 8.074.11a yaṃ tvā gopavano girā caniṣṭhad agne āngiraḥ |
 8.074.11c sa pāvaka śrudhī havam ||
 8.074.12a yaṃ tvā janāsa iḍate sabādho vājasātaye |
 8.074.12c sa bodhi vṛtratūrye ||
 8.074.13a ahaṃ huvāna ārkṣe śrutarvaṇi madacyuti |
 8.074.13c śardhāṃsīva stukāvinām mṛkṣā śīrṣā caturṇām ||
 8.074.14a mām catvāra āśavaḥ śaviṣṭhasya dravitnavaḥ |
 8.074.14c surathāso abhi prayo vakṣan vayo na tugryam ||
 8.074.15a satyam it tvā mahenadi paruṣṇy ava dediśam |
 8.074.15c nem āpo aśvadātaraḥ śaviṣṭhād asti martyaḥ ||

8.075.01a yukṣvā hi devahūtamāṃ aśvāṃ agne rathīr iva |
 8.075.01c ni hotā pūrvyaḥ sadaḥ ||
 8.075.02a uta no deva devāṃ achā voco viduṣṭaraḥ |
 8.075.02c śrad viśvā vāryā kṛdhi ||
 8.075.03a tvaṃ ha yad yaviṣṭhya sahasaḥ sūnav āhuta |
 8.075.03c ṛtāvā yajñīyo bhuvaḥ ||
 8.075.04a ayam agniḥ sahasriṇo vājasya śatīnas patiḥ |
 8.075.04c mūrdhā kavī rayīṇām ||
 8.075.05a taṃ nemim ṛbhavo yathā namasva sahūtibhiḥ |
 8.075.05c nediyo yajñam āngiraḥ ||
 8.075.06a tasmai nūnam abhidyaive vācā virūpa nityayā |
 8.075.06c vṛṣṇe codasva suṣṭutim ||
 8.075.07a kam u ṣvid asya senayāgner apākacakṣasaḥ |
 8.075.07c paṇim goṣu starāmahe ||
 8.075.08a mā no devānām viśaḥ prasnātīr ivosrāḥ |
 8.075.08c kṛśam na hāsura aghnyāḥ ||
 8.075.09a mā naḥ samasya dūḍhyaḥ paridveṣaso aṃhatiḥ |
 8.075.09c ūrmir na nāvam ā vadhīt ||
 8.075.10a namas te agna ojase gṛṇanti deva kṛṣṭayaḥ |
 8.075.10c amair amitram ardaya ||
 8.075.11a kuvit su no gaviṣṭaye 'gne saṃveṣiṣo rayim |
 8.075.11c urukṛd uru ṇas kṛdhi ||
 8.075.12a mā no asmin mahādhanē parā varg bhārabhṛd yathā |
 8.075.12c saṃvargaṃ saṃ rayim jaya ||
 8.075.13a anyam asmad bhiyā iyam agne siṣaktu duchunā |
 8.075.13c vardhā no amavac chavaḥ ||
 8.075.14a yasyājuṣan namasvinaḥ śamīm adurmakhasya vā |
 8.075.14c taṃ ghed agnir vṛdhāvati ||
 8.075.15a parasyā adhi saṃvato 'varāṃ abhy ā tara |
 8.075.15c yatrāham asmi tāṃ ava ||
 8.075.16a vidmā hi te purā vayam agne pitur yathāvasaḥ |
 8.075.16c adhā te sumnam īmahe ||

8.076.01a imaṃ nu māyinaṃ huva indram īśānam ojasā |
 8.076.01c marutvantam na vṛñjase ||
 8.076.02a ayam indro marutsakhā vi vṛtrasyābhinac chirah |
 8.076.02c vajreṇa śataparvanā ||
 8.076.03a vāvṛdhāno marutsakhendro vi vṛtram airayat |
 8.076.03c sṛjan samudriyā apaḥ ||
 8.076.04a ayam ha yena vā idaṃ svar marutvatā jitam |
 8.076.04c indreṇa somapītaye ||
 8.076.05a marutvantam ṛjīṣiṇam ojasvantam virapśinam |
 8.076.05c indram gīrbhir havāmahe ||
 8.076.06a indram pratnena manmanā marutvantam havāmahe |
 8.076.06c asya somasya pītaye ||
 8.076.07a marutvāṃ indra miḍhvaḥ pibā somaṃ śatakrato |
 8.076.07c asmin yajñe puruṣṭuta ||
 8.076.08a tubhyed indra marutvate sutāḥ somāso adrivaḥ |
 8.076.08c hṛdā hūyanta ukthinaḥ ||
 8.076.09a pibed indra marutsakhā sutam somaṃ diviṣṭiṣu |
 8.076.09c vajram śīsāna ojasā ||
 8.076.10a uttiṣṭhann ojasā saha pītvī śipre avepayah |
 8.076.10c somam indra camū sutam ||
 8.076.11a anu tvā rodasī ubhe krakṣamāṇam akṛpetām |
 8.076.11c indra yad dasyuhābhavaḥ ||
 8.076.12a vācam aṣṭāpadīm ahaṃ navasraktim ṛtasprśam |
 8.076.12c indrāt pari tanvam mame ||

8.077.01a jajñāno nu śatakatur vi pṛchad iti mātaram |
 8.077.01c ka ugrāḥ ke ha śṛṇvire ||
 8.077.02a ād im śavasy abravīd aurnāvābham ahīśuvam |
 8.077.02c te putra santu niṣṭuraḥ ||
 8.077.03a sam it tāt vṛtrahākhidat khe arāṃ iva khedayā |
 8.077.03c pravṛddho dasyuhābhavat ||
 8.077.04a ekayā pratidhāpibat sākam sarāṃsi triṃśatam |
 8.077.04c indrah somasya kāṇukā ||
 8.077.05a abhi gandharvam aṛṇad abudhneṣu rajassv ā |
 8.077.05c indro brahmabhya id vṛdhe ||
 8.077.06a nir āvidhyad giribhya ā dhārayat pakvam odanam |
 8.077.06c indro bundam svātataḥ ||
 8.077.07a śatabradhna iṣus tava sahasraparṇa eka it |
 8.077.07c yam indra cakṛṣe yujam ||
 8.077.08a tena stotr̥bhya ā bhara nṛbhyo nāribhyo attave |
 8.077.08c sadyo jāta ṛbhuṣṭhira ||
 8.077.09a etā cyautnāni te kṛtā varṣiṣṭhāni pariṇasā |
 8.077.09c hṛdā vīdv adhārayah ||
 8.077.10a viśvet tā viṣṇur ābharad urukramas tveṣitaḥ |
 8.077.10c śatam mahiṣān kṣīrapākam odanam varāham indra emuṣam ||
 8.077.11a tuvikṣam te sukṛtam sūmayam dhanuḥ sādhuḥ bundo hiraṇyayah |

8.077.11c ubhā te bāhū raṇyā susaṃskṛta ṛdūpe cid ṛdūvṛdhā ||

8.078.01a puroḍāsaṃ no andhasa indra sahasram ā bhara |

8.078.01c śatā ca śūra gonām ||

8.078.02a ā no bhara vyañjanam gām aśvam abhyañjanam |

8.078.02c sacā manā hiraṇyayā ||

8.078.03a uta naḥ karṇasobhanā purūṇi dhṛṣṇav ā bhara |

8.078.03c tvam hi śṛṇviṣe vaso ||

8.078.04a nakim vṛdhika indra te na suśā na sudā uta |

8.078.04c nānyas tvac chūra vāghataḥ ||

8.078.05a nakim indro nikartave na śakraḥ pariśaktave |

8.078.05c viśvam śṛṇoti paśyati ||

8.078.06a sa manyum martyānām adabdho ni cikīṣate |

8.078.06c purā nidaś cikīṣate ||

8.078.07a kratva it pūrnam udaram turasyāsti vidhataḥ |

8.078.07c vṛtraghnaḥ somapāvnaḥ ||

8.078.08a tve vasūni saṃgatā viśvā ca soma saubhagā |

8.078.08c sudātv aparihṛtā ||

8.078.09a tvām id yavayur mama kāmo gavyur hiraṇyayuḥ |

8.078.09c tvām aśvayur eṣate ||

8.078.10a taved indrāham āśasā haste dātram canā dade |

8.078.10c dinasya vā maghavan sambhṛtasya vā pūrdhi yavasya kāśinā ||

8.079.01a ayaṃ kṛtnur agrbhīto viśvajid udbhid it somaḥ |

8.079.01c ṛṣir vipraḥ kāvyena ||

8.079.02a abhy ūṇoti yan nagnam bhiṣakti viśvam yat turam |

8.079.02c prem andhaḥ khyan niḥ śroṇo bhūt ||

8.079.03a tvam soma tanūkṛdbhyo dveṣobhyo 'nyakṛtebhyaḥ |

8.079.03c uru yantāsi varūtham ||

8.079.04a tvam citti tava dakṣair diva ā pṛthivyā ṛjīṣin |

8.079.04c yāvīr aghasya cid dveṣaḥ ||

8.079.05a arthino yanti ced artham gachān id daduṣo rātim |

8.079.05c vavṛjyus tṛṣyataḥ kāmam ||

8.079.06a vidad yat pūrvyam naṣtam ud im ṛtāyum īrayat |

8.079.06c prem āyus tārid atīrnam ||

8.079.07a suśevo no mṛḍayākur adṛptakatur avātaḥ |

8.079.07c bhavā naḥ soma śam hṛde ||

8.079.08a mā naḥ soma sam vīvijo mā vi bībhiṣathā rājan |

8.079.08c mā no hārdi tviṣā vadhīḥ ||

8.079.09a ava yat sve sadhasthe devānām durmatīr ikṣe |

8.079.09c rājann apa dviṣaḥ sedha miḍhvo apa sridhaḥ sedha ||

8.080.01a nahy anyam baḍākaram marḍitāram śatakrato |

8.080.01c tvam na indra mṛḍaya ||

8.080.02a yo naḥ śasvat purāvithāmṛdhro vājasātaye |

8.080.02c sa tvam na indra mṛḍaya ||

8.080.03a kim aṅga radhracodanaḥ sunvānasyāvited asi |
 8.080.03c kuvit sv indra ṇaḥ śakaḥ ||
 8.080.04a indra pra ṇo ratham ava paścāc cit santam adrivaḥ |
 8.080.04c purastād enam me kṛdhi ||
 8.080.05a hanto nu kim āsase prathamam no ratham kṛdhi |
 8.080.05c upamam vājayu śravaḥ ||
 8.080.06a avā no vājayum ratham sukaram te kim it pari |
 8.080.06c asmān su jigyuṣas kṛdhi ||
 8.080.07a indra dṛhyasva pūr asi bhadra ta eti niṣkṛtam |
 8.080.07c iyam dhīr ṛtviyāvatī ||
 8.080.08a mā sīm avadya ā bhāg urvī kāṣṭhā hitam dhanam |
 8.080.08c apāvṛktā aratnayaḥ ||
 8.080.09a turīyam nāma yajñīyam yadā karas tad uśmasi |
 8.080.09c ād it patir na ohase ||
 8.080.10a avivṛdhad vo amṛtā amandīd ekadyūr devā uta yās ca devīḥ |
 8.080.10c tasmā u rādhaḥ kṛṇuta praśastam prātar makṣū dhiyāvasur jagamyāt ||

8.081.01a ā tū na indra kṣumantam citram grābham sam gṛbhāya |
 8.081.01c mahāhastī dakṣiṇena ||
 8.081.02a vidmā hi tvā tuvikūrmim tuvideṣṇam tuvīmagham |
 8.081.02c tuvimātram avobhiḥ ||
 8.081.03a nahi tvā śūra devā na martāso ditsantam |
 8.081.03c bhīmam na gām vārayante ||
 8.081.04a eto nv indram stavāmeśānam vasvaḥ svarājam |
 8.081.04c na rādhasā mardhiṣan naḥ ||
 8.081.05a pra stoṣad upa gāsiṣac chrvat sāma giyamānam |
 8.081.05c abhi rādhasā jugurat ||
 8.081.06a ā no bhara dakṣiṇenābhi savyena pra mṛśa |
 8.081.06c indra mā no vasor nir bhāk ||
 8.081.07a upa kramasvā bhara dhṛṣatā dhṛṣṇo janānām |
 8.081.07c adāsūṣṭarasya vedaḥ ||
 8.081.08a indra ya u nu te asti vājo viprebhiḥ sanitvaḥ |
 8.081.08c asmābhiḥ su tam sanuhi ||
 8.081.09a sadyojivas te vājā asmabhyam viśvaścandrāḥ |
 8.081.09c vaśaiś ca makṣū jarante ||

8.082.01a ā pra drava parāvato 'rvāvataś ca vṛtrahan |
 8.082.01c madhvaḥ prati prabharmaṇi ||
 8.082.02a tivrāḥ somāsa ā gahi sutāso mādayiṣṇavaḥ |
 8.082.02c pibā dadhṛg yathociṣe ||
 8.082.03a iṣā mandasvād u te 'ram varāya manyave |
 8.082.03c bhuvat ta indra śam hṛde ||
 8.082.04a ā tv aśatrav ā gahi ny ukthāni ca hūyase |
 8.082.04c upame rocane divaḥ ||
 8.082.05a tubhyāyam adribhiḥ suto gobhiḥ śrito madāya kam |
 8.082.05c pra soma indra hūyate ||
 8.082.06a indra śrudhi su me havam asme sutasya gomataḥ |

8.082.06c vi pītiṃ tṛptim aśnuhi ||
8.082.07a ya indra camaseṣv ā somaś camūṣu te sutaha |
8.082.07c pibed asya tvam īśiṣe ||
8.082.08a yo apsu candramā iva somaś camūṣu dadṛṣe |
8.082.08c pibed asya tvam īśiṣe ||
8.082.09a yaṃ te śyenaḥ padābharat tiro rajāṃsy asṛtam |
8.082.09c pibed asya tvam īśiṣe ||

8.083.01a devānām id avo mahat tad ā vṛṇīmahe vayam |
8.083.01c vṛṣṇām asmabhyam ūtaye ||
8.083.02a te naḥ santu yujaḥ sadā varuṇo mitro aryamā |
8.083.02c vṛdhāsaś ca pracetasaha ||
8.083.03a ati no viṣpitā puru naubhir apo na parṣatha |
8.083.03c yūyam ṛtasya rathyaḥ ||
8.083.04a vāmaṃ no astv aryaman vāmaṃ varuṇa śaṃsyam |
8.083.04c vāmaṃ hy āvṛṇīmahe ||
8.083.05a vāmasya hi pracetasa īśānāśo riśādasaḥ |
8.083.05c nem ādityā aghasya yat ||
8.083.06a vayam id vaḥ sudānavaḥ kṣiyanto yānto adhvann ā |
8.083.06c devā vṛdhāya hūmahe ||
8.083.07a adhi na indraiṣāṃ viṣṇo sajātyānām |
8.083.07c itā maruto aśvinā ||
8.083.08a pra bhrātṛtvaṃ sudānavo 'dha dvitā samānyā |
8.083.08c mātur garbhe bharāmahe ||
8.083.09a yūyaṃ hi ṣṭhā sudānava indrajyeṣṭhā abhidyavaḥ |
8.083.09c adhā cid va uta bruve ||

8.084.01a preṣṭhaṃ vo atithiṃ stuṣe mitram iva priyam |
8.084.01c agniṃ rathaṃ na vedyam ||
8.084.02a kavim iva pracetasam yaṃ devāso adha dvitā |
8.084.02c ni martyeṣv ādadhuḥ ||
8.084.03a tvam yaviṣṭha dāśuṣo nṛmḥ pāhi śṛṇudhī giraḥ |
8.084.03c rakṣā tokam uta tmanā ||
8.084.04a kayā te agne aṅgira ūrjo napād upastutim |
8.084.04c varāya deva manyave ||
8.084.05a dāśema kasya manasā yajñasya sahaso yaho |
8.084.05c kad u voca idam namaḥ ||
8.084.06a adhā tvam hi nas karo viśvā asmabhyam sukṣitīḥ |
8.084.06c vājadraviṇaso giraḥ ||
8.084.07a kasya nūnam pariṇaso dhiyo jinvasi dampate |
8.084.07c goṣātā yasya te giraḥ ||
8.084.08a tam marjayanta sukratum puroyāvānam ājiṣu |
8.084.08c sveṣu kṣayeṣu vājinam ||
8.084.09a kṣeti kṣemebhiḥ sādhubhir nakir yaṃ ghnanti hanti yaḥ |
8.084.09c agne suvira edhate ||

8.085.01a ā me havam nāsatyāśvinā gachatam yuvam |
 8.085.01c madhvaḥ somasya pītaye ||
 8.085.02a imam me stomam aśvinemam me śṛṅgutam havam |
 8.085.02c madhvaḥ somasya pītaye ||
 8.085.03a ayam vām kṛṣṇo aśvinā havate vājinivasū |
 8.085.03c madhvaḥ somasya pītaye ||
 8.085.04a śṛṅgutam jaritur havam kṛṣṇasya stuvato narā |
 8.085.04c madhvaḥ somasya pītaye ||
 8.085.05a chardir yantam adābhyam viprāya stuvate narā |
 8.085.05c madhvaḥ somasya pītaye ||
 8.085.06a gachatam dāśuṣo gṛham itthā stuvato aśvinā |
 8.085.06c madhvaḥ somasya pītaye ||
 8.085.07a yuñjātham rāsabham rathe vidvaṅge vṛṣaṅvasū |
 8.085.07c madhvaḥ somasya pītaye ||
 8.085.08a trivandhureṇa trivṛtā rathenā yātam aśvinā |
 8.085.08c madhvaḥ somasya pītaye ||
 8.085.09a nū me giro nāsatyāśvinā prāvataṃ yuvam |
 8.085.09c madhvaḥ somasya pītaye ||

8.086.01a ubhā hi dasrā bhiṣajā mayobhuvobhā dakṣasya vacaso babhūvathuḥ |
 8.086.01c tā vām viśvako havate tanūkrthe mā no vi yauştam sakhyā mumocatam ||
 8.086.02a kathā nūnam vām vimanā upa stavad yuvam dhiyam dadathur vasyaiṣṭaye |
 8.086.02c tā vām viśvako havate tanūkrthe mā no vi yauştam sakhyā mumocatam ||
 8.086.03a yuvam hi śmā purubhujemam edhatum viṣṇāpve dadathur vasyaiṣṭaye |
 8.086.03c tā vām viśvako havate tanūkrthe mā no vi yauştam sakhyā mumocatam ||
 8.086.04a uta tyam vīram dhanasām ṛjīṣiṇam dūre cit santam avase havāmahe |
 8.086.04c yasya svādiṣṭhā sumatiḥ pitur yathā mā no vi yauştam sakhyā mumocatam ||
 8.086.05a ṛtena devaḥ savitā śamāyata ṛtasya śṛṅgam urviyā vi paprathe |
 8.086.05c ṛtam sāsāha mahi cit pṛtanyato mā no vi yauştam sakhyā mumocatam ||

8.087.01a dyumnī vām stomo aśvinā krivir na seka ā gatam |
 8.087.01c madhvaḥ sutasya sa divi priyo narā pātam gaurāv iveriṇe ||
 8.087.02a pibataṃ gharmam madhumantam aśvinā barhiḥ sīdatam narā |
 8.087.02c tā mandasānā manuṣo duroṇa ā ni pātam vedasā vayaḥ ||
 8.087.03a ā vām viśvābhir ūtibhiḥ priyamedhā ahūṣata |
 8.087.03c tā vartir yātam upa vṛktabarhiṣo juṣtam yajñam diviṣṭiṣu ||
 8.087.04a pibataṃ somam madhumantam aśvinā barhiḥ sīdatam sumat |
 8.087.04c tā vāvṛdhānā upa suṣṭutim divo gantaṃ gaurāv iveriṇam ||
 8.087.05a ā nūnam yātam aśvināśvebhiḥ pruṣitapsubhiḥ |
 8.087.05c dasrā hiraṇyavartanī śubhas patī pātam somam ṛtāvṛdhā ||
 8.087.06a vayam hi vām havāmahe vipanyavo viprāso vājasātaye |
 8.087.06c tā valgū dasrā purudamsasā dhiyāśvinā śruṣṭy ā gatam ||

8.088.01a tam vo dasmam ṛtiṣaham vasor mandānam andhasaḥ |
 8.088.01c abhi vatsam na svasareṣu dhenava indram gīrbhir navāmahe ||
 8.088.02a dyukṣam sudānum taviṣibhir āvṛtam giriṃ na purubhojasam |

8.088.02c kṣumantaṃ vājaṃ śatinaṃ sahasriṇaṃ makṣū gomantaṃ īmahe ||
 8.088.03a na tvā bṛhanto adrayo varanta indra vīdavaḥ |
 8.088.03c yad ditsasi stuvate māvate vasu nakiṣ ṭad ā mināti te ||
 8.088.04a yoddhāsi kratvā śavasota daṃsanā viśvā jātābhi majmanā |
 8.088.04c ā tvāyam arka ūtaye vavartati yaṃ gotamā ajījanan ||
 8.088.05a pra hi ririkṣa ojasā divo antebhyas pari |
 8.088.05c na tvā vivyāca raja indra pārthivam anu svadhāṃ vavakṣitha ||
 8.088.06a nakiḥ pariṣṭir maghavan maghasya te yad dāśuṣe daśasyasi |
 8.088.06c asmākam bodhy ucathasya coditā maṃhiṣṭho vājasātaye ||

8.089.01a bṛhad indrāya gāyata maruto vṛtrahantamam |
 8.089.01c yena jyotir ajanayann ṛtāvṛdho devaṃ devāya jāgṛvi ||
 8.089.02a apādhamad abhiśastir aśastihāthendro dyumny ābhavat |
 8.089.02c devās ta indra sakhyāya yemire bṛhadbhāno marudgaṇa ||
 8.089.03a pra va indrāya bṛhate maruto brahmārcata |
 8.089.03c vṛtraṃ hanati vṛtrahā śatakratur vajreṇa śataparvaṇā ||
 8.089.04a abhi pra bhara dhṛṣatā dhṛṣanmanaḥ śravaś cit te asad bṛhat |
 8.089.04c arṣantv āpo jvasā vi mātaro hano vṛtraṃ jayā svaḥ ||
 8.089.05a yaj jāyathā apūrvya maghavan vṛtrahatyāya |
 8.089.05c tat pṛthivīm aprathayas tad astabhna uta dyām ||
 8.089.06a tat te yajño ajāyata tad arka uta haskṛtiḥ |
 8.089.06c tad viśvam abhibhūr asi yaj jātaṃ yac ca jantvam ||
 8.089.07a āmasu pakvam airaya ā sūryaṃ rohayo divi |
 8.089.07c ghamaṃ na sāman tapatā suvṛktibhir juṣṭaṃ girvaṇase bṛhat ||

8.090.01a ā no viśvāsu havya indraḥ samatsu bhūṣatu |
 8.090.01c upa brahmāṇi savanāni vṛtrahā paramajyā ṛciśamaḥ ||
 8.090.02a tvam dātā prathamo rādhasām asy asi satya īśanakṛt |
 8.090.02c tuvidyumnyasya yujyā vṛṇīmahe putrasya śavaso mahaḥ ||
 8.090.03a brahmā ta indra girvaṇaḥ kriyante anatidbhutā |
 8.090.03c imā juṣasva haryaśva yojanendra yā te amanmahi ||
 8.090.04a tvam hi satyo maghavann anānato vṛtrā bhūri nyṛṇjase |
 8.090.04c sa tvam śaviṣṭha vajrahasta dāśuṣe 'rvāñcaṃ rayim ā kṛdhi ||
 8.090.05a tvam indra yaśā asy ṛjīṣi śavasaṃ pate |
 8.090.05c tvam vṛtrāṇi haṃsy apratīny eka id anuttā carṣaṇīdhṛtā ||
 8.090.06a tam u tvā nūnam asura pracetasam rādho bhāgam ivemahe |
 8.090.06c mahīva kṛttiḥ śaraṇā ta indra pra te sumnā no aśnavan ||

8.091.01a kanyā vār avāyatī somam api srutāvidat |
 8.091.01c astam bharanty abravīd indrāya sunavai tvā śakrāya sunavai tvā ||
 8.091.02a asau ya eṣi vīrako gṛhaṃ-gṛhaṃ vicākaśad |
 8.091.02c imaṃ jambhasutam piba dhānāvantaṃ karambhiṇam apūpavantaṃ ukthinam ||
 8.091.03a ā cana tvā cikitsāmo 'dhi cana tvā nemasi |
 8.091.03c śanair iva śanakair ivendrāyendo pari srava ||
 8.091.04a kuvic chakat kuvit karat kuvin no vasyasas karat |
 8.091.04c kuvit patidviṣo yatir indreṇa saṃgamāmahai ||

- 8.091.05a imāni trīṇi viṣṭapā tānīndra vi rohaya |
8.091.05c śiras tatasyorvarām ād idam ma upodare ||
8.091.06a asau ca yā na urvarād imāṃ tanvam mama |
8.091.06c atho tatasya yac chirah sarvā tā romaśā kṛdhi ||
8.091.07a khe rathasya khe 'nasaḥ khe yugasya śatakrato |
8.091.07c apālām indra triṣ pūtvya akṛṇoḥ sūryatvacam ||
- 8.092.01a pāntam ā vo andhasa indram abhi pra gāyata |
8.092.01c viśvāsāhaṃ śatakratum maṃhiṣṭhaṃ carṣaṇīnām ||
8.092.02a puruhūtam puruṣtutaṃ gāthānyam sanaśrutam |
8.092.02c indra iti bravītana ||
8.092.03a indra in no mahānām dātā vājānām nṛtuḥ |
8.092.03c mahāṃ abhijñv ā yamat ||
8.092.04a apād u śipry andhasaḥ sudakṣasya prahoṣiṇaḥ |
8.092.04c indor indro yavāsiraḥ ||
8.092.05a tam v abhi prārcatendram somasya pītaye |
8.092.05c tad id dhy asya vardhanam ||
8.092.06a asya pītva madānām devo devasyaujasā |
8.092.06c viśvābhi bhuvanā bhuvat ||
8.092.07a tyam u vaḥ satrāsāhaṃ viśvāsu gīrṣv āyatam |
8.092.07c ā cyāvayasy ūtaye ||
8.092.08a yudhmaṃ santam anarvāṇaṃ somapām anapacyutam |
8.092.08c naram avāryakratum ||
8.092.09a śikṣā ṇa indra rāya ā puru vidvāṃ ṛcīsama |
8.092.09c avā naḥ pārye dhane ||
8.092.10a ataś cid indra ṇa upā yāhi śatavājayā |
8.092.10c iṣā sahasravājayā ||
8.092.11a ayāma dhīvato dhiyo 'rvadbhiḥ śakra godare |
8.092.11c jayema pṛtsu vajrivaḥ ||
8.092.12a vayam u tvā śatakrato gāvo na yavaseṣv ā |
8.092.12c uktheṣu raṇayāmasi ||
8.092.13a viśvā hi martyatvanānukāmā śatakrato |
8.092.13c aganma vajrinn āśasaḥ ||
8.092.14a tve su putra śavaso 'vṛtran kāmakātayaḥ |
8.092.14c na tvām indrāti ricyate ||
8.092.15a sa no vṛṣan saniṣṭhayā saṃ ghorayā dravitnvā |
8.092.15c dhiyāvidḍhi puramdhyaḥ ||
8.092.16a yas te nūnam śatakratav indra dyumnitamo madaḥ |
8.092.16c tena nūnam made madeḥ ||
8.092.17a yas te citraśravastamo ya indra vṛtrahantamaḥ |
8.092.17c ya ojadātamo madaḥ ||
8.092.18a vidmā hi yas te adriivas tvādattaḥ satya somapāḥ |
8.092.18c viśvāsu dasma kṛṣṭiṣu ||
8.092.19a indrāya madvane sutam pari ṣṭobhantu no giraḥ |
8.092.19c arkam arcantu kāravaḥ ||
8.092.20a yasmin viśvā adhi śriyo raṇanti sapta saṃsadaḥ |
8.092.20c indram sute havāmahe ||
8.092.21a trikadrukeṣu cetanam devāso yajñam atnata |

- 8.092.21c tam id vardhantu no giraḥ ||
8.092.22a ā tvā viśantv indavaḥ samudram iva sindhavaḥ |
8.092.22c na tvām indrāti ricyate ||
8.092.23a vivyaktha mahinā vṛṣan bhakṣam somasya jāgṛve |
8.092.23c ya indra jaṭharaṣu te ||
8.092.24a aram ta indra kukṣaye somo bhavatu vṛtrahan |
8.092.24c aram dhāmabhya indavaḥ ||
8.092.25a aram aśvāya gāyati śrutakakṣo aram gave |
8.092.25c aram indrasya dhāmne ||
8.092.26a aram hi śma suteṣu ṇaḥ someṣv indra bhūṣasi |
8.092.26c aram te śakra dāvane ||
8.092.27a parākāttāc cid adrivās tvām nakṣanta no giraḥ |
8.092.27c aram gamāma te vayam ||
8.092.28a evā hy asi vīrayur evā śūra uta sthiraḥ |
8.092.28c evā te rādhyam manaḥ ||
8.092.29a evā rātis tuvīmagha viśvebhir dhāyi dhātṛbhiḥ |
8.092.29c adhā cid indra me sacā ||
8.092.30a mo ṣu brahmeva tandrayur bhuvo vājānām pate |
8.092.30c matsvā sutasya gomataḥ ||
8.092.31a mā na indrābhy ādiśaḥ sūro aktuṣv ā yaman |
8.092.31c tvā yujā vanema tat ||
8.092.32a tvayed indra yujā vayam prati bruvīmahi spṛdhaḥ |
8.092.32c tvam asmākaṁ tava smasi ||
8.092.33a tvām id dhi tvāyavo 'nunonuvataś carān |
8.092.33c sakhāya indra kāravaḥ ||
- 8.093.01a ud ghed abhi śrutāmagham vṛṣabham naryāpasam |
8.093.01c astāram eṣi sūrya ||
8.093.02a nava yo navatim puro bibheda bāhvojasā |
8.093.02c ahiṁ ca vṛtrahāvadhīt ||
8.093.03a sa na indraḥ śivaḥ sakhāśvāvad gomad yavamat |
8.093.03c urudhāreva dohate ||
8.093.04a yad adya kac ca vṛtrahann udaḡā abhi sūrya |
8.093.04c sarvaṁ tad indra te vaśe ||
8.093.05a yad vā pravṛddha satpate na marā iti manyase |
8.093.05c uto tat satyam it tava ||
8.093.06a ye somāsaḥ parāvati ye arvāvati sunvire |
8.093.06c sarvāms tāṁ indra gachasi ||
8.093.07a tam indraṁ vājayāmasi mahe vṛtrāya hantave |
8.093.07c sa vṛṣā vṛṣabho bhuvat ||
8.093.08a indraḥ sa dāmane kṛta ojiṣṭhaḥ sa made hitaḥ |
8.093.08c dyumnī ślokī sa somyaḥ ||
8.093.09a girā vajro na sambhṛtaḥ sabalo anapacyutaḥ |
8.093.09c vavakṣa ṛṣvo aṣṭṛtaḥ ||
8.093.10a durge cin naḥ sugaṁ kṛdhi gṛṇāna indra girvaṇaḥ |
8.093.10c tvam ca maghavan vaśaḥ ||
8.093.11a yasya te nū cid ādiśam na minanti svarājyam |
8.093.11c na devo nādhṛgur janaḥ ||

- 8.093.12a adhā te apratiṣkutaṃ devī śuṣmaṃ saparyataḥ |
8.093.12c ubhe suśipra rodasī ||
- 8.093.13a tvam etad adhārayaḥ kṛṣṇāsu rohiṇīṣu ca |
8.093.13c paruṣṇīṣu ruśat payaḥ ||
- 8.093.14a vi yad aher adha tviṣo viśve devāso akramuḥ |
8.093.14c vidan mṛgasya tāṃ amaḥ ||
- 8.093.15a ād u me nivaro bhuvad vṛtrahādiṣṭa paumṣyam |
8.093.15c ajātaśatrur astr̥taḥ ||
- 8.093.16a śrutam vo vṛtrahantamam pra śardham carṣaṇīnām |
8.093.16c ā śuṣe rādhasa mahe ||
- 8.093.17a ayā dhiyā ca gavyayā puruṇāman puruṣṭuta |
8.093.17c yat some-soma ābhavaḥ ||
- 8.093.18a bodhinmanā id astu no vṛtrahā bhūryāsutiḥ |
8.093.18c śṛṇotu śakra āśiṣam ||
- 8.093.19a kayā tvam na ūtyābhi pra mandase vṛṣan |
8.093.19c kayā stotṛbhya ā bhara ||
- 8.093.20a kasya vṛṣā sute sacā niyutvān vṛṣabho raṇat |
8.093.20c vṛtrahā somapītaye ||
- 8.093.21a abhi ṣu ṇas tvam rayim mandasānaḥ sahasriṇam |
8.093.21c prayantā bodhi dāsūṣe ||
- 8.093.22a patnīvantaḥ sutā ima uśanto yanti vītaye |
8.093.22c apām jagmir nicumpuṇaḥ ||
- 8.093.23a iṣṭā hotrā asṛkṣatendram vṛdhāso adhvare |
8.093.23c achāvabhṛtham ojasā ||
- 8.093.24a iha tyā sadhamādyā harī hiraṇyakeśyā |
8.093.24c voḍhām abhi prayo hitam ||
- 8.093.25a tubhyaṃ somāḥ sutā ime stīṇam barhir vibhāvaso |
8.093.25c stotṛbhya indram ā vaha ||
- 8.093.26a ā te dakṣam vi rocanā dadhad ratnā vi dāsūṣe |
8.093.26c stotṛbhya indram arcata ||
- 8.093.27a ā te dadhāmīndriyam ukthā viśvā śatakrato |
8.093.27c stotṛbhya indra mṛḍaya ||
- 8.093.28a bhadrām-bhadram na ā bhareṣam ūrjam śatakrato |
8.093.28c yad indra mṛḍayāsi naḥ ||
- 8.093.29a sa no viśvāny ā bhara suvitāni śatakrato |
8.093.29c yad indra mṛḍayāsi naḥ ||
- 8.093.30a tvām id vṛtrahantama sutāvanto havāmahe |
8.093.30c yad indra mṛḍayāsi naḥ ||
- 8.093.31a upa no haribhiḥ sutam yāhi madānām pate |
8.093.31c upa no haribhiḥ sutam ||
- 8.093.32a dvitā yo vṛtrahantamo vida indraḥ śatakratuḥ |
8.093.32c upa no haribhiḥ sutam ||
- 8.093.33a tvam hi vṛtrahann eṣām pātā somānām asi |
8.093.33c upa no haribhiḥ sutam ||
- 8.093.34a indra iṣe dadātu na ṛbhukṣaṇam ṛbhum rayim |
8.093.34c vājī dadātu vājinam ||

8.094.01a gaur dhayati marutām śravasyur mātā maghonām |

8.094.01c yuktā vahnī rathānām ||
 8.094.02a yasyā devā upasthe vratā viśve dhārayante |
 8.094.02c sūryāmāsā dṛṣe kam ||
 8.094.03a tat su no viśve arya ā sadā gṛṇanti kāravaḥ |
 8.094.03c marutaḥ somapītaye ||
 8.094.04a asti somo ayaṃ sutaḥ pibanty asya marutaḥ |
 8.094.04c uta svarājo aśvinā ||
 8.094.05a pibanti mitro aryamā tanā pūtasya varuṇaḥ |
 8.094.05c triṣadhasthasya jāvataḥ ||
 8.094.06a uto nv asya joṣam āṁ indraḥ sutasya gomataḥ |
 8.094.06c prātar hoteva matsati ||
 8.094.07a kad atviṣanta sūrayas tira āpa iva sridhaḥ |
 8.094.07c arṣanti pūtakṣasaḥ ||
 8.094.08a kad vo adya mahānām devānām avo vṛṇe |
 8.094.08c tmanā ca dasmavarcasām ||
 8.094.09a ā ye viśvā pārthivāni paprathan rocanā divaḥ |
 8.094.09c marutaḥ somapītaye ||
 8.094.10a tyān nu pūtakṣaso divo vo maruto huve |
 8.094.10c asya somasya pītaye ||
 8.094.11a tyān nu ye vi rodasī tastabhur maruto huve |
 8.094.11c asya somasya pītaye ||
 8.094.12a tyaṃ nu mārutaṃ gaṇaṃ giriṣṭhāṃ vṛṣaṇaṃ huve |
 8.094.12c asya somasya pītaye ||

8.095.01a ā tvā giro rathīr ivāsthūḥ suteṣu girvaṇaḥ |
 8.095.01c abhi tvā sam anūṣatendra vatsaṃ na mātaraḥ ||
 8.095.02a ā tvā śukrā acucyavuḥ sutāsa indra girvaṇaḥ |
 8.095.02c pibā tv asyāndhasa indra viśvāsu te hitam ||
 8.095.03a pibā somam madāya kam indra śyenābhṛtaṃ sutam |
 8.095.03c tvaṃ hi śasvatīnām patī rājā viśām asi ||
 8.095.04a śrudhī havaṃ tiraścyā indra yas tvā saparyati |
 8.095.04c suvīryasya gomato rāyas pūrdhi mahāṁ asi ||
 8.095.05a indra yas te navīyasīm giram mandrām ajījanat |
 8.095.05c cikitvinmanasaṃ dhiyam pratnām ṛtasya pipyuṣīm ||
 8.095.06a tam u ṣṭavāma yaṃ gira indram ukthāni vāvṛdhuḥ |
 8.095.06c purūṇy asya paumsyā siṣāsanto vanāmahe ||
 8.095.07a eto nv indraṃ stavāma śuddhaṃ śuddhena sāmnā |
 8.095.07c śuddhair ukthair vāvṛdhvāmsaṃ śuddha āśīrvān mamattu ||
 8.095.08a indra śuddho na ā gahi śuddhaḥ śuddhābhir ūtibhiḥ |
 8.095.08c śuddho rayiṃ ni dhāraya śuddho mamaddhi somyaḥ ||
 8.095.09a indra śuddho hi no rayiṃ śuddho ratnāni dāsūṣe |
 8.095.09c śuddho vṛtrāni jighnase śuddho vājaṃ siṣāsasi ||

8.096.01a asmā uṣāsa ātiranta yāmam indrāya naktam ūrmyāḥ suvācaḥ |
 8.096.01c asmā āpo mātaraḥ sapta tasthur nṛbhyas tarāya sindhavaḥ supārāḥ ||
 8.096.02a atividhā vithureṇā cid astrā triḥ sapta sānu saṃhitā giriṇām |
 8.096.02c na tad devo na martyas tuturyād yāni pravṛddho vṛṣabhaś cakāra ||

8.096.03a indrasya vajra āyaso nimiśla indrasya bāhvor bhūyiṣṭham ojaḥ |
 8.096.03c śīrṣann indrasya kratavo nireka āsann eṣanta śrutya upāke ||
 8.096.04a manye tvā yajñiyaṃ yajñiyānām manye tvā cyavanam acyutānām |
 8.096.04c manye tvā satvanām indra ketum manye tvā vṛṣabhaṃ carṣaṇinām ||
 8.096.05a ā yad vajram bāhvor indra dhatse madacyutam ahaye hantavā u |
 8.096.05c pra parvatā anavanta pra gāvaḥ pra brahmāṇo abhinakṣanta indram ||
 8.096.06a tam u ṣṭavāma ya imā jajāna viśvā jātāny avarāṇy asmāt |
 8.096.06c indreṇa mitram didhiṣema gīrbhir upo namobhir vṛṣabhaṃ viśema ||
 8.096.07a vṛtrasya tvā śvasathād iṣamāṇā viśve devā ajahur ye sakhāyaḥ |
 8.096.07c marudbhir indra sakhyaṃ te astv athemā viśvāḥ pṛtanā jayāsi ||
 8.096.08a triḥ ṣaṣṭis tvā maruto vāvṛdhānā usrā iva rāsāyo yajñiyāsaḥ |
 8.096.08c upa tvemaḥ kṛdhi no bhāgadheyam śuṣmaṃ ta enā haviṣā vidhema ||
 8.096.09a tigmam āyudham marutām anikaṃ kas ta indra prati vajram dadharṣa |
 8.096.09c anāyudhāso asurā adevās cakreṇa tāṃ apa vapa rjīṣin ||
 8.096.10a maha ugrāya tavase suvṛktim preraya śivatamāya paśvaḥ |
 8.096.10c girvāhase gira indrāya pūrvīr dhehi tanve kuvid aṅga vedat ||
 8.096.11a ukthavāhase vibhve manīṣam druṇā na pāram irayā nadinām |
 8.096.11c ni sprśa dhiyā tanvi śrutasya juṣṭatarasya kuvid aṅga vedat ||
 8.096.12a tad viviḍḍhi yat ta indro jujoṣat stuhi suṣṭutiṃ namasā vivāsa |
 8.096.12c upa bhūṣa jaritar mā ruvaṇyaḥ śrāvayā vācam kuvid aṅga vedat ||
 8.096.13a ava drapso aṃśumatīm atiṣṭhad iyānaḥ kṛṣṇo daśabhiḥ sahasraiḥ |
 8.096.13c āvat tam indraḥ śacyā dhamantam apa snehitīr nṛmaṇā adhatta ||
 8.096.14a drapsam apaśyaṃ viṣuṇe carantam upahvare nadyo aṃśumatyāḥ |
 8.096.14c nabho na kṛṣṇam avatasthivāmsam iṣyāmi vo vṛṣaṇo yudhyatājau ||
 8.096.15a adha drapso aṃśumatyā upasthe 'dhārayat tanvaṃ titviṣāṇaḥ |
 8.096.15c viśo adevīr abhy ācarantīr bṛhaspatinā yujendraḥ sasāhe ||
 8.096.16a tvam ha tyat saptabhyo jāyamāno 'śatrubhyo abhavaḥ śatrur indra |
 8.096.16c gūdhe dyāvāpṛthivī anv avindo vibhumadbhyo bhuvanebhyo raṇam dhāḥ ||
 8.096.17a tvam ha tyad apratimānam ojo vajreṇa vajrin dhṛṣito jaghantha |
 8.096.17c tvam śuṣṇasyāvātiro vadhatrais tvam gā indra śacyed avindaḥ ||
 8.096.18a tvam ha tyad vṛṣabha carṣaṇinām ghano vṛtrāṇam taviṣo babhūtha |
 8.096.18c tvam sindhūṃr asṛjas tastabhānān tvam apo ajayo dāsapatnīḥ ||
 8.096.19a sa sukratū raṇitā yaḥ suteṣv anuttamanyur yo aheva revān |
 8.096.19c ya eka in nary apāṃsi kartā sa vṛtrahā pratīd anyam āhuḥ ||
 8.096.20a sa vṛtrahendraś carṣaṇīdhṛt taṃ suṣṭutyā havyaṃ huvema |
 8.096.20c sa prāvitā maghavā no 'dhivaktā sa vājasya śravasyasya dātā ||
 8.096.21a sa vṛtrahendra ṛbhukṣāḥ sadyo jajñāno havyo babhūva |
 8.096.21c kṛṇvann apāṃsi naryā purūṇi somo na pīto havyaḥ sakhībhyāḥ ||

8.097.01a yā indra bhujā ābharaḥ svarvāṃ asurebhyāḥ |
 8.097.01c stotāram in maghavann asya vardhaya ye ca tve vṛktabarhiṣaḥ ||
 8.097.02a yam indra dadhiṣe tvam aśvaṃ gām bhāgam avyayam |
 8.097.02c yajamāne sunvati dakṣiṇāvati tasmin taṃ dhehi mā paṇau ||
 8.097.03a ya indra sasty avrato 'nuṣvāpam adevayuḥ |
 8.097.03c svaiḥ ṣa evair mumurat poṣyaṃ rayiṃ sanutar dhehi taṃ tataḥ ||
 8.097.04a yac chakrāsi parāvati yad arvāvati vṛtrahan |
 8.097.04c atas tvā gīrbhir dyugad indra keśibhiḥ sutāvāṃ ā vivāsati ||
 8.097.05a yad vāsi rocane divaḥ samudrasyādhi viṣṭapi |

8.097.05c yat pārthive sadane vṛtrahantama yad antarikṣa ā gahi ||
 8.097.06a sa naḥ someṣu somapāḥ suteṣu śavasas pate |
 8.097.06c mādayasva rādhasā sūnṛtāvatendra rāyā pariṇasā ||
 8.097.07a mā na indra parā vṛṇag bhavā naḥ sadhamādyah |
 8.097.07c tvam na ūti tvam in na āpyam mā na indra parā vṛṇak ||
 8.097.08a asme indra sacā sute ni śadā pītaye madhu |
 8.097.08c kṛdhī jaritre maghavann avo mahad asme indra sacā sute ||
 8.097.09a na tvā devāsa āsata na martyāso adrivaḥ |
 8.097.09c viśvā jātāni śavasābhibhūr asi na tvā devāsa āsata ||
 8.097.10a viśvāḥ pṛtanā abhibhūtaram naram
 8.097.10b sajūs tatakṣur indram jajanus ca rājase |
 8.097.10c kratvā variṣṭham vara āmurim utogram ojiṣṭham tavasam tarasvinam ||
 8.097.11a sam im rebhāso asvarann indram somasya pītaye |
 8.097.11c svarpatim yad im vṛdhe dhṛtavrato hy ojasā sam ūtibhiḥ ||
 8.097.12a nemim namanti cakṣasā meṣam viprā abhisvarā |
 8.097.12c sudītayo vo adruho 'pi karṇe tarasvinaḥ sam ṛkvabhiḥ ||
 8.097.13a tam indram johavimi maghavānam ugram
 8.097.13b satrā dadhānam apratiṣkutam śavāmsi |
 8.097.13c maṃhiṣṭho gīrbhir ā ca yajñiyo vavartad
 8.097.13d rāye no viśvā supathā kṛṇotu vajrī ||
 8.097.14a tvam pura indra cikid enā vy ojasā śaviṣṭha śakra nāśayadhyai |
 8.097.14c tvad viśvāni bhuvanāni vajrin dyāvā rejete pṛthivī ca bhīṣā ||
 8.097.15a tan ma ṛtam indra sūra citra pātv apo na vajrin duritāti parṣi bhūri |
 8.097.15c kadā na indra rāya ā daśasyer viśvapsnyasya spṛhayāyyasya rājan ||

8.098.01a indrāya sāma gāyata viprāya bṛhate bṛhat |
 8.098.01c dharmakṛte vipāścite panasyave ||
 8.098.02a tvam indrābhibhūr asi tvam sūryam arocayah |
 8.098.02c viśvakarmā viśvadevo mahāṃ asi ||
 8.098.03a vibhrājañ jyotiṣā svar agacho rocanam divaḥ |
 8.098.03c devās ta indra sakhyāya yemire ||
 8.098.04a endra no gadhi priyah satrājīd agohyah |
 8.098.04c girir na viśvatas pṛthuḥ patir divaḥ ||
 8.098.05a abhi hi satya somapā ubhe babhūtha rodasī |
 8.098.05c indrāsi sunvato vṛdhaḥ patir divaḥ ||
 8.098.06a tvam hi śāsvatīnām indra dartā purām asi |
 8.098.06c hantā dasyor manor vṛdhaḥ patir divaḥ ||
 8.098.07a adhā hīndra girvaṇa upa tvā kāmān mahaḥ sasṛjmahe |
 8.098.07c udeva yanta udabhiḥ ||
 8.098.08a vār ṇa tvā yavyābhir vardhanti sūra brahmāṇi |
 8.098.08c vāvṛdhvāmsam cid adrivo dive-dive ||
 8.098.09a yuñjanti harī iṣirasya gāthayorau ratha uruyuge |
 8.098.09c indravāhā vacoyujā ||
 8.098.10a tvam na indrā bharam oja nṛmṇam śatakṛato vicarṣaṇe |
 8.098.10c ā vīram pṛtanāṣaham ||
 8.098.11a tvam hi naḥ pitā vaso tvam mātā śatakṛato babhūvitha |
 8.098.11c adhā te sumnam īmahe ||
 8.098.12a tvam śuṣmin puruhūta vājayantam upa bruve śatakṛato |

8.098.12c sa no rāsva suvīryam ||

8.099.01a tvām idā hyo naro 'pīpyan vajrin bhūrṇayaḥ |
8.099.01c sa indra stomavāhasām iha śrudhy upa svasaram ā gahi ||
8.099.02a matsvā suśipra harivas tad īmahe tve ā bhūṣanti vedhasaḥ |
8.099.02c tava śravāmsy upamāny ukthyā suteṣv indra girvaṇaḥ ||
8.099.03a śrāyanta iva sūryaṃ viśved indrasya bhakṣata |
8.099.03c vasūni jāte janamāna ojasā prati bhāgaṃ na dīdhima ||
8.099.04a anarśarātiṃ vasudām upa stuhi bhadrā indrasya rātayaḥ |
8.099.04c so asya kāmāṃ vidhato na roṣati mano dānāya codayan ||
8.099.05a tvam indra pratūrtiṣv abhi viśvā asi sṛdhaḥ |
8.099.05c aśastihā janitā viśvatūr asi tvam tūrya taruṣyataḥ ||
8.099.06a anu te śuṣmaṃ turayantam iyatuḥ kṣoṇī śiśuṃ na mātaraḥ |
8.099.06c viśvās te sṛdhaḥ śnathayanta manyave vṛtraṃ yad indra tūrvasi ||
8.099.07a ita ūtī vo ajaram prahetāram aprahitam |
8.099.07c āsuṃ jetāraṃ hetāraṃ rathitamam atūrtaṃ tugryāvṛdham ||
8.099.08a iṣkartāram aniṣkṛtaṃ sahaskṛtaṃ śatamūtiṃ śatakratum |
8.099.08c samānam indram avase havāmahe vasavānaṃ vasūjuvam ||

8.100.01a ayaṃ ta emi tanvā purastād viśve devā abhi mā yanti paścāt |
8.100.01c yadā mahyaṃ dīdharo bhāgam indrād in mayā kṛṇavo vīryāni ||
8.100.02a dadhāmi te madhuno bhakṣam agre hitas te bhāgaḥ suto astu somaḥ |
8.100.02c asaś ca tvam dakṣiṇataḥ sakhā me 'dhā vṛtrāni jaṅghanāva bhūri ||
8.100.03a pra su stomam bhārata vājayanta indrāya satyaṃ yadi satyam asti |
8.100.03c nendro astīti nema u tva āha ka im dadarśa kam abhi ṣṭavāma ||
8.100.04a ayam asmi jaritaḥ paśya meha viśvā jātāny abhy asmi mahnā |
8.100.04c ṛtasya mā pradiśo vardhayanty ādardiro bhuvanā dardarīmi ||
8.100.05a ā yan mā venā aruhann ṛtasyaṃ ekam āsīnaṃ haryatasya pṛṣṭhe |
8.100.05c manaś cin me hṛda ā praty avocad acikradañ chiśumantaḥ sakhāyaḥ ||
8.100.06a viśvet tā te savaneṣu pravācyā yā cakartha maghavann indra sunvate |
8.100.06c pārāvataṃ yat purusambhṛtaṃ vasv apāvṛṇoḥ śarabhāya ṛṣibandhave ||
8.100.07a pra nūnam dhāvataḥ pṛthañ neha yo vo avāvarit |
8.100.07c ni ṣim vṛtrasya marmaṇi vajram indro apīpatat ||
8.100.08a manojavā ayamāna āyasim atarat puram |
8.100.08c divaṃ suparṇo gatvāya somaṃ vajriṇa ābharat ||
8.100.09a samudre antaḥ śayata udnā vajro abhivṛtaḥ |
8.100.09c bharanty asmai samyataḥ puraḥprasravaṇā balim ||
8.100.10a yad vāg vadanty avicetanāni rāṣṭrī devānāṃ niṣasāda mandrā |
8.100.10c catasra ūrjaṃ duduhe payāmsi kva svid asyāḥ paramaṃ jagāma ||
8.100.11a devīm vācam ajanayanta devās tāṃ viśvarūpāḥ paśavo vadanti |
8.100.11c sā no mandreṣam ūrjaṃ duhānā dhenur vāg asmān upa suṣṭutaitu ||
8.100.12a sakhe viṣṇo vitaraṃ vi kramasva dyaur dehi lokaṃ vajrāya viṣkabhe |
8.100.12c hanāva vṛtraṃ riṇacāva sindhūn indrasya yantu prasave viṣṣṭāḥ ||

8.101.01a ṛdhag itthā sa martyaḥ śāsame devatātaye |
8.101.01c yo nūnam mitrāvaruṇāv abhiṣṭaya ācakre havyaḍātaye ||

8.101.02a varṣiṣṭhakṣatrā urucakṣasā narā rājānā dīrghaśrutamā |
 8.101.02c tā bāhutā na daṁsanā ratharyataḥ sākam sūryasya raśmibhiḥ ||
 8.101.03a pra yo vām mitrāvaruṇājīro dūto adravat |
 8.101.03c ayaḥśīrṣā maderaghuḥ ||
 8.101.04a na yaḥ sampr̥che na punar havītave na samvādāya ramate |
 8.101.04c tasmān no adya samṛter uruṣyatam bāhubhyāṃ na uruṣyatam ||
 8.101.05a pra mitrāya prāryamṇe sacathyam ṛtāvaso |
 8.101.05c varūthyam varuṇe chandyam vaca stotram rājasu gāyata ||
 8.101.06a te hinvire aruṇam jenyam vasv ekam putram tisṛṇām |
 8.101.06c te dhāmāny amṛtā martyānām adabdhā abhi cakṣate ||
 8.101.07a ā me vacāṃsy udyatā dyumattamāni kartvā |
 8.101.07c ubhā yātam nāsatyā sajoṣasā prati havyāni vītaye ||
 8.101.08a rātiṃ yad vām arakṣasam havāmahe yuvābhyāṃ vājīnivasū |
 8.101.08c prācīm hotrām pratirantāv itam narā gṛṇānā jamadagninā ||
 8.101.09a ā no yajñam divisṛṣam vāyo yāhi sumanmabhiḥ |
 8.101.09c antaḥ pavitra upari śrīṇāno 'yam śukro ayāmi te ||
 8.101.10a vety adhvaryuḥ pathibhī rajīṣṭhaiḥ prati havyāni vītaye |
 8.101.10c adhā niyutva ubhayasya naḥ piba śuciṃ somaṃ gavāsīram ||
 8.101.11a baṇ mahāṃ asi sūrya baḍ āditya mahāṃ asi |
 8.101.11c mahas te sato mahimā panasyate 'ddhā deva mahāṃ asi ||
 8.101.12a baṭ sūrya śravasā mahāṃ asi satrā deva mahāṃ asi |
 8.101.12c mahnā devānām asuryaḥ purohito vibhu jyotir adābhyam ||
 8.101.13a iyam yā nīcy arkiṇī rūpā rohiṇyā kṛtā |
 8.101.13c citreva praty adarśy āyaty antar daśasu bāhuṣu ||
 8.101.14a prajā ha tisro atyāyam īyur ny anyā arkam abhito viviśre |
 8.101.14c bṛhad dha tasthau bhuvaneṣv antaḥ pavamāno harita ā viveśa ||
 8.101.15a mātā rudrāṇām duhitā vasūnām svasādityānām amṛtasya nābhiḥ |
 8.101.15c pra nu vocam cikituṣe janāya mā gām anāgām aditiṃ vadhiṣṭa ||
 8.101.16a vacovidam vācam udīrayantiṃ viśvābhir dhībhir upatiṣṭhamānām |
 8.101.16c devīm devebhyaḥ pary eyuṣīm gām ā māvr̥kta martyo dabhracetāḥ ||

8.102.01a tvam agne bṛhad vayo dadhāsi deva dāsūṣe |
 8.102.01c kavir gṛhapatir yuvā ||
 8.102.02a sa na idānayā saha devāṃ agne duvasyuvā |
 8.102.02c cikid vibhānav ā vaha ||
 8.102.03a tvayā ha svid yujā vayam codiṣṭhena yaviṣṭhya |
 8.102.03c abhi ṣmo vājasātaye ||
 8.102.04a aurvabhṛguvac chucim apnavānavad ā huve |
 8.102.04c agniṃ samudravāsasam ||
 8.102.05a huve vātasvanam kavim parjanyaakrandyam sahaḥ |
 8.102.05c agniṃ samudravāsasam ||
 8.102.06a ā savam savitur yathā bhagasyeva bhujim huve |
 8.102.06c agniṃ samudravāsasam ||
 8.102.07a agniṃ vo vṛdhantam adhvarāṇām purūtamam |
 8.102.07c achā naptre sahasvate ||
 8.102.08a ayam yathā na ābhuvat tvaṣṭā rūpeva takṣyā |
 8.102.08c asya kratvā yaśasvataḥ ||
 8.102.09a ayam viśvā abhi śriyo 'gnir deveṣu patyate |

8.102.09c ā vājair upa no gamat ||
 8.102.10a viśveṣām iha stuhi hotṛṇām yaśastamam |
 8.102.10c agniṃ yajñeṣu pūrvyam ||
 8.102.11a śīram pāvakaśociṣaṃ jyeṣṭho yo dameṣv ā |
 8.102.11c dīdāya dīrghaśruttamaḥ ||
 8.102.12a tam arvanṭaṃ na sānasim gr̥ṇihi vipra śuṣmiṇam |
 8.102.12c mitraṃ na yātayajjanam ||
 8.102.13a upa tvā jāmayo giro dediśatir haviṣkṛtaḥ |
 8.102.13c vāyor anīke asthiran ||
 8.102.14a yasya tridhātv avṛtam barhis tasthāv asaṃdinam |
 8.102.14c āpaś cin ni dadhā padam ||
 8.102.15a padaṃ devasya mīdhuṣo 'nādhṛṣṭābhir ūtibhiḥ |
 8.102.15c bhadrā sūrya ivopadr̥k ||
 8.102.16a agne ghṛtasya dhītibhis tepāno deva śociṣā |
 8.102.16c ā devān vakṣi yakṣi ca ||
 8.102.17a taṃ tvājananta mātaraḥ kavim devāso aṅgiraḥ |
 8.102.17c havyavāham amartyam ||
 8.102.18a pracetasam tvā kave 'gne dūtaṃ vareṇyam |
 8.102.18c havyavāham ni ṣedire ||
 8.102.19a nahi me asty aghnyā na svadhitir vananvati |
 8.102.19c athaitādṛg bharāmi te ||
 8.102.20a yad agne kāni kāni cid ā te dārūṇi dadhmasi |
 8.102.20c tā juṣasva yaviṣṭhya ||
 8.102.21a yad atty upajihvikā yad vamro atisarpati |
 8.102.21c sarvaṃ tad astu te ghṛtam ||
 8.102.22a agniṃ indhāno manasā dhiyaṃ saceta martyaḥ |
 8.102.22c agniṃ idhe vivasvabhiḥ ||

8.103.01a adarśi gātuvittamo yasmin vratāny ādadhuḥ |
 8.103.01c upo ṣu jātam āryasya vardhanam agniṃ nakṣanta no giraḥ ||
 8.103.02a pra daivodāso agnir devāṃ achā na majmanā |
 8.103.02c anu mātaram pṛthivim vi vāvṛte tasthau nākasya sānavi ||
 8.103.03a yasmād rejanta kṛṣṭayaś car̥kṛtyāni kṛṇvataḥ |
 8.103.03c sahasrasām medhasātāv iva tmanāgniṃ dhībhiḥ saparyata ||
 8.103.04a pra yaṃ rāye ninīṣasi marto yas te vaso dāśat |
 8.103.04c sa viraṃ dhatte agna ukthaśaṃsinam tmanā sahasrapoṣiṇam ||
 8.103.05a sa dṛḍhe cid abhi tṛṇatti vājam arvatā sa dhatte akṣiti śravaḥ |
 8.103.05c tve devatrā sadā purūvaso viśvā vāmāni dhīmahi ||
 8.103.06a yo viśvā dayate vasu hotā mandro janānām |
 8.103.06c madhor na pātrā prathamāny asmai pra stomā yanty agnaye ||
 8.103.07a aśvaṃ na gīrbhī rathyaṃ sudānavo marmṛjyante devayavaḥ |
 8.103.07c ubhe toke tanaye dasma viśpate paṛṣi rādho maghonām ||
 8.103.08a pra maṃhiṣṭhāya gāyata ṛtāvne bṛhate śukraśociṣe |
 8.103.08c upastutāso agnaye ||
 8.103.09a ā vaṃsate maghavā vīravād yaśaḥ samiddho dyumny āhutaḥ |
 8.103.09c kuvin no asya sumatir navīyasy achā vājebhir āgamat ||
 8.103.10a preṣṭham u priyāṇām stuhya āsāvātithim |
 8.103.10c agniṃ rathānām yamam ||

- 8.103.11a uditā yo nīditā veditā vasv ā yajñīyo vavartati |
8.103.11c duṣṭarā yasya pravāṇe normayo dhiyā vājaṃ siṣāsataḥ ||
8.103.12a mā no hr̥ṇītām atithir vasur agniḥ puruprasāsta eṣaḥ |
8.103.12c yaḥ suhotā svadhvaraḥ ||
8.103.13a mo te riṣan ye achoktibhir vaso 'gne kebhiś cid evaiḥ |
8.103.13c kīriś cid dhi tvām iṭṭe dūtyāya rātahavyaḥ svadhvaraḥ ||
8.103.14a āgne yāhi marutsakhā rudrebhiḥ somapītaye |
8.103.14c sobharyā upa suṣṭutim mādayasva svarṇare ||

9. Mandala

- 9.001.01a svādiṣṭhayā madiṣṭhayā pavasva soma dhārayā |
9.001.01c indrāya pātave sutaḥ ||
9.001.02a rakṣohā viśvacarṣaṇir abhi yonim ayohatam |
9.001.02c druṇā sadhastham āsadat ||
9.001.03a varivodhātamo bhava maṃhiṣṭho vṛtrahantamaḥ |
9.001.03c parṣi rādho maghonām ||
9.001.04a abhy arṣa mahānām devānām vītim andhasā |
9.001.04c abhi vājam uta śravaḥ ||
9.001.05a tvām achā carāmasi tad id arthaṃ dive-dive |
9.001.05c indo tve na āśasaḥ ||
9.001.06a punāti te parisrutaṃ somaṃ sūryasya duhitā |
9.001.06c vāreṇa śāsvatā tanā ||
9.001.07a tam im aṇvīḥ samarya ā gṛbhṇanti yoṣaṇo daśa |
9.001.07c svasāraḥ pārye divi ||
9.001.08a tam im hinvanty agruvo dhamanti bākuraṃ dṛtim |
9.001.08c tridhātu vāraṇam madhu ||
9.001.09a abhīmam aghnyā uta śrīṇanti dhenavaḥ śīsum |
9.001.09c somam indrāya pātave ||
9.001.10a asyed indro madeṣv ā viśvā vṛtrāṇi jighnate |
9.001.10c śūro maghā ca maṃhate ||
- 9.002.01a pavasva devavīr ati pavitraṃ soma raṃhyā |
9.002.01c indram indo vṛṣā viśa ||
9.002.02a ā vacyasva mahi psaro vṛṣendo dyumnavattamaḥ |
9.002.02c ā yoniṃ dharṇasiḥ sadaḥ ||
9.002.03a adhuḥṣata priyam madhu dhārā sutasya vedhasaḥ |
9.002.03c apo vasiṣṭa sukratuḥ ||
9.002.04a mahāntaṃ tvā mahīr anv āpo arṣanti sindhavaḥ |
9.002.04c yad gobhir vāsaiṣyase ||
9.002.05a samudro apsu māmṛje viṣṭambho dharuṇo divaḥ |
9.002.05c somaḥ pavitre asmayuḥ ||
9.002.06a acikradad vṛṣā harir mahān mitro na darśataḥ |
9.002.06c saṃ sūryeṇa rocate ||
9.002.07a giras ta inda ojasā marmṛjyante apasyuvaḥ |
9.002.07c yābhir madāya śumbhase ||
9.002.08a taṃ tvā madāya ghṛṣvaya ulokakṛtnum īmahe |
9.002.08c tava praśastayo mahīḥ ||
9.002.09a asmabhyam indav indrayur madhvaḥ pavasva dhārayā |
9.002.09c parjanya vṛṣṭimāṃ iva ||
9.002.10a goṣā indo nṛṣā asy aśvasā vājasā uta |
9.002.10c ātmā yajñasya pūrvaḥ ||
- 9.003.01a eṣa devo amartyaḥ parnavīr iva dīyati |

9.003.01c abhi droṇāny āśadam ||
 9.003.02a eṣa devo vipā kṛto 'ti hvarāṃsi dhāvati |
 9.003.02c pavamāno adābhyaḥ ||
 9.003.03a eṣa devo vipanyubhiḥ pavamāna ṛtāyubhiḥ |
 9.003.03c harir vājāya mṛjyate ||
 9.003.04a eṣa viśvāni vāryā śūro yann iva satvabhiḥ |
 9.003.04c pavamānaḥ siṣāsati ||
 9.003.05a eṣa devo ratharyati pavamāno daśasyati |
 9.003.05c āviṣ kṛṇoti vagvanum ||
 9.003.06a eṣa viprair abhiṣṭuto 'po devo vi gāhate |
 9.003.06c dadhad ratnāni dāśuṣe ||
 9.003.07a eṣa divaṃ vi dhāvati tiro rajāṃsi dhārayā |
 9.003.07c pavamānaḥ kanikradat ||
 9.003.08a eṣa divaṃ vy āsarat tiro rajāṃsy asprtaḥ |
 9.003.08c pavamānaḥ svadhvaraḥ ||
 9.003.09a eṣa pratnena janmanā devo devebhyaḥ sutaḥ |
 9.003.09c hariḥ pavitre arṣati ||
 9.003.10a eṣa u sya puruvrato jajñāno janayann iṣaḥ |
 9.003.10c dhārayā pavate sutaḥ ||

9.004.01a sanā ca soma jeṣi ca pavamāna mahi śravaḥ |
 9.004.01c athā no vasyasas kṛdhi ||
 9.004.02a sanā jyotiḥ sanā svar viśvā ca soma saubhagā |
 9.004.02c athā no vasyasas kṛdhi ||
 9.004.03a sanā dakṣam uta kratum apa soma mṛdho jahi |
 9.004.03c athā no vasyasas kṛdhi ||
 9.004.04a pavitāraḥ punītana somam indrāya pātave |
 9.004.04c athā no vasyasas kṛdhi ||
 9.004.05a tvaṃ sūrye na ā bhaja tava kratvā tavotibhiḥ |
 9.004.05c athā no vasyasas kṛdhi ||
 9.004.06a tava kratvā tavotibhir jyok paśyema sūryam |
 9.004.06c athā no vasyasas kṛdhi ||
 9.004.07a abhy arṣa svāyudha soma dvibarhasaṃ rayim |
 9.004.07c athā no vasyasas kṛdhi ||
 9.004.08a abhy arṣānapacyuto rayiṃ samatsu sāsahiḥ |
 9.004.08c athā no vasyasas kṛdhi ||
 9.004.09a tvāṃ yajñair avivṛdhan pavamāna vidharmaṇi |
 9.004.09c athā no vasyasas kṛdhi ||
 9.004.10a rayiṃ naś citram aśvinam indo viśvāyum ā bhara |
 9.004.10c athā no vasyasas kṛdhi ||

9.005.01a samiddho viśvatas patiḥ pavamāno vi rājati |
 9.005.01c pṛiṇan vṛṣā kanikradat ||
 9.005.02a tanūnapāt pavamānaḥ śṛṅge śiśāno arṣati |
 9.005.02c antarikṣeṇa rārajat ||
 9.005.03a iḍenyaḥ pavamāno rayir vi rājati dyumān |
 9.005.03c madhor dhārābhir ojasā ||

9.005.04a barhiḥ prācinam ojasā pavamāna str̥ṇan hariḥ |
 9.005.04c deveṣu deva iyate ||
 9.005.05a ud ātair jihate bṛhad dvāro devīr hiraṇyayīḥ |
 9.005.05c pavamānena suṣṭutāḥ ||
 9.005.06a suśilpe bṛhatī mahī pavamāno vṛṣaṇyati |
 9.005.06c naktoṣāsā na darśate ||
 9.005.07a ubhā devā nṛcakṣasā hotārā daivyā huve |
 9.005.07c pavamāna indro vṛṣā ||
 9.005.08a bhāratī pavamānasya sarasvatīdā mahī |
 9.005.08c imaṃ no yajñam ā gaman tisro devīḥ supeśasaḥ ||
 9.005.09a tvaṣṭāram agrajām gopām puroyāvānam ā huve |
 9.005.09c indur indro vṛṣā hariḥ pavamānaḥ prajāpatiḥ ||
 9.005.10a vanaspatim pavamāna madhvā sam aṅgdhi dhārayā |
 9.005.10c sahasravalśam haritam bhrājamānaṃ hiraṇyayam ||
 9.005.11a viśve devāḥ svāhākṛtim pavamānasyā gata |
 9.005.11c vāyur bṛhaspatiḥ sūryo 'gnir indraḥ sajośasaḥ ||

9.006.01a mandrayā soma dhārayā vṛṣā pavasva devayuḥ |
 9.006.01c avyo vāreṣv asmayuḥ ||
 9.006.02a abhi tyam madyam madam indav indra iti kṣara |
 9.006.02c abhi vājino arvataḥ ||
 9.006.03a abhi tyam pūrvyam madaṃ suvāno arṣa pavitra ā |
 9.006.03c abhi vājam uta śravaḥ ||
 9.006.04a anu drapsāsa indava āpo na pravatāsaran |
 9.006.04c punānā indram āśata ||
 9.006.05a yam atyam iva vājinam mṛjanti yoṣaṇo daśa |
 9.006.05c vane krīḍantam atyavim ||
 9.006.06a taṃ gobhir vṛṣaṇaṃ rasam madāya devavītaye |
 9.006.06c sutam bharāya saṃ sṛja ||
 9.006.07a devo devāya dhārayendrāya pavate sutaḥ |
 9.006.07c payo yad asya pīpayat ||
 9.006.08a ātmā yajñasya raṃhyā suṣvāṇaḥ pavate sutaḥ |
 9.006.08c pratnaṃ ni pāti kāvyam ||
 9.006.09a evā punāna indrayur madam madiṣṭha vītaye |
 9.006.09c guhā cid dadhiṣe giraḥ ||

9.007.01a asṛgram indavaḥ pathā dharmann ṛtasya suśriyaḥ |
 9.007.01c vidānā asya yojanam ||
 9.007.02a pra dhārā madhvo agriyo mahīr apo vi gāhate |
 9.007.02c havir haviṣṣu vandyāḥ ||
 9.007.03a pra yujo vāco agriyo vṛṣāva cakradad vane |
 9.007.03c sadmābhi satyo adhvaraḥ ||
 9.007.04a pari yat kāvyā kavir nṛmṇā vasāno arṣati |
 9.007.04c svar vājī siṣāsati ||
 9.007.05a pavamāno abhi spr̥dho viśo rājeva sīdati |
 9.007.05c yad im ṛṇvanti vedhasaḥ ||
 9.007.06a avyo vāre pari priyo harir vaneṣu sīdati |

9.007.06c rebho vanuṣyate matī ||
9.007.07a sa vāyum indram aśvinā sākam madena gachati |
9.007.07c raṇā yo asya dharmabhiḥ ||
9.007.08a ā mitrāvaruṇā bhagam madhvaḥ pavanta ūrmayaḥ |
9.007.08c vidānā asya śakmabhiḥ ||
9.007.09a asmabhyaṃ rodasī rayim madhvo vājasya sātaye |
9.007.09c śravo vasūni saṃ jitam ||

9.008.01a ete somā abhi priyam indrasya kāmam akṣaran |
9.008.01c vardhanto asya vīryam ||
9.008.02a punānāśaś camūṣado gachanto vāyum aśvinā |
9.008.02c te no dhāntu suvīryam ||
9.008.03a indrasya soma rādhasa punāno hārdi codaya |
9.008.03c ṛtasya yonim āśadam ||
9.008.04a mṛjanti tvā daśa kṣipo hinvanti sapta dhītayaḥ |
9.008.04c anu viprā amādiṣuḥ ||
9.008.05a devebhyas tvā madāya kaṃ sṛjānam ati meṣyaḥ |
9.008.05c saṃ gobhir vāsayāmasi ||
9.008.06a punānaḥ kalaśeṣv ā vastrāṇy aruṣo hariḥ |
9.008.06c pari gavyāny avyata ||
9.008.07a maghona ā pavasva no jahi viśvā apa dviṣaḥ |
9.008.07c indo sakhāyam ā viśa ||
9.008.08a vṛṣṭim divaḥ pari srava dyumnam pṛthivyā adhi |
9.008.08c saho naḥ soma pṛtsu dhāḥ ||
9.008.09a nṛcakṣasaṃ tvā vayam indrapitaṃ svarvidam |
9.008.09c bhakṣīmahi prajāṃ iṣam ||

9.009.01a pari priyā divaḥ kavir vayāṃsi napyor hitaḥ |
9.009.01c suvāno yāti kavikratuḥ ||
9.009.02a pra-pra kṣayāya panyase janāya juṣṭo adruhe |
9.009.02c vīty arṣa caniṣṭhayā ||
9.009.03a sa sūnur mātārā śucir jāto jāte arocayat |
9.009.03c mahān mahī ṛtāvṛdhā ||
9.009.04a sa sapta dhītibhir hito nadyo ajinvad adruhaḥ |
9.009.04c yā ekam akṣi vāvṛdhuḥ ||
9.009.05a tā abhi santam aśṛtam mahe yuvānam ā dadhuḥ |
9.009.05c indum indra tava vrata ||
9.009.06a abhi vahnir amartyaḥ sapta paśyati vāvahiḥ |
9.009.06c krivir devīr atarpayat ||
9.009.07a avā kalpeṣu naḥ pumas tamāṃsi soma yodhyā |
9.009.07c tāni punāna jaṅghanaḥ ||
9.009.08a nū navyase navīyase sūktāya sādhayā pathaḥ |
9.009.08c pratnavad rocayā rucaḥ ||
9.009.09a pavamāna mahi śravo gām aśvaṃ rāsi vīravat |
9.009.09c sanā medhāṃ sanā svaḥ ||

9.010.01a pra svānāso rathā ivārvanto na śravasyavaḥ |
 9.010.01c somāso rāye akramuḥ ||
 9.010.02a hinvānāso rathā iva dadhanvire gabhastyoḥ |
 9.010.02c bharāsaḥ kāriṇām iva ||
 9.010.03a rājāno na praśastibhiḥ somāso gobhir añjate |
 9.010.03c yajño na sapta dhātṛbhiḥ ||
 9.010.04a pari suvānāsa indavo madāya barhaṇā girā |
 9.010.04c sutā arṣanti dhārayā ||
 9.010.05a āpānāso vivasvato jananta uṣaso bhagam |
 9.010.05c sūrā aṇvaṃ vi tanvate ||
 9.010.06a apa dvārā matinām pratnā ṛṇvanti kāravaḥ |
 9.010.06c vṛṣṇo harasa āyavaḥ ||
 9.010.07a samīcināsa āsate hotāraḥ saptajāmayaḥ |
 9.010.07c padam ekasya piprataḥ ||
 9.010.08a nābhā nābhiṃ na ā dade cakṣuś cit sūrye sacā |
 9.010.08c kaver apatyam ā duhe ||
 9.010.09a abhi priyā divas padam adhvaryubhir guhā hitam |
 9.010.09c sūraḥ paśyati cakṣasā ||

9.011.01a upāsmāi gāyatā naraḥ pavamānāyendave |
 9.011.01c abhi devāṃ iyakṣate ||
 9.011.02a abhi te madhunā payo 'tharvāṇo asīśrayuḥ |
 9.011.02c devaṃ devāya devayu ||
 9.011.03a sa naḥ pavaśva śaṃ gave śaṃ janāya śaṃ arvate |
 9.011.03c śaṃ rājann ośadhībhyaḥ ||
 9.011.04a babhrave nu svatavase 'ruṇāya divisṛṣe |
 9.011.04c somāya gātham arcata ||
 9.011.05a hastacyutebhir adribhiḥ sutam somam punītana |
 9.011.05c madhāv ā dhāvatā madhu ||
 9.011.06a namased upa sīdata dadhned abhi śrīṇītana |
 9.011.06c indum indre dadhātana ||
 9.011.07a amitrahā vicarṣaṇiḥ pavaśva soma śaṃ gave |
 9.011.07c devebhyo anukāmakṛt ||
 9.011.08a indrāya soma pātave madāya pari śicyase |
 9.011.08c manaścin manasas patiḥ ||
 9.011.09a pavamāna suvīryaṃ rayiṃ soma rirīhi naḥ |
 9.011.09c indav indreṇa no yujā ||

9.012.01a somā asṛgram indavaḥ sutā ṛtasya sādane |
 9.012.01c indrāya madhumattamāḥ ||
 9.012.02a abhi viprā anūṣata gāvo vatsaṃ na mātaraḥ |
 9.012.02c indraṃ somasya pītaye ||
 9.012.03a madacyut kṣeti sādane sindhor ūrmā vipaścit |
 9.012.03c somo gaurī adhi śritaḥ ||
 9.012.04a divo nābhā vicakṣaṇo 'vyo vāre mahiyate |
 9.012.04c somo yaḥ sukratuḥ kaviḥ ||
 9.012.05a yaḥ somaḥ kalaśeṣv āṃ antaḥ pavitra āhitaḥ |

9.012.05c tam induḥ pari śasvaje ||
9.012.06a pra vācam indur iṣyati samudrasyādhi viṣṭapi |
9.012.06c jinvan kośam madhuścutam ||
9.012.07a nityastotro vanaspatir dhīnām antaḥ sabardughaḥ |
9.012.07c hinvāno mānuṣā yugā ||
9.012.08a abhi priyā divas padā somo hinvāno arṣati |
9.012.08c viprasya dhārayā kaviḥ ||
9.012.09a ā pavamāna dhāraya rayiṃ sahasravarcasam |
9.012.09c asme indo svābhuvam ||

9.013.01a somaḥ punāno arṣati sahasradhāro atyaviḥ |
9.013.01c vāyor indrasya niṣkr̥tam ||
9.013.02a pavamānam avasyavo vipram abhi pra gāyata |
9.013.02c suṣvāṇam devavītaye ||
9.013.03a pavante vājasātaye somāḥ sahasrapājasaḥ |
9.013.03c gṛṇānā devavītaye ||
9.013.04a uta no vājasātaye pavasva bṛhatīr iṣaḥ |
9.013.04c dyumad indo suvīryam ||
9.013.05a te naḥ sahasriṇam rayim pavantām ā suvīryam |
9.013.05c suvānā devāsa indavaḥ ||
9.013.06a atyā hiyānā na hetṛbhir asṛgram vājasātaye |
9.013.06c vi vāram avyam āśavaḥ ||
9.013.07a vāśrā arṣantīndavo 'bhi vatsam na dhenavaḥ |
9.013.07c dadhanvire gabhastyoḥ ||
9.013.08a juṣṭa indrāya matsaraḥ pavamāna kanikradat |
9.013.08c viśvā apa dviṣo jahi ||
9.013.09a apaghnanto arāvṇaḥ pavamānāḥ swardṛśaḥ |
9.013.09c yonāv ṛtasya sīdata ||

9.014.01a pari prāsiṣyadat kaviḥ sindhor ūrmāv adhi śritaḥ |
9.014.01c kāram bibhrat purusṛham ||
9.014.02a girā yadī sabandhavaḥ pañca vrātā apasyavaḥ |
9.014.02c pariṣkr̥ṇvanti dharṇasim ||
9.014.03a ād asya śuṣmiṇo rase viśve devā amatsata |
9.014.03c yadī gobhir vasāyate ||
9.014.04a niriṇāno vi dhāvati jahac charyāṇi tānvā |
9.014.04c atrā sam jighnate yujā ||
9.014.05a naptībhir yo vivasvataḥ śubhro na māmṛje yuvā |
9.014.05c gāḥ kṛṇvāno na nirṇijam ||
9.014.06a ati śriti tiraścatā gavyā jigāty aṇvyā |
9.014.06c vagnum iyarti yaṃ vide ||
9.014.07a abhi kṣipaḥ sam agmata marjayantīr iṣas patim |
9.014.07c pṛṣṭhā gṛbhṇata vājinaḥ ||
9.014.08a pari divyāni marmṛśad viśvāni soma pārthivā |
9.014.08c vasūni yāhy asmayuḥ ||

9.015.01a eṣa dhiyā yāty aṅvyā śūro rathebhīr āśubhiḥ |
 9.015.01c gachann indrasya niṣkṛtam ||
 9.015.02a eṣa purū dhiyāyate bṛhate devatātaye |
 9.015.02c yatrāmṛtāsa āsate ||
 9.015.03a eṣa hito vi niyate 'ntaḥ śubhrāvātā pathā |
 9.015.03c yadī tuñjanti bhūrṇayaḥ ||
 9.015.04a eṣa śṛṅgāṇi dodhuvac chiśīte yūthyo vṛṣā |
 9.015.04c nṛmṇā dadhāna ojasā ||
 9.015.05a eṣa rukmibhir īyate vājī śubhrebhir aṃśubhiḥ |
 9.015.05c patiḥ sindhūnām bhavan ||
 9.015.06a eṣa vasūni pibdanā paruṣā yayivāṃ ati |
 9.015.06c ava śādeṣu gachati ||
 9.015.07a etam mṛjanti marjyam upa droṇeṣv āyavaḥ |
 9.015.07c pracakrāṇam mahīr iṣaḥ ||
 9.015.08a etam u tyaṃ daśa kṣipo mṛjanti sapta dhītayaḥ |
 9.015.08c svāyudham madintamam ||

9.016.01a pra te sotāra oṅyo rasam madāya ghrṣvaye |
 9.016.01c sargo na takty etaśaḥ ||
 9.016.02a kratvā dakṣasya rathyam apo vasānam andhasā |
 9.016.02c goṣām aṅveṣu saścima ||
 9.016.03a anaptam apsu duṣṭaram somam pavitra ā sṛja |
 9.016.03c punihindrāya pātave ||
 9.016.04a pra punānasya cetasā somaḥ pavitre arṣati |
 9.016.04c kratvā sadhastham āsadat ||
 9.016.05a pra tvā namobhir indava indra somā asṛkṣata |
 9.016.05c mahe bharāya kāriṇaḥ ||
 9.016.06a punāno rūpe avyaye viśvā arṣann abhi śriyaḥ |
 9.016.06c śūro na goṣu tiṣṭhati ||
 9.016.07a divo na sānu pipyuṣī dhārā sutasya vedhasaḥ |
 9.016.07c vṛthā pavitre arṣati ||
 9.016.08a tvam soma vipaścitam tanā punāna āyūṣu |
 9.016.08c avyo vāram vi dhāvasi ||

9.017.01a pra nimneneva sindhavo ghnanto vṛtrāṇi bhūrṇayaḥ |
 9.017.01c somā asṛgram āśavaḥ ||
 9.017.02a abhi suvānāsa indavo vṛṣṭayaḥ pṛthivīm iva |
 9.017.02c indram somāso akṣaran ||
 9.017.03a atyūrmir matsaro madaḥ somaḥ pavitre arṣati |
 9.017.03c vighnan rakṣāṃsi devayuh ||
 9.017.04a ā kalaśeṣu dhāvati pavitre pari śicyate |
 9.017.04c ukthair yajñeṣu vardhate ||
 9.017.05a ati trī soma rocanā rohan na bhrājase divam |
 9.017.05c iṣṇan sūryam na codayaḥ ||
 9.017.06a abhi viprā anūṣata mūrdhan yajñasya kāravaḥ |
 9.017.06c dadhānāś cakṣasi priyam ||
 9.017.07a tam u tvā vājinaṃ naro dhībhir viprā avasyavaḥ |

9.017.07c mṛjanti devatātaye ||
9.017.08a madhor dhārām anu kṣara tivraḥ sadhastham āsadaḥ |
9.017.08c cārur ṛtāya pītaye ||

9.018.01a pari suvāno giriṣṭhāḥ pavitre somo akṣāḥ |
9.018.01c madeṣu sarvadhā asi ||
9.018.02a tvam vipras tvam kavir madhu pra jātam andhasaḥ |
9.018.02c madeṣu sarvadhā asi ||
9.018.03a tava viśve sajoṣaso devāsaḥ pītim āśata |
9.018.03c madeṣu sarvadhā asi ||
9.018.04a ā yo viśvāni vāryā vasūni hastayor dadhe |
9.018.04c madeṣu sarvadhā asi ||
9.018.05a ya ime rodasī mahī sam mātareva dohate |
9.018.05c madeṣu sarvadhā asi ||
9.018.06a pari yo rodasī ubhe sadyo vājebhir arṣati |
9.018.06c madeṣu sarvadhā asi ||
9.018.07a sa śuṣmī kalaśeṣv ā punāno acikradat |
9.018.07c madeṣu sarvadhā asi ||

9.019.01a yat soma citram ukthyaṃ divyam pārthivaṃ vasu |
9.019.01c tan naḥ punāna ā bhara ||
9.019.02a yuvaṃ hi sthaḥ svarpatī indraś ca soma gopatī |
9.019.02c iśānā pipyataṃ dhiyaḥ ||
9.019.03a vṛṣā punāna āyusu stanayann adhi barhiṣi |
9.019.03c hariḥ san yonim āsadat ||
9.019.04a avāvaśanta dhītayo vṛṣabhasyādhi retasi |
9.019.04c sūnor vatsasya mātaraḥ ||
9.019.05a kuvid vṛṣaṇyantībhyaḥ punāno garbham ādadhat |
9.019.05c yāḥ śukraṃ duhate payaḥ ||
9.019.06a upa śikṣāpatasthuṣo bhiyasam ā dhehi śatruṣu |
9.019.06c pavamāna vidā rayim ||
9.019.07a ni śatroḥ soma vṛṣṇyaṃ ni śuṣmaṃ ni vayas tira |
9.019.07c dūre vā sato anti vā ||

9.020.01a pra kavir devavītaye 'vyo vārebhir arṣati |
9.020.01c sāvān viśvā abhi sprdhaḥ ||
9.020.02a sa hi śmā jaritṛbhya ā vājaṃ gomantam invati |
9.020.02c pavamānaḥ sahasriṇam ||
9.020.03a pari viśvāni cetasā mṛśase pavase matī |
9.020.03c sa naḥ soma śravo vidaḥ ||
9.020.04a abhy arṣa bṛhad yaśo maghavadbhyo dhruvaṃ rayim |
9.020.04c iṣaṃ stotṛbhya ā bhara ||
9.020.05a tvam rājeva suvrato giraḥ somā viveśitha |
9.020.05c punāno vahne adbhuta ||
9.020.06a sa vahnir apsu duṣṭaro mṛjyamāno gabhastyoḥ |
9.020.06c somaś camūṣu sīdati ||

- 9.020.07a krīdur makho na mamhayuḥ pavitraṃ soma gachasi |
 9.020.07c dadhat stotre suvīryam ||
- 9.021.01a ete dhāvantīndavaḥ somā indrāya ghr̥ṣvayaḥ |
 9.021.01c matsarāsaḥ svarvidaḥ ||
 9.021.02a pravṛṇvanto abhiyujāḥ suṣvaye varivoidaḥ |
 9.021.02c svayaṃ stotre vayaskṛtaḥ ||
 9.021.03a vṛthā krīdanta indavaḥ sadhastham abhy ekam it |
 9.021.03c sindhor ūrmā vy akṣaran ||
 9.021.04a ete viśvāni vāryā pavamānāsa āśata |
 9.021.04c hitā na saptayo rathe ||
 9.021.05a āsmin piśaṅgam indavo dadhātā venam ādiṣe |
 9.021.05c yo asmabhyam arāvā ||
 9.021.06a ṛbhur na rathyaṃ navam dadhātā ketam ādiṣe |
 9.021.06c śukrāḥ pavadhvam arṇasā ||
 9.021.07a eta u tye avivaśan kāṣṭhāṃ vājino akrata |
 9.021.07c sataḥ prāsāviṣur matim ||
- 9.022.01a ete somāsa āśavo rathā iva pra vājinaḥ |
 9.022.01c sargāḥ sṛṣṭā aheṣata ||
 9.022.02a ete vātā ivoravaḥ parjanyaṣyeva vṛṣṭayaḥ |
 9.022.02c agner iva bhramā vṛthā ||
 9.022.03a ete pūtā vipāscitaḥ somāso dadhyāśiraḥ |
 9.022.03c vipā vy ānaśur dhiyaḥ ||
 9.022.04a ete mṛṣṭā amartyāḥ sasṛvāṃso na śaśramuḥ |
 9.022.04c iyakṣantaḥ patho rajaḥ ||
 9.022.05a ete pṛṣṭhāni rodasor viprayanto vy ānaśuḥ |
 9.022.05c utedam uttamaṃ rajaḥ ||
 9.022.06a tantuṃ tanvānam uttamam anu pravata āśata |
 9.022.06c utedam uttamāyyam ||
 9.022.07a tvam soma paṇibhya ā vasu gavyāni dhārayaḥ |
 9.022.07c tataṃ tantum acikradaḥ ||
- 9.023.01a somā asṛgram āśavo madhor madasya dhārayā |
 9.023.01c abhi viśvāni kāvyā ||
 9.023.02a anu pratnāsa āyavaḥ padaṃ navīyo akramuḥ |
 9.023.02c ruce jananta sūryam ||
 9.023.03a ā pavamāna no bharāryo adāśuṣo gayam |
 9.023.03c kṛdhi prajāvatir iṣaḥ ||
 9.023.04a abhi somāsa āyavaḥ pavante madyam madam |
 9.023.04c abhi kośam madhuścutam ||
 9.023.05a somo arṣati dharmasir dadhāna indriyaṃ rasam |
 9.023.05c suvīro abhiśastipāḥ ||
 9.023.06a indrāya soma pavase devebhyaḥ sadhamādyāḥ |
 9.023.06c indo vājaṃ siṣāsasi ||
 9.023.07a asya pītvā madānām indro vṛtrāṇy aprati |

9.023.07c jaghāna jaghanac ca nu ||

9.024.01a pra somāso adhanviṣuḥ pavamānāsa indavaḥ |
9.024.01c śrīṇānā apsu mṛñjata ||
9.024.02a abhi gāvo adhanviṣur āpo na pravatā yatīḥ |
9.024.02c punānā indram āsata ||
9.024.03a pra pavamāna dhanvasi somendrāya pātave |
9.024.03c nṛbhir yato vi nīyase ||
9.024.04a tvaṃ soma nṛmādanaḥ pavasva carṣaṇīsahe |
9.024.04c sasnir yo anumādyāḥ ||
9.024.05a indo yad adribhiḥ sutaḥ pavitram paridhāvasi |
9.024.05c aram indrasya dhāmne ||
9.024.06a pavasva vṛtrahantamokthebhir anumādyāḥ |
9.024.06c śuciḥ pāvako adbhutaḥ ||
9.024.07a śuciḥ pāvaka ucyate somaḥ sutasya madhvaḥ |
9.024.07c devāvīr aghaśaṃsahā ||

9.025.01a pavasva dakṣasādhano devebhyaḥ pītaye hare |
9.025.01c marudbhyo vāyave madaḥ ||
9.025.02a pavamāna dhiyā hito 'bhi yoniṃ kanikradat |
9.025.02c dharmanā vāyum ā viśa ||
9.025.03a saṃ devaiḥ śobhate vṛṣā kavir yonāv adhi priyaḥ |
9.025.03c vṛtrahā devavītamaḥ ||
9.025.04a viśvā rūpāṇy āviśan punāno yāti haryataḥ |
9.025.04c yatrāmṛtāsa āsate ||
9.025.05a aruṣo janayan giraḥ somaḥ pavata āyusak |
9.025.05c indram gachan kavikratuḥ ||
9.025.06a ā pavasva madintama pavitraṃ dhārayā kave |
9.025.06c arkasya yonim āsadam ||

9.026.01a tam amṛkṣanta vājinam upasthe aditer adhi |
9.026.01c viprāso aṇvyā dhiyā ||
9.026.02a taṃ gāvo abhy anūṣata sahasradhāram akṣitam |
9.026.02c induṃ dhartāram ā divaḥ ||
9.026.03a taṃ vedhām medhayāhyan pavamānam adhi dyavi |
9.026.03c dharṇasim bhūridhāyasam ||
9.026.04a tam ahyam bhurijor dhiyā saṃvasānaṃ vivasvataḥ |
9.026.04c patiṃ vāco adābhyam ||
9.026.05a taṃ sānāv adhi jāmayo hariṃ hinvanty adribhiḥ |
9.026.05c haryatam bhūricakṣasam ||
9.026.06a taṃ tvā hinvanti vedhasaḥ pavamāna girāvṛdham |
9.026.06c indav indrāya matsaram ||

9.027.01a eṣa kavir abhiṣtutaḥ pavitre adhi tośate |
9.027.01c punāno ghnann apa sridhaḥ ||

9.027.02a eṣa indrāya vāyave svarjit pari śicyate |
 9.027.02c pavitre dakṣasādhanah ||
 9.027.03a eṣa nṛbhir vi nīyate divo mūrdhā vṛṣā sutaḥ |
 9.027.03c somo vaneṣu viśvavit ||
 9.027.04a eṣa gavyur acikradat pavamāno hiraṇyayuḥ |
 9.027.04c induḥ satrājid astrtaḥ ||
 9.027.05a eṣa sūryeṇa hāsate pavamāno adhi dyavi |
 9.027.05c pavitre matsaro madaḥ ||
 9.027.06a eṣa śuṣmy asiṣyadad antarikṣe vṛṣā hariḥ |
 9.027.06c punāna indur indram ā ||

9.028.01a eṣa vājī hito nṛbhir viśvavin manasas patiḥ |
 9.028.01c avyo vāraṃ vi dhāvati ||
 9.028.02a eṣa pavitre akṣarat somo devebhyaḥ sutaḥ |
 9.028.02c viśvā dhāmāny āviśan ||
 9.028.03a eṣa devaḥ śubhāyate 'dhi yonāv amartyaḥ |
 9.028.03c vṛtrahā devavitamaḥ ||
 9.028.04a eṣa vṛṣā kanikradad daśabhir jāmibhir yataḥ |
 9.028.04c abhi droṇāni dhāvati ||
 9.028.05a eṣa sūryam arocayat pavamāno vicarṣaṇiḥ |
 9.028.05c viśvā dhāmāni viśvavit ||
 9.028.06a eṣa śuṣmy adābhyaḥ somaḥ punāno arṣati |
 9.028.06c devāvīr aghaśaṃsahā ||

9.029.01a prāśya dhārā akṣaran vṛṣṇaḥ sutasyaujasā |
 9.029.01c devāṃ anu prabhūṣataḥ ||
 9.029.02a saptim mṛjanti vedhaso gṛṇantaḥ kāravo girā |
 9.029.02c jyotir jajñānam ukthyam ||
 9.029.03a suśahā soma tāni te punānāya prabhūvaso |
 9.029.03c vardhā samudram ukthyam ||
 9.029.04a viśvā vasūni saṃjayan pavasva soma dhārayā |
 9.029.04c inu dveṣāṃsi sadhryak ||
 9.029.05a rakṣā su no araruṣaḥ svanāt samasya kasya cit |
 9.029.05c nido yatra mumucmahe ||
 9.029.06a endo pārthivaṃ rayiṃ divyam pavasva dhārayā |
 9.029.06c dyumantaṃ śuṣmam ā bhara ||

9.030.01a pra dhārā asya śuṣmiṇo vṛthā pavitre akṣaran |
 9.030.01c punāno vācam iṣyati ||
 9.030.02a indur hiyānaḥ sotṛbhir mṛjyamānaḥ kanikradat |
 9.030.02c iyarti vagnum indriyam ||
 9.030.03a ā naḥ śuṣmaṃ nṛṣāhyaṃ vīravantam purusṛham |
 9.030.03c pavasva soma dhārayā ||
 9.030.04a pra somo ati dhārayā pavamāno asiṣyadat |
 9.030.04c abhi droṇāny āśadam ||
 9.030.05a apsu tvā madhumattamaṃ hariṃ hinvanty adribhiḥ |

9.030.05c indav indrāya pītaye ||
9.030.06a sunotā madhumattamaṃ somam indrāya vajriṇe |
9.030.06c cāruṃ śardhāya matsaram ||

9.031.01a pra somāsaḥ svādhyah pavamānāso akramuḥ |
9.031.01c rayiṃ kṛṇvanti cetanam ||
9.031.02a divas pṛthivyā adhi bhavendo dyumnavardhanaḥ |
9.031.02c bhavā vājānām patiḥ ||
9.031.03a tubhyaṃ vātā abhipriyas tubhyam arṣanti sindhavaḥ |
9.031.03c soma vardhanti te mahaḥ ||
9.031.04a ā pyāyasva sam etu te viśvataḥ soma viṣṇyam |
9.031.04c bhavā vājasya saṃgathe ||
9.031.05a tubhyaṃ gāvo ghr̥tam payo babhro duduhre akṣitam |
9.031.05c varṣiṣṭhe adhi sānavi ||
9.031.06a svāyudhasya te sato bhuvanasya pate vayam |
9.031.06c indo sakhitvam uśmasi ||

9.032.01a pra somāso madacyutaḥ śravase no maghonaḥ |
9.032.01c sutā vidathe akramuḥ ||
9.032.02a ād iṃ tritasya yoṣaṇo hariṃ hinvanti adribhiḥ |
9.032.02c indum indrāya pītaye ||
9.032.03a ād iṃ haṃso yathā gaṇaṃ viśvasyāvivaśan matim |
9.032.03c atyo na gobhir ajoyate ||
9.032.04a ubhe somāvacākaśan mṛgo na takto arṣasi |
9.032.04c sīdann ṛtasya yonim ā ||
9.032.05a abhi gāvo anūṣata yoṣā jāram iva priyam |
9.032.05c agann ājim̐ yathā hitam ||
9.032.06a asme dhehi dyumad yaśo maghavadbhyaś ca mahyaṃ ca |
9.032.06c sanim medhām uta śravaḥ ||

9.033.01a pra somāso vipaścito 'pāṃ na yanti ūrmayaḥ |
9.033.01c vanāni mahiṣā iva ||
9.033.02a abhi droṇāni babhravaḥ śukrā ṛtasya dhārayā |
9.033.02c vājaṃ gomantam akṣaran ||
9.033.03a sutā indrāya vāyave varuṇāya marudbhyaḥ |
9.033.03c somā arṣanti viṣṇave ||
9.033.04a tisro vāca ud īrate gāvo mimanti dhenavaḥ |
9.033.04c harir eti kanikradat ||
9.033.05a abhi brahmīr anūṣata yahvīr ṛtasya mātaraḥ |
9.033.05c marmṛjyante divaḥ śiśum ||
9.033.06a rāyaḥ samudrāmś caturo 'smabhyaṃ soma viśvataḥ |
9.033.06c ā pavasva sahasriṇaḥ ||

9.034.01a pra suvāno dhārayā tanendur hinvāno arṣati |
9.034.01c rujad dṛdhā vy ojasā ||

9.034.02a suta indrāya vāyave varuṇāya marudbhyaḥ |
9.034.02c somo arṣati viṣṇave ||
9.034.03a vṛṣāṇaṃ vṛṣabhir yataṃ sunvanti somam adribhiḥ |
9.034.03c duhanti śakmanā payaḥ ||
9.034.04a bhuvat tritasya marjyo bhuvad indrāya matsaraḥ |
9.034.04c saṃ rūpair ajyate hariḥ ||
9.034.05a abhīm ṛtasya viṣṭapaṃ duhate pṛśnimātarāḥ |
9.034.05c cāru priyatamaṃ haviḥ ||
9.034.06a sam enam ahrutā imā giro arṣanti sasrutaḥ |
9.034.06c dhenūr vāśro avivaśat ||

9.035.01a ā naḥ pavasva dhārayā pavamāna rayim pṛthum |
9.035.01c yayā jyotir vidāsi naḥ ||
9.035.02a indo samudramīṅkhaya pavasva viśvamejaya |
9.035.02c rāyo dhartā na ojasā ||
9.035.03a tvayā vīreṇa vīravo 'bhi śyāma pṛtanyataḥ |
9.035.03c kṣarā ṇo abhi vāryam ||
9.035.04a pra vājam indur iṣyati siṣāsan vājasā ṛṣiḥ |
9.035.04c vratā vidāna āyudhā ||
9.035.05a taṃ gīrbhir vācamīṅkhayam punānaṃ vāsayāmasi |
9.035.05c somaṃ janasya gopatim ||
9.035.06a viśvo yasya vrata jano dādihāra dharmaṇas pateḥ |
9.035.06c punānasya prabhūvasoḥ ||

9.036.01a asarji rathyo yathā pavitre camvoḥ sutaḥ |
9.036.01c kārṣman vāji ny akramīt ||
9.036.02a sa vahniḥ soma jāgrviḥ pavasva devavīr ati |
9.036.02c abhi kośam madhuścutam ||
9.036.03a sa no jyotiṃṣi pūrvya pavamāna vi rocaya |
9.036.03c kratve dakṣāya no hinu ||
9.036.04a śumbhamāna ṛtāyubhir mṛjyamāno gabhastyoḥ |
9.036.04c pavate vāre avyaye ||
9.036.05a sa viśvā dāśuṣe vasu somo divyāni pārvhivā |
9.036.05c pavatām āntarikṣyā ||
9.036.06a ā divas pṛṣṭham aśvayur gavyayuh soma rohasi |
9.036.06c vīrayuḥ śavasas pate ||

9.037.01a sa sutaḥ pītaye vṛṣā somaḥ pavitre arṣati |
9.037.01c vighnan rakṣāṃsi devayuh ||
9.037.02a sa pavitre vicakṣaṇo harir arṣati dharmasiḥ |
9.037.02c abhi yoniṃ kanikradat ||
9.037.03a sa vāji rocanā divaḥ pavamāno vi dhāvati |
9.037.03c rakṣohā vāram avyayam ||
9.037.04a sa tritasyādhi sānavi pavamāno arocayat |
9.037.04c jāmbhiḥ sūryaṃ saha ||
9.037.05a sa vṛtrahā vṛṣā suto varivovid adābhyaḥ |

- 9.037.05c somo vājam ivāsarāt ||
 9.037.06a sa devaḥ kavineṣito 'bhi droṇāni dhāvati |
 9.037.06c indur indrāya maṃhanā ||
- 9.038.01a eṣa u sya vṛṣā ratho 'vyo vārebhir arṣati |
 9.038.01c gachan vājaṃ sahasriṇam ||
 9.038.02a etaṃ tritasya yoṣaṇo hariṃ hinvanty adribhiḥ |
 9.038.02c indum indrāya pītaye ||
 9.038.03a etaṃ tyam harito daśa marmṛjyante apasyuvaḥ |
 9.038.03c yābhir madāya śumbhate ||
 9.038.04a eṣa sya mānuṣiṣv ā śyeno na vikṣu sīdati |
 9.038.04c gachañ jāro na yoṣitam ||
 9.038.05a eṣa sya madyo raso 'va caṣṭe divaḥ śiśuḥ |
 9.038.05c ya indur vāram āviśat ||
 9.038.06a eṣa sya pītaye suto harir arṣati dharmasiḥ |
 9.038.06c krandan yonim abhi priyam ||
- 9.039.01a āśur arṣa bṛhanmate pari priyeṇa dhāmnā |
 9.039.01c yatra devā iti bravān ||
 9.039.02a pariṣkṛṇvann aniṣkṛtaṃ janāya yātayann iṣaḥ |
 9.039.02c vṛṣṭiṃ divaḥ pari srava ||
 9.039.03a suta eti pavitra ā tviṣiṃ dadhāna ojasā |
 9.039.03c vicakṣāṇo virocayan ||
 9.039.04a ayaṃ sa yo divas pari raghuyāmā pavitra ā |
 9.039.04c sindhor ūrmā vy akṣarat ||
 9.039.05a āvivāsan parāvato atho arvāvataḥ sutaḥ |
 9.039.05c indrāya sicyate madhu ||
 9.039.06a samīcinā anuṣata hariṃ hinvanty adribhiḥ |
 9.039.06c yonāv ṛtasya sīdata ||
- 9.040.01a punāno akramīd abhi viśvā mṛdho vicarṣaṇiḥ |
 9.040.01c śumbhanti vipraṃ dhītibhiḥ ||
 9.040.02a ā yonim aruṇo ruhad gamad indraṃ vṛṣā sutaḥ |
 9.040.02c dhruve sadasi sīdati ||
 9.040.03a nū no rayim mahām indo 'smabhyaṃ soma viśvataḥ |
 9.040.03c ā pavasva sahasriṇam ||
 9.040.04a viśvā soma pavamāna dyumnānīndav ā bhara |
 9.040.04c vidāḥ sahasriṇīr iṣaḥ ||
 9.040.05a sa naḥ punāna ā bhara rayiṃ stotre suvīryam |
 9.040.05c jaritur vardhayā giraḥ ||
 9.040.06a punāna indav ā bhara soma dvibarhasaṃ rayim |
 9.040.06c vṛṣann indo na ukthyam ||
- 9.041.01a pra ye gāvo na bhūrṇayas tveṣā ayāso akramuḥ |
 9.041.01c ghnantaḥ kṛṣṇām apa tvacam ||

9.041.02a suvitasya manāmahe 'ti setuṃ durāvyam |
9.041.02c sāvāṃso dasyum avratam ||
9.041.03a śṛṇve vṛṣṭer iva svanaḥ pavamānasya śuṣmiṇaḥ |
9.041.03c caranti vidyuto divi ||
9.041.04a ā pavasva mahīm iṣaṃ gomad indo hiraṇyavat |
9.041.04c aśvāvad vājavat sutaḥ ||
9.041.05a sa pavasva vicarṣaṇa ā mahī rodasī pṛṇa |
9.041.05c uṣāḥ sūryo na rāsmibhiḥ ||
9.041.06a pari ṇaḥ śarmayantyā dhārayā soma viśvataḥ |
9.041.06c sarā raseva viṣṭapam ||

9.042.01a janayan rocanā divo janayann apsu sūryam |
9.042.01c vasāno gā apo hariḥ ||
9.042.02a eṣa pratnena manmanā devo devebhyas pari |
9.042.02c dhārayā pavate sutaḥ ||
9.042.03a vāvṛdhānāya tūrvaye pavante vājasātaye |
9.042.03c somāḥ sahasrapājasaḥ ||
9.042.04a duhānaḥ pratnam it payaḥ pavitre pari ṣicyate |
9.042.04c krandan devāṃ ajījanat ||
9.042.05a abhi viśvāni vāryābhi devāṃ ṛtāvṛdhaḥ |
9.042.05c somaḥ punāno arṣati ||
9.042.06a goman naḥ soma vīravad aśvāvad vājavat sutaḥ |
9.042.06c pavasva bṛhatīr iṣaḥ ||

9.043.01a yo atya iva mṛjyate gobhir madāya haryataḥ |
9.043.01c taṃ gīrbhir vāsayāmasi ||
9.043.02a taṃ no viśvā avasyuvo giraḥ śumbhanti pūrvathā |
9.043.02c indum indrāya pītaye ||
9.043.03a punāno yāti haryataḥ somo gīrbhiḥ pariṣkṛtaḥ |
9.043.03c viprasya medhyātitheḥ ||
9.043.04a pavamāna vidā rayim asmabhyaṃ soma suśriyam |
9.043.04c indo sahasravarcaṣam ||
9.043.05a indur atyo na vājasṛt kanikranti pavitra ā |
9.043.05c yad akṣār ati devayuḥ ||
9.043.06a pavasva vājasātaye viprasya gṛṇato vṛdhe |
9.043.06c soma rāsva suvīryam ||

9.044.01a pra ṇa indo mahe tana ūrmiṃ na bibhrad arṣasi |
9.044.01c abhi devāṃ ayāsyāḥ ||
9.044.02a matī juṣṭo dhiyā hitaḥ somo hinve parāvati |
9.044.02c viprasya dhārayā kaviḥ ||
9.044.03a ayaṃ deveṣu jāgṛviḥ suta eti pavitra ā |
9.044.03c somo yāti vicarṣaṇiḥ ||
9.044.04a sa naḥ pavasva vājayuś cakraṇāś cārum adhvaram |
9.044.04c barhiṣmāṃ ā vivāsati ||
9.044.05a sa no bhagāya vāyave vipravīraḥ sadāvṛdhaḥ |

9.044.05c somo deveṣv ā yamat ||
9.044.06a sa no adya vasuttaye kratuvid gātuvittamaḥ |
9.044.06c vājaṃ jeṣi śravo bṛhat ||

9.045.01a sa pavaśva madāya kaṃ nṛcaḥṣā devavītaye |
9.045.01c indav indrāya pītaye ||
9.045.02a sa no arṣābhi dūtyaṃ tvam indrāya tośase |
9.045.02c devān sakhibhya ā varam ||
9.045.03a uta tvām aruṇaṃ vayaṃ gobhir añjmo madāya kam |
9.045.03c vi no rāye duro vṛdhi ||
9.045.04a aty ū pavitrām akramīd vājī dhuraṃ na yāmani |
9.045.04c indur deveṣu patyate ||
9.045.05a sam ī sakhāyo asvaran vane krīḍantam atyavim |
9.045.05c indum nāvā anūṣata ||
9.045.06a tayā pavaśva dhārayā yayā pīto vicakṣase |
9.045.06c indo stotre suvīryam ||

9.046.01a aṣṛgran devavītaye 'tyāsaḥ kṛtvā iva |
9.046.01c kṣarantaḥ parvatāvṛdhaḥ ||
9.046.02a pariṣkṛtāsa indavo yoṣeva pitryāvātī |
9.046.02c vāyumaṃ somā aṣṛkṣata ||
9.046.03a ete somāsa indavaḥ prayasvantaḥ camū sutāḥ |
9.046.03c indraṃ vardhanti karmabhiḥ ||
9.046.04a ā dhāvatā suhastyaḥ śukrā gṛbhṇīta manthinā |
9.046.04c gobhiḥ śrīṇīta matsaram ||
9.046.05a sa pavaśva dhanamjaya prayantā rādhaso mahaḥ |
9.046.05c asmabhyaṃ soma gātuvit ||
9.046.06a etam mṛjanti marjyam pavamānaṃ daśa kṣipaḥ |
9.046.06c indrāya matsaram madam ||

9.047.01a ayā somaḥ sukṛtyayā mahaś cid abhy avardhata |
9.047.01c mandāna ud vṛṣāyate ||
9.047.02a kṛtānīd asya kartvā cetante dasyutarhaṇā |
9.047.02c ṛṇā ca dhṛṣṇuś cayate ||
9.047.03a āt soma indriyo raso vajraḥ sahasrasā bhuvat |
9.047.03c ukthaṃ yad asya jāyate ||
9.047.04a svayaṃ kavir vidhartari viprāya ratnam ichati |
9.047.04c yadī marmṛjyate dhiyaḥ ||
9.047.05a siṣāsatū rayīnāṃ vājeṣv arvatām iva |
9.047.05c bhareṣu jigyuṣām asi ||

9.048.01a taṃ tvā nṛmṇāni bibhrataṃ sadhastheṣu maho divaḥ |
9.048.01c cāruṃ sukṛtyayemahe ||
9.048.02a saṃvṛktadhṛṣṇum ukthyam mahāmahivratam madam |
9.048.02c śatam puro ruruḥṣaṇim ||

9.048.03a atas tvā rayim abhi rājānaṃ sukrato divaḥ |
9.048.03c suparṇo avyathir bharat ||
9.048.04a viśvasmā it svar dṛṣe sādharmaṇaṃ rajasturam |
9.048.04c gopām ṛtasya vir bharat ||
9.048.05a adhā hinvāna indriyaṃ jyāyo mahitvam ānaśe |
9.048.05c abhiṣṭikṛd vicarṣaṇiḥ ||

9.049.01a pavasva vṛṣṭim ā su no 'pām ūrmiṃ divas pari |
9.049.01c ayakṣmā bṛhatīr iṣaḥ ||
9.049.02a tayā pavasva dhārayā yayā gāva ihāgaman |
9.049.02c janyāsa upa no gṛham ||
9.049.03a ghṛtam pavasva dhārayā yajñeṣu devavitamaḥ |
9.049.03c asmabhyaṃ vṛṣṭim ā pava ||
9.049.04a sa na ūrje vy avyayam pavitraṃ dhāva dhārayā |
9.049.04c devāsaḥ śṛṇavan hi kam ||
9.049.05a pavamāno asiṣyadad rakṣāṃsy apajānghanat |
9.049.05c pratnavad rocayan rucaḥ ||

9.050.01a ut te śuṣmāsa irate sindhor ūrmer iva svanaḥ |
9.050.01c vāṇasya codayā pavim ||
9.050.02a prasave ta ud irate tisro vāco makhasyuvaḥ |
9.050.02c yad avya eṣi sānavi ||
9.050.03a avyo vāre pari priyaṃ harim hinvanty adribhiḥ |
9.050.03c pavamānam madhuścutam ||
9.050.04a ā pavasva madintama pavitraṃ dhārayā kave |
9.050.04c arkasya yonim āsadam ||
9.050.05a sa pavasva madintama gobhir añjāno aktubhiḥ |
9.050.05c indav indrāya pītaye ||

9.051.01a adhvaryo adribhiḥ sutam somam pavitra ā sṛja |
9.051.01c punihindrāya pātave ||
9.051.02a divaḥ pīyūṣam uttamaṃ somam indrāya vajriṇe |
9.051.02c sunotā madhumattamam ||
9.051.03a tava tya indo andhaso devā madhor vy aśnate |
9.051.03c pavamānasya marutaḥ ||
9.051.04a tvam hi soma vardhayan suto madāya bhūrṇaye |
9.051.04c vṛṣan stotāram ūtaye ||
9.051.05a abhy arṣa vicakṣaṇa pavitraṃ dhārayā sutaḥ |
9.051.05c abhi vājam uta śravaḥ ||

9.052.01a pari dyukṣaḥ sanadrayir bharad vājam no andhasā |
9.052.01c suvāno arṣa pavitra ā ||
9.052.02a tava pratnebhir adhvabhir avyo vāre pari priyaḥ |
9.052.02c sahasradhāro yāt tanā ||
9.052.03a carur na yas tam inkhayendo na dānam inkhaya |

- 9.052.03c vadhair vadhasnav ĩnkhaya ॥
 9.052.04a ni śuṣmam indav eṣām puruhūta janānām ।
 9.052.04c yo asmāṁ ādideśati ॥
 9.052.05a śataṁ na inda ūtibhiḥ sahasraṁ vā śucīnām ।
 9.052.05c pavasva maṁhayadrayiḥ ॥
- 9.053.01a ut te śuṣmāso asthū rakṣo bhindanto adrivaḥ ।
 9.053.01c nudasva yāḥ parispr̥dhaḥ ॥
 9.053.02a ayā nijagnir ojasā rathasaṁge dhane hite ।
 9.053.02c stavā abibhyuṣā hr̥dā ॥
 9.053.03a asya vratāni nādhr̥ṣe pavamānasya dūḍhyā ।
 9.053.03c ruja yas tvā pṛtanyati ॥
 9.053.04a taṁ hinvanti madacyutaṁ harim̐ nadīṣu vājinam ।
 9.053.04c indum indrāya matsaram ॥
- 9.054.01a asya pratnām anu dyutaṁ śukraṁ duduhre ahrayaḥ ।
 9.054.01c payaḥ sahasrasām ṛṣim ॥
 9.054.02a ayaṁ sūrya ivopadr̥g ayaṁ sarāṁsi dhāvati ।
 9.054.02c sapta pravata ā divam ॥
 9.054.03a ayaṁ viśvāni tiṣṭhati punāno bhuvanopari ।
 9.054.03c somo devo na sūryaḥ ॥
 9.054.04a pari ṇo devavitaye vājāṁ arṣasi gomataḥ ।
 9.054.04c punāna indav indrayuḥ ॥
- 9.055.01a yavaṁ-yavaṁ no andhasā puṣṭam-puṣṭam pari srava ।
 9.055.01c soma viśvā ca saubhagā ॥
 9.055.02a indo yathā tava stavo yathā te jātam andhasaḥ ।
 9.055.02c ni barhiṣi priye sadaḥ ॥
 9.055.03a uta no govid āsvavit pavasva somāndhasā ।
 9.055.03c makṣūtamebhir ahabhiḥ ॥
 9.055.04a yo jināti na jīyate hanti śatrum abhītya ।
 9.055.04c sa pavasva sahasrajit ॥
- 9.056.01a pari soma ṛtam bṛhad āśuḥ pavitre arṣati ।
 9.056.01c vighnan rakṣāṁsi devayuyḥ ॥
 9.056.02a yat somo vājam arṣati śataṁ dhārā apasyuvaḥ ।
 9.056.02c indrasya sakhyam āviśan ॥
 9.056.03a abhi tvā yoṣaṇo daśa jāraṁ na kanyānūṣata ।
 9.056.03c mṛjyase soma sātaye ॥
 9.056.04a tvam indrāya viṣṇave svādur indo pari srava ।
 9.056.04c nṛṇ stotṛṇ pāhy aṁhasaḥ ॥
- 9.057.01a pra te dhārā asaścato divo na yanti vṛṣṭayaḥ ।
 9.057.01c achā vājam sahasriṇam ॥

- 9.057.02a abhi priyāṇi kāvyā viśvā cakṣāṇo arṣati |
 9.057.02c haris tuñjāna āyudhā ||
 9.057.03a sa marmṛjāna āyubhir ibho rājeva suvrataḥ |
 9.057.03c śyeno na vaṃsu ṣīdati ||
 9.057.04a sa no viśvā divo vasūto pṛthivyā adhi |
 9.057.04c punāna indav ā bhara ||
- 9.058.01a tarat sa mandī dhāvati dhārā sutasyāndhasaḥ |
 9.058.01c tarat sa mandī dhāvati ||
 9.058.02a usrā veda vasūnām martasya devy avasaḥ |
 9.058.02c tarat sa mandī dhāvati ||
 9.058.03a dhvasrayoḥ puruṣantyor ā sahasrāṇi dadmahe |
 9.058.03c tarat sa mandī dhāvati ||
 9.058.04a ā yayos trimṣataṃ tanā sahasrāṇi ca dadmahe |
 9.058.04c tarat sa mandī dhāvati ||
- 9.059.01a pavasva gojid aśvajid viśvajit soma raṇyajit |
 9.059.01c prajāvad ratnam ā bhara ||
 9.059.02a pavasvādbhyo adābhyaḥ pavasvauṣadhībhyaḥ |
 9.059.02c pavasva dhiṣaṇābhyaḥ ||
 9.059.03a tvam soma pavamāno viśvāni duritā tara |
 9.059.03c kaviḥ sīda ni barhiṣi ||
 9.059.04a pavamāna svar vido jāyamāno 'bhavo mahān |
 9.059.04c indo viśvām̐ abhid asi ||
- 9.060.01a pra gāyatrena gāyata pavamānaṃ vicarṣaṇim |
 9.060.01c indum̐ sahasracakṣasam ||
 9.060.02a taṃ tvā sahasracakṣasam atho sahasrabharṇasam |
 9.060.02c ati vāram apāviṣuḥ ||
 9.060.03a ati vārān pavamāno asiṣyadat kalaśām̐ abhi dhāvati |
 9.060.03c indrasya hārdy āviśan ||
 9.060.04a indrasya soma rādhasa śam pavasva vicarṣaṇe |
 9.060.04c prajāvad reta ā bhara ||
- 9.061.01a ayā vīti pari srava yas ta indo madeṣv ā |
 9.061.01c avāhan navatīr nava ||
 9.061.02a puraḥ sadya itthādhiye divodāsāya śambaram |
 9.061.02c adha tyam̐ turvaśam yadum ||
 9.061.03a pari ṇo aśvam aśvavid gomad indo hiraṇyavat |
 9.061.03c kṣarā sahasriṇīr iṣaḥ ||
 9.061.04a pavamānasya te vayam pavitram abhyundataḥ |
 9.061.04c sakhitvam ā vṛṇīmahe ||
 9.061.05a ye te pavitram ūrmayo 'bhikṣaranti dhārayā |
 9.061.05c tebhīr naḥ soma mṛḍaya ||
 9.061.06a sa naḥ punāna ā bhara rayim̐ vīravatīm̐ iṣam |

- 9.061.06c iśānaḥ soma viśvataḥ ||
- 9.061.07a etam u tyaṃ daśa kṣipo mṛjanti sindhumātaram |
- 9.061.07c sam ādityebhir akhyata ||
- 9.061.08a sam indreṇota vāyunā suta eti pavitra ā |
- 9.061.08c saṃ sūryasya raśmibhiḥ ||
- 9.061.09a sa no bhagāya vāyave pūṣṇe pavasva madhumān |
- 9.061.09c cārur mitre varuṇe ca ||
- 9.061.10a uccā te jātam andhaso divi śad bhūmy ā dade |
- 9.061.10c ugraṃ śarma mahi śravaḥ ||
- 9.061.11a enā viśvāny arya ā dyumnāni mānuṣāṇām |
- 9.061.11c siśāsanto vanāmahe ||
- 9.061.12a sa na indrāya yajyave varuṇāya marudbhyaḥ |
- 9.061.12c varivovit pari srava ||
- 9.061.13a upo ṣu jātam apturaṃ gobhir bhaṅgam pariṣkṛtam |
- 9.061.13c induṃ devā ayāsiṣuḥ ||
- 9.061.14a tam id vardhantu no giro vatsaṃ saṃśiśvarīr iva |
- 9.061.14c ya indrasya hṛdaṃsaniḥ ||
- 9.061.15a arṣā ṇaḥ soma śaṃ gave dhukṣasva pipyuṣim iṣam |
- 9.061.15c vardhā samudram ukthyam ||
- 9.061.16a pavamāno ajījanad divaś citraṃ na tanyatum |
- 9.061.16c jyotir vaiśvānaram bṛhat ||
- 9.061.17a pavamānasya te raso mado rājann aduchunaḥ |
- 9.061.17c vi vāram avyam arṣati ||
- 9.061.18a pavamāna rasas tava dakṣo vi rājati dyumān |
- 9.061.18c jyotir viśvaṃ svar dṛṣe ||
- 9.061.19a yas te mado vareṇyas tenā pavasvāndhasā |
- 9.061.19c devāvīr aghaśaṃsahā ||
- 9.061.20a jaghnir vṛtram amitriyaṃ sasnir vājaṃ dive-dive |
- 9.061.20c goṣā u aśvasā asi ||
- 9.061.21a sammiślo aruṣo bhava sūpasthābhir na dhenubhiḥ |
- 9.061.21c sīdañ chyeno na yonim ā ||
- 9.061.22a sa pavasva ya āvithendraṃ vṛtrāya hantave |
- 9.061.22c vavrivāṃsam mahīr apaḥ ||
- 9.061.23a suvirāso vayaṃ dhanā jayema soma miḍhvaḥ |
- 9.061.23c punāno vardha no giraḥ ||
- 9.061.24a tvotāsas tavāvasā syāma vanvanta āmuraḥ |
- 9.061.24c soma vrateṣu jāgṛhi ||
- 9.061.25a apaghnan pavate mṛdho 'pa somo arāvṇaḥ |
- 9.061.25c gachann indrasya niṣkṛtam ||
- 9.061.26a maho no rāya ā bhara pavamāna jahī mṛdhaḥ |
- 9.061.26c rāsvendo vīravād yaśaḥ ||
- 9.061.27a na tvā śataṃ cana hruto rādho ditsantam ā minan |
- 9.061.27c yat punāno makhasyase ||
- 9.061.28a pavasvendo vṛṣā sutaḥ kṛdhī no yaśaso jane |
- 9.061.28c viśvā apa dviṣo jahi ||
- 9.061.29a asya te sakhye vayaṃ tavendo dyumna uttame |
- 9.061.29c sāsahyāma pṛtanyataḥ ||
- 9.061.30a yā te bhīmāny āyudhā tigmāni santi dhūrvaṇe |
- 9.061.30c rakṣā samasya no nidaḥ ||

- 9.062.01a ete asṛgram indavas tiraḥ pavitram āśavaḥ |
9.062.01c viśvāny abhi saubhagā ||
- 9.062.02a vighnanto duritā puru sugā tokāya vājinaḥ |
9.062.02c tanā kṛṇvanto arvate ||
- 9.062.03a kṛṇvanto varivo gave 'bhy arṣanti suṣṭutim |
9.062.03c iḍām asmabhyaṃ saṃyatam ||
- 9.062.04a asāvya aṃśur madāyāpsu dakṣo giriṣṭhāḥ |
9.062.04c śyeno na yonim āsadat ||
- 9.062.05a śubhram andho devavātām apsu dhūto nṛbhiḥ sutaḥ |
9.062.05c svadanti gāvaḥ payobhiḥ ||
- 9.062.06a ād im aśvaṃ na hetāro 'śūśubhann amṛtāya |
9.062.06c madhvo rasaṃ sadhamāde ||
- 9.062.07a yās te dhārā madhuścuto 'sṛgram inda ūtaye |
9.062.07c tābhiḥ pavitram āsadaḥ ||
- 9.062.08a so arṣendrāya pītaye tiro romāṇy avyayā |
9.062.08c sīdan yonā vaneṣv ā ||
- 9.062.09a tvam indo pari srava svādiṣṭho aṅgirobhyaḥ |
9.062.09c varivovid gṛtām payaḥ ||
- 9.062.10a ayaṃ vicarṣanir hitaḥ pavamānaḥ sa cetati |
9.062.10c hinvāna āpyam bṛhat ||
- 9.062.11a eṣa vṛṣā vṛṣavrataḥ pavamāno aśastihā |
9.062.11c karad vasūni dāśuṣe ||
- 9.062.12a ā pavasva sahasraṇaṃ rayiṃ gomantam aśvinam |
9.062.12c puruścandram puruṣpṛham ||
- 9.062.13a eṣa sya pari ṣicyate marmṛjyamāna āyubhiḥ |
9.062.13c urugāyaḥ kavikratuḥ ||
- 9.062.14a sahasrotiḥ śatāmagho vimāno rajasaḥ kaviḥ |
9.062.14c indrāya pavate madaḥ ||
- 9.062.15a girā jāta iha stuta indur indrāya dhīyate |
9.062.15c vir yonā vasatāv iva ||
- 9.062.16a pavamānaḥ suto nṛbhiḥ somo vājam ivāsarāt |
9.062.16c camūṣu śakmanāsadam ||
- 9.062.17a taṃ tripṛṣṭhe trivandhure rathe yuñjanti yātave |
9.062.17c ṛṣiṇām sapta dhītibhiḥ ||
- 9.062.18a taṃ sotāro dhanaspṛtam āśuṃ vājāya yātave |
9.062.18c hariṃ hinota vājinam ||
- 9.062.19a āviśan kalaśaṃ suto viśvā arṣann abhi śriyaḥ |
9.062.19c śūro na goṣu tiṣṭhati ||
- 9.062.20a ā ta indo madāya kam payo duhanty āyavaḥ |
9.062.20c devā devebhyo madhu ||
- 9.062.21a ā naḥ somam pavitra ā sṛjatā madhumattamam |
9.062.21c devebhyo devaśruttamam ||
- 9.062.22a ete somā aṣṭkṣata gṛṇānāḥ śravase mahe |
9.062.22c madintamasya dhārayā ||
- 9.062.23a abhi gavayāni vītaye nṛmṇā punāno arṣasi |
9.062.23c sanadvājaḥ pari srava ||
- 9.062.24a uta no gomatīr iṣo viśvā arṣa pariṣṭubhaḥ |

- 9.062.24c gṛṇāno jamadagninā ||
 9.062.25a pavasva vāco agriyaḥ soma citrābhir ūtibhiḥ |
 9.062.25c abhi viśvāni kāvyā ||
 9.062.26a tvam samudriyā apo 'griyo vāca irayan |
 9.062.26c pavasva viśvamejaya ||
 9.062.27a tubhyemā bhuvanā kave mahimne soma tasthire |
 9.062.27c tubhyam arṣanti sindhavaḥ ||
 9.062.28a pra te divo na vṛṣṭayo dhārā yanty asaścataḥ |
 9.062.28c abhi śukrām upastiram ||
 9.062.29a indrāyendum punītanogam dakṣāya sādhanam |
 9.062.29c iśānam vitirādhasam ||
 9.062.30a pavamāna ṛtaḥ kaviḥ somaḥ pavitram āsadat |
 9.062.30c dadhat stotre suvīryam ||
- 9.063.01a ā pavasva sahasriṇam rayim soma suvīryam |
 9.063.01c asme śravāmsi dhārāya ||
 9.063.02a iṣam ūrjam ca pinvasa indrāya matsarintamaḥ |
 9.063.02c camūṣv ā ni śidasi ||
 9.063.03a suta indrāya viṣṇave somaḥ kalaśe akṣarat |
 9.063.03c madhumāṁ astu vāyave ||
 9.063.04a ete aṣṛgram āśavo 'ti hvarāmsi babhravaḥ |
 9.063.04c somā ṛtasya dhārāyā ||
 9.063.05a indram vardhanto apturaḥ kṛṇvanto viśvam āryam |
 9.063.05c apaghnanto arāvṇaḥ ||
 9.063.06a sutā anu svam ā rajo 'bhy arṣanti babhravaḥ |
 9.063.06c indram gachanta indavaḥ ||
 9.063.07a ayā pavasva dhārāyā yayā sūryam arocayaḥ |
 9.063.07c hinvāno mānuṣīr apaḥ ||
 9.063.08a ayukta sūra etaśam pavamāno manāv adhi |
 9.063.08c antarikṣeṇa yātave ||
 9.063.09a uta tyā harito daśa sūro ayukta yātave |
 9.063.09c indur indra iti bruvan ||
 9.063.10a parīto vāyave sutam gira indrāya matsaram |
 9.063.10c avyo vāreṣu siñcata ||
 9.063.11a pavamāna vidā rayim asmabhyam soma duṣṭaram |
 9.063.11c yo dūṇāso vanuṣyatā ||
 9.063.12a abhy arṣa sahasriṇam rayim gomantam aśvinam |
 9.063.12c abhi vājam uta śravaḥ ||
 9.063.13a somo devo na sūryo 'dribhiḥ pavate sutaḥ |
 9.063.13c dadhānaḥ kalaśe rasam ||
 9.063.14a ete dhāmāny āryā śukrā ṛtasya dhārāyā |
 9.063.14c vājam gomantam akṣaran ||
 9.063.15a sutā indrāya vajriṇe somāso dadhyāśiraḥ |
 9.063.15c pavitram aty akṣaran ||
 9.063.16a pra soma madhumattamo rāye arṣa pavitra ā |
 9.063.16c mado yo devavītamaḥ ||
 9.063.17a tam ī mṛjanty āyavo hariṇ nadīṣu vājinam |
 9.063.17c indum indrāya matsaram ||

9.063.18a ā pavasva hiraṇyavad aśvāvat soma vīravat |
 9.063.18c vājaṃ gomantam ā bhara ||
 9.063.19a pari vāje na vājayum avyo vāreṣu siñcata |
 9.063.19c indrāya madhumattamam ||
 9.063.20a kavim mṛjanti marjyaṃ dhībhir viprā avasyavaḥ |
 9.063.20c vṛṣā kanikrad arṣati ||
 9.063.21a vṛṣaṇaṃ dhībhir apturaṃ somam ṛtasya dhārayā |
 9.063.21c matī viprāḥ sam asvaran ||
 9.063.22a pavasva devāyuṣag indraṃ gachatu te madaḥ |
 9.063.22c vāyum ā roha dharmaṇā ||
 9.063.23a pavamāna ni tośase rayiṃ soma śravāyyam |
 9.063.23c priyaḥ samudram ā viśa ||
 9.063.24a apaghnan pavase mṛdhaḥ kratuvit soma matsaraḥ |
 9.063.24c nudasvādevayum janam ||
 9.063.25a pavamānā asṛkṣata somāḥ śukrāsa indavaḥ |
 9.063.25c abhi viśvāni kāvyā ||
 9.063.26a pavamānāsa āśavaḥ śubhrā asṛgram indavaḥ |
 9.063.26c ghnanto viśvā apa dviṣaḥ ||
 9.063.27a pavamānā divas pary antarikṣād asṛkṣata |
 9.063.27c pṛthivyā adhi sānavi ||
 9.063.28a punānaḥ soma dhārayendo viśvā apa sridhaḥ |
 9.063.28c jahi rakṣāṃsi suktrato ||
 9.063.29a apaghnan soma rakṣaso 'bhy arṣa kanikradat |
 9.063.29c dyumantaṃ śuṣmam uttamam ||
 9.063.30a asme vasūni dhārāya soma divyāni pārthivā |
 9.063.30c indo viśvāni vāryā ||

9.064.01a vṛṣā soma dyumāṃ asi vṛṣā deva vṛṣavrataḥ |
 9.064.01c vṛṣā dharmāni dadhiṣe ||
 9.064.02a vṛṣṇas te vṛṣṇyaṃ śavo vṛṣā vanaṃ vṛṣā madaḥ |
 9.064.02c satyaṃ vṛṣan vṛṣed asi ||
 9.064.03a aśvo na cakrado vṛṣā saṃ gā indo sam arvataḥ |
 9.064.03c vi no rāye duro vṛdhi ||
 9.064.04a asṛkṣata pra vājino gavyā somāso aśvayā |
 9.064.04c śukrāso vīrayāśavaḥ ||
 9.064.05a śumbhamānā ṛtāyubhir mṛjyamānā gabhastyoḥ |
 9.064.05c pavante vāre avyaye ||
 9.064.06a te viśvā dāśuṣe vasu somā divyāni pārthivā |
 9.064.06c pavantām āntarikṣyā ||
 9.064.07a pavamānasya viśvavit pra te sargā asṛkṣata |
 9.064.07c sūryasyeva na raśmayaḥ ||
 9.064.08a ketuṃ kṛṇvan divas pari viśvā rūpābhy arṣasi |
 9.064.08c samudraḥ soma pinvase ||
 9.064.09a hinvāno vācam iṣyasi pavamāna vidharmaṇi |
 9.064.09c akrān devo na sūryaḥ ||
 9.064.10a induḥ paviṣṭa cetanaḥ priyaḥ kavīnām matī |
 9.064.10c sṛjad aśvaṃ rathīr iva ||
 9.064.11a ūrmir yas te pavitra ā devāvīḥ paryakṣarat |

9.064.11c sīdann ṛtasya yonim ā ||
 9.064.12a sa no arṣa pavitra ā mado yo devavītamah |
 9.064.12c indav indrāya pītaye ||
 9.064.13a iṣe pavasva dhārayā mṛjyamāno manīṣibhiḥ |
 9.064.13c indo rucābhi gā ihi ||
 9.064.14a punāno varivas kṛdhy ūrjaṃ janāya girvaṇah |
 9.064.14c hare sṛjāna āsīram ||
 9.064.15a punāno devavītaya indrasya yāhi niṣkṛtam |
 9.064.15c dyutāno vājibhir yataḥ ||
 9.064.16a pra hinvānāsa indavo 'chā samudram āsavaḥ |
 9.064.16c dhiyā jūtā asṛkṣata ||
 9.064.17a marmṛjānāsa āyavo vṛthā samudram indavaḥ |
 9.064.17c agmann ṛtasya yonim ā ||
 9.064.18a pari ṇo yāhy asmayur viśvā vasūny ojasā |
 9.064.18c pāhi naḥ śarma vīravat ||
 9.064.19a mimāti vahnir etaśaḥ padaṃ yujāna ṛkvabhiḥ |
 9.064.19c pra yat samudra āhitaḥ ||
 9.064.20a ā yad yoniṃ hiraṇyayam āśur ṛtasya sīdati |
 9.064.20c jahāty apracetasaḥ ||
 9.064.21a abhi venā anūṣateyakṣanti pracetasaḥ |
 9.064.21c majjanty avicetasaḥ ||
 9.064.22a indrāyendo marutvate pavasva madhumattamaḥ |
 9.064.22c ṛtasya yonim āsadam ||
 9.064.23a taṃ tvā viprā vacovidah pari ṣkṛṇvanti vedhasaḥ |
 9.064.23c saṃ tvā mṛjanty āyavaḥ ||
 9.064.24a rasaṃ te mitro aryamā pibanti varuṇah kave |
 9.064.24c pavamānasya marutaḥ ||
 9.064.25a tvam soma vipaścitam punāno vācam iṣyasi |
 9.064.25c indo sahasrabharṇasam ||
 9.064.26a uto sahasrabharṇasaṃ vācam soma makhasyuvam |
 9.064.26c punāna indav ā bhara ||
 9.064.27a punāna indav eṣām puruhūta janānām |
 9.064.27c priyaḥ samudram ā viśa ||
 9.064.28a davidyutatyā rucā pariṣṭobhantya kṛpā |
 9.064.28c somāḥ śukrā gavāsiraḥ ||
 9.064.29a hinvāno hetṛbhir yata ā vājaṃ vājy akramīt |
 9.064.29c sīdanto vanuṣo yathā ||
 9.064.30a ṛdhak soma svastaye saṃjagmāno divaḥ kaviḥ |
 9.064.30c pavasva sūryo dṛśe ||

9.065.01a hinvanti sūram usrayaḥ svasāro jāmayas patim |
 9.065.01c mahām indum mahīyuvaḥ ||
 9.065.02a pavamāna rucā-rucā devo devebhyas pari |
 9.065.02c viśvā vasūny ā viśa ||
 9.065.03a ā pavamāna suṣṭutiṃ vṛṣṭiṃ devebhyo duvaḥ |
 9.065.03c iṣe pavasva saṃyatam ||
 9.065.04a vṛṣā hy asi bhānunā dyumantaṃ tvā havāmahe |
 9.065.04c pavamāna svādhyah ||

- 9.065.05a ā pavasva suvīryam mandamānaḥ svāyudha |
 9.065.05c iho ṣv indav ā gahi ||
 9.065.06a yad adbhiḥ pariṣicyase mṛjyamāno gabhastyoḥ |
 9.065.06c drunā sadhastham aśnuṣe ||
 9.065.07a pra somāya vyaśvavat pavamānāya gāyata |
 9.065.07c mahe sahasracakṣase ||
 9.065.08a yasya varṇam madhuścutam harim hinvanty adribhiḥ |
 9.065.08c indum indrāya pītaye ||
 9.065.09a tasya te vājino vayam viśvā dhanāni jigyuṣaḥ |
 9.065.09c sakhitvam ā vṛṇīmahe ||
 9.065.10a vṛṣā pavasva dhārayā marutvate ca matsaraḥ |
 9.065.10c viśvā dadhāna ojasā ||
 9.065.11a tam tvā dhartāram oṇyoḥ pavamāna svardṛśam |
 9.065.11c hinve vājeṣu vājinam ||
 9.065.12a ayā citto vipānayā hariḥ pavasva dhārayā |
 9.065.12c yujam vājeṣu codaya ||
 9.065.13a ā na indo mahim iṣam pavasva viśvadarśataḥ |
 9.065.13c asmabhyam soma gātuvit ||
 9.065.14a ā kalaśā anūṣatendo dhārābhir ojasā |
 9.065.14c endrasya pītaye viśa ||
 9.065.15a yasya te madyam rasam tivrām duhanty adribhiḥ |
 9.065.15c sa pavasvābhimātihā ||
 9.065.16a rājā medhābhir iyate pavamāno manāv adhi |
 9.065.16c antarikṣeṇa yātave ||
 9.065.17a ā na indo śatagvinam gavām poṣam svaśvyam |
 9.065.17c vahā bhagattim ūtaye ||
 9.065.18a ā naḥ soma saho juvo rūpam na varcase bhara |
 9.065.18c suṣvāṇo devavītaye ||
 9.065.19a arśā soma dyumattamo 'bhi droṇāni roruvat |
 9.065.19c sīdañ chyeno na yonim ā ||
 9.065.20a apsā indrāya vāyave varuṇāya marudbhyaḥ |
 9.065.20c somo arṣati viṣṇave ||
 9.065.21a iṣam tokāya no dadhad asmabhyam soma viśvataḥ |
 9.065.21c ā pavasva sahasriṇam ||
 9.065.22a ye somāsaḥ parāvati ye arvāvati sunvire |
 9.065.22c ye vādaḥ śaryañāvati ||
 9.065.23a ya ārjikeṣu kṛtvasu ye madhye pastyānām |
 9.065.23c ye vā janeṣu pañcasu ||
 9.065.24a te no vṛṣṭim divas pari pavantām ā suvīryam |
 9.065.24c suvānā devāsa indavaḥ ||
 9.065.25a pavate haryato harir gṛṇāno jamadagninā |
 9.065.25c hinvāno gor adhi tvaci ||
 9.065.26a pra śukrāso vayojuvo hinvānāso na saptayaḥ |
 9.065.26c śrīṇānā apsu mṛñjata ||
 9.065.27a tam tvā suteṣv ābhavo hinvire devatātaye |
 9.065.27c sa pavasvānāya rucā ||
 9.065.28a ā te dakṣam mayobhavam vahnim adyā vṛṇīmahe |
 9.065.28c pāntam ā purusprham ||
 9.065.29a ā mandram ā vareṇyam ā vipram ā manīṣiṇam |

- 9.065.29c pāntam ā purusṛham ||
 9.065.30a ā rayim ā sucetunam ā sukrato tanūṣv ā |
 9.065.30c pāntam ā purusṛham ||
- 9.066.01a pavasva viśvacarṣaṇe 'bhi viśvāni kāvyā |
 9.066.01c sakhā sakhibhya idyaḥ ||
 9.066.02a tābhyām viśvasya rājasi ye pavamāna dhāmani |
 9.066.02c pratīcī soma tasthatuḥ ||
 9.066.03a pari dhāmāni yāni te tvam somāsi viśvataḥ |
 9.066.03c pavamāna ṛtubhiḥ kave ||
 9.066.04a pavasva janayann iṣo 'bhi viśvāni vāryā |
 9.066.04c sakhā sakhibhya ūtaye ||
 9.066.05a tava śukrāso arcayo divas pṛṣṭhe vi tanvate |
 9.066.05c pavitraṃ soma dhāmabhiḥ ||
 9.066.06a taveme sapta sindhavaḥ praśiṣaṃ soma sisrate |
 9.066.06c tubhyaṃ dhāvanti dhenavaḥ ||
 9.066.07a pra soma yāhi dhārayā suta indrāya matsaraḥ |
 9.066.07c dadhāno akṣiti śravaḥ ||
 9.066.08a sam u tvā dhībhīr asvaran hinvatīḥ sapta jāmayāḥ |
 9.066.08c vipram ājā vivasvataḥ ||
 9.066.09a mṛjanti tvā sam agruvo 'vye jīrāv adhi ṣvaṇi |
 9.066.09c rebho yad ayyase vane ||
 9.066.10a pavamānasya te kave vājin sargā asṛkṣata |
 9.066.10c arvanto na śravasyavaḥ ||
 9.066.11a achā kośam madhuścutam asṛgram vāre avyaye |
 9.066.11c avāvaśanta dhītayaḥ ||
 9.066.12a achā samudram indavo 'staṃ gāvo na dhenavaḥ |
 9.066.12c agmann ṛtasya yonim ā ||
 9.066.13a pra ṇa indo mahe raṇa āpo arṣanti sindhavaḥ |
 9.066.13c yad gobhir vāsaiṣyase ||
 9.066.14a asya te sakhye vayam iyakṣantas tvotayaḥ |
 9.066.14c indo sakhitvam uśmasi ||
 9.066.15a ā pavasva gaviṣṭaye mahe soma nṛcakṣase |
 9.066.15c endrasya jaṭhare viśa ||
 9.066.16a mahāṃ asi soma jyeṣṭha ugrāṇām inda ojiṣṭhaḥ |
 9.066.16c yudhvā sañ chaśvaj jigetha ||
 9.066.17a ya ugrebhyas cid ojiyāñ chūrebhyas cic chūratarah |
 9.066.17c bhūridābhyaś cin maṃhīyān ||
 9.066.18a tvam soma sūra eṣas tokasya sātā tanūnām |
 9.066.18c vṛṇīmahe sakhyāya vṛṇīmahe yujyāya ||
 9.066.19a agna āyūṃṣi pavasa ā suvorjam iṣaṃ ca naḥ |
 9.066.19c āre bādhasva duchunām ||
 9.066.20a agniṛ ṛṣiḥ pavamānaḥ pāñcajanyaḥ purohitaḥ |
 9.066.20c tam īmahe mahāgayam ||
 9.066.21a agne pavasva svapā asme varcaḥ suvīryam |
 9.066.21c dadhad rayim mayi poṣam ||
 9.066.22a pavamāno ati sridho 'bhy arṣati suṣṭutim |
 9.066.22c sūro na viśvadarśataḥ ||

9.066.23a sa marmṛjāna āyubhiḥ prayasvān prayase hitaḥ |
 9.066.23c indur atyo vicakṣaṇaḥ ||
 9.066.24a pavamāna ṛtam bṛhac chukraṃ jyotir ajjanat |
 9.066.24c kṛṣṇā tamāṃsi jaṅghanat ||
 9.066.25a pavamānasya jaṅghnato hareś candrā asṛkṣata |
 9.066.25c jīrā ajiraśociṣaḥ ||
 9.066.26a pavamāno rathītamah śubhrebhiḥ śubhraśastamah |
 9.066.26c hariścandro marudgaṇaḥ ||
 9.066.27a pavamāno vy aśnavad raśmibhir vājasātamah |
 9.066.27c dadhat stotre suvīryam ||
 9.066.28a pra suvāna indur akṣāḥ pavitram aty avyayam |
 9.066.28c punāna indur indram ā ||
 9.066.29a eṣa somo adhi tvaci gavāṃ kṛīḍaty adribhiḥ |
 9.066.29c indram madāya johuvat ||
 9.066.30a yasya te dyumnavat payaḥ pavamānābhṛtaṃ divaḥ |
 9.066.30c tena no mṛḍa jīvase ||

9.067.01a tvam somāsi dhārayur mandra ojiṣṭho adhvare |
 9.067.01c pavasva maṃhayadrayiḥ ||
 9.067.02a tvam suto ṇmādano dadhanvān matsarintamah |
 9.067.02c indrāya sūrīr andhasā ||
 9.067.03a tvam suṣvāno adribhir abhy arṣa kanikradat |
 9.067.03c dyumantaṃ śuṣmam uttamam ||
 9.067.04a indur hinvāno arṣati tiro vārāṇy avyayā |
 9.067.04c harir vājam acikradat ||
 9.067.05a indo vy avyam arṣasi vi śravāṃsi vi saubhagā |
 9.067.05c vi vājān soma gomataḥ ||
 9.067.06a ā na indo śatagvinaṃ rayiṃ gomantam aśvinam |
 9.067.06c bharā soma sahasriṇam ||
 9.067.07a pavamānāsa indavas tiraḥ pavitram āśavaḥ |
 9.067.07c indraṃ yāmebhir āśata ||
 9.067.08a kakuhaḥ somyo rasa indur indrāya pūrvyaḥ |
 9.067.08c āyuh pavata āyave ||
 9.067.09a hinvanti sūram usrayaḥ pavamānam madhuścutam |
 9.067.09c abhi girā sam asvaran ||
 9.067.10a avitā no ajāśvaḥ pūṣā yāmani-yāmani |
 9.067.10c ā bhakṣat kanyāsu naḥ ||
 9.067.11a ayaṃ somaḥ kapardine ghṛtaṃ na pavate madhu |
 9.067.11c ā bhakṣat kanyāsu naḥ ||
 9.067.12a ayaṃ ta āghṛṇe suto ghṛtaṃ na pavate śuci |
 9.067.12c ā bhakṣat kanyāsu naḥ ||
 9.067.13a vāco jantuḥ kavīnām pavasva soma dhārayā |
 9.067.13c deveṣu ratnadhā asi ||
 9.067.14a ā kalaśeṣu dhāvati śyeno varma vi gāhate |
 9.067.14c abhi droṇā kanikradat ||
 9.067.15a pari pra soma te raso 'sarji kalaśe sutaḥ |
 9.067.15c śyeno na takto arṣati ||
 9.067.16a pavasva soma mandayann indrāya madhumattamah ||

9.067.17a asṛgran devavitaye vājayanto rathā iva ||
 9.067.18a te sutāso madintamāḥ śukrā vāyum asṛkṣata ||
 9.067.19a grāvṇā tunno abhiṣṭutaḥ pavitraṃ soma gachasi |
 9.067.19c dadhat stotre suvīryam ||
 9.067.20a eṣa tunno abhiṣṭutaḥ pavitraṃ ati gāhate |
 9.067.20c rakṣohā vāram avyayam ||
 9.067.21a yad anti yac ca dūrake bhayaṃ vindati mām iha |
 9.067.21c pavamāna vi taj jahi ||
 9.067.22a pavamānaḥ so adya naḥ pavitreṇa vicarṣaṇiḥ |
 9.067.22c yaḥ potā sa punātu naḥ ||
 9.067.23a yat te pavitraṃ arcisy agne vitatam antar ā |
 9.067.23c brahma tena punīhi naḥ ||
 9.067.24a yat te pavitraṃ arcivad agne tena punīhi naḥ |
 9.067.24c brahmasavaiḥ punīhi naḥ ||
 9.067.25a ubhābhyām deva savitaḥ pavitreṇa savena ca |
 9.067.25c mām punīhi viśvataḥ ||
 9.067.26a tribhiṣ ṭvaṃ deva savitar varṣiṣṭhaiḥ soma dhāmabhiḥ |
 9.067.26c agne dakṣaiḥ punīhi naḥ ||
 9.067.27a punantu mām devajanāḥ punantu vasavo dhiyā |
 9.067.27c viśve devāḥ punīta mā jātavedaḥ punīhi mā ||
 9.067.28a pra pyāyasva pra syandasva soma viśvebhir aṃsubhiḥ |
 9.067.28c devebhya uttamaṃ haviḥ ||
 9.067.29a upa priyam panipnataṃ yuvānam āhutivṛdham |
 9.067.29c aganma bibhrato namaḥ ||
 9.067.30a alāyyasya paraśur nanāśa tam ā pavasva deva soma |
 9.067.30c ākhuṃ cid eva deva soma ||
 9.067.31a yaḥ pāvamānir adhyety ṛṣibhiḥ sambhṛtaṃ rasam |
 9.067.31c sarvaṃ sa pūtam aśnāti svaditam mātariśvanā ||
 9.067.32a pāvamānir yo adhyety ṛṣibhiḥ sambhṛtaṃ rasam |
 9.067.32c tasmai sarasvatī duhe kṣīraṃ sarpir madhūdakam ||

9.068.01a pra devam achā madhumanta indavo 'siṣyadanta gāva ā na dhenavaḥ |
 9.068.01c barhiṣado vacanāvanta ūdhabhiḥ parisrutam usriyā nirṇijam dhire ||
 9.068.02a sa roruvad abhi pūrvā acikradad upāruhaḥ śrathayan svādate hariḥ |
 9.068.02c tiraḥ pavitraṃ pariyan uru jrayo ni śaryāṇi dadhate deva ā varam ||
 9.068.03a vi yo mame yamyā saṃyatī madaḥ sākaṃvṛdhā payasā pinvad akṣitā |
 9.068.03c mahī apāre rajasī vivevidad abhivrajann akṣitam pāja ā dade ||
 9.068.04a sa mātārā vicaran vājayann apaḥ pra medhiraḥ svadhayā pinvate padam |
 9.068.04c aṃśur yavena pipīse yato nṛbhiḥ saṃ jāmbhir nasate rakṣate śiraḥ ||
 9.068.05a saṃ dakṣeṇa manasā jāyate kavir ṛtasya garbho nihito yamā paraḥ |
 9.068.05c yūnā ha santā prathamam vi jajñatur guhā hitam janima nemam udyatam ||
 9.068.06a mandrasya rūpaṃ vividur manīṣiṇaḥ śyeno yad andho abharat parāvataḥ |
 9.068.06c tam marjayanta suvṛdham nadīṣv āṃśuśantam aṃśum pariyan tam ṛgmīyam ||
 9.068.07a tvām mṛjanti daśa yoṣaṇaḥ sutam soma ṛṣibhir matibhir dhītibhir hitam |
 9.068.07c avyo vārebhir uta devahūtibhir nṛbhir yato vājam ā darṣi sātaye ||
 9.068.08a pariprayantam vayyam suṣaṃsadam somam manīṣā abhy anūṣata stubhaḥ |
 9.068.08c yo dhārayā madhumām ūrmiṇā diva iyarti vācam rayiṣād amartyaḥ ||
 9.068.09a ayam diva iyarti viśvam ā rajaḥ somaḥ punānaḥ kalaśeṣu sīdati |

9.068.09c adbhīr gobhīr mṛjyate adribhīḥ sutāḥ punāna indur varivo vidat priyam ||
9.068.10a evā naḥ soma pariṣicyamāno vayo dadhac citratamam pavasva |
9.068.10c adveṣe dyāvāpṛthivī huvema devā dhatta rayim asme suvīram ||

9.069.01a iṣur na dhanvan prati dhīyate matir vatso na mātur upa sarjy ūdhani |
9.069.01c urudhāreva duhe agra āyaty asya vrateṣv api soma iṣyate ||
9.069.02a upo matiḥ pṛcyate sicyate madhu mandrājanī codate antar āsani |
9.069.02c pavamānaḥ saṃtaniḥ praghnatām iva madhumān drapsaḥ pari vāram arṣati ||
9.069.03a avye vadhūyuh pavate pari tvaci śrathnīte naptir aditer ṛtaṃ yate |
9.069.03c harir akrān yajataḥ saṃyato mado nṛmṇā śísāno mahiṣo na śobhate ||
9.069.04a ukṣā mimāti prati yanti dhenavo devasya devīr upa yanti niṣkṛtam |
9.069.04c aty akramīd arjunaṃ vāram avyayam atkaṃ na niktam pari somo avyata ||
9.069.05a amṛktena ruśatā vāsasā harir amartyo nirṇijānaḥ pari vyata |
9.069.05c divas pṛṣṭham barhaṇā nirṇije kṛtopastaraṇaṃ camvor nabhasmayam ||
9.069.06a sūryasyeva raśmayo drāvayitnavo matsarāsaḥ prasupaḥ sākam irate |
9.069.06c tantuṃ tatam pari sargāsa āśavo nendrād ṛte pavate dhāma kiṃ cana ||
9.069.07a sindhor iva pravaṇe nimna āśavo vṛṣacyutā madāso gātum āśata |
9.069.07c śaṃ no niveṣe dvipade catuṣpade 'sme vājāḥ soma tiṣṭhantu kṛṣṭayaḥ ||
9.069.08a ā naḥ pavasva vasumad dhiraṇyavad aśvāvad gomad yavamat suvīryam |
9.069.08c yūyaṃ hi soma pitaro mama sthana divo mūrdhānaḥ prasthitā vayaskṛtaḥ ||
9.069.09a ete somāḥ pavamānāsa indraṃ rathā iva pra yayuh sātīm acha |
9.069.09c sutāḥ pavitram ati yanty avyaṃ hitvī vavriṃ harito vṛṣṭim acha ||
9.069.10a indav indrāya bṛhate pavasva sumṛḍīko anavadyo riśādāḥ |
9.069.10c bharā candrāṇi gṛṇate vasūni devair dyāvāpṛthivī prāvataṃ naḥ ||

9.070.01a trir asmai sapta dhenavo duduhre satyām āsīram pūrve vyomani |
9.070.01c catvāry anyā bhuvanāni nirṇije cārūṇi cakre yad ṛtair avardhata ||
9.070.02a sa bhikṣamāno amṛtasya cāruṇa ubhe dyāvā kāvyenā vi śāsrathe |
9.070.02c tejiṣṭhā apo maṃhanā pari vyata yadī devasya śravasā sado viduḥ ||
9.070.03a te asya santu ketavo 'mṛtyavo 'dābhyaśo januṣi ubhe anu |
9.070.03c yebhir nṛmṇā ca devyā ca punata ād id rājānam mananā agrībhṇata ||
9.070.04a sa mṛjyamāno daśabhiḥ sukarmabhiḥ pra madhyamāsu mātṛṣu prame sacā |
9.070.04c vratāni pāno amṛtasya cāruṇa ubhe nṛcakṣā anu paśyate viśau ||
9.070.05a sa marmṛjāna indriyāya dhāyasa obhe antā rodasī harṣate hitaḥ |
9.070.05c vṛṣā śuṣmeṇa bādgate vi durmatir ādediśānaḥ śaryaheva śurudhaḥ ||
9.070.06a sa mātārā na dadṛśāna usriyo nānadad eti marutām iva svanaḥ |
9.070.06c jānann ṛtam prathamam yat svarṇaram praśastaye kam avṛṇīta sukratuḥ ||
9.070.07a ruvati bhīmo vṛṣabhas taviṣyayā śṛṅge śísāno hariṇī vicakṣaṇaḥ |
9.070.07c ā yoniṃ somaḥ sukṛtaṃ ni śīdati gavyayī tvag bhavati nirṇig avyayī ||
9.070.08a śuciḥ punānas tanvam arepasam avye harir ny adhāviṣṭa sānavi |
9.070.08c juṣṭo mitrāya varuṇāya vāyave tridhātu madhu kriyate sukarmabhiḥ ||
9.070.09a pavasva soma devavītaye vṛṣendrasya hārdi somadhānam ā viśa |
9.070.09c purā no bādhad dūrītātī pārāya kṣetraavid dhi diśa āhā vipṛchate ||
9.070.10a hito na saptir abhi vājam arṣendrasyendo jaṭharam ā pavasva |
9.070.10c nāvā na sindhum ati parṣi vidvāñ chūro na yudhyann ava no nida spaḥ ||

9.071.01a ā dakṣiṇā sṛjyate śuṣmy āsadam veti druho rakṣasaḥ pāti jāgṛviḥ |
 9.071.01c harir opaśaṃ kṛṇute nabhas paya upastire camvor brahma nirṇije ||
 9.071.02a pra kṛṣṭiḥeva śūṣa eti roruvad asuryaṃ varṇaṃ ni riṇite asya tam |
 9.071.02c jahāti vavrim pitur eti niṣkṛtam upaprutam kṛṇute nirṇijaṃ tanā ||
 9.071.03a adribhiḥ sutaḥ pavate gabhastyor vṛṣāyate nabhasā vepate matī |
 9.071.03c sa modate nasate sādgate girā nenikte apsu yajate parīmaṇi ||
 9.071.04a pari dyukṣaṃ sahasaḥ parvatāvṛdham madhvaḥ siṅcanti harmyasya sakṣaṇim |
 9.071.04c ā yasmin gāvaḥ suhutāda ūdhani mūrdhañ chrīṇanty agriyaṃ varīmabhiḥ ||
 9.071.05a sam ī rathaṃ na bhurijor aheṣata daśa svasāro aditer upastha ā |
 9.071.05c jigād upa jrayati gor apīcyam padaṃ yad asya matuthā ajijanan ||
 9.071.06a śyeno na yoniṃ sadanaṃ dhiyā kṛtam hiraṇyayam āsadam deva eṣati |
 9.071.06c e riṇanti barhiṣi priyaṃ girāśvo na devāṃ apy eti yajñiyaḥ ||
 9.071.07a parā vyakto aruṣo divaḥ kavir vṛṣā triṣṭho anaviṣṭa gā abhi |
 9.071.07c sahasraṇītir yatiḥ parāyati rebho na pūrvīr uṣaso vi rājati ||
 9.071.08a tveṣaṃ rūpaṃ kṛṇute varṇo asya sa yatrāśayat samṛtā sedhati sridhaḥ |
 9.071.08c apsā yāti svadhayā daivyaṃ janaṃ saṃ suṣṭutī nasate saṃ goagrayā ||
 9.071.09a ukṣeva yūthā pariyaṇ arāvid adhi tviṣir adhita sūryasya |
 9.071.09c divyaḥ suparṇo 'va cakṣata kṣaṃ somaḥ pari kratunā paśyate jāḥ ||

9.072.01a harim mṛjanty aruṣo na yujyate saṃ dhenubhiḥ kalaśe somo ajyate |
 9.072.01c ud vācam īrayati hinvate matī puruṣṭutasya kati cit paripriyaḥ ||
 9.072.02a sākaṃ vadanti bahavo manīṣiṇa indrasya somaṃ jaṭhare yad āduhuḥ |
 9.072.02c yadī mṛjanti sugabhastayo naraḥ sanīdābhir daśabhiḥ kāmyam madhu ||
 9.072.03a aramamāṇo aty eti gā abhi sūryasya priyaṃ duhitus tiro ravam |
 9.072.03c anv asmaī joṣam abharad vinaṃgṛsaḥ saṃ dvayibhiḥ svasṛbhiḥ kṣeti jāmbiḥ ||
 9.072.04a nṛdhūto adriṣuto barhiṣi priyaḥ patir gavām pradiva indur ṛtviyaḥ |
 9.072.04c puraṃdhivān manuṣo yajñasādhanaḥ śucir dhiyā pavate soma indra te ||
 9.072.05a nṛbāhubhyāṃ codito dhārayā suto 'nuṣvadhā pavate soma indra te |
 9.072.05c āprāḥ kratūn sam ajair adhvare matīr ver na druṣac camvor āsadam dhariḥ ||
 9.072.06a aṃṣuṃ duhanti stanayantam akṣitam kavim kavayo 'paso manīṣiṇaḥ |
 9.072.06c sam ī gāvo matayo yanti saṃyata ṛtasya yonā sadane punarbhuvaḥ ||
 9.072.07a nābhā pṛthivyā dharuṇo maho divo3 'pām ūrmau sindhuṣv antar ukṣitaḥ |
 9.072.07c indrasya vajro vṛṣabho vibhūvasuḥ somo hṛde pavate cāru matsaraḥ ||
 9.072.08a sa tū pavasva pari pāthivaṃ raja stotre śikṣann ādhūnvate ca suktrato |
 9.072.08c mā no nir bhāg vasunaḥ sādanasprṣo rayim piśaṅgam bahulaṃ vasīmahi ||
 9.072.09a ā tū na indo śatadāt v aśvyam sahasradātu paśumad dhiraṇyavat |
 9.072.09c upa māsva bṛhatī revatīr iṣo 'dhi stotrasya pavamāna no gahi ||

9.073.01a srakve drapsasya dhamataḥ sam asvarann ṛtasya yonā sam aranta nābhayaḥ |
 9.073.01c trīn sa mūrdhno asuraś cakra ārabhe satyasya nāvaḥ sukṛtam apīparan ||
 9.073.02a samyak samyañco mahiṣā aheṣata sindhor ūrmāv adhi venā avīvipan |
 9.073.02c madhor dhārābhir janayanto arkam it priyām indrasya tanvam avīvṛdhan ||
 9.073.03a pavitravantaḥ pari vācam āsate pitaiṣām pratno abhi rakṣati vratam |
 9.073.03c mahaḥ samudraṃ varuṇas tiro dadhe dhīrā ic chekur dharuṇeṣv ārabham ||
 9.073.04a sahasradhāre 'va te sam asvaran divo nāke madhujihvā asaścataḥ |
 9.073.04c asya spaśo na ni miṣanti bhūrṇayaḥ pade-pade pāśinaḥ santi setavaḥ ||
 9.073.05a pitur mātur adhy ā ye samasvarann ṛcā śocantaḥ saṃdahanto avratān |

9.073.05c indradviṣṭām apa dhamanti māyayā tvacam asiknīm bhūmano divas pari ||
 9.073.06a pratnān mānād adhy ā ye samasvaraṅ chlokayantrāso rabhasasya mantavaḥ |
 9.073.06c apānakṣāso badhirā ahāsata ṛtasya panthām na taranti duṣkrtaḥ ||
 9.073.07a sahasradhāre vitate pavitra ā vācam punanti kavayo maṅṣiṇaḥ |
 9.073.07c rudrāsa eṣām iṣirāso adruha spaśaḥ svañcaḥ sudṛṣo nṛcakṣasaḥ ||
 9.073.08a ṛtasya gopā na dabhāya sukratuṣ trī ṣa pavitrā hṛdy antar ā dadhe |
 9.073.08c vidvān sa viśvā bhuvanābhi paśyaty avājuṣṭān vidhyati karte avratān ||
 9.073.09a ṛtasya tantur vitataḥ pavitra ā jihvāyā agre varuṇasya māyayā |
 9.073.09c dhirās cit tat saminakṣanta āsatātrā kartam ava padāty aprabhuḥ ||

9.074.01a śiśur na jāto 'va cakradad vane svar yad vājy aruṣaḥ siṣāsati |
 9.074.01c divo retasā sacate payovṛdhā tam imahe sumatī śarma saprathaḥ ||
 9.074.02a divo ya skambho dharuṇaḥ svātata āpūrṇo aṃśuḥ paryeti viśvataḥ |
 9.074.02c seme mahī rodasī yakṣad āvṛtā samīcīne dādḥāra sam iṣaḥ kaviḥ ||
 9.074.03a mahi psaraḥ sukṛtaṃ somyam madhūrvī gavyūtir aditer ṛtaṃ yate |
 9.074.03c iṣe yo vṛṣṭer ita usriyo vṛṣāpāṃ netā ya itaūtir ṛgmīyaḥ ||
 9.074.04a ātmanvan nabho duhyate ghṛtaṃ paya ṛtasya nābhir amṛtaṃ vi jāyate |
 9.074.04c samīcīnāḥ sudānavaḥ prīṇanti taṃ naro hitam ava mehanti peravaḥ ||
 9.074.05a arāvīd aṃśuḥ sacamāna ūrmiṇā devāvyam manuṣe pinvati tvacam |
 9.074.05c dadhāti garbham aditer upastha ā yena tokaṃ ca tanayaṃ ca dhāmahe ||
 9.074.06a sahasradhāre 'va tā asaścatas ṛṭiye santu rajasi prajāvatīḥ |
 9.074.06c catasro nābho nihitā avo divo havir bharanty amṛtaṃ ghṛtaścutaḥ ||
 9.074.07a śvetaṃ rūpaṃ kṛṇute yat siṣāsati somo mīdhvāṃ asuro veda bhūmanaḥ |
 9.074.07c dhiyā śamī sacate sem abhi pravat divas kavandham ava darṣad udriṇam ||
 9.074.08a adha śvetaṃ kalaśaṃ gobhir aktaṃ kārṣmann ā vājy akramit sasavān |
 9.074.08c ā hinvire manasā devayantaḥ kakṣivāte śatahimāya gonām ||
 9.074.09a adbhiḥ soma papṛcānasya te raso 'vyo vāraṃ vi pavamāna dhāvati |
 9.074.09c sa mṛjyamānaḥ kavibhir madintama svadasvendrāya pavamāna pītaye ||

9.075.01a abhi priyāṇi pavate canohito nāmāni yahvo adhi yeṣu vardhate |
 9.075.01c ā sūryasya bṛhato bṛhann adhi rathaṃ viśvañcam aruhad vicakṣaṇaḥ ||
 9.075.02a ṛtasya jihvā pavate madhu priyaṃ vaktā patir dhiyo asyā adābhyaḥ |
 9.075.02c dadhāti putraḥ pitror apīcyam nāma ṛṭiyam adhi rocane divaḥ ||
 9.075.03a ava dyutānaḥ kalaśāṃ acikradan nṛbhir yemānaḥ kośa ā hiraṇyaye |
 9.075.03c abhīm ṛtasya dohanā anūṣatādhi tripṛṣṭha uśaso vi rājati ||
 9.075.04a adribhiḥ suto matibhiś canohitaḥ prarocayan rodasī mātara śuciḥ |
 9.075.04c romāṇy avyā samayā vi dhāvati madhor dhārā pinvamānā dive-dive ||
 9.075.05a pari soma pra dhanvā svastaye nṛbhiḥ punāno abhi vāsayāśiram |
 9.075.05c ye te madā āhanaso vihāyasas tebhīr indraṃ codaya dātave magham ||

9.076.01a dhartā divaḥ pavate kṛtvyo raso dakṣo devānām anumādyo nṛbhiḥ |
 9.076.01c hariḥ sṛjāno atyo na satvabhir vṛthā pājāṃsi kṛṇute nadīṣv ā ||
 9.076.02a śūro na dhatta āyudhā gabhastyoḥ svaḥ siṣāsan rathiro gaviṣṭiṣu |
 9.076.02c indrasya śuṣmam irayann apasyubhir indur hinvāno ajyate maṅṣibhiḥ ||
 9.076.03a indrasya soma pavamāna ūrmiṇā taviṣyamāṇo jaṭharaṣv ā viśa |
 9.076.03c pra ṇaḥ pinva vidyud abhrevā rodasī dhiyā na vājāṃ upa māsi śaśvataḥ ||

- 9.076.04a viśvasya rājā pavate swardṛśa ṛtasya dhītim ṛṣiṣād avīvaśat |
 9.076.04c yaḥ sūryasyāsireṇa mṛjyate pitā matīnām asamaṣṭakāvyaḥ ||
 9.076.05a vṛṣeva yūthā pari kośam arṣasy apām upasthe vṛṣabhaḥ kanikradat |
 9.076.05c sa indrāya pavase matsarintamo yathā jeṣāma samithe tvotayaḥ ||
- 9.077.01a eṣa pra kośe madhumāṁ acikradad indrasya vajro vapuṣo vapuṣṭaraḥ |
 9.077.01c abhīm ṛtasya sudughā ghṛtaścuto vāsrā arṣanti payaseva dhenavaḥ ||
 9.077.02a sa pūrvyaḥ pavate yaṁ divas pari śyeno mathāyad iṣitas tiro rajaḥ |
 9.077.02c sa madhva ā yuvate vevijāna it kṛṣānor astur manasāha bibhyuṣā ||
 9.077.03a te naḥ pūrvāsa uparāsa indavo mahe vājāya dhanvantu gomate |
 9.077.03c ikṣeṇyāso ahyo na cāravo brahma-brahma ye jujuṣur havir-haviḥ ||
 9.077.04a ayaṁ no vidvān vanavad vanuṣyata induḥ satrācā manasā puruṣṭutaḥ |
 9.077.04c inasya yaḥ sadane garbham ādadhe gavām urubjam abhy arṣati vrajam ||
 9.077.05a cakrir divaḥ pavate kṛtvyo raso mahāṁ adabdho varuṇo hurug yate |
 9.077.05c asāvi mitro vṛjaneṣu yajñiyo 'tyo na yūthe vṛṣayuh kanikradat ||
- 9.078.01a pra rājā vācam janayann asiṣyadad apo vasāno abhi gā iyakṣati |
 9.078.01c gṛbhṇāti ripram avir asya tānvā śuddho devānām upa yāti niṣkṛtam ||
 9.078.02a indrāya soma pari śicyase nṛbhīr nṛcakṣā ūrmiḥ kavir ajyase vane |
 9.078.02c pūrvīr hi te srutayaḥ santi yātave sahasram aśvā harayaś camūśadaḥ ||
 9.078.03a samudriyā apsaraso manīṣiṇam āsīnā antar abhi somam akṣaran |
 9.078.03c tā im hinvanti harmyasya sakṣaṇim yācante sumnam pavamānam akṣitam ||
 9.078.04a gojin naḥ somo rathajid dhiranyaḥ svarjīd abjit pavate sahasrajit |
 9.078.04c yaṁ devāś cakrire pītaye madam svādiṣṭham drapsam aruṇam mayobhuvam ||
 9.078.05a etāni soma pavamāno asmayuh satyāni kṛṇvan draviṇāny arṣasi |
 9.078.05c jahi śatrum antike dūrake ca ya urvīm gavyūtim abhayaṁ ca nas kṛdhi ||
- 9.079.01a acodaso no dhanvantv indavaḥ pra suvānāso bṛhaddiveṣu harayaḥ |
 9.079.01c vi ca naśan na iṣo arātayo 'ryo naśanta saniśanta no dhiyaḥ ||
 9.079.02a pra ṇo dhanvantv indavo madacyuto dhanā vā yebhir arvato junīmasi |
 9.079.02c tiro martasya kasya cit parihvṛtiṁ vyaṁ dhanāni viśvadhā bharemahi ||
 9.079.03a uta svasyā arātyā arir hi ṣa utānyasyā arātyā vṛko hi ṣaḥ |
 9.079.03c dhanvan na tṛṣṇā sam arita tāṁ abhi soma jahi pavamāna durādhyāḥ ||
 9.079.04a divi te nābhā paramo ya ādade pṛthivyās te ruruhuḥ sānavi kṣipāḥ |
 9.079.04c adrayas tvā bapsati gor adhi tvacy apsu tvā hastair duduhur manīṣiṇaḥ ||
 9.079.05a evā ta indo subhvaṁ supeśasaṁ rasam tuñjanti prathamā abhiśriyaḥ |
 9.079.05c nidaṁ-nidam pavamāna ni tāriṣa āvis te śuṣmo bhavatu priyo madaḥ ||
- 9.080.01a somasya dhārā pavate nṛcakṣasa ṛtena devān havate divas pari |
 9.080.01c bṛhaspate ravathenā vi didyute samudrāso na savanāni vivyacuḥ ||
 9.080.02a yaṁ tvā vājinn aghnyā abhy anūṣatāyohataṁ yonim ā rohasi dyumān |
 9.080.02c maghonām āyuh pratiran mahi śrava indrāya soma pavase vṛṣā madaḥ ||
 9.080.03a endrasya kukṣā pavate madintama ūrjam vasānaḥ śravase sumaṅgalaḥ |
 9.080.03c pratyaṅ sa viśvā bhuvanābhi paprathe kṛḍan harir atyaḥ syandate vṛṣā ||
 9.080.04a taṁ tvā devebhyo madhumattamaṁ naraḥ sahasradhāram duhate daśa kṣipāḥ |

9.080.04c nṛbhiḥ soma pracyuto grāvabhiḥ suto viśvān devāṃ ā pavasvā sahasrajit ||
 9.080.05a taṃ tvā hastino madhumantam adribhir duhanty apsu vṛṣabhaṃ daśa kṣipah |
 9.080.05c indraṃ soma mādayan daivyaṃ janam sindhor ivormiḥ pavamāno arṣasi ||

9.081.01a pra somasya pavamānasyormaya indrasya yanti jaṭharam supeśasaḥ |
 9.081.01c dadhnā yad im unnitā yaśasā gavāṃ dānāya śūram udamandiṣuḥ sutāḥ ||
 9.081.02a achā hi somaḥ kalaśāṃ asiṣyadad atyo na voḍhā raghuvartanir vṛṣā |
 9.081.02c athā devānām ubhayasya janmano vidvāṃ aśnoty amuta itaś ca yat ||
 9.081.03a ā naḥ soma pavamānaḥ kirā vasv indo bhava maghavā rādhaso mahaḥ |
 9.081.03c śikṣā vayodho vasave su cetunā mā no gayam āre asmat parā sicaḥ ||
 9.081.04a ā naḥ pūṣā pavamānaḥ surātayo mitro gachantu varuṇaḥ sajośasaḥ |
 9.081.04c bṛhaspatir maruto vāyur aśvinā tvaṣṭā savitā suyamā sarasvatī ||
 9.081.05a ubhe dyāvapṛthivī viśvaminve aryamā devo aditir vidhātā |
 9.081.05c bhago nṛsaṃsa urv antarikṣaṃ viśve devāḥ pavamānaṃ juṣanta ||

9.082.01a asāvi somo aruṣo vṛṣā harī rājeva dasmo abhi gā acikradat |
 9.082.01c punāno vāram pary ety avyayaṃ śyeno na yoniṃ ghṛtavantam āsadam ||
 9.082.02a kavir vedhasyā pary eṣi māhinam atyo na mṛṣṭo abhi vājam arṣasi |
 9.082.02c apasedhan duritā soma mṛḍaya ghṛtaṃ vasānaḥ pari yāsi nirṇijam ||
 9.082.03a parjanyaḥ pitā mahiṣasya parṇino nābhā pṛthivyā giriṣu kṣayaṃ dadhe |
 9.082.03c svasāra āpo abhi gā utāsaran saṃ grāvabhir nasate vīte adhvare ||
 9.082.04a jāyeva patyāv adhi śeva maṃhase pajrāyā garbha śṛṇuhi bravīmi te |
 9.082.04c antar vāṇiṣu pra carā su jīvase 'nindyo vṛjane soma jāgrhi ||
 9.082.05a yathā pūrvebhyaḥ śatasā amṛdhraḥ sahasrasāḥ paryayā vājam indo |
 9.082.05c evā pavasva suvitāya navyase tava vratam anv āpaḥ sacante ||

9.083.01a pavitraṃ te vitatam brahmaṇas pate prabhur gātrāṇi pary eṣi viśvataḥ |
 9.083.01c ataptatanūr na tad āmo aśnute śṛtāsa id vahantas tat sam āsata ||
 9.083.02a tapoṣ pavitraṃ vitataṃ divas pade śocanto asya tantavo vy asthiran |
 9.083.02c avanty asya pavitāram āśavo divas pṛṣṭham adhi tiṣṭhanti cetasā ||
 9.083.03a arūrucad uśasaḥ pṛsnir agriya ukṣā bibharti bhuvanāni vājayuh |
 9.083.03c māyāvino mamire asya māyayā nṛcakṣasaḥ pitaro garbham ā dadhuḥ ||
 9.083.04a gandharva itthā padam asya rakṣati pāti devānām janimāny adbhutaḥ |
 9.083.04c gṛbhṇāti ripuṃ nidhayā nidhāpatiḥ sukṛttamā madhuno bhakṣam āsata ||
 9.083.05a havir haviṣmo mahi sadma daivyaṃ nabho vasānaḥ pari yāsy adhvaram |
 9.083.05c rājā pavitraratho vājam āruhaḥ sahasrabhṛṣṭir jayasi śravo bṛhat ||

9.084.01a pavasva devamādano vicarṣanir apsā indrāya varuṇāya vāyave |
 9.084.01c kṛdhī no adya varivaḥ svastimad urukṣitau gṛṇīhi daivyaṃ janam ||
 9.084.02a ā yas tasthau bhuvanāny amartyo viśvāni somaḥ pari tāny arṣati |
 9.084.02c kṛṇvan saṃcṛtaṃ vicṛtam abhiṣṭaya induḥ siṣakty uśasaṃ na sūryaḥ ||
 9.084.03a ā yo gobhiḥ sṛjyata ośadhiṣv ā devānām sumna iṣayann upāvasuḥ |
 9.084.03c ā vidyutā pavate dhārayā suta indraṃ somo mādayan daivyaṃ janam ||
 9.084.04a eṣa sya somaḥ pavate sahasrajid dhinvāno vācam iṣirām uṣarbudham |
 9.084.04c induḥ samudram ud iyarti vāyubhir endrasya hārdi kalaśeṣu sīdati ||

9.084.05a abhi tyam gāvaḥ payasā payovṛdham somam śrīṇanti matibhiḥ svarvidam |
9.084.05c dhanamjayaḥ pavate kṛtvyo raso vipraḥ kaviḥ kāvyenā svarcanāḥ ||

9.085.01a indrāya soma suṣutaḥ pari sravāpāmīvā bhavatu rakṣasā saha |
9.085.01c mā te rasasya matsata dvayāvino draviṇasvanta iha santv indavaḥ ||
9.085.02a asmān samarye pavamāna codaya dakṣo devānām asi hi priyo madaḥ |
9.085.02c jahi śatrūṃr abhy ā bhandanāyataḥ pibendra somam ava no mṛdho jahi ||
9.085.03a adabdha indo pavase madintama ātmendrasya bhavasi dhāsir uttamaḥ |
9.085.03c abhi svaranti bahavo maṇiṣiṇo rājānam asya bhuvanasya niṃsate ||
9.085.04a sahasraṇithaḥ śatadhāro adbhuta indrāyenduḥ pavate kāmīyam madhu |
9.085.04c jayan kṣetram abhy arṣā jayann apa uruṃ no gātum kṛṇu soma mīdhvaḥ ||
9.085.05a kanikradat kalaśe gobhir ajyase vy avyayaṃ samayā vāram arṣasi |
9.085.05c marmṛjyamāno atyo na sānasir indrasya soma jaṭhare sam akṣaraḥ ||
9.085.06a svāduḥ pavasva divyāya janmane svādur indrāya suhavītunāmne |
9.085.06c svādur mitrāya varuṇāya vāyave bṛhaspataye madhumāṃ adābhyaḥ ||
9.085.07a atyam mṛjanti kalaśe daśa kṣipaḥ pra viprānām matayo vāca irate |
9.085.07c pavamānā abhy arṣanti suṣṭutim endram viśanti madirāsa indavaḥ ||
9.085.08a pavamāno abhy arṣā suvīryam urvīm gavyūtim mahi śarma saprathaḥ |
9.085.08c mākīr no asya pariṣūtīr īsatendo jayema tvayā dhanam-dhanam ||
9.085.09a adhi dyām asthād vṛṣabho vicakṣaṇo 'rūrucad vi divo rocanā kaviḥ |
9.085.09c rājā pavitram aty eti roruvad divaḥ piyūṣam duhate nṛcakṣasaḥ ||
9.085.10a divo nāke madhujihvā asaścato venā duhanty ukṣaṇam giriṣṭhām |
9.085.10c apsu drapsam vāvṛdhānam samudra ā sindhor ūrmā madhumantam pavitra ā ||
9.085.11a nāke suparṇam upapaptivāmsam giro venānām akṛpanta pūrvīḥ |
9.085.11c śīsum rihanti matayaḥ panipnataṃ hiraṇyayaṃ śakunaṃ kṣāmaṇi sthām ||
9.085.12a ūrdhvo gandharvo adhi nāke asthād viśvā rūpā praticakṣaṇo asya |
9.085.12c bhānuḥ śukreṇa śociṣā vy adyaut prārūrucad rodasī mātārā śuciḥ ||

9.086.01a pra ta āśavaḥ pavamāna dhījavo madā arṣanti raghujā iva tmanā |
9.086.01c divyāḥ suparṇā madhumanta indavo madintamāsaḥ pari kośam āsate ||
9.086.02a pra te madāso madirāsa āśavo 'sṛkṣata rathyāso yathā pṛthak |
9.086.02c dhenur na vatsam payasābhi vajriṇam indram indavo madhumanta ūrmayaḥ ||
9.086.03a atyo na hiyāno abhi vājam arṣa svarvit kośam divo adrimātaram |
9.086.03c vṛṣā pavitre adhi sāno avyaye somaḥ punāna indriyāya dhāyase ||
9.086.04a pra ta āśvīnīḥ pavamāna dhijuvo divyā asṛgran payasā dharīmaṇi |
9.086.04c prāntar ṛṣaya sthāvīrīr asṛkṣata ye tvā mṛjanty ṛṣiṣāṇa vedhasaḥ ||
9.086.05a viśvā dhāmāni viśvacakṣa ṛbhvasaḥ prabhos te sataḥ pari yanti ketavaḥ |
9.086.05c vyānaśiḥ pavase soma dharmabhiḥ patir viśvasya bhuvanasya rājasi ||
9.086.06a ubhayataḥ pavamānasya raśmayo dhruvasya sataḥ pari yanti ketavaḥ |
9.086.06c yadī pavitre adhi mṛjyate hariḥ sattā ni yonā kalaśeṣu sīdati ||
9.086.07a yajñasya ketuḥ pavate svadhvaraḥ somo devānām upa yāti niṣkṛtam |
9.086.07c sahasradhāraḥ pari kośam arṣati vṛṣā pavitram aty eti roruvat ||
9.086.08a rājā samudram nadyo vi gāhate 'pām ūrmiḥ sacate sindhuṣu śritaḥ |
9.086.08c adhy asthāt sānu pavamāno avyayaṃ nābhā pṛthivyā dharuṇo maho divaḥ ||
9.086.09a divo na sānu stanayann acikradad dyauś ca yasya pṛthivī ca dharmabhiḥ |
9.086.09c indrasya sakhyam pavate vivevidat somaḥ punānaḥ kalaśeṣu sīdati ||
9.086.10a jyotir yajñasya pavate madhu priyam pitā devānām janitā vibhūvasuḥ |

- 9.086.10c dadhāti ratnaṃ svadhayor apīcyam madintamo matsara indriyo rasaḥ ||
9.086.11a abhikrandan kalaśaṃ vājy arṣati patir divaḥ śatadhāro vicakṣaṇaḥ |
9.086.11c harir mitrasya sadaneṣu sīdati marmṛjāno 'vibhiḥ sindhubhir vṛṣā ||
9.086.12a agre sindhūnām pavamāno arṣaty agre vāco agriyo goṣu gachati |
9.086.12c agre vājasya bhajate mahādhanam svāyudhaḥ sotṛbhiḥ pūyate vṛṣā ||
9.086.13a ayam matavāñ chakuno yathā hito 'vye sasāra pavamāna ūrmiṇā |
9.086.13c tava kratvā rodasī antarā kave śucir dhiyā pavate soma indra te ||
9.086.14a drāpiṃ vasāno yajato diviṣṛśam antarikṣaprā bhuvaneṣv arpitaḥ |
9.086.14c svar jajñāno nabhasābhy akramīt pratnam asya pitaram ā vivāsati ||
9.086.15a so asya viśe mahi śarma yachati yo asya dhāma prathamam vyānaśe |
9.086.15c padaṃ yad asya parame vyomany ato viśvā abhi sam yāti saṃyataḥ ||
9.086.16a pro ayāsīd indur indrasya niṣkṛtaṃ sakhā sakhyur na pra mināti saṃgiram |
9.086.16c marya iva yuvatibhiḥ sam arṣati somaḥ kalaśe śatayāmnā pathā ||
9.086.17a pra vo dhiyo mandrayuvo vipanyuvaḥ panasyuvaḥ saṃvasaneṣv akramuḥ |
9.086.17c somam mañiṣā abhy anūṣata stubho 'bhi dhenavaḥ payasem aśīśrayuḥ ||
9.086.18a ā naḥ soma saṃyatam pipyuṣim iṣam indo pavasva pavamāno asridham |
9.086.18c yā no dohate trir ahann asaścuṣī kṣumad vājavan madhumad suvīryam ||
9.086.19a vṛṣā matinām pavate vicakṣaṇaḥ somo ahnaḥ pratarītośaso divaḥ |
9.086.19c krāṇā sindhūnām kalaśāṃ avīvaśad indrasya hārdy āviśan mañiṣibhiḥ ||
9.086.20a mañiṣibhiḥ pavate pūrvyaḥ kavir nṛbhir yataḥ pari kośāṃ acikradat |
9.086.20c tritasya nāma janayan madhu kṣarad indrasya vāyoḥ sakhyāya kartave ||
9.086.21a ayam punāna uśaso vi rocayad ayam sindhubhyo abhavad ulokakṛt |
9.086.21c ayam triḥ sapta duduhāna āsiram somo hṛde pavate cāru matsaraḥ ||
9.086.22a pavasva soma divyeṣu dhāmasu sṛjāna indo kalaśe pavitra ā |
9.086.22c sīdann indrasya jaṭhare kanikradan nṛbhir yataḥ sūryam ārohayo divi ||
9.086.23a adribhiḥ sutaḥ pavase pavitra āṃ indav indrasya jaṭhारेṣv āviśan |
9.086.23c tvam nṛcakṣā bhavo vicakṣaṇa soma gotram aṅgirobhyo 'vṛṇor apa ||
9.086.24a tvām soma pavamānam svādhyo 'nu viprāso amadann avasyavaḥ |
9.086.24c tvām suparṇa ābharad divas parīndo viśvābhir matibhiḥ pariṣkṛtam ||
9.086.25a avye punānam pari vāra ūrmiṇā hariṃ navante abhi sapta dhenavaḥ |
9.086.25c apām upasthe adhy āyavaḥ kavim ṛtasya yonā mañiṣā aheṣata ||
9.086.26a induḥ punāno ati gāhate mṛdho viśvāni kṛṇvan supathāni yajyave |
9.086.26c gāḥ kṛṇvāno nirṇijaṃ haryataḥ kavir atyo na kṛīdan pari vāram arṣati ||
9.086.27a asaścataḥ śatadhārā abhiśriyo hariṃ navante 'va tā udanyuvaḥ |
9.086.27c kṣipo mṛjanti pari gobhir āvṛtaṃ tṛtiye pṛṣṭhe adhi rocane divaḥ ||
9.086.28a tavemāḥ prajā divyasya retasas tvam viśvasya bhuvanasya rājasi |
9.086.28c athedaṃ viśvam pavamāna te vaśe tvam indo prathamam dhāmadhā asi ||
9.086.29a tvam samudro asi viśvavit kave tavemāḥ pañca pradiśo vidharmaṇi |
9.086.29c tvam dyām ca pṛthivīm cāti jabhriṣe tava jyotimṣi pavamāna sūryaḥ ||
9.086.30a tvam pavitre rajaso vidharmaṇi devebhyaḥ soma pavamāna pūyase |
9.086.30c tvām uśijaḥ prathamā aḡrbhṇata tubhyemā viśvā bhuvanāni yemire ||
9.086.31a pra rebha ety ati vāram avyayam vṛṣā vaneṣv ava cakradad dhariḥ |
9.086.31c sam dhītayo vāvaśānā anūṣata śiśuṃ rihanti matayaḥ panipnatam ||
9.086.32a sa sūryasya raśmibhiḥ pari vyata tantum tanvānas trivṛtam yathā vide |
9.086.32c nayann ṛtasya praśiṣo navīyasīḥ patir janīnām upa yāti niṣkṛtam ||
9.086.33a rājā sindhūnām pavate patir diva ṛtasya yāti pathibhiḥ kanikradat |
9.086.33c sahasradhāraḥ pari śicyate hariḥ punāno vācam janayann upāvasuḥ ||
9.086.34a pavamāna mahy arṇo vi dhāvasi sūro na citro avyayāni pavyayā |
9.086.34c gabhastipūto nṛbhir adribhiḥ suto mahe vājāya dhanyāya dhanvasi ||

9.086.35a iṣam ūrjam pavamānābhy arṣasi śyeno na vaṃsu kalaśeṣu sīdasi |
 9.086.35c indrāya madvā madyo madaḥ suto divo viṣṭambha upamo vicakṣaṇaḥ ||
 9.086.36a sapta svasāro abhi mātaraḥ śiśuṃ navam jajñānam jenyam vipaścitam |
 9.086.36c apām gandharvaṃ divyaṃ nṛcakṣasaṃ somaṃ viśvasya bhuvanasya rājase ||
 9.086.37a iśāna imā bhuvanāni viyase yujāna indo haritaḥ suparṇyaḥ |
 9.086.37c tās te kṣarantu madhumad ghṛtam payas tava vrata soma tiṣṭhantu kṛṣṭayaḥ ||
 9.086.38a tvam nṛcakṣā asi soma viśvataḥ pavamāna vṛṣabha tā vi dhāvasi |
 9.086.38c sa naḥ pavasva vasumad dhiraṇyavad vyaṃ syāma bhuvaneṣu jīvase ||
 9.086.39a govit pavasva vasuvid dhiraṇyavid retodhā indo bhuvaneṣv arpitaḥ |
 9.086.39c tvam suvīro asi soma viśvavit taṃ tvā viprā upa girema āsate ||
 9.086.40a un madhva ūrmir vananā atiṣṭhipad apo vasāno mahiṣo vi gāhate |
 9.086.40c rājā pavitraratho vājam āruhat sahasrabhṛṣṭir jayati śravo bṛhat ||
 9.086.41a sa bhandanā ud iyarti prajāvatir viśvāyur viśvāḥ subharā ahardivi |
 9.086.41c brahma prajāvad rayim aśvapastyam pīta indav indram asmabhyam yācatāt ||
 9.086.42a so agre ahnām harir haryato madaḥ pra cetasā cetayate anu dyubhiḥ |
 9.086.42c dvā janā yātayann antar iyate narā ca śaṃsam daivyaṃ ca dhartari ||
 9.086.43a añjate vy añjate sam añjate kratuṃ rihanti madhunābhy añjate |
 9.086.43c sindhor ucchvāse patayantam ukṣaṇam hiraṇyapāvāḥ paśum āsu gṛbhṇate ||
 9.086.44a vipaścite pavamānāya gāyata mahī na dhārāty andho arṣati |
 9.086.44c ahir na jūrṇām ati sarpati tvacam atyo na krīḍann asarad vṛṣā hariḥ ||
 9.086.45a agrego rājāpyas taviṣyate vimāno ahnām bhuvaneṣv arpitaḥ |
 9.086.45c harir ghṛtasnuḥ sudṛśīko arṇavo jyotīrathaḥ pavate rāya okyaḥ ||
 9.086.46a asarji skambho diva udyato madaḥ pari tridhātur bhuvanāny arṣati |
 9.086.46c aṃśuṃ rihanti matayaḥ panipnataṃ girā yadi nirṇijam ṛgmiṇo yayuḥ ||
 9.086.47a pra te dhārā aty aṇvāni meṣyaḥ punānasya samyato yanti raṃhayaḥ |
 9.086.47c yad gobhir indo camvoḥ samajyasa ā suvānaḥ soma kalaśeṣu sīdasi ||
 9.086.48a pavasva soma kratuvin na ukthyo 'vyo vāre pari dhāva madhu priyam |
 9.086.48c jahi viśvān rakṣasa indo atriṇo bṛhad vadema vidathe suvīrāḥ ||

9.087.01a pra tu drava pari kośam ni śida nṛbhiḥ punāno abhi vājam arṣa |
 9.087.01c aśvam na tvā vājinam marjayanto 'chā barhī raśanābhīr nayanti ||
 9.087.02a svāyudhaḥ pavate deva indur aśastihā vṛjanaṃ rakṣamāṇaḥ |
 9.087.02c pitā devānām janitā sudakṣo viṣṭambho divo dharuṇaḥ pṛthivyāḥ ||
 9.087.03a ṛṣir vipraḥ puraetā janānām ṛbhur dhira uśanā kāvyena |
 9.087.03c sa cid viveda nihitaṃ yad āsām apīcyam guhyam nāma gonām ||
 9.087.04a eṣa sya te madhumāṃ indra somo vṛṣā vṛṣṇe pari pavitre akṣāḥ |
 9.087.04c sahasrasāḥ śatasā bhūridāvā śaśvattamam barhir ā vājy asthāt ||
 9.087.05a ete somā abhi gavyā sahasrā mahe vājyāmṛtāya śravāṃsi |
 9.087.05c pavitrebhiḥ pavamānā asṛgrañ chravasyavo na pṛtanājo atyāḥ ||
 9.087.06a pari hi śmā puruhūto janānām viśvāsarad bhojanā pūyamānaḥ |
 9.087.06c athā bhara śyenabhṛta prayāṃsi rayim tuñjāno abhi vājam arṣa ||
 9.087.07a eṣa suvānaḥ pari somaḥ pavitre sargo na sṛṣṭo adadhāvad arvā |
 9.087.07c tigme śiśāno mahiṣo na śṛṅge gā gavyann abhi śūro na satvā ||
 9.087.08a eṣā yayau paramād antar adreḥ kūcit satir ūrve gā viveda |
 9.087.08c divo na vidyut stanayanty abhraiḥ somasya te pavata indra dhārā ||
 9.087.09a uta sma rāśim pari yāsi gonām indreṇa soma saratham punānaḥ |
 9.087.09c pūrvīr iṣo bṛhatir jīradāno śikṣā śacīvas tava tā upaṣṭut ||

9.088.01a ayaṃ soma indra tubhyaṃ sunve tubhyam pavate tvam asya pāhi |
 9.088.01c tvam ha yaṃ cakṛṣe tvam vavṛṣa indum madāya yujyāya somam ||
 9.088.02a sa iṃ ratho na bhuriṣād ayoji mahaḥ purūṇi sātaye vasūni |
 9.088.02c ād iṃ viśvā nahuṣyāṇi jātā svarṣātā vana ūrdhvā navanta ||
 9.088.03a vāyur na yo niyutvāṃ iṣṭayāmā nāsatyeva hava ā śambhaviṣṭhaḥ |
 9.088.03c viśvavāro draviṇodā iva tman pūṣeva dhijavano 'si soma ||
 9.088.04a indro na yo mahā karmāṇi cakrir hantā vṛtrāṇām asi soma pūrbhit |
 9.088.04c paidvo na hi tvam ahināmnāṃ hantā viśvasyāsi soma dasyoḥ ||
 9.088.05a agnir na yo vana ā sṛjyamāno vṛthā pājāṃsi kṛṇute nadiṣu |
 9.088.05c jano na yudhvā mahata upabdir iyarti somaḥ pavamāna ūrmim ||
 9.088.06a ete somā ati vārāṇy avyā divyā na kośāso abhravarṣāḥ |
 9.088.06c vṛthā samudraṃ sindhavo na nicīḥ sutāso abhi kalaśāṃ asṛgran ||
 9.088.07a śuṣmī śardho na mārutam pavasvānabhiśastā divyā yathā viṭ |
 9.088.07c āpo na makṣū sumatir bhavā naḥ sahasrāpsāḥ pṛtanāṣāṇ na yajñāḥ ||
 9.088.08a rājño nu te varuṇasya vratāni bṛhad gabhīraṃ tava soma dhāma |
 9.088.08c śuciṣṭvam asi priyo na mitro dakṣāyyo aryamevāsi soma ||

9.089.01a pro sya vahniḥ pathyābhir asyān divo na vṛṣṭiḥ pavamāno akṣāḥ |
 9.089.01c sahasradhāro asadan ny asme mātur upasthe vana ā ca somaḥ ||
 9.089.02a rājā sindhūnām avasiṣṭa vāsa ṛtasya nāvam āruhad rajiṣṭhām |
 9.089.02c apsu drapso vāvṛdhe śyenajūto duha iṃ pitā duha iṃ pitur jāṃ ||
 9.089.03a siṃhaṃ nasanta madhvo ayāsaṃ harim aruṣaṃ divo asya patim |
 9.089.03c śūro yutsu prathamāḥ pṛchate gā asya cakṣasā pari pāty ukṣā ||
 9.089.04a madhupṛṣṭhaṃ ghoram ayāsam aśvaṃ rathe yuñjanty urucakra ṛṣvam |
 9.089.04c svasāra iṃ jāmayo marjayanti sanābhayo vājinam ūrjayanti ||
 9.089.05a catasra iṃ ghṛtaduhaḥ sacante samāne antar dharuṇe niṣattāḥ |
 9.089.05c tā iṃ arṣanti namasā punānās tā iṃ viśvataḥ pari śanti pūrvīḥ ||
 9.089.06a viṣṭambho divo dharuṇaḥ pṛthivyā viśvā uta kṣitayo haste asya |
 9.089.06c asat ta utso gṛṇate niyutvān madhvo aṃśuḥ pavata indriyāya ||
 9.089.07a vanvann avāto abhi devavītim indrāya soma vṛtrahā pavasva |
 9.089.07c śagdhi mahaḥ puruścandrasya rāyaḥ suvīryasya patayaḥ syāma ||

9.090.01a pra hinvāno janitā rodasyo ratho na vājaṃ saniṣyann ayāsīt |
 9.090.01c indraṃ gachann āyudhā saṃśiśāno viśvā vasu hastayor ādadhānaḥ ||
 9.090.02a abhi tripṛṣṭhaṃ vṛṣaṇaṃ vayodhām āṅgūṣāṇām avāvaśanta vāṇiḥ |
 9.090.02c vanā vasāno varuṇo na sindhūn vi ratnadhā dayate vāryāṇi ||
 9.090.03a śūrāgrāmaḥ sarvavīraḥ sahāvāñ jetā pavasva sanitā dhanāni |
 9.090.03c tigṃāyudhaḥ kṣipradhanvā samatsv aśāḍhaḥ sāhvān pṛtanāsu śatrūn ||
 9.090.04a urugavyūtir abhayāni kṛṇvan samīcīne ā pavasvā puraṃdhī |
 9.090.04c apaḥ siṣāsann uśasaḥ svar gāḥ saṃ cikrado maho asmabhyaṃ vājān ||
 9.090.05a matsi soma varuṇam matsi mitram matsīndram indo pavamāna viṣṇum |
 9.090.05c matsi śardho mārutam matsi devān matsi mahām indram indo madāya ||
 9.090.06a evā rājeva kratumāṃ amena viśvā ghanighnad duritā pavasva |
 9.090.06c indo sūktāya vacase vayo dhā yūyam pāta svastibhiḥ sadā naḥ ||

9.091.01a asarji vakvā rathye yathājau dhiyā manotā prathamo manīṣi |
 9.091.01c daśa svasāro adhi sāno avye 'janti vahniṃ sadanāny acha ||
 9.091.02a vīti janasya divyasya kavyair adhi suvāno nahuṣyebhir induḥ |
 9.091.02c pra yo nṛbhir amṛto martyebhir marmṛjāno 'vibhir gobhir adbhiḥ ||
 9.091.03a vṛṣā vṛṣṇe roruvad aṃśur asmai pavamāno ruśad irte payo goḥ |
 9.091.03c sahasram ṛkvā pathibhir vacovid adhvasmabhiḥ sūro aṇvaṃ vi yāti ||
 9.091.04a rujā dṛḍhā cid rakṣasaḥ sadāṃsi punāna inda ūrṇuhi vi vājān |
 9.091.04c vṛṣcopariṣṭāt tujatā vadhena ye anti dūrād upanāyam eṣām ||
 9.091.05a sa pratnavan navyase viśvavāra sūktāya pathaḥ kṛṇuhi prācaḥ |
 9.091.05c ye duḥṣahāso vanuṣā bṛhantas tāṃs te aśyāma purukṛt purukṣo ||
 9.091.06a evā punāno apaḥ svar gā asmabhyaṃ tokā tanayāni bhūri |
 9.091.06c śaṃ naḥ kṣetram uru jyotiṃṣi soma jyoṅ naḥ sūryaṃ dṛṣaye rirīhi ||

9.092.01a pari suvāno harir aṃśuḥ pavitre ratho na sarji sanaye hiyānaḥ |
 9.092.01c āpac chlokam indriyam pūyamānaḥ prati devāṃ ajuṣata prayobhiḥ ||
 9.092.02a achā nṛcakṣā asarat pavitre nāma dadhānaḥ kavir asya yonau |
 9.092.02c sīdan hoteva sadane camūṣūpem agmann ṛṣayaḥ sapta viprāḥ ||
 9.092.03a pra sumedhā gātuvid viśvadevaḥ somaḥ punānaḥ sada eti nityam |
 9.092.03c bhuvad viśveṣu kāvyēṣu rantānu janān yatate pañca dhīraḥ ||
 9.092.04a tava tye soma pavamāna niṇye viśve devās traya ekādaśāsaḥ |
 9.092.04c daśa svadhābhir adhi sāno avye mṛjanti tvā nadyaḥ sapta yahvīḥ ||
 9.092.05a tan nu satyam pavamānasyāstu yatra viśve kāravaḥ saṃnasanta |
 9.092.05c jyotir yad ahne akṛṇod ulokam prāvan manuṃ dasyave kar abhīkam ||
 9.092.06a pari sadmeva paśumānti hotā rājā na satyaḥ samitir iyānaḥ |
 9.092.06c somaḥ punānaḥ kalaśāṃ ayāsīt sīdan mṛgo na mahiṣo vaneṣu ||

9.093.01a sākamukṣo marjayanta svasāro daśa dhīrasya dhītayo dhanutriḥ |
 9.093.01c hariḥ pary adravaj jāḥ sūryasya droṇaṃ nanakṣe atyo na vājī ||
 9.093.02a sam mātṛbhir na śiśur vāvaśāno vṛṣā dadhanve puruvāro adbhiḥ |
 9.093.02c maryo na yoṣām abhi niṣkṛtaṃ yan saṃ gachate kalaśa usriyābhiḥ ||
 9.093.03a uta pra pipya ūdhar aghnyāyā indur dhārābhiḥ sacate sumedhāḥ |
 9.093.03c mūrdhānaṃ gāvaḥ payasā camūṣv abhi śrīṇanti vasubhir na niktaiḥ ||
 9.093.04a sa no devebhiḥ pavamāna radendo rayim aśvinaṃ vāvaśānaḥ |
 9.093.04c rathirāyatām uśatī puraṃdhir asmadyag ā dāvane vasūnām ||
 9.093.05a nū no rayim upa māsva nṛvantam punāno vātāpyaṃ viśvaścandram |
 9.093.05c pra vanditur indo tāry āyuh prātar makṣū dhiyāvasur jagamyāt ||

9.094.01a adhi yad asmin vājinīva śubha spardhante dhiyaḥ sūrye na viśaḥ |
 9.094.01c apo vṛṇānaḥ pavate kavīyan vrajaṃ na paśuwardhanāya manma ||
 9.094.02a dvitā vyūrṇvann amṛtasya dhāma svarvide bhuvanāni prathanta |
 9.094.02c dhiyaḥ pinvānāḥ svasare na gāva ṛtāyantir abhi vāvaśra indum ||
 9.094.03a pari yat kaviḥ kāvyā bharate sūro na ratho bhuvanāni viśvā |
 9.094.03c deveṣu yaśo martāya bhūṣan dakṣāya rāyaḥ purubhūsu navyaḥ ||
 9.094.04a śriye jātaḥ śriya ā nir iyāya śriyaṃ vayo jaritṛbhyo dadhāti |
 9.094.04c śriyaṃ vasānā amṛtatvam āyan bhavanti satyā samithā mitadrau ||
 9.094.05a iṣam ūrjam abhy arṣāśvaṃ gām uru jyotiḥ kṛṇuhi matsi devān |

9.094.05c viśvāni hi suśahā tāni tubhyam pavamāna bādhasa soma śatrūn ||

9.095.01a kanikranti harir ā sṛjyamānaḥ sīdan vanasya jaṭhare punānaḥ |
9.095.01c nṛbhir yataḥ kṛṇute nirṇijaṃ gā ato matīr janayata svadhābhiḥ ||
9.095.02a hariḥ sṛjānaḥ pathyām ṛtasyeyarti vācam ariteva nāvam |
9.095.02c devo devānām guhyāni nāmāviṣ kṛṇoti barhiṣi pravāce ||
9.095.03a apām ived ūrmayas tarturāṇaḥ pra manīṣā irate somam acha |
9.095.03c namasyantīr upa ca yanti saṃ cā ca viśanty uśatīr uśantam ||
9.095.04a tam marmṛjānam mahiṣaṃ na sānāv aṃśuṃ duhanty ukṣaṇaṃ giriṣṭhām |
9.095.04c taṃ vāvaśānam matayaḥ sacante trito bibharti varuṇaṃ samudre ||
9.095.05a iṣyan vācam upavakteva hotuḥ punāna indo vi śyā manīṣām |
9.095.05c indraś ca yat kṣayathaḥ saubhagāya suvīryasya patayaḥ syāma ||

9.096.01a pra senāniḥ sūro agre rathānām gavyann eti harṣate asya senā |
9.096.01c bhadrān kṛṇvann indrahavān sakhībhya ā somo vastrā rabhasāni datte ||
9.096.02a sam asya hariṃ harayo mṛjanty aśvahayair anīṣitaṃ namobhiḥ |
9.096.02c ā tiṣṭhati ratham indrasya sakhā vidvāṃ enā sumatiṃ yāty acha ||
9.096.03a sa no deva devatāte pavasva mahe soma psarasa indrapānaḥ |
9.096.03c kṛṇvann apo varṣayan dyām utemām uror ā no varivasyā punānaḥ ||
9.096.04a ajītaye 'hataye pavasva svastaye sarvatātaye bṛhate |
9.096.04c tad uśanti viśva ime sakhāyas tad ahaṃ vaśmi pavamāna soma ||
9.096.05a somaḥ pavate janitā matīnām janitā divo janitā pṛthivyāḥ |
9.096.05c janitāgner janitā sūryasya janitendrasya janitota viṣṇoḥ ||
9.096.06a brahmā devānām padaviḥ kavīnām ṛṣir viprāṇām mahiṣo mṛgāṇām |
9.096.06c śyeno gṛdhrāṇām svadhitiṃ vanānām somaḥ pavitram aty eti rebhan ||
9.096.07a prāvīvipad vāca ūrmim na sindhur giraḥ somaḥ pavamāno manīṣāḥ |
9.096.07c antaḥ paśyan vṛjanemāvarāṇy ā tiṣṭhati vṛṣabho goṣu jānan ||
9.096.08a sa matsaraḥ pṛtsu vanvann avātaḥ sahasraretā abhi vājam arṣa |
9.096.08c indrāyendo pavamāno manīṣy aṃśor ūrmim iraya gā iṣaṇyan ||
9.096.09a pari priyaḥ kalaśe devavāta indrāya somo raṇyo madāya |
9.096.09c sahasradhāraḥ śatavāja indur vājī na saptiḥ samanā jigāti ||
9.096.10a sa pūrvyo vasuvij jāyamāno mṛjāno apsu duduhāno adrau |
9.096.10c abhiśastipā bhuvanasya rājā vidad gātum brahmaṇe pūyamānaḥ ||
9.096.11a tvayā hi naḥ pitaraḥ soma pūrve karmāṇi cakruḥ pavamāna dhīrāḥ |
9.096.11c vanvann avātaḥ paridhīm̐r aporṇu vīrebhir aśvair maghavā bhavā naḥ ||
9.096.12a yathāpavathā manave vayodhā amitrahā varivovid dhaviṣmān |
9.096.12c evā pavasva draviṇaṃ dadhāna indre saṃ tiṣṭha janayāyudhāni ||
9.096.13a pavasva soma madhumāṃ ṛtāvāpo vasāno adhi sāno avye |
9.096.13c ava droṇāni ghṛtavānti sīda madintamo matsara indrapānaḥ ||
9.096.14a vṛṣṭim̐ divaḥ śatadhāraḥ pavasva sahasrasā vājayur devavitau |
9.096.14c saṃ sindhubhiḥ kalaśe vāvaśānaḥ sam usriyābhiḥ pratiran na āyuh ||
9.096.15a eṣa sya somo matibhiḥ punāno 'tyo na vājī taratīd arātīḥ |
9.096.15c payo na dugdham aditer iṣiram urv iva gātuḥ suyamo na voḍhā ||
9.096.16a svāyudhaḥ sotṛbhiḥ pūyamāno 'bhy arṣa guhyaṃ cāru nāma |
9.096.16c abhi vājaṃ saptir iva śravasyābhi vāyum abhi gā deva soma ||
9.096.17a śīsum̐ jajñānaṃ haryatam mṛjanti śumbhanti vahnim maruto gaṇena |
9.096.17c kavir gīrbhiḥ kāvyenā kaviḥ san somaḥ pavitram aty eti rebhan ||

9.096.18a ṛṣimanā ya ṛṣikṛt svarṣāḥ sahasraṇīthaḥ padaviḥ kavīnām |
 9.096.18c ṛṭṭiyam dhāma mahiṣaḥ siṣāsan somo virājam anu rājati ṣṭup ||
 9.096.19a camūṣac chyenaḥ śakuno vibhṛtvā govindur drapsa āyudhāni bibhṛat |
 9.096.19c apām ūrmiḥ sacamānaḥ samudraḥ turīyam dhāma mahiṣo vivakti ||
 9.096.20a maryo na śubhras tanvam mṛjāno 'tyo na sṛtvā sanaye dhanānām |
 9.096.20c vṛṣeva yūthā pari kośam arṣan kanikradac camvor ā viveśa ||
 9.096.21a pavasvendo pavamāno mahobhiḥ kanikradat pari vārāṇy arṣa |
 9.096.21c krīḍaṅ camvor ā viśa pūyamāna indraḥ te raso madiro mamattu ||
 9.096.22a prāsya dhārā bṛhatir asṛgrann akto gobhiḥ kalaśāṃ ā viveśa |
 9.096.22c sāma kṛṇvan sāmānyo vipāścīt krandann ety abhi sakhyur na jānim ||
 9.096.23a apaghnann eṣi pavamāna śatrūn priyam na jāro abhigīta induḥ |
 9.096.23c sīdan vaneṣu śakuno na patvā somaḥ punānaḥ kalaśeṣu sattā ||
 9.096.24a ā te rucaḥ pavamānasya soma yoṣeva yanti sudughāḥ sudhārāḥ |
 9.096.24c harir ānītaḥ puruvāro apsv acikradat kalaśe devayūnām ||

9.097.01a asya preṣā hemanā pūyamāno devo devebhiḥ sam aprkta rasam |
 9.097.01c sutaḥ pavitram pary eti rebhan miteva sadma paśumānti hotā ||
 9.097.02a bhadrā vastrā samanyā vasāno mahān kavir nivacanāni śaṃsan |
 9.097.02c ā vacyasva camvoḥ pūyamāno vicakṣaṇo jāgṛvir devavītau ||
 9.097.03a sam u priyo mṛjyate sāno avye yaśastaro yaśasām kṣaito asme |
 9.097.03c abhi svāra dhanvā pūyamāno yūyam pāta svastibhiḥ sadā naḥ ||
 9.097.04a pra gāyatābhy arcāma devān somaḥ hinota mahate dhanāya |
 9.097.04c svāduḥ pavāte ati vāram avyam ā sīdāti kalaśam devayur naḥ ||
 9.097.05a indur devānām upa sakhyam āyan sahasradhāraḥ pavate madāya |
 9.097.05c nṛbhi stavāno anu dhāma pūrvam aḡann indram mahate saubhagāya ||
 9.097.06a stotre rāye harir arṣā punāna indram mado gachatu te bharāya |
 9.097.06c devair yāhi saratham rādho achā yūyam pāta svastibhiḥ sadā naḥ ||
 9.097.07a pra kāvyam usaneva bruvāno devo devānām janimā vivakti |
 9.097.07c mahivrataḥ śucibandhuḥ pāvakaḥ padā varāho abhy eti rebhan ||
 9.097.08a pra hamsāsas ṛpalam manyum achāmād astam vṛṣagaṇā ayāsuḥ |
 9.097.08c āṅgūṣyam pavamānaḥ sakhāyo durmarṣam sākam pra vadanti vānam ||
 9.097.09a sa raḥhata urugāyasya jūtiḥ vṛthā krīḍantam mimate na gāvaḥ |
 9.097.09c parīṇasam kṛṇute tigmaśṛṅgo divā harir dadṛṣe naktam ṛjraḥ ||
 9.097.10a indur vāji pavate gonyoghā indre somaḥ saha invan madāya |
 9.097.10c hanti rakṣo bād hate pary arātir varivaḥ kṛṇvan vṛjanasya rājā ||
 9.097.11a adha dhārayā madhvā pṛcānas tiro roma pavate adridugdhaḥ |
 9.097.11c indur indrasya sakhyam juṣāno devo devasya matsaro madāya ||
 9.097.12a abhi priyāni pavate punāno devo devān svena rasena pṛñcan |
 9.097.12c indur dharmāṇy ṛtuthā vasāno daśa kṣipo avyata sāno avye ||
 9.097.13a vṛṣā śoṇo abhikanikradad gā nadayann eti pṛthivīm uta dyām |
 9.097.13c indrasyeva vagnur ā ṣṛṇva ājau pracetayann arṣati vācam emām ||
 9.097.14a rasāyyaḥ payasā pinvamāna irayann eṣi madhumantam amśum |
 9.097.14c pavamānaḥ samtanīm eṣi kṛṇvann indrāya soma pariṣicyamānaḥ ||
 9.097.15a evā pavasva madiro madāyodagrābhasya namayan vadhasnaiḥ |
 9.097.15c pari varṇam bharamāno ruśantaḥ gavyur no arṣa pari soma siktaḥ ||
 9.097.16a juṣṭvī na indo supathā sugāny urau pavasva varivāṃsi kṛṇvan |
 9.097.16c ghaneva viṣvag duritāni vighnann adhi ṣṇunā dhanva sāno avye ||
 9.097.17a vṛṣṭim no arṣa divyām jigatnum idāvatiḥ śamgayim jiradānum |

- 9.097.17c stukeva vītā dhanvā vicinvan bandhūmr imāṃ avarāṃ indo vāyūn ||
- 9.097.18a granthiṃ na vi śya grathitam punāna rjuṃ ca gātuṃ vṛjinam ca soma |
- 9.097.18c atyo na krado harir ā sṛjāno maryo deva dhanva pastyāvān ||
- 9.097.19a juṣṭo madāya devatāta indo pari ṣṇunā dhanva sāno avye |
- 9.097.19c sahasradhāraḥ surabhir adabdhaḥ pari srava vājasātau nṛṣahye ||
- 9.097.20a araśmāno ye 'rathā ayuktā atyāso na sasṛjānāsa ājau |
- 9.097.20c ete śukrāso dhanvanti somā devāsas tāṃ upa yātā pibadhyai ||
- 9.097.21a evā na indo abhi devavītim pari srava nabho arṇas camūṣu |
- 9.097.21c somo asmabhyaṃ kāmyam bṛhantaṃ rayiṃ dadātu vīravantam ugram ||
- 9.097.22a takṣad yadī manaso venato vāg jyeṣṭhasya vā dharmaṇi kṣor anīke |
- 9.097.22c ād im āyan varam ā vāvaśānā juṣṭam patiṃ kalaśe gāva indum ||
- 9.097.23a pra dānudo divyo dānupinva ṛtam ṛtāya pavate sumedhāḥ |
- 9.097.23c dharmā bhuvad vṛjanyasya rājā pra raśmibhir daśabhir bhāri bhūma ||
- 9.097.24a pavitrebhiḥ pavamāno nṛcakṣā rājā devānām uta martyānām |
- 9.097.24c dvitā bhuvad rayipatī rayiṇām ṛtam bharat subhṛtaṃ cārv induḥ ||
- 9.097.25a arvāṃ iva śravase sātīm achendrasya vāyor abhi vītim arṣa |
- 9.097.25c sa naḥ sahasrā bṛhatīr iṣo dā bhavā soma draviṇovit punānaḥ ||
- 9.097.26a devāvyo naḥ pariṣicyamānāḥ kṣayam suvīram dhanvantu somāḥ |
- 9.097.26c āyajyavaḥ sumatiṃ viśvavārā hotāro na diviyajo mandratamāḥ ||
- 9.097.27a evā deva devatāte pavasva mahe soma psarase devapānaḥ |
- 9.097.27c mahaś cid dhi śmasi hitāḥ samarye kṛdhi suṣṭhāne rodasī punānaḥ ||
- 9.097.28a aśvo no krado vṛṣabhir yujānaḥ simho na bhīmo manaso javiyān |
- 9.097.28c arvācīnaiḥ pathibhir ye rajiṣṭhā ā pavasva saumanasaṃ na indo ||
- 9.097.29a śataṃ dhārā devajātā asṛgran sahasram enāḥ kavayo mṛjanti |
- 9.097.29c indo sanitraṃ diva ā pavasva puraetāsi mahato dhanasya ||
- 9.097.30a divo na sargā asasṛgram ahnām rājā na mitram pra mināti dhīraḥ |
- 9.097.30c pitur na putraḥ kratubhir yatāna ā pavasva viśe asyā ajītim ||
- 9.097.31a pra te dhārā madhumatīr asṛgran vārān yat pūto atyeṣy avyān |
- 9.097.31c pavamāna pavase dhāma gonām jajñānaḥ sūryam apinvo arkaiḥ ||
- 9.097.32a kanikradad anu panthām ṛtasya śukro vi bhāsy amṛtasya dhāma |
- 9.097.32c sa indrāya pavase matsaravān hinvāno vācam matibhiḥ kavīnām ||
- 9.097.33a divyaḥ suparṇo 'va cakṣi soma pinvan dhārāḥ karmaṇā devavītau |
- 9.097.33c endo viśa kalaśam somadhānam krandann ihi sūryasyopa raśmim ||
- 9.097.34a tisro vāca irayati pra vahnir ṛtasya dhītim brahmaṇo maṇiṣām |
- 9.097.34c gāvo yanti gopatim pṛchamānāḥ somaṃ yanti matayo vāvaśānāḥ ||
- 9.097.35a somaṃ gāvo dhenavo vāvaśānāḥ somaṃ viprā matibhiḥ pṛchamānāḥ |
- 9.097.35c somaḥ sutāḥ pūyate ajoyamānaḥ some arkās triṣṭubhaḥ sam navante ||
- 9.097.36a evā naḥ soma pariṣicyamāna ā pavasva pūyamānaḥ svasti |
- 9.097.36c indram ā viśa bṛhatā raveṇa vardhayā vācam janayā puramdhim ||
- 9.097.37a ā jāgṛvir vipra ṛtā matīnām somaḥ punāno asadac camūṣu |
- 9.097.37c sapanti yam mithunāso nikāmā adhvaryavo rathirāsaḥ suhastāḥ ||
- 9.097.38a sa punāna upa sūre na dhātobhe aprā rodasī vi śa āvaḥ |
- 9.097.38c priyā cid yasya priyasāsa ūti sa tū dhanam kāriṇe na pra yaṃsat ||
- 9.097.39a sa vardhitā vardhanaḥ pūyamānaḥ somo mīdhvāṃ abhi no jyotiṣāvīt |
- 9.097.39c yenā naḥ pūrve pitarāḥ padajñāḥ svarvido abhi gā adrim uṣṇan ||
- 9.097.40a akrān samudraḥ prathame vidharmañ janayan prajā bhuvanasya rājā |
- 9.097.40c vṛṣā pavitre adhi sāno avye bṛhat somo vāvṛdhe suvāna induḥ ||
- 9.097.41a mahat tat somo mahiṣas cakārāpām yad garbho 'vṛṇita devān |
- 9.097.41c adadhād indre pavamāna ojo 'janayat sūrye jyotir induḥ ||

9.097.42a matsi vāyum iṣṭaye rādhasē ca matsi mitrāvaruṇā pūyamānaḥ |
 9.097.42c matsi śardho mārutam matsi devān matsi dyāvapṛthivī deva soma ||
 9.097.43a ṛjuḥ pavasva vṛjinasya hantāpāmivām bādhamāno mṛdhas ca |
 9.097.43c abhiśrīṇan payaḥ payasābhi gonām indrasya tvam tava vayam sakhāyaḥ ||
 9.097.44a madhvaḥ sūdam pavasva vasva utsam vīram ca na ā pavasvā bhagaṃ ca |
 9.097.44c svadasvendrāya pavamāna indo rayim ca na ā pavasvā samudrāt ||
 9.097.45a somaḥ suto dhārayātyo na hitvā sindhur na nimnam abhi vājy akṣāḥ |
 9.097.45c ā yoniṃ vanyam asadat punānaḥ sam indur gobhir asarat sam adbhiḥ ||
 9.097.46a eṣa sya te pavata indra somaś camūṣu dhīra usate tavasvān |
 9.097.46c svarcaḥṣā rathiraḥ satyaśuṣmaḥ kāmo na yo devayatām asarji ||
 9.097.47a eṣa pratnena vayasā punānas tiro varpāmsi duhitur dadhānaḥ |
 9.097.47c vasānaḥ śarma trivarūtham apsu hoteva yāti samaneṣu rebhan ||
 9.097.48a nū nas tvam rathiro deva soma pari srava camvoḥ pūyamānaḥ |
 9.097.48c apsu svādiṣṭho madhumāmṛtāvā devo na yaḥ savitā satyamanmā ||
 9.097.49a abhi vāyum vīty arṣā gṛṇāno 'bhi mitrāvaruṇā pūyamānaḥ |
 9.097.49c abhi naram dhījavanam ratheṣṭhām abhīndram vṛṣaṇam vajrabāhum ||
 9.097.50a abhi vastrā suvasanāny arṣābhi dhenūḥ sudughāḥ pūyamānaḥ |
 9.097.50c abhi candrā bhartave no hiraṇyābhy aśvān rathino deva soma ||
 9.097.51a abhi no arṣa divyā vasūny abhi viśvā pāṛthivā pūyamānaḥ |
 9.097.51c abhi yena draviṇam aśnavāmābhy āṛṣeyaṃ jamadagnivan naḥ ||
 9.097.52a ayā pavā pavasvainā vasūni māṃścatva indo sarasi pra dhanva |
 9.097.52c bradhnaś cid atra vāto na jūtaḥ purumedhas cit takave naram dāt ||
 9.097.53a uta na enā pavayā pavasvādhi śrute śravāyyasya tīrthe |
 9.097.53c ṣaṣṭim sahasrā naiguto vasūni vṛkṣam na pakvam dhūnavad raṇāya ||
 9.097.54a mahīme asya vṛṣanāma sūṣe māṃścatve vā pṛśane vā vadhatre |
 9.097.54c asvāpayan nigutaḥ snehayac cāpāmitrām apācito acetāḥ ||
 9.097.55a sam trī pavitrā vitatāny eṣy anv ekaṃ dhāvasi pūyamānaḥ |
 9.097.55c asi bhago asi dātrasya dātāsi maghavā maghavadbhya indo ||
 9.097.56a eṣa viśvavit pavate manīṣi somo viśvasya bhuvanasya rājā |
 9.097.56c drapsām īrayan vidatheṣv indur vi vāram avyam samayāti yāti ||
 9.097.57a induṃ rihanti mahiṣā adabdhāḥ pade rebhanti kavayo na gṛdhrāḥ |
 9.097.57c hinvanti dhīrā daśabhiḥ kṣipābhiḥ sam añjate rūpam apāṃ rasena ||
 9.097.58a tvayā vayam pavamānena soma bhare kṛtam vi cinuyāma śāsvat |
 9.097.58c tan no mitro varuṇo māmahantām aditiḥ sindhuḥ pṛthivī uta dyauḥ ||

9.098.01a abhi no vājasātamaṃ rayim arṣa purusprham |
 9.098.01c indo sahasrabharṇasaṃ tuvidyumnaṃ vibhvāsaham ||
 9.098.02a pari ṣya suvāno avyayaṃ rathe na varmāvyata |
 9.098.02c indur abhi druṇā hito hiyāno dhārābhir akṣāḥ ||
 9.098.03a pari ṣya suvāno akṣā indur avye madacyutaḥ |
 9.098.03c dhārā ya ūrdhvo adhvare bhrājā naiti gavyayuh ||
 9.098.04a sa hi tvam deva śāsvate vasu martāya dāsūṣe |
 9.098.04c indo sahasriṇam rayim śatātmānaṃ vivāsasi ||
 9.098.05a vayam te asya vṛtrahan vaso vasvaḥ purusprhaḥ |
 9.098.05c ni nediṣṭhatamā iṣaḥ syāma sumnasyādhriḡo ||
 9.098.06a dvir yam pañca svayaśasaṃ svasāro adrisamhatam |
 9.098.06c priyam indrasya kāmyam prasnāpayanty ūrmiṇam ||
 9.098.07a pari tyam haryatam harim babhrum punanti vāreṇa |

9.098.07c yo devān viśvāṃ it pari madena saha gachati ||
 9.098.08a asya vo hy avasā pānto dakṣasādhanam |
 9.098.08c yaḥ sūriṣu śravo bṛhad dadhe svar ṇa haryataḥ ||
 9.098.09a sa vāṃ yajñeṣu mānavī indur janiṣṭa rodasī |
 9.098.09c devo devī giriṣṭhā asredhan taṃ tuviṣvaṇi ||
 9.098.10a indrāya soma pātave vṛtraghne pari ṣicyase |
 9.098.10c nare ca dakṣiṇāvate devāya sadanāsade ||
 9.098.11a te pratnāso vyuṣṭiṣu somāḥ pavitre akṣaran |
 9.098.11c apaprothantaḥ sanutar huraścitaḥ prātas tāṃ apracetasaḥ ||
 9.098.12a taṃ sakhāyaḥ purorucaṃ yūyaṃ vayaṃ ca sūrayaḥ |
 9.098.12c aśyāma vājagandhyaṃ sanema vājapastyam ||

9.099.01a ā haryatāya dhṛṣṇave dhanus tanvanti paumṣyam |
 9.099.01c śukrāṃ vayanty asurāya nirṇijaṃ vipām agre mahiyuvaḥ ||
 9.099.02a adha kṣapā pariṣkrto vājāṃ abhi pra gāhate |
 9.099.02c yadī vivasvato dhiyo hariṃ hinvanti yātave ||
 9.099.03a tam asya marjayāmasi mado ya indrapātamaḥ |
 9.099.03c yaṃ gāva āsabhīr dadhuḥ purā nūnaṃ ca sūrayaḥ ||
 9.099.04a taṃ gāthayā purāṇyā punānam abhy anūṣata |
 9.099.04c uto kṛpanta dhītayo devānāṃ nāma bibhratiḥ ||
 9.099.05a tam ukṣamāṇam avyaye vāre punanti dharmasim |
 9.099.05c dūtaṃ na pūrvacittaya ā śāsate manīṣiṇaḥ ||
 9.099.06a sa punāno madintamaḥ somaś camūṣu sīdati |
 9.099.06c paśau na reta ādadhat patir vacasyate dhiyaḥ ||
 9.099.07a sa mṛjyate sukarmabhir devo devebhyaḥ sutaḥ |
 9.099.07c vide yad āsu saṃdadir mahīr apo vi gāhate ||
 9.099.08a suta indo pavitra ā nṛbhīr yato vi nīyase |
 9.099.08c indrāya matsarintamaś camūṣv ā ni śīdasi ||

9.100.01a abhī navante adruhaḥ priyam indrasya kāmyam |
 9.100.01c vatsaṃ na pūrva āyuni jātāṃ rihanti mātaraḥ ||
 9.100.02a punāna indav ā bhara soma dvibarhasaṃ rayim |
 9.100.02c tvam vasūni puṣyasi viśvāni dāśuṣo gṛhe ||
 9.100.03a tvam dhiyam manoyujaṃ sṛjā vṛṣṭiṃ na tanyatuḥ |
 9.100.03c tvam vasūni pārhivā divyā ca soma puṣyasi ||
 9.100.04a pari te jigyuṣo yathā dhārā sutasya dhāvati |
 9.100.04c ramhamānā vy avyayaṃ vāraṃ vājīva sānasiḥ ||
 9.100.05a kratve dakṣāya naḥ kave pavasva soma dhārayā |
 9.100.05c indrāya pātave suto mitrāya varuṇāya ca ||
 9.100.06a pavasva vājasātamaḥ pavitre dhārayā sutaḥ |
 9.100.06c indrāya soma viṣṇave devebhyo madhumattamaḥ ||
 9.100.07a tvam rihanti mātaro harim pavitre adruhaḥ |
 9.100.07c vatsaṃ jātāṃ na dhenavaḥ pavamāna vidharmaṇi ||
 9.100.08a pavamāna mahi śravaś citrebhir yāsi raśmibhiḥ |
 9.100.08c śardhan tamāmsi jighnase viśvāni dāśuṣo gṛhe ||
 9.100.09a tvam dyām ca mahivrata pṛthivīm cāti jabhriṣe |
 9.100.09c prati drāpim amuñcathāḥ pavamāna mahitvanā ||

9.101.01a purojiti vo andhasaḥ sutāya mādayitnave |
 9.101.01c apa śvānaṃ śnathiṣṭana sakhāyo dīrghajihvyam ||
 9.101.02a yo dhārayā pāvakayā pariprasyandate sutaḥ |
 9.101.02c indur aśvo na kṛtvyaḥ ||
 9.101.03a taṃ duroṣam abhī naraḥ somaṃ viśvācyā dhiyā |
 9.101.03c yajñam hinvanty adribhiḥ ||
 9.101.04a sutāso madhumattamāḥ somā indrāya mandinaḥ |
 9.101.04c pavitravanto akṣaran devān gachantu vo madāḥ ||
 9.101.05a indur indrāya pavata iti devāso abruvan |
 9.101.05c vācas patir makhasyate viśvasyeśāna ojasā ||
 9.101.06a sahasradhāraḥ pavate samudro vācamīṅkhayaḥ |
 9.101.06c somaḥ patī rayiṅnām sakhendrasya dive-dive ||
 9.101.07a ayam pūṣā rayir bhagaḥ somaḥ punāno arṣati |
 9.101.07c patir viśvasya bhūmano vy akhyad rodasī ubhe ||
 9.101.08a sam u priyā anūṣata gāvo madāya ghr̥ṣvayaḥ |
 9.101.08c somāsaḥ kṛṇvate pathaḥ pavamānāsa indavaḥ ||
 9.101.09a ya ojiṣṭhas tam ā bhara pavamāna śravāyyam |
 9.101.09c yaḥ pañca carṣaṇīr abhi rayiṃ yena vanāmahai ||
 9.101.10a somāḥ pavanta indavo 'smabhyaṃ gātuvittamāḥ |
 9.101.10c mitrāḥ suvānā arepasāḥ svādhyāḥ svarvidaḥ ||
 9.101.11a susvānāso vy adribhiś citānā gor adhi tvaci |
 9.101.11c iṣam asmabhyam abhitaḥ sam asvaran vasuvidaḥ ||
 9.101.12a ete pūtā vipaścitaḥ somāso dadhyāśiraḥ |
 9.101.12c sūryāso na darśatāso jigatnavo dhruvā ghr̥te ||
 9.101.13a pra sunvānasyāndhaso marto na vṛta tad vacaḥ |
 9.101.13c apa śvānam arādhasaṃ hatā makhaṃ na bhṛgavaḥ ||
 9.101.14a ā jāmir atke avyata bhuje na putra oṇyoḥ |
 9.101.14c saraj jāro na yoṣaṇām varo na yonim āśadam ||
 9.101.15a sa vīro dakṣasādhanō vi yas tastambha rodasī |
 9.101.15c hariḥ pavitre avyata vedhā na yonim āśadam ||
 9.101.16a avyo vārebhiḥ pavate somo gavye adhi tvaci |
 9.101.16c kanikradad vṛṣā harir indrasyābhy eti niṣkṛtam ||

9.102.01a krāṇā śiśur mahinām hinvann ṛtasya dīdhitim |
 9.102.01c viśvā pari priyā bhuvad adha dvitā ||
 9.102.02a upa tritasya pāṣyor abhakta yad guhā padam |
 9.102.02c yajñasya sapta dhāmabhir adha priyam ||
 9.102.03a trīṇi tritasya dhārayā pṛṣṭheṣv erayā rayim |
 9.102.03c mimīte asya yojanā vi sukratuḥ ||
 9.102.04a jajñānam sapta mātaro vedhām aśāsata śriye |
 9.102.04c ayam dhruvo rayiṅnām ciketa yat ||
 9.102.05a asya vrata sajoṣaso viśve devāso adruhaḥ |
 9.102.05c spārḥā bhavanti rantayo juṣanta yat ||
 9.102.06a yam ī garbham ṛtāvṛdho dṛṣe cārum ajijanan |
 9.102.06c kavim maṃhiṣṭham adhvare purusṛham ||
 9.102.07a samīcīne abhi tmanā yahvī ṛtasya mātara |

9.102.07c tanvānā yajñam ānuṣag yad añjate ||
9.102.08a kratvā śukrebhir akṣabhir ṛnor apa vrajaṃ divaḥ |
9.102.08c hinvann ṛtasya dīdhitim prādhvare ||

9.103.01a pra punānāya vedhase somāya vaca udyatam |
9.103.01c bhṛtiṃ na bharā matibhir jujoṣate ||
9.103.02a pari vārāṇy avyayā gobhir añjāno arṣati |
9.103.02c trī ṣadhasthā punānaḥ kṛṇute hariḥ ||
9.103.03a pari kośam madhuścutam avyaye vāre arṣati |
9.103.03c abhi vāṇīr ṛṣiṇām sapta nūṣata ||
9.103.04a pari ṇetā matinām viśvadevo adābhyaḥ |
9.103.04c somaḥ punānaś camvor viśad dhariḥ ||
9.103.05a pari daivīr anu svadhā indreṇa yāhi saratham |
9.103.05c punāno vāghad vāghadbhir amartyaḥ ||
9.103.06a pari saptir na vājayur devo devebhyaḥ sutaḥ |
9.103.06c vyānaśiḥ pavamāno vi dhāvati ||

9.104.01a sakhāya ā ni ṣidata punānāya pra gāyata |
9.104.01c śiśuṃ na yajñaiḥ pari bhūṣata śriye ||
9.104.02a sam ī vatsaṃ na mātṛbhiḥ sṛjatā gayasādhanam |
9.104.02c devāvyaṃ madam abhi dviśavasam ||
9.104.03a punātā dakṣasādhanam yathā śardhāya vītaye |
9.104.03c yathā mitrāya varuṇāya śaṃtamaḥ ||
9.104.04a asmabhyaṃ tvā vasuvidam abhi vāṇīr anūṣata |
9.104.04c gobhiṣ te varṇam abhi vāsayāmasi ||
9.104.05a sa no madānām pata indo devapsarā asi |
9.104.05c sakheva sakhye gātuvittamo bhava ||
9.104.06a sanemi kṛdhy asmad ā rakṣasaṃ kaṃ cid atriṇam |
9.104.06c apādevaṃ dvayum aṃho yuyodhi naḥ ||

9.105.01a taṃ vaḥ sakhāyo madāya punānam abhi gāyata |
9.105.01c śiśuṃ na yajñaiḥ svadayanta gūrtibhiḥ ||
9.105.02a saṃ vatsa iva mātṛbhir indur hinvāno ajoyate |
9.105.02c devāvīr mado matibhiḥ pariṣkṛtaḥ ||
9.105.03a ayaṃ dakṣāya sādhanā 'yaṃ śardhāya vītaye |
9.105.03c ayaṃ devebhyo madhumattamaḥ sutaḥ ||
9.105.04a goman na indo aśvavat sutaḥ sudakṣa dhanva |
9.105.04c śucim te varṇam adhi goṣu dīdharam ||
9.105.05a sa no hariṇām pata indo devapsarastamaḥ |
9.105.05c sakheva sakhye naryo ruce bhava ||
9.105.06a sanemi tvam asmad āṃ adevaṃ kaṃ cid atriṇam |
9.105.06c sāhvāṃ indo pari bādho apa dvayum ||

9.106.01a indram acha sutā ime vṛṣaṇaṃ yantu harayaḥ |
9.106.01c śruṣṭi jātāsa indavaḥ svarvidaḥ ||

- 9.106.02a ayam bharāya sānasir indrāya pavate sutaḥ |
 9.106.02c somo jaitrasya cetati yathā vide ||
- 9.106.03a asyed indro madeṣv ā grābham gr̥bhñīta sānasim |
 9.106.03c vajraṃ ca vṛṣaṇam bharat sam apsuḥ ||
- 9.106.04a pra dhanvā soma jāgr̥vir indrāyendo pari srava |
 9.106.04c dyumantaṃ śuṣṣmam ā bharā svarvidam ||
- 9.106.05a indrāya vṛṣaṇam madam pavasva viśvadarśataḥ |
 9.106.05c sahasrayāmā pathikṛd vicakṣaṇaḥ ||
- 9.106.06a asmabhyaṃ gātuvittamo devebhyo madhumattamaḥ |
 9.106.06c sahasraṃ yāhi pathibhiḥ kanikradat ||
- 9.106.07a pavasva devavītaya indo dhārābhir ojasā |
 9.106.07c ā kalaśam madhumān soma naḥ sadaḥ ||
- 9.106.08a tava drapsā udapruta indram madāya vāvṛdhuḥ |
 9.106.08c tvāṃ devāso amṛtāya kam papuḥ ||
- 9.106.09a ā naḥ sutāsa indavaḥ punānā dhāvatā rayim |
 9.106.09c vṛṣṭidyāvo rītyāpaḥ svarvidaḥ ||
- 9.106.10a somaḥ punāna ūrmiṇāvyo vāraṃ vi dhāvati |
 9.106.10c agre vācaḥ pavamānaḥ kanikradat ||
- 9.106.11a dhibhir hinvanti vājinaṃ vane krīdantam atyavim |
 9.106.11c abhi tripṛṣṭham matayaḥ sam asvaran ||
- 9.106.12a asarji kalaśāṃ abhi miḍhe saptir na vājayuḥ |
 9.106.12c punāno vācaṃ janayann asiṣyadat ||
- 9.106.13a pavate haryato harir ati hvarāṃsi raṃhyā |
 9.106.13c abhyarṣan stotṛbhyo vīravat yaśaḥ ||
- 9.106.14a ayā pavasva devayur madhor dhārā asṛkṣata |
 9.106.14c rebhan pavitram pary eṣi viśvataḥ ||
- 9.107.01a parīto ṣiñcatā sutam somo ya uttamaṃ haviḥ |
 9.107.01c dadhanvāṃ yo naryo apsv antar ā suṣāva somam adribhiḥ ||
- 9.107.02a nūnam punāno 'vibhiḥ pari sravādabdhaḥ surabhintaraḥ |
 9.107.02c sute cit tvāpsu madāmo andhasā śrīṇanto gobhir uttaram ||
- 9.107.03a pari suvānaś cakṣase devamādanaḥ kratuḥ indur vicakṣaṇaḥ ||
 9.107.04a punānaḥ soma dhārāyāpo vasāno arṣasi |
 9.107.04c ā ratnadhā yonim ṛtasya sīdasy utso deva hiraṇyayaḥ ||
- 9.107.05a duhāna ūdhar divyam madhu priyam pratnaṃ sadhastham āsadat |
 9.107.05c āpṛchyaṃ dharuṇaṃ vājy arṣati nṛbhir dhūto vicakṣaṇaḥ ||
- 9.107.06a punānaḥ soma jāgr̥vir avyo vāre pari priyaḥ |
 9.107.06c tvāṃ vipro abhavo 'ngirastamo madhvā yajñam mimikṣa naḥ ||
- 9.107.07a somo miḍhvān pavate gātuvittama ṛṣir vipro vicakṣaṇaḥ |
 9.107.07c tvāṃ kavir abhavo devavītama ā sūryaṃ rohaya divi ||
- 9.107.08a soma u ṣuvānaḥ sotṛbhir adhi ṣṇubhir avīnām |
 9.107.08c aśvayeva haritā yāti dhārāyā mandrayā yāti dhārāyā ||
- 9.107.09a anūpe gomān gobhir akṣāḥ somo dugdhābhir akṣāḥ |
 9.107.09c samudraṃ na saṃvaraṇāny agman mandī madāya tośate ||
- 9.107.10a ā soma suvāno adribhis tiro vārāṇy avyayā |
 9.107.10c jano na puri camvor viśad dhariḥ sado vaneṣu dadhiṣe ||
- 9.107.11a sa māmṛje tiro aṇvāni meṣyo miḍhe saptir na vājayuḥ |
 9.107.11c anumādyāḥ pavamāno manīṣibhiḥ somo viprebhir ṛkvabhiḥ ||

9.107.12a pra soma devavītaye sindhur na pipye arṇasā |
 9.107.12c aṃśoḥ payasā madiro na jāgrvir achā kośam madhuścutam ||
 9.107.13a ā haryato arjune atke avyata priyaḥ sūnur na marjyaḥ |
 9.107.13c tam iṃ hinvanty apaso yathā rathaṃ nadiṣv ā gabhastyoḥ ||
 9.107.14a abhi somāsa āyavaḥ pavante madyam madam |
 9.107.14c samudrasyādhi viṣṭapi manīṣiṇo matsarāsaḥ svarvidaḥ ||
 9.107.15a tarat samudram pavamāna ūrmiṇā rājā deva ṛtam bṛhat |
 9.107.15c arṣan mitrasya varuṇasya dharmaṇā pra hinvāna ṛtam bṛhat ||
 9.107.16a nṛbhir yemāno haryato vicakṣaṇo rājā devaḥ samudriyaḥ ||
 9.107.17a indrāya pavate madaḥ somo marutvate sutaḥ |
 9.107.17c sahasradhāro aty avyam arṣati tam ī mṛjanty āyavaḥ ||
 9.107.18a punānaś camū janayan matim kaviḥ somo deveṣu raṇyati |
 9.107.18c apo vasānaḥ pari gobhir uttaraḥ sīdan vaneṣv avyata ||
 9.107.19a tavāhaṃ soma rāraṇa sakhya indo dive-dive |
 9.107.19c purūṇi babhro ni caranti mām ava paridhīm̐r ati tām̐r ihi ||
 9.107.20a utāhaṃ naktam uta soma te divā sakhyāya babhra ūdhani |
 9.107.20c ghr̥ṇā tapantam ati sūryam paraḥ śakunā iva paptima ||
 9.107.21a mṛjyamānaḥ suhastya samudre vācam invasi |
 9.107.21c rayim piśaṅgam bahulam puruspr̥ham pavamānābhy arṣasi ||
 9.107.22a mṛjāno vāre pavamāno avyaye vṛṣāva cakrado vane |
 9.107.22c devānām soma pavamāna niṣkṛtaṃ gobhir añjāno arṣasi ||
 9.107.23a pavasva vājasātaye 'bhi viśvāni kāvyā |
 9.107.23c tvaṃ samudram prathamo vi dhārayo devebhyaḥ soma matsaraḥ ||
 9.107.24a sa tū pavasva pari pārthivaṃ rajo divyā ca soma dharmabhiḥ |
 9.107.24c tvām viprāso matibhir vicakṣaṇa śubhram hinvanti dhītibhiḥ ||
 9.107.25a pavamānā asṛkṣata pavitram ati dhārayā |
 9.107.25c marutvanto matsarā indriyā hayā medhām abhi prayāṃsi ca ||
 9.107.26a apo vasānaḥ pari kośam arṣatindur hiyānaḥ sotṛbhiḥ |
 9.107.26c janayañ jyotir mandanā avivaśad gāḥ kṛṇvāno na nirṇijam ||

9.108.01a pavasva madhumattama indrāya soma kratuvittamo madaḥ |
 9.108.01c mahi dyukṣatamo madaḥ ||
 9.108.02a yasya te pītivā vṛṣabho vṛṣāyate 'sya pītā svarvidaḥ |
 9.108.02c sa supraketo abhy akramīd iṣo 'chā vājam naitaśaḥ ||
 9.108.03a tvaṃ hy aṅga daivyā pavamāna janimāni dyumattamaḥ |
 9.108.03c amṛtatvāya ghoṣayaḥ ||
 9.108.04a yenā navagvo dadhyaññ apornute yena viprāsa āpire |
 9.108.04c devānām sumne amṛtasya cāruṇo yena śravāṃsy ānaśuḥ ||
 9.108.05a eṣa sya dhārayā suto 'vyo vārebhiḥ pavate madintamaḥ |
 9.108.05c krīḍann ūrmir apām iva ||
 9.108.06a ya usriyā apyā antar aśmano nir gā akṛntad ojasā |
 9.108.06c abhi vrajam tatniṣe gavyam aśvyam varmiva dhṛṣṇav ā ruja ||
 9.108.07a ā sotā pari ṣiñcatāśvam na stomam apturam rajasturam |
 9.108.07c vanakrakṣam udaprutam ||
 9.108.08a sahasradhāram vṛṣabham payovṛdham priyam devāya janmane |
 9.108.08c ṛtena ya ṛtajāto vivāvṛdhe rājā deva ṛtam bṛhat ||
 9.108.09a abhi dyumnam bṛhad yaśa iṣas pate didīhi deva devayuḥ |
 9.108.09c vi kośam madhyamaṃ yuva ||

9.108.10a ā vacyasva sudakṣa camvoḥ suto viśāṃ vahnir na viśpatiḥ |
 9.108.10c vṛṣṭiṃ divaḥ pavasva rītim apāṃ jinvā gaviṣṭaye dhiyaḥ ||
 9.108.11a etam u tyam madacyutaṃ sahasradhāraṃ vṛṣabhaṃ divo duhuḥ |
 9.108.11c viśvā vasūni bibhratam ||
 9.108.12a vṛṣā vi jajñe janayann amartyaḥ pratapañ jyotiṣā tamaḥ |
 9.108.12c sa suṣṭutaḥ kavibhir nirṇijaṃ dadhe tridhātṅ asya daṃsasā ||
 9.108.13a sa sunve yo vasūnāṃ yo rāyāṃ ānetā ya iḍānām |
 9.108.13c somo yaḥ sukṣitinām ||
 9.108.14a yasya na indraḥ pibād yasya maruto yasya vāryamaṇā bhagaḥ |
 9.108.14c ā yena mitrāvaruṇā karāmaha endram avase mahe ||
 9.108.15a indrāya soma pātave nṛbhir yataḥ svāyudho madintamaḥ |
 9.108.15c pavasva madhumattamaḥ ||
 9.108.16a indrasya hārdi somadhānam ā viśa samudram iva sindhavaḥ |
 9.108.16c juṣṭo mitrāya varuṇāya vāyave divo viṣṭambha uttamaḥ ||

9.109.01a pari pra dhanvendrāya soma svādur mitrāya pūṣṇe bhagāya ||
 9.109.02a indras te soma sutasya peyāḥ kratve dakṣāya viśve ca devāḥ ||
 9.109.03a evāmṛtāya mahe kṣayāya sa śukro arṣa divyaḥ pīyūṣaḥ ||
 9.109.04a pavasva soma mahān samudraḥ pitā devānāṃ viśvābhi dhāma ||
 9.109.05a śukraḥ pavasva devebhyaḥ soma dive pṛthivyai śaṃ ca prajāyai ||
 9.109.06a divo dhartāsi śukraḥ pīyūṣaḥ satye vidharman vāji pavasva ||
 9.109.07a pavasva soma dyumnī sudhāro mahām avīnām anu pūrvyaḥ ||
 9.109.08a nṛbhir yemāno jajñānaḥ pūtaḥ kṣarad viśvāni mandraḥ svarvit ||
 9.109.09a induḥ punānaḥ prajāṃ urānaḥ karad viśvāni draviṇāni naḥ ||
 9.109.10a pavasva soma kratve dakṣāyāśvo na nikto vāji dhanāya ||
 9.109.11a taṃ te sotāro rasam madāya punanti somam mahe dyumnāya ||
 9.109.12a śīsum jajñānaṃ harim mṛjanti pavitre somaṃ devebhya indum ||
 9.109.13a induḥ paviṣṭa cārur madāyāpām upasthe kavir bhagāya ||
 9.109.14a bibharti cārv indrasya nāma yena viśvāni vṛtrā jaghāna ||
 9.109.15a pibanty asya viśve devāso gobhiḥ śrītasya nṛbhiḥ sutasya ||
 9.109.16a pra suvāno akṣāḥ sahasradhāras tiraḥ pavitraṃ vi vāram avyam ||
 9.109.17a sa vājy akṣāḥ sahasraretā adbhir mṛjāno gobhiḥ śrīṇānaḥ ||
 9.109.18a pra soma yāhindrasya kukṣā nṛbhir yemāno adribhiḥ sutaḥ ||
 9.109.19a asarji vāji tiraḥ pavitraṃ indrāya somaḥ sahasradhāraḥ ||
 9.109.20a añjanty enam madhvo rasenendrāya vṛṣṇa indum madāya ||
 9.109.21a devebhyas tvā vṛthā pājase 'po vasānaṃ harim mṛjanti ||
 9.109.22a indur indrāya tośate ni tośate śrīṇann ugro riṇann apaḥ ||

9.110.01a pary ū ṣu pra dhanva vājasātaye pari vṛtrāni sakṣaṇiḥ |
 9.110.01c dviṣas taradhyā ṛṇayā na iyase ||
 9.110.02a anu hi tvā sutam soma madāmasi mahe samaryarājye |
 9.110.02c vājāṃ abhi pavamāna pra gāhase ||
 9.110.03a ajijano hi pavamāna sūryaṃ vidhāre śakmanā payaḥ |
 9.110.03c gojīrayā raṃhamānaḥ puraṃdhyā ||
 9.110.04a ajijano amṛta martyeṣv āṃ ṛtasya dharmann amṛtasya cāruṇaḥ |
 9.110.04c sadāsaro vājam achā saniṣyadat ||
 9.110.05a abhy-abhi hi śravasā tatardithotsaṃ na kaṃ cij janapānam akṣitam |

9.110.05c śaryābhir na bharamāṇo gabhastyoḥ ||
 9.110.06a ād im ke cit paśyamānāsa āpyaṃ vasuruco divyā abhy anūṣata |
 9.110.06c vāraṃ na devaḥ savitā vy ūrṇute ||
 9.110.07a tve soma prathamā vṛktabarhiṣo mahe vājāya śravase dhiyaṃ dadhuḥ |
 9.110.07c sa tvaṃ no vīra vīryāya codaya ||
 9.110.08a divaḥ pīyūṣam pūrvyam yad ukthyam maho gāhād diva ā nir adhuḥṣata |
 9.110.08c indram abhi jāyamānaṃ sam asvaran ||
 9.110.09a adha yad ime pavamāna rodasī imā ca viśvā bhuvanābhi majmanā |
 9.110.09c yūthe na niṣṭhā vṛṣabho vi tiṣṭhase ||
 9.110.10a somaḥ punāno avyaye vāre śīśur na kriḍan pavamāno akṣāḥ |
 9.110.10c sahasradhāraḥ śatavāja induḥ ||
 9.110.11a eṣa punāno madhumāṃ ṛtāvendrāyenduḥ pavate svādur ūrmiḥ |
 9.110.11c vājasanir varivovid vayodhāḥ ||
 9.110.12a sa pavasva sahamānaḥ pṛtanyūn sedhan rakṣāṃsy apa durgahāṇi |
 9.110.12c svāyudhaḥ sāsahvān soma śatrūn ||

9.111.01a ayā rucā hariṇyā punāno viśvā dveṣāṃsi tarati svayugvabhiḥ sūro na
 svayugvabhiḥ |
 9.111.01d dhārā sutasya rocate punāno aruṣo hariḥ |
 9.111.01f viśvā yad rūpā pariyāty ṛkvabhiḥ saptāsyebhir ṛkvabhiḥ ||
 9.111.02a tvaṃ tyat paṇināṃ vido vasu sam mātṛbhir marjayasi sva ā dama ṛtasya dhītibhir
 dame |
 9.111.02d parāvato na sāma tad yatrā raṇanti dhītayaḥ |
 9.111.02f tridhātubhir aruṣībhir vayo dadhe rocamāno vayo dadhe ||
 9.111.03a pūrvām anu pradiśaṃ yāti cekitat saṃ raśmibhir yatate darśato ratho |
 9.111.03c daivyo darśato rathaḥ |
 9.111.03d agmann ukthāni paumsyendraṃ jaitrāya harṣayan |
 9.111.03f vajraś ca yad bhavatho anapacyutā samatsv anapacyutā ||

9.112.01a nānānaṃ vā u no dhiyo vi vratāni janānām |
 9.112.01c takṣā riṣṭaṃ rutam bhiṣag brahmā sunvantam ichatīndrāyendo pari srava ||
 9.112.02a jaratībhir oṣadhībhiḥ parṇebhiḥ śakunānām |
 9.112.02c karmāro aśmabhir dyubhir hiraṇyavantam ichatīndrāyendo pari srava ||
 9.112.03a kārur ahaṃ tato bhiṣag upalaprakṣiṇī nanā |
 9.112.03c nānādhiyo vasūyavo 'nu gā iva tasthimendrāyendo pari srava ||
 9.112.04a aśvo voḍhā sukhaṃ rathaṃ hasanām upamantriṇaḥ |
 9.112.04c śepo romaṇvantau bhedau vār in maṇḍūka ichatīndrāyendo pari srava ||

9.113.01a śaryañāvati somam indraḥ pibatu vṛtrahā |
 9.113.01c balaṃ dadhāna ātmani kariṣyan vīryam mahad indrāyendo pari srava ||
 9.113.02a ā pavasva diśām pata ārjikāt soma miḍhvah |
 9.113.02c ṛtavākena satyena śraddhayā tapasā suta indrāyendo pari srava ||
 9.113.03a parjanyaṃ vṛddham mahiṣaṃ taṃ sūryasya duhitābharat |
 9.113.03c taṃ gandharvāḥ praty agrbhṇan taṃ some rasam ādadhur indrāyendo pari srava ||
 9.113.04a ṛtaṃ vadann ṛtadyumna satyaṃ vadan satyakarman |
 9.113.04c śraddhāṃ vadan soma rājan dhātṛā soma pariṣkrta indrāyendo pari srava ||

- 9.113.05a satyamugrasya bṛhataḥ saṃ sravanti saṃsravāḥ |
 9.113.05c saṃ yanti rasino rasāḥ punāno brahmaṇā hara indrāyendo pari srava ||
 9.113.06a yatra brahmā pavamāna chandasyāṃ vācaṃ vadan |
 9.113.06c grāvṇā some mahīyate somenānandaṃ janayann indrāyendo pari srava ||
 9.113.07a yatra jyotir ajasraṃ yasmiṃ loke svar hitam |
 9.113.07c tasmin mām dhehi pavamānāmṛte loke akṣita indrāyendo pari srava ||
 9.113.08a yatra rājā vaivasvato yatrāvarodhanaṃ divaḥ |
 9.113.08c yatrāmūr yahvatīr āpas tatra mām amṛtaṃ kṛdhindrāyendo pari srava ||
 9.113.09a yatrānukāmaṃ caraṇaṃ trināke tridive divaḥ |
 9.113.09c lokā yatra jyotiṣmantas tatra mām amṛtaṃ kṛdhindrāyendo pari srava ||
 9.113.10a yatra kāmā nikāmāś ca yatra bradhnasya viṣṭapam |
 9.113.10c svadhā ca yatra tṛptiś ca tatra mām amṛtaṃ kṛdhindrāyendo pari srava ||
 9.113.11a yatrānandās ca modās ca mudaḥ pramuda āsate |
 9.113.11c kāmasya yatrāptāḥ kāmās tatra mām amṛtaṃ kṛdhindrāyendo pari srava ||

- 9.114.01a ya indoḥ pavamānasyānu dhāmāny akramīt |
 9.114.01c tam āhuḥ suprajā iti yas te somāvidhan mana indrāyendo pari srava ||
 9.114.02a ṛṣe mantrakṛtāṃ stomaiḥ kaśyapodvardhayan giraḥ |
 9.114.02c somaṃ namasya rājānaṃ yo jajñe vīrudhām patir indrāyendo pari srava ||
 9.114.03a sapta diśo nānāsūryāḥ sapta hotāra ṛtvijaḥ |
 9.114.03c devā ādityā ye sapta tebhiḥ somābhi rakṣa na indrāyendo pari srava ||
 9.114.04a yat te rājañ chṛtaṃ havis tena somābhi rakṣa naḥ |
 9.114.04c arātīvā mā nas tārīn mo ca naḥ kiṃ canāmamad indrāyendo pari srava ||

10. Mandala

10.001.01a agre bṛhann uṣasām ūrdhvo asthān nirjaganvān tamaso jyotiṣāgāt |
10.001.01c agnir bhānunā ruśatā svaṅga ā jāto viśvā sadmāny aprāḥ ||
10.001.02a sa jāto garbho asi rodasyor agne cārur vibhṛta oṣadhīṣu |
10.001.02c citraḥ śīsuḥ pari tamāmsy aktūn pra mātṛbhyo adhi kanikradat gāḥ ||
10.001.03a viṣṇur itthā paramam asya vidvāñ jāto bṛhann abhi pāti tṛṭiyam |
10.001.03c āsā yad asya payo akrata svam sacetaso abhy arcanty atra ||
10.001.04a ata u tvā pitubhṛto janitrīr annāvṛdham prati caranty annaiḥ |
10.001.04c tā im praty eṣi punar anyarūpā asi tvam vikṣu mānuṣīṣu hotā ||
10.001.05a hotāraṃ citraratham adhvarasya yajñasya-yajñasya ketuṃ ruśantam |
10.001.05c pratyardhiṃ devasya-devasya mahnā śriyā tv agnim atithiṃ janānām ||
10.001.06a sa tu vastrāṇy adha peśanāni vasāno agnir nābhā pṛthivyāḥ |
10.001.06c aruṣo jātaḥ pada idāyāḥ purohito rājan yakṣiḥa devān ||
10.001.07a ā hi dyāvāpṛthivī agna ubhe sadā putro na mātārā tatantha |
10.001.07c pra yāhy achośato yaviṣṭhāthā vaha sahasyeha devān ||

10.002.01a piprihi devāñ uśato yaviṣṭha vidvāñ ṛtūmr ṛtupate yajeha |
10.002.01c ye daivyā ṛtvijas tebhir agne tvam hotṛṇām asy āyajiṣṭhaḥ ||
10.002.02a veṣi hotram uta potraṃ janānām mandhātāsi draviṇodā ṛtāvā |
10.002.02c svāhā vayam kṛṇavāmā havimṣi devo devān yajatv agnir arhan ||
10.002.03a ā devānām api panthām aganma yac chaknavāma tad anu pravodhum |
10.002.03c agnir vidvān sa yajāt sed u hotā so adhvarān sa ṛtūn kalpayāti ||
10.002.04a yad vo vayam pramināma vratāni viduṣāṃ devā aviduṣṭarāsaḥ |
10.002.04c agniṣ ṭad viśvam ā pṛṇāti vidvān yebhir devāñ ṛtubhiḥ kalpayāti ||
10.002.05a yat pākatrā manasā dīnadakṣā na yajñasya manvate martyāsaḥ |
10.002.05c agniṣ ṭad dhotā kratuvid vijānan yajiṣṭho devāñ ṛtuśo yajāti ||
10.002.06a viśveṣāṃ hy adhvarāṇām anīkaṃ citraṃ ketuṃ janitā tvā jajāna |
10.002.06c sa ā yajasva nṛvatir anu kṣā spārḥā iṣaḥ kṣumatir viśvajanyāḥ ||
10.002.07a yaṃ tvā dyāvāpṛthivī yaṃ tvāpas tvaṣṭā yaṃ tvā sujanimā jajāna |
10.002.07c panthām anu pravidvān pitṛyāṇaṃ dyumad agne samidhāno vi bhāhi ||

10.003.01a ino rājann aratiḥ samiddho raudro dakṣāya suṣumāñ adarśi |
10.003.01c cikid vi bhāti bhāsā bṛhatāsiknīm eti ruśatim apājan ||
10.003.02a kṛṣṇāṃ yad enīm abhi varpasā bhūj janayan yoṣām bṛhataḥ pitur jān |
10.003.02c ūrdhvam bhānuṃ sūryasya stabhāyan divo vasubhir aratir vi bhāti ||
10.003.03a bhadro bhadrayā sacamāna āgāt svasāraṃ jāro abhy eti paścāt |
10.003.03c supraketair dyubhir agnir vitiṣṭhan ruśadbhir varṇair abhi rāmam asthāt ||
10.003.04a asya yāmāso bṛhato na vagnūn indhānā agneḥ sakhyuḥ śivasya |
10.003.04c idyasya vṛṣṇo bṛhataḥ svāso bhāmāso yāmann aktavaś cikitre ||
10.003.05a svanā na yasya bhāmāsaḥ pavante rocamānasya bṛhataḥ sudivaḥ |
10.003.05c jyeṣṭhebhīr yas tejiṣṭhaiḥ kṛīdumadbhir varṣiṣṭhebhīr bhānubhir nakṣati dyām ||
10.003.06a asya śuṣmāso dadṛṣānapaver jehamānasya svanayan niyudbhiḥ |
10.003.06c pratnebhīr yo ruśadbhir devatamo vi rebhadbhīr aratir bhāti vibhvā ||
10.003.07a sa ā vakṣi mahi na ā ca satsi divaspṛthivyor aratir yuvatyoh |

10.003.07c agniḥ sutukaḥ sutukebhir aśvai rabhasvadbhī rabhasvāṃ eha gamyāḥ ||

10.004.01a pra te yakṣi pra ta iyarmi manma bhuvo yathā vandyo no haveṣu |
10.004.01c dhanvann iva prapā asi tvam agna iyakṣave pūrave pratna rājan ||
10.004.02a yaṃ tvā janāso abhi samcaranti gāva uṣṇam iva vrajaṃ yaviṣṭha |
10.004.02c dūto devānām asi martyānām antar mahāṃś carasi rocanena ||
10.004.03a śiśuṃ na tvā jenyam vardhayanti mātā bibharti sacanasyamānā |
10.004.03c dhanor adhi pravatā yāsi haryaṅ jigīṣase paśur ivāvasṛṣṭaḥ ||
10.004.04a mūrā amūra na vayaṃ cikitvo mahitvam agne tvam aṅga vitse |
10.004.04c śaye vavriś carati jihvayādan rerihyate yuvatim viśpatiḥ san ||
10.004.05a kūcij jāyate sanayāsu navyo vane tasthau palito dhūmaketuḥ |
10.004.05c asnātāpo vṛṣabho na pra veti sacetaso yam praṇayanta martāḥ ||
10.004.06a tanūtyajeva taskarā vanargū raśanābhir daśabhir abhy adhītām |
10.004.06c iyaṃ te agne navyasī manīṣā yukṣvā rathaṃ na śucayadbhir aṅgaiḥ ||
10.004.07a brahma ca te jātavedo namaś ceyaṃ ca giḥ sadam id vardhanī bhūt |
10.004.07c rakṣā ṇo agne tanayāni tokā rakṣota nas tanvo aprayuchan ||

10.005.01a ekaḥ samudro dharuṇo rayīnām asmad dhṛdo bhūrijanmā vi caṣṭe |
10.005.01c siṣakty ūdhar niṇyor upastha utsasya madhye nihitam padaṃ veḥ ||
10.005.02a samānaṃ nīdaṃ vṛṣaṇo vasānāḥ saṃ jagmire mahiṣā arvatibhiḥ |
10.005.02c ṛtasya padaṃ kavayo ni pānti guhā nāmāni dadhire parāni ||
10.005.03a ṛtāyini māyini saṃ dadhāte mitvā śiśuṃ jajñatur vardhayanti |
10.005.03c viśvasya nābhim carato dhruvasya kaveś cit tantum manasā viyantaḥ ||
10.005.04a ṛtasya hi vartanayaḥ sujātam iṣo vājāya pradivaḥ sacante |
10.005.04c adhivāsaṃ rodasī vāvasāne ghṛtair annair vāvṛdhāte madhūnām ||
10.005.05a sapta svasīr aruṣīr vāvasāno vidvān madhva uj jabhārā dṛśe kam |
10.005.05c antar yeme antarikṣe purājā ichan vavrim avidat pūṣaṇasya ||
10.005.06a sapta maryādāḥ kavayas tatakṣus tāsām ekām id abhy aṃhuro gāt |
10.005.06c āyor ha skambha upamasya nīde pathāṃ visarge dharuṇeṣu tasthau ||
10.005.07a asac ca sac ca parame vyoman dakṣasya janmann aditer upasthe |
10.005.07c agnir ha naḥ prathamajā ṛtasya pūrva āyuni vṛṣabhaś ca dhenuḥ ||

10.006.01a ayaṃ sa yasya śarmann avobhir agner edhate jaritābhiṣṭau |
10.006.01c jyeṣṭhebhīr yo bhānubhir ṛṣūnām paryeti parivito vibhāvā ||
10.006.02a yo bhānubhir vibhāvā vibhāty agnir devebhīr ṛtāvājasraḥ |
10.006.02c ā yo vivāya sakhyā sakhibhyo 'parihvṛto atyo na saptiḥ ||
10.006.03a īse yo viśvasyā devavīter īse viśvāyur uṣaso vyuṣṭau |
10.006.03c ā yasmin manā havīmṣy agnāv ariṣṭaratha skabhnāti sūśaiḥ ||
10.006.04a sūṣebhir vṛdho juṣaṇo arkair devāṃ achā raghupatvā jigāti |
10.006.04c mandro hotā sa juhvā yajīṣṭhaḥ sammiślo agnir ā jigharti devān ||
10.006.05a tam usrām indraṃ na rejamānam agniṃ gīrbhir namobhir ā kṛṇudhvam |
10.006.05c ā yaṃ viprāso matibhir gṛṇanti jātavedasaṃ juhvaṃ sahānām ||
10.006.06a saṃ yasmin viśvā vasūni jagmur vāje nāśvāḥ saptivanta evaiḥ |
10.006.06c asme ūtir indravātataṃ arvacīnā agna ā kṛṇuṣva ||
10.006.07a adhā hy agne mahnā niśadyā sadyo jajñāno havyo babhūtha |
10.006.07c taṃ te devāso anu ketam āyann adhāvardhanta prathamāsa ūmāḥ ||

10.007.01a svasti no divo agne pṛthivyā viśvāyur dhehi yajathāya deva |
 10.007.01c sacemahi tava dasma praketair uruṣyā ṇa urubhir deva śaṃsaiḥ ||
 10.007.02a imā agne matayas tubhyam jātā gobhir aśvair abhi gṛṇanti rādhaḥ |
 10.007.02c yadā te marto anu bhogam ānaḍ vaso dadhāno matibhiḥ sujāta ||
 10.007.03a agnim manye pitaram agnim āpim agnim bhrātaram sadam it sakhāyam |
 10.007.03c agner anikam bṛhataḥ saparyam divi śukram yajataḥ sūryasya ||
 10.007.04a sidhrā agne dhiyo asme sanutrīr yaḥ trāyase dama ā nityahotā |
 10.007.04c ṛtāvā sa rohidaśvaḥ purukṣur dyubhir asmā ahabhir vāmam astu ||
 10.007.05a dyubhir hitam mitram iva prayogam pratnam ṛtvijam adhvarasya jāram |
 10.007.05c bāhubhyām agnim āyavo 'jananta vikṣu hotāram ny asādayanta ||
 10.007.06a svayam yajasva divi deva devān kiṃ te pākaḥ kṛṇavad apracetāḥ |
 10.007.06c yathāyaja ṛtubhir deva devān evā yajasva tanvaḥ sujāta ||
 10.007.07a bhavā no agne 'vitota gopā bhavā vayaskṛd uta no vayodhāḥ |
 10.007.07c rāsvā ca naḥ sumaho havypadātīm trāsvota nas tanvo aprayuchan ||

10.008.01a pra ketunā bṛhatā yāty agnir ā rodasī vṛṣabho roravīti |
 10.008.01c divaś cid antāṃ upamāṃ ud ānaḍ apām upasthe mahiṣo vavardha ||
 10.008.02a mumoda garbho vṛṣabhaḥ kakudmān asremā vatsaḥ śimivāṃ arāvīt |
 10.008.02c sa devatāty udyatāni kṛṇvan sveṣu kṣayeṣu prathamo jigāti ||
 10.008.03a ā yo mūrdhānam pitror arabdha ny adhvare dadhire sūro arṇaḥ |
 10.008.03c asya patmann aruṣīr aśvabudhnā ṛtasya yonau tanvo juṣanta ||
 10.008.04a uṣa-uṣo hi vaso agram eṣi tvaḥ yamayor abhavo vibhāvā |
 10.008.04c ṛtāya sapta dadhiṣe padāni janayan mitraḥ tanve svāyai ||
 10.008.05a bhuvāś cakṣur maha ṛtasya gopā bhuvo varuṇo yad ṛtāya veṣi |
 10.008.05c bhuvo apām napāj jātavedo bhuvo dūto yasya havyaḥ jujoṣaḥ ||
 10.008.06a bhuvo yajñasya rajasaś ca netā yatrā niyudbhiḥ sacase śivābhiḥ |
 10.008.06c divi mūrdhānam dadhiṣe svarṣām jihvām agne cakṛṣe havyaavāham ||
 10.008.07a asya tritaḥ kratunā vavre antar ichan dhītim pitur evaiḥ parasya |
 10.008.07c sacasyamānaḥ pitror upasthe jāmi bruvāṇa āyudhāni veti ||
 10.008.08a sa pitryāṇy āyudhāni vidvān indreṣita āptyo abhy ayudhyat |
 10.008.08c trīśīrṣānaḥ saptaraśmim jaghanvān tvāṣṭrasya cin niḥ sasṛje trito gāḥ ||
 10.008.09a bhūrīd indra udinakṣantam ojo 'vābhinat satpatir manyamānam |
 10.008.09c tvāṣṭrasya cid viśvarūpasya gonām ācakrāṇas trīṇi śīrṣā parā vark ||

10.009.01a āpo hi ṣṭhā mayobhuvas tā na ūrje dadhātana |
 10.009.01c mahe raṇāya cakṣase ||
 10.009.02a yo vaḥ śivatamo rasas tasya bhājayateha naḥ |
 10.009.02c uśatīr iva mātaraḥ ||
 10.009.03a tasmā araḥ gamāma vo yasya kṣayāya jinvatha |
 10.009.03c āpo janayathā ca naḥ ||
 10.009.04a śaḥ no devīr abhiṣṭaya āpo bhavantu pītaye |
 10.009.04c śaḥ yor abhi sravantu naḥ ||
 10.009.05a īsānā vāryāṇām kṣayantīś carṣaṇinām |
 10.009.05c apo yācāmi bheṣajam ||
 10.009.06a apsu me somo abravīd antar viśvāni bheṣajā |

10.009.06c agniṃ ca viśvaśambhuvam ||
 10.009.07a āpaḥ pṛṇīta bheṣajaṃ varūthaṃ tanve mama |
 10.009.07c jyok ca sūryaṃ dṛśe ||
 10.009.08a idam āpaḥ pra vahata yat kiṃ ca duritam mayi |
 10.009.08c yad vāham abhidudroha yad vā śepa utānṛtam ||
 10.009.09a āpo adyānv acāriṣaṃ rasena sam agasmahi |
 10.009.09c payasvān agna ā gahi tam mā saṃ sṛja varcasā ||

10.010.01a o cit sakhāyaṃ sakhyā vavṛtyāṃ tiraḥ purū cid arṇavam jaganvān |
 10.010.01c pitur napātam ā dadhīta vedhā adhi kṣami prataram dīdhyanāḥ ||
 10.010.02a na te sakhā sakhyaṃ vaṣṭy etat salakṣmā yad viṣurūpā bhavāti |
 10.010.02c mahas putrāso asurasya vīrā divo dhartāra urviyā pari khyan ||
 10.010.03a uśanti ghā te amṛtāsa etad ekasya cit tyajasam martyasya |
 10.010.03c ni te mano manasi dhāyy asme janyuḥ patis tanvam ā viviśyāḥ ||
 10.010.04a na yat purā cakṛmā kad dha nūnam ṛtā vadanto anṛtam rapema |
 10.010.04c gandharvo apsv apyā ca yoṣā sā no nābhiḥ paramaṃ jāmi tan nau ||
 10.010.05a garbhe nu nau janitā dampatī kar devas tvaṣṭā savitā viśvarūpaḥ |
 10.010.05c nakir asya pra minanti vratāni veda nāv asya pṛthivī uta dyauḥ ||
 10.010.06a ko asya veda prathamasyāhnaḥ ka iṃ dadarśa ka iha pra vocat |
 10.010.06c bṛhan mitrasya varuṇasya dhāma kad u brava āhano vīcyā nṛn ||
 10.010.07a yamasya mā yamyam kāma āgan samāne yonau sahaśeyyāya |
 10.010.07c jāyeva patye tanvam riricyāṃ vi cid vṛheva rathyeva cakrā ||
 10.010.08a na tiṣṭhanti na ni miśanty ete devānām spaśa iha ye caranti |
 10.010.08c anyena mad āhano yāhi tūyaṃ tena vi vṛha rathyeva cakrā ||
 10.010.09a rātrībhīr asmā ahabhir daśasyet sūryasya cakṣur muhur un mimiyāt |
 10.010.09c divā pṛthivyā mithunā sabandhū yamīr yamasya bibhṛyād ajāmi ||
 10.010.10a ā ghā tā gachān uttarā yugāni yatra jāmayaḥ kṛṇavann ajāmi |
 10.010.10c upa barbṛhi vṛṣabhāya bāhum anyam ichasva subhage patim mat ||
 10.010.11a kim bhrātāsad yad anātham bhavāti kim u svasā yan nirṛtir nigachāt |
 10.010.11c kāmamūtā bahv etad rapāmi tanvā me tanvam sam pipṛgdhi ||
 10.010.12a na vā u te tanvā tanvam sam papṛcyām pāpam āhur yaḥ svasāram nigachāt |
 10.010.12c anyena mat pramudaḥ kalpayasva na te bhrātā subhage vaṣṭy etat ||
 10.010.13a bato batāsi yama naiva te mano hṛdayam cāvidāma |
 10.010.13c anyā kila tvāṃ kakṣyeva yuktam pari ṣvajāte libujeva vṛkṣam ||
 10.010.14a anyam ū ṣu tvam yamy anya u tvāṃ pari ṣvajāte libujeva vṛkṣam |
 10.010.14c tasya vā tvam mana ichā sa vā tavādāhā kṛṇuṣva saṃvidam subhadram ||

10.011.01a vṛṣā vṛṣṇe duduhe dohasā divaḥ payāṃsi yahvo aditer adābhyah |
 10.011.01c viśvam sa veda varuṇo yathā dhiyā sa yajñīyo yajatu yajñiyāṃ ṛtūn ||
 10.011.02a rapad gandharvīr apyā ca yoṣaṇā nadasya nāde pari pātu me manaḥ |
 10.011.02c iṣṭasya madhye aditir ni dhātu no bhrātā no jyeṣṭhaḥ prathamo vi vocati ||
 10.011.03a so cin nu bhadrā kṣumatī yaśasvaty uṣā uvāsa manave svarvatī |
 10.011.03c yad iṃ uśantam uśatām anu kratum agniṃ hotāram vidathāya jījanan ||
 10.011.04a adha tyaṃ drapsaṃ vibhvaṃ vicakṣaṇaṃ vir ābharad iṣitaḥ śyeno adhware |
 10.011.04c yadī viśo vṛṇate dasmam āryā agniṃ hotāram adha dhīr ajāyata ||
 10.011.05a sadāsi raṇvo yavaseva puṣyate hotrābhīr agne manuṣaḥ svadhvaraḥ |
 10.011.05c viprasya vā yac chaśamāna ukthyam vājam sasavāṃ upayāsi bhūribhiḥ ||

10.011.06a ud īraya pitarā jāra ā bhagam iyakṣati haryato hr̥tta iṣyati |
 10.011.06c vivakti vahniḥ svapasyate makhas taviṣyate asuro vepate matī ||
 10.011.07a yas te agne sumatim marto akṣat sahasaḥ sūno ati sa pra śṛṇve |
 10.011.07c iṣaṃ dadhāno vahamāno aśvair ā sa dyumāṃ amavān bhūṣati dyūn ||
 10.011.08a yad agna eṣā samitir bhavāti devī deveṣu yajatā yajatra |
 10.011.08c ratnā ca yad vibhajāsi svadhāvo bhāgaṃ no atra vasumantaṃ vītāt ||
 10.011.09a śrudhī no agne sadane sadhasthe yukṣvā ratham amṛtasya dravitnum |
 10.011.09c ā no vaha rodasī devaputre mākir devānām apa bhūr iha syāḥ ||

10.012.01a dyāvā ha kṣāmā prathame ṛtenābhiśrāve bhavataḥ satyavācā |
 10.012.01c devo yan martān yajathāya kṛṇvan sīdad dhotā pratyaṅ svam asuṃ yan ||
 10.012.02a devo devān paribhūr ṛtena vahā no havyam prathamaś cikivān |
 10.012.02c dhūmaketuḥ samidhā bhārjiko mandro hotā nityo vācā yajiyān ||
 10.012.03a svāvṛg devasyāmṛtaṃ yadī gor ato jātāso dhārayanta urvī |
 10.012.03c viśve devā anu tat te yajur gur duhe yad enī divyaṃ ghr̥taṃ vāḥ ||
 10.012.04a arcāmi vāṃ vardhāyāpo ghr̥tasnū dyāvābhūmī śṛṇutaṃ rodasī me |
 10.012.04c ahā yad dyāvo 'sunītim ayan madhvā no atra pitarā śīsītām ||
 10.012.05a kiṃ svin no rājā jagṛhe kad asyāti vrataṃ cakṛmā ko vi veda |
 10.012.05c mitraś cid dhi śmā juhurāṇo devāñ chloko na yātām api vājo asti ||
 10.012.06a durmantv atrāmṛtasya nāma salakṣmā yad viṣurūpā bhavāti |
 10.012.06c yamasya yo manavate sumantv agne tam iṣva pāhy aprayuchan ||
 10.012.07a yasmin devā vidathe mādayante vivasvataḥ sadane dhārayante |
 10.012.07c sūrye jyotir adadhur māsy aktūn pari dyotaniṃ carato ajasrā ||
 10.012.08a yasmin devā manmani saṃcaranty apīcye na vayam asya vidma |
 10.012.08c mitro no atrādītir anāgān savitā devo varuṇāya vocat ||
 10.012.09a śrudhī no agne sadane sadhasthe yukṣvā ratham amṛtasya dravitnum |
 10.012.09c ā no vaha rodasī devaputre mākir devānām apa bhūr iha syāḥ ||

10.013.01a yuje vām brahma pūrvyaṃ namobhir vi śloka etu pathyeva sūreḥ |
 10.013.01c śṛṇvantu viśve amṛtasya putrā ā ye dhāmāni divyāni tasthuḥ ||
 10.013.02a yame iva yatamāne yad aitam pra vām bharan mānuṣā devayantaḥ |
 10.013.02c ā sīdataṃ svam ulokaṃ vidāne svāsasthe bhavatam indave naḥ ||
 10.013.03a pañca padāni rupo anv arohaṃ catuspadīm anv emi vratena |
 10.013.03c akṣareṇa prati mima etām ṛtasya nābhāv adhi sam punāmi ||
 10.013.04a devebhyaḥ kam avṛṇīta mṛtyum prajāyai kam amṛtaṃ nāvṛṇīta |
 10.013.04c bṛhaspatiṃ yajñam akṛṇvata iṣim priyāṃ yamas tanvam prāirecīt ||
 10.013.05a sapta kṣaranti śīsave marutvate pitre putrāso apy avivatann ṛtam |
 10.013.05c ubhe id asyobhayasya rājata ubhe yatete ubhayasya puṣyataḥ ||

10.014.01a pareyivāṃsam pravato mahīr anu bahubhyaḥ panthām anupaspaśānam |
 10.014.01c vaivasvataṃ saṃgamaṇaṃ janānām yamaṃ rājānaṃ haviṣā duvasya ||
 10.014.02a yamo no gātum prathamo viveda naiṣā gavyūtir apabhartavā u |
 10.014.02c yatrā naḥ pūrve pitarāḥ pareyur enā jajñānāḥ pathyā anu svāḥ ||
 10.014.03a mātali kavyair yamo aṅgirobhir bṛhaspatir ṛkvabhir vāvṛdhānaḥ |
 10.014.03c yāṃś ca devā vāvṛdhur ye ca devān svāhānye svadhayānye madanti ||
 10.014.04a imaṃ yama prastaram ā hi sīdāṅgirobhiḥ pitṛbhiḥ saṃvidānaḥ |

10.014.04c ā tvā mantrāḥ kavīśastā vahantv enā rājan haviṣā mādayasva ||
 10.014.05a aṅgirobhir ā gahi yajñiyebhir yama vairūpair iha mādayasva |
 10.014.05c vivasvantam huve yaḥ pitā te 'smin yajñe barhiṣy ā niṣadya ||
 10.014.06a aṅgirasō naḥ pitaro navagvā atharvāṇo bhṛgavaḥ somyāsaḥ |
 10.014.06c teṣāṃ vayam sumatau yajñiyānām api bhadre saumanase syāma ||
 10.014.07a prehi prehi pathibhiḥ pūrvyebhir yatrā naḥ pūrve pitarāḥ pareyuḥ |
 10.014.07c ubhā rājānā svadhayā madantā yamam paśyāsi varuṇam ca devam ||
 10.014.08a sam gachasva pitṛbhiḥ sam yamaneṣṭāpūrtena parame vyoman |
 10.014.08c hitvāyāvadyam punar astam ehi sam gachasva tanvā suvarcāḥ ||
 10.014.09a apeta vīta vi ca sarpatāto 'smā etam pitaro lokam akran |
 10.014.09c ahobhir adbhir aktubhir vyaktam yamo dadāty avasānam asmai ||
 10.014.10a ati drava sārameyau śvānau caturakṣau śabalau sādhunā pathā |
 10.014.10c athā pitṛn suvidatrām̃ upehi yamena ye sadhamādam madanti ||
 10.014.11a yau te śvānau yama rakṣitārau caturakṣau pathirakṣi nṛcakṣasau |
 10.014.11c tābhyām enam pari dehi rājan svasti cāsmā anamīvam ca dhehi ||
 10.014.12a urūṇasāv asutr̥pā udumbalau yamasya dūtau carato janām̃ anu |
 10.014.12c tāv asmabhyam dṛśaye sūryāya punar dātām asum adyeha bhadrām ||
 10.014.13a yamāya somam sunuta yamāya juhutā haviḥ |
 10.014.13c yamam ha yajño gachaty agnidūto aram̃kṛtaḥ ||
 10.014.14a yamāya ghṛtavād dhavir juhota pra ca tiṣṭhata |
 10.014.14c sa no deveṣv ā yamad dīrgham āyuh pra jīvase ||
 10.014.15a yamāya madhumattamam rājñe havyam juhutana |
 10.014.15c idam nama ṛṣibhyaḥ pūrvajebhyaḥ pūrvebhyaḥ pathikṛdbhyaḥ ||
 10.014.16a trikadrakebhiḥ patati ṣaḍ urvīr ekam id bṛhat |
 10.014.16c triṣṭub gāyatrī chandāṃsi sarvā tā yama āhitā ||

10.015.01a ud iratām avara ut parāsa un madhyamāḥ pitarāḥ somyāsaḥ |
 10.015.01c asum ya iyur avṛkā ṛtajñās te no 'vantu pitaro haveṣu ||
 10.015.02a idam pitṛbhyo namo astv adya ye pūrvāso ya uparāsa iyuh |
 10.015.02c ye pārthive rajasy ā niṣattā ye vā nūnam suvr̥janāsu vikṣu ||
 10.015.03a āham pitṛn suvidatrām̃ avitsi napātām ca vikramaṇam ca viṣṇoḥ |
 10.015.03c barhiṣado ye svadhayā sutasya bhajanta pitvas ta ihāgamiṣṭhāḥ ||
 10.015.04a barhiṣadaḥ pitara ūty arvāg imā vo havya cakṛmā juṣadhvam |
 10.015.04c ta ā gatāvasā śamtamenāthā naḥ śam yor arapo dadhāta ||
 10.015.05a upahūtāḥ pitarāḥ somyāso barhiṣyeṣu nidhiṣu priyeṣu |
 10.015.05c ta ā gamantu ta iha śruvantv adhi bruvantu te 'vantv asmān ||
 10.015.06a ācyā jānu dakṣiṇato niṣadyemam yajñam abhi gr̥ṇīta viśve |
 10.015.06c mā himsiṣṭa pitarāḥ kena cin no yad va āgaḥ puruṣatā karāma ||
 10.015.07a āsīnāso aruṇinām upasthe rayim dhatta dāsuse martyāya |
 10.015.07c putrebhyaḥ pitaras tasya vasvaḥ pra yachata ta ihorjam dadhāta ||
 10.015.08a ye naḥ pūrve pitarāḥ somyāso 'nūhire somapītham vasiṣṭhāḥ |
 10.015.08c tebhir yamaḥ samrarāṇo havimṣy usann usadbhiḥ pratikāmam attu ||
 10.015.09a ye tātr̥ṣur devatrā jehamānā hotrāvida stomataṣṭāso arkaiḥ |
 10.015.09c āgne yāhi suvidatrebhir arvān satyaiḥ kavyaiḥ pitṛbhir gharmasadbhiḥ ||
 10.015.10a ye satyāso havirado haviṣpā indreṇa devaiḥ saratham dadhānāḥ |
 10.015.10c āgne yāhi sahasram devavandaiḥ paraiḥ pūrvaiḥ pitṛbhir gharmasadbhiḥ ||
 10.015.11a agniṣvātātāḥ pitara eha gachata sadaḥ-sadaḥ sadata supraṇitayaḥ |
 10.015.11c attā havimṣi prayatāni barhiṣy athā rayim sarvavīram dadhātana ||

- 10.015.12a tvam agna īdīto jātavedo 'vāḍ ḍhavyāni surabhīṇi kṛtvī |
 10.015.12c prādāḥ pitṛbhyaḥ svadhayā te akṣann addhi tvam deva prayatā havīmṣi ||
 10.015.13a ye ceḥa pitaro ye ca neḥa yāṃś ca vidma yāṃ u ca na pravidma |
 10.015.13c tvam vettha yati te jātavedaḥ svadhābhir yajñam sukṛtam juṣasva ||
 10.015.14a ye agnidagdhā ye anagnidagdhā madhye divaḥ svadhayā mādayante |
 10.015.14c tebhiḥ svarāḍ asunitim etām yathāvaśam tanvam kalpayasva ||
- 10.016.01a mainam agne vi daho mābhi śoco māśya tvacaṃ cikṣipo mā śarīram |
 10.016.01c yadā śṛtam kṛṇavo jātavedo 'them enam pra hiṇutāt pitṛbhyaḥ ||
 10.016.02a śṛtam yadā karasi jātavedo 'them enam pari dattāt pitṛbhyaḥ |
 10.016.02c yadā gachāty asunitim etām athā devānām vaśanīr bhavāti ||
 10.016.03a sūryam cakṣur gachatu vātam ātmā dyām ca gacha pṛthivīm ca dharmaṇā |
 10.016.03c apo vā gacha yadi tatra te hitam ośadhīṣu prati tiṣṭhā śarīraiḥ ||
 10.016.04a ajo bhāgas tapasā tam tapasva tam te śocis tapatu tam te arcīḥ |
 10.016.04c yās te śivās tanvo jātavedas tābhir vahainam sukṛtām ulokam ||
 10.016.05a ava sṛja punar agne pitṛbhyo yas ta āhutaś carati svadhābhiḥ |
 10.016.05c āyur vasāna upa vetu śeṣaḥ sam gachatām tanvā jātavedaḥ ||
 10.016.06a yat te kṛṣṇaḥ śakuna ātutoda pipīlaḥ sarpa uta vā śvāpadaḥ |
 10.016.06c agniṣ ṭad viśvād agadam kṛṇotu somaś ca yo brāhmaṇāṃ āviveśa ||
 10.016.07a agner varma pari gobhir vyayasva sam proruṣva pīvasā medasā ca |
 10.016.07c net tvā dhṛṣṇur harasā jarhṛṣāṇo dadhṛg vidhakṣyan paryāṅkhayāte ||
 10.016.08a imam agne camasam mā vi jihvaraḥ priyo devānām uta somyānām |
 10.016.08c eṣa yaś camaso devapānas tasmin devā amṛtā mādayante ||
 10.016.09a kravādādam agnim pra hiṇomi dūram yamarājño gachatu ripravāhaḥ |
 10.016.09c ihaivāyam itaro jātavedā devebhyo havyam vahatu prajānan ||
 10.016.10a yo agniḥ kravayāt praviveśa vo gṛham imam paśyann itaram jātavedasam |
 10.016.10c tam harāmi pitṛyajñāya devam sa gharmam invāt parame sadhasthe ||
 10.016.11a yo agniḥ kravavāhanaḥ pitṛn yakṣad ṛtāvṛdhaḥ |
 10.016.11c pred u havyanī vocati devebhyaś ca pitṛbhya ā ||
 10.016.12a uśantas tvā ni dhīmahy uśantaḥ sam idhīmahi |
 10.016.12c uśann uśata ā vaha pitṛn haviṣe attave ||
 10.016.13a yaṃ tvam agne samadahas tam u nir vāpayā punaḥ |
 10.016.13c kiyāmbv atra rohatu pākadūrvā vyalkasā ||
 10.016.14a śītike śītikāvati hlādike hlādikāvati |
 10.016.14c maṇḍūkyā su sam gama imam sv agniṃ harṣaya ||
- 10.017.01a tvaṣṭā duhitre vahatum kṛṇotitīdam viśvam bhuvanam sam eti |
 10.017.01c yamasya mātā paryuhyamānā maho jāyā vivasvato nanāśa ||
 10.017.02a apāgūhann amṛtām martyebhyaḥ kṛtvī savarṇām adadur vivasvate |
 10.017.02c utāśvināv abharad yat tad āśid ajahād u dvā mithunā saranyūḥ ||
 10.017.03a pūṣā tvetaś cyāvayatu pra vidvān anaṣṭapaśur bhuvanasya gopāḥ |
 10.017.03c sa tvaitebhyaḥ pari dadat pitṛbhyo 'gnir devebhyaḥ suvidatriebhyaḥ ||
 10.017.04a āyur viśvāyuh pari pāsati tvā pūṣā tvā pātu prapathe purastāt |
 10.017.04c yatrāsate sukṛto yatra te yayus tatra tvā devaḥ savitā dadhātu ||
 10.017.05a pūṣemā āśā anu veda sarvāḥ so asmāṃ abhayatamena neṣat |
 10.017.05c svastidā āghṛṇiḥ sarvavīro 'prayuchan pura etu prajānan ||
 10.017.06a prapathe pathām ajaniṣṭa pūṣā prapathe divaḥ prapathe pṛthivyāḥ |

10.017.06c ubhe abhi priyatame sadhasthe ā ca parā ca carati prajānan ||
 10.017.07a sarasvatīm devayanto havante sarasvatīm adhvare tāyamāne |
 10.017.07c sarasvatīm sukṛto ahvayanta sarasvatī dāsūṣe vāryaṃ dāt ||
 10.017.08a sarasvati yā saratham yayātha svadhābhir devi pitṛbhir madantī |
 10.017.08c āsadyāsmin barhiṣi mādayasvānamivā iṣa ā dhehy asme ||
 10.017.09a sarasvatīm yām pitaro havante dakṣiṇā yajñam abhinakṣamānāḥ |
 10.017.09c sahasrārgham iḍo atra bhāgaṃ rāyas poṣaṃ yajamāneṣu dhehi ||
 10.017.10a āpo asmān mātaraḥ śundhayantu gṛtena no gṛtapvaḥ punantu |
 10.017.10c viśvaṃ hi ripram pravahanti devīr ud id ābhyaḥ śucir ā pūta emi ||
 10.017.11a drapsaś caskanda prathamām anu dyūn imaṃ ca yonim anu yaś ca pūrvaḥ |
 10.017.11c samānaṃ yonim anu saṃcarantaṃ drapsaṃ juhomy anu sapta hotrāḥ ||
 10.017.12a yas te drapsa skandati yas te aṃśur bāhucyuto dhiṣaṇāyā upasthāt |
 10.017.12c adhvaryor vā pari vā yaḥ pavitrāt taṃ te juhomi manasā vaṣaṭkṛtam ||
 10.017.13a yas te drapsa skanno yas te aṃśur avaś ca yaḥ paraḥ srucā |
 10.017.13c ayaṃ devo bṛhaspatiḥ saṃ taṃ siñcatu rādhasē ||
 10.017.14a payasvatīr oṣadhayaḥ payasvan māmakaṃ vacaḥ |
 10.017.14c apām payasvad it payas tena mā saha śundhata ||

10.018.01a param mṛtyo anu parehi panthām yas te sva itaro devayānāt |
 10.018.01c cakṣuṣmate śṛṇvate te bravīmi mā naḥ prajāṃ rīriṣo mota vīrān ||
 10.018.02a mṛtyoḥ padaṃ yopayanto yad aita drāghīya āyuh prataraṃ dadhānāḥ |
 10.018.02c āpyāyamānāḥ prajayā dhanena śuddhāḥ pūtā bhavata yajñiyāsaḥ ||
 10.018.03a ime jīvā vi mṛtair āvavṛtrann abhūd bhadrā devahūtīr no adya |
 10.018.03c prāñco agāma nṛtaye hasāya drāghīya āyuh prataraṃ dadhānāḥ ||
 10.018.04a imaṃ jīvebhyaḥ paridhiṃ dadhāmi maiśaṃ nu gād aparo artham etam |
 10.018.04c śataṃ jīvantu śaradaḥ purūcīr antar mṛtyuṃ dadhatām parvatena ||
 10.018.05a yathāhāny anupūrvam bhavanti yatha ṛtava ṛtubhir yanti sādhu |
 10.018.05c yathā na pūrvam aparo jahāty evā dhātar āyūṃṣi kalpayaiśam ||
 10.018.06a ā rohatāyur jarasaṃ vṛṇānā anupūrvam yatamānā yati ṣṭha |
 10.018.06c iha tvaṣṭā sujanimā sajoṣā dīrgham āyuh karati jīvase vaḥ ||
 10.018.07a imā nārīr avidhavaḥ supatnīr āñjanena sarpiṣā saṃ viśantu |
 10.018.07c anaśravo 'namivāḥ suratnā ā rohantu janayo yonim agre ||
 10.018.08a ud īrṣva nāry abhi jīvalokaṃ gatāsum etam upa śeṣa ehi |
 10.018.08c hastagrābhasya didhiṣos tavedam patyur janitvam abhi sam babhūtha ||
 10.018.09a dhanur hastād ādadāno mṛtasyāsme kṣatrāya varcase balāya |
 10.018.09c atraiva tvam iha vayaṃ suvīrā viśvā spṛdho abhimātīr jayema ||
 10.018.10a upa sarpa mātaram bhūmim etām uruvyacasam pṛthivīm suśevām |
 10.018.10c ūrṇamradā yuvatīr dakṣiṇāvata eṣā tvā pātu nirṛter upasthāt ||
 10.018.11a uc chvañcasva pṛthivi mā ni bādhatāḥ sūpāyanāsmāi bhava sūpavañcanā |
 10.018.11c mātā putraṃ yathā sicābhy enam bhūma ūrṇuhi ||
 10.018.12a ucchvañcamānā pṛthivi su tiṣṭhatu sahasram mita upa hi śrayantām |
 10.018.12c te gṛhāso gṛtaścuta bhavantu viśvāhāsmāi śaraṇāḥ santv atra ||
 10.018.13a ut te stabhnāmi pṛthivīm tvat parīmaṃ logaṃ nidadhan mo ahaṃ riṣam |
 10.018.13c etām sthūṇām pitaro dhārayantu te 'trā yamaḥ sādānā te minotu ||
 10.018.14a praticīne mām ahanīṣvāḥ parṇam ivā dadhuḥ |
 10.018.14c praticīm jagrabhā vācam aśvaṃ raśanayā yathā ||

10.019.01a ni vartadhvam mānu gātāsmān siṣakta revatiḥ |
 10.019.01c agniṣomā punarvasū asme dhārayataṃ rayim ||
 10.019.02a punar enā ni vartaya punar enā ny ā kuru |
 10.019.02c indra eṇā ni yachatv agnir enā upājatu ||
 10.019.03a punar etā ni vartantām asmin puṣyantu gopatau |
 10.019.03c ihaivāgne ni dhārayeha tiṣṭhatu yā rayiḥ ||
 10.019.04a yan niyānaṃ nyayanaṃ saṃjñānaṃ yat parāyaṇam |
 10.019.04c āvartanaṃ nivartanaṃ yo gopā api taṃ huve ||
 10.019.05a ya udānaḥ vyayanaṃ ya udānaḥ parāyaṇam |
 10.019.05c āvartanaṃ nivartanaṃ api gopā ni vartatām ||
 10.019.06a ā nivarta ni vartaya punar na indra gā dehi |
 10.019.06c jīvābhir bhunajāmahai ||
 10.019.07a pari vo viśvato dadha ūrjā ghr̥tena payasā |
 10.019.07c ye devāḥ ke ca yajñiyās te rayyā saṃ sṛjantu naḥ ||
 10.019.08a ā nivartana vartaya ni nivartana vartaya |
 10.019.08c bhūmyās catasraḥ pradiśas tābhya enā ni vartaya ||

10.020.01a bhadraṃ no api vātaya manaḥ ||
 10.020.02a agnim iḍe bhujāṃ yaviṣṭhaṃ śāsā mitraṃ durdharītum |
 10.020.02c yasya dharman svar eniḥ saparyanti mātur ūdhaḥ ||
 10.020.03a yam āsā kṛpanīdam bhāsāketuṃ vardhayanti |
 10.020.03c bhrājate śreṇidan ||
 10.020.04a aryo viśam gātur eti pra yad ānaḥ divo antān |
 10.020.04c kavir abhraṃ dīdyānaḥ ||
 10.020.05a juṣad dhavyā mānuṣasyordhvas tasthāv ṛbhvā yajñe |
 10.020.05c minvan sadma pura eti ||
 10.020.06a sa hi kṣemo havir yajñāḥ śruṣṭīd asya gātur eti |
 10.020.06c agniṃ devā vāsīmantam ||
 10.020.07a yajñāsāhaṃ duva iṣe 'gnim pūrvasya śevasya |
 10.020.07c adreḥ sūnum āyum āhuḥ ||
 10.020.08a naro ye ke cāsmad ā viśvet te vāma ā syuḥ |
 10.020.08c agniṃ haviṣā vardhantaḥ ||
 10.020.09a kṛṣṇaḥ śveto 'ruṣo yāmo asya bradhna ṛjra uta śoṇo yaśasvān |
 10.020.09c hiraṇyarūpaṃ janitā jajāna ||
 10.020.10a evā te agne vimado maṇiṣām ūrjo napād amṛtebhiḥ sajoṣāḥ |
 10.020.10c gira ā vakṣat sumatīr iyāna iṣam ūrjaṃ sukṣitīm viśvam ābhāḥ ||

10.021.01a āgniṃ na svavṛktibhir hotāraṃ tvā vṛṇīmahe |
 10.021.01c yajñāya stīrṇabarhiṣe vi vo made śīram pāvakaśociṣam vivakṣase ||
 10.021.02a tvām u te svābhuvāḥ śumbhanty aśvarādhasaḥ |
 10.021.02c veti tvām upasecanī vi vo mada ṛjītir agna āhutir vivakṣase ||
 10.021.03a tve dharmāṇa āsate juhūbhiḥ siñcatīr iva |
 10.021.03c kṛṣṇā rūpāṇy arjunā vi vo made viśvā adhi śriyo dhiṣe vivakṣase ||
 10.021.04a yam agne manyase rayiṃ sahasāvann amartya |
 10.021.04c tam ā no vājasātaye vi vo made yajñeṣu citram ā bharā vivakṣase ||
 10.021.05a agnir jāto atharvaṇā vidad viśvāni kāvyā |
 10.021.05c bhuvad dūto vivasvato vi vo made priyo yamasya kāmyo vivakṣase ||

10.021.06a tvām yajñeṣv īdate 'gne prayaty adhware |
 10.021.06c tvam vasūni kāmyā vi vo made viśvā dadhāsi dāśuṣe vivakṣase ||
 10.021.07a tvām yajñeṣv ṛtviyaṃ cārum agne ni ṣedire |
 10.021.07c ghṛtapratikam manuṣo vi vo made śukraṃ cetiṣṭham akṣabhir vivakṣase ||
 10.021.08a agne śukreṇa śociṣoru prathayase bṛhat |
 10.021.08c abhikrandan vṛṣāyase vi vo made garbham dadhāsi jāmiṣu vivakṣase ||

10.022.01a kuha śruta indraḥ kasminn adya jane mitro na śrūyate |
 10.022.01c ṛṣiṇām vā yaḥ kṣaye guhā vā carikṣe girā ||
 10.022.02a iha śruta indro asme adya stave vajry ṛciṣamaḥ |
 10.022.02c mitro na yo janeṣv ā yaśaś cakre asāmy ā ||
 10.022.03a maho yas patiḥ śvaso asāmy ā maho nṛmṇasya tūtujiḥ |
 10.022.03c bhartā vajrasya dhṛṣṇoḥ pitā putram iva priyam ||
 10.022.04a yujāno aśvā vātasya dhunī devo devasya vajrivaḥ |
 10.022.04c syantā pathā virukmatā sṛjāna stoṣy adhvanaḥ ||
 10.022.05a tvam tyā cid vātasyāśvāgā ṛjrā tmanā vahadhyai |
 10.022.05c yayor devo na martyo yantā nakir vidāyyaḥ ||
 10.022.06a adha gmantośanā pṛchate vām kadamhā na ā gṛham |
 10.022.06c ā jagmathuḥ parākād divaś ca gmaś ca martyam ||
 10.022.07a ā na indra pṛkṣase 'smākam brahmodyatam |
 10.022.07c tat tvā yācāmahe 'vaḥ śuṣṇam yad dhann amānuṣam ||
 10.022.08a akarmā dasyur abhi no amantur anyavrato amānuṣaḥ |
 10.022.08c tvam tasyāmitrahan vadhar dāsasya dambhaya ||
 10.022.09a tvam na indra śūra sūrain uta tvotāso barhaṇā |
 10.022.09c purutrā te vi pūrtayo navanta kṣonayo yathā ||
 10.022.10a tvam tān vṛtrahatye codayo nṛn kārpaṇe śūra vajrivaḥ |
 10.022.10c guhā yadī kavīnām viśām nakṣatraśavasām ||
 10.022.11a makṣū tā ta indra dānāpnasa ākṣāṇe śūra vajrivaḥ |
 10.022.11c yad dha śuṣṇasya dambhaya jātaṃ viśvaṃ sayāvabhiḥ ||
 10.022.12a mākudhryag indra śūra vasvīr asme bhūvann abhiṣṭayaḥ |
 10.022.12c vayaṃ-vayaṃ ta āsām sumne syāma vajrivaḥ ||
 10.022.13a asme tā ta indra santu satyāhimsantīr upasṛṣaḥ |
 10.022.13c vidyāma yāsām bhujō dhenūnām na vajrivaḥ ||
 10.022.14a ahastā yad apadī vardhata kṣāḥ śacībhir vedyānām |
 10.022.14c śuṣṇam pari pradakṣiṇid viśvāyave ni śiśnathaḥ ||
 10.022.15a pibā-pibed indra śūra somam mā riṣaṇyo vasavāna vasuḥ san |
 10.022.15c uta trāyasva gṛṇato maghono mahaś ca rāyo revatas kṛdhī naḥ ||

10.023.01a yajāmaha indraṃ vajradakṣiṇam harīṇām rathyaṃ vivratānām |
 10.023.01c pra śmaśru dodhuvad ūrdhvathā bhūd vi senābhir dayamāno vi rādhasā ||
 10.023.02a harī nv asya yā vane vide vasv indro maghair maghavā vṛtrahā bhuvat |
 10.023.02c ṛbhur vāja ṛbhukṣāḥ patyate śavo 'va kṣṇaumi dāsasya nāma cit ||
 10.023.03a yadā vajraṃ hiraṇyam id athā rathaṃ harī yam asya vahato vi sūribhiḥ |
 10.023.03c ā tiṣṭhati maghavā sanaśruta indro vājasya dīrghaśravasas patiḥ ||
 10.023.04a so cin nu vṛṣṭir yūthyā svā sacāṃ indraḥ śmaśrūṇi haritābhi pruşṇute |
 10.023.04c ava veti sukṣayaṃ sute madhūd id dhūnoti vāto yathā vanam ||
 10.023.05a yo vācā vivāco mṛdhraṇvācaḥ purū sahasrāśivā jaghāna |

10.023.05c tat-tad id asya paumsyaṃ gr̥ṇimasi piteva yas taviṣiṃ vāvṛdhe śavaḥ ||
 10.023.06a stomam ta indra vimadā ajijanann apūrvyam purutamaṃ sudānave |
 10.023.06c vidmā hy asya bhojanam inasya yad ā paśuṃ na gopāḥ karāmahe ||
 10.023.07a mākīr na enā sakhyā vi yausus tava cendra vimadasya ca ṛṣeḥ |
 10.023.07c vidmā hi te pramatīṃ deva jānivad asme te santu sakhyā śivāni ||

10.024.01a indra somam imam piba madhumantaṃ camū sutam |
 10.024.01c asme rayiṃ ni dhāraya vi vo made sahasriṇam purūvaso vivakṣase ||
 10.024.02a tvāṃ yajñebhir ukthair upa havyebhir īmahe |
 10.024.02c śacīpate śacīnāṃ vi vo made śreṣṭhaṃ no dhehi vāryaṃ vivakṣase ||
 10.024.03a yas patir vāryāṇām asi radhrasya coditā |
 10.024.03c indra stotṛiṇām avitā vi vo made dviṣo naḥ pāhy aṃhaso vivakṣase ||
 10.024.04a yuvaṃ śakrā māyāvinā samīcī nir amanthatam |
 10.024.04c vimadena yad īditā nāsatyā niramanthatam ||
 10.024.05a viśve devā akṛpanta samīcyor niṣpatantyoḥ |
 10.024.05c nāsatyāv abruvan devāḥ punar ā vahatād iti ||
 10.024.06a madhuman me parāyaṇam madhumat punar āyanam |
 10.024.06c tā no devā devatayā yuvam madhumatas kṛtam ||

10.025.01a bhadraṃ no api vātaya mano dakṣam uta kratum |
 10.025.01c adhā te sakhye andhaso vi vo made raṇan gāvo na yavase vivakṣase ||
 10.025.02a hr̥dispr̥śas ta āsate viśveṣu soma dhāmasu |
 10.025.02c adhā kāmā ime mama vi vo made vi tiṣṭhante vasūyavo vivakṣase ||
 10.025.03a uta vratāni soma te prāham mināmi pākyā |
 10.025.03c adhā piteva sūnave vi vo made mṛḍā no abhi cid vadhād vivakṣase ||
 10.025.04a sam u pra yanti dhītayaḥ sargāso 'vatāṃ iva |
 10.025.04c kratuṃ naḥ soma jīvase vi vo made dhārayā camasāṃ iva vivakṣase ||
 10.025.05a tava tye soma śaktibhir nikāmāso vy ṛṇvire |
 10.025.05c gr̥tsasya dhīrās tavaso vi vo made vrajaṃ gomantam aśvinam vivakṣase ||
 10.025.06a paśuṃ naḥ soma rakṣasi purutrā viṣṭhitam jagat |
 10.025.06c samākṛṇoṣi jīvase vi vo made viśvā sampaśyan bhuvanā vivakṣase ||
 10.025.07a tvam naḥ soma viśvato gopā adābhyo bhava |
 10.025.07c sedha rājann apa sridho vi vo made mā no duḥśaṃsa īsatā vivakṣase ||
 10.025.08a tvam naḥ soma sukatur vayodheyāya jāgṛhi |
 10.025.08c kṣetravittaro manuṣo vi vo made druho naḥ pāhy aṃhaso vivakṣase ||
 10.025.09a tvam no vṛtrahantamendrasyendo śivaḥ sakhā |
 10.025.09c yat sīm havante samithe vi vo made yudhyamānās tokasātau vivakṣase ||
 10.025.10a ayaṃ gha sa turo mada indrasya vardhata priyaḥ |
 10.025.10c ayaṃ kakṣivato maho vi vo made matiṃ viprasya vardhayad vivakṣase ||
 10.025.11a ayaṃ viprāya dāśuṣe vājāṃ iyarti gomataḥ |
 10.025.11c ayaṃ saptabhya ā varam vi vo made prāndham śroṇam ca tāriṣad vivakṣase ||

10.026.01a pra hy achā manīṣā spārḥā yanti niyutaḥ |
 10.026.01c pra dasrā niyudrathaḥ pūṣā aviṣṭu māhinaḥ ||
 10.026.02a yasya tyan mahitvaṃ vātāpyam ayaṃ janaḥ |
 10.026.02c vipra ā vaṃsad dhītibhiś ciketa suṣṭutinām ||

10.026.03a sa veda suṣṭutinām indur na pūṣā vṛṣā |
 10.026.03c abhi psuraḥ pruṣāyati vrajaṃ na ā pruṣāyati ||
 10.026.04a mamsīmahī tvā vayam asmākaṃ deva pūṣan |
 10.026.04c matinām ca sādhanam viprānām cādhamam ||
 10.026.05a pratyardhir yajñānām aśvahayo rathānām |
 10.026.05c ṛṣiḥ sa yo manurhito viprasya yāvayatsakhaḥ ||
 10.026.06a ādhīsamāṇāyāḥ patiḥ śucāyās ca śucasya ca |
 10.026.06c vāsovāyo 'vinām ā vāsāṃsi marmṛjat ||
 10.026.07a ino vājānām patir inah puṣṭinām sakhā |
 10.026.07c pra śmaśru haryato dūdhod vi vṛthā yo adābhyaḥ ||
 10.026.08a ā te rathasya pūṣann ajā dhuraṃ vavṛtyuḥ |
 10.026.08c viśvasyārthinaḥ sakhā sanojā anapacyutaḥ ||
 10.026.09a asmākam ūrjā ratham pūṣā aviṣṭu māhinaḥ |
 10.026.09c bhuvad vājānām vṛdha imaṃ naḥ śṛṇavad dhavam ||

10.027.01a asat su me jaritaḥ sābhivego yat sunvate yajamānāya śikṣam |
 10.027.01c anāśīrdām aham asmi prahantā satyadhvṛtam vṛjināyantam ābhūm ||
 10.027.02a yadīd aham yudhaye samṇayāny adevayūn tanvā śūsujānān |
 10.027.02c amā te tumraṃ vṛṣabham pacāni tīvraṃ sutam pañcadaśam ni śiñcam ||
 10.027.03a nāham taṃ veda ya iti bravīty adevayūn samaraṇe jaghanvān |
 10.027.03c yadāvākyat samaraṇam ṛghāvad ād id dha me vṛṣabhā pra bruvanti ||
 10.027.04a yad ajñāteṣu vṛjaneṣv āsam viśve sato maghavāno ma āsan |
 10.027.04c jināmi vet kṣema ā santam ābhūm pra taṃ kṣiṇām parvate pādagr̥hya ||
 10.027.05a na vā u māṃ vṛjane vārayante na parvatāso yad aham manasye |
 10.027.05c mama svanāt kṛdhukarṇo bhayāta eved anu dyūn kiraṇaḥ sam ejāt ||
 10.027.06a darśan nv atra śṛtapāṃ anindrān bāhukṣadaḥ śarave patyamānān |
 10.027.06c ghṛṣuṃ vā ye niniduḥ sakhāyam adhy ū nv eṣu pavayo vavṛtyuḥ ||
 10.027.07a abhūr v aukṣīr vy u āyur ānaḍ darśan nu pūrvo aparō nu darṣat |
 10.027.07c dve pavaste pari taṃ na bhūto yo asya pāre rajaso viveṣa ||
 10.027.08a gāvo yavam prayutā aryo akṣan tā apaśyam sahaḥgopās carantiḥ |
 10.027.08c havā id aryo abhitaḥ sam āyan kiyad āsu svapatiś chandayāte ||
 10.027.09a sam yad vayam yavasādo janānām aham yavāda urvajre antaḥ |
 10.027.09c atrā yukto 'vasātāram ichād atho ayuktaṃ yunajad vavanvān ||
 10.027.10a atred u me maṃsase satyam uktaṃ dvipāc ca yac catuspāt saṃsr̥jāni |
 10.027.10c strībhir yo atra vṛṣaṇam pṛtanyād ayuddho asya vi bhajāni vedaḥ ||
 10.027.11a yasyānakṣā duhitā jātv āsa kas tām vidvāṃ abhi manyāte andhām |
 10.027.11c kataro menim prati tam mucāte ya im vahāte ya im vā vareyāt ||
 10.027.12a kiyatī yoṣā maryato vadhūyoḥ pariprītā panyasā vāryeṇa |
 10.027.12c bhadrā vadhūr bhavati yat supesāḥ svayam sā mitraṃ vanute jane cit ||
 10.027.13a patto jagāra pratyāñcam atti śīrṣṇā śīraḥ prati dadhau varūtham |
 10.027.13c āsīna ūrdhvām upasi kṣiṇāti nyanñ uttānām anv eti bhūmim ||
 10.027.14a bṛhann achāyo apalāśo arvā tasthau mātā viṣito atti garbhaḥ |
 10.027.14c anyasyā vatsam rihatī mimāya kayā bhuvā ni dadhe dhenur ūdhaḥ ||
 10.027.15a sapta vīrāso adharād ud āyann aṣṭottarāttāt sam ajagmīran te |
 10.027.15c nava paścātāt sthivimanta āyan daśa prāk sānu vi tiranty āśnaḥ ||
 10.027.16a daśānām ekaṃ kapilaṃ samānaṃ taṃ hinvanti kratave pāryāya |
 10.027.16c garbham mātā sudhitaṃ vakṣaṇāsv avenantaṃ tuṣayanti bibharti ||
 10.027.17a pīvānam meṣam apacanta vīrā nyuptā akṣā anu dīva āsan |

10.027.17c dvā dhanum bṛhatīm apsv antaḥ pavitravantā carataḥ punantā ||
 10.027.18a vi krośanāso viṣvañca āyan pacāti nemo nahi pakṣad ardhaḥ |
 10.027.18c ayam me devaḥ savitā tad āha drvanna id vanavat sarpirannaḥ ||
 10.027.19a apaśyam grāmaṃ vahamānam ārād acakrayā svadhayā vartamānam |
 10.027.19c siṣakty aryaḥ pra yugā janānām sadyaḥ śisnā pramināno navīyān ||
 10.027.20a etau me gāvau pramarasya yuktau mo ṣu pra sedhīr muhur in mamandhi |
 10.027.20c āpaś cid asya vi naśanty arthaṃ sūraś ca marka uparo babhūvān ||
 10.027.21a ayaṃ yo vajraḥ purudhā vivṛtto 'vaḥ sūryasya bṛhataḥ puriṣāt |
 10.027.21c śrava id enā paro anyad asti tad avyathī jarimāṇas taranti ||
 10.027.22a vṛkṣe-vṛkṣe niyatā mīmayad gaus tato vayaḥ pra patān pūruṣādaḥ |
 10.027.22c athedaṃ viśvam bhuvanam bhayāta indrāya sunvad ṛṣaye ca śikṣat ||
 10.027.23a devānām māne prathamā atiṣṭhan kṛntatrād eṣām uparā ud āyan |
 10.027.23c trayas tapanti pṛthivīm anūpā dvā bṛbūkaṃ vahataḥ puriṣam ||
 10.027.24a sā te jīvātur uta tasya viddhi mā smaitādṛg apa gūhaḥ samarye |
 10.027.24c āviḥ svaḥ kṛṇute gūhate busaṃ sa pādur asya nirṇijo na mucyate ||

10.028.01a viśvo hy anyo arir ājagāma mamed aha śvaśuro nā jagāma |
 10.028.01c jakṣiyād dhānā uta somam papīyāt svāśitaḥ punar astam jagāyāt ||
 10.028.02a sa roruvad vṛṣabhas tigmaśṛṅgo varṣman tasthau varimann ā pṛthivyāḥ |
 10.028.02c viśveṣv enam vṛjaneṣu pāmi yo me kukṣi sutasomaḥ pṛṇāti ||
 10.028.03a adriṇā te mandina indra tūyān sunvanti somān pibasi tvam eṣām |
 10.028.03c pacanti te vṛṣabhāñ atsi teṣām pṛkṣeṇa yan maghavan hūyamānaḥ ||
 10.028.04a idam su me jaritar ā cikiddhi pratīpaṃ śāpaṃ nadyo vahanti |
 10.028.04c lopāśaḥ siṃham pratyañcam atsāḥ kroṣṭā varāham nir atakta kaksāt ||
 10.028.05a kathā ta etad aham ā ciketaṃ gṛtsasya pākas tavaso mañiṣām |
 10.028.05c tvam no vidvāñ ṛtuthā vi voco yam ardham te maghavan kṣemyā dhūḥ ||
 10.028.06a evā hi mām tavasaṃ vardhayanti divaś cin me bṛhata uttarā dhūḥ |
 10.028.06c purū sahasrā ni śisāmi sākam aśatruṃ hi mā janitā jajāna ||
 10.028.07a evā hi mām tavasaṃ jajñur ugraṃ karman-karman vṛṣaṇam indra devāḥ |
 10.028.07c vadhīm vṛtraṃ vajreṇa mandasāno 'pa vrajam mahinā dāśuṣe vam ||
 10.028.08a devāsa āyan paraśūmr abibhran vanā vṛścanto abhi vidbhīr āyan |
 10.028.08c ni sudrvaṃ dadhato vakṣaṇāsu yatrā kṛpītam anu tad dahanti ||
 10.028.09a śāśaḥ kṣuram pratyañcam jagārādrim logena vy abhedam ārāt |
 10.028.09c bṛhantaṃ cid ṛhate randhayāni vayad vatso vṛṣabham sūsuvānaḥ ||
 10.028.10a suparṇa itthā nakham ā siṣāyāvaruddhaḥ paripadam na siṃhaḥ |
 10.028.10c niruddhaś cin mahiṣas tarṣyāvān godhā tasmā ayathaṃ karṣad etat ||
 10.028.11a tebhyo godhā ayathaṃ karṣad etad ye brahmaṇaḥ pratīpiyanty annaiḥ |
 10.028.11c sima ukṣṇo 'vasṛṣṭāñ adanti svayam balāni tanvaḥ śṛṇānāḥ ||
 10.028.12a ete śamībhiḥ suśamī abhūvan ye hinvire tanvaḥ soma ukthaiḥ |
 10.028.12c nṛvad vadann upa no māhi vājān divi śravo dadhiṣe nāma vīraḥ ||

10.029.01a vane na vā yo ny adhāyi cākañ chucir vām stomo bhuraṇāv ajīgaḥ |
 10.029.01c yasyed indraḥ purudineṣu hotā nṛṇām naryo nṛtamaḥ kṣapāvān ||
 10.029.02a pra te asyā uśasaḥ prāparasyā nṛtau syāma nṛtamasya nṛṇām |
 10.029.02c anu triśokaḥ śatam āvahan nṛn kutsena ratho yo asat sasavān ||
 10.029.03a kas te mada indra rantyo bhūd duro giro abhy ugro vi dhāva |
 10.029.03c kad vāho arvāg upa mā mañiṣā ā tvā śakyām upamaṃ rādho annaiḥ ||

10.029.04a kad u dyumnam indra tvāvato nṛṇ kayā dhiyā karase kan na āgan |
 10.029.04c mitro na satya urugāya bhṛtyā anne samasya yad asan maṇiṣāḥ ||
 10.029.05a preraya sūro arthaṃ na pāraṃ ye asya kāmāṃ janidhā iva gman |
 10.029.05c giraś ca ye te tuvijāta pūrvīr nara indra pratiśikṣanty annaiḥ ||
 10.029.06a mātṛe nu te sumite indra pūrvī dyaur majmanā pṛthivī kāvyena |
 10.029.06c varāya te ghṛtavantaḥ sutāsaḥ svādman bhavantu pītaye madhūni ||
 10.029.07a ā madhvo asmā asicann amatram indrāya pūrṇaṃ sa hi satyarādhāḥ |
 10.029.07c sa vāvṛdhe varimann ā pṛthivyā abhi kratvā naryaḥ paumsyaiś ca ||
 10.029.08a vy ānaḍ indraḥ pṛtanāḥ svojā āsmai yatante sakhyāya pūrvīḥ |
 10.029.08c ā smā rathaṃ na pṛtanāsu tiṣṭha yam bhadrāya sumatyā codayāse ||

10.030.01a pra devatrā brahmaṇe gātur etv apo achā manaso na prayukti |
 10.030.01c mahīm mitrasya varuṇasya dhāsim pṛthujrayase rīradhā suvr̥ktim ||
 10.030.02a adhvaryavo haviṣmanto hi bhūtāchāpa itośatīr uśantaḥ |
 10.030.02c ava yās caṣṭe aruṇaḥ suparṇas tam āsyadhvam ūrmim adyā suhastāḥ ||
 10.030.03a adhvaryavo 'pa itā samudram apāṃ napātaṃ haviṣā yajadhvam |
 10.030.03c sa vo dadad ūrmim adyā supūtaṃ tasmai somam madhumantaṃ sunota ||
 10.030.04a yo anidhmo dīdayad apsv antar yaṃ viprāsa iḍate adhvarēṣu |
 10.030.04c apāṃ napān madhumatīr apo dā yābhir indro vāvṛdhe vīryāya ||
 10.030.05a yābhiḥ somo modate harṣate ca kalyāṇībhir yuvatībhir na maryaḥ |
 10.030.05c tā adhvaryo apo achā parehi yad āsiñcā ośadhībhiḥ punītāt ||
 10.030.06a eved yūne yuvatayo namanta yad im uśann uśatīr ety acha |
 10.030.06c saṃ jānate manasā saṃ cikitre 'dhvaryavo dhiṣaṇāpaś ca devīḥ ||
 10.030.07a yo vo vṛtābhyo akṛṇod ulokaṃ yo vo mahyā abhiśaster amuñcat |
 10.030.07c tasmā indrāya madhumantam ūrmiṃ devamādanam pra hiṇotanāpaḥ ||
 10.030.08a prāsmāi hinota madhumantam ūrmiṃ garbho yo vaḥ sindhavo madhva utsaḥ |
 10.030.08c ghṛtapṛṣṭham īdyam adhvarēṣv āpo revatīḥ śṛṇutā havam me ||
 10.030.09a taṃ sindhavo matsaram indrapānam ūrmim pra heta ya ubhe iyarti |
 10.030.09c madacyutam auśānaṃ nabhojām pari tritantaṃ vicarantaṃ utsam ||
 10.030.10a āvarvṛtatīr adha nu dvidhārā goṣuyudho na niyavaṃ carantīḥ |
 10.030.10c ṛṣe janitrīr bhuvanasya patnīr apo vandasva savṛdhaḥ sayonīḥ ||
 10.030.11a hinotā no adhvaraṃ devayajyā hinota brahma sanaye dhanānām |
 10.030.11c ṛtasya yoge vi ṣyadhvam ūdhaḥ śruṣṭivarīr bhūtanāsmabhyam āpaḥ ||
 10.030.12a āpo revatīḥ kṣayathā hi vasvaḥ kratuṃ ca bhadrām bibhṛthāmṛtaṃ ca |
 10.030.12c rāyaś ca stha svapatyasya patnīḥ sarasvatī tad gṛṇate vayo dhāt ||
 10.030.13a prati yad āpo adṛśram āyatīr ghṛtam payāmsi bibhṛatīr madhūni |
 10.030.13c adhvaryubhir manasā saṃvidānā indrāya somaṃ suṣutam bharantīḥ ||
 10.030.14a emā agman revatīr jivadhanyā adhvaryavaḥ sādāyatā sakhāyaḥ |
 10.030.14c ni barhiṣi dhattana somyāso 'pāṃ naptrā saṃvidānāsa enāḥ ||
 10.030.15a āgmann āpa uśatīr barhir edaṃ ny adhware asadan devayantīḥ |
 10.030.15c adhvaryavaḥ sunutendrāya somam abhūd u vaḥ suśakā devayajyā ||

10.031.01a ā no devānām upa vetu śaṃso viśvebhis turair avase yajatraḥ |
 10.031.01c tebhir vayaṃ suśakhāyo bhavema taranto viśvā duritā syāma ||
 10.031.02a pari cin marto draviṇam mamanyād ṛtasya pathā namaśā vivāset |
 10.031.02c uta svena kratunā saṃ vadeta śreyāṃsaṃ dakṣam manasā jagṛbhyāt ||
 10.031.03a adhāyi dhītir asasṛgram aṃśās tīrthe na dasmam upa yanty ūmāḥ |

10.031.03c abhy ānaśma suvitasya sūṣaṃ navedaso amṛtānām abhūma ||
 10.031.04a nityaś cākanyāt svapatir damūnā yasmā u devaḥ savitā jajāna |
 10.031.04c bhago vā gobhir aryamem anajyāt so asmai cāruś chadayad uta syāt ||
 10.031.05a iyam sā bhūyā uṣasām iva kṣā yad dha kṣumantaḥ śavasā samāyan |
 10.031.05c asya stutiṃ jaritur bhikṣamāṇā ā naḥ śagmāsa upa yantu vājāḥ ||
 10.031.06a asyed eṣā sumatiḥ paprathānābhavat pūrvyā bhūmanā gauḥ |
 10.031.06c asya sanīdā asurasya yonau samāna ā bharaṇe bibhramāṇāḥ ||
 10.031.07a kiṃ svid vanaṃ ka u sa vṛkṣa āsa yato dyāvāpṛthivī niṣṭatakṣuḥ |
 10.031.07c saṃtasthāne ajare itaūtī ahāni pūrvīr uṣaso jaranta ||
 10.031.08a naitāvad enā paro anyad asty ukṣā sa dyāvāpṛthivī bibharti |
 10.031.08c tvacam pavitraṃ kṛṇuta svadhāvān yad iṃ sūryaṃ na harito vahanti ||
 10.031.09a stego na kṣām aty eti pṛthvīm mihaṃ na vāto vi ha vāti bhūma |
 10.031.09c mitro yatra varuṇo ajyamāno 'gnir vane na vy asṛṣṭa śokam ||
 10.031.10a starīr yat sūta sadyo ajyamānā vyathir avyathih kṛṇuta svagopā |
 10.031.10c putro yat pūrvaḥ pitror janiṣṭa śamyāṃ gaur jagāra yad dha pṛchān ||
 10.031.11a uta kaṇvaṃ nṛṣadaḥ putram āhur uta śyāvo dhanam ādatta vājī |
 10.031.11c pra kṛṣṇāya ruśad apinvatodhar ṛtam atra nakir asmā apīpet ||

10.032.01a pra su gmantā dhiyasānasya sakṣaṇi varebhir varāṃ abhi ṣu prasīdataḥ |
 10.032.01c asmākam indra ubhayaṃ jujoṣati yat somyasyāndhaso bubodhati ||
 10.032.02a vīndra yāsi divyāni rocanā vi pāṛthivāni rajasā puruṣtuta |
 10.032.02c ye tvā vahanti muhur adhvarāṃ upa te su vanvantu vagvanāṃ arādhasaḥ ||
 10.032.03a tad in me chantsad vapuṣo vapuṣṭaram putro yaj jānam pitror adhiyati |
 10.032.03c jāyā patiṃ vahati vagnunā sumat puṃsa id bhadro vahatuḥ pariṣkrtaḥ ||
 10.032.04a tad it sadhastham abhi cāru dīdhaya gāvo yac chāsan vahatuṃ na dhenavaḥ |
 10.032.04c mātā yan mantur yūthasya pūrvyābhi vāṇasya saptadhātur ij janaḥ ||
 10.032.05a pra vo 'chā ririce devayuṣ padam eko rudrebhir yāti turvaṇiḥ |
 10.032.05c jarā vā yeṣv amṛteṣu dāvane pari va ūmebhyaḥ siñcatā madhu ||
 10.032.06a nidhiyamānam apagūḍham apsu pra me devānāṃ vratapā uvāca |
 10.032.06c indro vidvāṃ anu hi tvā cacakṣa tenāham agne anuśiṣṭa āgām ||
 10.032.07a akṣetravit kṣetravidam hy aprāt sa praiti kṣetravidānuśiṣṭaḥ |
 10.032.07c etad vai bhadrām anuśāsānasyota srutiṃ vindaty añjasīnām ||
 10.032.08a adyed u prāṇīd amamann imāhāpīvrto adhayan mātur ūdhaḥ |
 10.032.08c em enam āpa jarimā yuvānam aheḍan vasuḥ sumanā babhūva ||
 10.032.09a etāni bhadrā kalaśa kriyāma kuruśravaṇa dadato maghāni |
 10.032.09c dāna id vo maghavānaḥ so astv ayaṃ ca somo hṛdi yam bibharmi ||

10.033.01a pra mā yuyujre prayujo janānāṃ vahāmi sma pūṣaṇam antareṇa |
 10.033.01c viśve devāso adha mām arakṣan duḥśāsū āgād iti ghoṣa āsīt ||
 10.033.02a sam mā tapanty abhitaḥ sapatnīr iva parśavaḥ |
 10.033.02c ni bād hate amatir nagnatā jasur ver na vevīyate matiḥ ||
 10.033.03a mūṣo na śiśnā vy adanti mādhyā stotāraṃ te śatakrato |
 10.033.03c sakṛt su no maghavann indra mṛḍayād hā piteva no bhava ||
 10.033.04a kuruśravaṇam āvrṇi rājānaṃ trāsadasyavam |
 10.033.04c maṃhiṣṭham vāghatām ṛṣiḥ ||
 10.033.05a yasya mā harito rathe tisro vahanti sādhuḃyā |
 10.033.05c stavai sahasradakṣiṇe ||

10.033.06a yasya prasvādaso gira upamaśravasaḥ pituḥ |
 10.033.06c kṣetraṃ na raṇvam ūcuṣe ||
 10.033.07a adhi putropamaśravo napān mitrātither ihi |
 10.033.07c pituḥ ṭe asmi vanditā ||
 10.033.08a yad īśiyāmṛtānām uta vā martyānām |
 10.033.08c jīved in maghavā mama ||
 10.033.09a na devānām ati vratam śatātmā cana jīvati |
 10.033.09c tathā yujā vi vāvṛte ||

10.034.01a prāvepā mā bṛhato mādayanti pravātejā iriṇe varvṛtānāḥ |
 10.034.01c somasyeva maujavatasya bhakṣo vibhīdako jāgṛvir mahyam achān ||
 10.034.02a na mā mimetha na jihīda eṣā śivā sakhibhya uta mahyam āsit |
 10.034.02c akṣasyāham ekaparasya hetor anuvratām apa jāyām arodham ||
 10.034.03a dveṣṭi śvaśrūr apa jāyā ruṇaddhi na nāthito vindate marḍitāram |
 10.034.03c aśvasyeva jarato vasnyasya nāham vindāmi kitavasya bhogam ||
 10.034.04a anye jāyām pari mṛsanty asya yasyāgṛdhad vedane vājy akṣaḥ |
 10.034.04c pitā mātā bhrātara enam āhur na jānīmo nayatā baddham etam ||
 10.034.05a yad ādīdhye na daviṣāṇy ebhiḥ parāyadbhyo 'va hīye sakhibhyaḥ |
 10.034.05c nyuptās ca babhravo vācam akrataṃ emīd eṣāṃ niṣkṛtaṃ jāriṇīva ||
 10.034.06a sabhām eti kitavaḥ pṛchamāno jeṣyāmīti tanvā sūśujānaḥ |
 10.034.06c akṣāso asya vi tiranti kāmam pratidīvne dadhata ā kṛtāni ||
 10.034.07a akṣāsa id aṅkuśīno nitodino nikṛtvānas tapanās tāpayiṣṇavaḥ |
 10.034.07c kumāradeṣṇā jayataḥ punarhaṇo madhvā samprkṛtāḥ kitavasya barhaṇā ||
 10.034.08a tripañcāśaḥ krīḍati vrāta eṣāṃ deva iva savitā satyadharmā |
 10.034.08c ugrasya cin manyave nā namante rājā cid ebhyo nama it kṛṇoti ||
 10.034.09a nīcā vartanta upari sphuranty ahastāso hastavantam sahante |
 10.034.09c divyā aṅgārā iriṇe nyuptāḥ śītāḥ santo hṛdayam nir dahanti ||
 10.034.10a jāyā tapyate kitavasya hīnā mātā putrasya carataḥ kva svit |
 10.034.10c ṛṇāvā bibhyad dhanam ichamāno 'nyeṣām astam upa naktam eti ||
 10.034.11a striyam dṛṣṭvāya kitavam tatāpānyeṣām jāyām sukṛtam ca yonim |
 10.034.11c pūrvāhṇe aśvān yuyuje hi babhrūn so agner ante vṛṣalaḥ papāda ||
 10.034.12a yo vaḥ senānīr mahato gaṇasya rājā vrātasya prathamo babhūva |
 10.034.12c tasmai kṛṇomi na dhanā ruṇadhmi daśāham prācis tad ṛtam vadāmi ||
 10.034.13a akṣair mā dīvyāḥ kṛṣim it kṛṣasva vitte ramasva bahu manyamānaḥ |
 10.034.13c tatra gāvaḥ kitava tatra jāyā tan me vi caṣṭe savitāyam ayaḥ ||
 10.034.14a mitram kṛṇudhvaṃ khalu mṛdatā no mā no ghoreṇa caratābhi dhṛṣṇu |
 10.034.14c ni vo nu manyur viśatām arātīr anyo babhrūṇām prasitau nv astu ||

10.035.01a abudhram u tya indravanto agnayo jyotir bharanta uṣaso vyuṣṭiṣu |
 10.035.01c mahī dyāvāpṛthivī cetatām apo 'dyā devānām ava ā vṛṇīmahe ||
 10.035.02a divaspṛthivyor ava ā vṛṇīmahe mātṛṇe sindhūn parvatāñ charyāṇāvataḥ |
 10.035.02c anāgāstvam sūryam uṣāsam īmahe bhadrām somaḥ suvāno adyā kṛṇotu naḥ ||
 10.035.03a dyāvā no adya pṛthivī anāgaso mahī trāyetam suvitāya mātārā |
 10.035.03c uṣā uchanty apa bādhatām agham svasty agniṃ samidhānam īmahe ||
 10.035.04a iyam na usrā prathamā sudevyam revat sanibhyo revatī vy uchatu |
 10.035.04c āre manyum durvidatrasya dhīmahi svasty agniṃ samidhānam īmahe ||
 10.035.05a pra yāḥ sisrate sūryasya raśmibhir jyotir bharantīr uṣaso vyuṣṭiṣu |

10.035.05c bhadrā no adya śravase vy uchata svasty agniṃ samidhānam īmahe ||
 10.035.06a anamivā uṣasa ā carantu na ud agnayo jihatāṃ jyotiṣā bṛhat |
 10.035.06c āyukṣātām aśvinā tūtujiṃ rathaṃ svasty agniṃ samidhānam īmahe ||
 10.035.07a śreṣṭhaṃ no adya savitar vareṇyam bhāgam ā suva sa hi ratnadhā asi |
 10.035.07c rāyo janitrīṃ dhiṣaṇām upa bruve svasty agniṃ samidhānam īmahe ||
 10.035.08a pipartu mā tad ṛtasya pravācanam devānām yan manuṣyā amanmahi |
 10.035.08c viśvā id usrā spaḍ ud eti sūryaḥ svasty agniṃ samidhānam īmahe ||
 10.035.09a adveṣo adya barhiṣa starīmaṇi grāvṇām yoge manmanaḥ sādha īmahe |
 10.035.09c ādityānām śarmaṇi sthā bhuraṇyasi svasty agniṃ samidhānam īmahe ||
 10.035.10a ā no barhiḥ sadhamāde bṛhad divi devāṃ iḍe sādāyā sapta hotṛn |
 10.035.10c indram mitraṃ varuṇam sātaye bhagam svasty agniṃ samidhānam īmahe ||
 10.035.11a ta ādityā ā gatā sarvatātaye vṛdhe no yajñam avatā sajoṣasaḥ |
 10.035.11c bṛhaspatim pūṣaṇam aśvinā bhagam svasty agniṃ samidhānam īmahe ||
 10.035.12a tan no devā yachata supravācanam chardir ādityāḥ subharam nṛpāyyam |
 10.035.12c paśve tokāya tanayāya jīvase svasty agniṃ samidhānam īmahe ||
 10.035.13a viśve adya maruto viśva ūtī viśve bhavantv agnayaḥ samiddhāḥ |
 10.035.13c viśve no devā avasā gamantu viśvam astu draviṇam vājo asme ||
 10.035.14a yaṃ devāso 'vatha vājasātau yaṃ trāyadhve yaṃ pipṛthāty aṃhaḥ |
 10.035.14c yo vo gopīthe na bhayasya veda te syāma devavītaye turāsaḥ ||

10.036.01a uṣāsānaktā bṛhatī supeśasā dyāvākṣāmā varuṇo mitro aryamā |
 10.036.01c indram huve marutaḥ parvatāṃ apa ādityān dyāvāpṛthivī apaḥ svaḥ ||
 10.036.02a dyauś ca naḥ pṛthivī ca pracetasa ṛtāvārī rakṣatām aṃhaso riṣaḥ |
 10.036.02c mā durvidatrā nirṛtir na īsata tad devānām avo adyā vṛṇīmahe ||
 10.036.03a viśvasmān no aditiḥ pātv aṃhaso mātā mitrasya varuṇasya revataḥ |
 10.036.03c svarvaj jyotir avṛkaṃ naśīmahi tad devānām avo adyā vṛṇīmahe ||
 10.036.04a grāvā vadann apa rakṣāmsi sedhatu duṣvapnyam nirṛtiṃ viśvam atriṇam |
 10.036.04c ādityam śarma marutām aśīmahi tad devānām avo adyā vṛṇīmahe ||
 10.036.05a endro barhiḥ sīdatu pinvatām iḍā bṛhaspatiḥ sāmabhir ṛkvo arcatu |
 10.036.05c supraketaṃ jīvase manma dhīmahi tad devānām avo adyā vṛṇīmahe ||
 10.036.06a diviṣṛṣam yajñam asmākam aśvinā jirādhvaram kṛṇutam sunnam iṣṭaye |
 10.036.06c prācīnaraśmim āhutaṃ gṛtena tad devānām avo adyā vṛṇīmahe ||
 10.036.07a upa hvaye suhavam mārutaṃ gaṇam pāvakam ṛṣvam sakhyāya śambhuvam |
 10.036.07c rāyas poṣam sauśravasāya dhīmahi tad devānām avo adyā vṛṇīmahe ||
 10.036.08a apām peruṃ jivadhanyam bharāmahe devāvyam suhavam adhvaraśriyam |
 10.036.08c suraśmiṃ somam indriyam yamīmahi tad devānām avo adyā vṛṇīmahe ||
 10.036.09a sanema tat susanitā sanitvabhir vayam jivā jivaputrā anāgasah |
 10.036.09c brahmadviṣo viṣvag eno bharerata tad devānām avo adyā vṛṇīmahe ||
 10.036.10a ye sthā manor yajñiyās te śṛṇotana yad vo devā īmahe tad dadātana |
 10.036.10c jaitram kratuṃ rayimad vīravat yaśas tad devānām avo adyā vṛṇīmahe ||
 10.036.11a mahad adya mahatām ā vṛṇīmahe 'vo devānām bṛhatām anarvaṇām |
 10.036.11c yathā vasu vīrajātam naśāmahi tad devānām avo adyā vṛṇīmahe ||
 10.036.12a maho agneḥ samidhānasya śarmaṇy anāgā mitre varuṇe svastaye |
 10.036.12c śreṣṭhe syāma savituḥ savīmani tad devānām avo adyā vṛṇīmahe ||
 10.036.13a ye savituḥ satyasavasya viśve mitrasya vrate varuṇasya devāḥ |
 10.036.13c te saubhagam vīravat gomad apno dadhātana draviṇam citram asme ||
 10.036.14a savitā paścātāt savitā purastāt savitottarāttāt savitādharāttāt |
 10.036.14c savitā naḥ suvatu sarvatātiṃ savitā no rāsatām dīrgham āyuh ||

10.037.01a namo mitrasya varuṇasya cakṣase maho devāya tad ṛtaṃ saparyata |
 10.037.01c dūredṛṣe devajātāya ketave divas putrāya sūryāya śamsata ||
 10.037.02a sā mā satyoktiḥ pari pātu viśvato dyāvā ca yatra tatanann ahāni ca |
 10.037.02c viśvam anyan ni viśate yad ejati viśvāhāpo viśvāhod eti sūryaḥ ||
 10.037.03a na te adevaḥ pradivo ni vāsate yad etaśebhiḥ patarai ratharyasi |
 10.037.03c prācīnam anyad anu vartate raja ud anyena jyotiṣā yāsi sūrya ||
 10.037.04a yena sūrya jyotiṣā bādhasse tamo jagac ca viśvam udiyarṣi bhānunā |
 10.037.04c tenāsmad viśvām anirām anāhutim apāmivām apa duṣvapnyam suva ||
 10.037.05a viśvasya hi preṣito rakṣasi vratam aheḍayann uccarasi svadhā anu |
 10.037.05c yad adya tvā sūryopabravāmahai taṃ no devā anu maṃsīrata kratum ||
 10.037.06a taṃ no dyāvāpṛthivī tan na āpa indraḥ śṛṇvantu maruto havaṃ vacaḥ |
 10.037.06c mā śūne bhūma sūryasya samdṛṣi bhadram jīvanto jaraṇām aśimahi ||
 10.037.07a viśvāhā tvā sumanasah sucakṣasaḥ prajāvanto anamivā anāgasah |
 10.037.07c udyantaṃ tvā mitramaho dive-dive jyog jīvāḥ prati paśyema sūrya ||
 10.037.08a mahi jyotir bibhrataṃ tvā vicakṣaṇa bhāsvantaṃ cakṣuṣe-cakṣuṣe mayaḥ |
 10.037.08c ārohantam bṛhataḥ pājasas pari vayaṃ jīvāḥ prati paśyema sūrya ||
 10.037.09a yasya te viśvā bhuvanāni ketunā pra cerate ni ca viśante aktubhiḥ |
 10.037.09c anāgāstvena harikeśa sūryāhnāhnā no vasyasā-vasyasod ihi ||
 10.037.10a śaṃ no bhava cakṣasā śaṃ no ahnā śaṃ bhānunā śaṃ himā śaṃ ghṛṇena |
 10.037.10c yathā śaṃ adhvañ cham asad duroṇe tat sūrya draviṇaṃ dhehi citram ||
 10.037.11a asmākaṃ devā ubhayāya janmane śarma yachata dvipade catuṣpade |
 10.037.11c adat pibad ūrjayamānam āsitam tad asme śaṃ yor arapo dadhātana ||
 10.037.12a yad vo devāś cakṛma jihvayā guru manaso vā prayuti devaheḍanam |
 10.037.12c arāvā yo no abhi duchunāyate tasmin tad eno vasavo ni dhetana ||

10.038.01a asmin na indra pṛtsutau yaśasvati śimivati krandasi prāva sātaye |
 10.038.01c yatra goṣātā dhṛṣiteṣu khādiṣu viṣvak patanti didyavo nṛṣāhye ||
 10.038.02a sa naḥ kṣumantaṃ sadane vy ūrṇuhi goarṇasaṃ rayim indra śravāyyam |
 10.038.02c syāma te jayataḥ śakra medino yathā vayaṃ uśmasi tad vaso kṛdhi ||
 10.038.03a yo no dāsa āryo vā puruṣtutādeva indra yudhaye ciketati |
 10.038.03c asmābhiḥ ṭe suśahāḥ santu śatrasvas tvayā vayaṃ tān vanuyāma samgame ||
 10.038.04a yo dabhrebhir havyo yaś ca bhūribhir yo abhike varivovin nṛṣāhye |
 10.038.04c taṃ vikhāde sasnim adya śrutam naram arvāñcam indram avase karāmahe ||
 10.038.05a svavṛjam hi tvām aham indra śuśravānānudaṃ vṛṣabha radhracodanam |
 10.038.05c pra muñcasva pari kutsād ihā gahi kim u tvāvān muṣkayor baddha āsate ||

10.039.01a yo vām pariḥmā suvṛd aśvinā ratho doṣām uṣāso havyo haviṣmatā |
 10.039.01c śaśvattamāsas tam u vām idam vayaṃ pitur na nāma suhavam havāmahe ||
 10.039.02a codayataṃ sūnṛtāḥ pinvataṃ dhiya ut puraṃdhīr irayataṃ tad uśmasi |
 10.039.02c yaśasam bhāgam kṛṇutaṃ no aśvinā somaṃ na cārum maghavatsu nas kṛtam ||
 10.039.03a amājuraś cid bhavatho yuvam bhago 'nāśoś cid avitārāpamasya cit |
 10.039.03c andhasya cin nāsatyā kṛśasya cid yuvām id āhur bhiṣajā rutasya cit ||
 10.039.04a yuvaṃ cyavānaṃ sanayaṃ yathā ratham punar yuvānaṃ carathāya takṣathuḥ |
 10.039.04c niṣ ṭaugryam ūhathur adbhyas pari viśvet tā vām savaneṣu pravācyā ||
 10.039.05a purānā vām vīryā pra bravā jane 'tho hāsathur bhiṣajā mayobhuvā |

10.039.05c tā vāṃ nu navyāv avase karāmahe 'yaṃ nāsatyā śrad arir yathā dadhat ||
 10.039.06a iyaṃ vāṃ ahve śṛṇutam me aśvinā putrāyeva pitarā mahyaṃ śikṣatam |
 10.039.06c anāpir ajñā asajātyāmatih purā tasyā abhiśaster ava sprtam ||
 10.039.07a yuvaṃ rathena vimadāya śundhyuvaṃ ny ūhathuḥ purumitrasya yoṣaṇām |
 10.039.07c yuvaṃ havaṃ vadhrimatyā agachataṃ yuvaṃ suṣuṭim cakrathuḥ puramdhaye ||
 10.039.08a yuvaṃ viprasya jaraṇām upeyuṣaḥ punaḥ kaler akṛṇutam yuvad vayaḥ |
 10.039.08c yuvaṃ vandanam ṛśyadād ud ūpathur yuvaṃ sadyo viśpalām etave kṛthaḥ ||
 10.039.09a yuvaṃ ha rebhaṃ vṛṣaṇā guhā hitam ud airayatam mamṛvāmsam aśvinā |
 10.039.09c yuvaṃ ṛbīsam uta taptam atraya omanvantaṃ cakrathuḥ saptavadhraye ||
 10.039.10a yuvaṃ śvetam pedave 'śvināśvaṃ navabhir vājair navatī ca vājinam |
 10.039.10c carakṛtyaṃ dadathur drāvayatsakham bhagaṃ na nṛbhyo havyam mayobhuvam ||
 10.039.11a na taṃ rājānāv adite kutaś cana nāṃho aśnoti duritaṃ nakir bhayam |
 10.039.11c yaṃ aśvinā suhavā rudravartanī purorathaṃ kṛṇuthaḥ patnyā saha ||
 10.039.12a ā tena yātam manaso javīyasā rathaṃ yaṃ vāṃ ṛbhavaś cakrur aśvinā |
 10.039.12c yasya yoge duhitā jāyate diva ubhe ahanī sudine vivasvataḥ ||
 10.039.13a tā vartir yātaṃ jayuṣā vi parvatam apinvataṃ śayave dhenum aśvinā |
 10.039.13c vṛkasya cid vartikām antar āsyād yuvaṃ śacībhir grasitām amuñcatam ||
 10.039.14a etaṃ vāṃ stomam aśvināv akarmātakṣāma bhṛgavo na ratham |
 10.039.14c ny amṛkṣāma yoṣaṇām na marye nityaṃ na sūnum tanayaṃ dadhānāḥ ||

10.040.01a rathaṃ yāntaṃ kuha ko ha vāṃ narā prati dyumantaṃ suvitāya bhūṣati |
 10.040.01c prātaryāvāṇaṃ vibhvaṃ viśe-viśe vastor-vastor vahamānaṃ dhiyā śami ||
 10.040.02a kuha svid doṣā kuha vastor aśvinā kuhābhipitvaṃ karataḥ kuhoṣatuḥ |
 10.040.02c ko vāṃ śayutrā vidhaveva devaram maryaṃ na yoṣā kṛṇute sadhastha ā ||
 10.040.03a prātar jarethe jaraṇeva kāpayā vastor-vastor yajatā gachatho gṛham |
 10.040.03c kasya dhvasrā bhavathaḥ kasya vā narā rājaputrevā savanāva gachathaḥ ||
 10.040.04a yuvām mṛgeva vāraṇā mṛgaṇyavo doṣā vastor haviṣā ni hvayāmahe |
 10.040.04c yuvaṃ hotrām ṛtuthā juhvate nareṣaṃ janāya vahathaḥ śubhas patī ||
 10.040.05a yuvām ha ghoṣā pary aśvinā yatī rājña ūce duhitā pṛche vāṃ narā |
 10.040.05c bhūtam me ahna uta bhūtam aktave 'śvāvate rathine śaktam arvate ||
 10.040.06a yuvaṃ kavī ṣṭhaḥ pary aśvinā rathaṃ viśo na kutso jaritur naśāyathaḥ |
 10.040.06c yuvor ha makṣā pary aśvinā madhv āsā bhārata niṣkṛtaṃ na yoṣaṇā ||
 10.040.07a yuvaṃ ha bhujyuṃ yuvam aśvinā vaśaṃ yuvaṃ śiñjāram uśanām upārathuḥ |
 10.040.07c yuvo rarāvā pari sakhyam āsate yuvor aham avasā sumnam ā cake ||
 10.040.08a yuvaṃ ha kṛśaṃ yuvam aśvinā śayuṃ yuvaṃ vidhantaṃ vidhavām uruṣyathaḥ |
 10.040.08c yuvaṃ sanibhya stanayantaṃ aśvināpa vrajam ūrṇuthaḥ saptāsyam ||
 10.040.09a janiṣṭa yoṣā patayat kanīnako vi cāruhan vīrudho daṃsanā anu |
 10.040.09c āsmai rīyante nivaneva sindhavo 'smā ahne bhavati tat patitvanam ||
 10.040.10a jīvaṃ rudanti vi mayante adhvare dīrghām anu prasitiṃ dīdhiyur naraḥ |
 10.040.10c vāmam pitṛbhyo ya idam samerire mayaḥ patibhyo janayaḥ pariṣvaje ||
 10.040.11a na tasya vidma tad u ṣu pra vocata yuvā ha yad yuvatyāḥ kṣeti yoniṣu |
 10.040.11c priyosriyasya vṛṣabhasya retino gṛhaṃ gamemāśvinā tad uśmasi ||
 10.040.12a ā vāṃ agan sumatir vājīnivasū ny aśvinā hrtsu kāmā ayamsata |
 10.040.12c abhūtaṃ gopā mithunā śubhas patī priyā aryamṇo duryām aśīmahi ||
 10.040.13a tā mandasānā manuṣo duroṇa ā dhattaṃ rayiṃ sahavīraṃ vacasyave |
 10.040.13c kṛtaṃ tīrthaṃ suprapāṇaṃ śubhas patī sthānum patheṣṭhām apa durmatim
 hatam ||
 10.040.14a kva svid adya katamāsv aśvinā vikṣu dasrā mādayete śubhas patī |

10.040.14c ka im ni yeme katamasya jagmatur viprasya vā yajamānasya vā gṛham ||

10.041.01a samānam u tyam puruhūtam ukthyam ratham tricakram savanā ganigmatam |
10.041.01c parijsānam vidathyam suvṛktibhir vayam vyuṣṭā uṣaso havāmahe ||
10.041.02a prātaryujam nāsatyādhi tiṣṭhathaḥ prātaryāvāṇam madhuvāhanam ratham |
10.041.02c viśo yena gachatho yajvarīr narā kīreś cid yajñam hotṛmantam aśvinā ||
10.041.03a adhvaryum vā madhupāṇim suhastyam agnidham vā dhṛṭadakṣam damūnasam |
10.041.03c viprasya vā yat savanāni gachatho 'ta ā yātam madhupeyam aśvinā ||

10.042.01a asteva su prataram lāyam asyan bhūṣann iva pra bharā stomam asmai |
10.042.01c vācā viprās tarata vācam aryo ni rāmaya jaritaḥ soma indram ||
10.042.02a dohena gām upa śikṣā sakhāyam pra bodhaya jaritar jāram indram |
10.042.02c kośam na pūrṇam vasunā nyṣṭam ā cyāvaya maghadeyāya sūram ||
10.042.03a kim aṅga tvā maghavan bhojam āhuḥ śiśīhi mā śiśayam tvā śṛṇomi |
10.042.03c apnasvatī mama dhīr astu śakra vasuvidam bhagam indrā bharā naḥ ||
10.042.04a tvām janā mamasatyeshv indra samtasthānā vi hvayante samīke |
10.042.04c atrā yujam kṛṇute yo haviṣmān nāsunvatā sakhyam vaṣṭi sūraḥ ||
10.042.05a dhanam na syandram bahulam yo asmai tivrān somāṃ āsunoti prayasvān |
10.042.05c tasmai śatrūn sutukān prātar ahno ni svaṣṭrān yuvati hanti vṛtram ||
10.042.06a yasmin vayam dadhimā śamsam indre yaḥ śiśrāya maghavā kāmam asme |
10.042.06c ārāc cit san bhayatām asya śatrur ny asmai dyumnā janyā namantām ||
10.042.07a ārāc chatrum apa bādhasva dūram ugro yaḥ śambaḥ puruhūta tena |
10.042.07c asme dhehi yavamad gomad indra kṛdhī dhiyam jaritre vājaratnām ||
10.042.08a pra yam antar vṛṣasavāso aḡman tivrāḥ somā bahulāntāsa indram |
10.042.08c nāha dāmānam maghavā ni yaṃsan ni sunvate vahati bhūri vāmam ||
10.042.09a uta prahām atidivya jayāti kṛtam yac chvaghni vicinoti kāle |
10.042.09c yo devakāmo na dhanā ruṇaddhi sam it tam rāyā sṛjati svadhāvān ||
10.042.10a gobhiṣ ṭaremāmatim durevām yavena kṣudham puruhūta viśvām |
10.042.10c vayam rājabhiḥ prathamā dhanāny asmākena vṛjanenā jayema ||
10.042.11a bṛhaspatir naḥ pari pātu paścād utottarasmād adharād aghāyoḥ |
10.042.11c indraḥ purastād uta madhyato naḥ sakhā sakhibhyo varivaḥ kṛṇotu ||

10.043.01a achā ma indram matayaḥ svarvidaḥ sadhrīcīr viśvā uśatīr anūṣata |
10.043.01c pari ṣvajante janayo yathā patim maryam na śundhyum maghavānam ūtaye ||
10.043.02a na ghā tvadrig apa veti me manas tve it kāmam puruhūta śiśraya |
10.043.02c rājeva dasma ni ṣado 'dhi barhiṣy asmin su some 'vapānam astu te ||
10.043.03a viśūvṛd indro amater uta kṣudhaḥ sa id rāyo maghavā vasva īśate |
10.043.03c tasyed ime pravaṇe sapta sindhavo vayo vardhanti vṛṣabhasya śuṣmiṇaḥ ||
10.043.04a vayo na vṛkṣam supalāsam āśadan somāsa indram mandinaś camūśadaḥ |
10.043.04c praiśām anikam śavasā davidyutad vidat svar manave jyotir āryam ||
10.043.05a kṛtam na śvaghni vi cinoti devane samvargam yan maghavā sūryam jayat |
10.043.05c na tat te anyo anu vīryam śakan na purāṇo maghavan nota nūtanāḥ ||
10.043.06a viśam-viśam maghavā pary aśāyata janānām dhenā avacākaśad vṛṣā |
10.043.06c yasyāha śakraḥ savaneṣu raṇyati sa tivrāiḥ somaiḥ sahate pṛtanyataḥ ||
10.043.07a āpo na sindhum abhi yat samakṣaran somāsa indram kulyā iva hradam |
10.043.07c vardhanti viprā maho asya sādane yavam na vṛṣṭir divyena dānunā ||

10.043.08a vṛṣā na kruddhaḥ patayad rajassv ā yo aryapatnīr akṛṇod imā apaḥ |
 10.043.08c sa sunvate maghavā jīradānave 'vindaj jyotir manave haviṣmate ||
 10.043.09a uj jāyatām paraśur jyotiṣā saha bhūyā ṛtasya sudughā purāṇavat |
 10.043.09c vi rocatām aruṣo bhānunā śuciḥ svar ṇa śukraṃ śusucīta satpatiḥ ||
 10.043.10a gobhiṣ ṭaremāmatim durevām yavena kṣudham puruhūta viśvām |
 10.043.10c vyaṃ rājabhiḥ prathamā dhanāny asmākena vṛjanenā jayema ||
 10.043.11a bṛhaspatir naḥ pari pātu paścād utottarasmād adharād aghāyoḥ |
 10.043.11c indraḥ purastād uta madhyato naḥ sakhā sakhibhyo varivaḥ kṛṇotu ||

10.044.01a ā yātv indraḥ svapatir madāya yo dharmanā tūtujānas tuviṣmān |
 10.044.01c pratvakṣāno ati viśvā sahāṃsy apāreṇa mahatā vṛṣnyena ||
 10.044.02a suṣṭhāmā rathaḥ suyamā harī te mimyakṣa vajro nṛpate gabhastau |
 10.044.02c śībhaṃ rājan supathā yāhy arvān vardhāma te papuṣo vṛṣnyāni ||
 10.044.03a endravāho nṛpatim vajrabāhum ugram ugrāsas taviṣāsa enam |
 10.044.03c pratvakṣasam vṛṣabhaṃ satyaśuṣmam em asmatrā sadhamādo vahantu ||
 10.044.04a evā patim droṇasācam sacetasam ūrja skambhaṃ dharuṇa ā vṛṣāyase |
 10.044.04c ojaḥ kṛṣva sam gṛbhāya tve apy aso yathā kenipānām ino vṛdhe ||
 10.044.05a gamann asme vasūny ā hi śaṃsiṣam svāsiṣam bharam ā yāhi sominaḥ |
 10.044.05c tvam īsiṣe sāsminn ā satsi barhiṣy anādhrṣyā tava pātrāṇi dharmanā ||
 10.044.06a pṛthak prāyan prathamā devahūtayo 'kṛṇvata śravasyāni duṣṭarā |
 10.044.06c na ye śekur yajñiyām nāvam āruham īrmaiva te ny avisanta kepayaḥ ||
 10.044.07a evaivāpāg apare santu dūḍhyo 'śvā yeṣām duryuja āyuyujre |
 10.044.07c itthā ye prāg upare santi dāvane purūṇi yatra vayunāni bhojanā ||
 10.044.08a giriṃr ajrān rejamānām adhārayad dyauḥ krandaḥ antarikṣāni kopayat |
 10.044.08c samīcīne dhiṣaṇe vi śkabhāyati vṛṣṇaḥ pītvā mada ukthāni śaṃsati ||
 10.044.09a imam bibharmi sukṛtaṃ te ankuṣam yenārujāsi maghavañ chaphārujaḥ |
 10.044.09c asmin su te savane astv okyam suta iṣṭau maghavan bodhy ābhagaḥ ||
 10.044.10a gobhiṣ ṭaremāmatim durevām yavena kṣudham puruhūta viśvām |
 10.044.10c vyaṃ rājabhiḥ prathamā dhanāny asmākena vṛjanenā jayema ||
 10.044.11a bṛhaspatir naḥ pari pātu paścād utottarasmād adharād aghāyoḥ |
 10.044.11c indraḥ purastād uta madhyato naḥ sakhā sakhibhyo varivaḥ kṛṇotu ||

10.045.01a divas pari prathamam jajñe agnir asmad dviṭiyam pari jātavedāḥ |
 10.045.01c tṛṭiyam apsu nṛmanā ajasram indhāna enam jarate svādhiḥ ||
 10.045.02a vidmā te agne tredhā trayāni vidmā te dhāma vibhṛtā purutrā |
 10.045.02c vidmā te nāma paramam guhā yad vidmā tam utsam yata ājagantha ||
 10.045.03a samudre tvā nṛmanā apsv antar nṛcakṣā idhe divo agna ūdhan |
 10.045.03c tṛṭiye tvā rajasi tasthivāmsam apām upasthe mahiṣā avardhan ||
 10.045.04a akrandaḥ agni stanayann iva dyauḥ kṣāmā rerihad vīrudhaḥ samañjan |
 10.045.04c sadyo jajñāno vi hīm iddho akhyad ā rodasī bhānunā bhāty antaḥ ||
 10.045.05a śrīṇām udāro dharuṇo rayīṇām manīṣāṇām prārpaṇaḥ somagopāḥ |
 10.045.05c vasuḥ sūnuḥ sahaso apsu rājā vi bhāty agra uṣasām idhānaḥ ||
 10.045.06a viśvasya ketur bhuvanasya garbha ā rodasī aprṇāj jāyamānaḥ |
 10.045.06c viḍum cid adrim abhinat parāyañ janā yad agnim ayajanta pañca ||
 10.045.07a usīk pāvako aratiḥ sumedhā marteṣv agnir amṛto ni dhāyi |
 10.045.07c iyarti dhūmam aruṣam bharibhrad uc chukreṇa śociṣā dyām inakṣan ||
 10.045.08a drśāno rukma urviyā vy adyaud durmarṣam āyuh śriye rucānaḥ |

- 10.045.08c agnir amṛto abhavad vayobhir yad enam dyaur janayat suretāḥ ||
10.045.09a yas te adya kṛṇavad bhadrāśoce 'pūpaṃ deva ghr̥tavantam agne |
10.045.09c pra taṃ naya prataraṃ vasyo achābhi sumnaṃ devabhaktaṃ yaviṣṭha ||
10.045.10a ā tam bhaja sauśravaseṣv agna uktha-uktha ā bhaja śasyamāne |
10.045.10c priyaḥ sūrye priyo agnā bhavāty uj jātena bhinadaḥ uj janitvaiḥ ||
10.045.11a tvām agne yajamānā anu dyūn viśvā vasu dadhire vāryāni |
10.045.11c tvayā saha draviṇam ichamānā vrajaṃ gomantam uśijo vi vavruḥ ||
10.045.12a astāvya agnir narāṃ suśevo vaiśvānara ṛṣibhiḥ somagopāḥ |
10.045.12c adveṣe dyāvāpṛthivī huvema devā dhatta rayim asme suvīram ||
- 10.046.01a pra hotā jāto mahān nabhovin nṛṣadvā sīdad apām upasthe |
10.046.01c dadhir yo dhāyi sa te vayāmsi yantā vasūni vidhate tanūpāḥ ||
10.046.02a imaṃ vidhanto apām sadhasthe paśuṃ na naṣṭam padair anu gman |
10.046.02c guhā catantam uśijo namobhir ichanto dhīrā bhṛgavo 'vindaṃ ||
10.046.03a imaṃ trito bhūry avindad ichan vaibhūvaso mūrdhany aghnyāyāḥ |
10.046.03c sa śevṛdho jāta ā harmyeṣu nābhīr yuvā bhavati rocanasya ||
10.046.04a mandraṃ hotāram uśijo namobhiḥ prāñcam yajñam netāram adhvarāṇām |
10.046.04c viśām akr̥ṇvann aratim pāvakaṃ havyvāham dadhato mānuṣeṣu ||
10.046.05a pra bhūr jayantam mahāṃ vipodhām mūrā amūram purāṃ darmānam |
10.046.05c nayanto garbham vanām dhiyaṃ dhur hiriśmaśruṃ nārvāṇam dhanarcam ||
10.046.06a ni pastyāsu trita stabhūyan parivīto yonau sīdad antaḥ |
10.046.06c ataḥ samgṛbhyā viśām damūnā vidharmaṇāyantrair iyate nīn ||
10.046.07a asyājarāso damām aritrā arcaddhūmāso agnayaḥ pāvakāḥ |
10.046.07c śviticayaḥ śvātrāso bhuraṇyavo vanarṣado vāyavo na somāḥ ||
10.046.08a pra jihvayā bharate vepo agniḥ pra vayunāni cetasā pṛthivyāḥ |
10.046.08c tam āyavaḥ śucayantam pāvakaṃ mandraṃ hotāram dadhire yajīṣṭham ||
10.046.09a dyāvā yam agnim pṛthivī janiṣṭām āpas tvaṣṭā bhṛgavo yaṃ sahoḥbhiḥ |
10.046.09c īdenyam prathamam mātariśvā devās tatakṣur manave yajatram ||
10.046.10a yaṃ tvā devā dadhire havyvāham puruspr̥ho mānuṣāso yajatram |
10.046.10c sa yāmann agne stuvate vayo dhāḥ pra devayan yaśasaḥ sam hi pūrvīḥ ||
- 10.047.01a jagṛbhmā te dakṣiṇam indra hastam vasūyavo vasupate vasūnām |
10.047.01c vidmā hi tvā gopatiṃ sūra gonām asmabhyam citram vṛṣaṇam rayiṃ dāḥ ||
10.047.02a svāyudham svavasam sunītham catuḥsamudram dharuṇam rayiṇām |
10.047.02c carakṛtyam śamsyam bhūrivāram asmabhyam citram vṛṣaṇam rayiṃ dāḥ ||
10.047.03a subrahmaṇam devavantam bṛhantam uruṃ gabhīram pṛthubudhnam indra |
10.047.03c śrutaṛṣim ugram abhimātiśāham asmabhyam citram vṛṣaṇam rayiṃ dāḥ ||
10.047.04a sanadvājam vipravīram tarutraṃ dhanaspr̥tam śūsuvāmsam sudakṣam |
10.047.04c dasyuhanam pūrbhidam indra satyam asmabhyam citram vṛṣaṇam rayiṃ dāḥ ||
10.047.05a aśvāvantam rathinam vīravantam sahasriṇam śatinam vājam indra |
10.047.05c bhadravrātam vipravīram svarṣām asmabhyam citram vṛṣaṇam rayiṃ dāḥ ||
10.047.06a pra saptagum ṛtadhītiṃ sumedhām bṛhaspatim matir achā jigāti |
10.047.06c ya āngiraso namasopasadyo 'smabhyam citram vṛṣaṇam rayiṃ dāḥ ||
10.047.07a vanivāno mama dūtāsa indram stomāś caranti sumatir iyānāḥ |
10.047.07c hṛdispr̥so manasā vacyamānā asmabhyam citram vṛṣaṇam rayiṃ dāḥ ||
10.047.08a yat tvā yāmi daddhi tan na indra bṛhantam kṣayam asamam janānām |
10.047.08c abhi tad dyāvāpṛthivī gr̥ṇitām asmabhyam citram vṛṣaṇam rayiṃ dāḥ ||

10.048.01a aham bhuvam vasunah pūrvyas patir aham dhanāni sam jayāmi śāsvatāḥ |
 10.048.01c mām havante pitaram na jantavo 'ham dāsuse vi bhajāmi bhojanam ||
 10.048.02a aham indro rodho vakṣo atharvaṇas tritāya gā ajanayam aher adhi |
 10.048.02c aham dasyubhyaḥ pari nrmṇam ā dade gotrā śikṣan dadhice mātariśvane ||
 10.048.03a mahyam tvaṣṭā vajram atakṣad āyasam mayi devāso 'vṛjann api kratum |
 10.048.03c mamānikam sūryasyeva duṣṭaram mām āryanti kṛtena kartvena ca ||
 10.048.04a aham etaṃ gavyayam aśvyam paśum puriṣiṇam sāyakenā hiraṇyayam |
 10.048.04c purū sahasrā ni śīsāmi dāsuse yan mā somāsa ukthino amandiṣuḥ ||
 10.048.05a aham indro na parā jigya id dhanam na mṛtyave 'va tasthe kadā cana |
 10.048.05c somam in mā sunvanto yācatā vasu na me pūravaḥ sakhye riṣāthana ||
 10.048.06a aham etāñ chāsvasato dvā-dvendram ye vajram yudhaye 'kṛṇvata |
 10.048.06c āhvayamānām̐ ava hanmanāhanam dṛdhā vadann anamasyur namasvinaḥ ||
 10.048.07a abhīdam ekam eko asmi niṣṣāḍ abhī dvā kim u trayāḥ karanti |
 10.048.07c khale na parṣān prati hanmi bhūri kim mā nindanti śatravo 'nindrāḥ ||
 10.048.08a aham guṅgubhyo atithigvam iṣkaram iṣam na vṛtraturam vikṣu dhārayam |
 10.048.08c yat parṇayaghna uta vā karañjahe prāham mahe vṛtrahatye aśuśravi ||
 10.048.09a pra me namī sāpya iṣe bhujē bhūd gavām eṣe sakhyā kṛṇuta dvitā |
 10.048.09c didyūṃ yad asya samitheṣu maṃhayam ād id enaṃ śamsyam ukthyam karam ||
 10.048.10a pra nemasmin dadṛṣe somo antar gopā nemam āvir asthā kṛṇoti |
 10.048.10c sa tigmaśṛṅgam vṛṣabham yuyutsan druhas tasthau bahule baddho antaḥ ||
 10.048.11a ādityānām vasūnām rudriyāṇām devo devānām na mināmi dhāma |
 10.048.11c te mā bhadrāya śavase tatakṣur aparājitam aśṛtam aśāḍham ||

10.049.01a aham dām gṛṇate pūrvyam vasv aham brahma kṛṇavam mahyam vardhanam |
 10.049.01c aham bhuvam yajamānasya coditāyajvanaḥ sākṣi viśvasmin bhare ||
 10.049.02a mām dhur indram nāma devatā divas ca gmaś cāpām ca jantavaḥ |
 10.049.02c aham harī vṛṣaṇā vivratā raghū aham vajram śavase dhṛṣṇv ā dade ||
 10.049.03a aham atkam kavaye śisnatham hathair aham kutsam āvam ābhir ūtibhiḥ |
 10.049.03c aham śuṣṇasya śnathitā vadhar yamaṃ na yo rara āryam nāma dasyave ||
 10.049.04a aham piteva vetasūmr abhiṣṭaye tugram kutsāya smadibham ca randhayam |
 10.049.04c aham bhuvam yajamānasya rājani pra yad bhare tujaye na priyādhṛṣe ||
 10.049.05a aham randhayam mṛgayam śrutarvaṇe yan mājihīta vayunā canānuṣak |
 10.049.05c aham veśam namram āyave 'karam aham savyāya paḍgṛbhim arandhayam ||
 10.049.06a aham sa yo navavāstvam bṛhadratham sam vṛtreva dāsam vṛtrahārujam |
 10.049.06c yad vardhayantam prathayantam ānuṣag dūre pāre rajaso rocanākaram ||
 10.049.07a aham sūryasya pari yāmy āśubhiḥ praitaśebhir vahamāna ojasā |
 10.049.07c yan mā sāvo manuṣa āha nirṇija ṛdhak kṛṣe dāsam kṛtvyam hathaiḥ ||
 10.049.08a aham saptahā nahuṣo nahuṣtaraḥ prāśrāvayam śavasā turvaśam yadum |
 10.049.08c aham ny anyam sahasā sahas karam nava vrādhato navatiṃ ca vakṣayam ||
 10.049.09a aham sapta sravato dhārayam vṛṣā dravitnvaḥ pṛthivyām sirā adhi |
 10.049.09c aham arṇāmsi vi tirāmi sukatur yudhā vidam manave gātum iṣṭaye ||
 10.049.10a aham tad āsu dhārayam yad āsu na devas cana tvaṣṭādhārayad ruśat |
 10.049.10c spārham gavām ūdhassu vakṣaṇāsv ā madhor madhu śvātryam somam āśiram ||
 10.049.11a evā devām̐ indro vivye nṛṇ pra cyautnena maghavā satyarādhāḥ |
 10.049.11c viśvet tā te harivaḥ śacīvo 'bhi turāsaḥ svayaśo gṛṇanti ||

10.050.01a pra vo mahe mandamānāyāndhaso 'rcā viśvānarāya viśvābhuvē |
 10.050.01c indrasya yasya sumakhaṃ saho mahi śravo nṛmṇaṃ ca rodasī saparyataḥ ||
 10.050.02a so cin nu sakhyā narya ina stutaś carkr̥tya indro māvate nare |
 10.050.02c viśvāsu dhūr̥ṣu vājakṛtyeṣu satpate vṛtre vāpsv abhi śūra mandase ||
 10.050.03a ke te nara indra ye ta iṣe ye te sumnaṃ sadhanyam iyakṣān |
 10.050.03c ke te vājāyāsuryāya hinvire ke apsu svāsūrvarāsu paṃsye ||
 10.050.04a bhuvā tvam indra brahmaṇā mahān bhuvō viśveṣu savaneṣu yajñīyaḥ |
 10.050.04c bhuvō nṛm̄ś cyautno viśvasmin bhare jyeṣṭhaś ca mantra viśvacarṣaṇe ||
 10.050.05a avā nu kaṃ jyāyān yajñāvanaso mahīm ta omātrām kṛṣṭayo viduḥ |
 10.050.05c aso nu kam ajaro vardhāś ca viśved etā savanā tūtumā kṛṣe ||
 10.050.06a etā viśvā savanā tūtumā kṛṣe svayaṃ sūno sahaso yāni dadhiṣe |
 10.050.06c varāya te pātraṃ dharmaṇe tanā yajño mantra brahmodyataṃ vacaḥ ||
 10.050.07a ye te vipra brahmakṛtaḥ sute sacā vasūnām ca vasunaś ca dāvane |
 10.050.07c pra te sumnasya manasā pathā bhuvan made sutasya somyasyāndhasaḥ ||

10.051.01a mahat tad ulbaṃ sthāviraṃ tad āsīd yenāviṣṭitaḥ praviveṣithāpaḥ |
 10.051.01c viśvā apaśyad bahudhā te agne jātavedas tanvo deva ekaḥ ||
 10.051.02a ko mā dadarśa katamaḥ sa devo yo me tanvo bahudhā paryapaśyat |
 10.051.02c kvāha mitrāvaruṇā kṣiyanty agner viśvāḥ samidho devayāniḥ ||
 10.051.03a aichāma tvā bahudhā jātavedaḥ praviṣṭam agne apsv oṣadhīṣu |
 10.051.03c taṃ tvā yamo acikec citrabhāno daśāntaruṣyād atirocamānam ||
 10.051.04a hotrād ahaṃ varuṇa bibhyad āyaṃ ned eva mā yunajann atra devāḥ |
 10.051.04c tasya me tanvo bahudhā niviṣṭā etam arthaṃ na ciketāham agniḥ ||
 10.051.05a ehi manur devayur yajñakāmo 'raṃkr̥tyā tamasi kṣeṣy agne |
 10.051.05c sugān pathaḥ kṛṇuhi devayānān vaha havyāni sumanasyamānaḥ ||
 10.051.06a agneḥ pūrve bhrātaro artham etaṃ rathivādhvānam anv āvarīvuḥ |
 10.051.06c tasmād bhīyā varuṇa dūram āyaṃ gauro na kṣepnor avije jyāyāḥ ||
 10.051.07a kurmas ta āyur ajaraṃ yad agne yathā yukto jātavedo na riṣyāḥ |
 10.051.07c athā vahāsi sumanasyamāno bhāgaṃ devebhyo haviṣaḥ sujāta ||
 10.051.08a prayājān me anuyājāms ca kevalān ūrjasvantaṃ haviṣo datta bhāgam |
 10.051.08c ghr̥taṃ cāpām puruṣaṃ cauśadhīnām agneś ca dīrgham āyur astu devāḥ ||
 10.051.09a tava prayājā anuyājās ca kevala ūrjasvanto haviṣaḥ santu bhāgāḥ |
 10.051.09c tavāgne yajño 'yam astu sarvas tubhyaṃ namantām pradīśaś catasraḥ ||

10.052.01a viśve devāḥ śāstana mā yatheha hotā vṛto manavai yan niṣadya |
 10.052.01c pra me brūta bhāgadheyam yathā vo yena pathā havyam ā vo vahāni ||
 10.052.02a ahaṃ hotā ny asīdam yajīyān viśve devā maruto mā junanti |
 10.052.02c ahar-ahar aśvinādhvaryavaṃ vām brahmā samid bhavati sāhutir vām ||
 10.052.03a ayaṃ yo hotā kir u sa yamasya kam apy ūhe yat samañjanti devāḥ |
 10.052.03c ahar-ahar jāyate māsi-māsy athā devā dadhire havyavāham ||
 10.052.04a māṃ devā dadhire havyavāham apamluktam bahu kṛchrā carantam |
 10.052.04c agnir vidvān yajñam naḥ kalpayāti pañcayāmaṃ trivṛtaṃ saptatantum ||
 10.052.05a ā vo yakṣy amṛtatvaṃ suvīraṃ yathā vo devā varivaḥ karāni |
 10.052.05c ā bāhvor vajram indrasya dheyām athemā viśvāḥ pṛtanā jayāti ||
 10.052.06a trīṇi śatā trī sahasrāṇy agniṃ trimśac ca devā nava cāsaparyan |
 10.052.06c aukṣan ghr̥tair astr̥ṇan barhir asmā ād id dhotāraṃ ny asādayanta ||

10.053.01a yam aichāma manasā so 'yam āgād yajñasya vidvān paruṣas cikitvān |
 10.053.01c sa no yakṣad devatātā yajīyān ni hi ṣatsad antaraḥ pūrvo asmat ||
 10.053.02a arādhi hotā niṣadā yajīyān abhi prayāmsi sudhitāni hi khyat |
 10.053.02c yajāmahai yajñīyān hanta devāṃ idāmahā idyāṃ ājyena ||
 10.053.03a sādhvīm akar devavītiṃ no adya yajñasya jihvām avidāma guhyām |
 10.053.03c sa āyur āgāt surabhir vasāno bhadrām akar devahūtiṃ no adya ||
 10.053.04a tad adya vācaḥ prathamam masīya yenāsurāṃ abhi devā asāma |
 10.053.04c ūrjāda uta yajñīyāsaḥ pañca janā mama hotraṃ juṣadhvam ||
 10.053.05a pañca janā mama hotraṃ juṣantāṃ gojātā uta ye yajñīyāsaḥ |
 10.053.05c pṛthivī naḥ pāṛthivāt pātv aṃhaso 'ntarikṣaṃ divyāt pātv asmān ||
 10.053.06a tantuṃ tanvan rajaso bhānum anv ihi jyotiṣmataḥ patho rakṣa dhiyā kṛtān |
 10.053.06c anulbaṇaṃ vayata joguvām apo manur bhava janayā daivyaṃ janam ||
 10.053.07a akṣānaho nahyatanota somyā iṣkṛṇudhvaṃ raśanā ota piṃsata |
 10.053.07c aṣṭāvandhuraṃ vahatābhito rathaṃ yena devāso anayann abhi priyam ||
 10.053.08a aśmanvati riyate saṃ rabhadhvam ut tiṣṭhata pra taratā sakhāyaḥ |
 10.053.08c atrā jahāma ye asann asevāḥ śivān vayam ut taremābhi vājān ||
 10.053.09a tvaṣṭā māyā ved apasām apastamo bibhrat pātrā devapānāni śaṃtamā |
 10.053.09c śīśite nūnam paraśuṃ svāyasaṃ yena vṛścād etaśo brahmaṇas patiḥ ||
 10.053.10a sato nūnaṃ kavayaḥ saṃ śīśita vāsībhir yābhir amṛtāya takṣatha |
 10.053.10c vidvāṃsaḥ padā guhyāni kartana yena devāso amṛtatvam ānaśuḥ ||
 10.053.11a garbhe yoṣām adadhur vatsam āsany apīcyena manasota jihvayā |
 10.053.11c sa viśvāhā sumanā yogyā abhi siṣāsānir vanate kāra ij jitim ||

10.054.01a tāṃ su te kīrtim maghavan mahitvā yat tvā bhīte rodasī ahvayetām |
 10.054.01c prāvo devāṃ ātiro dāsam ojaḥ prajāyai tvasyai yad aśikṣa indra ||
 10.054.02a yad acaras tanvā vāvṛdhāno balānindra prabruvāṇo janeṣu |
 10.054.02c māyet sā te yāni yuddhāny āhur nādya śatruṃ nanu purā vivitse ||
 10.054.03a ka u nu te mahimanaḥ samasyāsmat pūrva ṛṣayo 'ntam āpuḥ |
 10.054.03c yan mātaraṃ ca pitaraṃ ca sākam ajanayathās tanvaḥ svāyāḥ ||
 10.054.04a catvāri te asuryāni nāmādābhyāni mahiṣasya santi |
 10.054.04c tvam aṅga tāni viśvāni vitse yebhiḥ karmāni maghavañ cakartha ||
 10.054.05a tvaṃ viśvā dadhiṣe kevalāni yāny āvir yā ca guhā vasūni |
 10.054.05c kāmam in me maghavan mā vi tāris tvam ājñātā tvam indrāsi dātā ||
 10.054.06a yo adadhāj jyotiṣi jyotir antar yo aṣṛjan madhunā sam madhūni |
 10.054.06c adha priyaṃ sūṣam indrāya manma brahmakṛto bṛhadukthād avāci ||

10.055.01a dūre tan nāma guhyam parācair yat tvā bhīte ahvayetām vayodhai |
 10.055.01c ud astabhnāḥ pṛthivīm dyām abhīke bhrātuḥ putrān maghavan titviṣānaḥ ||
 10.055.02a mahat tan nāma guhyam puruṣṛg yena bhūtaṃ janayo yena bhavyam |
 10.055.02c pratnaṃ jātaṃ jyotir yad asya priyam priyāḥ sam avīśanta pañca ||
 10.055.03a ā rodasī aprṇād ota madhyam pañca devāṃ ṛtuśaḥ sapta-sapta |
 10.055.03c catustriṃśatā purudhā vi caṣṭe sarūpeṇa jyotiṣā vivratena ||
 10.055.04a yad uṣa auchaḥ prathamā vibhānām ajanayo yena puṣṭasya puṣṭam |
 10.055.04c yat te jāmitvam avaram parasyā mahan mahatyā asuratvam ekam ||
 10.055.05a vidhuṃ dadrāṇaṃ samane bahūnāṃ yuvānaṃ santam palito jagāra |

10.055.05c devasya paśya kāvyam mahitvādyā mamāra sa hyaḥ sam āna ḥ
10.055.06a śākmanā śāko aruṇaḥ suparṇa ā yo mahaḥ śūraḥ sanād anīḍaḥ ḥ
10.055.06c yac ciketa satyam it tan na moghaṃ vasu spārham uta jetota dātā ḥ
10.055.07a aibhir dade vṛṣṇyā paumśyāni yebhir aukṣad vṛtrahatyāya vajrī ḥ
10.055.07c ye karmaṇaḥ kriyamāṇasya mahna ṛtekarmam udajāyanta devāḥ ḥ
10.055.08a yujā karmāṇi janayan viśvaujā aśastihā viśvamanās turāṣāḥ ḥ
10.055.08c pītvī somasya diva ā vṛdhānaḥ śūro nir yudhādhamad dasyūn ḥ

10.056.01a idaṃ ta ekam para ū ta ekam ṛtīyena jyotiṣā saṃ viśasva ḥ
10.056.01c saṃveśane tanvaś cārur edhi priyo devānām parame janitre ḥ
10.056.02a tanūṣ ṭe vājin tanvaṃ nayantī vāmam asmabhyaṃ dhātu śarma tubhyam ḥ
10.056.02c ahruto maho dharuṇāya devān divīva jyotiḥ svam ā mimiyāḥ ḥ
10.056.03a vājy asi vājinenā suvenīḥ suvita stomaṃ suvito divaṃ gāḥ ḥ
10.056.03c suvito dharmā prathamānu satyā suvito devān suvito 'nu patma ḥ
10.056.04a mahimna eṣām pitaraś caneśire devā deveṣv adadhur api kratum ḥ
10.056.04c sam avivyacur uta yāny atviṣur aiṣām tanūṣu ni viviśuḥ punaḥ ḥ
10.056.05a saḥobhir viśvam pari cakramū rajaḥ pūrvā dhāmāny amitā mimānāḥ ḥ
10.056.05c tanūṣu viśvā bhuvanā ni yemire prāsārayanta purudha prajā anu ḥ
10.056.06a dvidhā sūnavo 'suram svarvidam āsthāpayanta ṛtīyena karmaṇā ḥ
10.056.06c svām prajāṃ pitaraḥ pitryaṃ saha āvareṣv adadhus tantum ātatam ḥ
10.056.07a nāvā na kṣodaḥ pradiśaḥ pṛthivyāḥ svastibhir ati durgāṇi viśvā ḥ
10.056.07c svām prajāṃ bṛhaduktho mahitvāvareṣv adadhād ā pareṣu ḥ

10.057.01a mā pra gāma patho vayam mā yajñād indra sominaḥ ḥ
10.057.01c mānta sthur no arātayaḥ ḥ
10.057.02a yo yajñasya prasādhanas tantur deveṣv ātataḥ ḥ
10.057.02c tam āhutaṃ naśimahi ḥ
10.057.03a mano nv ā huvāmahe nārāsaṃsena somena ḥ
10.057.03c pitṛṇām ca manmabhiḥ ḥ
10.057.04a ā ta etu manaḥ punaḥ kratve dakṣāya jīvase ḥ
10.057.04c jyok ca sūryaṃ dṛśe ḥ
10.057.05a punar naḥ pitaro mano dadātu daivyo janaḥ ḥ
10.057.05c jīvaṃ vrātaṃ sacemahi ḥ
10.057.06a vayam soma vrata tava manas tanūṣu bibhrataḥ ḥ
10.057.06c prajāvantaḥ sacemahi ḥ

10.058.01a yat te yamaṃ vaivasvatam mano jagāma dūrakam ḥ
10.058.01c tat ta ā vartayāmasiha kṣayāya jīvase ḥ
10.058.02a yat te divaṃ yat pṛthivīm mano jagāma dūrakam ḥ
10.058.02c tat ta ā vartayāmasiha kṣayāya jīvase ḥ
10.058.03a yat te bhūmiṃ caturbhṛṣṭim mano jagāma dūrakam ḥ
10.058.03c tat ta ā vartayāmasiha kṣayāya jīvase ḥ
10.058.04a yat te catasraḥ pradiśo mano jagāma dūrakam ḥ
10.058.04c tat ta ā vartayāmasiha kṣayāya jīvase ḥ
10.058.05a yat te samudram arṇavam mano jagāma dūrakam ḥ
10.058.05c tat ta ā vartayāmasiha kṣayāya jīvase ḥ

10.058.06a yat te marīciḥ pravato mano jagāma dūrakam |
 10.058.06c tat ta ā vartayāmasiḥa kṣayāya jīvase ||
 10.058.07a yat te apo yad oṣadhīr mano jagāma dūrakam |
 10.058.07c tat ta ā vartayāmasiḥa kṣayāya jīvase ||
 10.058.08a yat te sūryam yad uṣasam mano jagāma dūrakam |
 10.058.08c tat ta ā vartayāmasiḥa kṣayāya jīvase ||
 10.058.09a yat te parvatān bṛhato mano jagāma dūrakam |
 10.058.09c tat ta ā vartayāmasiḥa kṣayāya jīvase ||
 10.058.10a yat te viśvam idaṃ jagan mano jagāma dūrakam |
 10.058.10c tat ta ā vartayāmasiḥa kṣayāya jīvase ||
 10.058.11a yat te parāḥ parāvato mano jagāma dūrakam |
 10.058.11c tat ta ā vartayāmasiḥa kṣayāya jīvase ||
 10.058.12a yat te bhūtaṃ ca bhavyaṃ ca mano jagāma dūrakam |
 10.058.12c tat ta ā vartayāmasiḥa kṣayāya jīvase ||

10.059.01a pra tāry āyuh pratarāṃ navīya sthātāreva kratumatā rathasya |
 10.059.01c adha cyavāna ut tavīty artham parātaraṃ su nirṛtir jihītām ||
 10.059.02a sāman nu rāye nidhiman nv annaṃ karāmahe su purudha śravāṃsi |
 10.059.02c tā no viśvāni jaritā mamattu parātaraṃ su nirṛtir jihītām ||
 10.059.03a abhī śv aryaḥ paumsyair bhavema dyaur na bhūmiṃ girayo nājrān |
 10.059.03c tā no viśvāni jaritā ciketa parātaraṃ su nirṛtir jihītām ||
 10.059.04a mo ṣu naḥ soma mṛtyave parā dāḥ paśyema nu sūryam uccarantam |
 10.059.04c dyubhir hito jarimā sū no astu parātaraṃ su nirṛtir jihītām ||
 10.059.05a asunīte mano asmāsu dhārāya jīvātave su pra tirā na āyuh |
 10.059.05c rārandhi naḥ sūryasya samdṛśi ghṛtena tvam tanvaṃ vardhayasva ||
 10.059.06a asunīte punar asmāsu cakṣuh punaḥ prāṇam iha no dhehi bhogam |
 10.059.06c jyok paśyema sūryam uccarantam anumate mṛḍayā naḥ svasti ||
 10.059.07a punar no asum pṛthivi dadātu punar dyaur devī punar antarikṣam |
 10.059.07c punar naḥ somas tanvaṃ dadātu punaḥ pūṣā pathyāṃ yā svastiḥ ||
 10.059.08a śaṃ rodasī subandhave yāvī ṛtasya mātārā |
 10.059.08c bharatām apa yad rapo dyauh pṛthivi kṣamā rapo mo ṣu te kiṃ canāmamat ||
 10.059.09a ava dvake ava trikā divaś caranti bheṣajā |
 10.059.09c kṣamā cariṣṇv ekakam bharatām apa yad rapo dyauh pṛthivi kṣamā rapo mo ṣu
 te kiṃ canāmamat ||
 10.059.10a sam indreraya gām anaḍvāhaṃ ya āvahad uśīnarāṇyā anaḥ |
 10.059.10c bharatām apa yad rapo dyauh pṛthivi kṣamā rapo mo ṣu te kiṃ canāmamat ||

10.060.01a ā janam tveṣasamdṛśam mähinānām upastutam |
 10.060.01c aganma bibhrato namaḥ ||
 10.060.02a asamātiṃ nitośanam tveṣam niyayinaṃ ratham |
 10.060.02c bhajerathasya satpatim ||
 10.060.03a yo janān mahiṣāṃ ivātistasthau pavīravān |
 10.060.03c utāpavīravān yudhā ||
 10.060.04a yasyekṣvākur upa vrāte revān marāyy edhate |
 10.060.04c divīva pañca kṛṣṭayaḥ ||
 10.060.05a indra kṣatrāsamātiṣu rathaproṣṭheṣu dhārāya |
 10.060.05c divīva sūryam dṛśe ||

- 10.060.06a agastyasya nadbhyaḥ saptī yunakṣi rohitā |
 10.060.06c paṇīn ny akramīr abhi viśvān rājann arādhasaḥ ||
 10.060.07a ayam mātāyam pitāyaṃ jīvātur āgamat |
 10.060.07c idam tava prasarpaṇaṃ subandhav ehi nir ihi ||
 10.060.08a yathā yugaṃ varatrayā nahyanti dharuṇāya kam |
 10.060.08c evā dādhāra te mano jīvātave na mṛtyave 'tho ariṣṭatātaye ||
 10.060.09a yatheyam pṛthivī mahī dādhāremān vanaspatīn |
 10.060.09c evā dādhāra te mano jīvātave na mṛtyave 'tho ariṣṭatātaye ||
 10.060.10a yamād ahaṃ vaivasvatāt subandhor mana ābharam |
 10.060.10c jīvātave na mṛtyave 'tho ariṣṭatātaye ||
 10.060.11a nyag vāto 'va vāti nyak tapati sūryaḥ |
 10.060.11c nīcinam aghnyā duhe nyag bhavatu te rapaḥ ||
 10.060.12a ayam me hasto bhagavān ayam me bhagavattaraḥ |
 10.060.12c ayam me viśvabheṣajo 'yaṃ śivābhimarśanaḥ ||
- 10.061.01a idam itthā raudraṃ gūrtavacā brahma kratvā śacyām antar ājau |
 10.061.01c krāṇā yad asya pitarā mamhaneṣṭhāḥ parṣat pakthe ahan ā sapta hotīn ||
 10.061.02a sa id dānāya dabhyāya vanvañ cyavānaḥ sūdair amimīta vedim |
 10.061.02c tūrvayāṇo gūrtavacastamaḥ kṣodo na reta itaūti siñcat ||
 10.061.03a mano na yeṣu havaneṣu tigmaṃ vipaḥ śacyā vanutho dravantā |
 10.061.03c ā yaḥ śaryābhis tuvinṛmṇo asyāsrīṇītādīsaṃ gabhastau ||
 10.061.04a kṛṣṇā yad goṣv aruṇiṣu sīdad divo napātāśvinā huve vām |
 10.061.04c vītam me yajñam ā gatam me annaṃ vavanvāmsā neṣam asmṛtadhrū ||
 10.061.05a prathiṣṭa yasya vīrakarmam iṣṇad anuṣṭhitam nu naryo apauhat |
 10.061.05c punas tad ā vṛhati yat kanāyā duhitur ā anubhṛtam anarvā ||
 10.061.06a madhyā yat kartvam abhavad abhīke kāmam kṛṇvāne pitari yuvatyām |
 10.061.06c manānag reto jahatur viyantā sānau niṣiktaṃ sukṛtasya yonau ||
 10.061.07a pitā yat svām duhitaram adhiṣkan kṣmayā retaḥ samjagmāno ni ṣiñcat |
 10.061.07c svādhyo 'janayan brahma devā vāstoṣ patiṃ vratapām nir atakṣan ||
 10.061.08a sa im vṛṣā na phenam asyad ājau smad ā paraid apa dabhracetāḥ |
 10.061.08c sarat padā na dakṣiṇā parāvṛṇ na tā nu me pṛsanyo jagṛbhre ||
 10.061.09a makṣū na vahniḥ prajāyā upabdir agniṃ na nagna upa sīdad ūdhaḥ |
 10.061.09c sanitedhmaṃ sanitota vājam sa dhartā jajñe sahasā yavīyut ||
 10.061.10a makṣū kanāyāḥ sakhyam navagvā ṛtam vadanta ṛtayuktim agman |
 10.061.10c dvibarhaso ya upa gopam āgur adakṣiṇāso acyutā duduḥṣan ||
 10.061.11a makṣū kanāyāḥ sakhyam navīyo rādho na reta ṛtam it turanyan |
 10.061.11c śuci yat te rekṇa āyajanta sabardughāyāḥ paya usriyāyāḥ ||
 10.061.12a paśvā yat paścā viyutā budhanteti bravīti vaktarī rarāṇaḥ |
 10.061.12c vasor vasutvā kāravo 'nehā viśvam viveṣṭi draviṇam upa kṣu ||
 10.061.13a tad in nv asya pariṣadvāno agman purū sadanto nārṣadam bibhitsan |
 10.061.13c vi śuṣṇasya samgrathitam anarvā vidat puruprajātasya guhā yat ||
 10.061.14a bhargo ha nāmota yasya devāḥ svar ṇa ye triṣadhasthe niṣeduḥ |
 10.061.14c agnir ha nāmota jātavedāḥ śrudhī no hotar ṛtasya hotādhruk ||
 10.061.15a uta tyā me raudrāv arcimantā nāsatyāv indra gūrtaye yajadhyai |
 10.061.15c manuṣvad vṛktabarhiṣe rarāṇā mandū hitaprayasā vikṣu yajyū ||
 10.061.16a ayam stuto rājā vandi vedhā apaś ca vipras tarati svasetuḥ |
 10.061.16c sa kākṣivantaṃ rejayat so agniṃ nemiṃ na cakram arvato raghudru ||
 10.061.17a sa dvibandhur vaitaraṇo yaṣṭā sabardhum dhenum asvam duhadhyai |

10.061.17c sam yan mitravarunā vṛñja ukthair jyeṣṭhebhīr aryamaṇaṃ varūthaiḥ ||
 10.061.18a tadbandhuḥ sūrir divi te dhiyaṃdhā nābhānediṣṭho rapati pra venan |
 10.061.18c sā no nābhiḥ paramāsyā vā ghāhaṃ tat paścā katithas cid āsa ||
 10.061.19a iyam me nābhīr iha me sadhastham ime me devā ayam asmi sarvaḥ |
 10.061.19c dvijā aha prathamajā ṛtasyedaṃ dhenur aduhaj jāyamānā ||
 10.061.20a adhāsu mandro aratir vibhāvāva syati dvivartanir vaneṣāt |
 10.061.20c ūrdhvā yac chreṇir na śísur dan makṣū sthiraṃ śevṛdham sūta mātā ||
 10.061.21a adhā gāva upamātiṃ kanāyā anu śvāntasya kasya cit pareyuḥ |
 10.061.21c śrudhi tvam sudraṇo nas tvam yād āsvagnasya vāvṛdhe sūnṛtābhiḥ ||
 10.061.22a adha tvam indra viddhy asmān maho rāye nṛpate vajrabāhuḥ |
 10.061.22c rakṣā ca no maghonaḥ pāhi sūrīn anehasas te harivo abhiṣṭau ||
 10.061.23a adha yad rājānā gaviṣṭau sarat saranyuḥ kārave jaranyuḥ |
 10.061.23c vipraḥ preṣṭhaḥ sa hy eṣām babhūva parā ca vakṣad uta parṣad enān ||
 10.061.24a adhā nv asya jenyasya puṣṭau vṛthā rebhanta īmahe tad ū nu |
 10.061.24c saranyur asya sūnur aśvo vipras cāsi śravasaś ca sātāu ||
 10.061.25a yuvor yadi sakhyāyāsme śardhāya stomaṃ jujuṣe namasvān |
 10.061.25c viśvatra yasminn ā giraḥ samīciḥ pūrvīva gātur dāsat sūnṛtāyai ||
 10.061.26a sa gṛñāno adbhīr devavān iti subandhur namasā sūktaiḥ |
 10.061.26c vardhad ukthair vacobhir ā hi nūnaṃ vy adhvaiti payasa usriyāyāḥ ||
 10.061.27a ta ū ṣu ṇo maho yajatrā bhūta devāsa ūtaye sajoṣāḥ |
 10.061.27c ye vājāṃ anayatā viyanto ye sthā nicetāro amūrāḥ ||

10.062.01a ye yajñena dakṣiṇayā samaktā indrasya sakhyam amṛtatvam ānaśa |
 10.062.01c tebhyo bhadrām āngiraso vo astu prati gṛbhñīta mānavam sumedhasaḥ ||
 10.062.02a ya udājan pitaro gomayam vasv ṛtenābhīndan parivatsare valam |
 10.062.02c dīrghāyutvam āngiraso vo astu prati gṛbhñīta mānavam sumedhasaḥ ||
 10.062.03a ya ṛtena sūryam ārohayan divy aprathayan pṛthivīm mātaram vi |
 10.062.03c suprajāstvam āngiraso vo astu prati gṛbhñīta mānavam sumedhasaḥ ||
 10.062.04a ayam nābhā vadati valgu vo gṛhe devaputrā ṛṣayas tac chṛnotana |
 10.062.04c subrahmaṇyam āngiraso vo astu prati gṛbhñīta mānavam sumedhasaḥ ||
 10.062.05a virūpāsa id ṛṣayas ta id gambhīravepasaḥ |
 10.062.05c te āngirasaḥ sūnavas te agneḥ pari jajñire ||
 10.062.06a ye agneḥ pari jajñire virūpāso divas pari |
 10.062.06c navagvo nu daśagvo āngirastamo sacā deveṣu maṃhate ||
 10.062.07a indreṇa yujā niḥ sṛjanta vāghato vrajam gomantam aśvinam |
 10.062.07c sahasram me dadato aṣṭakarṇyaḥ śravo deveṣv akrata ||
 10.062.08a pra nūnaṃ jāyatām ayam manus tokmeva rohatu |
 10.062.08c yaḥ sahasram śatāśvam sadyo dānāya maṃhate ||
 10.062.09a na tam aśnoti kaś cana diva iva sānv ārabham |
 10.062.09c sāvarṇyasya dakṣiṇā vi sindhur iva paprathe ||
 10.062.10a uta dāsā pariviṣe smaddiṣṭi goparīnasā |
 10.062.10c yadus turvas ca māmahe ||
 10.062.11a sahasradā grāmaṇīr mā riṣan manuḥ sūryeṇāsya yatamānaitu dakṣiṇā |
 10.062.11c sāvarṇer devāḥ pra tirantv āyur yasminn aśrāntā asanāma vājam ||

10.063.01a parāvato ye didhiṣanta āpyam manuprītāso janimā vivasvataḥ |

10.063.01c yayāter ye nahuṣyasya barhiṣi devā āsate te adhi bruvantu naḥ ||
 10.063.02a viśvā hi vo namasyāni vandyā nāmāni devā uta yajñiyāni vaḥ |
 10.063.02c ye stha jātā aditer adbhyas pari ye pṛthivyās te ma iha śrutā havam ||
 10.063.03a yebhyo mātā madhumat pinvate payaḥ pīyūṣaṃ dyaur aditir adribarhāḥ |
 10.063.03c ukthaśuṣmān vṛṣabharān svapnasas tāṃ ādityāṃ anu madā svastaye ||
 10.063.04a nṛcakṣaso animiṣanto arhaṇā bṛhad devāso amṛtatvam ānaśuḥ |
 10.063.04c jyotīrathā ahimāyā anāgaso divo varṣmāṇaṃ vasate svastaye ||
 10.063.05a samrājo ye suvṛdho yajñam āyayur aparihvṛtā dadhire divi kṣayam |
 10.063.05c tāṃ ā vivāsa namasā suvṛktibhir maho ādityāṃ aditiṃ svastaye ||
 10.063.06a ko va stomaṃ rādhati yaṃ jujoṣatha viśve devāso manuṣo yati ṣṭhana |
 10.063.06c ko vo 'dhvaram tuvijātā araṃ karad yo naḥ parśad aty amhaḥ svastaye ||
 10.063.07a yebhyo hotrām prathamām āyeje manuḥ samiddhāgnir manasā sapta hotṛbhiḥ |
 10.063.07c ta ādityā abhayaṃ śarma yachata sugā naḥ karta supathā svastaye ||
 10.063.08a ya īsire bhuvanasya pracetaso viśvasya sthātur jagataś ca mantavaḥ |
 10.063.08c te naḥ kṛtād akṛtād enasas pary adyā devāsaḥ pipṛtā svastaye ||
 10.063.09a bhareṣv indraṃ suhavaṃ havāmahe 'mhomucaṃ sukṛtaṃ daivyam janam |
 10.063.09c agnim mitraṃ varuṇaṃ sātaye bhagaṃ dyāvāpṛthivi marutaḥ svastaye ||
 10.063.10a sutrāmāṇaṃ pṛthiviṃ dyām anehasaṃ suśarmāṇaṃ aditiṃ supraṇitim |
 10.063.10c daiviṃ nāvaṃ svaritrām anāgasam asravanti ā ruhema svastaye ||
 10.063.11a viśve yajatrā adhi vocatotaye trāyadhvaṃ no durevāyā abhihruṭaḥ |
 10.063.11c satyayā vo devahūtyā huvema śṛṇvato devā avase svastaye ||
 10.063.12a apāmivām apa viśvām anāhutim apārātiṃ durvidatrām aghāyataḥ |
 10.063.12c āre devā dveṣo asmad yuyotanoru naḥ śarma yachatā svastaye ||
 10.063.13a ariṣṭaḥ sa marto viśva edhate pra prajābhir jāyate dharmaṇas pari |
 10.063.13c yam ādityāso nayathā sunītibhir ati viśvāni duriṭā svastaye ||
 10.063.14a yaṃ devāso 'vatha vājasātau yaṃ sūrasātā maruto hite dhane |
 10.063.14c prātaryāvāṇaṃ ratham indra sānasim ariṣyantam ā ruhema svastaye ||
 10.063.15a svasti naḥ pathyāsu dhanvasu svasty apsu vṛjane svarvati |
 10.063.15c svasti naḥ putrakṛtheṣu yoniṣu svasti rāye maruto dadhātana ||
 10.063.16a svastir id dhi prapathe śreṣṭhā rekṣasvaty abhi yā vāmam eti |
 10.063.16c sā no amā so araṇe ni pātu svāveśā bhavatu devagopā ||
 10.063.17a evā plateḥ sūnur avivṛdhad vo viśva ādityā adite manīṣi |
 10.063.17c īsānāso naro amartyenāstāvi jano divyo gayena ||

10.064.01a kathā devānām katamasya yāmani sumantu nāma śṛṇvatām manāmahe |
 10.064.01c ko mṛdāti katamo no mayas karat katama ūti abhy ā vavartati ||
 10.064.02a kratūyanti kratavo hṛtsu dhītayo venanti venāḥ patayanty ā diśaḥ |
 10.064.02c na marḍitā vidyate anya ebhyo deveṣu me adhi kāmā ayamsata ||
 10.064.03a narā vā śamsam pūṣaṇam agohyam agniṃ deveddham abhy arcase girā |
 10.064.03c sūryāmāsā candramasā yamaṃ divi tritaṃ vātam uṣasam aktum aśvinā ||
 10.064.04a kathā kavis tuvīravān kayā girā bṛhaspatir vāvṛdhate suvṛktibhiḥ |
 10.064.04c aja ekapāt suhavebhir ṛkvabhir ahiḥ śṛnotu budhnyo havīmani ||
 10.064.05a dakṣasya vādite janmani vrata rājānā mitrāvaruṇā vivāsasi |
 10.064.05c atūrtapanthāḥ pururatho aryamā saptahotā viṣurūpeṣu janmasu ||
 10.064.06a te no arvanto havanaśruto havaṃ viśve śṛṇvantu vājino mitadravaḥ |
 10.064.06c sahasrasā medhasātāv iva tmanā maho ye dhanam samitheṣu jabhrire ||
 10.064.07a pra vo vāyum rathayujam puraṃdhiṃ stomaiḥ kṛṇudhvaṃ sakhyāya pūṣaṇam |
 10.064.07c te hi devasya savituḥ savīmani kratum sacante sacitaḥ sacetasah ||

10.064.08a triḥ sapta sasrā nadyo mahīr apo vanaspatīn parvatāṃ agnim ūtaye |
 10.064.08c kṛśānum astīn tiṣyaṃ sadhastha ā rudraṃ rudreṣu rudriyaṃ havāmahe ||
 10.064.09a sarasvatī sarayuḥ sindhur ūrmibhir mahō mahīr avasā yantu vakṣaṇiḥ |
 10.064.09c devīr āpo mātaraḥ sūdayitnvo ghṛtavat payo madhuman no arcata ||
 10.064.10a uta mātā bṛhaddivā śṛṇotu nas tvaṣṭā devebhir janibhiḥ pitā vacaḥ |
 10.064.10c ṛbhukṣā vājo rathaspatir bhago raṇvaḥ śamsaḥ śāsamānasya pātu naḥ ||
 10.064.11a raṇvaḥ saṃdrṣṭau pitumāṃ iva kṣayo bhadrā rudrāṇām marutām upastutiḥ |
 10.064.11c gobhiḥ ṣyāma yaśaso janeṣv ā sadā devāsa iḍayā sacemahi ||
 10.064.12a yām me dhiyam maruta indra devā adadāta varuṇa mitra yūyam |
 10.064.12c tām pīpayata payaseva dhenum kuvid giro adhi rathe vahātha ||
 10.064.13a kuvid aṅga prati yathā cid asya naḥ sajātyasya maruto bubodhatha |
 10.064.13c nābhā yatra prathamam saṃnasāmahe tatra jāmitvam aditir dadhātu naḥ ||
 10.064.14a te hi dyāvāpṛthivī mātara mahī devī devāñ janmanā yajñīye itaḥ |
 10.064.14c ubhe bibhṛta ubhayam bharīmabhiḥ purū retāmsi pitṛbhiś ca siñcataḥ ||
 10.064.15a vi śā hotrā viśvam aśnoti vāryam bṛhaspatir aramatih pañiyasī |
 10.064.15c grāvā yatra madhusud ucyate bṛhad avivaśanta matibhir manīṣiṇaḥ ||
 10.064.16a evā kavis tuvīravāṃ ṛtajñā draviṇasyur draviṇasaś cakānaḥ |
 10.064.16c ukthebhir atra matibhiś ca vipro 'pīpayad gayo divyāni janma ||
 10.064.17a evā plateḥ sūnur avīṛdhad vo viśva ādityā adite manīṣi |
 10.064.17c īśānāso naro amartyenāstāvi jano divyo gayena ||

10.065.01a agnir indro varuṇo mitro aryamā vāyuh pūṣā sarasvatī sajośasaḥ |
 10.065.01c ādityā viṣṇur marutaḥ svar bṛhat somo rudro aditir brahmaṇas patiḥ ||
 10.065.02a indrāgnī vṛtrahatyēṣu satpatī mitho hinvānā tanvā samokasā |
 10.065.02c antarikṣam mahy ā paprur ojasā somo ghṛtaśrīr mahimānam īrayan ||
 10.065.03a teṣāṃ hi mahnā mahatām anarvaṇām stomāṃ iyarmy ṛtajñā ṛtāvṛdhām |
 10.065.03c ye apsavam arṇavam citrarādhasas te no rāsantām mahaye sumitryāḥ ||
 10.065.04a svarṇaram antarikṣāni rocanā dyāvābhūmī pṛthivīm skambhur ojasā |
 10.065.04c pṛkṣā iva mahayantaḥ surātayo devā stavante manuṣāya sūrayaḥ ||
 10.065.05a mitrāya śikṣa varuṇāya dāsūṣe yā samrājā manasā na prayuchataḥ |
 10.065.05c yayor dhāma dharmaṇā rocate bṛhad yayor ubhe rodasī nādhasī vṛtau ||
 10.065.06a yā gaur vartanim paryeti niṣkṛtam payo duhānā vratanīr avārataḥ |
 10.065.06c sā prabruvāṇā varuṇāya dāsūṣe devebhyo dāśad dhaviṣā vivasvate ||
 10.065.07a divakṣaso agnijihvā ṛtāvṛdha ṛtasya yoniṃ vimṛśanta āsate |
 10.065.07c dyām skabhitvy apa ā cakrur ojasā yajñam janitvī tanvī ni māmṛjuḥ ||
 10.065.08a parikṣitā pitarā pūrvajāvari ṛtasya yonā kṣayataḥ samokasā |
 10.065.08c dyāvāpṛthivī varuṇāya savrate ghṛtavat payo mahiṣāya pinvataḥ ||
 10.065.09a parjanya vātā vṛṣabhā puriṣiṇendravāyū varuṇo mitro aryamā |
 10.065.09c devāṃ ādityāṃ aditiṃ havāmahe ye pāṛthivāso divyāso apsu ye ||
 10.065.10a tvaṣṭāram vāyum ṛbhavo ya ohate daivyā hotārā uśasaṃ svastaye |
 10.065.10c bṛhaspatiṃ vṛtrakhādām sumedhasam indriyaṃ somaṃ dhanasā u īmahe ||
 10.065.11a brahma gām aśvam janayanta ośadhīr vanaspatīn pṛthivīm parvatāṃ apaḥ |
 10.065.11c sūryam divi rohayantaḥ sudānava āryā vratā viśṛjanto adhi kṣami ||
 10.065.12a bhujyum aṃhasaḥ pipṛtho nir aśvinā śyāvam putram vadhrimatyā ajinvatam |
 10.065.12c kamadyuvam vimadāyohathur yuvam viṣṇāpvam viśvakāyāva srjathaḥ ||
 10.065.13a pāvīravī tanyatur ekapād ajo divo dhartā sindhur āpaḥ samudriyaḥ |
 10.065.13c viśve devāsaḥ śṛṇavan vacāmsi me sarasvatī saha dhībhiḥ puraṃdhyā ||
 10.065.14a viśve devāḥ saha dhībhiḥ puraṃdhyā manor yajatrā amṛtā ṛtajñāḥ |

10.065.14c rātiṣāco abhiṣācaḥ svarvidaḥ svar giro brahma sūktam juṣerata |
 10.065.15a devān vasiṣṭho amṛtān vavande ye viśvā bhuvanābhi pratasthuḥ |
 10.065.15c te no rāsantām urugāyam adya yūyam pāta svastibhiḥ sadā naḥ ||

10.066.01a devān huve bṛhacchravasaḥ svastaye jyotiṣkr̥to adhvarasya pracetasah |
 10.066.01c ye vāvṛdhuḥ prataram viśvavedasa indrajyeṣṭhāso amṛtā ṛtāvṛdhaḥ ||
 10.066.02a indraprasūtā varuṇapraśiṣṭā ye sūryasya jyotiṣo bhāgam ānaśuḥ |
 10.066.02c marudgaṇe vṛjane manma dhīmahi māghone yajñam janayanta sūrayaḥ ||
 10.066.03a indro vasubhiḥ pari pātu no gayam ādityair no aditiḥ śarma yachatu |
 10.066.03c rudro rudrebhir devo mṛḍayāti nas tvaṣṭā no gnābhiḥ suvitāya jinvatu ||
 10.066.04a aditir dyāvāpṛthivī ṛtam mahad indrāviṣṇū marutaḥ svar bṛhat |
 10.066.04c devāṃ ādityāṃ avase havāmahe vasūn rudrān savitāram sudamsasam ||
 10.066.05a sarasvān dhībhir varuṇo dhṛtavrataḥ pūṣā viṣṇur mahimā vāyur aśvinā |
 10.066.05c brahmakṛto amṛtā viśvavedasaḥ śarma no yaṃsan trivarūtham aṃhasaḥ ||
 10.066.06a vṛṣā yajño vṛṣaṇaḥ santu yajñiyā vṛṣaṇo devā vṛṣaṇo haviṣkr̥taḥ |
 10.066.06c vṛṣaṇā dyāvāpṛthivī ṛtāvarī vṛṣā parjanya vṛṣaṇo vṛṣastubhaḥ ||
 10.066.07a agniṣomā vṛṣaṇā vājasātaye purupraśastā vṛṣaṇā upa bruve |
 10.066.07c yāv ijire vṛṣaṇo devayajyayā tā naḥ śarma trivarūtham vi yaṃsataḥ ||
 10.066.08a dhṛtavratāḥ kṣatriyā yajñaniṣkr̥to bṛhaddivā adhvarāṇām abhiśriyaḥ |
 10.066.08c agnihotāra ṛtasāpo adruho 'po asṛjann anu vṛtratūrye ||
 10.066.09a dyāvāpṛthivī janayann abhi vratāpa oṣadhīr vanināni yajñiyā |
 10.066.09c antarikṣam svar ā paprur ūtaye vaśam devāsas tanvī ni māmṛjuḥ ||
 10.066.10a dhartāro diva ṛbhavaḥ suhastā vātāparjanya mahiṣasya tanyatoḥ |
 10.066.10c āpa oṣadhīḥ pra tirantu no giro bhago rātir vājino yantu me havam ||
 10.066.11a samudraḥ sindhū rajo antarikṣam aja ekapāt tanayitnur arṇavaḥ |
 10.066.11c ahir budhnyah sṛṇavad vacāṃsi me viśve devāsa uta sūrayo mama ||
 10.066.12a syāma vo manavo devavitaye prāñcam no yajñam pra ṇayata sādhyā |
 10.066.12c ādityā rudrā vasavaḥ sudānava imā brahma śasyamānāni jinvata ||
 10.066.13a daivyā hotārā prathamā purohita ṛtasya panthām anv emi sādhyā |
 10.066.13c kṣetrasya patim prativeśam imahe viśvān devāṃ amṛtāṃ aprayuchataḥ ||
 10.066.14a vasiṣṭhāsaḥ pitṛvad vācam akrata devāṃ idānā ṛṣivat svastaye |
 10.066.14c prītā iva jñātayaḥ kāmam etyāsme devāso 'va dhūnutā vasu ||
 10.066.15a devān vasiṣṭho amṛtān vavande ye viśvā bhuvanābhi pratasthuḥ |
 10.066.15c te no rāsantām urugāyam adya yūyam pāta svastibhiḥ sadā naḥ ||

10.067.01a imāṃ dhiyaṃ saptaśīrṣṇim pitā na ṛtaprajātām bṛhatim avindat |
 10.067.01c turīyaṃ svij janayad viśvajanyo 'yāsya uktham indrāya śaṃsan ||
 10.067.02a ṛtam śaṃsanta ṛju dīdhyānā divas putrāso asurasya vīrāḥ |
 10.067.02c vipram padam aṅgiraso dadhānā yajñasya dhāma prathamam mananta ||
 10.067.03a haṃsair iva sakhibhir vāvadadbhir aśmanmayāni nahanā vyasyan |
 10.067.03c bṛhaspatir abhikanikradad gā uta prāstaud uc ca vidvāṃ agāyat ||
 10.067.04a avo dvābhyām para ekayā gā guhā tiṣṭhantīr anṛtasya setau |
 10.067.04c bṛhaspatis tamasi jyotir ichann ud usrā ākar vi hi tisra āvaḥ ||
 10.067.05a vibhidya puram śayathem apācīm nis trīṇi sākam udadher akṛntat |
 10.067.05c bṛhaspatir uśasam sūryam gām arkam viveda stanayann iva dyauḥ ||
 10.067.06a indro valam rakṣitāram dughānām kareṇeva vi cakartā ravena |
 10.067.06c svedāñjibhir āśiram ichamāno 'rodayat paṇim ā gā amuṣṇāt ||

10.067.07a sa iṃ satyebhiḥ sakhibhiḥ śucadbhir godhāyasam vi dhanasair adardaḥ |
 10.067.07c brahmaṇas patir vṛṣabhir varāhair gharmasvedebhir draṇam vy ānaḥ ||
 10.067.08a te satyena manasā gopatim gā iyānāsa iṣaṇayanta dhībhiḥ |
 10.067.08c bṛhaspatir mithoavadyapebhir ud usriyā asṛjata svayugbhiḥ ||
 10.067.09a taṃ vardhayanto matibhiḥ śivābhiḥ siṃham iva nānadatam sadhasthe |
 10.067.09c bṛhaspatim vṛṣaṇam śūrasātau bhare-bhare anu madema jiṣṇum ||
 10.067.10a yadā vājam asanad viśvarūpam ā dyām arukṣad uttarāni sadma |
 10.067.10c bṛhaspatim vṛṣaṇam vardhayanto nānā santo bibhrato jyotir āsā ||
 10.067.11a satyām āśiṣam kṛṇutā vayodhai kīriṃ cid dhy avatha svebhir evaiḥ |
 10.067.11c paścā mṛdho apa bhavantu viśvās tad rodasī śṛṇutam viśvaminve ||
 10.067.12a indro mahnā mahato arṇavasya vi mūrdhānam abhinad arbudasya |
 10.067.12c ahann ahim ariṇāt sapta sindhūn devair dyāvapṛthivī prāvataṃ naḥ ||

10.068.01a udapruto na vayo rakṣamāṇā vāvadato abhriyasyeva ghoṣāḥ |
 10.068.01c giribhrajō normayo madanto bṛhaspatim abhy arkā anāvan ||
 10.068.02a sam gobhir āṅgirasō nakṣamāṇo bhaga ived aryamaṇam nināya |
 10.068.02c jane mitro na dampatī anakti bṛhaspate vājayāsūṃr ivājau ||
 10.068.03a sādhvayā atithinī iṣirā spārhāḥ suvarṇā anavadyarūpāḥ |
 10.068.03c bṛhaspatiḥ parvatebhyo vitūryā nir gā ūpe yavam iva sthivibhyaḥ ||
 10.068.04a āpruṣāyan madhuna ṛtasya yonim avakṣipann arka ulkāṃ iva dyoḥ |
 10.068.04c bṛhaspatir uddharann āsmano gā bhūmyā udneva vi tvacam bibheda ||
 10.068.05a apa jyotiṣā tamo antarikṣād udnaḥ śīpālam iva vāta ājat |
 10.068.05c bṛhaspatir anumṛśyā valasyābhram iva vāta ā cakra ā gāḥ ||
 10.068.06a yadā valasya pīyato jasum bheda bṛhaspatir agnitapobhir arkaiḥ |
 10.068.06c dadbhir na jihvā pariviṣṭam ādad āvir nidhīm akṛṇod usriyāṇam ||
 10.068.07a bṛhaspatir amata hi tyad āsām nāma svarīṇam sadane guhā yat |
 10.068.07c āṇḍeva bhittvā śakunasya garbham ud usriyāḥ parvatasya tmanājat ||
 10.068.08a āsnāpinaddham madhu pary apaśyan matsyam na dīna udani kṣiyantam |
 10.068.08c niṣ taj jabhāra camasam na vṛkṣād bṛhaspatir viraveṇā vikṛtya ||
 10.068.09a soṣām avindat sa svaḥ so agniṃ so arkeṇa vi babādhe tamāmsi |
 10.068.09c bṛhaspatir govapuṣo valasya nir majjānam na parvaṇo jabhāra ||
 10.068.10a himeva parṇā muṣitā vanāni bṛhaspatinākṛpayad valo gāḥ |
 10.068.10c anānukṛtyam apunaś cakāra yāt sūryāmāsā mitha uccarātaḥ ||
 10.068.11a abhi śyāvam na kṛśanebhir āsvam nakṣatrebhiḥ pitaro dyām apiṃśan |
 10.068.11c rātryām tamo adadhur jyotir ahan bṛhaspatir bhinad adriṃ vidad gāḥ ||
 10.068.12a idam akarma namo abhriyāya yaḥ pūrvīr anv ānavīti |
 10.068.12c bṛhaspatiḥ sa hi gobhiḥ so āsvaiḥ sa vīrebhiḥ sa nṛbhir no vayo dhāt ||

10.069.01a bhadrā agner vadhryaśvasya samdrśo vāmī praṇitīḥ suraṇā upetayaḥ |
 10.069.01c yad iṃ sumitrā viśo agra indhate ghṛtenāhuto jarate davidyutat ||
 10.069.02a ghṛtam agner vadhryaśvasya vardhanam ghṛtam annam ghṛtam v asya
 medanam |
 10.069.02c ghṛtenāhuta urviyā vi paprathe sūrya iva rocate sarpirāsutiḥ ||
 10.069.03a yat te manur yad anīkam sumitraḥ samīdhe agne tad idam navīyaḥ |
 10.069.03c sa revac choca sa giro juṣasva sa vājam darṣi sa iha śravo dhāḥ ||
 10.069.04a yaṃ tvā pūrvam īdīto vadhryaśvaḥ samīdhe agne sa idam juṣasva |

10.069.04c sa na stipā uta bhavā tanūpā dātraṃ rakṣasva yad idaṃ te asme ||
 10.069.05a bhavā dyumnī vādhryaśvota gopā mā tvā tārīd abhimātir janānām |
 10.069.05c śūra iva dhr̥ṣṇuś cyavanaḥ sumitraḥ pra nu vocaṃ vādhryaśvasya nāma ||
 10.069.06a sam ajryā parvatyā vasūni dāsā vṛtrāṅy āryā jigetha |
 10.069.06c śūra iva dhr̥ṣṇuś cyavano janānām tvam agne pṛtanāyūṃr abhi ṣyāḥ ||
 10.069.07a dīrghatantur bṛhadukṣāyam agniḥ sahasrastariḥ śatanītha ṛbhvā |
 10.069.07c dyumān dyumatsu nṛbhir mṛjyamānaḥ sumitreṣu dīdayo devayatsu ||
 10.069.08a tve dhenuḥ sudughā jātavedo 'saścateva samanā sabardhuk |
 10.069.08c tvam nṛbhir dakṣiṇāvadbhir agne sumitrebhir idhyase devayadbhiḥ ||
 10.069.09a devās cit te amṛtā jātavedo mahimānaṃ vādhryaśva pra vocan |
 10.069.09c yat sampr̥cham mānuṣīr viśā āyan tvam nṛbhir ajayas tvāvṛdhebhīḥ ||
 10.069.10a piteva putram abibhar upasthe tvām agne vadhryaśvaḥ saparyan |
 10.069.10c juṣāṇo asya samidham yaviṣṭhota pūrvām̐ avanor vrādhataś cit ||
 10.069.11a śaśvad agnir vadhryaśvasya śatrūn nṛbhir jigāya sutasomavadbhiḥ |
 10.069.11c samanā cid adahaś citrabhāno 'va vrādhantam abhinad vṛdhaś cit ||
 10.069.12a ayam agnir vadhryaśvasya vṛtrahā sanakāt preddho namasopavākyaḥ |
 10.069.12c sa no ajāmīṃr uta vā vijāmīn abhi tiṣṭha śardhato vādhryaśva ||

10.070.01a imām me agne samidham juṣasveḍas pade prati haryā ghṛtācīm |
 10.070.01c varṣman pṛthivyāḥ sudinatve ahnām ūrdhvo bhava sukrato devayajyā ||
 10.070.02a ā devānām agrayāveha yātu narāsaṃso viśvarūpebhir aśvaiḥ |
 10.070.02c ṛtasya pathā namasā miyedho devebhyo devatamaḥ suṣūdat ||
 10.070.03a śaśvattamam idate dūtyāya haviṣmanto manuṣyāso agnim |
 10.070.03c vahiṣṭhair aśvaiḥ suvṛtā rathenā devān vakṣi ni ṣadeha hotā ||
 10.070.04a vi prathatām devajuṣtam tiraścā dīrgham drāghmā surabhi bhūtv asme |
 10.070.04c aheadatā manasā deva barhir indrajyeṣṭhām̐ uśato yakṣi devān ||
 10.070.05a divo vā sānu spr̥satā variyāḥ pṛthivyā vā mātrayā vi śrayadhvam |
 10.070.05c uśatir dvāro mahinā mahadbhir devaṃ ratham rathayur dhārayadhvam ||
 10.070.06a devī divo duhitarā suśilpe uṣāsānaktā sadatām ni yonau |
 10.070.06c ā vām devāsa uśatī uśanta urau sīdantu subhage upasthe ||
 10.070.07a ūrdhvo grāvā bṛhad agniḥ samiddhaḥ priyā dhāmāny aditer upasthe |
 10.070.07c purohitāv ṛtvijā yajñe asmin viduṣṭarā draviṇam ā yajethām ||
 10.070.08a tisro devīr barhir idaṃ variya ā sīdata cakṛmā vaḥ syonam |
 10.070.08c manuṣvad yajñam sudhitā havīṃṣīdā devī ghṛtapadī juṣanta ||
 10.070.09a deva tvaṣṭar yad dha cārutvam ānaḍ yad aṅgirasām abhavaḥ sacābhūḥ |
 10.070.09c sa devānām pātha upa pra vidvām̐ uśan yakṣi draviṇodaḥ suratnaḥ ||
 10.070.10a vanaspate raśanayā niyūyā devānām pātha upa vakṣi vidvān |
 10.070.10c svadāti devaḥ kṛṇavad dhaviṃṣy avatām dyāvāpṛthivī havam me ||
 10.070.11a āgne vaha varuṇam iṣṭaye na indraṃ divo maruto antarikṣāt |
 10.070.11c sīdantu barhir viśva ā yajatrāḥ svāhā devā amṛtā mādayantām ||

10.071.01a bṛhaspate prathamam vāco agram yat prairata nāmadheyam dadhānāḥ |
 10.071.01c yad eṣām śreṣṭham yad aripram āsīt preṇā tad eṣām nihitam guhāviḥ ||
 10.071.02a saktum iva titaūnā punanto yatra dhīrā manasā vācam akrata |
 10.071.02c atrā sakhāyaḥ sakhyāni jānate bhadrāiṣām lakṣmīr nihitādhi vāci ||
 10.071.03a yajñena vācaḥ padavīyam āyan tām anv avindann ṛṣiṣu praviṣṭām |
 10.071.03c tām ābhṛtyā vy adadhuḥ purutrā tām sapta rebhā abhi sam navante ||

10.071.04a uta tvaḥ paśyan na dadarśa vācam uta tvaḥ śṛṇvan na śṛṇoty enām |
 10.071.04c uto tvasmai tanvaṃ vi sasre jāyeva patya uśatī suvāsāḥ ||
 10.071.05a uta tvam sakhye sthirapītam āhur nainaṃ hinvanty api vājineṣu |
 10.071.05c adhenvā carati māyayaiṣa vācam śuśruvāṃ aphalām apuṣpām ||
 10.071.06a yas tityāja sacividaṃ sakhāyaṃ na tasya vācy api bhāgo asti |
 10.071.06c yad iṃ śṛṇoty alakaṃ śṛṇoti nahi praveda sukṛtasya panthām ||
 10.071.07a akṣaṇvantaḥ karṇavantaḥ sakhāyo manojaveṣv asamā babhūvuḥ |
 10.071.07c ādaghnāsa upakakṣāsa u tve hradā iva snātvā u tve dadṛsre ||
 10.071.08a hṛdā taṣṭeṣu manaso javeṣu yad brāhmaṇāḥ saṃyajante sakhāyaḥ |
 10.071.08c atrāha tvam vi jahur vedyābhir ohabrahmāṇo vi caranty u tve ||
 10.071.09a ime ye nārvān na paraś caranti na brāhmaṇāso na sutekarāsaḥ |
 10.071.09c ta ete vācam abhipadya pāpayā sirīs tantraṃ tanvate aprajajñayaḥ ||
 10.071.10a sarve nandanti yaśasāgatena sabhāsāhena sakhyā sakhāyaḥ |
 10.071.10c kilbiṣasṛt pituṣaṇir hy eṣām araṃ hito bhavati vājīnāya ||
 10.071.11a ṛcām tvaḥ poṣam āste pupuṣvān gāyatram tvo gāyati śakvarīṣu |
 10.071.11c brahmā tvo vadati jātavidyāṃ yajñasya mātṛam vi mimīta u tvaḥ ||

10.072.01a devānām nu vyaṃ jānā pra vocāma vipanyayā |
 10.072.01c uktheṣu śasyamāneṣu yaḥ paśyād uttare yuge ||
 10.072.02a brahmaṇas patir etā saṃ karmāra ivādhamat |
 10.072.02c devānām pūrve yuge 'sataḥ sad ajāyata ||
 10.072.03a devānām yuge prathame 'sataḥ sad ajāyata |
 10.072.03c tad āśā anv ajāyanta tad uttānapadas pari ||
 10.072.04a bhūr jajña uttānapado bhūva āśā ajāyanta |
 10.072.04c aditer dakṣo ajāyata dakṣād v aditiḥ pari ||
 10.072.05a aditir hy ajaniṣṭa dakṣa yā duhitā tava |
 10.072.05c tāṃ devā anv ajāyanta bhadrā amṛtabandhavaḥ ||
 10.072.06a yad devā adaḥ salile susaṃrabdhā atiṣṭhata |
 10.072.06c atrā vo nṛtyatām iva tīvro reṇur apāyata ||
 10.072.07a yad devā yatayo yathā bhuvanāny apinvata |
 10.072.07c atrā samudra ā gūḍham ā sūryam ajabhartana ||
 10.072.08a aṣṭau putrāso aditer ye jātās tanvas pari |
 10.072.08c devāṃ upa prait saptabhiḥ parā mārtaṇḍam āsyat ||
 10.072.09a saptabhiḥ putrair aditir upa prait pūrvaṃ yugam |
 10.072.09c prajāyai mṛtyave tvat punar mārtaṇḍam ābharat ||

10.073.01a janiṣṭhā ugraḥ sahase turāya mandra ojiṣṭho bahulābhimānaḥ |
 10.073.01c avardhann indram marutaś cid atra mātā yad vīraṃ dadhanad dhaniṣṭhā ||
 10.073.02a druho niṣattā pṛsanī cid evaiḥ purū śaṃsena vāvṛdhuṣ ṭa indram |
 10.073.02c abhivṛteva tā mahāpadena dhvāntāt prapitvād ud aranta garbhāḥ ||
 10.073.03a ṛṣvā te pādā pra yaj jigāsy avaradhan vājā uta ye cid atra |
 10.073.03c tvam indra sālāvṛkān sahasram āsan dadhiṣe aśvinā vavṛtyāḥ ||
 10.073.04a samanā tūrṇir upa yāsi yajñam ā nāsatyā sakhyāya vakṣi |
 10.073.04c vasāvyām indra dhārayaḥ sahasrāśvinā sūra dadatur maghāni ||
 10.073.05a mandamāna ṛtād adhi prajāyai sakhibhir indra iṣirebhir artham |
 10.073.05c ābhir hi māyā upa dasyum āgān mihaḥ pra tamrā avapat tamāṃsi ||

10.073.06a sanāmānā cid dhvasayo ny asmā avāhann indra uṣaso yathānaḥ |
 10.073.06c ṛṣvair agachaḥ sakhibhir nikāmaiḥ sākam pratiṣṭhā hṛdyā jaghantha ||
 10.073.07a tvam jaghantha namucim makhasyumuḥ dāsam kṛṇvāna ṛṣaye vimāyam |
 10.073.07c tvam cakārtha manave syonān patho devatrāñjaseva yānān ||
 10.073.08a tvam etāni papriṣe vi nāmeśāna indra dadhiṣe gabhastau |
 10.073.08c anu tvā devāḥ śavasā madanty uparibudhnān vaninaś cakārtha ||
 10.073.09a cakram yad asyāpsv ā niṣattam uto tad asmai madhv ic cachadyāt |
 10.073.09c pṛthivyām atiṣitam yad ūdhaḥ payo goṣv adadhā oṣadhīṣu ||
 10.073.10a aśvād iyāyeti yad vadanty ojaso jātam uta manya enam |
 10.073.10c manyor iyāya harmyeṣu tasthau yataḥ prajajña indro asya veda ||
 10.073.11a vayaḥ suparnā upa sedur indram priyamedhā ṛṣayo nādhamānāḥ |
 10.073.11c apa dhvāntam ūrṇuhi pūrḍhi cakṣur mumugdhy asmān nidhayeva baddhān ||

10.074.01a vasūnām vā carakṛṣa iyakṣan dhiyā vā yajñair vā rodasyoḥ |
 10.074.01c arvanto vā ye rayimantaḥ sātāu vanuḥ vā ye suśruṇam suśruto dhuḥ ||
 10.074.02a hava eṣām asuro nakṣata dyām śravasyatā manasā niṣsata kṣām |
 10.074.02c cakṣānā yatra suvitāya devā dyaur na vārebhiḥ kṛṇavanta svaiḥ ||
 10.074.03a iyam eṣām amṛtānām giḥ sarvatātā ye kṛpaṇanta ratnam |
 10.074.03c dhiyam ca yajñam ca sādhanas te no dhāntu vasavyam asāmi ||
 10.074.04a ā tat ta indrāyavaḥ panantābhi ya ūrvam gomantaḥ titṛtsān |
 10.074.04c sakṛtsvam ye puruputrām mahim sahasradhārām bṛhatim dudukṣan ||
 10.074.05a śaciva indram avase kṛṇudhvam anānataḥ damayantaḥ pṛtanyūn |
 10.074.05c ṛbhukṣaṇam maghavānaḥ suvṛktim bhartā yo vajram naryam purukṣuḥ ||
 10.074.06a yad vāvāna purutamam purāṣād ā vṛtrahendro nāmāny aprāḥ |
 10.074.06c acetī prāsahas patis tuviṣmān yad im uśmasi kartave karat tat ||

10.075.01a pra su va āpo mahimānam uttamaḥ kārur vocāti sadane vivasvataḥ |
 10.075.01c pra sapta-sapta tredhā hi cakramuḥ pra sṛtvarīṇām ati sindhur ojasā ||
 10.075.02a pra te 'radad varuṇo yātave pathaḥ sindho yad vājāṃ abhy adrasvas tvam |
 10.075.02c bhūmyā adhi pravatā yāsi sānūnā yad eṣām agram jagatām irajyasi ||
 10.075.03a divi svano yatate bhūmyopary anantaḥ śuśmam ud iyarti bhānūnā |
 10.075.03c abhrād iva pra stanayanti vṛṣṭayaḥ sindhur yad eti vṛṣabho na roruvat ||
 10.075.04a abhi tvā sindho śīsum in na mātaro vāsrā arṣanti payaseva dhenavaḥ |
 10.075.04c rājeva yudhvā nayasi tvam it sicau yad āsām agram pravatām inakṣasi ||
 10.075.05a imam me gaṅge yamune sarasvati śutudri stomaḥ sacatā paruṣṇy ā |
 10.075.05c asiknyā marudvṛdhe vitastayārjikiye śṛṇuhy ā suśomayā ||
 10.075.06a tṛṣṭāmāyā prathamam yātave sajūḥ susartvā rasayā śvetyā tyā |
 10.075.06c tvam sindho kubhayā gomatiḥ krumum mehatnvā saratham yābhir iyase ||
 10.075.07a ṛjity enī ruṣatī mahitvā pari jrayāṃsi bharate rajāṃsi |
 10.075.07c adabdhā sindhur apasām apastamāśvā na citrā vapuṣiva darśatā ||
 10.075.08a svaśvā sindhuḥ surathā suvāsā hiraṇyayī sukṛtā vājinivatī |
 10.075.08c ūrṇavatī yuvatīḥ śilamāvaty utādhi vaste subhagā madhuvṛdham ||
 10.075.09a sukham ratham yuyuje sindhur aśvinam tena vājam saniṣad asminn ājau |
 10.075.09c mahān hy asya mahimā panasyate 'dabdhasya svayaśaso virapśinaḥ ||

10.076.01a ā va rñjasa ūrjām vyuṣṭiṣv indram maruto rodasī anaktana |

10.076.01c ubhe yathā no ahanī sacābhuvā sadaḥ-sado varivasyāta udbhidā ||
 10.076.02a tad u śreṣṭhaṃ savanaṃ sunotanātyo na hastayato adriḥ sotari |
 10.076.02c vidad dhy aryo abhibhūti paumsyam maho rāye cit tarute yad arvataḥ ||
 10.076.03a tad id dhy asya savanaṃ viver apo yathā purā manave gātum aśret |
 10.076.03c goṛṇasi tvāṣṭre aśvanirṇiji prem adhvařeṣv adhvarāṃ aśiśrayuḥ ||
 10.076.04a apa hata rakṣaso bhaṅgurāvata skabhāyata nirṛtiṃ sedhatāmatim |
 10.076.04c ā no rayiṃ sarvavīraṃ sunotana devāvyam bharata ślokaṃ adrayaḥ ||
 10.076.05a divaś cid ā vo 'mavattarebhyo vibhvanā cid āśvapastarebhyaḥ |
 10.076.05c vāyoś cid ā somarabhastarebhyo 'gneś cid arca pitukṛttarebhyaḥ ||
 10.076.06a bhurantu no yaśasaḥ sotv andhaso grāvāṇo vācā divitā divitmatā |
 10.076.06c naro yatra duhate kāmyam madhv āghoṣayanto abhito mithasturaḥ ||
 10.076.07a sunvanti somaṃ rathirāso adrayo nir asya rasaṃ gaviṣo duhanti te |
 10.076.07c duhanty ūdhar upasecanāya kaṃ naro havyaḥ na marjayanta āsabiḥ ||
 10.076.08a ete naraḥ svapaso abhūtana ya indrāya sunutha somam adrayaḥ |
 10.076.08c vāmaṃ-vāmaṃ vo divyāya dhāmne vasu-vasu vaḥ pārthivāya sunvate ||

10.077.01a abhrapruṣo na vācā prūṣā vasu haviṣmanto na yajñā vijānuṣaḥ |
 10.077.01c sumārutaṃ na brahmānam arhase gaṇam astoṣy eṣāṃ na śobhase ||
 10.077.02a śriye maryāso añjīmīr akṛṇvata sumārutaṃ na pūrvīr ati kṣapaḥ |
 10.077.02c divas putrāsa etā na yetira ādityāsas te akrā na vāvṛdhuḥ ||
 10.077.03a pra ye divaḥ pṛthivyā na barhaṇā tmanā riricre abhrān na sūryaḥ |
 10.077.03c pājasvanto na vīrāḥ panasyavo riśādaso na maryā abhidyaḥ ||
 10.077.04a yuṣmākam budhne apāṃ na yāmani vithuryati na mahī śratharyati |
 10.077.04c viśvapsur yajño arvāg ayaṃ su vaḥ prayasvanto na satrāca ā gata ||
 10.077.05a yūyam dhūrṣu prayujo na raśmibhir jyotiṣmanto na bhāsā vyuṣṭiṣu |
 10.077.05c śyenāso na svayaśaso riśādasāḥ pravāso na prasitāsaḥ paripruṣaḥ ||
 10.077.06a pra yad vahadhve marutaḥ parākād yūyam mahaḥ samvaraṇasya vasvaḥ |
 10.077.06c vidānāso vasavo rādhyasyārāc cid dveṣaḥ sanutar yuyota ||
 10.077.07a ya udṛci yajñe adhvařeṣṭhā marudbhyo na mānuṣo dadāsat |
 10.077.07c revat sa vayo dadhate suvīraṃ sa devānām api gopithe astu ||
 10.077.08a te hi yajñeṣu yajñiyāsa ūmā ādityena nāmnā śambhaviṣṭhāḥ |
 10.077.08c te no 'vantu rathatūr maṇiṣām mahāś ca yāmann adhvaře cakānāḥ ||

10.078.01a viprāso na manmabhiḥ svādhyo devāvyo na yajñaiḥ svapnasaḥ |
 10.078.01c rājāno na citrāḥ susaṃdṛṣaḥ kṣitināṃ na maryā arepasaḥ ||
 10.078.02a agnir na ye bhrājasā rukmavakṣaso vātāso na svayujaḥ sadyaūtayaḥ |
 10.078.02c prajñātāro na jyeṣṭhāḥ sunītayaḥ suśarmāṇo na somā ṛtaṃ yate ||
 10.078.03a vātāso na ye dhunayo jigatnavo 'gnīnāṃ na jihvā virokiṇaḥ |
 10.078.03c varmaṇvanto na yodhāḥ śimivantaḥ pitṛnāṃ na śamsāḥ surātayaḥ ||
 10.078.04a rathānāṃ na ye 'rāḥ sanābhayo jigīvāmsō na sūrā abhidyaḥ |
 10.078.04c vareyavo na maryā ghṛtapruṣo 'bhisvartāro arkaṃ na suṣṭubhaḥ ||
 10.078.05a aśvāso na ye jyeṣṭhāsa āśavo didhiṣavo na rathyaḥ sudānavaḥ |
 10.078.05c āpo na nimnair udabhir jigatnavo viśvarūpā aṅgirasō na sāmabhiḥ ||
 10.078.06a grāvāṇo na sūryaḥ sindhumātara ādardirāso adrayo na viśvahā |
 10.078.06c śiśūlā na krīdayaḥ sumātaro mahāgrāmo na yāmann uta tviṣā ||
 10.078.07a uṣasāṃ na ketavo 'dhvaraśriyaḥ śubhamyavo nāñjibhir vy aśvitan |
 10.078.07c sindhavo na yayiyo bhrājadṛṣṭayaḥ parāvato na yojanāni mamire ||

- 10.078.08a subhāgān no devāḥ kṛṇutā suratnān asmān stotṛn maruto vāvṛdhānāḥ |
 10.078.08c adhi stotrasya sakhyasya gāta sanād dhi vo ratnadheyāni santi ||
- 10.079.01a apaśyam asya mahato mahitvam amartyasya martyāsu vikṣu |
 10.079.01c nānā hanū vibhṛte sam bharete asinvati bapsatī bhūry attaḥ ||
 10.079.02a guhā śiro nihitam ṛdhag akṣī asinvann atti jihvayā vanāni |
 10.079.02c atrāṅy asmai paḍbhiḥ sam bharanty uttānahastā namasādhi vikṣu ||
 10.079.03a pra mātuh prataram guhyam ichan kumāro na vīrudhaḥ sarpad urviḥ |
 10.079.03c sasam na pakvam avidac chucantaṃ ririhvāmsam ripa upasthe antaḥ ||
 10.079.04a tad vām ṛtam rodasī pra bravīmi jāyamāno mātārā garbho atti |
 10.079.04c nāham devasya martyaś ciketāgnir aṅga vicetāḥ sa pracetāḥ ||
 10.079.05a yo asmā annam tṛṣv ādadhāty ājyair ghṛtair juhōti puṣyati |
 10.079.05c tasmai sahasram akṣabhir vi cakṣe 'gne viśvataḥ pratyaññ asi tvam ||
 10.079.06a kiṃ deveṣu tyaja enaś cakarthāgne pṛchāmi nu tvām avidvān |
 10.079.06c akrīdan krīdan harir attave 'dan vi parvaśaś cakarta gām ivāsiḥ ||
 10.079.07a viṣūco aśvān yuyuje vanejā ṛjītibhī raśanābhir gṛbhītān |
 10.079.07c cakṣade mitro vasubhiḥ sujātaḥ sam āṇḍhe parvabhir vāvṛdhānaḥ ||
- 10.080.01a agniḥ saptim vājambharam dadāty agnir vīram śrutyaṃ karmaniṣṭhām |
 10.080.01c agnī rodasī vi carat samañjann agnir nārīm vīrakukṣim puraṃdhim ||
 10.080.02a agner apnasaḥ samid astu bhadrāgnir mahī rodasī ā viveśa |
 10.080.02c agnir ekaṃ codayat samatsv agnir vṛtrāṇi dayate puruṇi ||
 10.080.03a agnir ha tyam jarataḥ karṇam āvāgnir adbhyo nir adahaj jarūtham |
 10.080.03c agnir atrim gharma uruṣyad antar agnir nṛmedham prajayāsṛjat sam ||
 10.080.04a agnir dād draviṇam vīrapeśā agnir ṛṣim yaḥ sahasrā sanoti |
 10.080.04c agnir divi havyam ā tatānāgner dhāmāni vibhṛtā purutrā ||
 10.080.05a agnim ukthair ṛṣayo vi hvayante 'gnim naro yāmani bādhitāsaḥ |
 10.080.05c agnim vayo antarikṣe patanto 'gniḥ sahasrā pari yāti gonām ||
 10.080.06a agnim viśa īdate mānuṣīr yā agnim manuṣo nahuṣo vi jātāḥ |
 10.080.06c agnir gāndharvīm pathyām ṛtasyāgner gavyūtir ghṛta ā niṣattā ||
 10.080.07a agnaye brahma ṛbhavas tatakṣur agnim mahām avocāmā suvṛktim |
 10.080.07c agne prāva jaritāram yaviṣṭhāgne mahi draviṇam ā yajasva ||
- 10.081.01a ya imā viśvā bhuvanāni juhvad ṛṣir hotā ny asīdat pitā naḥ |
 10.081.01c sa āśiṣā draviṇam ichamānaḥ prathamachad avarāññ ā viveśa ||
 10.081.02a kiṃ svid āsīd adhiṣṭhānam ārambhaṇam katamat svit kathāsīt |
 10.081.02c yato bhūmim janayan viśvakarmā vi dyām aurṇon mahinā viśvacakṣāḥ ||
 10.081.03a viśvataścakṣur uta viśvatomukho viśvatobāhur uta viśvataspāt |
 10.081.03c sam bāhubhyām dhamati sam patatrair dyāvābhūmī janayan deva ekaḥ ||
 10.081.04a kiṃ svid vanaṃ ka u sa vṛkṣa āsa yato dyāvāpṛthivī niṣtatakṣuḥ |
 10.081.04c manīṣiṇo manasā pṛchated u tad yad adhyatiṣṭhad bhuvanāni dhārayan ||
 10.081.05a yā te dhāmāni paramāṇi yāvamā yā madhyamā viśvakarmann utemā |
 10.081.05c śikṣā sakhibhyo haviṣi svadhāvaḥ svayaṃ yajasva tanvam vṛdhānaḥ ||
 10.081.06a viśvakarman haviṣā vāvṛdhānaḥ svayaṃ yajasva pṛthivīm uta dyām |
 10.081.06c muhyantv anye abhito janāsa ihāsmākam maghavā sūrīr astu ||
 10.081.07a vācas patim viśvakarmāṇam ūtaye manojuvam vāje adyā huvema |

10.081.07c sa no viśvāni havanāni joṣad viśvaśambhūr avase sādhuḥkarmā ||

10.082.01a cakṣuṣaḥ pitā manasā hi dhīro ghr̥tam ene ajanan nannamāne |
10.082.01c yaded antā adadṛhanta pūrva ād id dyāvapṛthivī aprathetām ||
10.082.02a viśvakarmā vimanā ād vihāyā dhātā vidhātā paramota saṃdṛk |
10.082.02c teṣām iṣṭāni sam iṣā madanti yatrā saptaṛṣin para ekam āhuḥ ||
10.082.03a yo naḥ pitā janitā yo vidhātā dhāmāni veda bhuvanāni viśvā |
10.082.03c yo devānām nāmadhā eka eva taṃ sampraśnam bhuvanā yanty anyā ||
10.082.04a ta āyajanta draviṇaṃ sam asmā ṛṣayaḥ pūrve jaritāro na bhūnā |
10.082.04c asūrte sūrte rajasi niṣatte ye bhūtāni samakṛṇvann imāni ||
10.082.05a paro divā para enā pṛthivyā paro devebhir asurair yad asti |
10.082.05c kaṃ svid garbham prathamam dadhra āpo yatra devāḥ samapaśyanta viśve ||
10.082.06a tam id garbham prathamam dadhra āpo yatra devāḥ samagachanta viśve |
10.082.06c ajasya nābhāv adhy ekam arpitam yasmin viśvāni bhuvanāni tasthuḥ ||
10.082.07a na taṃ vidātha ya imā jajānānyad yuṣmākam antaram babhūva |
10.082.07c nīhāreṇa prāvṛtā jalpyā cāsutr̥pa ukthaśāśaś caranti ||

10.083.01a yas te manyo 'vidhad vajra sāyaka saha ojaḥ puṣyati viśvam ānuṣak |
10.083.01c sāhyāma dāsam āryam tvayā yujā sahaskṛtena sahasā sahasvatā ||
10.083.02a manyur indro manyur evāsa devo manyur hotā varuṇo jātavedāḥ |
10.083.02c manyum viśa ṛdate mānuṣir yāḥ pāhi no manyo tapasā sajoṣāḥ ||
10.083.03a abhihi manyo tavasas taviyān tapasā yujā vi jahi śatrūn |
10.083.03c amitrahā vṛtrahā dasyuhā ca viśvā vasūny ā bharā tvam naḥ ||
10.083.04a tvam hi manyo abhibhūtyojāḥ svayambhūr bhāmo abhimātiśahaḥ |
10.083.04c viśvacarṣaṇiḥ sahurīḥ sahāvān asmāsv ojaḥ pṛtanāsu dhehi ||
10.083.05a abhāgaḥ sann apa pareto asmi tava kratvā taviśasya pracetaḥ |
10.083.05c taṃ tvā manyo akratur jihīdāham svā tanūr baladeyāya mehi ||
10.083.06a ayaṃ te asmy upa mehy arvān pratīcīnaḥ sahure viśvadhāyaḥ |
10.083.06c manyo vajrinn abhi mām ā vavṛtsva hanāva dasyūmṛ uta bodhy āpeḥ ||
10.083.07a abhi prehi dakṣiṇato bhavā me 'dhā vṛtrāṇi jaṅghanāva bhūri |
10.083.07c juhomi te dharuṇam madhvo agram ubhā upāṃśu prathamā pibāva ||

10.084.01a tvayā manyo saratham ārujanto harṣamāṇāso dhr̥ṣitā marutvaḥ |
10.084.01c tigmeṣava āyudhā saṃśiśānā abhi pra yantu naro agnirūpāḥ ||
10.084.02a agnir iva manyo tviṣitaḥ sahasva senānir naḥ sahure hūta edhi |
10.084.02c hatvāya śatrūn vi bhajasva veda ojo mimāno vi mṛdho nudasva ||
10.084.03a sahasva manyo abhimātim asme rujan mṛṇan pramṛṇan prehi śatrūn |
10.084.03c ugraṃ te pājo nanv ā rurudhre vaśi vaśam nayasa ekaja tvam ||
10.084.04a eko bahūnām asi manyav ṛdito viśam-viśam yudhaye saṃ śiśādhi |
10.084.04c akṛttaruk tvayā yujā vyaṃ dyumantaṃ ghoṣam vijayāya kṛṇmahe ||
10.084.05a vijeṣakṛd indra ivānavabravo 'smākam manyo adhipā bhaveha |
10.084.05c priyaṃ te nāma sahure gṛṇimasi vidmā tam utsaṃ yata ābabhūtha ||
10.084.06a ābhūtyā sahajā vajra sāyaka saho bibharṣy abhibhūta uttaram |
10.084.06c kratvā no manyo saha medy edhi mahādhanasya puruhūta saṃsṛji ||
10.084.07a saṃsṛṣṭam dhanam ubhayaṃ samākṛtam asmabhyam dattam varuṇāś ca manyuḥ |

10.084.07c bhiyaṃ dadhānā hr̥dayeṣu śatravaḥ parājitāso apa ni layantām ||

- 10.085.01a satyenottabhitā bhūmiḥ sūryenottabhitā dyauḥ |
10.085.01c ṛtenādityās tiṣṭhanti divi somo adhi śritaḥ ||
10.085.02a somenādityā balinaḥ somena pṛthivī mahī |
10.085.02c atho nakṣatrāṇām eṣām upasthe soma āhitaḥ ||
10.085.03a somam manyate papivān yat sampiṃṣanty oṣadhim |
10.085.03c somaṃ yam brahmāṇo vidur na tasyāśnāti kaś cana ||
10.085.04a āchadvidhānair gupito bārhataiḥ soma rakṣitaḥ |
10.085.04c grāvṇām ic chr̥ṇvan tiṣṭhasi na te aśnāti pārthivaḥ ||
10.085.05a yat tvā deva prapibanti tata ā pyāyase punaḥ |
10.085.05c vāyuḥ somasya rakṣitā samānām māsa ākṛtiḥ ||
10.085.06a raibhy āsīd anudeyī nārāśamsī nyocanī |
10.085.06c sūryāyā bhadram id vāso gāthayaiti pariṣkṛtam ||
10.085.07a cittir ā upabarhaṇaṃ cakṣur ā abhyañjanam |
10.085.07c dyaur bhūmiḥ kośa āsīd yad ayāt sūryā patim ||
10.085.08a stomā āsan pratidhayaḥ kurīraṃ chanda opaśaḥ |
10.085.08c sūryāyā aśvinā varāgnir āsīt purogavaḥ ||
10.085.09a somo vadhūyur abhavad aśvināstām ubhā varā |
10.085.09c sūryāṃ yat patye śaṃsantim manasā savitādadāt ||
10.085.10a mano asyā ana āsīd dyaur āsīd uta chadiḥ |
10.085.10c śukrāv anaḍvāhāv āstām yad ayāt sūryā gṛham ||
10.085.11a ṛksāmābhyām abhihitau gāvau te sāmanāv itaḥ |
10.085.11c śrotraṃ te cakre āstām divi panthās carācāraḥ ||
10.085.12a śucī te cakre yātyā vyāno akṣa āhataḥ |
10.085.12c ano manasmayaṃ sūryārohat prayatī patim ||
10.085.13a sūryāyā vahatuḥ prāgāt savitā yam avāsṛjat |
10.085.13c aghāsu hanyante gāvo 'rjunyoḥ pary uhyate ||
10.085.14a yad aśvinā pṛchamānāv ayātaṃ tricakreṇa vahatuṃ sūryāyāḥ |
10.085.14c viśve devā anu tad vām ajānan putraḥ pitarāv avṛṇita pūṣā ||
10.085.15a yad ayātaṃ śubhas patī vareyaṃ sūryām upa |
10.085.15c kvaikaṃ cakraṃ vām āsīt kva deṣṭrāya tasthathuḥ ||
10.085.16a dve te cakre sūrye brahmāṇa ṛtuthā viduḥ |
10.085.16c athaikaṃ cakraṃ yad guhā tad addhātaya id viduḥ ||
10.085.17a sūryāyai devebhyo mitrāya varuṇāya ca |
10.085.17c ye bhūtasya pracetasa idaṃ tebhyo 'karaṃ namaḥ ||
10.085.18a pūrvāparaṃ carato māyayaitau śísū krīḍantau pari yāto adhvaram |
10.085.18c viśvāny anyo bhuvanābhicaṣṭa ṛtūṃr anyo vidadhaj jāyate punaḥ ||
10.085.19a navo-navo bhavati jāyamāno 'hnām ketur uṣasām ety agram |
10.085.19c bhāgaṃ devebhyo vi dadhāty āyan pra candramās tirate dīrgham āyuḥ ||
10.085.20a sukimśukaṃ śalmaliṃ viśvarūpaṃ hiraṇyavarnaṃ suvṛtaṃ sucakraṃ |
10.085.20c ā roha sūrye amṛtasya lokaṃ syonam patye vahatuṃ kṛṇuṣva ||
10.085.21a ud irṣvātaḥ pativatī hy eṣā viśvāvasuṃ namasā gīrbhir iḍe |
10.085.21c anyām icha pitṛśadaṃ vyaktām sa te bhāgo januṣā tasya viddhi ||
10.085.22a ud irṣvāto viśvāvaso namasedā mahe tvā |
10.085.22c anyām icha prapharvyam saṃ jāyām patyā sṛja ||
10.085.23a anṛkṣarā ṛjavaḥ santu panthā yebhiḥ sakhāyo yanti no vareyam |
10.085.23c sam aryamā sam bhago no ninīyāt saṃ jāspatyam suyamam astu devāḥ ||

- 10.085.24a pra tvā muñcāmi varuṇasya pāsād yena tvābadhnāt savitā suśevaḥ |
10.085.24c ṛtasya yonau sukṛtasya loke 'riṣṭāṃ tvā saha patyā dadhāmi ||
10.085.25a preto muñcāmi nāmutaḥ subaddhām amutas karam |
10.085.25c yatheyam indra mīdhvaḥ suputrā subhagāsati ||
10.085.26a pūṣā tveto nayatu hastagṛhyāśvinā tvā pra vahatām rathena |
10.085.26c gṛhān gacha gṛhapatnī yathāso vaśinī tvam vidatham ā vadāsi ||
10.085.27a iha priyam prajayā te sam ṛdhyatām asmin gṛhe gārhapatyāya jāgṛhi |
10.085.27c enā patyā tanvaṃ sam sṛjasvādhā jivṛi vidatham ā vadāthaḥ ||
10.085.28a nīllohitaṃ bhavati kṛtyāsaktir vy ajoyate |
10.085.28c edhante asyā jñātayaḥ patir bandheṣu badhyate ||
10.085.29a parā dehi śāmulyam brahmabhyo vi bhajā vasu |
10.085.29c kṛtyaiṣā padvatī bhūtvī ā jāyā viśate patim ||
10.085.30a āśrīrā tanūr bhavati ruśatī pāpayāmuyā |
10.085.30c patir yad vadhvo vāsasā svam aṅgam abhidhitasate ||
10.085.31a ye vadhvaś candraṃ vahatuṃ yakṣmā yanti janād anu |
10.085.31c punas tām yajñiyā devā nayantu yata āgatāḥ ||
10.085.32a mā vidan paripanthino ya āśidanti dampatī |
10.085.32c sugebhir durgam atītām apa drāntv arātayaḥ ||
10.085.33a sumaṅgalīr iyaṃ vadhūr imām sameta paśyata |
10.085.33c saubhāgyam asyai dattvāyāthāstaṃ vi paretana ||
10.085.34a tṛṣṭam etat kaṭukam etad apāṣṭhavad viṣavan naitad attave |
10.085.34c sūryāṃ yo brahmā vidyāt sa id vādhūyam arhati ||
10.085.35a āśasanam viśasanam atho adhivikartanam |
10.085.35c sūryāyāḥ paśya rūpāni tāni brahmā tu śundhati ||
10.085.36a gṛbhñāmi te saubhagatvāya hastam mayā patyā jaradaṣṭir yathāsaḥ |
10.085.36c bhago aryamā savitā puraṃdhir mahyam tvādur gārhapatyāya devāḥ ||
10.085.37a tām pūṣaṅ chivatamām erayasva yasyām bījam manuṣyā vapanti |
10.085.37c yā na ūrū uśatī viśrayāte yasyām uśantaḥ praharāma śepam ||
10.085.38a tubhyam agre pary avahan sūryāṃ vahatunā saha |
10.085.38c punaḥ patibhyo jāyāṃ dā agne prajayā saha ||
10.085.39a punaḥ patnīm agnir adād āyusā saha varcasā |
10.085.39c dīrghāyur asyā yaḥ patir jīvāti śaradaḥ śatam ||
10.085.40a somaḥ prathamo vivide gandharvo vivida uttaraḥ |
10.085.40c tṛtīyo agniṣ ṭe patis turīyas te manuṣyajāḥ ||
10.085.41a somo dadad gandharvāya gandharvo dadad agnaye |
10.085.41c rayiṃ ca putrāṃś cādād agnir mahyam atho imām ||
10.085.42a ihaiva stam mā vi yausṭam viśvam āyur vy aśnutam |
10.085.42c krīḍantau putrair naptṛbhir modamānau sve gṛhe ||
10.085.43a ā naḥ prajāṃ janayatu prajāpatir ājarasāya sam anaktv aryamā |
10.085.43c adurmaṅgalīḥ patilokam ā viśa śaṃ no bhava dvipade śaṃ catuṣpade ||
10.085.44a aghoracakṣur apatighny edhi śivā paśubhyaḥ sumanāḥ suvarcāḥ |
10.085.44c vīrasūr devakāmā syonā śaṃ no bhava dvipade śaṃ catuṣpade ||
10.085.45a imām tvam indra mīdhvaḥ suputrāṃ subhagāṃ kṛṇu |
10.085.45c daśāsyām putrān ā dhehi patim ekādaśaṃ kṛdhi ||
10.085.46a samrājñī śvaśure bhava samrājñī śvaśrvām bhava |
10.085.46c nanāndari samrājñī bhava samrājñī adhi devṛṣu ||
10.085.47a sam añjantu viśve devāḥ sam āpo hṛdayāni nau |
10.085.47c sam mātariśvā saṃ dhātā sam u deṣṭṛi dadhātu nau ||

- 10.086.01a vi hi sotor asṛkṣata nendram devam amamsata |
10.086.01c yatrāmadad vṛṣākaper aryah puṣṭeṣu matsakhā viśvasmād indra uttaraḥ ||
10.086.02a parā hīndra dhāvasi vṛṣākaper ati vyathiḥ |
10.086.02c no aha pra vindasy anyatra somapītaye viśvasmād indra uttaraḥ ||
10.086.03a kim ayam tvām vṛṣākapiś cakāra harito mṛgaḥ |
10.086.03c yasmā irasyasid u nv aryo vā puṣṭimad vasu viśvasmād indra uttaraḥ ||
10.086.04a yam imam tvam vṛṣākapiṃ priyam indrābhirakṣasi |
10.086.04c śvā nv asya jambhiṣad api karṇe varāhayur viśvasmād indra uttaraḥ ||
10.086.05a priyā taṣṭāni me kapir vyaktā vy adūduṣat |
10.086.05c śiro nv asya rāviṣam na sugam duṣkrte bhuvam viśvasmād indra uttaraḥ ||
10.086.06a na mat strī subhasattarā na suyāśutarā bhuvat |
10.086.06c na mat praticyaviyāsī na sakthy udyamiyāsī viśvasmād indra uttaraḥ ||
10.086.07a uve amba sulābhike yathevāṅga bhaviṣyati |
10.086.07c bhasan me amba sakthi me śiro me vīva hṛṣyati viśvasmād indra uttaraḥ ||
10.086.08a kiṃ subāho svaṅgure pṛthuṣṭo pṛthujāghane |
10.086.08c kiṃ śūrapatni nas tvam abhy amiṣi vṛṣākapiṃ viśvasmād indra uttaraḥ ||
10.086.09a avirām iva mām ayam śarārur abhi manyate |
10.086.09c utāham asmi vīriṇīndrapatnī marutsakhā viśvasmād indra uttaraḥ ||
10.086.10a saṃhotram sma purā nārī samanam vāva gachati |
10.086.10c vedhā ṛtasya vīriṇīndrapatnī mahiyate viśvasmād indra uttaraḥ ||
10.086.11a indrāṇim āsu nārīṣu subhagām aham aśravam |
10.086.11c nahy asyā aparam cana jarasā marate patir viśvasmād indra uttaraḥ ||
10.086.12a nāham indrāṇi rāraṇa sakhyur vṛṣākaper ṛte |
10.086.12c yasyedam apyam haviḥ priyam deveṣu gachati viśvasmād indra uttaraḥ ||
10.086.13a vṛṣākapāyi revati suputra ād u susnuṣe |
10.086.13c ghasat ta indra ukṣaṇaḥ priyam kācitrakaram havir viśvasmād indra uttaraḥ ||
10.086.14a ukṣṇo hi me pañcadaśa sākam pacanti viṃśatim |
10.086.14c utāham admi pīva id ubhā kukṣi pṛṇanti me viśvasmād indra uttaraḥ ||
10.086.15a vṛṣabho na tigmaśṛṅgo 'ntar yūtheṣu roruvat |
10.086.15c manthas ta indra śam hṛde yaṃ te sunoti bhāvayur viśvasmād indra uttaraḥ ||
10.086.16a na seṣe yasya rambate 'ntarā sakthyā kapṛt |
10.086.16c sed īse yasya romaśam niṣeduṣo vijṛmbhate viśvasmād indra uttaraḥ ||
10.086.17a na seṣe yasya romaśam niṣeduṣo vijṛmbhate |
10.086.17c sed īse yasya rambate 'ntarā sakthyā kapṛd viśvasmād indra uttaraḥ ||
10.086.18a ayam indra vṛṣākapiḥ parasvantam hataṃ vidat |
10.086.18c asiṃ sūnām navam carum ād edhasyāna ācitam viśvasmād indra uttaraḥ ||
10.086.19a ayam emi vicākaśad vicinvan dāsam āryam |
10.086.19c pibāmi pākāsutvano 'bhi dhīram acākaśam viśvasmād indra uttaraḥ ||
10.086.20a dhanva ca yat kṛntatram ca kati svit tā vi yojanā |
10.086.20c nediyaso vṛṣākape 'stam ehi gṛhām upa viśvasmād indra uttaraḥ ||
10.086.21a punar ehi vṛṣākape suvitā kalpayāvahai |
10.086.21c ya eṣa svapnanamśano 'stam eṣi pathā punar viśvasmād indra uttaraḥ ||
10.086.22a yad udañco vṛṣākape gṛham indrājagantana |
10.086.22c kva sya pulvagho mṛgaḥ kam agaṇ janayopano viśvasmād indra uttaraḥ ||
10.086.23a parśur ha nāma mānavī sākam sasūva viṃśatim |
10.086.23c bhadram bhala tyasyā abhūd yasyā udaram āmayad viśvasmād indra uttaraḥ ||

- 10.087.01a rakṣoḥaṇaṃ vājinam ā jigharmi mitram prathiṣṭham upa yāmi śarma |
10.087.01c śiśāno agniḥ kratubhiḥ samiddhaḥ sa no divā sa riṣaḥ pātu naktam ||
10.087.02a ayodaṃṣṭro arciṣā yātudhānān upa sprīsa jātavedaḥ samiddhaḥ |
10.087.02c ā jihvayā mūradevān rabhasva kravyādo vṛktvy api dhatsvāsan ||
10.087.03a ubhobhayāvinn upa dhehi daṃṣṭrā himsraḥ śiśāno 'varam paraṃ ca |
10.087.03c utāntarikṣe pari yāhi rājañ jambhaiḥ saṃ dhehy abhi yātudhānān ||
10.087.04a yajñair iṣūḥ saṃnamamāno agne vācā śalyāṃś aśanibhir dihānaḥ |
10.087.04c tābhir vidhya hṛdaye yātudhānān pratico bāhūn prati bhañdhy eṣāṃ ||
10.087.05a agne tvacaṃ yātudhānasya bhindhi himsrāśanir harasā hantv enam |
10.087.05c pra parvāni jātavedaḥ śṛṇīhi kravyāt kraviṣṇur vi cinotu vṛkṇam ||
10.087.06a yatredānīm paśyasi jātavedas tiṣṭhantam agna uta vā carantam |
10.087.06c yad vāntarikṣe pathibhiḥ patantaṃ tam astā vidhya śarvā śiśānaḥ ||
10.087.07a utālabdham sprīnuhi jātaveda ālebhānād iṣṭibhir yātudhānāt |
10.087.07c agne pūrvo ni jahi śośucāna āmādaḥ kṣviṅkās tam adantv enīḥ ||
10.087.08a iha pra brūhi yatamaḥ so agne yo yātudhāno ya idaṃ kṛṇoti |
10.087.08c tam ā rabhasva samidhā yaviṣṭha nṛcakṣasaś cakṣuṣe randhayainam ||
10.087.09a tikṣṇenāgne cakṣuṣā rakṣa yajñam prāñcam vasubhyaḥ pra ṇaya pracetaḥ |
10.087.09c himsraṃ rakṣāmsy abhi śośucānam mā tvā dabhan yātudhānā nṛcakṣaḥ ||
10.087.10a nṛcakṣā rakṣaḥ pari paśya vikṣu tasya trīni prati śṛṇīhy agrā |
10.087.10c tasyāgne pṛṣṭir harasā śṛṇīhi tredhā mūlaṃ yātudhānasya vṛsca ||
10.087.11a trir yātudhānaḥ prasitiṃ ta etv ṛtaṃ yo agne anṛtena hanti |
10.087.11c tam arciṣā sphūrjayañ jātavedaḥ samakṣam enam gṛṇate ni vṛndhi ||
10.087.12a tad agne cakṣuḥ prati dhehi rebhe śaphārujaṃ yena paśyasi yātudhānam |
10.087.12c atharvavaj jyotiṣā daivyena satyaṃ dhūrvantam acitaṃ ny oṣa ||
10.087.13a yad agne adya mithunā śapāto yad vācas tṛṣṭaṃ janayanta rebhāḥ |
10.087.13c manyor manasaḥ śaravyā jāyate yā tayā vidhya hṛdaye yātudhānān ||
10.087.14a parā śṛṇīhi tapasā yātudhānān parāgne rakṣo harasā śṛṇīhi |
10.087.14c parārciṣā mūradevāñ chṛṇīhi parāsutrīpo abhi śośucānaḥ ||
10.087.15a parādya devā vṛjinam śṛṇantu pratyag enam śapathā yantu tṛṣṭāḥ |
10.087.15c vācāstenam śarava ṛchantu marman viśvasyaitu prasitiṃ yātudhānaḥ ||
10.087.16a yaḥ pauruṣeṇa kraviṣā samañkte yo aśvyena paśunā yātudhānaḥ |
10.087.16c yo aghnyāyā bharati kṣīram agne teṣāṃ śīrṣāni harasāpi vṛsca ||
10.087.17a saṃvatsariṇam paya usriyāyās tasya māśīd yātudhāno nṛcakṣaḥ |
10.087.17c piyūṣam agne yatamas titṛpsāt tam pratyañcam arciṣā vidhya marman ||
10.087.18a viṣaṃ gavāṃ yātudhānāḥ pibantv ā vṛsčyantām aditaye durevāḥ |
10.087.18c parainān devaḥ savitā dadātu parā bhāgam oṣadhīnāṃ jayantām ||
10.087.19a sanād agne mṛṇasi yātudhānān na tvā rakṣāmsi pṛtanāsu jigyuḥ |
10.087.19c anu daha sahamūrān kravyādo mā te hetyā muṣṣata daivyāyāḥ ||
10.087.20a tvam no agne adharād udaktāt tvam paścād uta rakṣā purastāt |
10.087.20c prati te te ajarāsas tapiṣṭhā aghaśamsaṃ śośucato dahantu ||
10.087.21a paścāt purastād adharād udaktāt kaviḥ kāvyena pari pāhi rājan |
10.087.21c sakhe sakhāyam ajaro jarimṇe 'gne martāṃ amartyas tvam naḥ ||
10.087.22a pari tvāgne puraṃ vyaṃ vipraṃ sahasya dhīmahi |
10.087.22c dhṛṣadvarṇaṃ dive-dive hantāram bhaṅgurāvatām ||
10.087.23a viṣeṇa bhaṅgurāvataḥ prati śma rakṣaso daha |
10.087.23c agne tigmena śociṣā tapuragrābhir iṣṭibhiḥ ||
10.087.24a praty agne mithunā daha yātudhānā kimidinā |
10.087.24c saṃ tvā śiśāmi jāgṛhy adabdham vipra manmabhiḥ ||
10.087.25a praty agne harasā haraḥ śṛṇīhi viśvataḥ prati |

10.087.25c yātudhānasya rakṣaso balaṃ vi ruja vīryam ||

- 10.088.01a haviṣ pāntam ajaram svarvidi divisprśy āhutaṃ juṣṭam agnau |
10.088.01c tasya bharmāṇe bhuvanāya devā dharmāṇe kaṃ svadhayā paprathanta ||
10.088.02a gīrṇam bhuvanam tamasāpagūḍham āviḥ svar abhavaj jāte agnau |
10.088.02c tasya devāḥ pṛthivī dyaur utāpo 'raṇayann oṣadhīḥ sakhye asya ||
10.088.03a devebhir nv iṣito yajñiyebhir agniṃ stoṣāṇy ajaram bṛhantam |
10.088.03c yo bhānunā pṛthivīm dyām utemām ātatāna rodasī antarikṣam ||
10.088.04a yo hotāsīt prathamō devajuṣṭo yaṃ samāñjann ājyenā vṛṇānāḥ |
10.088.04c sa patatṛitvaram sthā jagad yac chvātram agnir akṛṇoj jātavedāḥ ||
10.088.05a yaj jātavedo bhuvanasya mūrdhann atiṣṭho agne saha rocanena |
10.088.05c taṃ tvāhema matibhir gīrbhir ukthaiḥ sa yajñiyo abhavo rodasiprāḥ ||
10.088.06a mūrdhā bhuvo bhavati naktam agnis tataḥ sūryo jāyate prātar udyan |
10.088.06c māyām ū tu yajñiyānām etām apo yat tūrṇis carati prajānan ||
10.088.07a drśenyo yo mahinā samiddho 'rocata diviyonir vibhāvā |
10.088.07c tasminn agnau sūktavākena devā havir viśva ājuhavirus tanūpāḥ ||
10.088.08a sūktavākam prathamam ād id agniṃ ād id dhavir ajanayanta devāḥ |
10.088.08c sa eṣāṃ yajño abhavat tanūpās taṃ dyaur veda tam pṛthivī tam āpaḥ ||
10.088.09a yaṃ devāso 'janayantāgniṃ yasminn ājuhavirus bhuvanāni viśvā |
10.088.09c so arciṣā pṛthivīm dyām utemām rjūyamāno atapan mahitvā ||
10.088.10a stomena hi divi devāso agniṃ ajijanañ chaktibhī rodasiprām |
10.088.10c tam ū akṛṇvan tredhā bhuve kaṃ sa oṣadhīḥ pacati viśvarūpāḥ ||
10.088.11a yaded enam adadhur yajñiyāso divi devāḥ sūryam āditeyam |
10.088.11c yadā cariṣṇū mithunāv abhūtām ād it prāpaśyan bhuvanāni viśvā ||
10.088.12a viśvasmā agniṃ bhuvanāya devā vaiśvānaram ketum ahnām akṛṇvan |
10.088.12c ā yas tatānoṣaso vibhātir apo ūrṇoti tamo arciṣā yan ||
10.088.13a vaiśvānaram kavayo yajñiyāso 'gniṃ devā ajanayann ajuryam |
10.088.13c nakṣatram pratnam aminac cariṣṇu yakṣasyādhyakṣam taviṣam bṛhantam ||
10.088.14a vaiśvānaram viśvahā dīdivāṃsam mantrair agniṃ kavim achā vadāmaḥ |
10.088.14c yo mahinnā paribabhūvorvī utāvastād uta devaḥ parastāt ||
10.088.15a dve srutī aśṛṇavam pitṛṇām ahaṃ devānām uta martyānām |
10.088.15c tābhyām idam viśvam ejat sam eti yad antarā pitaram mātaram ca ||
10.088.16a dve samīci bibhṛtaś carantaṃ sīrṣato jātam manasā vimṛṣtam |
10.088.16c sa pratyañ viśvā bhuvanāni tasthāv aprayuchan taraṇir bhrājamānaḥ ||
10.088.17a yatrā vadete avaraḥ paraś ca yajñanyoḥ kataro nau vi veda |
10.088.17c ā śekur it sadhamādam sakhāyo nakṣanta yajñam ka idam vi vocat ||
10.088.18a katy agnayaḥ kati sūryāsaḥ katy uṣāsaḥ katy u svid āpaḥ |
10.088.18c nopaspijam vaḥ pitaro vadāmi pṛchāmi vaḥ kavayo vidmane kam ||
10.088.19a yāvanmātram uṣaso na pratīkam suparṇyo vasate mātariśvaḥ |
10.088.19c tāvad dadhāty upa yajñam āyan brāhmaṇo hotur avaro niṣīdan ||

- 10.089.01a indram stavā nṛtamaṃ yasya mahnā vibabādhe rocanā vi jmo antān |
10.089.01c ā yaḥ paprau carṣaṇīdhṛd varobhiḥ pra sindhubhyo riricāno mahitvā ||
10.089.02a sa sūryaḥ pary urū varāṃsy endro vavrtyād rathyeva cakrā |
10.089.02c atiṣṭhantam apasyam na sargaṃ kṛṣṇā tamāṃsi tviṣyā jaghāna ||
10.089.03a samānam asmā anapāvṛd arca kṣmayā divo asamam brahma navyam |
10.089.03c vi yaḥ pṛṣṭheva janimāny arya indraś cikāya na sakhāyam iṣe ||

10.089.04a indrāya giro aniśitasargā apaḥ prerayaṃ sagarasya budhnāt |
 10.089.04c yo akṣeṇeva cakriyā śacībhir viṣvak tastambha pṛthivīm uta dyām ||
 10.089.05a āpāntamanyus tṛpalaprabharmā dhuniḥ śimivāñ charumāñ ṛjīṣi |
 10.089.05c somo viśvāny atasā vanāni nārvāg indram pratimānāni debhuḥ ||
 10.089.06a na yasya dyāvāpṛthivī na dhanva nāntarikṣaṃ nādrayaḥ somo akṣāḥ |
 10.089.06c yad asya manyur adhinīyamānaḥ śṛṇāti vīḍu rujati sthirāṇi ||
 10.089.07a jaghāna vṛtraṃ svadhitiṛ vaneva ruvoja puro aradan na sindhūn |
 10.089.07c bibheda giriṃ navam in na kumbham ā gā indro akṛṇuta svayugbhiḥ ||
 10.089.08a tvam ha tyad ṛṇayā indra dhīro 'sir na parva vṛjinā śṛṇāsi |
 10.089.08c pra ye mitrasya varuṇasya dhāma yujaṃ na janā minanti mitram ||
 10.089.09a pra ye mitram prāryamaṇaṃ durevāḥ pra saṃgiraḥ pra varuṇam minanti |
 10.089.09c ny amitreṣu vadham indra tumraṃ vṛṣan vṛṣāṇam aruṣaṃ śīśīhi ||
 10.089.10a indro diva indra īse pṛthivyā indro apām indra it parvatānām |
 10.089.10c indro vṛdhām indra in medhirāṇām indraḥ kṣeme yoge havya indraḥ ||
 10.089.11a prāktubhya indraḥ pra vṛdho ahabhyaḥ prāntarikṣāt pra samudrasya dhāseḥ |
 10.089.11c pra vātasya prathasaḥ pra jmo antāt pra sindhubhyo ririce pra kṣitibhyaḥ ||
 10.089.12a pra śośucatyā uṣaso na ketur asinvā te vartatām indra hetīḥ |
 10.089.12c aśmeva vidhya diva ā sṛjānas tapiṣṭhena heṣasā droghamitrān ||
 10.089.13a anv aha māsā anv id vanāny anv oṣadhīr anu parvatāsaḥ |
 10.089.13c anv indraṃ rodasī vāvaśāne anv āpo ajihata jāyamānam ||
 10.089.14a karhi svit sā ta indra cetyāsad aghasya yad bhinado rakṣa eṣat |
 10.089.14c mitrakruvo yac chasane na gāvāḥ pṛthivyā āpṛg amuyā śayante ||
 10.089.15a śatrūyanto abhi ye nas tatasre mahi vrādhanta ogaṇāsa indra |
 10.089.15c andhenāmitrās tamasā sacantām sujyotiṣo aktavas tām abhi ṣyuh ||
 10.089.16a purūṇi hi tvā savanā janānām brahmāṇi mandan gṛṇatām ṛṣiṇām |
 10.089.16c imām āghoṣann avasā sahūtiṃ tiro viśvām arcato yāhy arvāñ ||
 10.089.17a evā te vayam indra bhuñjatinām vidyāma sumatinām navānām |
 10.089.17c vidyāma vastor avasā gṛṇanto viśvāmitrā uta ta indra nūnam ||
 10.089.18a śunaṃ huvema maghavānam indram asmin bhare nṛtamaṃ vājasātau |
 10.089.18c śṛṇvantam ugram ūtaye samatsu ghnantaṃ vṛtrāṇi saṃjitaṃ dhanānām ||

10.090.01a sahasraśīrṣā puruṣaḥ sahasrākṣaḥ sahasrapāt |
 10.090.01c sa bhūmiṃ viśvato vṛtvāty atiṣṭhad daśāṅgulam ||
 10.090.02a puruṣa evedaṃ sarvaṃ yad bhūtaṃ yac ca bhavyam |
 10.090.02c utāmṛtatvasyeśāno yad annenātirohati ||
 10.090.03a etāvān asya mahimāto jyāyāṃś ca pūruṣaḥ |
 10.090.03c pādo 'sya viśvā bhūtāni tripād asyāmṛtaṃ divi ||
 10.090.04a tripād ūrdhva ud ait puruṣaḥ pādo 'syehābhavat punaḥ |
 10.090.04c tato viṣvañ vy akrāmat sāsanānaśane abhi ||
 10.090.05a tasmād virāḍ ajāyata virājo adhi pūruṣaḥ |
 10.090.05c sa jāto aty aricyata paścād bhūmim atho puraḥ ||
 10.090.06a yat puruṣeṇa haviṣā devā yajñam atanvata |
 10.090.06c vasanto asyāsīd ājyaṃ grīṣma idhmaḥ śarad dhaviḥ ||
 10.090.07a taṃ yajñam barhiṣi praukṣan puruṣaṃ jātām agrataḥ |
 10.090.07c tena devā ayajanta sādhyā ṛṣayaś ca ye ||
 10.090.08a tasmād yajñāt sarvahutaḥ sambhṛtam pṛṣadājyaṃ |
 10.090.08c paśūn tāmś cakre vāyavyān āraṇyān grāmyāś ca ye ||
 10.090.09a tasmād yajñāt sarvahuta ṛcaḥ sāmāni jajñire |

10.090.09c chandāṃsi jajñire tasmād yajus tasmād ajāyata ||
 10.090.10a tasmād aśvā ajāyanta ye ke cobhayādataḥ |
 10.090.10c gāvo ha jajñire tasmāt tasmāj jātā ajāvayaḥ ||
 10.090.11a yat puruṣaṃ vy adadhuḥ katidhā vy akalpayan |
 10.090.11c mukhaṃ kim asya kau bāhū kā ūrū pādā ucyete ||
 10.090.12a brāhmaṇo 'sya mukhaṃ āsīd bāhū rājanyaḥ kṛtaḥ |
 10.090.12c ūrū tad asya yad vaiśyaḥ padbhyāṃ sūdro ajāyata ||
 10.090.13a candramā manaso jātaś cakṣoḥ sūryo ajāyata |
 10.090.13c mukhād indraś cāgniś ca prāṇād vāyur ajāyata ||
 10.090.14a nābhyā āsīd antarikṣaṃ śirṣṇo dyauḥ sam avartata |
 10.090.14c padbhyāṃ bhūmir diśaḥ śrotrāt tathā lokāṃ akalpayan ||
 10.090.15a saptāsyāsan paridhayaḥ triḥ sapta samidhaḥ kṛtāḥ |
 10.090.15c devā yad yajñam tanvānā abadhnan puruṣaṃ paśum ||
 10.090.16a yajñena yajñam ayajanta devās tāni dharmāṇi prathamāny āsan |
 10.090.16c te ha nākam mahimānaḥ sacanta yatra pūrve sādhyāḥ santi devāḥ ||

10.091.01a saṃ jāgrvadbhir jaramāṇa idhyate dame damūnā iṣayann iḍas pade |
 10.091.01c viśvasya hotā haviṣo vareṇyo vibhur vibhāvā suśakhā sakhīyate ||
 10.091.02a sa darśataśrīr atithir gr̥he-gr̥he vane-vane śīśriye takvavīr iva |
 10.091.02c janam-janam janyo nāti manyate viśa ā kṣeti viśyo viśam-viśam ||
 10.091.03a sudakṣo dakṣaiḥ kratunāsi sukratur agne kaviḥ kāvyenāsi viśvavit |
 10.091.03c vasur vasūnām kṣayasi tvam eka id dyāvā ca yāni pṛthivī ca puṣyataḥ ||
 10.091.04a prajānann agne tava yonim ṛtviyam iḍāyās pade ghṛtavantam āsadaḥ |
 10.091.04c ā te cikitra uśasām ivetayo 'repasaḥ sūryasyeva raśmayaḥ ||
 10.091.05a tava śriyo varṣasyeva vidyutaś citrās cikitra uśasām na ketavaḥ |
 10.091.05c yad ośadhīr abhisṛṣṭo vanāni ca pari svayaṃ cinuṣe annam āsye ||
 10.091.06a tam ośadhīr dadhire garbham ṛtviyaṃ tam āpo agniṃ janayanta mātaraḥ |
 10.091.06c tam it samānam vaninaś ca vīrudho 'ntarvatīś ca suvate ca viśvahā ||
 10.091.07a vātopadhūta iṣito vaśāṃ anu tṛṣu yad annā veviṣad vitiṣṭhase |
 10.091.07c ā te yatante rathyo yathā pṛthak chardhāṃsy agne ajarāṇi dhakṣataḥ ||
 10.091.08a medhākāraṃ vidathasya prasādhanam agniṃ hotāram paribhūtamam matim |
 10.091.08c tam id arbhe haviṣy ā samānam it tam in mahe vṛṇate nānyam tvat ||
 10.091.09a tvām id atra vṛṇate tvāyavo hotāram agne vidatheṣu vedhasaḥ |
 10.091.09c yad devayanto dadhati prayāṃsi te haviṣmanto manavo vṛktabarhiṣaḥ ||
 10.091.10a tavāgne hotraṃ tava potraṃ ṛtviyaṃ tava neṣṭraṃ tvam agnid ṛtāyataḥ |
 10.091.10c tava praśāstraṃ tvam adhvarīyasi brahmā cāsi gr̥hapatīś ca no dame ||
 10.091.11a yas tubhyam agne amṛtāya martyaḥ samidhā dāśad uta vā haviṣkṛti |
 10.091.11c tasya hotā bhavasi yāsi dūtyam upa brūṣe yajasy adhvarīyasi ||
 10.091.12a imā asmai matayo vāco asmad āṃ ṛco giraḥ suṣṭutayaḥ sam agmata |
 10.091.12c vasūyavo vasave jātavedase vṛddhāsu cid vardhano yāsu cākanat ||
 10.091.13a imām pratnāya suṣṭutiṃ naviyasiṃ voceyam asmā uśate śṛṇotu naḥ |
 10.091.13c bhūyā antarā hṛdy asya nisṛṣe jāyeva patya uśatī suvāsāḥ ||
 10.091.14a yasminn aśvāsa ṛṣabhāsa ukṣaṇo vaśā meṣā avasṛṣṭāsa āhutāḥ |
 10.091.14c kilālope somapṛṣṭhāya vedhase hṛdā matim janaye cārum agnaye ||
 10.091.15a ahāvya agne havir āsye te srucīva ghṛtaṃ camvīva somaḥ |
 10.091.15c vājasaniṃ rayim asme suvīram praśastaṃ dhehi yaśasam bhṛhantam ||

10.092.01a yajñasya vo rathyam viśpatim viśam hotāram aktor atithim vibhāvasum |
 10.092.01c śocañ chuṣkāsu hariṇiṣu jarbhuraḍ vṛṣā ketur yajato dyām aśāyata ||
 10.092.02a imam añjaspām ubhaye akr̥vata dharmānam agniṃ vidathasya sādhanam |
 10.092.02c aktum na yahvam uśasaḥ purohitam tanūnapātam aruśasya niṃsate ||
 10.092.03a baḍ asya nithā vi paṇeś ca manmahe vayā asya prahutā āsur attave |
 10.092.03c yadā ghorāso amṛtatvam āśatād ij janasya daivyasya carkiran ||
 10.092.04a ṛtasya hi prasitir dyaur uru vyaco namo mahy aramatiḥ pañiyasī |
 10.092.04c indro mitro varuṇaḥ sam cikitrire 'tho bhagaḥ savitā pūtadakṣasaḥ ||
 10.092.05a pra rudreṇa yayinā yanti sindhavas tiro mahim aramatiṃ dadhanvire |
 10.092.05c yebhiḥ pariṃmā pariann uru jrayo vi roruvaj jaṭhare viśvam ukṣate ||
 10.092.06a krāṇā rudrā maruto viśvakṛṣṭayo divaḥ śyenāso asurasya nīdayaḥ |
 10.092.06c tebhiś caṣṭe varuṇo mitro aryamendro devebhir arvaśebhir arvaśaḥ ||
 10.092.07a indre bhujam śasamānāsa āśata sūro dṛśike vṛṣaṇaś ca paumsye |
 10.092.07c pra ye nv asyārhaṇā tatakṣire yujam vajram nṛśadaneṣu kāravaḥ ||
 10.092.08a sūraś cid ā harito asya rīramad indrād ā kaś cid bhayate tavīyasaḥ |
 10.092.08c bhīmasya vṛṣṇo jaṭharād abhiśvaso dive-dive sahuri stann abādhitāḥ ||
 10.092.09a stomam vo adya rudrāya śikvase kṣayadvīrāya namasā didiṣṭana |
 10.092.09c yebhiḥ śivaḥ svavāṃ evayāvabhir divaḥ siṣakti svayaśā nikāmabhiḥ ||
 10.092.10a te hi prajāyā abharanta vi śravo bṛhaspatir vṛṣabhaḥ somajāmayaḥ |
 10.092.10c yajñair atharvā prathamō vi dhārayad devā dakṣair bhṛgavaḥ sam cikitrire ||
 10.092.11a te hi dyāvapṛthivī bhūretasā narāśamsaś caturaṅgo yamo 'ditiḥ |
 10.092.11c devas tvaṣṭā draviṇodā ṛbhukṣaṇaḥ pra rodasī maruto viṣṇur arhire ||
 10.092.12a uta sya na uśijām urviyā kavir ahiḥ śṛṇotu budhnyo havimani |
 10.092.12c sūryāmāsā vicarantā divikṣitā dhiyā śaminahuṣī asya bodhatam ||
 10.092.13a pra naḥ pūṣā caratham viśvadevyo 'pām napād avatu vāyur iṣṭaye |
 10.092.13c ātmānam vasyo abhi vātam arcata tad aśvinā suhavā yāmani śrutam ||
 10.092.14a viśam āsām abhayānām adhikṣitam gīrbhir u svayaśasaṃ gṛṇimasi |
 10.092.14c gnābhir viśvābhir aditim anarvaṇam aktor yuvānam nṛmaṇā adhā patim ||
 10.092.15a rebhad atra januśā pūrvo āngirā grāvāṇa ūrdhvā abhi cakṣur adhvaram |
 10.092.15c yebhir vihāyā abhavad vicakṣaṇaḥ pāthaḥ sumekaṃ svadhitiṃ vananvati ||

10.093.01a mahi dyāvapṛthivī bhūtam urvī nārī yāvī na rodasī sadam naḥ |
 10.093.01c tebhir naḥ pātam sahyasa ebhir naḥ pātam śūṣaṇi ||
 10.093.02a yajñe-yajñe sa martyo devān saparyati |
 10.093.02c yaḥ sumnair dirghaśruttama āvivāsaty enān ||
 10.093.03a viśveṣām irajyavo devānām vār mahaḥ |
 10.093.03c viśve hi viśvamahasō viśve yajñeṣu yajñiyāḥ ||
 10.093.04a te ghā rājāno amṛtasya mandrā aryamā mitro varuṇaḥ pariṃmā |
 10.093.04c kad rudro nṛṇām stuto marutaḥ pūṣaṇo bhagaḥ ||
 10.093.05a uta no naktam apām vṛṣaṇvasū sūryāmāsā sadanāya sadhanyā |
 10.093.05c sacā yat sādya eṣām ahir budhneṣu budhnyāḥ ||
 10.093.06a uta no devāv aśvinā śubhas patī dhāmabhir mitrāvaruṇā uruṣyatām |
 10.093.06c mahaḥ sa rāya eṣate 'ti dhanveva duritā ||
 10.093.07a uta no rudrā cin mṛdatām aśvinā viśve devāso rathaspatir bhagaḥ |
 10.093.07c ṛbhur vāja ṛbhukṣaṇaḥ pariṃmā viśvavedasaḥ ||
 10.093.08a ṛbhur ṛbhukṣā ṛbhur vidhato mada ā te harī jūjuvānasya vājinā |
 10.093.08c duṣṭaram yasya sāma cid ṛdhag yajño na mānuṣaḥ ||
 10.093.09a kṛdhī no ahrayo deva savitaḥ sa ca stuṣe maghonām |

10.093.09c saho na indro vahnibhir ny eṣāṃ carṣaṇināṃ cakram raśmiṃ na yoyuve ||
 10.093.10a aiṣu dyāvāpṛthivī dhātam mahad asme vīreṣu viśvacarṣaṇi śravaḥ |
 10.093.10c pṛkṣaṃ vājasya sātaye pṛkṣaṃ rāyota turvaṇe ||
 10.093.11a etaṃ śamsam indrāsmayuṣ tvaṃ kūcit santaṃ sahasāvann abhiṣṭaye |
 10.093.11c sadā pāhy abhiṣṭaye medatāṃ vedatā vaso ||
 10.093.12a etaṃ me stomam tanā na sūrye dyutadyāmānaṃ vāvṛdhanta nṛṇām |
 10.093.12c saṃvananaṃ nāśvyam taṣṭevānapacyutam ||
 10.093.13a vāvarta yeṣāṃ rāyā yuktaishāṃ hiraṇyayī |
 10.093.13c nemadhitā na paumṣyā vṛtheva viṣṭāntā ||
 10.093.14a pra tad duḥśime pṛthavāne vene pra rāme vocam asure maghavatsu |
 10.093.14c ye yuktvāya pañca śatāsmayu pathā viśrāvy eṣāṃ ||
 10.093.15a adhīn nv atra saptatiṃ ca sapta ca |
 10.093.15b sadyo didiṣṭa tānvaḥ sadyo didiṣṭa pārthyah sadyo didiṣṭa māyavaḥ ||

10.094.01a praitē vadantu pra vyaṃ vadāma grāvabhyo vācam vadatā vadadbhyaḥ |
 10.094.01c yad adrayaḥ parvatāḥ sākam āśavaḥ ślokaṃ ghoṣam bharathendrāya sominaḥ ||
 10.094.02a ete vadanti śatavat sahasravat abhi krandanti haritebhir āsabhiḥ |
 10.094.02c viṣṭvī grāvāṇaḥ sukṛtaḥ sukṛtyayā hotuś cit pūrve haviradyam āśata ||
 10.094.03a ete vadanty avidann anā madhu ny ūṅkhayante adhi pakva āmiṣi |
 10.094.03c vṛkṣasya śākhām aruṇasya bapsatas te sūbharvā vṛṣabhāḥ prem arāviṣuḥ ||
 10.094.04a bṛhad vadanti madireṇa mandinendraṃ krośanto 'vidann anā madhu |
 10.094.04c samrabhyā dhirāḥ svasṛbhir anartiṣur āghoṣayantaḥ pṛthivīm upabdibhiḥ ||
 10.094.05a suparṇā vācam akrotapa dyavy ākhare kṛṣṇā iṣirā anartiṣuḥ |
 10.094.05c nyañ ni yanty uparasya niṣkṛtam purū reto dadhire sūryaśvitaḥ ||
 10.094.06a ugrā iva pravahantaḥ samāyamuḥ sākam yuktā vṛṣaṇo bibhrato dhuraḥ |
 10.094.06c yac chvasanto jagrasānā arāviṣuḥ śṛṇva eṣāṃ prothatho arvatām iva ||
 10.094.07a daśāvanibhyo daśakakṣyebhyo daśayoktrebhyo daśayojanebhyaḥ |
 10.094.07c daśābhīsubhyo arcatajarebhyo daśa dhuro daśa yuktā vahadbhyaḥ ||
 10.094.08a te adrayo daśayantrāsa āśavas teṣāṃ ādhānam pary eti haryatam |
 10.094.08c ta ū sutasya somyasyāndhaso 'mśoḥ pīyūṣam prathamasya bhejire ||
 10.094.09a te somādo harī indrasya niṃsate 'mśum duhanto adhy āsate gavi |
 10.094.09c tebhir dugdham papivān somyam madhv indro vardhate prathate vṛṣāyate ||
 10.094.10a vṛṣā vo amśur na kilā riṣāthanedāvantaḥ sadam it sthanāśitāḥ |
 10.094.10c raivatyeva mahasā cārava sthana yasya grāvāṇo ajuṣadhvam adhvaram ||
 10.094.11a tṛdilā atṛdilāso adrayo 'śramaṇā aśṛthitā amṛtyavaḥ |
 10.094.11c anāturā ajarā sthāmaviṣṇavaḥ supīvaso atṛṣitā atṛṣṇajaḥ ||
 10.094.12a dhruvā eva vaḥ pitaro yuge-yuge kṣemakāmāsaḥ sadaso na yuñjate |
 10.094.12c ajuryāso hariṣāco haridrava ā dyāṃ ravena pṛthivīm aśuśravuḥ ||
 10.094.13a tad id vadanty adrayo vimocane yāmann añjaspā iva ghed upabdibhiḥ |
 10.094.13c vapanto bijam iva dhānyākṛtaḥ pṛñcanti somam na minanti bapsataḥ ||
 10.094.14a sute adhware adhi vācam akrotā krīdayo na mātaram tudantaḥ |
 10.094.14c vi śū muñcā suṣuvuṣo maṇiṣāṃ vi vartantām adrayaś cāyamānāḥ ||

10.095.01a haye jāye manasā tiṣṭha ghore vacāṃsi miśrā kṛṇavāvahai nu |
 10.095.01c na nau mantrā anuditāsa ete mayas karan paratare canāhan ||
 10.095.02a kim etā vācā kṛṇavā tavāham prākramaṣam uṣasām agriyeva |
 10.095.02c purūravaḥ punar astam parehi durāpanā vāta ivāham asmi ||

10.095.03a iṣur na śriya iṣudher asanā goṣāḥ śatasā na raṃhiḥ |
 10.095.03c avīre kratau vi davidyutan norā na māyumu citayanta dhunayaḥ ||
 10.095.04a sā vasu dadhatī śvaśūrāya vaya uṣo yadi vaṣṭy antigṛhāt |
 10.095.04c astaṃ nanakṣe yasmiñ cākan divā naktam śnathitā vaitasena ||
 10.095.05a triḥ sma māhnaḥ śnathayo vaitasenota sma me 'vyatyai pṛṇāsi |
 10.095.05c purūravo 'nu te ketam āyam rājā me vīra tanvas tad āsīḥ ||
 10.095.06a yā sujūrṇiḥ śreṇiḥ sumnaāpir hradecakṣur na granthinī caranyuḥ |
 10.095.06c tā añjayo 'ruṇayo na sasruḥ śriye gāvo na dhenavo 'navanta ||
 10.095.07a sam asmiñ jāyamāna āsata gnā utem avardhan nadyaḥ svagūrtāḥ |
 10.095.07c mahe yat tvā purūravo raṇāyāvardhayan dasyuhatyāya devāḥ ||
 10.095.08a sacā yad āsu jahatiṣv atkam amānuṣīṣu mānuṣo niṣeve |
 10.095.08c apa sma mat tarasanti na bhujyus tā atrasan rathasprśo nāśvāḥ ||
 10.095.09a yad āsu marto amṛtāsu nisprk sam kṣoṇibhiḥ kratubhir na pṛṅkte |
 10.095.09c tā ātayo na tanvaḥ śumbhata svā aśvāso na krīdayo dandaśānāḥ ||
 10.095.10a vidyun na yā patanti davidyod bharanti me apyā kāmyāni |
 10.095.10c janiṣṭo apo naryaḥ sujātaḥ prorvaśī tirata dīrgham āyuh ||
 10.095.11a jajñiṣa itthā gopithyāya hi dadhātha tat purūravo ma ojaḥ |
 10.095.11c aśāsam tvā viduṣī sasminn ahan na ma āśṛṇoḥ kim abhug vadāsi ||
 10.095.12a kadā sūnuḥ pitaram jāta ichāc cakran nāśru vartayad vijānan |
 10.095.12c ko dampatī samanasā vi yūyod adha yad agniḥ śvaśureṣu dīdayat ||
 10.095.13a prati bravāṇi vartayate āśru cakran na kranda ādhye śivāyai |
 10.095.13c pra tat te hinavā yat te asme parehy astaṃ nahi mūra māpaḥ ||
 10.095.14a sudevo adya prapated anāvṛt parāvatam paramāṃ gantavā u |
 10.095.14c adhā śayīta nirṛter upasthe 'dhainaṃ vṛkā rabhasāso adyuḥ ||
 10.095.15a purūravo mā mṛthā mā pra popto mā tvā vṛkāso aśivāsa u kṣan |
 10.095.15c na vai straiṇāni sakhyāni santi sālāvṛkāṇāṃ hṛdayāny etā ||
 10.095.16a yad virūpācaram martyeṣv avasam rātrīḥ śaradaś catasraḥ |
 10.095.16c ghṛtasya stokam sakṛd aha āśnāṃ tād evedam tātrpāṇā carāmi ||
 10.095.17a antarikṣaprām rajaso vimānim upa śikṣāmy urvaśim vasiṣṭhaḥ |
 10.095.17c upa tvā rātiḥ sukṛtasya tiṣṭhān ni vartasva hṛdayam tapyate me ||
 10.095.18a iti tvā devā ima āhur aiḍa yathem etad bhavasi mṛtyubandhuḥ |
 10.095.18c prajā te devān haviṣā yajāti svarga u tvam api mādayāse ||

10.096.01a pra te mahe vidathe śaṃsiṣam harī pra te vanve vanuṣo haryatam madam |
 10.096.01c ghṛtam na yo haribhiś cāru secata ā tvā viśantu harivarpasam giraḥ ||
 10.096.02a hariṃ hi yonim abhi ye samasvaran hinvanto harī divyam yathā sadaḥ |
 10.096.02c ā yam pṛṇanti haribhir na dhenava indrāya śūṣam harivantam arcata ||
 10.096.03a so asya vajro harito ya āyaso harir nikāmo harir ā gabhastyoḥ |
 10.096.03c dyumnī suśipro harimanyusāyaka indre ni rūpā haritā mimikṣire ||
 10.096.04a divi na ketur adhi dhāyi haryato vivyacad vajro harito na raṃhyā |
 10.096.04c tudad ahim hariśipro ya āyasaḥ sahasraśokā abhavad dharimbharaḥ ||
 10.096.05a tvam-tvam aharyathā upastutaḥ pūrvebhir indra harikeśa yajvabhiḥ |
 10.096.05c tvam haryasi tava viśvam ukthyam asāmi rādho harijāta haryatam ||
 10.096.06a tā vajriṇam mandinaṃ stomyam mada indram rathe vahato haryatā harī |
 10.096.06c purūṇy asmai savanāni haryata indrāya somā harayo dadhanvire ||
 10.096.07a aram kāmāya harayo dadhanvire sthirāya hinvan harayo harī turā |
 10.096.07c arvadbhīr yo haribhir joṣam iyate so asya kāmam harivantam ānaśe ||
 10.096.08a hariśmaśārur harikeśa āyasaḥ turaspeye yo haripā avardhata |

10.096.08c arvadbhīr yo haribhīr vājinīvasur ati viśvā duriṭā pāriṣad dhārī ||
 10.096.09a sruveva yasya harinī vipetatuḥ śipre vājāya harinī davidhvataḥ |
 10.096.09c pra yat kṛte camase marmṛjad dhārī pītvā madasya haryatasyāndhasaḥ ||
 10.096.10a uta sma sadma haryatasya pastyor atyo na vājaṃ harivāṃ acikradat |
 10.096.10c mahī cid dhi dhiṣaṇāharyad ojasā bṛhad vayo dadhiṣe haryataś cid ā ||
 10.096.11a ā rodasī haryamāṇo mahitvā navyaṃ-navyaṃ haryasi manma nu priyam |
 10.096.11c pra pastyam asura haryataṃ gor āviṣ kṛdhi haraye sūryāya ||
 10.096.12a ā tvā haryantam prayujo janānāṃ rathe vahantu hariśipram indra |
 10.096.12c pibā yathā pratibhṛtasya madhvo haryan yajñam sadhamāde daśoṇim ||
 10.096.13a apāḥ pūrveṣāṃ harivaḥ sutānām atho idaṃ savanaṃ kevalaṃ te |
 10.096.13c mamaddhi somam madhumantam indra satrā vṛṣaṅ jaṭhara ā vṛṣasva ||

10.097.01a yā oṣadhīḥ pūrvā jātā devebhyas triyugam purā |
 10.097.01c manai nu babhrūṇām ahaṃ śataṃ dhāmāni sapta ca ||
 10.097.02a śataṃ vo amba dhāmāni sahasram uta vo ruhaḥ |
 10.097.02c adhā śatakratvo yūyam imam me agadaṃ kṛta ||
 10.097.03a oṣadhīḥ prati modadhvam puṣpavatiḥ prasūvariḥ |
 10.097.03c aśvā iva sajitvarīr vīrudhaḥ pārayiṣṇvaḥ ||
 10.097.04a oṣadhīr iti mātaraś tad vo devīr upa bruve |
 10.097.04c saneyam aśvaṃ gāṃ vāsa ātmānaṃ tava pūruṣa ||
 10.097.05a aśvatthe vo niṣadanam parṇe vo vasatiḥ kṛtā |
 10.097.05c gobhāja it kilāsatha yat sanavatha pūruṣam ||
 10.097.06a yatrauṣadhīḥ samagmata rājānaḥ samitāv iva |
 10.097.06c vipraḥ sa ucyate bhīṣag rakṣohāmīvacātanaḥ ||
 10.097.07a aśvāvatīm somāvatīm ūrjayantīm udojasam |
 10.097.07c āvīsi sarvā oṣadhīr asmā ariṣṭatātaye ||
 10.097.08a uc chuṣmā oṣadhīnāṃ gāvo goṣṭhād iverate |
 10.097.08c dhanam saniṣyantīnām ātmānaṃ tava pūruṣa ||
 10.097.09a iṣkṛtir nāma vo mātātho yūyaṃ stha niṣkṛtīḥ |
 10.097.09c sīrāḥ patatrinī sthana yad āmayati niṣ kṛtha ||
 10.097.10a ati viśvāḥ pariṣṭhā stena iva vrajam akramuḥ |
 10.097.10c oṣadhīḥ prācucyavur yat kiṃ ca tanvo rapaḥ ||
 10.097.11a yad imā vājayann aham oṣadhīr hasta ādadhe |
 10.097.11c ātmā yakṣmasya naśyati purā jīvaḡṛbho yathā ||
 10.097.12a yasyauṣadhīḥ prasarpathāṅgam-aṅgam paruṣ-paruḥ |
 10.097.12c tato yakṣmaṃ vi bādhadhva ugro madhyamaśīr iva ||
 10.097.13a sākam yakṣma pra pata cāṣeṇa kikiḍivīnā |
 10.097.13c sākam vātasya dhrājyā sākam naśya nihākayā ||
 10.097.14a anyā vo anyām avatv anyānyasyā upāvata |
 10.097.14c tāḥ sarvāḥ samvidānā idam me prāvātā vacaḥ ||
 10.097.15a yāḥ phalinīr yā aphalā apuṣpā yāś ca puṣpiṇīḥ |
 10.097.15c bṛhaspatiprasūtās tā no muñcantv aṃhasaḥ ||
 10.097.16a muñcantu mā śapathyād atho varuṇyād uta |
 10.097.16c atho yamasya paḍbīśāt sarvasmād devakilbīśāt ||
 10.097.17a avapatantīr avadan diva oṣadhayas pari |
 10.097.17c yaṃ jīvam aśnavāmahai na sa riṣyāti pūruṣaḥ ||
 10.097.18a yā oṣadhīḥ somarājñīr bahvīḥ śatavicakṣaṇāḥ |
 10.097.18c tāsāṃ tvam asy uttamāraṃ kāmāya śaṃ hṛde ||

10.097.19a yā oṣadhīḥ somarājñīr viṣṭhitāḥ pṛthivīm anu |
 10.097.19c bṛhaspatiprasūtā asyai saṃ datta vīryam ||
 10.097.20a mā vo riṣat khanitā yasmai cāhaṃ khanāmi vaḥ |
 10.097.20c dvipac catuṣpad asmākaṃ sarvam astv anāturam ||
 10.097.21a yās cedam upaśṛṅvanti yās ca dūram parāgatāḥ |
 10.097.21c sarvāḥ saṃgatya vīrudho 'syai saṃ datta vīryam ||
 10.097.22a oṣadhayaḥ saṃ vadante somena saha rājñā |
 10.097.22c yasmai kṛṇoti brāhmaṇas taṃ rājan pārayāmasi ||
 10.097.23a tvam uttamāsy oṣadhe tava vṛkṣā upastayaḥ |
 10.097.23c upastir astu so 'smākaṃ yo asmāṃ abhidāsati ||

10.098.01a bṛhaspate prati me devatām ihi mitro vā yad varuṇo vāsi pūṣā |
 10.098.01c ādityair vā yad vasubhir marutvān sa parjanyaṃ śaṃtanave vṛṣāya ||
 10.098.02a ā devo dūto ajiraś cikitvān tvad devāpe abhi mām agachat |
 10.098.02c praciṇaḥ prati mām ā vavṛtsva dadhāmi te dyumatīm vācam āsan ||
 10.098.03a asme dhehi dyumatīm vācam āsan bṛhaspate anamivām iṣirām |
 10.098.03c yayā vṛṣṭiṃ śaṃtanave vanāva divo drapso madhumāṃ ā viveśa ||
 10.098.04a ā no drapsā madhumanto viśantv indra dehy adhirathaṃ sahasram |
 10.098.04c ni śida hotram ṛtuthā yajasva devān devāpe haviṣā saparya ||
 10.098.05a ārṣṭiṣeṇo hotram iṣir niśidan devāpir devasumatīm cikitvān |
 10.098.05c sa uttarasmād adharaṃ samudram apo divyā asṛjad varṣyā abhi ||
 10.098.06a asmin samudre adhy uttarasminn āpo devebhir nivṛtā atiṣṭhan |
 10.098.06c tā adravann ārṣṭiṣeṇena sṛṣṭā devāpinā preṣitā mṛkṣiṇiṣu ||
 10.098.07a yad devāpiḥ śaṃtanave purohito hotrāya vṛtaḥ kṛpayann adīdhet |
 10.098.07c devaśrutam vṛṣṭivanim rarāṇo bṛhaspatir vācam asmā ayachat ||
 10.098.08a yaṃ tvā devāpiḥ śūsucāno agna ārṣṭiṣeṇo manuṣyaḥ samīdhe |
 10.098.08c viśvebhir devair anumadyamānaḥ pra parjanyaṃ irayā vṛṣṭimantam ||
 10.098.09a tvām pūrva ṛṣayo gīrbhir āyan tvām adhvareṣu puruhūta viśve |
 10.098.09c sahasrāṇy adhirathāny asme ā no yajñam rohidaśvopa yāhi ||
 10.098.10a etāny agne navatir nava tve āhutāny adhirathā sahasrā |
 10.098.10c tebhir vardhasva tanvaḥ śūra pūrvīr divo no vṛṣṭim iṣito rirīhi ||
 10.098.11a etāny agne navatiṃ sahasrā sam pra yacha vṛṣṇa indrāya bhāgam |
 10.098.11c vidvān patha ṛtuśo devayānān apy aulānaṃ divi deveṣu dhehi ||
 10.098.12a agne bādhasva vi mṛdho vi durgahāpāmivām apa rakṣāmsi sedha |
 10.098.12c asmāt samudrād bṛhato divo no 'pām bhūmānam upa naḥ sṛjeha ||

10.099.01a kaṃ naś citram iṣanyasi cikitvān pṛthugmānaṃ vāśraṃ vāvṛdhadhyai |
 10.099.01c kat tasya dātu śavaso vyuṣṭau takṣad vajraṃ vṛtraturam apinvat ||
 10.099.02a sa hi dyutā vidyutā veti sāma pṛthum yonim asuratvā sasāda |
 10.099.02c sa sanīdebhiḥ prasahāno asya bhrātur na ṛte saptathasya māyāḥ ||
 10.099.03a sa vājam yātāpaduṣpadā yan svarṣatā pari śadat saniṣyan |
 10.099.03c anarvā yac chatadurasya vedo ghnañ chiśnadevāṃ abhi varpasā bhūt ||
 10.099.04a sa yahvyo 'vanīr goṣv arvā juhōti pradhanyāsu sasriḥ |
 10.099.04c apādo yatra yujyāso 'rathā droṇyaśvāsa irate ghṛtam vāḥ ||
 10.099.05a sa rudrebhir aśastavāra ṛbhvā hitvī gayam āreavadya āgāt |
 10.099.05c vamrasya manye mithunā vivavṛī annam abhītyārodayan muṣāyan ||
 10.099.06a sa id dāsam tuvīravam patir dan ṣadākṣam trisīrṣānaṃ damanyat |

10.099.06c asya trito nv ojasā vṛdhāno vipā varāham ayoagrayā han ||
 10.099.07a sa druhvaṇe manuṣa ūrdhvasāna ā sāviṣad arśasānāya śarum |
 10.099.07c sa nṛtamo nahuṣo 'smat sujātaḥ puro 'bhinad arhan dasyuhatye ||
 10.099.08a so abhriyo na yavasa udanyan kṣayāya gātum vidan no asme |
 10.099.08c upa yat sīdad indum śarīraiḥ śyeno 'yopāṣṭir hanti dasyūn ||
 10.099.09a sa vrādhataḥ śavasānebhir asya kutsāya śuṣṇam kṛpaṇe parādāt |
 10.099.09c ayaṃ kavim anayac chasyamānam atkaṃ yo asya sanitota nṛṇām ||
 10.099.10a ayaṃ daśasyan naryebhir asya dasmo devebhir varuṇo na māyī |
 10.099.10c ayaṃ kanīna ṛtupā avedy amimitārarum yaś catuṣpāt ||
 10.099.11a asya stomebhir auśija ṛjīsvā vrajaṃ darayad vṛṣabheṇa piproḥ |
 10.099.11c sutvā yad yajato dīdayad gīḥ pura iyāno abhi varpasā bhūt ||
 10.099.12a evā maho asura vakṣathāya vamrakaḥ paḍbhir upa sarpad indram |
 10.099.12c sa iyānaḥ karati svastim asmā iṣam ūrjaṃ sukṣitim viśvam ābhāḥ ||

10.100.01a indra dṛhya maghavan tvāvad id bhujā iha stutaḥ sutapā bodhi no vṛdhe |
 10.100.01c devebhir naḥ savitā prāvatu śrutam ā sarvatātim aditiṃ vṛṇīmahe ||
 10.100.02a bharāya su bharata bhāgam ṛtviyam pra vāyave śucipe krandadiṣṭaye |
 10.100.02c gaurasya yaḥ payasaḥ pītim ānaśa ā sarvatātim aditiṃ vṛṇīmahe ||
 10.100.03a ā no devaḥ savitā sāviṣad vāya ṛjūyate yajamānāya sunvate |
 10.100.03c yathā devān pratibhūṣema pākavad ā sarvatātim aditiṃ vṛṇīmahe ||
 10.100.04a indro asme sumanā astu viśvahā rājā somaḥ suvitasyādhy etu naḥ |
 10.100.04c yathā-yathā mitradhitāni saṃdadhur ā sarvatātim aditiṃ vṛṇīmahe ||
 10.100.05a indra ukthena śavasā parur dadhe bṛhaspate prataritāsy āyuṣaḥ |
 10.100.05c yajño manuḥ pramatir naḥ pitā hi kam ā sarvatātim aditiṃ vṛṇīmahe ||
 10.100.06a indrasya nu sukṛtaṃ daivyaṃ saho 'gnir gṛhe jaritā medhiraḥ kaviḥ |
 10.100.06c yajñaś ca bhūd vidathe cārur antama ā sarvatātim aditiṃ vṛṇīmahe ||
 10.100.07a na vo guhā cakṛma bhūri duṣkṛtaṃ nāviṣṭyaṃ vasavo devaheḍanam |
 10.100.07c mākir no devā anṛtasya varpasa ā sarvatātim aditiṃ vṛṇīmahe ||
 10.100.08a apāmivāṃ savitā sāviṣan nyag varīya id apa sedhantv adrayaḥ |
 10.100.08c grāvā yatra madhuṣud ucyate bṛhad ā sarvatātim aditiṃ vṛṇīmahe ||
 10.100.09a ūrdhvo grāvā vasavo 'stu sotari viśvā dveṣāmsi sanutar yuyota |
 10.100.09c sa no devaḥ savitā pāyur iḍya ā sarvatātim aditiṃ vṛṇīmahe ||
 10.100.10a ūrjaṃ gāvo yavase pīvo attana ṛtasya yāḥ sadane kośe aṅgdhve |
 10.100.10c tanūr eva tanvo astu bheṣajam ā sarvatātim aditiṃ vṛṇīmahe ||
 10.100.11a kratuprāvā jaritā śasvatām ava indra id bhadrā pramatiḥ sutāvatām |
 10.100.11c pūrṇam ūdhar divyaṃ yasya siktaya ā sarvatātim aditiṃ vṛṇīmahe ||
 10.100.12a citras te bhānuḥ kratuprā abhiṣṭiḥ santi spṛdho jaraṇiprā adhrṣṭāḥ |
 10.100.12c rajiṣṭhayā rajyā paśva ā gos tūtūrṣaty pary agram duvasyuh ||

10.101.01a ud budhyadhvam samanasaḥ sakhāyaḥ sam agnim indhvam bahavaḥ sanīdāḥ |
 10.101.01c dadhikrām agnim uṣasam ca devīm indrāvato 'vase ni hvaye vaḥ ||
 10.101.02a mandrā kṛṇudhvam dhiya ā tanudhvam nāvam aritraparaṇim kṛṇudhvam |
 10.101.02c iṣkṛṇudhvam āyudhāram kṛṇudhvam prāñcam yajnam pra ṇayatā sakhāyaḥ ||
 10.101.03a yunakta sirā vi yugā tanudhvam kṛte yonau vapateha bijam |
 10.101.03c girā ca śruṣṭiḥ sabharā asan no nedīya it sṛṇyaḥ pakvam eyāt ||
 10.101.04a sirā yuñjanti kavayo yugā vi tanvate pṛthak |
 10.101.04c dhīrā deveṣu sumnayā ||

10.101.05a nir āhāvān kṛṇotana saṃ varatrā dadhātana |
 10.101.05c siñcāmāhā avatam udriṇaṃ vayaṃ suṣekam anupakṣitam ||
 10.101.06a iṣkṛtāhāvam avataṃ suvaratraṃ suṣecanam |
 10.101.06c udriṇaṃ siñce akṣitam ||
 10.101.07a prīṇitāśvān hitaṃ jayātha svastivāhaṃ ratham it kṛṇudhvam |
 10.101.07c droṇāhāvam avatam āsmacakram aṃsatrakośaṃ siñcatā nṛpāṇam ||
 10.101.08a vrajaṃ kṛṇudhvaṃ sa hi vo nṛpāṇo varma sīvyadhvam bahulā pṛthūni |
 10.101.08c puraḥ kṛṇudhvam āyasīr adhrṣṭā mā vaḥ susroc camaso dṛmhatā tam ||
 10.101.09a ā vo dhiyaṃ yajñiyāṃ varta ūtaye devā devīm yajatāṃ yajñiyām iha |
 10.101.09c sā no duhiyad yavaseva gatvī sahasradhārā payasā mahī gauḥ ||
 10.101.10a ā tū siñca harim im dror upasthe vāsībhis takṣatāśmanmayībhiḥ |
 10.101.10c pari ṣvajadhvaṃ daśa kakṣyābhir ubhe dhurau prati vahnim yunakta ||
 10.101.11a ubhe dhurau vahnir āpibdamāno 'ntar yoneva carati dvijāniḥ |
 10.101.11c vanaspatiṃ vana āsthāpayadhvaṃ ni ṣū dadhidhvam akhananta utsam ||
 10.101.12a kapṛn naraḥ kapṛtham ud dadhātana codayata khudata vājasātaye |
 10.101.12c niṣṭigryaḥ putram ā cyāvayotaya indraṃ sabādha iha somapitaye ||

10.102.01a pra te ratham mithūkṛtam indro 'vatu dhṛṣṇuyā |
 10.102.01c asminn ājau puruhūta śravāyve dhanabhakṣeṣu no 'va ||
 10.102.02a ut sma vāto vahati vāso 'syā adhirathaṃ yad ajayat sahasram |
 10.102.02c rathir abhūn mudgalānī gaviṣṭau bhare kṛtaṃ vy aced indrasenā ||
 10.102.03a antar yacha jighāmsato vajram indrābhidāsataḥ |
 10.102.03c dāsasya vā maghavann āryasya vā sanutar yavayā vadham ||
 10.102.04a udno hradam apibaj jarhṛṣāṇaḥ kūṭaṃ sma tṛṃhad abhimātim eti |
 10.102.04c pra muṣkabhāraḥ śrava ichamāno 'jiram bāhū abharat siṣāsan ||
 10.102.05a ny akrandayann upayanta enam amehayan vṛṣabham madhya ājeḥ |
 10.102.05c tena sūbharvaṃ śatavat sahasraṃ gavām mudgalaḥ pradhane jigāya ||
 10.102.06a kakardave vṛṣabho yukta āsīd avāvacīt sārathir asya keśī |
 10.102.06c dudher yuktasya dravataḥ sahānasa ṛchanti śmā niṣpado mudgalānim ||
 10.102.07a uta pradhim ud ahann asya vidvān upāyunag vaṃsagam atra śikṣan |
 10.102.07c indra ud āvat patim aghnyānām araṃhata padyābhiḥ kakudmān ||
 10.102.08a śunam aṣṭrāvya acarat kapardī varatrāyāṃ dārv ānahyamānaḥ |
 10.102.08c nṛmṇāni kṛṇvan bahave janāya gāḥ paspaśānas taviṣīr adhatta ||
 10.102.09a imaṃ tam paśya vṛṣabhasya yuñjaṃ kāṣṭhāyā madhye drughaṇaṃ śayānam |
 10.102.09c yena jigāya śatavat sahasraṃ gavām mudgalaḥ pṛtanājyeṣu ||
 10.102.10a āre aghā ko nv itthā dadarśa yaṃ yuñjanti tam v ā sthāpayanti |
 10.102.10c nāsmāi tṛṇaṃ nodakam ā bharanty uttaro dhuro vahati pradediśat ||
 10.102.11a parivṛkteva patividyam ānaṭ pīpyānā kūcakreṇeva siñcan |
 10.102.11c eṣaiṣyā cid rathyā jayema sumaṅgalaṃ sinavad astu sātam ||
 10.102.12a tvam viśvasya jagataś cakṣur indrāsi cakṣuṣaḥ |
 10.102.12c vṛṣā yad ājim vṛṣaṇā siṣāsasi codayan vadhrinā yujā ||

10.103.01a āsuḥ śisāno vṛṣabho na bhīmo ghanāghanaḥ kṣobhaṇaś carṣaṇinām |
 10.103.01c saṃkrandano 'nimiṣa ekavīraḥ śataṃ senā ajayat sākam indraḥ ||
 10.103.02a saṃkrandanenānimiṣeṇa jiṣṇunā yutkāreṇa duścyavanena dhṛṣṇunā |
 10.103.02c tad indreṇa jayata tat sahadhvaṃ yudho nara iṣuhastena vṛṣṇā ||
 10.103.03a sa iṣuhastaiḥ sa niṣaṅgibhir vaśī samsraṣṭā sa yudha indro gaṇena |

10.103.03c samsr̥ṣṭajit somapā bāhuśardhy ugradhanvā pratihitābhir astā ||
 10.103.04a bṛhaspate pari diyā rathena rakṣohāmitrāṃ apabādhamānaḥ |
 10.103.04c prabhañjan senāḥ pramṛṇo yudhā jayann asmākam edhy avitā rathānām ||
 10.103.05a balavijñāya sthaviraḥ praviraḥ sahasvān vājī sahamāna ugraḥ |
 10.103.05c abhivīro abhisatvā sahojā jaitram indra ratham ā tiṣṭha govit ||
 10.103.06a gotrabhidam govidam vajrabāhum jayantam ajma pramṛṇantam ojasā |
 10.103.06c imaḥ sajātā anu vīrayadhvam indram sakhāyo anu saḥ rabhadhvam ||
 10.103.07a abhi gotrāṇi sahasā gāhamāno 'dayo viraḥ śatamanyur indraḥ |
 10.103.07c duścyavanaḥ pṛtanāśād ayudhyo 'smākam senā avatu pra yutsu ||
 10.103.08a indra āsām netā bṛhaspatir dakṣiṇā yajñāḥ pura etu somaḥ |
 10.103.08c devasenānām abhibhañjatinām jayantinām maruto yantv agram ||
 10.103.09a indrasya vṛṣṇo varuṇasya rājña ādityānām marutām śardha ugram |
 10.103.09c mahāmanasām bhuvanacyavānām ghoṣo devānām jayatām ud asthāt ||
 10.103.10a ud dharṣaya maghavann āyudhāny ut satvanām māmakānām manāṃsi |
 10.103.10c ud vṛtrahan vājinām vājināny ud rathānām jayatām yantu ghoṣāḥ ||
 10.103.11a asmākam indraḥ samṛteṣu dhvajeṣv asmākam yā iṣavas tā jayantu |
 10.103.11c asmākam virā uttare bhavantv asmāṃ u devā avatā haveṣu ||
 10.103.12a amīṣām cittam pratilobhayantī gṛhāṅgāny apve parehi |
 10.103.12c abhi prehi nir daha hr̥tsu śokair andhenāmitrās tamasā sacantām ||
 10.103.13a pretā jayatā nara indro vaḥ śarma yachatu |
 10.103.13c ugrā vaḥ santu bāhavo 'nādhṛṣyā yathāsatha ||

10.104.01a asāvi somaḥ puruhūta tubhyam haribhyām yajñam upa yāhi tūyam |
 10.104.01c tubhyam giro vipravirā iyānā dadhanvira indra pibā sutasya ||
 10.104.02a apsu dhūtasya harivaḥ pibeha nṛbhiḥ sutasya jaṭharam pṛnasva |
 10.104.02c mimikṣur yam adraya indra tubhyam tebhira vardhasva madam ukthavāhaḥ ||
 10.104.03a progrām pītiṃ vṛṣṇa iyarmi satyām prayai sutasya haryaśva tubhyam |
 10.104.03c indra dhenābhir iha mādayasva dhībhir viśvābhiḥ śacyā gṛṇānaḥ ||
 10.104.04a ūti śacīvas tava vīryeṇa vayo dadhānā usija ṛtajñāḥ |
 10.104.04c prajāvad indra manuṣo duroṇe tasthur gṛṇantaḥ sadhamādyāsaḥ ||
 10.104.05a praṇītibhiḥ te haryaśva suṣṭoḥ suṣumnasya pururuco janāsaḥ |
 10.104.05c mamhiṣṭhām ūtiṃ vitire dadhānā stotāra indra tava sūnṛtābhiḥ ||
 10.104.06a upa brahmāṇi harivo haribhyām somasya yāhi pītaye sutasya |
 10.104.06c indra tvā yajñāḥ kṣamamāṇam ānaḍ dāśvāṃ asy adhvarasya praketaḥ ||
 10.104.07a sahasravājam abhimātiśāham suterāṇam maghavānam suvr̥ktim |
 10.104.07c upa bhūṣanti giro apratitam indram namasyā jarituḥ pananta ||
 10.104.08a saptāpo devīḥ suraṇā amṛktā yābhiḥ sindhum atara indra pūrbhit |
 10.104.08c navatiṃ srotyā nava ca sravanti devebhyo gātum manuṣe ca vindaḥ ||
 10.104.09a apo mahīr abhisaster amuñco 'jāgar āsv adhi deva ekaḥ |
 10.104.09c indra yās tvaṃ vṛtratūrye cakārtha tābhir viśvāyus tanvam pupuṣyāḥ ||
 10.104.10a vīreṇyaḥ kratuḥ indraḥ susastir utāpi dhenā puruhūtam iṭṭe |
 10.104.10c ārdyad vṛtram akṛṇod ulokaḥ sasāhe śakraḥ pṛtanā abhiṣṭiḥ ||
 10.104.11a śunam huvema maghavānam indram asmin bhare nṛtamam vājasātau |
 10.104.11c śṛṇvantam ugram ūtaye samatsu ghnantaḥ vṛtrāṇi samjitaḥ dhanānām ||

10.105.01a kadā vaso stotram haryata āva śmaśā rudhad vāḥ |
 10.105.01c dīrgham sutam vātāpyāya ||

10.105.02a harī yasya suyujā vivratā ver arvantānu śepā |
 10.105.02c ubhā rajī na keśinā patir dan ||
 10.105.03a apa yor indraḥ pāpaja ā marto na śasramāṇo bibhivān |
 10.105.03c śubhe yad yuyuje taviṣivān ||
 10.105.04a sacāyor indraś carikṛṣa āṁ upānasaḥ saparyan |
 10.105.04c nadayor vivratayoḥ sūra indraḥ ||
 10.105.05a adhi yas tasthau keśavantā vyacasvantā na puṣṭyai |
 10.105.05c vanoti śiprābhyāṁ śipriṇivān ||
 10.105.06a prāstaud ṛṣvaujā ṛṣvebhis tatakṣa sūraḥ śavasā |
 10.105.06c ṛbhur na kratubhir mātariśvā ||
 10.105.07a vajraṁ yaś cakre suhanāya dasyave hirīmaśo hirīmān |
 10.105.07c arutahanur adbhutaṁ na rajaḥ ||
 10.105.08a ava no vṛjinā śiśihy ṛcā vanemānṛcaḥ |
 10.105.08c nābrahmā yajña ṛdhag joṣati tve ||
 10.105.09a ūrdhvā yat te tretinī bhūd yajñasya dhūrṣu sadman |
 10.105.09c sajūr nāvaṁ svayaśasaṁ sacāyoḥ ||
 10.105.10a śriye te pṛṣṇir upasecanī bhūc chriye darvir arepāḥ |
 10.105.10c yayā sve pātre siñcasa ut ||
 10.105.11a śataṁ vā yad asurya prati tvā sumitra itthāstaud durmitra itthāstaut |
 10.105.11c āvo yad dasyuhatye kutsaputram prāvo yad dasyuhatye kutsavatsam ||

10.106.01a ubhā u nūnaṁ tad id arthayethe vi tanvāthe dhiyo vastrāpaseva |
 10.106.01c sadhrīcīnā yātave prem ajigaḥ sudineva pṛkṣa ā tamsayethe ||
 10.106.02a uṣṭāreva pharvareṣu śrayethe prāyogeva śvātryā śāsura ethaḥ |
 10.106.02c dūteva hi ṣṭho yaśasā janeṣu māpa sthātam mahiṣevāvapānāt ||
 10.106.03a sākamyujā śakunasyeva pakṣā paśveva citrā yajur ā gamiṣtam |
 10.106.03c agnir iva devayor dīdivāmsā pariṣmāneva yajathaḥ purutrā ||
 10.106.04a āpī vo asme pitareva putrogreva rucā nṛpatīva turyai |
 10.106.04c iryeva puṣṭyai kiraṇeva bhujyai śruṣṭivāneva havam ā gamiṣtam ||
 10.106.05a vaṁsageva pūṣaryā śimbātā mitreva ṛtā śatarā śatapantā |
 10.106.05c vājevocā vayasā gharṁyeṣṭhā meṣeveṣā saparyā puriṣā ||
 10.106.06a sṛṇyeva jarbharī turpharītū naitośeva turpharī parpharīkā |
 10.106.06c udanyajeva jemanā maderū tā me jarāyva ajaram marāyu ||
 10.106.07a pajreva carcaram jāram marāyu kṣadmevārtheṣu tartarītha ugrā |
 10.106.07c ṛbhū nāpat kharamajrā kharajrur vāyur na parpharat kṣayad rayiṇām ||
 10.106.08a gharṁeva madhu jaṭhare sanerū bhagevitā turpharī phārivāram |
 10.106.08c patareva cacarā candranirṇiṇ manarṅgā mananyā na jagmī ||
 10.106.09a bṛhanteva gambhareṣu pratiṣṭhām pādeva gādham tarate vidāthaḥ |
 10.106.09c karṇeva śāsura anu hi smarātho 'mśeva no bhajataṁ citram apnaḥ ||
 10.106.10a āraṅgareva madhv erayethe sārāgheva gavi nīcinabāre |
 10.106.10c kināreva svedam āsiṣvidānā kṣāmevorjā sūyavasāt sacethe ||
 10.106.11a ṛdhyāma stomaṁ sanuyāma vājam ā no mantraṁ sarathehopa yātam |
 10.106.11c yaśo na pakvam madhu goṣv antar ā bhūtāmśo aśvinoḥ kāmam aprāḥ ||

10.107.01a āvir abhūn mahi māghonam eṣāṁ viśvaṁ jīvaṁ tamaso nir amoci |
 10.107.01c mahi jyotiḥ pitṛbhir dattam āgād uruḥ panthā dakṣiṇāyā adarśi ||
 10.107.02a uccā divi dakṣiṇāvanto asthur ye aśvadāḥ saha te sūryeṇa |

10.107.02c hiraṇyadā amṛtatvam bhajante vāsodāḥ soma pra tiranta āyuhḥ ||
 10.107.03a daivī pūrtir dakṣiṇā devayajyā na kavāribhyo nahi te pṛṇanti |
 10.107.03c athā naraḥ prayatadakṣiṇāso 'vadyabhiyā bahavaḥ pṛṇanti ||
 10.107.04a śatadhāraṃ vāyum arkaṃ svarvidam nṛcākṣasas te abhi cakṣate haviḥ |
 10.107.04c ye pṛṇanti pra ca yachanti saṅgame te dakṣiṇāṃ duhate saptamātaram ||
 10.107.05a dakṣiṇāvān prathamo hūta eti dakṣiṇāvān grāmaṇir agram eti |
 10.107.05c tam eva manye nṛpatim janānām yaḥ prathamo dakṣiṇām āvivāya ||
 10.107.06a tam eva ṛṣim tam u brahmāṇam āhur yajñanyaṃ sāmagām ukthaśāsam |
 10.107.06c sa śukrasya tanvo veda tisro yaḥ prathamo dakṣiṇayā rarādha ||
 10.107.07a dakṣiṇāśvam dakṣiṇā gāṃ dadāti dakṣiṇā candram uta yad dhiraṇyam |
 10.107.07c dakṣiṇānnaṃ vanute yo na ātmā dakṣiṇāṃ varma kṛṇute vijānan ||
 10.107.08a na bhojā mamrur na nyartham iyur na riṣyanti na vyathante ha bhojāḥ |
 10.107.08c idaṃ yad viśvam bhuvanaṃ svas caitat sarvaṃ dakṣiṇaibhyo dadāti ||
 10.107.09a bhojā jigyuḥ surabhiṃ yonim agre bhojā jigyur vadhvam yā suvāsāḥ |
 10.107.09c bhojā jigyur antaḥpeyaṃ surāyā bhojā jigyur ye ahūtāḥ prayanti ||
 10.107.10a bhojāyāśvam sam mṛjanty āsum bhojāyāste kanyā śumbhamānā |
 10.107.10c bhojasyedam puṣkariṇīva veśma pariṣkṛtaṃ devamāneva citram ||
 10.107.11a bhojam aśvāḥ suṣṭhuvāho vahanti suvṛd ratho vartate dakṣiṇāyāḥ |
 10.107.11c bhojaṃ devāso 'vatā bhareṣu bhojaḥ śatrūn samanikeṣu jetā ||

10.108.01a kim ichantī saramā predam ānaḍ dūre hy adhvā jaguriḥ parācaiḥ |
 10.108.01c kāsmehitiḥ kā paritakmyāsīt katham rasāyā ataraḥ payāmsi ||
 10.108.02a indrasya dūtīr iṣitā carāmi maha ichantī paṇayo nidhīn vaḥ |
 10.108.02c atiṣkado bhiyasā tan na āvat tathā rasāyā ataram payāmsi ||
 10.108.03a kidṛṇṇ indraḥ sarame kā dṛśikā yasyedaṃ dūtīr asaraḥ parākāt |
 10.108.03c ā ca gachān mitram enā dadhāmāthā gavāṃ gopatir no bhavāti ||
 10.108.04a nāham taṃ veda dabhyaṃ dabhat sa yasyedaṃ dūtīr asaram parākāt |
 10.108.04c na taṃ gūhanti sravato gabhīrā hatā indreṇa paṇayaḥ śayadhve ||
 10.108.05a imā gāvaḥ sarame yā aichaḥ pari divo antān subhage patantī |
 10.108.05c kas ta enā ava sṛjād ayudhvy utāsmākam āyudhā santi tigmā ||
 10.108.06a asenyā vaḥ paṇayo vacāṃsy aniṣavyās tanvaḥ santu pāpīḥ |
 10.108.06c adhrṣṭo va etavā astu panthā bṛhaspatir va ubhayā na mṛdāt ||
 10.108.07a ayaṃ nidhiḥ sarame adribudhno gobhir aśvebhir vasubhir nyṛṣṭaḥ |
 10.108.07c rakṣanti tam paṇayo ye sugopā reku padam alakam ā jagantha ||
 10.108.08a eha gamann ṛṣayaḥ somaśitā ayāsyo aṅgirasō navagvāḥ |
 10.108.08c ta etam ūrvaṃ vi bhajanta gonām athaitad vacaḥ paṇayo vamann it ||
 10.108.09a evā ca tvaṃ sarama ājagantha prabādhitā sahasā daivyena |
 10.108.09c svasāraṃ tvā kṛṇavai mā punar gā apa te gavāṃ subhage bhajāma ||
 10.108.10a nāham veda bhrātṛtvaṃ no svasṛtvam indro vidur aṅgirasas ca ghorāḥ |
 10.108.10c gokāmā me achadayan yad āyam apāta ita paṇayo variyaḥ ||
 10.108.11a dūram ita paṇayo variya ud gāvo yantu minatīr ṛtena |
 10.108.11c bṛhaspatir yā avindan nigūḍhāḥ somo grāvāṇa ṛṣayaś ca viprāḥ ||

10.109.01a te 'vadan prathamā brahmakilbiṣe 'kūpāraḥ salilo mātariśvā |
 10.109.01c vīduharās tapa ugro mayobhūr āpo devīḥ prathamajā ṛtena ||
 10.109.02a somo rājā prathamo brahmajāyām punaḥ prāyachad ahṛṇīyamānaḥ |
 10.109.02c anvaritā varuṇo mitra āsīd agnir hotā hastagrhyā nināya ||

10.109.03a hastenaiva grāhya ādhir asyā brahmajāyeyam iti ced avocan |
 10.109.03c na dūtāya prahye tastha eṣā tathā rāṣṭraṃ gupitaṃ kṣatriyasya ||
 10.109.04a devā etasyām avadanta pūrve saptarṣayas tapase ye niṣeduḥ |
 10.109.04c bhīmā jāyā brāhmaṇasyopanītā durdhām dadhāti parame vyoman ||
 10.109.05a brahmacārī carati veviṣad viṣaḥ sa devānām bhavaty ekam aṅgam |
 10.109.05c tena jāyām anv avindad bṛhaspatiḥ somena nītām juhvaṃ na devāḥ ||
 10.109.06a punar vai devā adaduḥ punar manuṣyā uta |
 10.109.06c rājānaḥ satyaṃ kṛṇvānā brahmajāyām punar daduḥ ||
 10.109.07a punardāya brahmajāyām kṛtvī devair nikilbiṣam |
 10.109.07c ūrjam pṛthivyā bhaktvāyorugāyam upāsate ||

10.110.01a samiddho adya manuṣo duroṇe devo devān yajasi jātavedaḥ |
 10.110.01c ā ca vaha mitramahaś cikitvān tvam dūtaḥ kavir asi pracetāḥ ||
 10.110.02a tanūnapāt patha ṛtasya yānān madhvā samañjan svadayā sujihva |
 10.110.02c manmāni dhībhir uta yajñam ṛndhan devatrā ca kṛṇuhy adhvaram naḥ ||
 10.110.03a ājuhvāna idyo vandyas cā yāhy agne vasubhiḥ sajoṣāḥ |
 10.110.03c tvam devānām asi yahva hotā sa enān yakṣiṣito yajiyān ||
 10.110.04a prācīnam barhiḥ pradiśā pṛthivyā vastor asyā vṛjyate agre ahnām |
 10.110.04c vy u prathate vitaram variyo devebhyo aditaye syonam ||
 10.110.05a vyacasvatīr urviyā vi śrayantām patibhyo na janayaḥ śumbhamānāḥ |
 10.110.05c devīr dvāro bṛhatīr viśvaminvā devebhyo bhavata suprāyaṇāḥ ||
 10.110.06a ā suṣvayantī yajate upāke uṣāsānaktā sadatām ni yonau |
 10.110.06c divye yoṣaṇe bṛhatī surukme adhi śriyaṃ śukrapīśam dadhāne ||
 10.110.07a daivyā hotārā prathamā suvācā mimānā yajñam manuṣo yajadhyai |
 10.110.07c pracodayantā vidatheṣu kārū prācīnam jyotiḥ pradiśā diśantā ||
 10.110.08a ā no yajñam bhāratī tūyam etv idā manuṣvad iha cetayantī |
 10.110.08c tisro devīr barhir edam syonam sarasvatī svapasah sadantu ||
 10.110.09a ya ime dyāvāpṛthivī janitrī rūpair apimśad bhuvanāni viśvā |
 10.110.09c tam adya hotar iṣito yajiyān devam tvaṣṭāram iha yakṣi vidvān ||
 10.110.10a upāvasṛja tmanyā samañjan devānām pātha ṛtuthā havimṣi |
 10.110.10c vanaspatiḥ śamitā devo agniḥ svadantu havyam madhunā ghr̥tena ||
 10.110.11a sadyo jāto vy amimita yajñam agnir devānām abhavat purogāḥ |
 10.110.11c asya hotuḥ pradiśy ṛtasya vāci svāhākṛtam havir adantu devāḥ ||

10.111.01a manīṣiṇaḥ pra bharadhvam manīṣam yathā-yathā matayaḥ santi nṛṇām |
 10.111.01c indram satyair erayāmā kṛtebhiḥ sa hi viro girvaṇasyur vidānaḥ ||
 10.111.02a ṛtasya hi sadaso dhītīr adyaut sam gārṣṭeyo vṛṣabho gobhir ānaḥ |
 10.111.02c ud atiṣṭhat taviṣeṇā ravena mahānti cit sam vivyācā rajāmsi ||
 10.111.03a indraḥ kila śrutyā asya veda sa hi jiṣṇuḥ pathikṛt sūryāya |
 10.111.03c ān menām kṛṇvann acyuto bhuvad goḥ patir divaḥ sanajā apratitaḥ ||
 10.111.04a indro mahnā mahato arṇavasya vratāminād aṅgirobhir gr̥ṇānaḥ |
 10.111.04c purūṇi cin ni tatānā rajāmsi dādihāra yo dharuṇam satyatātā ||
 10.111.05a indro divaḥ pratimānam pṛthivyā viśvā veda savanā hanti śuṣṇam |
 10.111.05c mahim cid dyām ātanot sūryeṇa cāskambha cit kambhanena skabhīyān ||
 10.111.06a vajreṇa hi vṛtrahā vṛtram astar adevasya sūśuvānasya māyāḥ |
 10.111.06c vi dhṛṣṇo atra dhṛṣatā jaghanthāthābhavo maghavan bāhvojāḥ ||
 10.111.07a sacanta yad uṣasaḥ sūryeṇa citrām asya ketavo rām avindan |

- 10.111.07c ā yan nakṣatram dadṛṣe divo na punar yato nakir addhā nu veda ||
10.111.08a dūram kila prathamā jagmur āsām indrasya yāḥ prasave sasrur āpaḥ |
10.111.08c kva svid agram kva budhna āsām āpo madhyam kva vo nūnam antaḥ ||
10.111.09a sṛjaḥ sindhūṁ ahinā jagrasānām ād id etāḥ pra vivijre javena |
10.111.09c mumukṣamānā uta yā mumucre 'dhed etā na ramante nitiktāḥ ||
10.111.10a sadhrīcīḥ sindhum uśatīr ivāyan sanāj jāra āritaḥ pūrbhid āsām |
10.111.10c astam ā te pārthivā vasūny asme jagmuḥ sūnṛtā indra pūrvīḥ ||
- 10.112.01a indra piba pratikāmaḥ sutasya prātaḥsāvas tava hi pūrvapītiḥ |
10.112.01c harṣasva hantave śūra śatrūn ukthebhiḥ ṭe vīryā pra bravāma ||
10.112.02a yas te ratho manaso javiyān endra tena somapeyāya yāhi |
10.112.02c tūyam ā te harayaḥ pra dravantu yebhir yāsi vṛṣabhir mandamānaḥ ||
10.112.03a haritvatā varcasā sūryasya śreṣṭhai rūpais tanvaḥ sparśayasva |
10.112.03c asmābhir indra sakhībhir huvānaḥ sadhrīcīno mādayasvā niśadya ||
10.112.04a yasya tyat te mahimānam madeṣv ime mahī rodasī nāviviktām |
10.112.04c tad oka ā haribhir indra yuktaiḥ priyebhir yāhi priyam annam acha ||
10.112.05a yasya śasvat papivāṁ indra śatrūn anānukṛtyā raṇyā cakartha |
10.112.05c sa te puramdhim taviṣīm iyarti sa te madāya suta indra somaḥ ||
10.112.06a idaḥ te pātram sanavittam indra pibā somam enā śatakṛato |
10.112.06c pūrṇa āhāvo madirasya madhvo yaḥ viśva id abhīharyanti devāḥ ||
10.112.07a vi hi tvām indra purudhā janāso hitaprayaso vṛṣabha hvayante |
10.112.07c asmākaḥ te madhumattamānimā bhuvan savanā teṣu harya ||
10.112.08a pra ta indra pūrvyāṇi pra nūnam vīryā vocam prathamā kṛtāni |
10.112.08c satīnamanyur aśrathāyo adriḥ suvedanām akṛṇor brahmaṇe gām ||
10.112.09a ni ṣu sīda gaṇapate gaṇeṣu tvām āhur vipratamaḥ kavīnām |
10.112.09c na ṛte tvat kriyate kiṁ canāre mahām arkam maghavañ citram arca ||
10.112.10a abhīkhyā no maghavan nādhamānān sakhe bodhi vasupate sakhīnām |
10.112.10c raṇam kṛdhi raṇakṛt satyaśuṣmābhakte cid ā bhajā rāye asmān ||
- 10.113.01a tam asya dyāvāpṛthivī sacetasā viśvebhir devair anu śuṣmam āvatām |
10.113.01c yad ait kṛṇvāno mahimānam indriyam pītvī somasya kratumāṁ avaradhata ||
10.113.02a tam asya viṣṇur mahimānam ojasāmśuḥ dadhanvān madhuno vi rapśate |
10.113.02c devebhir indro maghavā sayāvabhir vṛtram jaghanvāṁ abhavad vareṇyaḥ ||
10.113.03a vṛtreṇa yad ahinā bibhrad āyudhā samasthithā yudhaye śaṁsam āvide |
10.113.03c viśve te atra marutaḥ saha tmanāvardhann ugra mahimānam indriyam ||
10.113.04a jajñāna eva vy abādhata sṛdhaḥ prāpaśyad viro abhi paumśyaḥ raṇam |
10.113.04c avṛścad adriḥ ava sasyadaḥ sṛjad astabhnān nākaḥ svapasyayā pṛthum ||
10.113.05a ād indraḥ satrā taviṣīr apatyata variyo dyāvāpṛthivī abādhata |
10.113.05c avābharad dhṛṣito vajram āyasaḥ śevam mitrāya varuṇāya dāśuṣe ||
10.113.06a indrasyātra taviṣībhyo virapśina ṛghāyato aramhayanta manyave |
10.113.06c vṛtram yad ugro vy avṛścad ojasāpo bibhrataḥ tamasā parivṛtam ||
10.113.07a yā vīryāṇi prathamāni kartvā mahitvebhir yatamānau samīyatuḥ |
10.113.07c dhvāntam tamo 'va dadhvase hata indro mahnā pūrvahūtāv apatyata ||
10.113.08a viśve devāso adha vṛṣṇyāni te 'vardhayan somavatyā vacasyayā |
10.113.08c raddham vṛtram ahim indrasya hanmanāgnir na jambhais tṛṣv annam āvayat ||
10.113.09a bhūri dakṣebhir vacanebhir ṛkvabhiḥ sakhyebhiḥ sakhyāni pra vocata |
10.113.09c indro dhuniḥ ca cumuriḥ ca dambhayañ chraddhāmanasyā śṛṇute dabhītaye ||

- 10.113.10a tvam purūṇy ā bharā svaśvyā yebhir maṃsai nivacanāni śaṃsan |
10.113.10c sugebhir viśvā duritā tarema vido ṣu ṇa urviyā gādham adya ||
- 10.114.01a gharmā samantā trivṛtaṃ vy āpatus tayor juṣṭim mātariśvā jagāma |
10.114.01c divas payo didhiṣāṇā aveṣan vidur devāḥ sahasāmānam arkam ||
10.114.02a tisro deṣṭrāya nirrtir upāsate dirghaśruto vi hi jānanti vahnayaḥ |
10.114.02c tāsām ni cikyuḥ kavayo nidānam pareṣu yā guhyeṣu vrateṣu ||
10.114.03a catuṣkapardā yuvatih supeśā ghṛtapratikā vayunāni vaste |
10.114.03c tasyām suparnā vṛṣaṇā ni ṣedatur yatra devā dadhire bhāgadheyam ||
10.114.04a ekaḥ suparnaḥ sa samudram ā viveśa sa idam viśvam bhuvanam vi caṣṭe |
10.114.04c tam pākena manasāpaśyam antitas tam mātā reḍhi sa u reḍhi mātaram ||
10.114.05a suparnam viprāḥ kavayo vacobhir ekaṃ santam bahudhā kalpayanti |
10.114.05c chandāṃsi ca dadhato adhvareṣu grahān somasya mimate dvādaśa ||
10.114.06a ṣaṭtriṃśāṃś ca caturaḥ kalpayantaś chandāṃsi ca dadhata ādvādaśam |
10.114.06c yajñam vimāya kavayo manīṣa ṛksāmābhyām pra ratham vartayanti ||
10.114.07a caturdaśānye mahimāno asya taṃ dhīrā vācā pra ṇayanti sapta |
10.114.07c āpnānam tirtham ka iha pra vocad yena pathā prapibante sutasya ||
10.114.08a sahasradhā pañcadaśāny ukthā yāvad dyāvapṛthivī tāvad it tat |
10.114.08c sahasradhā mahimānaḥ sahasram yāvad brahma viṣṭhitam tāvatī vāk ||
10.114.09a kaś chandasām yogam ā veda dhīraḥ ko dhiṣṇyām prati vācam papāda |
10.114.09c kam ṛtvijām aṣṭamaṃ sūram āhur harī indrasya ni cikāya kaḥ svit ||
10.114.10a bhūmyā antam pary eke caranti rathasya dhūrṣu yuktāso asthuḥ |
10.114.10c śramasya dāyam vi bhajanty ebhyo yadā yamo bhavati harmye hitaḥ ||
- 10.115.01a citra ic chiśos taruṇasya vakṣatho na yo mātārāv apyeti dhātave |
10.115.01c anūdḥā yadi jījanad adhā ca nu vavakṣa sadyo mahi dūtyam caran ||
10.115.02a agnir ha nāma dhāyi dann apastamaḥ sam yo vanā yuvate bhasmanā datā |
10.115.02c abhipramurā juhvā svadhvara ino na prothamāno yavase vṛṣā ||
10.115.03a taṃ vo viṃ na druṣadam devam andhasa indum prothantam pravapantam
arṇavam |
10.115.03c āsā vahniṃ na śociṣā virapśinam mahivratam na sarajantam adhvanaḥ ||
10.115.04a vi yasya te jrayasānasyājara dhakṣor na vātāḥ pari santy acyutāḥ |
10.115.04c ā raṇvāso yuyudhayo na satvanam tritam naśanta pra śiṣanta iṣṭaye ||
10.115.05a sa id agniḥ kaṇvatamaḥ kaṇvasakhāryaḥ parasyāntarasya taruṣaḥ |
10.115.05c agniḥ pātu gṛṇato agniḥ sūrīn agnir dadātu teṣām avo naḥ ||
10.115.06a vājintamāya sahyase supitrya ṛṣu cyavāno anu jātavedase |
10.115.06c anudre cid yo dhṛṣatā varam sate mahintamāya dhanvaned aviṣyate ||
10.115.07a evāgnir martaiḥ saha sūrībhir vasu ṣṭave sahasaḥ sūnaro nṛbhiḥ |
10.115.07c mitrāso na ye sudhitā ṛtāyavo dyāvo na dyumnair abhi santi mānuṣān ||
10.115.08a ūrjo napāt sahasāvann iti tvopastutasya vandate vṛṣā vāk |
10.115.08c tvām stośāma tvayā suvirā drāghīya āyuḥ prataram dadhānāḥ ||
10.115.09a iti tvāgne vṛṣṭihavyasya putrā upastutāsa ṛṣayo 'vocaṇ |
10.115.09c tāṃś ca pāhi gṛṇataś ca sūrīn vaṣaḍ vaṣaḍ ity ūrdhvāso anakṣan namo nama ity
ūrdhvāso anakṣan ||
- 10.116.01a pibā somam mahata indriyāya pibā vṛtrāya hantave śaviṣṭha |

10.116.01c piba rāye śavase hūyamānaḥ piba madhvas tṛpad indrā vṛṣasva ||
 10.116.02a asya piba kṣumataḥ prasthitasyaendra somasya varam ā sutasya |
 10.116.02c svastidā manasā mādayasvārvācīno revate saubhagāya ||
 10.116.03a mamattu tvā divyaḥ soma indra mamattu yaḥ sūyate pārthiveṣu |
 10.116.03c mamattu yena varivaś cakartha mamattu yena niriṇāsi śatrūn ||
 10.116.04a ā dvibarhā amino yātv indro vṛṣā haribhyām pariṣiktam andhaḥ |
 10.116.04c gavy ā sutasya prabhṛtasya madhvaḥ satrā khedām aruśahā vṛṣasva ||
 10.116.05a ni tigmani bhrāśayan bhrāśyāny ava sthirā tanuhi yātujūnām |
 10.116.05c ugrāya te saho balaṃ dadāmi pratītyā śatrūn vigadeṣu vṛśca ||
 10.116.06a vy arya indra tanuhi śravāmsy oja sthireva dhanvano 'bhimātīḥ |
 10.116.06c asmadryag vāvṛdhānaḥ sahoḥhir anibhṛṣtas tanvaṃ vāvṛdhasva ||
 10.116.07a idaṃ havir maghavan tubhyaṃ rātam prati samrāḍ ahṛṇāno gṛbhāya |
 10.116.07c tubhyaṃ suto maghavan tubhyam pakvo 'ddhīndra piba ca prasthitasya ||
 10.116.08a addhīd indra prasthitemā havīmṣi cano dadhiṣva pacatota somam |
 10.116.08c prayasvantaḥ prati haryāmasi tvā satyāḥ santu yajamānasya kāmāḥ ||
 10.116.09a prendrāgnibhyaṃ suvacasyām iyarmi sindhāv iva prerayaṃ nāvam arkaiḥ |
 10.116.09c ayā iva pari caranti devā ye asmabhyaṃ dhanadā udbhidaś ca ||

10.117.01a na vā u devāḥ kṣudham id vadhaṃ dadur utāsitam upa gachanti mṛtyavaḥ |
 10.117.01c uto rayiḥ pṛṇato nopā dasyaty utāpṛṇan marḍitāraṃ na vindate ||
 10.117.02a ya ādhrāya cakamānāya pitvo 'nnavān san raphitāyopajagmuṣe |
 10.117.02c sthiram manaḥ kṛṇute sevate puroto cit sa marḍitāraṃ na vindate ||
 10.117.03a sa id bhojo yo gṛhave dadāty annakāmāya carate kṛśāya |
 10.117.03c aram asmai bhavati yāmahūtā utāparīṣu kṛṇute sakhāyam ||
 10.117.04a na sa sakhā yo na dadāti sakhye sacābhuve sacamānāya pitvaḥ |
 10.117.04c apāsmāt preyān na tad oko asti pṛṇantam anyam araṇaṃ cid ichet ||
 10.117.05a pṛṇiyād in nādhamānāya tavyān drāghiyāmsam anu paśyeta panthām |
 10.117.05c o hi vartante rathyeva cakrānyam-anyam upa tiṣṭhanta rāyaḥ ||
 10.117.06a mogham annaṃ vindate apracetāḥ satyam bravīmi vadha it sa tasya |
 10.117.06c nāryamaṇam puṣyati no sakhāyaṃ kevalāgho bhavati kevalādī ||
 10.117.07a kṛṣann it phāla āsitam kṛṇoti yann adhvānam apa vṛṅkte caritraiḥ |
 10.117.07c vadan brahmāvadata vanīyān pṛṇann āpir apṛṇantam abhi śyāt ||
 10.117.08a ekapād bhūyo dvipado vi cakrame dvipāt tripādam abhy eti paścāt |
 10.117.08c catuṣpād eti dvipadām abhisvare sampaśyan paṅktīr upatiṣṭhamānaḥ ||
 10.117.09a samau cid dhastau na samaṃ viviṣṭaḥ sammātarā cin na samaṃ duhāte |
 10.117.09c yamayoś cin na samā vīryāṇi jñātī cit santau na samam pṛṇītaḥ ||

10.118.01a agne haṃsi ny atrīṇaṃ dīdyan martyeṣv ā |
 10.118.01c sve kṣaye śucivrata ||
 10.118.02a ut tiṣṭhasi svāhuto ghr̥tāni prati modase |
 10.118.02c yat tvā srucaḥ samasthiran ||
 10.118.03a sa āhuto vi rocate 'gnir īdenyo girā |
 10.118.03c srucaḥ pratīkam ajyate ||
 10.118.04a ghr̥tenāgniḥ sam ajyate madhupratīka āhutaḥ |
 10.118.04c rocamāno vibhāvasuḥ ||
 10.118.05a jaramānaḥ sam idhyase devebhyo havyvāhana |
 10.118.05c taṃ tvā havanta martyāḥ ||

10.118.06a tam martā amartyaṃ gṛtenāgniṃ saparyata |
 10.118.06c adābhyaṃ gṛhapatim ||
 10.118.07a adābhyena śociṣāgne rakṣas tvam daha |
 10.118.07c gopā ṛtasya dīdhi ||
 10.118.08a sa tvam agne pratīkena praty oṣa yātudhānyaḥ |
 10.118.08c urukṣayeṣu dīdyat ||
 10.118.09a taṃ tvā gīrbhir urukṣayā havyvāhaṃ sam īdhire |
 10.118.09c yajīṣṭham mānuṣe jane ||

10.119.01a iti vā iti me mano gām aśvaṃ sanuyām iti |
 10.119.01c kuvit somasyāpām iti ||
 10.119.02a pra vātā iva dodhata un mā pītā ayaṃsata |
 10.119.02c kuvit somasyāpām iti ||
 10.119.03a un mā pītā ayaṃsata ratham aśvā ivāśavaḥ |
 10.119.03c kuvit somasyāpām iti ||
 10.119.04a upa mā matir asthita vāsrā putram iva priyam |
 10.119.04c kuvit somasyāpām iti ||
 10.119.05a ahaṃ taṣṭeva vandhuram pary acāmi hṛdā matim |
 10.119.05c kuvit somasyāpām iti ||
 10.119.06a nahi me akṣipac canāchāntsuḥ pañca kṛṣṭayaḥ |
 10.119.06c kuvit somasyāpām iti ||
 10.119.07a nahi me rodasī ubhe anyam pakṣaṃ cana prati |
 10.119.07c kuvit somasyāpām iti ||
 10.119.08a abhi dyām mahinā bhuvam abhīmām pṛthivīm mahīm |
 10.119.08c kuvit somasyāpām iti ||
 10.119.09a hantāham pṛthivīm imāṃ ni dadhānīha veva vā |
 10.119.09c kuvit somasyāpām iti ||
 10.119.10a oṣam it pṛthivīm ahaṃ jaṅghanānīha veva vā |
 10.119.10c kuvit somasyāpām iti ||
 10.119.11a divi me anyaḥ pakṣo 'dho anyam acīkṛṣam |
 10.119.11c kuvit somasyāpām iti ||
 10.119.12a aham asmi mahāmaho 'bhinabhyam udiṣitaḥ |
 10.119.12c kuvit somasyāpām iti ||
 10.119.13a gṛho yāmy aramkṛto devebhyo havyvāhanaḥ |
 10.119.13c kuvit somasyāpām iti ||

10.120.01a tad id āsa bhuvaneṣu jyeṣṭhaṃ yato jajña ugras tveṣanṛmṇaḥ |
 10.120.01c sadyo jajñāno ni riṇāti śatrūn anu yaṃ viśve madanty ūmāḥ ||
 10.120.02a vāvṛdhānaḥ śavasā bhūryojāḥ śatrur dāsāya bhiyaṃ dadhāti |
 10.120.02c avyanac ca vyanac ca sasni saṃ te navanta prabhṛtā madeṣu ||
 10.120.03a tve kratum api vṛñjanti viśve dvir yad ete trir bhavanty ūmāḥ |
 10.120.03c svādoḥ svādīyaḥ svādunā sṛjā sam adaḥ su madhu madhunābhi yodhīḥ ||
 10.120.04a iti cid dhi tvā dhanā jayantam made-made anumadanti viprāḥ |
 10.120.04c ojīyo dhṛṣṇo sthiram ā tanuṣva mā tvā dabhan yātudhānā durevāḥ ||
 10.120.05a tvayā vayaṃ śāsādmahe raṇeṣu prapaśyanto yudhena bhūri |
 10.120.05c codayāmi ta āyudhā vacobhiḥ saṃ te śīsāmi brahmaṇā vayāṃsi ||
 10.120.06a stuṣeyyam puruvarpasam ṛbhvam inatamam āptyam āptyānām |
 10.120.06c ā darṣate śavasā sapta dānūn pra sākṣate pratimānāni bhūri ||

10.120.07a ni tad dadhiṣe 'varam paraṃ ca yasminn āvithāvasā duroṇe |
 10.120.07c ā mātarā sthāpayase jigatnū ata inoṣi karvarā purūṇi ||
 10.120.08a imā brahma bṛhaddivo vivaktīndrāya śūṣam agriyaḥ svarṣāḥ |
 10.120.08c maho gotrasya kṣayati svarājo duraś ca viśvā avṛṇod apa svāḥ ||
 10.120.09a evā mahān bṛhaddivo atharvāvocat svāṃ tanvam indram eva |
 10.120.09c svasāro mātaribhvarīr aripṛā hinvanti ca śavasā vardhayanti ca ||

10.121.01a hiraṇyagarbhaḥ sam avartatāgre bhūtasya jātaḥ patir eka āsīt |
 10.121.01c sa dādḥāra pṛthivīm dyām utemām kasmai devāya haviṣā vidhema ||
 10.121.02a ya ātmadā baladā yasya viśva upāsate praśiṣam yasya devāḥ |
 10.121.02c yasya chāyāmṛtaṃ yasya mṛtyuḥ kasmai devāya haviṣā vidhema ||
 10.121.03a yaḥ pṛānato nimiṣato mahitvaika id rājā jagato babhūva |
 10.121.03c ya iṣe asya dvipadaś catuṣpadaḥ kasmai devāya haviṣā vidhema ||
 10.121.04a yasyeme himavanto mahitvā yasya samudraṃ rasayā sahāhuḥ |
 10.121.04c yasyemāḥ pradiśo yasya bāhū kasmai devāya haviṣā vidhema ||
 10.121.05a yena dyaur ugrā pṛthivī ca dṛḍhā yena sva stabhitam yena nākaḥ |
 10.121.05c yo antarikṣe rajaso vimānaḥ kasmai devāya haviṣā vidhema ||
 10.121.06a yaṃ krandasī avasā tastabhāne abhy aikṣetām manasā rejamāne |
 10.121.06c yatrādhi sūra uditō vibhāti kasmai devāya haviṣā vidhema ||
 10.121.07a āpo ha yad bṛhatīr viśvam āyan garbham dadhānā janayantīr agnim |
 10.121.07c tato devānām sam avartatāsūr ekaḥ kasmai devāya haviṣā vidhema ||
 10.121.08a yaś cid āpo mahinā paryapaśyad dakṣam dadhānā janayantīr yajñam |
 10.121.08c yo deveṣv adhi deva eka āsīt kasmai devāya haviṣā vidhema ||
 10.121.09a mā no himsī janitā yaḥ pṛthivyā yo vā divam satyadharmā jajāna |
 10.121.09c yaś cāpaś candrā bṛhatīr jajāna kasmai devāya haviṣā vidhema ||
 10.121.10a prajāpate na tvad etāny anyo viśvā jātāni pari tā babhūva |
 10.121.10c yatkāmas te juhūmas tan no astu vyaṃ syāma patayo rayiṇām ||

10.122.01a vasuṃ na citramahasam gṛṇiṣe vāmaṃ śevam atithim adviṣeṇyam |
 10.122.01c sa rāsate śurudho viśvadhāyaso 'gnir hotā gṛhapatīḥ suvīryam ||
 10.122.02a juṣāno agne prati harya me vaco viśvāni vidvān vayunāni sukrato |
 10.122.02c ghṛtanirṇig brahmaṇe gātum eraya tava devā ajanayann anu vratam ||
 10.122.03a sapta dhāmāni pariyan amartyo dāśad dāśuṣe sukrte māmahasva |
 10.122.03c suvireṇa rayiṇāgne svābhuvā yas ta ānaḥ samidhā taṃ juṣasva ||
 10.122.04a yajñasya ketum prathamam purohitam haviṣmanta idate sapta vājinam |
 10.122.04c śṛṇvantam agniṃ ghṛtapṛṣṭham ukṣaṇam pṛṇantaṃ devam pṛṇate suvīryam ||
 10.122.05a tvam dūtaḥ prathamo vareṇyaḥ sa hūyamāno amṛtāya matsva |
 10.122.05c tvām marjayan maruto dāśuṣo gṛhe tvām stomebhir bhṛgavo vi rurucuḥ ||
 10.122.06a iṣam duhan sudughām viśvadhāyasaṃ yajñapriye yajamānāya sukrato |
 10.122.06c agne ghṛtasnus trir ṛtāni didyad vartir yajñam pariyan sukratūyase ||
 10.122.07a tvām id asyā uśaso vyuṣṭiṣu dūtaṃ kṛṇvānā ayajanta mānuṣāḥ |
 10.122.07c tvām devā mahayāyyāya vāvṛdhur ājyam agne nimṛjanto adhvare ||
 10.122.08a ni tvā vasiṣṭhā ahvanta vājinam gṛṇanto agne vidatheṣu vedhasaḥ |
 10.122.08c rāyas poṣam yajamāneṣu dhārāya yūyam pāta svastibhiḥ sadā naḥ ||

10.123.01a ayaṃ venaś codayat pṛṣnigarbhā jyotirjarāyū rajaso vimāne |

10.123.01c imam apāṃ saṃgame sūryasya śiśuṃ na viprā matibhī rihanti ||
 10.123.02a samudrād ūrmim ud iyarti veno nabhojāḥ pṛṣṭhaṃ haryatasya darśi |
 10.123.02c ṛtasya sānāv adhi viṣṭapi bhrāṭ samānaṃ yonim abhy anūṣata vrāḥ ||
 10.123.03a samānam pūrvīr abhi vāvaśānās tiṣṭhan vatsasya mātaraḥ sanīdāḥ |
 10.123.03c ṛtasya sānāv adhi cakramāṇā rihanti madhvo amṛtasya vāṇīḥ ||
 10.123.04a jānanto rūpam akṛpanta viprā mṛgasya ghoṣam mahiṣasya hi gman |
 10.123.04c ṛtena yanto adhi sindhum asthur vidad gandharvo amṛtāni nāma ||
 10.123.05a apsarā jāram upasiṣmiyāṇā yoṣā bibharti parame vyoman |
 10.123.05c carat priyasya yoniṣu priyaḥ san sīdat pakṣe hiraṇyaye sa venāḥ ||
 10.123.06a nāke suparṇam upa yat patantaṃ hṛdā venanto abhy acakṣata tvā |
 10.123.06c hiraṇyapakṣam varuṇasya dūtaṃ yamasya yonau śakunam bhuraṇyum ||
 10.123.07a ūrdhvo gandharvo adhi nāke asthāt pratyāṅ citrā bibhrad asyāyudhāni |
 10.123.07c vasāno atkaṃ surabhiṃ dr̥ṣe kaṃ svar ṇa nāma janata priyāṇi ||
 10.123.08a drapsaḥ samudram abhi yaj jigāti paśyan gṛdhrasya cakṣasā vidharman |
 10.123.08c bhānuḥ śukreṇa śociṣā cakānas tṛṭiye cakre rajasi priyāṇi ||

10.124.01a imaṃ no agna upa yajñam ehi pañcayāmaṃ trivṛtaṃ saptatantum |
 10.124.01c aso havyvād uta naḥ purogā jyog eva dirghaṃ tama āśayiṣṭhāḥ ||
 10.124.02a adevād devaḥ pracatā guhā yan prapaśyamāno amṛtatvam emi |
 10.124.02c śivaṃ yat santam aśivo jahāmi svāt sakhyād araṇim nābhim emi ||
 10.124.03a paśyann anyasyā atithim vayāyā ṛtasya dhāma vi mime purūṇi |
 10.124.03c śamsāmi pitre asurāya śevam ayajñiyād yajñiyam bhāgam emi ||
 10.124.04a bahviḥ samā akaram antar asminn indraṃ vṛṇānaḥ pitaraṃ jahāmi |
 10.124.04c agniḥ somo varuṇas te cyavante paryāvard rāṣṭraṃ tad avāmy āyan ||
 10.124.05a nirmāyā u tye asurā abhūvan tvam ca mā varuṇa kāmāyāse |
 10.124.05c ṛtena rājann anṛtaṃ viviṅcan mama rāṣṭrasyādhipatyam ehi ||
 10.124.06a idaṃ svar idam id āsa vāmam ayam prakāśa urv antarikṣam |
 10.124.06c hanāva vṛtraṃ nirehi soma haviṣ tvā santaṃ haviṣā yajāma ||
 10.124.07a kaviḥ kavitvā divi rūpam āsajad aprabhūtī varuṇo nir apaḥ sṛjat |
 10.124.07c kṣemaṃ kṛṇvānā janayo na sindhavas tā asya varṇam śucayo bharibhrati ||
 10.124.08a tā asya jyeṣṭham indriyaṃ sacante tā im ā kṣeti svadhayā madantīḥ |
 10.124.08c tā im viśo na rājānaṃ vṛṇānā bibhatsuvo apa vṛtrād atiṣṭhan ||
 10.124.09a bibhatsūnām sayujaṃ hamsam āhur apāṃ divyānām sakhye carantam |
 10.124.09c anuṣṭubham anu carcūryamāṇam indraṃ ni cikyuḥ kavayo manīṣā ||

10.125.01a ahaṃ rudrebhir vasubhiś carāmy aham ādityair uta viśvadevaiḥ |
 10.125.01c aham mitrāvaruṇobhā bibharmy aham indrāgni aham aśvinobhā ||
 10.125.02a ahaṃ somam āhanasam bibharmy ahaṃ tvaṣṭāram uta pūṣaṇam bhagam |
 10.125.02c ahaṃ dadhāmi draviṇaṃ haviṣmate suprāvye yajamānāya sunvate ||
 10.125.03a ahaṃ rāṣṭri saṃgamanī vasūnām cikituṣi prathamā yajñiyānām |
 10.125.03c tām mā devā vy adadhuḥ purutrā bhūriṣṭhātrām bhūry āveśayantīm ||
 10.125.04a mayā so annam atti yo vipaśyati yaḥ prāṇiti ya im śṛṇoty uktam |
 10.125.04c amantavo māṃ ta upa kṣiyanti śrudhi śruta śraddhivaṃ te vadāmi ||
 10.125.05a aham eva svayam idaṃ vadāmi juṣṭam devebhir uta mānuṣebhiḥ |
 10.125.05c yaṃ kāmāye taṃ-tam ugraṃ kṛṇomi tam brahmānaṃ tam ṛṣim taṃ sumedhām ||
 10.125.06a ahaṃ rudrāya dhanur ā tanomi brahmadviṣe śarave hantavā u |
 10.125.06c ahaṃ janāya samadaṃ kṛṇomy ahaṃ dyāvapṛthivī ā viveśa ||

10.125.07a ahaṃ suve pitaram asya mūrdhan mama yonir apsv antaḥ samudre |
 10.125.07c tato vi tiṣṭhe bhuvanānu viśvotāmūṃ dyāṃ varṣmaṇopa sprśāmi ||
 10.125.08a aham eva vāta iva pra vāmy ārabhamāṇā bhuvanāni viśvā |
 10.125.08c paro divā para enā pṛthiv yaitāvati mahinā sam babhūva ||

10.126.01a na tam aṃho na duritaṃ devāso aṣṭa martyam |
 10.126.01c sajoṣaso yam aryamā mitro nayanti varuṇo ati dviṣaḥ ||
 10.126.02a tad dhi vyaṃ vṛṇīmahe varuṇa mitrāryaman |
 10.126.02c yenā nir aṃhaso yūyam pātha nethā ca martyam ati dviṣaḥ ||
 10.126.03a te nūnaṃ no 'yam ūtaye varuṇo mitro aryamā |
 10.126.03c nayiṣṭhā u no neṣaṇi paṛṣiṣṭhā u naḥ paṛṣaṇy ati dviṣaḥ ||
 10.126.04a yūyam viśvam pari pātha varuṇo mitro aryamā |
 10.126.04c yuṣmākaṃ śarmaṇi priye syāma supraṇītayo 'ti dviṣaḥ ||
 10.126.05a ādityāso ati sridho varuṇo mitro aryamā |
 10.126.05c ugram marudbhī rudraṃ huvemendram agniṃ svastaye 'ti dviṣaḥ ||
 10.126.06a netāra ū ṣu ṇas tiro varuṇo mitro aryamā |
 10.126.06c ati viśvāni duritā rājānaś carṣaṇinām ati dviṣaḥ ||
 10.126.07a śunam asmabhyam ūtaye varuṇo mitro aryamā |
 10.126.07c śarma yachantu sapratha ādityāso yad īmahe ati dviṣaḥ ||
 10.126.08a yathā ha tyad vasavo gauryaṃ cit padi ṣitām amuñcatā yajatrāḥ |
 10.126.08c evo ṣv asman muñcatā vy aṃhaḥ pra tāry agne prataraṃ na āyuh ||

10.127.01a rātri vy akhyad āyatī purutrā devy akṣabhiḥ |
 10.127.01c viśvā adhi śriyo 'dhita ||
 10.127.02a orv aprā amartyā nivato devy udvataḥ |
 10.127.02c jyotiṣā bād hate tamaḥ ||
 10.127.03a nir u svasāram askṛtoṣasaṃ devy āyatī |
 10.127.03c aped u hāsate tamaḥ ||
 10.127.04a sā no adya yasyā vyaṃ ni te yāmannn avikṣmahi |
 10.127.04c vṛkṣe na vasatiṃ vayaḥ ||
 10.127.05a ni grāmāso avikṣata ni padvanto ni pakṣiṇaḥ |
 10.127.05c ni śyenāsaś cid arthinaḥ ||
 10.127.06a yāvayā vṛkyam vṛkaṃ yavaya stenam ūrmye |
 10.127.06c athā naḥ sutarā bhava ||
 10.127.07a upa mā pepiśat tamaḥ kṛṣṇaṃ vyaktam asthita |
 10.127.07c uṣa ṛṇeva yātaya ||
 10.127.08a upa te gā ivākaraṃ vṛṇiṣva duhitar divaḥ |
 10.127.08c rātri stomaṃ na jigyuṣe ||

10.128.01a mamāgne varco vihaveṣv astu vyaṃ tvendhānās tanvam puṣema |
 10.128.01c mahyaṃ namantām pradiśaś catasras tvayādhyakṣeṇa pṛtanā jayema ||
 10.128.02a mama devā vihave santu sarva indravanto maruto viṣṇur agniḥ |
 10.128.02c mamāntarikṣam urulokam astu mahyaṃ vātaḥ pavatām kāme asmin ||
 10.128.03a mayi devā draviṇam ā yajantām mayy āsīr astu mayi devahūtiḥ |
 10.128.03c daivyā hotāro vanuṣanta pūrve 'riṣṭāḥ syāma tanvā suvīrāḥ ||
 10.128.04a mahyaṃ yajantu mama yāni havyākūtiḥ satyā manaso me astu |

10.128.04c eno mā ni gāṃ katamac canāhaṃ viśve devāso adhi vocatā naḥ |
 10.128.05a devīḥ ṣaḍ urvīr uru naḥ kṛṇota viśve devāsa iha vīrayadhvam |
 10.128.05c mā hāsmahi prajayā mā tanūbhir mā radhāma dviṣate soma rājan ||
 10.128.06a agne manyum pratinudan pareṣām adabdhō gopāḥ pari pāhi nas tvam |
 10.128.06c pratyāñco yantu nigutaḥ punas te 'maiṣāṃ cittam prabudhāṃ vi neśat ||
 10.128.07a dhātā dhātṛṇām bhuvanasya yas patir devaṃ trātāram abhimātiṣāham |
 10.128.07c imaṃ yajñam aśvinobhā bṛhaspatir devāḥ pāntu yajamānaṃ nyarthāt ||
 10.128.08a uruvyacā no mahiṣaḥ śarma yaṃsad asmin have puruhūtaḥ purukṣuḥ |
 10.128.08c sa naḥ prajāyai haryaśva mṛḍayendra mā no rīriṣo mā parā dāḥ ||
 10.128.09a ye naḥ sapatnā apa te bhavantv indrāgnibhyām ava bādhāmahe tān |
 10.128.09c vasavo rudrā ādityā upariṣṛṣam mograṃ cettāram adhirājam akran ||

10.129.01a nāsad āsīn no sad āsīt tadānīm nāsīd rajo no vyomā paro yat |
 10.129.01c kim āvarīvaḥ kuha kasya śarmann ambhaḥ kim āsīd gahanaṃ gabhīram ||
 10.129.02a na mṛtyur āsīd amṛtaṃ na tarhi na rātryā ahna āsīt praketaḥ |
 10.129.02c ānīd avātaṃ svadhayā tad ekaṃ tasmād dhānyan na paraḥ kiṃ canāsa ||
 10.129.03a tama āsīt tamasā gūḍham agre 'praketaṃ salilaṃ sarvam ā idam |
 10.129.03c tuchyenābhv apihitaṃ yad āsīt tapasas tan mahinājāyataikam ||
 10.129.04a kāmas tad agre sam avartatādhi manaso retaḥ prathamam yad āsīt |
 10.129.04c sato bandhum asati nir avindan ḥṛdi pratīṣyā kavayo maṇiṣā ||
 10.129.05a tiraścīno vitato raśmir eṣām adhaḥ svid āsī3d upari svid āsī3t |
 10.129.05c retodhā āsan mahimāna āsan svadhā avastāt prayatiḥ parastāt ||
 10.129.06a ko addhā veda ka iha pra vocat kuta ājātā kuta iyaṃ viṣṛṣṭiḥ |
 10.129.06c arvāg devā asya visarjanenāthā ko veda yata ābabhūva ||
 10.129.07a iyaṃ viṣṛṣṭir yata ābabhūva yadi vā dadhe yadi vā na |
 10.129.07c yo asyādhyakṣaḥ parame vyoman so aṅga veda yadi vā na veda ||

10.130.01a yo yajño viśvatas tantubhis tata ekaśataṃ devakarmebhir āyataḥ |
 10.130.01c ime vayanti pitaro ya āyayuḥ pra vayāpa vayety āsate tate ||
 10.130.02a pumāñ enaṃ tanuta ut kṛṇatti pumān vi tatne adhi nāke asmin |
 10.130.02c ime mayūkhā upa sedur ū sadaḥ sāmāni cakrus tasarāṇy otave ||
 10.130.03a kāsit pramā pratimā kiṃ nidānam ājyaṃ kim āsīt paridhiḥ ka āsīt |
 10.130.03c chandaḥ kim āsīt praūgaṃ kim ukthaṃ yad devā devam ayajanta viśve ||
 10.130.04a agner gāyatri abhavat sayugvoṣṇihayā savitā sam babhūva |
 10.130.04c anuṣṭubhā soma ukthair mahasvān bṛhaspater bṛhatī vācam āvat ||
 10.130.05a virāṇ mitrāvaruṇayor abhiśrīr indrasya triṣṭub iha bhāgo ahnaḥ |
 10.130.05c viśvān devāñ jagaty ā viveśa tena cākḷpra ṛṣayo manuṣyāḥ ||
 10.130.06a cākḷpre tena ṛṣayo manuṣyā yajñe jāte pitaro naḥ purāṇe |
 10.130.06c paśyan manye manasā cakṣasā tān ya imaṃ yajñam ayajanta pūrve ||
 10.130.07a sahostomāḥ sahachandasa āvṛtaḥ sahapramā ṛṣayaḥ sapta daivyāḥ |
 10.130.07c pūrveṣām panthām anudṛśya dhīrā anvālebhire rathyo na raśmīn ||

10.131.01a apa prāca indra viśvāñ amitrān apāpāco abhibhūte nudasva |
 10.131.01c apodīco apa śūrādharāca urau yathā tava śarman madema ||
 10.131.02a kuvid aṅga yavamanto yavaṃ cid yathā dānty anupūrvaṃ viyūya |
 10.131.02c ihehaiṣāṃ kṛṇuhi bhojanāni ye barhiṣo namovṛktiṃ na jagmuḥ ||

10.131.03a nahi sthūry ṛtuthā yātam asti nota śravo vivide saṃgameṣu |
 10.131.03c gavyanta indraṃ sakhyāya viprā aśvāyanto vṛṣaṇaṃ vājayantaḥ ||
 10.131.04a yuvaṃ surāmam aśvinā namucāv āsure sacā |
 10.131.04c vipipānā śubhas patī indraṃ karmasv āvatam ||
 10.131.05a putram iva pitarāv aśvinobhendrāvathuḥ kāvyair daṃsanābhiḥ |
 10.131.05c yat surāmam vy apibaḥ śacībhiḥ sarasvatī tvā maghavann abhiṣṇak ||
 10.131.06a indraḥ sutrāmā svavāṃ avobhiḥ sumṛḍīko bhavatu viśvavedāḥ |
 10.131.06c bādhatām dveṣo abhayaṃ kṛṇotu suvīryasya patayaḥ syāma ||
 10.131.07a tasya vayaṃ sumatau yajñiyasyāpi bhadre saumanase syāma |
 10.131.07c sa sutrāmā svavāṃ indro asme ārāc cid dveṣaḥ sanutar yuyotu ||

10.132.01a ijānam id dyaur gūrtāvasur ijānam bhūmir abhi prabhūṣaṇi |
 10.132.01c ijānaṃ devāv aśvināv abhi sumnair avardhatām ||
 10.132.02a tā vām mitrāvaruṇā dhārayatkṣitī suṣumneṣitatvatā yajāmasi |
 10.132.02c yuvoḥ krāṇāya sakhyair abhi ṣyāma rakṣasaḥ ||
 10.132.03a adhā cin nu yad didhiṣāmahe vām abhi priyaṃ rekṇaḥ patyamānāḥ |
 10.132.03c dadvāṃ vā yat puṣyati rekṇaḥ sam v āran nakir asya maghāni ||
 10.132.04a asāv anyo asura sūyata dyaus tvam viśveṣāṃ varuṇāsi rājā |
 10.132.04c mūrdhā rathasya cākan naitāvatainasāntakadhruk ||
 10.132.05a asmin sv etac chakapūta eno hite mitre nigatān hanti vīrān |
 10.132.05c avor vā yad dhāt tanūṣv avāḥ priyāsu yajñiyāsv arvā ||
 10.132.06a yuvor hi mātāditir vicetasā dyaur na bhūmiḥ payasā pupūtani |
 10.132.06c ava priyā didiṣṭana sūro ninikta raśmibhiḥ ||
 10.132.07a yuvaṃ hy apnarājāv asīdatam tiṣṭhad ratham na dhūrṣadam vanarṣadam |
 10.132.07c tā naḥ kaṇūkayantīr nṛmedhas tatre aṃhasaḥ sumedhas tatre aṃhasaḥ ||

10.133.01a pro ṣv asmai puroratham indrāya śūṣam arcata |
 10.133.01c abhike cid ulokakṛt saṃge samatsu vṛtrahāsmākam bodhi coditā nabhantām
 anyakeṣāṃ jyākā adhi dhanvasu ||
 10.133.02a tvam sindhūmr avāsṛjo 'dharāco ahann ahim |
 10.133.02c aśatrur indra jajñiṣe viśvam puṣyasi vāryaṃ tam tvā pari ṣvajāmahe nabhantām
 anyakeṣāṃ jyākā adhi dhanvasu ||
 10.133.03a vi ṣu viśvā arātayo 'ryo naśanta no dhiyaḥ |
 10.133.03c astāsi śatrave vadham yo na indra jighāṃsati yā te rātir dadir vasu nabhantām
 anyakeṣāṃ jyākā adhi dhanvasu ||
 10.133.04a yo na indrabhito jano vṛkāyur ādideśati |
 10.133.04c adhaspadaṃ tam im kṛdhi vibādho asi sāsahir nabhantām anyakeṣāṃ jyākā adhi
 dhanvasu ||
 10.133.05a yo na indrabhidāsati sanābhir yaś ca niṣṭyaḥ |
 10.133.05c ava tasya balaṃ tira mahīva dyaur adha tmanā nabhantām anyakeṣāṃ jyākā
 adhi dhanvasu ||
 10.133.06a vayam indra tvāyavaḥ sakhitvam ā rabhāmahe |
 10.133.06c ṛtasya naḥ pathā nayāti viśvāni durityā nabhantām anyakeṣāṃ jyākā adhi
 dhanvasu ||
 10.133.07a asmabhyam su tvam indra tām śikṣa yā dohate prati varam jaritre |
 10.133.07c achidrodhni pīpayad yathā naḥ sahasradhārā payasā mahī gauḥ ||

10.134.01a ubhe yad indra rodasī āpaprāthoṣā iva |
 10.134.01c mahāntaṃ tvā mahināṃ samrājaṃ carṣaṇināṃ devī janitry ajījanad bhadrā
 janitry ajījanat ||
 10.134.02a ava sma durhaṇāyato martasya tanuhi sthiram |
 10.134.02c adhaspadaṃ tam iṃ kṛdhi yo asmāṃ ādideśati devī janitry ajījanad bhadrā
 janitry ajījanat ||
 10.134.03a ava tyā bṛhatīr iṣo viśvaścandrā amitrahan |
 10.134.03c śacībhiḥ śakra dhūnuhīndra viśvābhir ūtibhir devī janitry ajījanad bhadrā janitry
 ajījanat ||
 10.134.04a ava yat tvam śatakratav indra viśvāni dhūnuṣe |
 10.134.04c rayiṃ na sunvate sacā sahasriṇibhir ūtibhir devī janitry ajījanad bhadrā janitry
 ajījanat ||
 10.134.05a ava svedā ivābhito viṣvak patantu didyavaḥ |
 10.134.05c dūrvāyā iva tantavo vy asmad etu durmatir devī janitry ajījanad bhadrā janitry
 ajījanat ||
 10.134.06a dīrghaṃ hy ankuśaṃ yathā śaktim bibharṣi mantumaḥ |
 10.134.06c pūrveṇa maghavan padājo vayāṃ yathā yamo devī janitry ajījanad bhadrā
 janitry ajījanat ||
 10.134.07a nakir devā minīmasi nakir ā yopayāmasi mantraśrutyaṃ carāmasi |
 10.134.07c pakṣebhir apikakṣebhir atrābhi saṃ rabhāmahe ||

10.135.01a yasmin vṛkṣe supalāśe devaiḥ sampibate yamaḥ |
 10.135.01c atrā no viśpatiḥ pitā purāṇāṃ anu venati ||
 10.135.02a purāṇāṃ anuvenantaṃ carantaṃ pāpayāmuyā |
 10.135.02c asūyann abhy acākaśaṃ tasmā aspṛhayam punaḥ ||
 10.135.03a yaṃ kumāra navam ratham acakram manasākṛṇoḥ |
 10.135.03c ekeṣaṃ viśvataḥ prāñcam apaśyann adhi tiṣṭhasi ||
 10.135.04a yaṃ kumāra prāvartayo rathaṃ viprebhyas pari |
 10.135.04c taṃ sāmānu prāvartata sam ito nāvya āhitam ||
 10.135.05a kaḥ kumāram ajanayad rathaṃ ko nir avartayat |
 10.135.05c kaḥ svit tad adya no brūyād anudeyī yathābhavat ||
 10.135.06a yathābhavad anudeyī tato agram ajāyata |
 10.135.06c purastād budhna ātataḥ paścān nirayaṇaṃ kṛtam ||
 10.135.07a idaṃ yamasya sādanaṃ devamānaṃ yad ucyate |
 10.135.07c iyam asya dhamyate nāḍir ayaṃ gīrbhiḥ pariṣkṛtaḥ ||

10.136.01a keśy agniṃ keśī viṣaṃ keśī bibharti rodasī |
 10.136.01c keśī viśvaṃ svar dṛṣe keśīdaṃ jyotir ucyate ||
 10.136.02a munayo vātaraśanāḥ piśaṅgā vasate malā |
 10.136.02c vātasyānu dhrājīṃ yanti yad devāso avikṣata ||
 10.136.03a unmaditā mauneyena vātāṃ ā tasthimā vayam |
 10.136.03c śarīred asmākaṃ yūyam martāso abhi paśyatha ||
 10.136.04a antarikṣeṇa patati viśvā rūpāvacaśat |
 10.136.04c munir devasya-devasya saukṛtyāya sakhā hitaḥ ||
 10.136.05a vātasyāśvo vāyoḥ sakhātho deveṣito muniḥ |
 10.136.05c ubhau samudrāv ā kṣeti yaś ca pūrva utāparaḥ ||

- 10.136.06a apsarasām gandharvāṇām mṛgāṇām caraṇe caran |
 10.136.06c keśi ketasya vidvān sakhā svādur madintamaḥ ||
 10.136.07a vāyur asmā upāmanthat pinaṣṭi smā kunannamā |
 10.136.07c keśi viśasya pātreṇa yad rudreṇāpibat saha ||
- 10.137.01a uta devā avahitaṃ devā un nayathā punaḥ |
 10.137.01c utāgaś cakruṣaṃ devā devā jīvayathā punaḥ ||
 10.137.02a dvāv imau vātau vāta ā sindhor ā parāvataḥ |
 10.137.02c dakṣaṃ te anya ā vātu parānyo vātu yad rapaḥ ||
 10.137.03a ā vāta vāhi bheṣajaṃ vi vāta vāhi yad rapaḥ |
 10.137.03c tvam hi viśvabheṣajo devānām dūta iyase ||
 10.137.04a ā tvāgamam śamtātibhir atho ariṣṭatātibhiḥ |
 10.137.04c dakṣaṃ te bhadrām ābhārṣam parā yakṣmaṃ suvāmi te ||
 10.137.05a trāyantām iha devās trāyatām marutām gaṇaḥ |
 10.137.05c trāyantām viśvā bhūtāni yathāyam arapā asat ||
 10.137.06a āpa id vā u bheṣajir āpo amīvacātaniḥ |
 10.137.06c āpaḥ sarvasya bheṣajis tās te kṛṇvantu bheṣajam ||
 10.137.07a hastābhyām daśāsākhābhyām jihvā vācaḥ purogavi |
 10.137.07c anāmayitnubhyām tvā tābhyām tvopa spṛśāmasi ||
- 10.138.01a tava tya indra sakhyeṣu vahnaya ṛtam manvānā vy adardirur valam |
 10.138.01c yatrā daśasyann uṣaso riṇann apaḥ kutsāya manmann ahyas ca daṃsayāḥ ||
 10.138.02a avāsṛjaḥ prasvaḥ śvañcayo girīn ud āja usrā apibo madhu priyam |
 10.138.02c avardhaya vanino asya daṃsasā śusoca sūrya ṛtajātayā girā ||
 10.138.03a vi sūryo madhye amucad rathaṃ divo vidad dāsāya pratimānam āryaḥ |
 10.138.03c dṛḍhāni pipror asurasya māyina indro vy āsyac cakṛvām̃ ṛjīsvanā ||
 10.138.04a anādhrṣṭāni dhṛṣṭo vy āsyan nidhīm̃ adevām̃ amṛṇad ayāsyāḥ |
 10.138.04c māseva sūryo vasu puryam ā dade gṛṇānaḥ śatrūm̃ aśṛṇad virukmatā ||
 10.138.05a ayuddhaseno vibhvā vibhindatā dāśad vṛtrahā tujyāni tejate |
 10.138.05c indrasya vajrād abibhed abhiśnathaḥ prākṛāmac chundhyūr ajahād uṣā anaḥ ||
 10.138.06a etā tyā te śrutyāni kevalā yad eka ekam akṛṇor ayajñam |
 10.138.06c māsām vidhānam adadhā adhi dyavi tvayā vibhinnam bharati pradhim pitā ||
- 10.139.01a sūryaraśmir harikeśaḥ purastāt savitā jyotir ud ayām̃ ajasram |
 10.139.01c tasya pūṣā prasave yāti vidvān sampaśyan viśvā bhuvanāni gopāḥ ||
 10.139.02a nṛcakṣā eṣa divo madhya āsta āpaprivān rodasī antarikṣam |
 10.139.02c sa viśvācīr abhi caṣṭe ghṛtācīr antarā pūrvam aparaṃ ca ketum ||
 10.139.03a rāyo budhnaḥ saṃgamano vasūnām viśvā rūpābhi caṣṭe śacibhiḥ |
 10.139.03c deva iva savitā satyadharmendro na tasthau samare dhanānām ||
 10.139.04a viśvāvasuṃ soma gandharvam āpo dadṛśuṣis tad ṛtenā vy āyan |
 10.139.04c tad anvavaid indro rārahāṇa āsām pari sūryasya paridhīm̃ apaśyat ||
 10.139.05a viśvāvasur abhi tan no gṛṇātu divyo gandharvo rajaso vimānaḥ |
 10.139.05c yad vā ghā satyam uta yan na vidma dhiyo hinvāno dhiya in no avyāḥ ||
 10.139.06a sasnim avindac caraṇe nadīnām apāvṛṇod duro āsmavrajānām |
 10.139.06c prāsām gandharvo amṛtāni vocad indro dakṣam pari jānād ahinām ||

10.140.01a agne tava śravo vayo mahi bhrājante arcayo vibhāvaso |
 10.140.01c bṛhadbhāno śavasā vājam ukthyam dadhāsi dāśuṣe kave ||
 10.140.02a pāvakavarcāḥ śukravarca anūnavarcā ud iyarṣi bhānunā |
 10.140.02c putro mātārā vicarann upāvasi pṛṇakṣi rodasī ubhe ||
 10.140.03a ūrjo napāj jātavedaḥ suśastibhir mandasva dhītibhir hitaḥ |
 10.140.03c tve iṣaḥ saṃ dadhur bhūrivarpasāś citrotayo vāmajātāḥ ||
 10.140.04a irajyann agne prathayasva jantubhir asme rāyo amartya |
 10.140.04c sa darśatasya vapuṣo vi rājasi pṛṇakṣi sānasim kratum ||
 10.140.05a iṣkartāram adhvarasya pracetasam kṣayantam rādhaso mahaḥ |
 10.140.05c rātim vāmasya subhagām mahim iṣam dadhāsi sānasim rayim ||
 10.140.06a ṛtāvānam mahiṣam viśvadarśatam agnim sumnāya dadhire puro janāḥ |
 10.140.06c śrutkaṇam saprathastamam tvā girā daivyam mānuṣā yugā ||

10.141.01a agne achā vadeha naḥ pratyañ naḥ sumanā bhava |
 10.141.01c pra no yacha viśas pate dhanadā asi nas tvam ||
 10.141.02a pra no yachatv aryamā pra bhagaḥ pra bṛhaspatiḥ |
 10.141.02c pra devāḥ prota sūnṛtā rāyo devī dadātu naḥ ||
 10.141.03a somaṃ rājānam avase 'gnim gīrbhir havāmahe |
 10.141.03c ādityān viṣṇum sūryam brahmāṇam ca bṛhaspatim ||
 10.141.04a indravāyū bṛhaspatim suhaveha havāmahe |
 10.141.04c yathā naḥ sarva ij janaḥ saṃgatyām sumanā asat ||
 10.141.05a aryamaṇam bṛhaspatim indram dānāya codaya |
 10.141.05c vātam viṣṇum sarasvatim savitāram ca vājinam ||
 10.141.06a tvam no agne agnibhir brahma yajñam ca vardhaya |
 10.141.06c tvam no devatātaye rāyo dānāya codaya ||

10.142.01a ayam agne jaritā tve abhūd api sahasaḥ sūno nahy anyad asty āpyam |
 10.142.01c bhadram hi śarma trivarūtham asti ta āre hiṃsānām apa didyum ā kṛdhi ||
 10.142.02a pravat te agne janimā pitūyataḥ sācīva viśvā bhuvanā ny ṛñjase |
 10.142.02c pra saptayaḥ pra saniṣanta no dhiyaḥ puraś caranti paśupā iva tmanā ||
 10.142.03a uta vā u pari vṛṇakṣi bapsad bahor agna ulapasya svadhāvaḥ |
 10.142.03c uta khilyā urvarāṇām bhavanti mā te hetim taviṣim cukrudhāma ||
 10.142.04a yad udvato nivato yāsi bapsat pṛthag eṣi pragardhinīva senā |
 10.142.04c yadā te vāto anuvāti śocir vapteva śmaśru vapasi pra bhūma ||
 10.142.05a praty asya śreṇayo dadṛśra ekaṃ niyānam bahavo rathāsaḥ |
 10.142.05c bāhū yad agne anumarmṛjāno nyanñ uttānām anveṣi bhūmim ||
 10.142.06a ut te śuṣmā jihatām ut te arcir ut te agne śāsamānasya vājāḥ |
 10.142.06c uc chvañcasva ni nama vardhamāna ā tvādya viśve vasavaḥ sadantu ||
 10.142.07a apām idam nyayanaṃ samudrasya niveśanam |
 10.142.07c anyam kṛṇuṣvetaḥ panthām tena yāhi vaśāṃ anu ||
 10.142.08a āyane te parāyaṇe dūrvā rohantu puṣpiṇiḥ |
 10.142.08c hradās ca puṇḍarikāṇi samudrasya gṛhā ime ||

10.143.01a tyam cid atrim ṛtajuram artham aśvam na yātave |
 10.143.01c kakṣivantam yadī punā ratham na kṛṇutho navam ||

- 10.143.02a tyam cid aśvaṃ na vājinam areṇavo yam atnata |
 10.143.02c dṛḍhaṃ granthiṃ na vi śyatam atrim yaviṣṭham ā rajaḥ ||
 10.143.03a narā daṃsiṣṭhav atraye śubhrā siṣāsataṃ dhiyaḥ |
 10.143.03c athā hi vāṃ divo narā puna stomo na viśase ||
 10.143.04a cite tad vāṃ surādhasā rātiḥ sumatir aśvinā |
 10.143.04c ā yan naḥ sadane pṛthau samane parṣatho narā ||
 10.143.05a yuvam bhujyuṃ samudra ā rajasaḥ pāra inkhitam |
 10.143.05c yātam achā patatribhir nāsatyā sātaye kṛtam ||
 10.143.06a ā vāṃ sumnaiḥ śamyū iva maṃhiṣṭhā viśvavedasā |
 10.143.06c sam asme bhūṣataṃ narotsaṃ na pipyuṣir iṣaḥ ||
- 10.144.01a ayaṃ hi te amartya indur atyo na patyate |
 10.144.01c dakṣo viśvāyur vedhase ||
 10.144.02a ayam asmāsu kāvya ṛbhur vajro dāsvate |
 10.144.02c ayam bibharty ūrdhvakṛśanam madam ṛbhur na kṛtvyam madam ||
 10.144.03a ghrṣuḥ śyenāya kṛtvana āsu svāsu vaṃsagaḥ |
 10.144.03c ava dīdhed ahīśuvaḥ ||
 10.144.04a yaṃ suparnaḥ parāvataḥ śyenasya putra ābharat |
 10.144.04c śatacakraṃ yo 'hyo vartaniḥ ||
 10.144.05a yaṃ te śyenaś cārum avṛkam padābharad aruṇam mānam andhasaḥ |
 10.144.05c enā vayo vi tāry āyur jīvasa enā jāgāra bandhutā ||
 10.144.06a evā tad indra indunā deveṣu cid dhārayāte mahi tyajaḥ |
 10.144.06c kratvā vayo vi tāry āyuh sukrato kratvāyam asmad ā sutaḥ ||
- 10.145.01a imāṃ khanāmy oṣadhiṃ vīrudham balavattamām |
 10.145.01c yayā sapatnīm bādhte yayā saṃvindate patim ||
 10.145.02a uttānaparṇe subhage devajūte sahasvati |
 10.145.02c sapatnīm me parā dhama patim me kevalaṃ kuru ||
 10.145.03a uttarāham uttara uttared uttarābhyaḥ |
 10.145.03c athā sapatnī yā mamādharā sādharābhyaḥ ||
 10.145.04a nahy asyā nāma gṛbhṇāmi no asmin ramate jane |
 10.145.04c parām eva parāvataṃ sapatnīm gamayāmasi ||
 10.145.05a aham asmi sahamānātha tvam asi sāsahiḥ |
 10.145.05c ubhe sahasvatī bhūtvī sapatnīm me sahāvahai ||
 10.145.06a upa te 'dhāṃ sahamānām abhi tvādhāṃ sahiyasā |
 10.145.06c mām anu pra te mano vatsaṃ gaur iva dhāvatu pathā vār iva dhāvatu ||
- 10.146.01a araṇyāny araṇyāny asau yā preva naśyasi |
 10.146.01c kathā grāmaṃ na pṛchasi na tvā bhīr iva vindatī^{3m} ||
 10.146.02a vṛṣāravāya vadate yad upāvati ciccikaḥ |
 10.146.02c āghāṭibhir iva dhāvayann araṇyānir mahīyate ||
 10.146.03a uta gāva ivādanty uta veśmeva dṛśyate |
 10.146.03c uto araṇyāniḥ sāyaṃ śakaṭīr iva sarjati ||
 10.146.04a gām aṅgaiṣa ā hvayati dārv aṅgaiṣo apāvadhī |
 10.146.04c vasann araṇyānyām sāyam akruṣad iti manyate ||
 10.146.05a na vā araṇyānir hantya anyas cen nābhigachati |

- 10.146.05c svādoḥ phalasya jagdhvāya yathākāmaṃ ni padyate ॥
 10.146.06a āñjanagandhiṃ surabhim bahvannām akṛṣīvalām ।
 10.146.06c prāham mṛgāṇām mātaram aranyānim aśaṃsiṣam ॥
- 10.147.01a śrat te dadhāmi prathamāya manyave 'han yad vṛtram naryam viver apaḥ ।
 10.147.01c ubhe yat tvā bhavato rodasī anu rejate śuṣmāt pṛthivī cid adrivaḥ ॥
 10.147.02a tvam māyābhir anavadya māyinaṃ śravasyatā manasā vṛtram ardayaḥ ।
 10.147.02c tvām in naro vṛnate gaviṣṭiṣu tvām viśvāsu havyāsv iṣṭiṣu ॥
 10.147.03a aiṣu cākandhi puruhūta sūriṣu vṛdhāso ye maghavann ānaśur magham ।
 10.147.03c arcanti toke tanaye pariṣṭiṣu medhasātā vājinam ahraye dhane ॥
 10.147.04a sa in nu rāyaḥ subhṛtasya cākanan madaṃ yo asya raṃhyaṃ ciketati ।
 10.147.04c tvāvṛdho maghavan dāśvadhvaro makṣū sa vājam bharate dhanā nṛbhiḥ ॥
 10.147.05a tvam śardhāya mahinā gṛṇāna uru kṛdhi maghavañ chagdhi rāyaḥ ।
 10.147.05c tvam no mitro varuṇo na māyī pitvo na dasma dayase vibhaktā ॥
- 10.148.01a suṣvāṇāsa indra stumasi tvā sasavāṃsaś ca tuvinṛmṇa vājam ।
 10.148.01c ā no bhara suvitam yasya cākan tmanā tanā sanuyāma tvotāḥ ॥
 10.148.02a ṛṣvas tvam indra sūra jāto dāsīr viśaḥ sūryeṇa sahyāḥ ।
 10.148.02c guhā hitam guhyaṃ gūḍham apsu bibhṛmasi prasravaṇe na somam ॥
 10.148.03a aryo vā giro abhy arca vidvān ṛṣiṇām vipraḥ sumatiṃ cakānaḥ ।
 10.148.03c te syāma ye raṇayanta somair enota tubhyaṃ rathodha bhakṣaiḥ ॥
 10.148.04a imā brahmendra tubhyaṃ śaṃsi dā nṛbhyo nṛṇām sūra śavaḥ ।
 10.148.04c tebhir bhava sakratur yeṣu cākann uta trāyasva gṛṇata uta stīn ॥
 10.148.05a śrudhī havam indra sūra pṛthyā uta stavase venyasyārkaḥ ।
 10.148.05c ā yas te yoniṃ ghṛtavantam asvār ūrmir na nimnair dravayanta vakvāḥ ॥
- 10.149.01a savitā yantraiḥ pṛthivīm aramṇād askambhane savitā dyām adṛmhat ।
 10.149.01c aśvam ivādhuḥṣad dhunim antarikṣam atūrte baddham savitā samudram ॥
 10.149.02a yatrā samudra skabhito vy aunad apām napāt savitā tasya veda ।
 10.149.02c ato bhūr ata ā utthitam rajo 'to dyāvāpṛthivī aprathetām ॥
 10.149.03a paścedam anyad abhavad yajatram amartyasya bhuvanasya bhūnā ।
 10.149.03c suparṇo aṅga savitur garutmān pūrvo jātaḥ sa u asyānu dharmā ॥
 10.149.04a gāva iva grāmaṃ yūyudhir ivāśvān vāśreva vatsam sumanā duhānā ।
 10.149.04c patir iva jāyām abhi no ny etu dhartā divaḥ savitā viśvavāraḥ ॥
 10.149.05a hiraṇyastūpaḥ savitar yathā tvāṅgirasō juhve vāje asmin ।
 10.149.05c evā tvārcann avase vandamānaḥ somasyevāṃśum prati jāgarāham ॥
- 10.150.01a samiddhaś cit sam idhyase devebhyo havyavāhana ।
 10.150.01c ādityai rudrair vasubhir na ā gahi mṛḍikāya na ā gahi ॥
 10.150.02a imaṃ yajñam idaṃ vaco jujuṣāṇa upāgahi ।
 10.150.02c martāsaś tvā samidhāna havāmahe mṛḍikāya havāmahe ॥
 10.150.03a tvām u jātavedasaṃ viśvavāraṃ gṛṇe dhiyā ।
 10.150.03c agne devāṃ ā vaha naḥ priyavratān mṛḍikāya priyavratān ॥
 10.150.04a agnir devo devānām abhavat purohito 'gnim manuṣyā ṛṣayaḥ sam idhire ।
 10.150.04c agnim maho dhanasātāv aham huve mṛḍikaṃ dhanasātaye ॥

- 10.150.05a agnir atrim bharadvājam gaviṣṭhīram prāvan naḥ kaṇvaṃ trasadasyum āhave |
 10.150.05c agniṃ vasiṣṭho havate purohito mṛḍikāya purohitaḥ ||
- 10.151.01a śraddhayāgniḥ sam idhyate śraddhayā hūyate haviḥ |
 10.151.01c śraddhām bhagasya mūrdhani vacasā vedayāmasi ||
 10.151.02a priyaṃ śraddhe dadataḥ priyaṃ śraddhe didāsataḥ |
 10.151.02c priyam bhojeṣu yajvasv idam ma uditam kṛdhi ||
 10.151.03a yathā devā asureṣu śraddhām ugreṣu cakrire |
 10.151.03c evam bhojeṣu yajvasv asmākam uditam kṛdhi ||
 10.151.04a śraddhām devā yajamānā vāyugopā upāsate |
 10.151.04c śraddhām hṛdayyayākūtyā śraddhayā vindate vasu ||
 10.151.05a śraddhām prātar havāmahe śraddhām madhyamdinam pari |
 10.151.05c śraddhām sūryasya nimrucci śraddhe śrad dhāpayeha naḥ ||
- 10.152.01a śāsa itthā mahāṃ asy amitrahādo adbhutaḥ |
 10.152.01c na yasya hanyate sakhā na jīyate kadā cana ||
 10.152.02a svastidā viśas patir vṛtrahā vimṛdho vaśi |
 10.152.02c vṛṣendraḥ pura etu naḥ somapā abhayamkaraḥ ||
 10.152.03a vi rakṣo vi mṛdho jahi vi vṛtrasya hanū ruja |
 10.152.03c vi manyum indra vṛtrahann amitrasyābhidāsataḥ ||
 10.152.04a vi na indra mṛdho jahi nīcā yacha pṛtanyataḥ |
 10.152.04c yo asmāṃ abhidāsaty adharam gamayā tamaḥ ||
 10.152.05a apendra dviṣato mano 'pa jiyāsato vadham |
 10.152.05c vi manyoḥ śarma yacha variyo yavayā vadham ||
- 10.153.01a iṅkhayantīr apasyuva indram jātam upāsate |
 10.153.01c bhejānāsaḥ suvīryam ||
 10.153.02a tvam indra balād adhi sahaso jāta ojaṣaḥ |
 10.153.02c tvam vṛṣan vṛṣed asi ||
 10.153.03a tvam indrāsi vṛtrahā vy antarikṣam atiraḥ |
 10.153.03c ud dyām astabhna ojasā ||
 10.153.04a tvam indra sajoṣasam arkam bibharṣi bāhvoḥ |
 10.153.04c vajram śiśāna ojasā ||
 10.153.05a tvam indrābhibhūr asi viśvā jātāny ojasā |
 10.153.05c sa viśvā bhuvā ābhavaḥ ||
- 10.154.01a soma ekebhyaḥ pavate ghṛtam eka upāsate |
 10.154.01c yebhyo madhu pradhāvati tāṃś cid evāpi gachatāt ||
 10.154.02a tapasā ye anādhr̥ṣyās tapasā ye svar yayuḥ |
 10.154.02c tapo ye cakrire mahas tāṃś cid evāpi gachatāt ||
 10.154.03a ye yudhyante pradhaneṣu sūrāso ye tanūtyajaḥ |
 10.154.03c ye vā sahasradakṣiṇās tāṃś cid evāpi gachatāt ||
 10.154.04a ye cit pūrva ṛtasāpa ṛtāvāna ṛtāvṛdhaḥ |
 10.154.04c pitṛn tapasvato yama tāṃś cid evāpi gachatāt ||
 10.154.05a sahasraṇīthāḥ kavayo ye gopāyanti sūryam |

10.154.05c ṛṣin tapasvato yama tapojāṁ api gachatāt ||

10.155.01a arāyi kāṇe vikāṭe giriṁ gacha sadānve |
10.155.01c śirimbīṭhasya satvabhis tebhiṣ ṭvā cātayāmasi ||
10.155.02a catto itasā cattāmutaḥ sarvā bhrūṇāny āruṣi |
10.155.02c arāyāyā brahmaṇas pate tīkṣṇaśṛṅgodṛṣann ihi ||
10.155.03a ado yad dāru plavate sindhoḥ pāre apūruṣam |
10.155.03c tad ā rabhasva durhaṇo tena gacha parastaram ||
10.155.04a yad dha prācīr ajagantoro maṇḍūradhāṇīkīḥ |
10.155.04c hatā indrasya śatravaḥ sarve budbudayāśavaḥ ||
10.155.05a parīme gām aneṣata pary agnim ahṛṣata |
10.155.05c deveṣv akrata śravaḥ ka imāṁ ā dadharṣati ||

10.156.01a agniṁ hinvantu no dhiyaḥ saptim āsum ivājiṣu |
10.156.01c tena jeṣma dhanam-dhanam ||
10.156.02a yayā gā ākarāmahe senayāgne tavotyā |
10.156.02c tāṁ no hinva maghattaye ||
10.156.03a āgne sthūram rayim bhara pṛthum gomantam aśvinam |
10.156.03c aṅdhi kham vartayā paṇim ||
10.156.04a agne nakṣatram ajaram ā sūryam rohayo divi |
10.156.04c dadhaj jyotir janebhyaḥ ||
10.156.05a agne ketur viśām asi preṣṭhaḥ śreṣṭha upasthasat |
10.156.05c bodhā stotre vayo dadhat ||

10.157.01a imā nu kam bhuvanā sīśadhāmendraś ca viśve ca devāḥ ||
10.157.02a yajñam ca nas tanvam ca prajām cādityair indraḥ saha cikṣpāti ||
10.157.03a ādityair indraḥ sagaṇo marudbhīr asmākam bhūtv avitā tanūnām ||
10.157.04a hatvāya devā asurān yad āyan devā devatvam abhirakṣamāṇāḥ ||
10.157.05a pratyañcam arkam anayañ chacībhīr ād it svadhām iṣirām pary apaśyan ||

10.158.01a sūryo no divas pātu vāto antarīkṣāt |
10.158.01c agnir naḥ pāṛthivebhyaḥ ||
10.158.02a joṣā savitar yasya te haraḥ śataṁ savāṁ arhati |
10.158.02c pāhi no didyutaḥ patantyāḥ ||
10.158.03a cakṣur no devaḥ savitā cakṣur na uta parvataḥ |
10.158.03c cakṣur dhātā dadhātu naḥ ||
10.158.04a cakṣur no dhehi cakṣuṣe cakṣur vikhyai tanūbhyaḥ |
10.158.04c saṁ cedam vi ca paśyema ||
10.158.05a susaṁdṛśam tvā vayam prati paśyema sūrya |
10.158.05c vi paśyema nṛcakṣasaḥ ||

10.159.01a ud asau sūryo agād ud ayam māmako bhagaḥ |
10.159.01c aham tad vidvalā patim abhy asākṣi viśāsahīḥ ||
10.159.02a aham ketur aham mūrdhāham ugrā vivācanī |

10.159.02c mamed anu kratum patiḥ sehānāyā upācaret ||
 10.159.03a mama putrāḥ śatruhaṇo 'tho me duhitā virāṭ |
 10.159.03c utāham asmi samjayā patyau me śloka uttamaḥ ||
 10.159.04a yenendro haviṣā kṛtvya abhavad dyumny uttamaḥ |
 10.159.04c idaṃ tad akri devā asapatnā kilābhuvam ||
 10.159.05a asapatnā sapatnaghñi jayanty abhibhūvarī |
 10.159.05c āvrkṣam anyāsām varco rādho astheyasām iva ||
 10.159.06a sam ajaīṣam imā ahaṃ sapatnīr abhibhūvarī |
 10.159.06c yathāham asya vīrasya virājāni janasya ca ||

10.160.01a tīrasyābhivayaso asya pāhi sarvarathā vi harī iha muñca |
 10.160.01c indra mā tvā yajamānāso anye ni rīraman tubhyam ime sutāsaḥ ||
 10.160.02a tubhyaṃ sutās tubhyam u sotvāsas tvām giraḥ śvātryā ā hvayanti |
 10.160.02c indredam adya savanaṃ juṣāṇo viśvasya vidvāṃ iha pāhi somam ||
 10.160.03a ya uśatā manasā somam asmai sarvahr̥dā devakāmaḥ sunoti |
 10.160.03c na gā indras tasya parā dadāti praśastam ic cārum asmai kṛṇoti ||
 10.160.04a anuspaṣṭo bhavaty eṣo asya yo asmai revān na sunoti somam |
 10.160.04c nir aratnau maghavā taṃ dadhāti brahmadviṣo hanty anānudiṣṭaḥ ||
 10.160.05a aśvāyanto gavyanto vājayanto havāmahe tvopagantavā u |
 10.160.05c ābhūṣantas te sumatau navāyāṃ vayam indra tvā śunaṃ huvema ||

10.161.01a muñcāmi tvā haviṣā jīvanāya kam ajñātayakṣmād uta rājayakṣmāt |
 10.161.01c grāhir jagrāha yadi vaitad enaṃ tasyā indrāgnī pra mumuktam enam ||
 10.161.02a yadi kṣitāyur yadi vā pareto yadi mṛtyor antikaṃ nīta eva |
 10.161.02c tam ā harāmi nirṛter upasthād aspārṣam enaṃ śataśāradāya ||
 10.161.03a sahasrākṣeṇa śataśāradena śatāyuṣā haviṣāhārṣam enam |
 10.161.03c śataṃ yathemaṃ śarado nayātindro viśvasya duritasya pāram ||
 10.161.04a śataṃ jīva śarado vardhamānaḥ śataṃ hemantāñ chatam u vasantān |
 10.161.04c śatam indrāgnī savitā bṛhaspatiḥ śatāyuṣā haviṣemam punar duḥ ||
 10.161.05a āhārṣam tvāvidam tvā punar āgāḥ punarnava |
 10.161.05c sarvāṅga sarvaṃ te cakṣuḥ sarvam āyus ca te 'vidam ||

10.162.01a brahmaṇāgniḥ samvidāno rakṣohā bādhatām itaḥ |
 10.162.01c amīvā yas te garbhaṃ durṇāmā yonim āśaye ||
 10.162.02a yas te garbham amīvā durṇāmā yonim āśaye |
 10.162.02c agniḥ ṭam brahmaṇā saha niṣ kravyādān anīnaśat ||
 10.162.03a yas te hanti patayantaṃ niṣatsnuṃ yaḥ sarīṣpam |
 10.162.03c jātaṃ yas te jighāṃsati tam ito nāśayāmasi ||
 10.162.04a yas ta ūrū viharaty antarā dampatī śaye |
 10.162.04c yoniṃ yo antar āreḍhi tam ito nāśayāmasi ||
 10.162.05a yas tvā bhrātā patir bhūtvā jāro bhūtvā nīpadyate |
 10.162.05c prajāṃ yas te jighāṃsati tam ito nāśayāmasi ||
 10.162.06a yas tvā svapnena tamasā mohayitvā nīpadyate |
 10.162.06c prajāṃ yas te jighāṃsati tam ito nāśayāmasi ||

10.163.01a akṣibhyāṃ te nāsikābhyāṃ karṇābhyāṃ chubukād adhi |
 10.163.01c yakṣmaṃ śīrṣaṇyam mastiṣkāḥ jihvāyā vi vṛhāmi te ||
 10.163.02a grīvābhyas ta uṣṇihābhyaḥ kikasābhyo anūkyāt |
 10.163.02c yakṣmaṃ doṣaṇyam aṃsābhyāṃ bāhubhyāṃ vi vṛhāmi te ||
 10.163.03a āntrebhyas te gudābhyo vaniṣṭhor hṛdayād adhi |
 10.163.03c yakṣmam matasnābhyāṃ yaknaḥ plāśibhyo vi vṛhāmi te ||
 10.163.04a ūrubhyāṃ te aṣṭhivadbhyāṃ pārṣṇibhyāṃ prapadābhyāṃ |
 10.163.04c yakṣmaṃ śronibhyāṃ bhāsadād bhaṃsaso vi vṛhāmi te ||
 10.163.05a mehanād vanaṃkaraṇāl lomabhyas te nakhebhyaḥ |
 10.163.05c yakṣmaṃ sarvasmād ātmanas tam idam vi vṛhāmi te ||
 10.163.06a aṅgād-aṅgāl lomno-lomno jātam parvaṇi-parvaṇi |
 10.163.06c yakṣmaṃ sarvasmād ātmanas tam idam vi vṛhāmi te ||

10.164.01a apehi manasas pate 'pa krāma paraś cara |
 10.164.01c paro nirṛtyā ā cakṣva bahudhā jīvato manaḥ ||
 10.164.02a bhadraṃ vai varam vṛṇate bhadraṃ yuñjanti dakṣiṇam |
 10.164.02c bhadraṃ vaivasvate cakṣur bahutrā jīvato manaḥ ||
 10.164.03a yad āśasā niḥśasābhiśasopārīma jāgrato yat svapantaḥ |
 10.164.03c agnir viśvāny apa duṣkṛtāny ajuṣṭāny āre asmad dadhātu ||
 10.164.04a yad indra brahmaṇas pate 'bhidrohaṃ carāmasi |
 10.164.04c pracetā na āṅgirasō dviṣatām pātv aṃhasaḥ ||
 10.164.05a ajaiṣmādyāsanāma cābhūmānāgaso vayam |
 10.164.05c jāgratsvapnaḥ saṃkalpaḥ pāpo yaṃ dviṣmas taṃ sa ṛchatu yo no dveṣṭi tam
 ṛchatu ||

10.165.01a devāḥ kapota iṣito yad ichan dūto nirṛtyā idam ājagāma |
 10.165.01c tasmā arcāma kṛṇavāma niṣkṛtiṃ śaṃ no astu dvipade śaṃ catuṣpade ||
 10.165.02a śivaḥ kapota iṣito no astv anāgā devāḥ śakuno gṛheṣu |
 10.165.02c agnir hi vipro juṣatām havir naḥ pari hetih pakṣiṇī no vṛṇaktu ||
 10.165.03a hetih pakṣiṇī na dabhāty asmān aṣṭryām padaṃ kṛṇute agnidhāne |
 10.165.03c śaṃ no gobhyaś ca puruṣebhyaś cāstu mā no hiṃsīd iha devāḥ kapotaḥ ||
 10.165.04a yad ulūko vadati mogham etad yat kapotaḥ padam agnau kṛṇoti |
 10.165.04c yasya dūtaḥ prahita eṣa etat tasmai yamāya namo astu mṛtyave ||
 10.165.05a ṛcā kapotaṃ nudata praṇodam iṣam madantaḥ pari gāṃ nayadhvam |
 10.165.05c saṃyopayanto duritāni viśvā hitvā na ūrjam pra patāt patiṣṭhaḥ ||

10.166.01a ṛṣabham mā samānānāṃ sapatnānāṃ viśāsahim |
 10.166.01c hantāraṃ śatrūṇāṃ kṛdhi virājaṃ gopatiṃ gavām ||
 10.166.02a aham asmi sapatnahendra ivāriṣṭo akṣataḥ |
 10.166.02c adhaḥ sapatnā me pador ime sarve abhiṣṭhitāḥ ||
 10.166.03a atraiva vo 'pi nahyāmy ubhe ārtñi iva jyayā |
 10.166.03c vācas pate ni ṣedhemān yathā mad adharaṃ vadān ||
 10.166.04a abhibhūr aham āgamaṃ viśvakarmaṇa dhāmnā |
 10.166.04c ā vaś cittam ā vo vratam ā vo 'haṃ samitiṃ dade ||
 10.166.05a yogakṣemaṃ va ādāyāham bhūyāsam uttama ā vo mūrdhānam akramīm |
 10.166.05d adhaspadān ma ud vadata maṇḍūkā ivodakān maṇḍūkā udakād iva ||

10.167.01a tubhyedam indra pari śicyate madhu tvam sutasya kalaśasya rājasi |
 10.167.01c tvam rayim puruvīrām u nas kṛdhi tvam tapaḥ paritapyājayaḥ svaḥ ||
 10.167.02a svarjitam mahi mandānam andhaso havāmahe pari śakraṃ sutām upa |
 10.167.02c imaṃ no yajñam iha bodhy ā gahi spṛdho jayantam maghavānam imahe ||
 10.167.03a somasya rājño varuṇasya dharmaṇi bṛhaspater anumatyā u śarmaṇi |
 10.167.03c tavāham adya maghavann upastutau dhātar vidhātaḥ kalaśām abhakṣayam ||
 10.167.04a prasūto bhakṣam akaraṃ carāv api stomaṃ cemam prathamah sūrir un mṛje |
 10.167.04c sute sātēna yady āgamaṃ vām prati viśvāmitrajamadagnī dame ||

10.168.01a vātasya nu mahimānam rathasya rujann eti stanayann asya ghoṣaḥ |
 10.168.01c divispr̥g yāty aruṇāni kṛṇvann uto eti pṛthivyā reṇum asyan ||
 10.168.02a sam prerate anu vātasya viṣṭhā ainam gachanti samanam na yoṣāḥ |
 10.168.02c tābhiḥ sayuk saratham deva iyate 'sya viśvasya bhuvanasya rājā ||
 10.168.03a antarikṣe pathibhir iyamāno na ni viśate katamac canāhaḥ |
 10.168.03c apām sakhā prathamajā ṛtāvā kva svij jātaḥ kuta ā babhūva ||
 10.168.04a ātmā devānām bhuvanasya garbho yathāvaśam carati deva eṣaḥ |
 10.168.04c ghoṣā id asya śṛṇvire na rūpaṃ tasmai vātāya haviṣā vidhema ||

10.169.01a mayobhūr vāto abhi vātūsrā ūrjasvatir ośadhīr ā riśantām |
 10.169.01c pīvasvatir jīvadhanyāḥ pibantv avasāya padvate rudra mṛḍa ||
 10.169.02a yāḥ sarūpā virūpā ekarūpā yāsām agnir iṣṭyā nāmāni veda |
 10.169.02c yā aṅgirasas tapaseha cakrus tābhyaḥ parjanya mahi śarma yacha ||
 10.169.03a yā deveṣu tanvam airayanta yāsām somo viśvā rūpāni veda |
 10.169.03c tā asmabhyam payasā pinvamānāḥ prajāvatir indra goṣṭhe rirīhi ||
 10.169.04a prajāpatir mahyam etā rarāṇo viśvair devaiḥ pitṛbhiḥ samvidānaḥ |
 10.169.04c śivāḥ satir upa no goṣṭham ākas tāsām vayam prajāyā sam sadema ||

10.170.01a vibhrād bṛhat pibatu somyam madhv āyur dadhad yajñapatāv avihrutam |
 10.170.01c vātajūto yo abhirakṣati tmanā prajāḥ pupoṣa purudhā vi rājati ||
 10.170.02a vibhrād bṛhat subhṛtam vājasātamaṃ dharman divo dharuṇe satyam arpitam |
 10.170.02c amitrahā vṛtrahā dasyuhantamaṃ jyotir jajñe asurahā sapatnahā ||
 10.170.03a idam śreṣṭham jyotiṣām jyotir uttamaṃ viśvajid dhanajid ucyate bṛhat |
 10.170.03c viśvabhrād bhrājo mahi sūryo dṛśa uru paprathe saha ojo acyutam ||
 10.170.04a vibhrājañ jyotiṣā svar agacho rocanam divaḥ |
 10.170.04c yenemā viśvā bhuvanāny ābhṛtā viśvakarmaṇā viśvadevyāvatā ||

10.171.01a tvam tyam itato ratham indra prāvaḥ sutāvataḥ |
 10.171.01c aśṛṇoḥ somino havam ||
 10.171.02a tvam makhasya dodhataḥ śiro 'va tvaco bharaḥ |
 10.171.02c agachaḥ somino gṛham ||
 10.171.03a tvam tyam indra martyam āstrabudhnāya venyam |
 10.171.03c muhuḥ śrathnā manasyave ||
 10.171.04a tvam tyam indra sūryam paścā santam puras kṛdhi |

10.171.04c devānām cit tiro vaśam ||

10.172.01a ā yāhi vanasā saha gāvaḥ sacanta vartaniṃ yad ūdhabhiḥ ||

10.172.02a ā yāhi vasvyā dhiyā maṃhiṣṭho jārayanmakhaḥ sudānubhiḥ ||

10.172.03a pitubhr̥to na tantum it sudānavaḥ prati dadhmo yajāmasi ||

10.172.04a uṣā apa svasus tamaḥ saṃ vartayati vartaniṃ sujātātā ||

10.173.01a ā tvāhārṣam antar edhi dhruvas tiṣṭhāvicācaliḥ |

10.173.01c viśas tvā sarvā vāñchantu mā tvad rāṣṭram adhi bhraśat ||

10.173.02a ihaivaidhi māpa cyoṣṭhāḥ parvata ivāvicācaliḥ |

10.173.02c indra iveha dhruvas tiṣṭheha rāṣṭram u dhāraya ||

10.173.03a imam indro adīdharad dhruvaṃ dhruveṇa haviṣā |

10.173.03c tasmai somo adhi bravat tasmā u brahmaṇas patiḥ ||

10.173.04a dhruvā dyaur dhruvā pṛthivī dhruvāsaḥ parvatā ime |

10.173.04c dhruvaṃ viśvam idaṃ jagad dhruvo rājā viśām ayam ||

10.173.05a dhruvaṃ te rājā varuṇo dhruvaṃ devo bṛhaspatiḥ |

10.173.05c dhruvaṃ ta indras cāgniś ca rāṣṭram dhārayatām dhruvam ||

10.173.06a dhruvaṃ dhruveṇa haviṣābhi somam mṛśāmasi |

10.173.06c atho ta indraḥ kevalīr viśo balihṛtas karat ||

10.174.01a abhivartena haviṣā yenendro abhivāvṛte |

10.174.01c tenāsmān brahmaṇas pate 'bhi rāṣṭrāya vartaya ||

10.174.02a abhivṛtya sapatnān abhi yā no arātayaḥ |

10.174.02c abhi pṛtanyantaṃ tiṣṭhābhi yo na irasyati ||

10.174.03a abhi tvā devaḥ savitābhi somo avivṛtat |

10.174.03c abhi tvā viśvā bhūtāny abhivarto yathāsasi ||

10.174.04a yenendro haviṣā kṛtvya abhavad dyumny uttamaḥ |

10.174.04c idaṃ tad akri devā asapatnaḥ kilābhuvam ||

10.174.05a asapatnaḥ sapatnahābhirāṣṭro viśāsahiḥ |

10.174.05c yathāham eṣām bhūtānām virājāni janasya ca ||

10.175.01a pra vo grāvāṇaḥ savitā devaḥ suvatu dharmaṇā |

10.175.01c dhūrṣu yujyadhvaṃ sunuta ||

10.175.02a grāvāṇo apa duchunām apa sedhata durmatim |

10.175.02c usrāḥ kartana bheṣajam ||

10.175.03a grāvāṇa upareṣv ā mahiyante sajoṣasaḥ |

10.175.03c vṛṣṇe dadhato vṛṣṇyam ||

10.175.04a grāvāṇaḥ savitā nu vo devaḥ suvatu dharmaṇā |

10.175.04c yajamānāya sunvate ||

10.176.01a pra sūnava ṛbhūṇām bṛhan navanta vṛjanā |

10.176.01c kṣāmā ye viśvadhāyaso 'śnan dhenum na mātaram ||

10.176.02a pra devaṃ devyā dhiyā bharatā jātavedasam |

10.176.02c havyā no vakṣad ānuṣak ||

- 10.176.03a ayam u şya pra devayur hotā yajñāya nīyate |
 10.176.03c ratho na yor abhivṛto ghr̥ṇivāñ cetati tmanā ||
 10.176.04a ayam agnir uruṣyaty amṛtād iva janmanaḥ |
 10.176.04c sahasāś cid sahīyān devo jīvātave kṛtaḥ ||
- 10.177.01a patamgam aktam asurasya māyayā hṛdā paśyanti manasā vipaścitaḥ |
 10.177.01c samudre antaḥ kavayo vi cakṣate marīcinām padam ichanti vedhasaḥ ||
 10.177.02a patamgo vācam manasā bibharti tām gandharvo 'vadaḥ garbhe antaḥ |
 10.177.02c tām dyotamānām svaryam manīṣām ṛtasya pade kavayo ni pānti ||
 10.177.03a apaśyam gopām anipadyamānam ā ca parā ca pathibhiś carantam |
 10.177.03c sa sadhrīcīḥ sa viṣūcīr vasāna ā varīvartī bhuvaneṣv antaḥ ||
- 10.178.01a tyam ū ṣu vājinam devajūtam sahāvānam tarutāram rathānām |
 10.178.01c ariṣṭanemim pṛtanājam āsum svastaye tārkṣyam ihā huvema ||
 10.178.02a indrasyeva rātim ājohuvānāḥ svastaye nāvam ivā ruhema |
 10.178.02c urvī na pṛthvī bahule gabhīre mā vām etau mā paretau riṣāma ||
 10.178.03a sadyāś cid yaḥ śavasā pañca kṛṣṭiḥ sūrya iva jyotiṣāpas tatāna |
 10.178.03c sahasrasāḥ śatasā asya ramhir na smā varante yuvatim na śaryām ||
- 10.179.01a ut tiṣṭhatāva paśyatendrasya bhāgam ṛtviyam |
 10.179.01c yadi śrāto juhōtana yady aśrāto mamattana ||
 10.179.02a śrātam havir o ṣv indra pra yāhi jagāma sūro adhvano vimadhyam |
 10.179.02c pari tvāsate nidhibhiḥ sakhāyaḥ kulapā na vrājapatim carantam ||
 10.179.03a śrātam manya ūdhanī śrātam agnau suśrātam manye tad ṛtam navīyaḥ |
 10.179.03c mādhyamdinasya savanasya dadhnaḥ pibendra vajrin purukṛj juṣānaḥ ||
- 10.180.01a pra sasāhiṣe puruhūta śatrūñ jyeṣṭhas te śuṣma iha rātir astu |
 10.180.01c indrā bhara dakṣiṇenā vasūni patiḥ sindhūnām asi revatīnām ||
 10.180.02a mṛgo na bhīmaḥ kucaro giriṣṭhāḥ parāvata ā jaganthā parasyāḥ |
 10.180.02c sṛkam saṁśāya pavim indra tigmaḥ vi śatrūn tādhi vi mṛdho nudasva ||
 10.180.03a indra kṣatram abhi vāmam ojo 'jāyathā vṛṣabha carṣaṇīnām |
 10.180.03c apānudo janam amitrayantam urum devebhyo akṛṇor ulokam ||
- 10.181.01a prathas ca yasya saprathas ca nāmānuṣṭubhasya haviṣo havir yat |
 10.181.01c dhātur dyutānāt savitūś ca viṣṇo rathamtaram ā jabhārā vasiṣṭhaḥ ||
 10.181.02a avindan te atihitam yad āsīd yajñasya dhāma paramam guhā yat |
 10.181.02c dhātur dyutānāt savitūś ca viṣṇor bharadvājo bṛhad ā cakre agneḥ ||
 10.181.03a te 'vindan manasā dīdhyānā yaju śkannam prathamam devayānam |
 10.181.03c dhātur dyutānāt savitūś ca viṣṇor ā sūryād abharan gharmam ete ||
- 10.182.01a bṛhaspatir nayatu durgahā tiraḥ punar neṣad aghaśaṁsāya manma |
 10.182.01c kṣipad aśastim apa durmatim hann athā karad yajamānāya śam yoḥ ||
 10.182.02a narāśaṁso no 'vatu prayāje śam no astv anuyājo haveṣu |

10.182.02c kṣīpad aśastim apa durmatim hann athā karad yajamānāya śam yoḥ ||
10.182.03a tapurmūrdhā tapatu rakṣaso ye brahmadviṣaḥ śarave hantavā u |
10.182.03c kṣīpad aśastim apa durmatim hann athā karad yajamānāya śam yoḥ ||

10.183.01a apaśyaṃ tvā manasā cekitānaṃ tapaso jātaṃ tapaso vibhūtam |
10.183.01c iha prajāṃ iha rayim rarāṇaḥ pra jāyasva prajāyā putrakāma ||
10.183.02a apaśyaṃ tvā manasā dīdhyanāṃ svāyāṃ tanū ṛtve nādhamānām |
10.183.02c upa mām uccā yuvatir babhūyāḥ pra jāyasva prajāyā putrakāme ||
10.183.03a ahaṃ garbham adadhām ośadhīṣv ahaṃ viśveṣu bhuvaneṣv antaḥ |
10.183.03c aham prajā ajanayam pṛthivyām ahaṃ janibhyo aparīṣu putrān ||

10.184.01a viṣṇur yoniṃ kalpayatu tvaṣṭā rūpāṇi piṃśatu |
10.184.01c ā siñcatu prajāpatir dhātā garbham dadhātu te ||
10.184.02a garbham dhehi sinīvāli garbham dhehi sarasvati |
10.184.02c garbham te aśvinau devāv ā dhattām puṣkarasrajā ||
10.184.03a hiraṇyayī araṇi yaṃ nirmanthato aśvinā |
10.184.03c taṃ te garbham havāmahe daśame māsi sūtave ||

10.185.01a mahi trīṇām avo 'stu dyukṣam mitrasyāryamaṇaḥ |
10.185.01c durādharṣaṃ varuṇasya ||
10.185.02a nahi teṣām amā cana nādhasu vāraṇeṣu |
10.185.02c īśe ripur aghaśaṃsaḥ ||
10.185.03a yasmai putrāso aditeḥ pra jīvase martyāya |
10.185.03c jyotir yachanty ajasram ||

10.186.01a vāta ā vātu bheṣajaṃ śambhu mayobhu no hṛde |
10.186.01c pra ṇa āyūṃṣi tāriṣat ||
10.186.02a uta vāta pitāsi na uta bhrātota naḥ sakhā |
10.186.02c sa no jīvātave kṛdhi ||
10.186.03a yad ado vāta te gṛhe 'mṛtasya nidhir hitaḥ |
10.186.03c tato no dehi jīvase ||

10.187.01a prāgnaye vācam īraya vṛṣabhāya kṣitinām |
10.187.01c sa naḥ parṣad ati dviṣaḥ ||
10.187.02a yaḥ parasyāḥ parāvatas tiro dhanvātirocate |
10.187.02c sa naḥ parṣad ati dviṣaḥ ||
10.187.03a yo rakṣāṃsi nijūrvati vṛṣā śukreṇa śociṣā |
10.187.03c sa naḥ parṣad ati dviṣaḥ ||
10.187.04a yo viśvābhi vipaśyati bhuvanā sam ca paśyati |
10.187.04c sa naḥ parṣad ati dviṣaḥ ||
10.187.05a yo asya pāre rajasaḥ śukro agnir ajāyata |
10.187.05c sa naḥ parṣad ati dviṣaḥ ||

10.188.01a pra nūnaṃ jātavedasam aśvaṃ hinota vājinam |
10.188.01c idaṃ no barhir āsade ||
10.188.02a asya pra jātavedaso vipravīrasya mīdhuṣaḥ |
10.188.02c mahīm iyarmi suṣṭutim ||
10.188.03a yā ruco jātavedaso devatrā havyvāhaniḥ |
10.188.03c tābhir no yajñam invatu ||

10.189.01a āyaṃ gauḥ pṛśnir akramīd asadan mātaram puraḥ |
10.189.01c pitaraṃ ca prayan svaḥ ||
10.189.02a antaś carati rocanāsya prāṇād apānatī |
10.189.02c vy akhyan mahiṣo divam ||
10.189.03a triṃśad dhāma vi rājati vāk patamgāya dhiyate |
10.189.03c prati vastor aha dyubhiḥ ||

10.190.01a ṛtaṃ ca satyaṃ cābhiddhāt tapaso 'dhy ajāyata |
10.190.01c tato rātry ajāyata tataḥ samudro arṇavaḥ ||
10.190.02a samudrād arṇavād adhi saṃvatsaro ajāyata |
10.190.02c ahorātrāṇi vidadhad viśvasya miṣato vaśī ||
10.190.03a sūryācandramasau dhātā yathāpūrvam akalpayat |
10.190.03c divaṃ ca pṛthiviṃ cāntarikṣam atho svaḥ ||

10.191.01a saṃ-sam id yuvase vṛṣann agne viśvāny arya ā |
10.191.01c iḍas pade sam idhyase sa no vasūny ā bhara ||
10.191.02a saṃ gachadhvaṃ saṃ vadadhvaṃ saṃ vo manāṃsi jānatām |
10.191.02c devā bhāgaṃ yathā pūrve saṃjānānā upāsate ||
10.191.03a samāno mantraḥ samitiḥ samānī samānam manaḥ saha cittam eṣām |
10.191.03c samānam mantram abhi mantraye vaḥ samānena vo haviṣā juhomi ||
10.191.04a samānī va ākūtiḥ samānā hṛdayāni vaḥ |
10.191.04c samānam astu vo mano yathā vaḥ susahāsati ||